

New Testament

Ledo Kaili Language

Ledo Kaili -Bible -New Testament

Matius	3	
Markus	101	
Lukas	161	
Yohanes	263	
Suro-Suro	341	
Roma	443	
1 Korintus	490	
2 Korintus	536	
Galatia	566	
Efesus	583	
Filipi	600	
Kolose	611	
1 Tesalonika	622	
2 Tesalonika	632	
1 Timotius	637	
2 Timotius	650	
Titus	659	
Filemon	665	
Ibrani	668	
Yakobus	702	
1 Petrus	713	
2 Petrus	726	
1 Yohanes	734	
2 Yohanes	746	
3 Yohanes	748	
Yudas	750	
Pompakita	754	

Ledo Kaili -Bible -New Testament

Matius

Matius 1

¹Iveimo sunju nu muli ntotua i Yesus Kristus, muli Magau Daud, muli i Abraham:

²i Abraham nomulika i Ishak, i Ishak nomulika i Yakub, i Yakub nomulika i Yehuda ntali sampesuvu,

³i Yehuda nomulika i Peres bo i Zerah (tinara i Tamar), i Peres nomulika i Hezron, i Hezron nomulika i Ram,

⁴i Ram nomulika i Aminadab, i Aminadab nomulika i Nahason, i Nahason nomulika i Salmon,

⁵i Salmon nomulika i Boas (tinana i Rahab), i Boas nomulika i Obed (tinana i Rut), i Obed nomulika i Isai,

⁶i Isai nomulika Magau Daud, Magau Daud nomulika i Salomo (tinana timbala i Uria),

⁷i Salomo nomulika i Rehabeam, i Rehabeam nomulika i Abia, i Abia nomulika i Asa,

⁸i Asa nomulika i Yosafat, i Yosafat nomulika i Yoram, i Yoram nomulika i Uzia,

⁹i Uzia nomulika i Yotam, i Yotam nomulika i Ahas, i Ahas nomulika i Hizkia,

¹⁰i Hizkia nomulika i Manasye, i Manasye nomulika i Amon, i Amon nomulika i Yosia,

¹¹i Yosia nomulika i Yekhonya ntali sampesuvuna napara tempona toYahudi nidagi bo niken i mpalai hau ri tana Babel.

¹²Nakava ri tana Babel, i Yekhonya nomulika i Sealtiel, i Sealtiel nomulika i Zerubabel,

¹³i Zerubabel nomulika i Abihud, i Abihud nomulika i Elyakim, i Elyakim nomulika i Azur,

¹⁴i Azur nomulika i Zadok, i Zadok nomulika i Akhim, i Akhim nomulika i Eliud,

¹⁵i Eliud nomulika i Eleazar, i Eleazar nomulika i Matan, i Matan nomulika i Yakub,

¹⁶i Yakub nomulika i Yusuf berei i Maria, bo i Maria noanaka i Yesus anu niuli i Kristus, haitumo Magau Topepakasalama anu nijanji nu Alatala.

¹⁷Jadi lako nte i Abraham sampe Magau Daud naria sapulu pata-ntapi mulina. Bo lako ri Daud sampe ri tempo toYahudi niken i mpalai hau ri tana Babel naria sapulu pata-ntapi muni. Bo lako ri tempo toYahudi niken i hau ri tana Babel sampe pompoanaka i Kristus naria sapulu pata-ntapi muni.

¹⁸Iveimo tesa pompoanaka i Yesus Kristus. TinaNa i Maria anu nijanji moberei ante langgai nosanga i Yusuf. Tapi dopame ira noberei, natianamo i Maria lako ri kuasa Nosa Gasa nu Alatala.

¹⁹I Yusuf, tengena, tona natutu nangoseaka atura agama. Haitu sampe ia nonia mombabole tengena i Maria. Tapi ledo nadota ia mompakaeya i Maria ri ngayo ntodea. Jadi patujuna mombabole i Maria nggalino-lino.

²⁰Tempo i Yusuf da nompekiri patujuna haitu, malaeka nTupu nakava riar pangipina bo nanguli ka ia, “Yusuf, muli i Daud, nee makini raramu mompoberei i Maria, sabana ngana nikatianakana najadi lako ri kuasa Nosa Gasa nu Alatala.

²¹I Maria mompoanaka saito ngana langgai, bo ngana haitu kana mupoposanga Yesus sabana Iamo mompakasalama todeana lako ri dosara.”

²²Haitu pura-pura najadi ala madupa tesa nTupu anu nipasimbayu nabiNa nggaulu ivei:

²³“Saito randaa matiana bo mompoanaka saito ngana langgai. Bo ngana haitu rapoposanga i Imanuel.” (Yesaya 7:14) (Immanuel riaru basa Ibrani batuana: “Alatala mosanggani ante kita.”)

²⁴Jadi nembangupa i Yusuf, nipovianamo anu niuli nu malaeka ka ia. Nipobereinamo i Maria,

²⁵tapi ira dopa nosampaturu dopame i Maria moanaka anana langgai haitu. Bo i Yusuf nompoposanga ngana haitu i Yesus.

Matius 2

¹I Yesus nipoanaka ri ngata Betlehem ri bagia Yudea. Tempo haitu Magau Herodes noparenta. Naupu pompoanaka i Yesus, nakavamo topande nanggita betue. Ira nakava lako ri mpandakena hau ri ngata Yerusalem,

²bo nekutanamo ira, “Ri umba Ia, anu majadi Magau ntoYahudi, anu dako nipoanaka? Nikita kami betueNa nebonda ri mpandakena bo kami nakava mombasomba Ia.”

³Nangepe tesa haitu natekajamo bo nasesa rara Magau Herodes, bo ivesia muni pura-pura tupu ngata Yerusalem.

⁴Jadi nipasiromu Magau Herodes puramo balengga-balengga ntopanggeni pesomba bo guru-guru agama bo nipekutanana, “Ri umba ngata rapompoanaka Magau Topepakasalama anu nijanji nu Alatala?”

⁵Nesana ira, “Ri ngata Betlehem ri bagia Yudea, sabana naria tesa nTupu nitulisi nu nabi nggaulu ivei:

⁶‘Iko, ngata Betlehem ri bagia Yudea, Nau ngata kodi, iko ngata nelabi nopoko ri panggita nu pakeni ntoYudea. Sabana lako nte iko kana meumba saito pakeni anu moevu todeaKu toIsrael.’ ” (Mikha 5:2)

⁷Naupu haitu Magau Herodes nompokio tona lako ri mpandakena haitu mosintomu nggalino ante ia, bo nipekutanana pakabelo-belo tempo peonga betue nipeintara haitu.

⁸Naupu haitu nitudunamo ira hau ri ngata Betlehem. Niulikana ira, “Koimo komiu hau ri ngata haitu bo elo pakabelo-belo ngana haitu. Bo ane rakavamiu ia, uli ka yaku, ala yaku muni hau mombasomba Ia.”

⁹Naupupa nangepe tesa magau haitu, nalaimo ira. Bo betue nipeintara ri mpandakena nokolu ka ira sampe nenonto ri toto nu banua niponturo nu ngana kodi haitu.

¹⁰Tempo nikitara betue haitu, nadamba mpuumo rarara.

¹¹Bo nesuamo ira riaru nu banua bo nikitara ngana kodi haitu ante tinana i Maria. Bo nantaputumo ira nombasomba Ia. Naupu haitu nibukaramo peti pomboli kakalumanara, bo nidekeira ka Ia pedekei-pedekeira, haitumo bulava, bo rongaya lana dupa nasuli mpuu alina, haitumo kemenyan bo mur.

¹²Naupu haitu, Alatala nompopainga ira riaru pangipira, ala nee manjili hau nte Magau Herodes. Jadi nalaimo ira hau manjili ri ngatara mboto nangoseaka dala ntanina.

¹³Nalaipa tona lako ri mpandakena, nakavamo saito malaeka nTupu riaru pangipi i Yusuf bo nanguli, “Pembangumo, kenimo ngana ntali tina haitu masalisa hau ri tana Mesir, sabana Magau Herodes mangelo ngana haitu rapatesina. Ponturomo hamai sampe yaku makava vai nte iko.”

¹⁴Jadi nembangumo i Yusuf bo bongi haitu nikenina ngana ntali tina nalai hau ri tana Mesir.

¹⁵Bo ira nonturo hamai sampe namate Magau Herodes. Ivesiamo kadupana tesa nTupu nipasimbayu nu nabi nggaulu ivei: “Yaku nompokio anaKu mesuvu lako ri tana Mesir.”

¹⁶Nisani Magau Herodespa ia niakalani ntopande nanggita betue haitu, nagigi mpuumo rarana. Bo nituduna tantarana hau mompatesi pura-pura ngana langgai noumuru rompae bo anu dopa nagana rompae ri ngata Betlehem bo ri ngata-ngata ri sinjorina. Umuru nu ngana nipatesi nangoseaka kasaena peonga betue nipeinta ntopande nanggita betue pangane.

¹⁷Ante kajadia haitu nadupamo tesa nTupu nipasimbayu Nabi Yeremia nggaulu ivei:

¹⁸“Ri ngata Rama niepe suara ntopotumangi nabuku mpuu rarana. Haitumo i Rahel nantangisi ana-anana. Ledo nadota ia rapakavoe rarana sabana anana domo naria.” (Yeremia 31:15)

¹⁹Naliu Magau Herodes namate, i Yusuf da nonturo ri Mesir. Nakavamo saito malaeka nTupu riaru pangipina

²⁰ nanguli, “Pembangumo! Kenimo ngana ntali tina haitu hau manjili ri tana Israel, sabana namatemo tona madota mompatesi Ia.”

²¹Jadi nembangumo i Yusuf bo nikeninamo i Maria ntali ana manjili hau ri tana Israel.

²²Tapi niepenapa i Arkelaus, ana Magau Herodes nanjambei tuamana nompamenta bagia Yudea, naekamo rarana mapola. Alatala notesa vai ka ia riaru pangipina, jadipa napolamo ira hau ri bagia Galilea.

²³Bo nonturomo ira ri ngata nosanga Nazaret. Ivesiamo kadupana tesa nTupu nipasimbayu nabi-nabi nggaulu ivei: “Ia rauli ntona toNazaret.”

Matius 3

¹Bara sakuya mpae kaliuna haitu, nompamulamo i Yohanes Topediu nompatuduki ri karava bai ri bagia Yudea.

²Niulina, “Kajeamo lako ri dosamiau sabana naparamo tempona Alatala mompamula nompamenta mpo Magau!”

³I Yohanes hitumo niuli Nabi Yesaya riaru Buku Gasa ivei: “Naria tona nongarengare ri karava bai ivei: Pakasadiamo dala ka Tupu! Pakanoa dala raoseNa!” (Yesaya 40:3)

⁴I Yohanes haitu nopakea baju nitanu lako ri bulu unta. Ia nosulepe kulimba bo kandeanu nggaboro bo manisa.

⁵Nadeamo tona nakava nte ia lako ri ngata Yerusalem bo njumangu bagia Yudea bo pura-pura bagia napara Binangga Yordan.

⁶Ira nompangaku dosara bo ira nidiuna ri Binangga Yordan tanda najeamo lako ri dosara.

⁷Nadea toFarisi bo toSaduki nakava mekidu nte i Yohanes. Tapi tempo i Yohanes nanggita ira, nanguli ia, “Komu noakala nasimbayu eva ule! Nisarumakamiu ane komu radiu, komu ledo rapambela pehuku nu Alatala bara maipia! Tapi ledo nakana!

⁸Ane mpuu-mpuu komu najea lako ri dosamiu, popakitamo ante pokainggu nabelo.

⁹Nee rapekirimiu, ‘Kami hii muli i Abraham. Pehuku nu Alatala ledo rapambela ka kami.’ Haitu ledo muni nakana! Kuuli ka komu, ane Alatala madota, nau watu-watu hitu mamala rapajadiNa muli i Abraham.

¹⁰Pehuku nu Alatala nasimbayu eva baliu, nasadiamo raportovo kayu sampe ri kalena ane ledo naria vuana nabelo. Kayu ledo nabelo vuana ratovosi bo ratedaka ri mata nu apu.

¹¹Yaku mombadiu komu ante uve, tandana najeamo komu lako ri dosamiu. Tapi da nariapa saito ngena tona meonga nelabipa kakuasaNa pade yaku. Naogepa Ia pade yaku sampe nau manggeni sapatuNa ledo masipato yaku. Ia mombadiu komu ante Nosa Gasa nu Alatala bo apu.

¹²Ia nasimbayu eva tona novaro pae. Nasadiamo Ia ante tapi ri paleNa bo ravarona paeNa sampe magasa. Pae naisi raboliNa riara gampiriNa, tapi meena rapalabusiNa riara apu anu ledo mapaya-paya.”

¹³Tempo haitu nakavamo i Yesus lako ri bagia Galilea hau ri Binangga Yordan ala radiu i Yohanes.

¹⁴Tapi i Yohanes madota mompoara perapiNa haitu. Niulina, “Kakanana yakumo anu masipato radiuMiu. Berimba sampe Komu makava mekidu nte yaku?”

¹⁵Tapi nangulimo i Yesus ka ia, “Diumo Yaku, sabana ivesiamo kita mompakadupa pura-pura anu nipodota nu Alatala.” Nangepe pesanaNa haitu, nadota mpuumo i Yohanes nombadiu i Yesus.

¹⁶Naupu nidiu, nesoremo i Yesus lako ri uve. Bo eva nisuka tempona haitu muni langi natebuka bo nikitaNa Nosa Gasa nu Alatala nolenje mpo tonji banggebodo nanau bo netuu nte Ia.

¹⁷Bo naria suara lako ri suruga nanguli, “Hitumo AnaKu nipotoveKu. Iamo nompakadamba raraKu.”

Matius 4

¹¹¹Naupu haitu i Yesus niken i Nosa Gasa nu Alatala hau nantende ri karava bai ala rapesori Magau nu Seta.

²Hamai patapulu eo bo patapulu mbongi i Yesus nopuasa. Naupu haitu naara mpuumo taiNa.

³Bo nakavamo Magau nu Seta nanggaparai Ia bo nanguli, “Ane Komiu Ana nu Alatala, tudumo vatu-vatu hitu majadi kande!”

⁴Tapi nesana i Yesus, “Naria nitulisi riaru Buku Gasa ivei: ‘Ledo aga kandea mompakatuvu manusia. Tapi pangoseakara pura-pura tesa nisovadaka nu Alatala, haitumo nompakatuvu manusia.’”

⁵Naupu haitu i Yesus niken i nu Magau Setamo hau ri ngata Yerusalem, ngata nagasa, bo nituuna ri vumbu Banua nu Alatala.

⁶Bo niulina ka i Yesus, “Ane Komiu mpuu Ana nu Alatala, potingganavumo Komiu lako rahitu hau ri tana. Ledo makuya Komiu sabana riaru Buku Gasa nitulisi ivei: ‘Alatala mombatudu malaekana mombasaliku Komiu. Ratandera mpale Komiu ala nau kadaMiu ledo mambela vatu.’ ” (Mazmur 91:11-12)

⁷Nesana i Yesus, “Naria muni nitulisi riaru Buku Gasa ivei: ‘Nee mupesori Alatala, Tupumu!’”

⁸Naupu haitu, Magau nu Seta nanggeni i Yesus hau ri tutu nu bulu nelabi kalangana. Bo nipopakitana ka Ia pura-pura kamagaua bo poparenta naria riaru dunia hitu ante mpengaya-ngaya kagayana bo kakalumanana.

⁹Bo niulina ka Ia, “Pura-pura haitu kudekei ka Komiu ane Komiu mantaputu mombasomba yaku.”

¹⁰Tapi nesanamo i Yesus ka ia, “He, Magau nu Seta! Palaimo iko lako ri sii. Sabana nitulisi riara Buku Gasa ivei: ‘Komiu kana mombasomba Alatala, Tupumiu. Aga Iamo masipato rapetupumiu.’”

¹¹Naliu haitu, nalaimo Magau nu Seta lako nte i Yesus, bo nakavamo malaeka-malaeka nTupu mompatala Ia.

¹²Naupu sia i Yohanes Topedi nitarunggu. Niepe i Yesuspa karebana, nanjilimo Ia hau ri bagia Galilea.

¹³Nakava ri bagia Galilea nolinjamo Ia lako ri ngata Nazaret hau nonturo ri ngata Kapernaum ri bivi Rano Galilea ri tana muli i Zebulon bo i Naftali.

¹⁴NipoviaNa ivesia ala madupamo tesa nTupu nipasimbayu Nabi Yesaya nggaulu ivei:

¹⁵“Komiu toponturo ri tana muli i Zebulon bo i Naftali, ri dala hau ri rano ri sambote Binangga Yordan! Komiu toponturo ri bagia Galilea, ngata ntona ledoto Yahudi!

¹⁶Bara ipia komiu nonturo ri kalandana bo dosa, tapi sii-sii nikitamiumo reme nu Alatala. Bara ipia komiu natuvu naeka ka kamatea, tapi sii-sii komiu nivanta nu rememo.” (Yesaya 9:1-2 17) Lako ri tempo haitu nompamulamo i Yesus nompatolele ka tona ivei: “Kajeamo lako ri dosamiu, sabana naparamo tempona Alatala moparenta mpo Magau.”

¹⁸Naria sanggani i Yesus nolipa ri tinggi Rano Galilea. NikitaNa hamai randua tona ntali sampesuvu, haitumo i Simon, anu nidae i Petrus, ante tueina i Andreas. Tempo haitu ira nantendeaka jala mompemala bau ri rano haitu sabana ira topebau mami.

¹⁹Nanguli i Yesus ka ira, “Kamaimo, oseakamo Yaku, bo Kupatuduki komiu mangelo tona ntanina majadi topangoseaka Yaku.”

²⁰Nangepe haitu, kaliu-liu nipalaisiramo jalara ri sia bo hau nioseakaramo i Yesus.

²¹Lako ri situ napolamo i Yesus sampe nikitaNa randuapa tona ntali sampesuvu, haitumo i Yakobus bo i Yohanes, ana-ana i Zebedeus. Tempo haitu ira nompakabelo jalara riara sakaya nosangani ante tuamara i Zebedeus. I Yesus nompokio ira randua mangoseaka Ia.

²²Nangepe haitu, kaliu-liu nipalaisiramo sakayara ante tuamara bo hau niouseakaramo i Yesus.

²³I Yesus hau nompebutu ngata ri bagia Galilea. Ri ngata-ngata haitu Ia nompatuduki tona ri banua-banua petupu ntoYahudi bo nipatoleleNa Kareba Belo, anu notesaki Poparenta nu Alatala. Bo nipakabeloNa tona nadua mpengaya-ngaya.

²⁴Kareba povia i Yesus haitu natolele ri umba-umba bagia Siria, sampe tona nanggeni ka Ia pura-pura roara nambela dua mpengaya, tona nipesua nu seta, torompate bo tona nakoyo. Bo i Yesus nompakabelo ira pura-pura bo nipopalaiNa puramo seta.

²⁵Nadea mpuu tona nantuntuni Ia. Naria tona lako ri bagia Galilea, bagia Sapulu Ngata, ngata Yerusalem, bagia Yudea bo naria muni tona lako ri sambote Binangga Yordan.

Matius 5

¹Tempo i Yesus nanggita todea haitu, nantendemo Ia hau ri bulu. Nonturopa Ia ri sia, nakavamo topangoseaka Ia.

²Pade nompamulamo Ia nompatuduki ira ivei:

³“Nabelo mpuumo tona nisanina ledo rapakulena mompakasalama karon mboto bo aga nanjarumaka Tupu, sabana iamo najadi todea riara Poparenta nu Alatala.

⁴Nabelo mpuumo tona nabuku rarana, sabana Alatala mompakavoe rarana.

⁵Nabelo mpuumo tona naede rarana, sabana ia mantarima pura-pura anu nijanji nu Alatala ka todeaNa.

- ⁶Nabelo mpuumo tona naino rarana matuvu manoa ri panggita nu Alatala, sabana Alatala mbotomo mompopapakule ia matuvu manoa.
- ⁷Nabelo mpuumo tona naasi matana nanggita roana, sabana iamo rapoasi nu Alatala.
- ⁸Nabelo mpuumo tona nagasa bo naliangu rarana, sabana iamo manggita Alatala.
- ⁹Nabelo mpuumo tona nompoposinggabelo roa, sabana iamo rauli nu Alatala anaNa.
- ¹⁰Nabelo mpuumo tona nipandasa sabana novia anu nanao ri panggita nu Alatala. Iamo majadi todea riaro Poparenta nu Alatala.
- ¹¹Nabelo mpuumo ane komiu rasalai atau rapandasa atau rarai ntona sabana komiu topangoseaka Yaku.
- ¹²Ivesia muni nipoviara ka nabi-nabi nggaulu. Jadi kadamba-dambamo raramiu ane tutu majadi nte komiu sabana naoge mpuu belo nipakasadia ka komiu ri suruga.”
- ¹³“Komiu nasimbayu eva gara ri dunia. Tapi ane gara mamolimo, berimba mompakapagana mpanjili! Natantu gara haitu domo ria gunana, bo aga ratedaka bo rajeje-jeje ntona.
- ¹⁴Komiu nasimbayu eva reme nombavanta dunia. Ngata ri bavo bulu ledo namala ratabuniaka.
- ¹⁵Ivesia muni ante poindo. Ledo ria tona nombatunju poindo bo niloduna ntonda! Natantu poindo haitu rabolina ri kalangana, ala pura-pura tona riaro banua ravanta nu remena.
- ¹⁶Ivesia muni reme anu naria riaro ntaimiu, nee ratabuniaka! Komiu kana matuvu ante pokainggu nabelo ala tona ntaina mamala manggita pokainggumiu haitu bo mantoiya Tuamamiu ri suruga.”

¹⁷“Nee rapekirimiu Yaku hii nakava mompakaropu Atura-atura agama nitulisi i Musa bo pepatuduki nu nabi-nabi. Yaku ledo nakava mompakaropuna tapi ala mompopakita kadupana.

¹⁸Pariaramo tesaKu hitu! Ane da maria langi bo tana, ledo ria malipo sambelaa lako ri Atura-atura haitu, nau sangu hurupu atau santiti ledo ntoto. Kana madupa puramo.

¹⁹Jadi, isema-sema nombaliunaka nau aga sambela lako ri parenta riara Atura-atura haitu, nau parenta anu nakodi ntoto, bo mompatuduki tona ntanina nombaliunaka muni, ia rareke tona nelabipa kakodina riara Poparenta nu Alatala. Tapi isema-sema nangoseaka Atura-atura haitu bo nipatudukina ka tona ntanina mangoseakana muni, iamo rareke tona nelabi kaogena riara Poparenta nu Alatala.

²⁰Pariaramo tesaKu hitu! Komiu kana matutupa nangoseaka dota nTupu pade guru-guru agama bo toFarisi. Ane ledo, komiu ledo ntoto mamala majadi todea riara Poparenta nu Alatala.”

²¹“Natantu niepemiumo pepatuduki ntotuata nggaulu ivei: ‘Nee mepatesi! Isema-sema mepatesi masipato ratangara.’

²²Tapi Kuuli ka komiu, isema-sema narau rarana nte sampesuvuna masipato ratangara. Bo isema-sema nanjalai sampesuvuna masipato raposintingayo ri Polibu Mbaso Agama. Tapi isema-sema manguli ka sampesuvuna, ‘Kanavumo ri narakaa iko!’ ia haitumo masipato ratedaka riara apu narakaa.

²³Sabana haitu, ane rapana komiu hau ri lanta pesomba manggeni pesombamiu ka Alatala, bo ratoramiu naria sampesuvumiu nadua rarana nte komiu,

²⁴boli ntanimo ruru pesombamiu haitu ri ngayo lanta pesomba, bo koimo mosinggabelo ante sampesuvumiu. Maupu haitu pade manjili komiu mombadekei pesombamiu ka Alatala.

²⁵Ane maria tona mompangadu komiu, masalisa mosinggabelo mpanjili ante ia dopame komiu makava ri ngayo ntopotangara. Sabana, ane komiu ledo mosinggabelo ante ia, natantumoa ia mompangadu komiu nte topotangara, bo

topotangara haitu mombadekei komiu ka polisi, bo polisi mombasuaraka komiu riara ntarunggu.

²⁶Pariaramo tesaKu hitu! Natantumo komiu ledo rasuvuraka lako riara ntarunggu haitu ane dopa nibayarimiu pura vayamiu.”

²⁷“Natantu niepemiū pepatuduki ntotuata nggaulu ivei: ‘Nee mobualo.’

²⁸Tapi Kuuli ka komiu, isema-sema mombalele mata manggita mombine bo madota mompogau ia, natantu tona haitu nireke nombabualoni mombine haitu riara pekirina.

²⁹Ane mata ngganamu manggeni iko movia dosa, suimo bo tedakamo matamu haitu. Aginapa sangu sipa nu karomu malipo pade njumangu karomu ranavusaka riara narakaa.

³⁰Bo ane pale ngganamu manggeni iko movia dosa, tampasimo bo tedeakamo palemū haitu. Aginapa sangu sipa nu karomu malipo pade njumangu karomu ranavusaka riara narakaa.”

³¹“Naria muni pepatuduki nggaulu nanguli ivei: ‘Isema-sema madota mompogaaka bereina mombine, ia kana mombadekei ka bereina sura kaupū poberei.’

³²Tapi Kuuli ka komiu, ane komiu mompogaaka bereimiu mombine, tano ledo ria ia nosipogau nte langgai ntanina, batuana komiu nompopobualo ia. Bo isema-sema mompoberei mombine nipogaaka haitu, ia muni nobualo.”

³³“Niepemiū pepatuduki ntotuata nggaulu ivei: ‘Nee mombaleva janjimiu. Anu nijanjimiu nte nosumpa ri ngayo nu Alatala, kana rapoviamiu.’

³⁴Tapi Kuuli ka komiu, nemo ntoto mosumpa ante manguli langi, sabana langi gadera nu Alatala.

³⁵Nee mosumpa ante manguli dunia, sabana dunia hitu polampi kada nu Alatala. Nee mosumpa ante manguli Yerusalem, sabana Yerusalem ngata nu Magau anu nambaso kuasaNa.

³⁶Bo nee mosumpa ante manguli vuvumiu mboto, sabana ledo rapakulemiu mombabaliki nau sambesa buluamiu majadi mabula bara mavuri.

³⁷Tapi ane patujumiu iyo, ulimo iyo, bo ane patujumiu ledo, ulimo ledo. Ledo nabelo mompakaroso tesa ante mosumpa sabana pokainggu eva haitu nopuna lako ri Magau nu Seta.”

³⁸“Niepemi pepatuduki ntotuata nggaulu ivei: ‘Mata rasambei mata, ngisi rasambei ngisi.’

³⁹Tapi Kuuli ka komiu, nee rapesavamiu. Ane maria tona mombasapa kalimpi ngganamiu, dekei muni sabingga kalimpi njidimiu rasapana.

⁴⁰Bo ane maria tona manggeni komiu ri ngayo ntopotangara sabana madota mangala buyamiu, dekei ka ia muni bajumiu.

⁴¹Ane maria tona mompasuu komiu manggala mbara-mbarana sangu kilo kakavaona, kalamo mbara-mbara haitu rokilo kakavaona.

⁴²Dekeimo ka tona nerapi nte komiu, bo nee mompoara tona makava manginda anumiu.”

⁴³“Niepemi pepatuduki nggaulu nanguli ivei: ‘Potovemo roamiu bo povuu matamo balimiu.’

⁴⁴Tapi Kuuli ka komiu, potovemo balimiu bo posambayaka tona nompandasa komiu.

⁴⁵Ane komiu mokainggu ivehaitu, komiu majadi ana-ana nu Alatala, Tuamamiu ri suruga. Apa nipotoveNa pura-pura tona bo nipopebondana mata nu eo ka tona nadaa bo ka tona nabelo. Bo nidekeiNa uda ka tona nanao bo ka tona natenggo muni.

⁴⁶Ane komiu aga mompotove tona nompotove komiu, natantumo komiu ledo masipato ratoiya nu Alatala. Apa nau topesingara balasitee nadaa ingguna, nompotove tona anu nompotove ira.

⁴⁷Bo ane komiu aga nabelo nte roamiu mboto, natantumo pokainggumiu haitu ledo mbeki ratoiya. Nau tona ledo nosisani nte Alatala nabelo nte roara mboto!

⁴⁸Jadi komiu kana mokainggu mabelo ante mpuu-mpuu raramiu, nasimbayu eva pokainggu nu Alatala, Tuamata ri suruga.”

Matius 6

¹“Toramo, ane komiu movia ada-ada nu agama, nemo rapopakita ri ngayo ntodea. Apa ane ivesia pokainggumiu, komiu ledo ntoto manggava belo lako nte Alatala, Tuamamiu ri suruga.

²Rapana ane komiu mombadekei petulungi ka tona napakasi, nee rapatolele poviamiu haitu eva povia ntona anu aga nabelo ri sumba. Ira nombadekei ka tona napakasi ri ngayo ntodea riaru banua-banua petupu bo ri dala riaru ngata ala rakita bo ratoiya ntona. Pariaramo tesaKu hitu! Petoiya ntona haitumo tambo nitarimara. Domo ria ntanina.

³⁻⁴Tapi ane komiu mombadekei petulungi ka tona napakasi, dekei nggalinomo, nee rapatolele poviamiu haitu. Bo Alatala, Tuamamiu ri suruga, manggita poviamiu nggalino haitu bo Ia mombadekei tambo ka komiu.”

⁵“Ane komiu mosambaya, nee moinggu eva tona aga nabelo ri sumba. Nipokonora neangga mosambaya riaru banua-banua petupu bo ri tatanga nu dala ala rakita ntodea. Pariaramo tesaKu hitu! Nitarimaramo petoiya ntona bo haitumo tambo nu posambayara. Domo ria ntanina.

⁶Tapi ane komiu mosambaya, pesuamo riaru ntombimiu, upimo vamba, bo posambayamo ka Alatala, Tuamamiu anu ledo nikita. Bo Alatala anu nanggita poviamiu nggalino haitu, mombadekei tambo ka komiu.

⁷Bo ane komiu mosambaya, nee mompakandoe posambayamiu bo mombasili-sili tesa eva kabiasa ntona ledo nosisani nte Alatala. Nisarumakara ane posambayara mandoe, Alatala kana mompetalingai ira.

⁸Nee mompasiala pokainggura haitu! Apa nisani nu Alatala mamimo nuapa niparaluumiu dopame komiu merapi lako nte Ia.

⁹Jadi posambaya ivei: Alatala, Tuama kami ri suruga, Aga Komiu masipato rapetupu bo rapakaoge. Komiumo Magau kami.

¹⁰Perapi Komiu momparenta ri dunia hitu, bo dotaMiu majadi raturusi ntona ri dunia nasimbayu eva ri suruga.

¹¹Dekei ka kami kande niparaluu kami eo hitu.

¹²Bo ampungi sala kami, nasimbayu eva kami muni nombaampungi tona novia sala nte kami.

¹³Nee rapalamba kami rapesori bo kabasakamo kami lako ri kuasa Magau nu Seta. [Sabana Komiumo Magau nakuasa bo nipokumaaka sampe ri kasae-saena. Amin.]

¹⁴Ane komiu mombaampungi tona novia sala nte komiu, Alatala Tuamamiu ri suruga, muni mombaampungi komiu.

¹⁵Tapi ane komiu ledo mombaampungi tona novia sala nte komiu, Alatala Tuamamiu ri suruga, ledo muni mombaampungi salamiu.”

¹⁶“Ane komiu mopuasa nee molenje naburu eva kabiasa ntona aga nabelo ri sumba. Nitunggaira nompakaburu lenjera ala rasani ntona ira nopuasa. Pariaramo tesaKu hitu! Nikavaramo pura-pura tambo nu puasara haitu. Domo ria ntanina.

¹⁷Tapi ane komiu mopuasa, pendoumo bo salagamo buluamiu

¹⁸ala ledo rasani ntona ntanina komiu nopuasa. Aga Alatala, TuamaMiu ri suruga, anu ledo nikita, mangisanina. RakitaNa poviamiu anu ledo nisani ntona ntanina haitu bo radekeiNa tambo ka komiu.”

¹⁹“Nee mompasiromu kakalumana dunia ka karomiu mboto. Apa kakalumana dunia namala rakande nu ane atau tagara, bo rapangangga ntona.

²⁰Agina mompasiromu kakalumana ri suruga apa hamai kakalumana ledo rakande nu ane atau tagara, bo ledo rapangangga ntona.

²¹Nee mompasiromu kakalumana ri dunia, apa ri umba kakalumanamiu, ri sia muni pekirimiu.

²²Mata nirapaka poindo nu karo. Ane matata nabelo, tantu nalanto pekitata.

²³Tapi ane navurau matata, ledo nalanto nikitata nuapa-nuapa. Ivesia muni pekiri rara ntaita. jadi ane pikiri rarantaita majadi malanda bo aga nompekirika kasana nu karo mboto, malanda mpuumo kalandana haitu!

²⁴Ledo rapakule ntona saito matundu nte madika randua. Apa saito rapotovena bo saitopa ledo rapeilina. Saito raoseakana parentana bo saitopa rapoarana. Ivesia muni ante komiu. Ane komiu mompotove mbara-mbara ri dunia hitu, ledo rapakulemiu mpuu-mpuu mangoseaka dota nu Alatala.”

²⁵“Haitu sampe Kuuli ka komiu, nee makini raramiu mompekirika katuvumiu, bara nuapa rakandemiu atau rainumiu. Nee makini mompekirika baju nuapa rapasuamiu. Apa katuvuta nopokopa pade kanda bo karota nopokopa pade pakea.

²⁶Peintamo tonji-tonji ri laerava! Ira ledo notuda pae, ledo nokato bo ledo muni nomboli pae riaru gampiri. Tapi naupa ivesia, Alatala, Tuamamiu ri suruga, nombadekei kanda ka ira. Nemopa komiu! NipotoveNapa komiu pade tonji-tonji.

²⁷Nuapa gunana makini raramiu? Nau damo makini njuu raramiu, ledo ria saitoa komiu mompakule mantambai umurumiu, nau aga sambongi.

²⁸Bo nuapa gunana makini raramiu mompekirika baju? Pekirimo sese nu bunga ranggavoko. Bunga haitu natuvu nau ledo nokarajaa atau nantanu.

²⁹Tapi naupa ivesia, Kuuli ka komiu, Magau Salomo anu nakalumana mpuu ledo ria pakeana nagaya eva sese nu bunga haitu!

³⁰Jadi ane Alatala nompakagaya bunga-bunga ranggavoko anu aga natuvu sampalai bo maile rapalabusi, nemopa komiu! Natantu Ia nombadekei ka komiu pakea niparaluumiu. Nakura mpuu pomparasayamiu!

³¹Nee makini raramiu bo manguli, ‘Nuapa rakandeta, nuapa rainuta, bara pakea nuapa rapaketa?’

³²Haitu puramo nielo ntona anu ledo nosisani ante Alatala. Tapi ledo paraluu makini raramiu sabana pura-pura anu niparaluumiu haitu nisani nu Alatala, Tuamamiu ri suruga.

³³Jadi pasimbuku ntanimo ruru ala Alatala momparenta riara katuvumiu bo oseakamo dotaNa, bo pura-pura ntanina haitu radekeiNa muni ka komiu.

³⁴Jadi nee masesa raramiu nompekirika bara nuapa majadi maile, sabana maile maria kasusana mboto. Naganamo kasusa eo hitu rapekirita „nee ratambai anu majadi maile!”

Matius 7

¹“Nee mompakasala tona ntanina ala komiu ledo rapakasala nu Alatala.

²Apa komiu ratangara nu Alatala nangoseaka kabiasamiu mboto mombatangara tona ntanina. Posuka nipakemiu mosuka ka tona ntanina, haitu muni rapake nu Alatala mosuka ka komiu.

³Nakuya komiu namala manggita dosa roamiu nakodi eva garupu ri matana, tapi dosamiu mboto nambaso eva baloti ri matamiu mboto ledo nikitamiu?

⁴Berimba komiu manguli ka roamiu, ‘Mai, kulelaka garupu ri matamiu,’ iyapa ri matamiu mboto naria baloti!

⁵Komiu aga tobelo ri sumba! Lelaka ntani ruru baloti lako ri matamiu mboto ala matamiu malanto mekita bo komiu mamala mombalelaka garupu ri mata nu roa.”

⁶Naupu haitu, nanguli i Yesus, “Nee radekei ka asu anu nagasa mbelaka asu aga megoli mombalopo komiu! Bo nee radekei mutiara ka bavu, apa bavu aga mombajeje bayangi mutiara haitu.”

⁷“Perapimo nte Alatala bo radekeiNa ka komiu. Elomo bo rakavamiu. Tanedemo vamba bo vamba raunggeNa ka komiu.

⁸Apa isema-sema merapi, kana radekei ka ia. Isema-sema mompaelo kana rakavana. Bo isema-sema mantanede vamba, kana raungge ka ia.

⁹Natantu ledo ria saitoa komiu mombadekei vatu ka anamiu ane roti raperapina!

¹⁰Bara ane anamiu merapi bau ntasi, natantu ledo ule radekeimiu.

¹¹Nau komiu tona nadosa, nisanimiu nombadekei anu nabelo ka anamiu. Nemopa Alatala, Tuamamiu ri suruga! Natantu Ia muni mombadekei anu nabelo ka isema-sema merapi nte Ia.”

¹²“Jadi nuapa-nuapa rapodotamiu rapovia ntona ka komiu, ivesia muni rapoviamiu ka tona. Sabana parenta haitumo isi nu Atura agama bo pepatuduki nu nabi-nabi nggaulu.

¹³Pesuamo ri bobaa napii, sabana naluo bobaa bo nabelo dala hau ri narakaa, bo nadea muni tona nangosena.

¹⁴Tapi napiimo vamba bo nakaja dala manggava katuvua nabelo bo ledo nadea tona nangosena.”

¹⁵“Komiu kana mainga nte tona nanguli karora nabi tano aga nodava. Ira nakava nte komiu netibelo rara eva bimba nanondo, tano rara ntaira nadaa mpuu eva asulaku nasoa.

¹⁶Rasanimiu ira lako ri pokainggura. Vua anggur ledo nipupu lako ri lemo ntasi bo vua ara ledo nipupu lako ri kavoko nggarui.

¹⁷Ivesia muni kayu naboya novua nabelo, tapi kayu nangguru ledo novua nabelo.

¹⁸Ledo ria kayu nabelo novua nadaa. Bo ledo muni naria kayu nangguru novua nabelo.

¹⁹Pura-pura kayu ledo nabelo vuana kana ratovo bo ratedeaka riaru apu.

²⁰Jadi ivesia muni ante nabi-nabi mpodava. Lako ri pokainggura rasanimumo isema ira.

²¹Ledo pura-pura tona nanguli Yaku Tupura majadi todea riaru Poparenta nu Alatala. Aga tona anu novia dota nu Alatala, TuamaKu ri suruga, masipato mesua riarana.

²²Ri Eo Potangara bara maipia madea tona manguli ka Yaku, ‘Pue, Pue! Kami nompasimbayu tesaMiu ka tona ntanina ante kuasaMiu bo ante kuasaMiu muni

kami nompopalai seta-seta lako nte tona. Bo nadeamo kabaraka nipovia kami nte kuasaMiu!’

²³Tapi Kupesanaka ira, ‘Ledo nisaniKu komiu! Palaimo lako ri sii, komiu topokainggu nadaa!’ “

²⁴“Jadi isema-sema mangepe tesaKu bo mangoseakana, ia nasimbayu ante topande novia banuana ri bavo vatu.

²⁵Nauda romba bo nakava lono ante poiri nombaburu banua haitu, tapi banua haitu ledo nagero sabana nipovia ri bavo vatu.

²⁶Tapi isema-sema mangepe tesaKu bo ledo nioseakana, ia nadoyo nasimbayu eva tona novia banuana ri bavo bone.

²⁷Naromba uda, bo nalono, bo poiri narimboso nombaburu banua haitu sampe banua haitu naombo bo narupusaka.”

²⁸Naupu i Yesus nompatuduki haitu pura-pura ka todea, nokumaa mpuumo ira nangepena.

²⁹Apa Ia ledo nompaguru eva guru-guru agama. Ia nompatuduki eva tona mpuu-mpuu nakuasa.

Matius 8

¹Notuamo i Yesus lako ri bulu, nadea mpuu tona nantuntuni Ia.

²Tempo haitu nakavamo saito tona nadua oge nantaputu ri ngayo i Yesus, bo nanguli, “Pue, ane madota Komiu, Komiu nompakule mompakabelo yaku.”

³Nangepa haitu, i Yesus nombadika paleNa ri karo ntona haitu bo nanguli, “Madota Yaku. Mabelomo iko!” Kaliu-liu nabelomo tona haitu.

⁴Bo nanguli i Yesus ka ia, “Nee mutesa ka tona anu najadi ri karomu. Tapi koimo hau nte topanggeni pesomba bo popakitamo karomu ka ia ala rakitana nabelomo karomu. Bo dekeimo pesombamu ka Alatala, nangoseaka parenta Nabi Musa ala mompopakita ka todea iko mpuu-mpuu nabelomo.”

⁵Tempo i Yesus nesua ri ngata Kapernaum nakavamo saito balengga ntantara nte Ia. Ia nerapi mpuu-mpuu nte i Yesus,

⁶“Pua, batuaku nadua ntamo ria ri banuaku. Ia aga naturu ria, ledo nipakulena nembangu, bo nandasa mpuu nirasaina.”

⁷Nanguli i Yesus ka ia, “Tuou Yaku mompakabelo ia.”

⁸Tapi nesana balengga ntantara haitu, “Pua, yaku hii ledo masipato mantarima Komiu riaru banuaku. Nau aga rauliMiu sambela rombela, mabelomo batuaku.

⁹Nisaniku ia mabelo sabana yaku muni natundu ri parenta nu puaku. Bo naria muni tantara-tantara natundu nte parentaku. Ane kuuli ka saito tantara, ‘Koimo!’ ia kana hau. Bo ane kuuli ka tantara ntanina, ‘Katumai!’ ia kana tumai. Bo ane kuuli ka batuaku, ‘Povia haitu’, kana rapoviana haitu.”

¹⁰Nangepe tesana haitu, nokumaamo i Yesus, bo niuliNa ka todea anu nantuntuni Ia, “Natantu mpuu pomparasaya ntona hitu! Nau todea toYahudi, muli Israel, dopa ria nikavaKu pomparasaya ntona naroso eva pomparasaya ntona hitu!

¹¹Pariaramo! Tempo bara maipia madea tona ledo toYahudi majadi todea nu Alatala. Ira makava lako ri mpandakena bo mpanauna mosusa madambadamba ri Poparenta nu Alatala singgani-nggani ante i Abraham, i Ishak bo i Yakub.

¹²Tapi toYahudi mboto anu masipato majadi todea riaru Poparenta nu Alatala ledo mamala. Ira aga ratedaka ri kalandana makavao lako nte Alatala, bo hamai ira aga motumangi-mangi bo masinggiki baga ante kasusa rara.”

¹³Bo i Yesus nanguli ka balengga ntantara haitu, “Panjilimo. Mabelomo batuamu eva anu niparasayamu majadi.” Bo eva nisuka, nabelomo batuana.

¹⁴Naupu sia i Yesus hau ri banua i Petrus. Hamai nikitaNa matua i Petrus mombine aga naturu sabana nakokora.

¹⁵Jadi i Yesus nanggungisi pale nu mombine haitu bo kaliu-liu nabelomo ia. Naupu haitu nembangumo mombine haitu mombakadambanaka ira.

¹⁶Nanggoviapa, nakavamo tona nte i Yesus, nanggeni roara anu nipesua seta. I Yesus nompopalai seta-seta haitu ante sambela tesa. Bo nipakabeloNa muni pura-pura tona nadua.

¹⁷Haitu najadi ala madupa tesa nu Alatala anu nipasimbayu Nabi Yesaya nggaulu ivei: “Iamo nomparikaro kasusata bo nompakabelo kita nadua.” (Yesaya 53:4)

¹⁸Naria saeo nadea gaga tona nantagui i Yesus. Nanggita tona dea haitu, nanguli i Yesus ka anaguruNa, “Hau kita ri sambote rano.”

¹⁹Tempo haitu naria saito guru agama nakava nte i Yesus bo nanguli, “Guru, yaku madota mantuntuni Komiu. Nau damo ri umba rakalauMiu kuoseaka Komiu.”

²⁰Nesana i Yesus, “Asulaku naria bolona rapaturuna bo tonji naria jumuna, tapi Yaku, Ana nu Manusia, ledo ria ponturoKu natantu Kupaturu.”

²¹Naupu haitu nanguli saitopa topangoseaka Ia, “Pue, paloga ntanimo ruru yaku manjili nte tuamaku. Mamate tuamaku pade tumai yaku mangoseaka Komiu.”

²²Tapi nanguli i Yesus ka ia, “Oseakamo Yaku! Palambakamo tona namate mombatana tona namate.”

²³Naliu haitu nesavi sakayamo i Yesus nosangani-nggani ante anaguruNa, bo haumo ira.

²⁴Tempo ira nosakaya sampesani nakavamo poiri narimboso nompakambaso balumba ri rano. Sakidepa natala sakayara nitompe balumba mbaso. Tempo haitu i Yesus naluru namonjo.

²⁵Hau anaguruNa nombalike Ia bo nanguli, “Pue, tulungimo! Mamatemo kita!”

²⁶Nangulimo i Yesus ka ira, “Nakuya komiu naeka? Nakura mpuu pomparasayamiu!” Naupu haitu neangga Ia nombatudu poiri bo balumba mbaso metaa. Bo kaliu-liu netaa mpuumo poiri bo nalinomo uve.

²⁷Nanggita kajadia haitu nokumaa puramo anaguruNa. Niulira, “Tonuapa hitu tano sampe nau poiri bo balumba nangoseaka parentaNa?”

²⁸Naupu haitu nakavamo ira ri sambote rano ri bagia ntoGadara. Nakavapa ira hamai, nesuvumo randua tona lako ri podayo mosintomu ante i Yesus. Ira randua haitu nipesua seta-seta sampe nagila mpuu ira bo ledo ria tona nabia noliu ri sia.

²⁹Nongare-ngaremo ira nanguli, “He, Ana nu Alatala! Nakuya tano Komiu tumai? RakuyaMiu kami? RapandasaMiumo kami nau dopa tempona?”

³⁰Napara ri sia nadea bavu nangelo kandeara.

³¹Jadi seta-seta nesua nte tona randua haitu nerapi nte i Yesus, “Ane Komiu mompopalai kami lako ri tona hitu, palambakamo kami mesua nte bavu-bavu gahaitu!”

³²Nangulimo i Yesus ka seta-seta gahaitu, “Koimo!” Jadi nesuvumo seta-seta lako ri tona randua bo nolinja nesua nte bavu. Eva nisuka, nipesua seta-seta, nangova puramo bavu haitu notingganavu lako ri tinggi bingge hau riaro rano sampe namate nalodo riaro nu uve.

³³Sampanggita kajadia haitu, nangova nalaimo topojava bavu hau riaro ngata. Bo nitesara pura anu najadi nte bavura bo nte tona randua anu nipesua nu seta pangane.

³⁴Nangepe haitu, hau puramo tupu ngata mosintomu nte i Yesus. Nakava nte i Yesus niperapira ante mpuu-mpuu raro ala Ia mompalaisi ngatara haitu.

Matius 9

¹Naupu haitu nesavi sakayamo i Yesus ante anaguruNa nanjili hau ri sambote rano, sampe nakava ri ngata niponturora.

²Hamai naria bara sako-ndua tona nombakova roara hau nte i Yesus. Roara haitu napunggu bo naturu ri ompa paturuna. Nanggita karoso nu pomparasayara, nangulimo i Yesus ka topunggu haitu, “AnaKu, pakaroso raramu. Dosamu niampungimo.”

³Bara sako-ndua guru agama hamai nompekiri riara ntaira, “Nadaa mpuu tona hitu! Ia nompakasimbayu karoNa ante Alatala, apa aga Alatala namala nombampungi dosa!”

⁴Tapi nisani i Yesusmo pekirira. Haitu sampe niuliNa ka ira, “Nakuya rara ntaimiu nompekiri nadaa?”

⁵Natantumo ledo nakaja manguli ‘Dosamu niampungimo.’ Nakajapa manguli ‘Peanggamo bo polipamo!’

⁶Tapi Kupopakita ka komiu Yaku, Ana nu Manusia, nakuasa ri dunia hitu nombampungi dosa nu manusia.” Jadi nituduNa topunggu haitu, “Peanggamo! Anggataka ompa paturumu bo panjilimo!”

⁷Nangepe haitu neangga mpuumo topunggu haitu, bo nanjilimo ia ri banuana mboto.

⁸Nanggita kajadia haitu naekamo rara ntodea ri sia. Bo nitoyara Alatala sabana nidekeiNa kuasa nambaso eva haitu ka manusia.

⁹Naupu haitu nalaimo i Yesus lako ri sia. Nolipa-lipamo Ia, nikitaNa saito topesingara balasitee nonturo riara kantoroto pesingara balasitee. Sangana i Matius. Nanguli i Yesus ka ia, “Kaimo! Oseakamo Yaku!” Nangepe haitu neanggamo i Matius bo hau nangoseaka i Yesus.

¹⁰Naupu haitu i Yesus ante anaguruNa hau nangande ri banua i Matius. Bo nadea topesingara balasitee bo tona ntanina anu nireke ntoYahudi tona nadosa, nakava nangande nosanggani-nggani ante ira.

¹¹Sampanggita haitu, nangulimo bara sako-ndua toFarisi ka anaguru i Yesus, “Nakuya gurumiu nangande nosanggani-nggani ante topesingara balasitee bo tona nadosa?”

¹²Niepe i Yesus tesara haitu. Jadi niulikaNa, “Tona ledo nadua ledo nomparaluu pakuli nu dokutoro. Aga tona nadua paraluu rapakulisi.

¹³Koi pegurumo batuana tesa nu Alatala anu nanguli ivei: ‘NipokonoKupa maasi matamiu manggita roamiu pade manggeni binata-binata rapesomba ka

Yaku.’ (Hosea 6:6) Yaku nakava ri dunia ledo mompokio tona anu nanguli karora nanao, tapi mompokio tona nadosa majea lako ri dosara.”

¹⁴Naupu sia, bara sako-ndua topangoseaka i Yohanes Topediu nakava nte i Yesus. Nekutanamo ira, “Kami bo toFarisi nasaro nopuasa nangoseaka ada-ada agamata. Nuapa sabana anaguruMiu ledo nopuasa?”

¹⁵Nesanamo i Yesus ka ira, “Ledo masipato torata ri posusa poboti masusa rara bo mopuasa tempo boti langgai da mosangani ante ira. Tapi kana makava tempona boti langgai raala lako nte ira. Tempo haitumo pade mopuasa ira. Ivesia muni anaguruKu masusa rara bo mopuasa ane Yaku raala lako nte ira.”

¹⁶Nanguli munimo i Yesus, “Ledo ria tona notampala baju naranta ante kae nabaru. Sabana kae baru haitu mekonjo bo mombabitesi baju ranta sampe mantambai kabitena baju haitu.

¹⁷Ivesia muni ante uve anggur. Ledo ria tona nombaisi uve anggur nabaru riaraku njae anu domo nagini. Sabana ane radika ri pomboli njae, uve anggur baruna morende bo mevoya mompakapasa pombolina haitu sampe mabubu uve anggur, bo marugi pombolina. Uve anggur nabaru kana raisi riaraku pomboli baruna muni. Ane ivesia mabelo puramo uve anggur bo pombolina.”

¹⁸Da notesa i Yesus, nakavamo saito pakeni ri banua petupu ntoYahudi. Nantaputumo ia ri ngayo i Yesus bo nerapi tulungi ante mpuu-mpuu rara. Niulina, “Dako namate anaku mombine. Kamai, kita hau ri banuaku. Tuu paleMiu ri karonala matuvu mpanjili ia.”

¹⁹Nangepe haitu, neanggamo i Yesus hau mantuntuni tuama nu ngana haitu. Bo anaguruNa muni hau nosangani nte Ia.

²⁰Ri tatanga dala naria saito mombine anu sapulu rompaemo nasimbunga njuu. Ia nanggaparai puri i Yesus bo nikabena doe baju i Yesus,

²¹apa nipekirina, “Nau aga doe nu bajuNa kukabe, tantu mabelomo duaku hitu.”

²²Neilimo i Yesus nompeinta mombine haitu. Bo niuliNa ka ia, “Anaku, pakaroso raramu! Mabelomo iko sabana iko nomparasaya.” Bo eva nisuka, nabelo mpuumo mombine haitu.

²³Naupu sia napolamo i Yesus hau ri banua nu pakeni ri banua petupu pangane. Nakava hamai nikitaNa nadea tona nantavusi suli bo notumangi ka tomate ante suara namangga.

²⁴Nanguli i Yesus ka ira, “Palaimo komiu pura-pura. Ngana haitu ledo namate. Ia aga namonjo.” Nangepe tesa haitu, aga nipongirikara i Yesus.

²⁵Naupu ira nipopalai, nesuamo i Yesus riarra tombi nu ngana mombine. NikangisiNa pale nu ngana bo kaliu-liu nembangumo ia.

²⁶Naupu haitu, kajadia haitu natolele sampe ri pura-pura ngata ri njumangu bagia haitu.

²⁷Tempo i Yesus nompapola polipana, naria randua toburo nantuntuni Ia bo nongare-ngare, “Muli Magau Daud! Poasimo kami!”

²⁸I Yesus nesua riarra banua, bo nesua munimo toburo randua haitu bo nanggaparai Ia. Nekutanamo Ia “Niparasayamiu Yaku nakuasa mompakabelo matamiu?” Nesana ira, “Iyo, Pue. Niparasaya kami.”

²⁹Jadi i Yesus nombatui matara bo nanguli, “Mabelomo matamiu, eva niparasayamiu majadi!”

³⁰Kaliu-liu nabelomo matara randua. Bo i Yesus nantagi ira ante mpuu-mpuu. NiuliNa, “Nee ntoto ratesa ka tona ntanina anu najadi nte komiu hitu.”

³¹Tapi nalaimo ira bo nompatolele kareba i Yesus ri pura-pura ngata ri njumangu bagia haitu.

³²Dako nalai toburo randua pangane, naria saito tobobo niken ntona hau nte i Yesus. Tona haitu nabobo sabana nipesua nu seta.

³³Jadi tempo seta haitu nipopalai i Yesus lako nte ia, namalamo ia notesa. Nanggita kajadia haitu nokumaa mpuumo todea. Nanguli ira, “Dopa sanggania nikita kami kajadia eva hitu ri tana Israel!”

³⁴Tapi nanguli toFarisi hamai, “Bai! Tona hitu aga nompopalai seta ante kuasa lako nte Magau nu Seta mboto!”

³⁵I Yesus hau nompesayoki ngata dea. Ia nompatuduki ri banua-banua petupu bo nompatolele kareba Poparenta nu Alatala. Bo nipakabeloNa tona nadua mpengaya-ngaya.

³⁶Nanggita todea, naasi mpuumo mataNa, sabana nasesamo ira bo ledo ria tona nantulungi ira, nasimbayu eva bimba ledo ria topoevuna.

³⁷Bo nanguli i Yesus ka anaguruNa, “Nadeamo tona nasadia mantarima Kareba Belo. Ira nasimbayu eva pae natasamo, nasadiamo rakato. Nadea mpuu pae nasadiamo rakato, tapi topokato ledo nadea.

³⁸Jadi perapimo nte Alatala tupu ntalua, ala ratuduNa tona hau mokato ri taluaNa.”

Matius 10

¹I Yesus nompasiromu ana-anaguruNa, bo nidekeiNa ka ira kuasa mompopalai seta-seta bo mompakabelo tona nadua mpengaya-ngaya.

²⁻⁴Sanga sapulu randua anaguru anu nisuroNa haitumo, Pamulana i Simon anu nosanga muni i Petrus; bo i Andreas, tuei i Petrus; i Yakobus bo i Yohanes ana-ana i Zebedeus; i Filipus; bo i Bartolomeus; i Tomas; bo i Matius topesingara balasitee; i Yakobus ana i Alfeus; i Tadeus; i Simon, saito lako ri partai Zelot, haitumo partai maradeka ntoYahudi; bo i Yudas Iskariot anu nompobalu i Yesus ka baliNa.

⁵Ira sapulu randua nisuro i Yesus hau manggeni Kareba Belo bo nitevaiNa ivei: “Nee hau ri ngata-ngata ntona ledo toYahudi bara ngata-ngata ntoSamaria.

⁶Koimo ruru nte toYahudi muli i Israel anu nasimbayu eva bimba-bimba nalipo.

⁷Koimo bo patolele ka ira ivei: ‘Naparamo tempona Alatala momparenta mpo Magau.’

⁸Pakabelo tona nadua, pakatuvu mpanjili tona namatemo, pakabelo tona nadua oge, popalai seta-seta anu nesua ri karo ntona. Kuasa haitu nidekei bayangi ka komiu, ledo nialimiu. Jadi dekeimiu bayangi muni ka tona ntona.

⁹Nee rakenimiu doi bulava bara doi salaka bara doi tambaga riara karepemiu.

¹⁰Nee rakenimiu batutu rapomboli baku. Nee rakenimiu rontonga baju, sapatu atau toko polipa, sabana topokarajaa masipato ratande ntona nitulungina.

¹¹Ane komiu mesua riara ngata, elomo saito tona nabelo rarana mantarima komiu riara banuana. Bo ponturomo hamai nte ira sampe komiu mompalaisi ngata haitu.

¹²Tempo komiu mesua riara banua ntona, ulika tupu banua, ‘Perapi Alatala mombadekei belo ka komiu!’

¹³Ane mabelo rara ntupu banua haitu bo ratarimara komiu, belo niperapimiu lako nte Alatala kana mambela nte ira. Tapi ane ledo mabelo rarara bo ledo ratarimara mabelo komiu, belo niperapimiu ka ira haitu ledo mambela nte ira.

¹⁴Ane tupu banua bara tupu ngata ledo madota mantarima komiu atau ledo madota mangepe tesamiu, palaimo komiu lako nte ira bo tapaimiu sovu lako ri kadamiu.

¹⁵Pariaramo tesaKu hitu! Ri Eo Potangara ri kaupuu nu dunia melabipa kadaana pehuku nu Alatala ka ira pade pehuku rapambela ka tupu ngata Sodom bo Gomora anu nadaa mpuu pokainggura!”

¹⁶“Pariaramo tesaKu hitu! Komiu Kusuro hau ri tatanga ntona nadaa nasimbayu eva bimba ri tatanga asulaku. Jadi komiu kana matau eva ule bo malusu rara eva tonji togou.

¹⁷Komiu kana mainga apa komiu rasaka ntona bo rakeni rapangadu ri ngayo ntopotangara. Bo komiu raboba riara banua-banua petupu.

¹⁸Komiu rakeni ri ngayo gubernur-gubernur bo magau-magau sabana komiu nomparasaya Yaku. Haitumo loga nabelo ka komiu motesa pomparasayamiu Yaku ka ira bo ka tona ntona anu ledo toYahudi.

¹⁹Ane komiu rakeni ri ngayora, nee makini raramiu mompekirika nuapa raulimiu bara berimba komiu mesana ka ira. Apa ri tempo haitu radekei ka komiu tesa-tesa masipato raulimiu ka ira.

²⁰Bo tesa-tesa raulimiu ledo tesa lako ri pekirimiu mboto, tapi tesa lako nte Nosa Gasa nTuamamiu Alatala. Iamo mokarajaa riaru ntaimiu mompakalanto tesa nuapa masipato ratesamiu.

²¹Makava tempona maria tona mombadekei sampesuvuna mboto rapatesi sabana sampesuvuna nomparasaya Yaku. Bo maria muni totua mombadekei anana mboto rapatesi. Bo ngana-ngana mangeva tina tuamara mboto bo mombadekei ira rapatesi.

²²Komiu rapovuu mata ntodea sabana komiu nangoseaka Yaku. Tapi isema-sema maroo momparasaya sampe ri kaupuna rapakasalama nu Alatala.

²³Ane komiu rapandasa ntona ri sangu ngata, palaimo hau ri ngata ntanina. Pariaramo tesaKu hitu. Yaku, Ana nu Manusia kana makava mpanjili dopame maupu rakenimiu Kareba Belo ka pura-pura ngata ri tana Israel.

²⁴Anaguru ledo naogepa pade guruna. Batua ledo naogepa pade madikana.

²⁵Kana maosa rara anaguru ane ia manjava guruna bo kana maosa rara batua manjava madikana. Iyapa Yaku Gurumiu, niuli ntona i Beelzebul, Magau nu Seta, nemopa komiu anu najadi ana-ana riaru banuaKu. Komiu muni kana rasalaira.”

²⁶“Tapi nau rasalai ntona komiu, nee maeka nte tona mangeva komiu. Apa pura-pura anu nakana, anu nitabuniaka sii-sii kana malanto rakita ngena. Pura-pura rahasia sii-sii kana rasani ntonamo bara maipia.

²⁷Pura-pura anu nitesaKu nggalino ka komiu, kana ratesamiu ri ngayo ntodea, bo anu nipanggalivayaKu ri talingamiu kana rapatolelemiu ka todea!

²⁸Nee maeka nte tona madota mompatesi komiu. Ira mamala mompatesi karomiu tapi ledo ria kuasara mombanavusaka komiu ri narakaa. Aginapa komiu maeka nte Alatala sabana Iamo nakuasa mompatesi karomiu bo Ia muni nakuasa mombahuku komiu riaru narakaa.

²⁹Natantu nisanimiu tonji rone rombaa nipobalu sampeka doi kodi. Tapi nau ledo noali ri panggita manusia, ledo ria sambaa tonji rone mamate ane ledo dota nTuamamiu Alatala.

³⁰Tapi komiu nelabipa noali ri panggita nu Alatala. Nau buluamiu nirekeNa bo nisaniNa puramo.

³¹Jadi nee maeka, apa nipotove nu Alatalapa komiu pade tonji rone nadea.

³²Isema-sema manguli ri ngayo ntona ntanina, ia topangoseaka Yaku, Yaku muni manguli ri ngayo nTuamaKu Alatala ri suruga, ia topangoseaka Yaku.

³³Tapi isema-sema manguli ri ngayo ntona ntanina, ledo nisanina Yaku, Yaku muni manguli ri ngayo nTuamaKu ri suruga, ledo nisaniKu ia.”

³⁴“Nee rapekirimiu kakavaKu hii manggeni posinggabelo ri dunia. Ledo nakana! Tapi kakavaKu hii nanggeni posieva.

³⁵Lako ri kakavaKu, ngana langgai mangeva tuamana mboto, bo ngana mombine mangeva tinana, bo mania mombine mangeva matuana mombine.

³⁶Tona nangoseaka Yaku raeva nu roara sambanua mboto. (Mikha 7:6)

³⁷Isema-sema nipotovenapa tina-tuamana pade Yaku, ledo masipato rauli topangoseaka Yaku. Bo tona nipotovenapa anana pade Yaku, ledo muni masipato rauli topangoseaka Yaku.

³⁸Bo tona ledo nanjimbuaka kayu salibna bo nangoseaka Yaku, ia ledo masipato rauli topangoseaka Yaku.

³⁹Isema-sema batena nangoseaka dota rarana mboto, ledo manggava katuvu mabelo sampe ri kasae-saena. Tapi isema-sema nombakabasaka pura-pura dota rarana mboto sabana nioseakana Yaku, iamo manggava katuvu mabelo sampe ri kasae-saena.

⁴⁰Isema-sema nantarima komiu, nitarimana muni Yaku. Bo isema-sema nantarima Yaku, nitarimana Alatala anu nombasuro Yaku.

⁴¹Isema-sema nantarima saito suro nu Alatala sabana ia mpuu-mpuu suro nu Alatala, tona haitu manggava tambo nasimbayu eva anu radekeika suro haitu.

Bo isema-sema nantarima saito tona sabana ia mpuu-mpuu nanao, tona haitu manggava tambo nasimbayu eva tambo radekei ka tona nanao haitu.

⁴²Bo isema-sema nombatulungi topangoseaka Yaku sabana ia mpuu-mpuu nangoseaka Yaku, tona haitu manggava tambona bara maipia. Pariaramo tesaKu hitu, nau aga mombadekei uve ranindi ka saito topangoseaka Yaku anu ledo ria nturona, ia kana manggava tambona.”

Matius 11

¹Naupupa i Yesus nompatuduki anaguruNa sapulu randua, nalaimo Ia lako ri sia bo hau mompatuduki tona bo mompatolele Kareba Belo ri ngata-ngata napara sia.

²Tempo haitu i Yohanes Topediu nitarunggu. Ri tarunggu niepena lлена mpengaya-ngaya anu nipovia i Kristus. Jadi nituduna bara sako-ndua anaguruna hau mompekutana nte i Yesus ivei:

³“Pua, Komiumo hii Magau Topepakasalama anu makava nangoseaka pojanji nu Alatala? Atau bara da mariapa tona ntanina rapopea kami?”

⁴Nesana i Yesus, “Panjilimo komiu hau nte i Yohanes bo ulika ia pura-pura anu niepemi bo nikitamiu ri sii:

⁵tona naburo nekita, tona napunggu nolipamo, tona nadua oge nipakabelomo, tona nabongo neepemo, tona namate natuvu mpanjilimo, bo Kareba Belo lako nte Alatala nipatolele munimo ka tona napakasi.

⁶Nabelo mpuu tona ledo noura nomparasaya Yaku.”

⁷Nalaipa tona nitudu i Yohanes haitu, nitesaNamo katuvu i Yohanes ka todea. NiuliNa, “Nuapa patujumiu hau ranggarava bai nompeinta i Yohanes bara ipia? Hau manggita [tona nonggai rarana eva] kavoko niburu mpouri hau tumai? Natantu ledo ivesia.

⁸Jadi nuapa patujumiu hau? Hau manggita tona nopakea nagaya? Natantu ledo muni, apa tona nopakea ivesia aga nonturo ri banua magau.

⁹Jadi nuapa patujumiu hamai? Tantumo hau manggita nabi. Tapi pariaramo! I Yohanes naogepa pade nabi ntanina,

¹⁰sabana iamo suro nitesaki nu Alatala riara Buku Gasa ivei: ‘Pariaramo! Kutudu suroKu mokolu ka Iko, ala ia mompakasadia dala ka Iko.’ ” (Maleakhi 3:1)

¹¹Nanguli munimo i Yesus, “Pariaramo, lako ri pura-pura tona nipoanaka ri dunia hitu ledo naria saitoa naogepa pade i Yohanes Topediu. Tapi nau tona ledo ria nturona ri Poparenta nu Alatala, naogepa ia pade i Yohanes.

¹²Lako ri pamula nu pokarajaa i Yohanes Topediu sampe sii-sii, Poparenta nu Alatala nieva ntona nadaa bo nasese anu madota mombadagina.

¹³Nompamula lako ri nabi-nabi nggaulu sampe i Yohanes sii-sii, pura-pura nabi bo Buku Atura Agama nombaboto tempo hitu _haitumo Poparenta nu Alatala_.

¹⁴Bo ane raparasayamiu anu nipopaisanira, rasanimiu i Yohanes hitu nasimbayu ante Nabi Elia, anu nibotora makava mpanjili.

¹⁵Isema-sema naria talingana, pariaramo tesaKu hitu!

¹⁶Yaku motesa mompakalanto ka komiu inggu ntona nadaa anu natuvu sii-sii. Ira nasimbayu nte ngana-ngana nonturo ri potomu sangaya-sangaya niulika ledo niosera. Ira nipongare roara ntanina ivei:

¹⁷‘Kami nosuli bo nodade mompakadamba raramiu, tapi komiu ledo nadamba. Kami nodade nasusa eva ri tempo kamate tapi ledo notumangi komiu.’

¹⁸Ivesia muni najadi nte kami bo i Yohanes. I Yohanes nakava, nopuasa bo ledo nanginu uve anggur, bo niuli ntona ia nipesua nu seta!

¹⁹Yaku, Ana nu Manusia nakava nangande bo nanginu uve anggur eva tona biasa, tapi niuli ntona, ‘Peintamo tona haitu! Nadoko, nalangu, vega ntopesingara balasitee bo vega ntodosa!’ Tapi nau ivesia, nisanita kanoto nia nu Alatala sabana aselena nikita ri pokainggu ntopangoseaka Ia.”

²⁰Naupu haitu i Yesus nangonteaka tupu ngata ledo najea lako ri dosara naupa nadeapa kabaraka nipoviaNa ri ngatara haitu.

²¹NiuliNa, “Mandasa mpuumo komiu, toponturo ri ngata Korazim! Bo mandasa mpuumo komiu toponturo ri ngata Betsaida, sabana komiu ledo najea. Ane rapana kabaraka-kabaraka nipoviaKu ri ngatamiu Kupovia ri ngata Tirus bo Sidon, natantu nasaemo kajeara, nau ira ledo toYahudi. Bo natantu nasae munimo popakeara karu bo podikara sovu ri balenggara, tandana nabuku rarara bo nanjosomo nokainggu nadaa. Komiu toYahudi nanggita kabaraka-kabaraka haitu, tapi komiu ledo ntoto najea!

²²Pariaramo! Tempo Alatala mombatangara manusia bara maipia, pehuku ka komiu melabipa kantamona pade pehuku ka toponturo ri ngata Tirus bo Sidon.

²³Heh, komiu toponturo ri ngata Kapernaum! Nisarumakamiu komiu raore hau ri suruga! Tapi ledo ntoto nakana! Komiu aga ranavusaka ri narakaa! Apa ane rapana kabaraka-kabaraka nipoviaKu ri ngatamiu Kupovia ri ngata Sodom anu nadaa mpuu, natantu ngata haitu ledo rapakaropu nu Alatala bo ngata haitu batena maria sampe sii-sii.

²⁴Jadi pariaramo! Ri Eo Potangara bara maipia mandasapa pehuku rapambela ka komiu pade pehuku rapambela ka tupu ngata Sodom!”

²⁵Tempo haitu nosambayamo i Yesus. NiuliNa, “Tata, Komiumo Tupu nu langi bo tana. Yaku nosukuru nte Komiu sabana nipopaisaniMiu pura-pura anu pangane ka tona ledo natau. Tapi nitabuniakaMiu ka tona nangisani bo tona napande,

²⁶apa ivesiamo dotaMiu.”

²⁷Naupu haitu, i Yesus notesa ka tona ri sia, “Pura-pura nidekei nTuamaKu ka Yaku. Ledo ria tona mpuu-mpuu nosisani ante Yaku, Ana nu Alatala, aga TuamaKu Alatala. Bo ledo ria tona mpuu-mpuu nosisani ante TuamaKu aga Yaku, AnaNa, bo isema-sema Kupodota, Kupopaisanika TuamaKu ka ia.

²⁸Isema-sema nalenge bo nantamo panggenina, kamaimo nte Yaku! Yaku mompakangaa ia.

²⁹Paritundu pasanga Kudika ka komiu bo pegurumo nte Yaku, apa Yaku nalusu bo naede raraKu bo Kupakatinonto raramiu.

³⁰Nakana suka pasanga Kudika, bo panggeni Kudekei nangaa rasimbuakamiu.”

Matius 12

¹Naria saeo, i Yesus ante anaguruNa noliu ri talua gando ri eo penonto. Tempo ira noliu ri sia, anaguru i Yesus nokaleti gando sakide bo niontara sabana naaramo taira.

²Naria bara sako-ndua toFarisi nanggita poviara haitu. Nanguli ira ka i Yesus, “Peinta vei! AnaguruMu nombaliunaka atura agamata! Nitagi nu agama mokarajaa ri eo penonto!”

³Tapi nesana i Yesus ka ira, “Dopa nibacamiu anu nipovia Magau Daud nggaulu? Tempo ia ante roa-roana naara taira,

⁴ia nesua riara Banua nu Alatala bo nikandena roti nipesomba ka Alatala. Kakanana nangoseaka Atura-atura agamata, ledo masipato i Daud ante roana mangande roti haitu, aga topanggeni pesomba masipato mangandena. Tapi naupa ivesia, i Daud ledo nisalai.

⁵Bara dopa muni nibacamiu anu nitulisi riara Buku Atura Agama. Ri eo penonto topanggeni pesomba nokarajaa ri Banua nu Alatala tapi ira ledo nireke nasala.

⁶Pariaramo anu Kuuli ka komiu hitu: Ri sii naria saito naogepa pade Banua nu Alatala.

⁷⁻⁸Apa Yaku, Ana nu Manusia, anu nakuasa manguli nuapa masipato rapovia ri eo penonto. Nitulisi riara Buku Gasa ivei: ‘NipokonoKupa maasi matamiu manggita roamiu pade manggeni binata-binata rapesomba ka Yaku.’ (Hosea 6:6) Ane nisanimiu mpuu-mpuu batuana tesa haitu, natantu ledo rapakasalamiu tona ledo nasala.”

⁹Naupu haitu, i Yesus nompalaisi ponturo haitu bo nesuamo Ia riara banua petupu ntoYahudi.

¹⁰Ri sia naria saito tona nakoyo sabingga palena. Naria toFarisi hamai madota mangelo sala i Yesus ala rapangadura. Haitu sampe nipekutanara Ia,

“Nangoseaka atura-atura agamata, mamala kita mompakabelo tona nadua ri eo penonto atau ledo?”

¹¹Nesana i Yesus, “Ane rapana maria bimbamiu manavu ralovu ri eo penonto, nuapa rapoviamiu? Natantu rasoreakamiu ri eo haitu muni!

¹²Tapi manusia nelabi noali pade bimba. Jadi namala kita mombatulungi tona ri eo penonto!”

¹³Naupu haitu nanguli Yesus ka tona nakoyo palena haitu, “Odomo palemu!” Tona haitu nangodo palena, bo kaliu-liu nabelomo, nasimbayu eva palena sabinggapa.

¹⁴Tapi toFarisi pangane nompalaisi banua petupu bo nolibu mangelo dala mompatesi i Yesus.

¹⁵Nisani i Yesusmo patuju ntoFarisi nadaa haitu nte Ia. Jadi nalaimo Ia lako ri ponturo haitu hau ri ponturo ntanina. Nadea mpuu tona nantuntuni Ia bo isema-sema nadua, nipakabeloNamo.

¹⁶Bo niulikaNa ira, “Nee ntoto ratesamiu ka tona ntanina anu nipoviaKu ka komiu.

¹⁷Ivesiamo kadupana Tesa nu Alatala anu nipasimbayu Nabi Yesaya nggaulu ivei:

¹⁸‘Siimo BatuaKu nipelisiKu. Iamo anu nipotoveKu bo nipodamba raraKu. Nosa Gasa Kudekei ka Ia Bo Ia mompatolele poparentaKu nanao ka pura-pura tona.

¹⁹Ia ledo mesanai, bo ledo muni mongare-ngare, Bo Ia muni ledo motesa mompakalanga rara ri ngayo ntodea.

²⁰Tava natetilu ledo rapakakotoNa, ̀batuana, Ia nabelo nte tona nalente pomparasayana, ̀ bo sumbu poindo aga nompida-mpida vayana ledo rapepayaNa; ̀batuana, nalusu raraNa nte tona nau pomparasayana ledo naroo, ̀. Ia bate-batena mompasimbuku sampe kanoa nu poparenta nu Alatala majadi ri dunia,

²¹Bo pura-pura manusia manjarumaka Ia.’ ” (Yesaya 42:1-4)

²²Naupu haitu naria saito tona niken i Yesu. Tona haitu naburo bo nabobo sabana ia nipesua nu seta. I Yesu nompopalai seta lako ri tona haitu sampe ia namalamo notesa bo nekita.

²³Nanggita kajadia haitu, nokumaa mpuumo todea hamai sampe nosimpekutana ira, “Bara tona hitumo Muli Magau Daud ʻanu nijanji nu Alatala nggaulu!”

²⁴Tapi tempo toFarisi nangepe tesa ntodea haitu, nesana ira, “Bai! Kuasa ntona haitu lako nte i Beelzebul, Magau nu Seta. Haitu sampe Ia nakuasa nompopalai seta-seta.”

²⁵Tapi nisani i Yesu pompekirira. Jadi niuliNa ka ira, “Ane maria saito magau bo todeana bate-batena mosipobali, natantu kamagauana haitu magero. Bo ane tona sangata bara sambanua bate-batena mosipobali, natantu ira aga masimpotare.

²⁶Ivesia muni ante Magau nu Seta. Ane Magau nu Seta mompopalai seta-seta ntanina, batuana seta mosimpobali ante seta ntanina. Ane ivesia, natantu poparenta Magau nu Seta haitu ledo maroso, aga magero nggoomo.

²⁷Pangulimiu Yaku nompopalai seta ante kuasa i Beelzebul, Magau nu Seta. Tapi naria muni ana-anagurumiu mboto nompopalai seta-seta. Uli ka Yaku, ante kuasa isema nipopalaire seta-seta? Natantu ante kuasa nu Alatala! Jadi povia nu anagurumiu mboto nompakalanto peraimiu tutu nasala!

²⁸Yaku nompopalai seta-seta ante kuasa Nosa Gasa nu Alatala. Bo haitu nompopakita ka komiu Alatala nompamulamo nomparenta ri tatangamiu!

²⁹Berimba tona namala mombasuaki banua ntona naroso mangagosi mbarambarana? Natantum kana ratipunguna ntani ruru tupu nu banua haitu pade mamala mangagosi mbarambarana. ʻIvesia muni Yaku namala nompopalai seta sabana Yaku nokolu nombadagi Magau nu Seta.ʼ

³⁰Isema-sema ledo nosabingga ante Yaku, iamo nangeva Yaku. Isema-sema ledo nantulungi riara pokarajaaKu, iamo nompakagero pokarajaaKu.

³¹Jadi Kuuli ka komiu, pura-pura dosa bo tesa nesalai mamala raampungi. Tapi isema-sema nombasalai Nosa Gasa nu Alatala ledo ntoto raampungi.

³²Isema-sema nombasalai Yaku, Ana nu Manusia mamala raampungi. Tapi isema-sema nombasalai Nosa Gasa nu Alatala, ledo ntoto raampungi, lako ri eo hitu sampe ri kasae-saena.

³³Ane kayu nabelo, nabelo muni vuana. Ane kayu ledo nabelo, ledo muni nabelo vuana. Kabelo nu kayu nikita ri vuana.

³⁴Komiu tano tona nadaa mpuu eva ule! Ledo ntoto nipakulemiu notesa anu nabelo, sabana nadaa mpuu raramiu! Apa tesa nisovadakata aga nangoseaka anu naria riara ntaita.

³⁵Tona nabelo rarana nombatesa anu nabelo, sabana anu niboli riara ntaina nabelo. Bo tona nadaa rarana nombatesa anu nadaa sabana anu niboli riara ntaina aga anu nadaa.

³⁶Jadi pariaramo! Ri Eo Potangara bara maipiapa, pura-pura tona kana ratangguna mboto pura-pura tesana ledo noguna niulira.

³⁷Apa tesamiu mboto rapake nu Alatala mombatangara komiu bara nasala bara ledo.”

³⁸Naupu haitu bara sako-ndua guru agama bo toFarisi nanguli ka i Yesus, “Guru, kami madota manggita Komiu movia tanda nabaraka, ala rasani kami Komiu mpuu-mpuu niposumba nu Alatala.”

³⁹Tapi nesana i Yesus, “Nadaa mpuu komiu natuvu sii-sii! Komiu ledo natutu nangoseaka Alatala! Komiu nerapi Kupovia tanda nabaraka. Tapi ledo maria tanda ntanina rapopakita ka komiu, aga tanda eva anu najadi nte Nabi Yunus nggaulu.

⁴⁰Talu-mbongi bo talu-eo kasaena Nabi Yunus riara ntai bau mbaso. Ivesia muni Yaku, Ana nu Manusia, kana riara dayo talu-mbongi talu-eo kasaena.

⁴¹Ri Eo Potangara bara maipia, tupu ngata Niniwe rapakatuvu mpanjili mosanggani-nggani ante komiu anu natuvu sii-sii. Bo ira nombasalai

pokainggumiu sabana ira najeamo nangepe tesa Nabi Yunus. Sii-sii naria saito ri tatangamiu naogepa pade Nabi Yunus tapi ledo nadota komiu momparasaya tesaNa.

⁴²Ivesia muni ri Eo Potangara, magau mombine tana Syeba ri sabingga puluna rapakatuvu mpanjili mosanggani-nggani ante komiu anu natuvu sii-sii. Bo ia muni mombasalai pokainggumiu, sabana ia nakava lako ri ngata nakavao ala mangepe pepatuduki Magau Salomo anu nanoto mpuu. Tapi sii-sii naria ri tatangamiu saito anu naogepa bo nanotopa pade Magau Salomo tapi ledo nadota komiu momparasaya tesaNa.”

⁴³I Yesus nompapola tesaNa ante porapa ivei: “Ane seta nesuvu nompalaisi saito manusia, ia nolilive hau tumai ri ponturo nangau mangelo ponturo rapangosanakana, tapi ledo nikavana.

⁴⁴Pade niulina, ‘Aginapa yaku manjili hau ri tona nipalaisiku ria.’ Makava ia ri sia, rakavana tona haitu eva banua boa, ledo ria toponturona, bo banua haitu naupu nipegasa bo nipakasiayu.

⁴⁵Jadi seta haitu hau nompokio papitu seta ntanina anu nadaapa pade ia mboto. Bo nakavamo ira nesua nte tona haitu bo nonturo ri sia. Kaupuna katuvu ntona haitu tantu melabipa kadaana pade ri pamulana bara ipia. Ivesia muni anu majadi nte tona nadaa anu natuvu sii-sii sabana ira ledo nadota momparasaya tesaKu.”

⁴⁶Tempo i Yesus da notesa-tesa ka todea haitu, nakavamo tinaNa bo sampesuvuNa. Ira neangga ri savalikuna madota motesa ante Ia.

⁴⁷Bo hau tona nanguli ka i Yesus, “Peinta! Naria tinaMiu bo sampesuvu-sampesuvuMiu ri savalikuna. Ira madota motesa nte Komiu.”

⁴⁸Nesana i Yesus, “Isema kakanana tinaKu bo sampesuvuKu?”

⁴⁹NituduakaNa ana-anaguruNa bo niuliNa, “Tona hitumo tinaKu bo sampesuvuKu.

⁵⁰Apa, isema-sema novia dota nTuamaKu ri suruga, ia haitumo nireke sampesuvuKu bo tinaKu.”

Matius 13

¹Ri eo haitu muni i Yesus nesuvu lako ri banua hau ri tinggi Rano [Galilea] bo nonturo ri sia.

²Mpalunu-lunu tona nakava nantagui Ia sampe Ia hau nesavi sakaya bo nonturo riarana, bo todea neangga ri talinti.

³Bo nadea ngayana anu nipepatudukikaNa ante nompake porapa. NiuliNa, “Naria saito toposavu.

⁴Tempo ia nosavu, naria savua nanavu ri dala. Bo nakavamo tonji-tonji nanteosi savua haitu sampe naupu.

⁵Naria muni sanu savua nanavu ri tana navatu. Savua haitu nasalisa natuvu sabana tanana ledo nakumba.

⁶Tapi napanepa eo, nalelemo bo nangaumo savua haitu sabana ledo nandala kalena.

⁷Naria muni savua nanavu ranggarui. Karui natuvu sanggani-nggani nte savua. Nasae-sae, karui nangupisi savua haitu sampe namate.

⁸Bo naria muni savua nanavu ri tana naboya. Savua haitu natuvu sampe novua. Naria saatu-nggani kadeana, naria onopulu-nggani, bo naria muni talupulu-nggani kadeana.

⁹Isema-sema naria talingana, pariaramo porapa hitu.”

¹⁰Naupu sia, ana-anaguru i Yesus nanggaparai Ia bo nompekutana, “Guru, nuapa sabana Komiu nompake porapa ane nompatuduki todea?”

¹¹Nesana i Yesus, “Bara ipia dopa nisani nu manusia berimba Poparenta nu Alatala. Sii-sii Alatala nompopaisanina ka komiu, tapi ledo nipopaisaniNa ka todea.

¹²Apa isema-sema mantarima bo mangoseaka Tesa nu Alatala, kana ratambaika pangisanina sampe rasanina mpuu patuju nu Alatala. Tapi tona ledo nadota mantarima bo mangoseaka Tesa nu Alatala, masae-sae anu sakide nisanina haitu ralelakasi lako nte ia.

¹³Haitumo sampe nipakeKu porapa ane notesa nte todea, apa nau niepera ledo nipariarara. Nau nikitara ledo nisanira batuana anu nikitara.

¹⁴Jadi, pokainggura nompakadupa Tesa nu Alatala anu nipasimbayu Nabi Yesaya nggaulu ivei: ‘Tona gahaitu batena mangepe tapi ledo ntoto rasanira batuana. Ira batena manggita tapi ledo ntoto rasanira nuapa najadi.

¹⁵Sabana tona gahaitu nakaa bagara, bo ira aga netibongo, bo matara nipiriramo. Ane ledo nipoviara ivehaitu rakita nu matara anu najadi, raepe ntalingara bo rasanira batuana, rapahara anu nakana bo manjili nte Yaku, ala Kupakabelo ira.’ ” (Yesaya 6:9-10)

¹⁶Bo napolamo tesa i Yesus ka anaguruNa, “Tapi ane komiu, Alatala mpuu-mpuu nombadekei belo ka komiu, sabana matamiu nanggita anu nipoviaKu, bo talingamiu nangepe tesaKu.

¹⁷Pariaramo tesaKu hitu, nadea nabi bo tona nanao ntanina anu natuvu nggaulu madota manggita anu nikitamiu, tapi ledo nikitara. Ira mpuu-mpuu madota mangepe anu niepemi, tapi ledo niepera.”

¹⁸“Jadi, epemo batuana porapa toposavu nitesaKu pangane:

¹⁹Savua nanavu ri dala nirapaka tona nangepe tesa Poparenta nu Alatala tapi ledo nisanira batuana. Bo nakavamo Magau nu Seta mangagosi tesa haitu lako riarantaira.

²⁰Savua nanavu ri tana navatu nirapaka tona anu nangepe Tesa nu Alatala bo kaliu-liu nadamba nantarima tesa haitu.

²¹Tapi ledo naroso pomparasayara, nasimbayu eva tuda-tuda ledo naroso pokalena. Tempo ira nipandasa bo nipakasusa sabana nomparasaya Tesa haitu, kaliu-liu nouramo pomparasayara.

²²Savua nanavu ranggarui nirapaka tona nangepe Tesa nu Alatala bo niparasayara. Tapi ira aga nasesa nompekirika katuvura mboto riaradunia hitu, bo ira aga naino ka doi. Haitu pura-pura nangupi Tesa nu Alatala sampe ledo riaselena riaranggatuvura.

²³Tapi savua nanavu ri tana naboya nirapaka tona nangepe Tesa nu Alatala bo nipariarara sampe naria mpuu-mpuu asele riaru nggatuvura. Naria sanu aselena saatu-nggani kadeana, naria onopulu-nggani kadeana bo naria talupulu-nggani kadeana.”

²⁴Naria porapa ntanina nitesa i Yesus ka todea haitu ivei: “Poparenta nu Alatala nirapaka tona hau nosavu savua tobelona ri taluana.

²⁵Tapi naria sambongi tempo pura-pura tona naturumo, nakavamo balina nombakamburaka vua jono ri talua haitu pade nalaimo ia.

²⁶Natuvumo pae haitu sampe nesuvumo vulina, bo nikita muni jono natuvu ri tatanga mpae haitu.

²⁷Jadi tona nigaji ntupu ntalua haitu hau nompekutana tupu ntalua, ‘Tua, savua tobelona nitudamiu ri talua hitu. Lako ri umba tano kavoko haitu?’

²⁸Nesanamo tupu ntalua, ‘Haitu pokarajaa nu baliku.’ Naupu haitu nanguli vaimo topokarajaa, ‘Pua, ane rapokonomiu, kami hau mombarebu jono haitu.’

²⁹Tapi nanguli tupu ntalua, ‘Nee! Ane rarebumiu jono haitu, bara maria muni pae materebu sanggani nte jono.

³⁰Palambamo jono matuvu mosanggani ante pae sampe makava tempona mokato. Damo kuuli ka topokato ngena, pasiromu ntani ruru jono-jonona, pade rapou bo rapalabusi. maupu sia, pade rapasiromu pae bo raboli riaru gampiriku.’ “

³¹Pade naria porapa ntanina nitesa i Yesus ka todea ivei: “Poparenta nu Alatala namala nirapaka batu mandoe anu niala ntona bo nitudana ri taluana.

³²Nau batu mandoe haitu nakodi ntoto, tapi ane natuvumo, najadi sampuu kayu nambasopa pade uta-uta ntanina, sampe tonji-tonji nakava novia jumuna ri tingguna.”

³³Naupu sia nitesa i Yesus vaimo sangu porapa ntanina. NiuliNa, “Poparenta nu Alatala nasimbayu eva raga niala nu mombine bo niposigalona ante talu-

njuka labu nu gando. Naupu nipasigalona, nenggamba puramo labu gando haitu.”

³⁴Pura-pura pepatuduki pangane nitesa i Yesus ka todea ante nompake porapa. Ledo ria Ia nompatuduki ledo nompake porapa.

³⁵Ivesiamo kadupana tesa nu Alatala nipasimbayu nabi nggaulu ivei: “Yaku mompake porapa ane motesa ka ira. Ivesiamo Kutesa anu nitabuniaka lako ri pompajadi dunia.” (Mazmur 78:2)

³⁶Naupu haitu i Yesus nompalaisi todea haitu bo nanjili hau ri banua. Pade nakava anaguruNa nanguli ka Ia, “Guru, tulungi tesa pakalanto ka kami batuana porapa pangane, jono natuvu ri talua pae.”

³⁷Nesana i Yesus, “Yaku, Ana nu Manusia, nirapaka toposavu pae tobelona.

³⁸Dunia nirapaka talua haitu. Tona anu najadi todea riaru Poparenta nu Alatala nirapaka savua tobelona. Bo topangoseaka Magau nu Seta nirapaka jono.

³⁹Magau nu Seta nirapaka bali anu nokamburaka vua jono. Kaupu nu Dunia nirapaka tempo nokato bo malaeka-malaeka nu Alatala nirapaka topokato.

⁴⁰Eva jono nipasiromu bo nipalabu riaru apu, ivesia muni anu majadi ri Kaupu nu Dunia.

⁴¹Yaku, Ana nu Manusia mombatudu malaeka-malaekaKu hau nte todea ri PoparentaKu mompasiromu pura-pura tona anu nompakanavu roa riaru dosa bo pura-pura tona ntanina anu novia nadaa.

⁴²Ira pura-pura ratedeaka riaru apu narakaa anu navaya-vaya. Ri situmo ira aga motumangi-mangi bo masinggiki baga ante kasusa rara.

⁴³Tapi tona nanao pokaingguna kana mareme eva mata eo riaru Poparenta nTuamara Alatala. Isema-sema naria talinga, pariaramo tesaKu hitu!”

⁴⁴Nanguli i Yesus, “Kabelona majadi todea riaru Poparenta nu Alatala nasimbayu eva bulava nitabuniaka ri tana. Naria tona nanggava bulava haitu bo nadamba mpuu rarana. Jadi niivuna mpanjili bo hau nipobaluna pura-pura

mbara-mbarana. Bo ali mbara-mbarana haitu nipakena nangali tana nipanggavana bulava haitu.”

⁴⁵“Ivesia muni kabelona majadi todea riaru Poparenta nu Alatala nasimbayu ante mutiara nagaya mpuu ri porapa hitu: Naria topopagoli mutiara anu nangelo-ngelo mutiara anu nasuli alina.

⁴⁶Nikavanapa sangu mutiara anu nagaya mpuu bo nelabi kasuli nu alina, haumo ia nompobalu pura-pura mbara-mbarana bo ali mbara-mbarana haitu nipakena mangali sangu mutiara pangane.”

⁴⁷“Poparenta nu Alatala nirapaka jala ri porapa hitu: Sangu jala bau nitendeaka ntopobau riaru ntasi, bo nompengaya lenje bau nesua riarana.

⁴⁸Naponupa jala, nianggataka ntopompemala baumo bo nitajara hau ri kabatana, pade nonturomo ira nompelisi bau haitu. Bau tobelona nidika riaru tonda, tapi bau ledonabelo nitedeakara.

⁴⁹Ivesia muni majadi ri Kaupu nu Dunia. Malaeka-malaeka nTupu kana hau mombataniaka tona nadaa lako ri tona nanoa.

⁵⁰Tona nadaa ratedeaka riaru apu narakaa anu navaya-vaya, bo ri situmo ira motumangi-mangi bo masinggiki baga ante kasusa rara.”

⁵¹Naupu haitu nekutana i Yesus, “Nisanimiu puramo batuana porapa-porapa pangane?” Nesanamo ira, “Iyo, nisani kami puramo.”

⁵²Jadi nanguli i Yesus ka ira, “Ane guru agama Yahudi majadi topangoseaka Yaku riaru Poparenta nu Alatala, [nisanina pepatuduki nu Atura nu Alatala nasae bo nisanina muni pepatuduki nabaru]. Ia nasimbayu eva tupu banua anu nombasuvuraka lako ri kakalumana mbara-mbara nabaru bo mbara-mbara nasae.”

⁵³Naupu i Yesus nombatesa porapa-porapa haitu, nipalaisiNamo ponturo haitu bo

⁵⁴hau ri ngataNa mboto. Ri sia Ia nompaguru tona ri banua petupura. Natekaja ira nangepe tesaNa, sampe ira nosimpekutana, “Lako ri umba tano nikavaNa

noto eva haitu? Bo lako ri umba muni nikavaNa kuasa novia kabaraka-kabaraka?

⁵⁵Apa ledo Ia haitu ana i Yusuf pande kayu? Apa ledo i Maria tinana? Bo sampesuvuNa langgai i Yakobus, i Yusuf, i Simon bo i Yudas?

⁵⁶Bo sampesuvuNa mombine nonturo muni ri ngatata hitu! Lako ri umba pura nikavaNa noto bo kuasa haitu?”

⁵⁷Bo naduamo rarara nanggita Ia bo nipoarara pepatudukiNa. Tapi nanguli i Yesus ka ira, “Saito nabi nibila ntona ri umba-umba ngata rakalauna, tapi ri ngatana mboto bara ri banuaNa mboto ia ledo nibila.”

⁵⁸Bo sia sampe ledo nadea kabaraka nipovia i Yesus ri sia, apa ledo niparasayara.

Matius 14

¹Tempo haitu topoparenta ri bagia Galilea, Magau Herodes Antipas. Niepena kareba i Yesus

²bo niulina ka pangga-pangga mbaso anu nantulungi ia, “Natantumo Ia haitu i Yohanes Topediu! Natuvu mpanjilimo lako ri kamatena! Sia sampe Ia nakuasa novia kabaraka-kabaraka!”

³⁻⁴Iveimo tesa kamate i Yohanes Topediu: Bara sakuya kasaena dopame haitu, Magau Herodes nangagosi berei sampesuvuna mboto, haitumo i Herodias, berei i Filipus. I Yohanes Topediu nasaro nangonteaka Magau Herodes nanguli, “Ledo masipato komiu mompoberei eramiu mboto! Pokainggumiu haitu nombaliunaka Atura nu Alatala.” Jadi i Herodes nantudu tona mombasaka i Yohanes bo mombatipunggu ia bo mombasuaraka ia riarar ntarunggu.

⁵Kakanana Magau Herodes madota mompatesi i Yohanes, tapi naeka ia ante todea, sabana i Yohanes nirekera nabi.

⁶Naria saeo nipoviara posusa eo jadi i Herodes. Kamanana, haitumo ngana randaa i Herodias, nolodi ri ngayo ntoposusa haitu. Nadamba mpuumo rara i Herodes nanggita ia nolodi

⁷Sampe ia nojanji bo nosumpa ka kamanana haitu. Niulina, “Nuapa-nuapa muperapi kudekei ka iko!”

⁸Nangepe tesa i Herodes haitu, i Herodias nantudu anana merapi ivei: “Keni ka yaku ri sii balengga i Yohanes Topedi nituu ri dula.”

⁹Nangepe perapi haitu, nasusa mpuumo rara i Herodes. Tapi naupa ivesia, nituduna tona novia anu niperapi nu randaa pangane, sabana ia nojanji bo nosumpa ri ngayo ntoposusa.

¹⁰Nitudunamo tantarana hau ri tarunggu mombatampa balengga i Yohanes.

¹¹Balengga haitu nituura ri bavo dula niken bo nidekei ka randaa haitu. Naliutaka sia, randaa pangane nanggeni balengga haitu ka tinana.

¹²Nangepe kajadia haitu, nakavamo ana-anaguru i Yohanes mangala karobata i Yohanes, bo nitanara ri dayo. Naupu sia, hau ira nopakilu ka i Yesus namatemo i Yohanes.

¹³Tempo i Yesus nangepe kareba i Herodes nangelo Ia, nipalaisiNa ponturo haitu. NipesaviNa sakaya bo hau saitoNa ri ponturo kalinona. Tapi niepe ntodea nalaimo i Yesus, ira muni nompalaisi ngata-ngatara bo hau nolipa ri kabatana mantuntuni Ia.

¹⁴Tempo i Yesus nanau lako ri sakaya, nikitaNa nadea mpuu tona nompopea Ia. Naasi mpuumo mataNa nanggita ira, bo nipakabeloNamo tona nadua.

¹⁵Nanggoviamo, domo masae mabongimo, anaguru i Yesus nangaparai Ia bo nanguli, “Guru, mabongimo, bo ponturo hitu nakalinoa. Agina ratuduMiu todea haitu hau ri ngata-ngata napara ri sii ala ira mamala mangali kande.”

¹⁶Tapi nanguli i Yesus ka ira, “Ledo paraluu ira malai. Komiumo mombadekei kande ka ira.”

¹⁷Nesana ana-anaguruNa, “Anu naria nte kami hitu aga lima-angu roti bo rombaa bau.”

¹⁸Nanguli i Yesus, “Keni tumai kande tutu.”

¹⁹Naupu haitu nituduNa todea monturo ri kavoko. Bo nialaNamō lima-angu roti bo rombaa bau haitu bo nitingoaNamō langi bo nosambaya nanguli tarima kasi ka Alatala. Naupu nosambaya, nitubi-tubiNa roti pangane bo nidekeiNa ka ana-anaguruNa ala rabagi-bagira ka todea.

²⁰Nangande puramo ira sampe nabosu. Naupu haitu anaguruNa nompasromu mpanjili labi kandeana naboli, sapulu rotonda ponupa kadeana.

²¹Kadea ntopangande hamai nitasere lima-njobu langgai, ledo nibila mombine ante ngana-ngana.

²²Naupu haitu nitudu i Yesusmo ana-anaguruNa mesavi sakaya mokolu ka Ia hau ri sambote rano. Apa Ia da mompopanjili todea manjili hau ri ngatara mboto.

²³Naupu Ia nompopanjili todea, nantendemo Ia saitoNa mosambaya ri bulu. Nabongimo, da ri bulu Ia saitoNa.

²⁴Tapi tempo haitu, sakaya anu nipesavi nu ana-anaguruNa nakavaomo lako ri kabatana, ri tatanga ranomo. Sakaya haitu ntompe-ntompena nikeni balumba mbaso sabana poiri mbaso nantomu sakayara haitu.

²⁵Nitasere tinti tatalu bobaya haitu, i Yesus nakava nte ira nolipa ri bavo nu uve.

²⁶Tempo ana-anaguruNa nanggita Ia nolipa ri bavo nu uve naekamo rarara. Nanguli ira, “Mboa tutu, le!” Bo nongare-ngaremo ira, navangгаа puramo ira.

²⁷Tapi kaliu-liu nanguli i Yesus ka ira, “Nee maeka! Pakaroso raramiu! Yaku hii!”

²⁸Bo nanguli i Petrus, “Pue, ane Komiu mpuu tu, rondemo yaku tou nte Komiu molipa ri bavo nu uve.”

²⁹Nesanamo i Yesus, “Kamaimo!” Jadi nanaumo i Petrus lako riarā sakaya, bo nolipamo ia ri bavo nu uve mangaparai i Yesus.

³⁰Tapi nikitanapa karimboso nu poiri mbaso, naekamo rarana. Nompamulamo ia malodo riarā uve rano haitu. Bo nongare ia, “Pue, tulungi yaku!”

³¹Jadi kaliu-liu niodo i Yesus paleNa mombasaka i Petrus. Bo niuliNa ka i Petrus, “Nakura mpuu pomparasayamu! Nakuya iko nolengga-lengga?”

³²Tempo ira randua nompene riara sakaya, kaliu-liu nenontomo poiri mbaso pangane.

³³Bo ana-anaguruNa riara sakaya haitu nantaputu nombasomba Ia. Nanguli ira, “Nakana mpuumo! Komiumo Ana nu Alatala!”

³⁴Nakava ri sambote rano nesampomo ira ri bagia Genesaret.

³⁵Tempo nisani ntupu ngata hamai tona nakava haitu i Yesus, nipatolelera kareba haitu hau ri umba-umba ngata ri bagia haitu sampe pura-pura tona nadua hamai niken i hau nte i Yesus.

³⁶Niperapira nte i Yesus ala ira rapaloga nau aga mombakabe doe bajuNa. Bo pura-pura tona nanggabe bajuNa, kaliu-liu nabelo.

Matius 15

¹Naliutaka haitu bara sako-ndua toFarisi bo guru-guru agama Yahudi lako ri ngata Yerusalem nakava nte i Yesus, bo nekutana,

²“Nakuya anaguruMiu nombaliunaka ada-ada ntotuata nggaulu? Tempo nangande, ira ledo nemanjo ntani ruru nangoseaka ada-adata!”

³Nesana i Yesus, “Nakuya komiu mboto nombaliunaka parenta-parenta nu Alatala bo aga nangoseaka ada-ada ntotuamiu nggaulu?”

⁴Alatala nanguli, ‘Bilamo tina-tuamamu’, bo niuliNa muni, ‘isema-sema nanjalai tuamana bara tinana, ia kana rahuku mate.’

⁵⁻⁶Tapi komiu nompatuduki, kita domo paraluu mombabila bo mombatulungi tina tuamata asaa raulita ka ira ivei: ‘Anu masipato kudekei ka komiu totua, naupumo nipesombaku ka Alatala!’ Jadi ante momparibavo ada-adamiu ivesia, komiu nompandaente tesa nu Alatala!

⁷Komiu tano aga tona nabelo ri sumba! Nakana ntotomo Tesa nu Alatala anu nipasimbayu Nabi Yesaya nggaulu ivei:

⁸Tona hitu nombasomba Yaku aga ri sumba tapi riaru ntaira ledo nipeilira Yaku.

⁹Ledo ntoto ria gunana ira mombasomba Yaku sabana pepatuduki anu nipepatudukikara niulira Atura-aturaKu, tano aga ada-ada nu manusia.’ ”
(Yesaya 29:13)

¹⁰Naupu haitu, i Yesus nompokio todea bo nanguli ka ira, “Epemo ala rasanimiu.

¹¹Anu nesua ri sumba ledo mompakaruto manusia ri panggita nu Alatala. Tapi anu nesuvu lako ri sumba, haitumo anu nompakaruto manusia ri panggita nu Alatala!”

¹²Naupu haitu nakavamo ana-anaguruNa nanggaparai Ia bo nanguli, “Pue, nisanimiu toFarisi nakodi rarara nangepe tesaMiu pangane?”

¹³Nesana i Yesus, “Pura-pura tuda-tuda anu ledo nituda nTuamaKu anu naria ri suruga, kana rarebu ante kalena.

¹⁴Jadi palambakamo toFarisi haitu. Ira eva pakeni naburo. Ane tona naburo mombanini toburo ntanina, natantu ira randua manavu mpasanggani riaru lovu.”

¹⁵Bo i Petrus nanguli ka i Yesus, “Guru, tulungi pakalanto ka kami batuana porapa pangane.”

¹⁶Nesana i Yesus, “Heh! Dopa muni tano nipahamiu?

¹⁷Dopa nisanimiu kande anu nesua ri sumba napola hau ri tai likota bo naupu haitu aga nesuvu bayangimo?

¹⁸Tapi tesa nadaa anu neumba lako riaru ntai bo lako ri sumba, haitumo anu nompakaruto manusia ri panggita nu Alatala.

¹⁹Apa lako riaru ntai neumba mpengaya pekiri nadaa, anu nanggeni tona nepatesi, nobualo, nogau nabuga, nangangga, nosabi dava, bo nesalai.

²⁰Pokainggu haitumo nompakaruto manusia ri panggita nu Alatala. Tapi nangande ante ledo memanja ntani ruru, haitu ledo nompakaruto tona ri panggita nu Alatala.”

²¹Naliu haitu, i Yesus nompalaisi ponturo haitu bo hau ri bagia napara ngata Tirus bo ngata Sidon.

²²Naria saito mombine toKanaan, tona ledo toYahudi, nonturo ri bagia haitu. Ia nakava nte i Yesus bo nongare-ngare ivei: “Pue, Muli Magau Daud! Poasimo yaku hii! Anaku mombine nipesua seta sampe nandasa mpuumo ia!”

²³Tapi i Yesus ledo notingo. Bo ana-anaguruNa nanggaparai Ia bo nerapi nte Ia, “Guru, agina popalai haumo mombine haitu! Ia ledo naupu-upu nongare-ngare bo nantuntuni purita.”

²⁴Nesana i Yesus, “Yaku hii aga nitudu mantulungi muli Israel, anu nasimbayu eva bimba nalipo.”

²⁵Naupu sia, nakavamo mombine haitu nantaputu ri ngayo i Yesus, bo nanguli, “Pue, tulungimo yaku!”

²⁶Nesana i Yesus, “Kana Kutulungi ntani ruru toYahudi.” Ledo masipato kanda nu ngana bo ratedaka ka asu.”

²⁷Nanguli mombine haitu, “Nakana niuliMiu, Pue. Tapi asu muni nabiasa nangande labi-labi kanda anu nanavu lako ri meja ntupuna.”

²⁸Naupu haitu nanguli i Yesus, “Ina, naroso mpuu pomparasayamu! Jadi, kajadimo anu niperapimu tutu!” Bo eva nisuka, tempo haitu muni nabelo mpanjilimo anana mombine haitu.

²⁹Naupu haitu nalaimo i Yesus lako ri ponturo haitu, bo hau noliu ri tinggi Rano Galilea. Bo nantendemo Ia hau ri bulu bo nonturo ri sia.

³⁰Nakavamo todea nte Ia nanggeni roara napunggu, tona naburo, nakejo bo nakoyo, tona nabobo bo nadea tona ntanina anu nadua. Ira nikenri ri ngayo i Yesus bo nipakabeloNa pura.

³¹Nanggita haitu nokumaa mpuumo todea sabana tona nabobo namala notesa, tona nakejo bo nakoyo nipakabelo, tona napunggu namala nolipa bo tona naburo namala nekita. Jadi todea nombabila bo nantoiya Alatala anu nisomba ntoYahudi.

³²Naliutaka haitu i Yesus nompokio ana-anaguruNa bo nanguli ka ira, “Naasi mpuumo mataKu nanggita todea hitu, apa talu-eomo kasaena ira nosangganingani ante Yaku bo sii-sii domo naria kandeara. Ledo madota Yaku mantudu ira manjili ante ara ntai. Nee-nee ira maletu ri dala.”

³³Nesana anaguruNa, “Lako ri umba rapanggavata kande magana radekeita ka tona damo nadea eva hitu? Bo ponturo hitu muni nakalinoa.”

³⁴Nekutana i Yesus, “Sako-angu roti naria nte komiu?” Nesana ira, “Pitu-angu, bo naria bara sako-mbaa bau kodi.”

³⁵Jadi i Yesus nombatudu todea monturo ri tana puramo.

³⁶Bo nialaNa roti bo bau-bau kodi haitu bo nitingoana ri laerava, niuliNa tarima kasi ka Alatala. Naupu haitu nitubi-tubiNa roti bo bau haitu bo nidekeikaNa ka anaguruNa. Bo ira nombatibo-tibo kande haitu ka todea.

³⁷Pura-pura tona haitu nangande sampe nabosu. Naupu ira nangande, anaguru i Yesus nompasiromu labina nikande ntodea pangane, pitu-tonda ponupa kadeana.

³⁸Langgai nangande tempo haitu pata-njobu kadeana, ledo nibila mombine bo ngana-ngana.

³⁹Naupu haitu, i Yesus nombatudu todea manjili. Bo Ia mboto nesavi sakaya lako ri sia hau ri bagia Magadan.

Matius 16

¹Naria bara sako-ndua toFarisi bo toSaduki nakava nte i Yesus madota mombaopa tesaNa. Jadi niperapira i Yesus movia tanda nipokumaaka, haitumo tandana Ia mpuu-mpuu niposumba nu Alatala.

²Nesana i Yesus, “Ane nasolo eo bo nalei langi komiu nanguli, ‘Marava luona bo mapane eo maile.’

³Bo ane kabobayana langi nalei bo ravana nakulimu, komiu nanguli ‘Maudamo ngena.’ Natau komiu nombatasere ravana tapi ledo natau komiu nombatasere tanda-tanda nipokumaaka anu nipovia nu Alatala sii-sii.

⁴Nadaa mpuu komiu natuvu sii-sii! Komiu ledo natutu nangoseaka Alatala. Komiu nerapi ala Kupovia tanda rapokumaaka ntona. Tapi ledo ria sangua tanda rapopakita ka komiu, aga tanda eva anu najadi nte Nabi Yunus nggaulu.” Naupu haitu, nipalaisiNamo ira.

⁵Tempo ana-anaguruNa hau ri sambote rano, nalinga rarara manggeni baku.

⁶I Yesus nanguli ka ira, “Pakabelo-belo. Komiu kana mainga nte ragi ntoFarisi bo toSaduki.”

⁷Nangepe haitu nosimpotesa anaguruNa, “NiuliNa ivesia sabana kita ledo nanggeni roti bara.”

⁸Tapi nisani i Yesus anu nitesara. Haitu sampe niuliNa ka ira, “Nakuya komiu aga notesa roti ledo naria? Nakura mpuu pomparasayamiu!

⁹Dopa nipahamiu? Ledo nitoramiu lima-njobu tona nipakande ante lima-angu roti? Ledo nitoramiu sako-tondapa labina nipasiromumi?

¹⁰Ledo nitoramiu pata-njobu tona nipakande ante pitu-angu roti? Ledo nitoramiu sako-tondapa labina nipasiromumi?

¹¹Tempo Yaku nanguli ka komiu mainga nte ragi ntoFarisi bo toSaduki, ledo nipatujuKu roti mpuu! Nakuya bo ledo nipahamiu?”

¹²Lako rahaitu pade nanoto rarara i Yesus ledo nompopainga ira ka ragi nu roti tapi nipopaingaNa ka pepatuduki ntoFarisi bo toSaduki.

¹³I Yesus bo anaguruNa hau ri bagia napara ngata Kaisarea Filipi. Nakava hamai, i Yesus nompekutana anaguruNa, “Nangoseaka panggava ntodea, isema Yaku, Ana nu Manusia?”

¹⁴Nesana ira, “Naria tona nanguli Komiumo i Yohanes Topediu. Naria muni sanu nanguli Komiu Nabi Elia, bo naria muni tona nanguli Komiu Nabi Yeremia atau nabi ntanina.”

¹⁵Nekutana vai i Yesus, “Jadi, ane komiu, berimba panggavamiu? Isema Yaku hii?”

¹⁶Nesana i Simon Petrus, “Komiu Magau Topepakasalama anu nijanji nu Alatala. Komiu Ana nu Alatala anu natuvu sampe ri kasae-saena.”

¹⁷Nanguli i Yesus, “Mabelo mpuu iko, Simon, ana i Yunus! Sabana, ledo manusia nompopaisani haitu ka komiu. TuamaKu ri suruga nompopaisani ka iko isema Yaku.

¹⁸[_Pomparasayamu tutu tuu_] sampe sangamu i Petrus—batuana ‘vatu’. Bo Yaku mompakajadi iko pakeni ntodea anu nomparasaya Yaku, ala iko mompakaroso rarara, masimbayu eva pandasi vatu nompakaroso banua. Bo ledo maria nuapa-nuapa mamala mombadagi todeaKu, nau kuasa kamatea.

¹⁹Yaku mombadekei ka iko gunji Poparenta nu Alatala, haitumo, kuasa manggeniaka todea anu nomparasaya Yaku. Nuapa-nuapa mutagi ri dunia, haitu muni anu nitagi nu Alatala ri suruga. Bo nuapa-nuapa mudekei rapovia ntona ri dunia, haitu muni anu nidekei nu Alatala ri suruga.”

²⁰Naupu haitu, niuliNa ka anaguruNa, “Nee ratesamiu ka tona Yaku hii Magau Topepakasalama.”

²¹Nompamula lako rahaitu, i Yesus nompakalanto ka ana-anaguruNa Ia kana hau ri ngata Yerusalem, bo hamai Ia rapandasa ntotua ntoYahudi, balengga-balengga ntopanggeni pesomba, bo guru-guru agama Yahudi. Bo Ia rapatesi, bo ri eo katataluna Ia rapakativu mpanjili lako ri kamateNa.

²²Nangepe tesa haitu, i Petrus nompakeni i Yesus notesa ri sabinggana. Pade nionteakana i Yesus bo nanguli, “Nee! Nee, Pue! Nee sampe anu haitu majadi nte Komiu!”

²³Tapi i Yesus neili bo nanguli ka ia, “Palaimo lako ri sii, Magau Seta! Iko, Petrus, aga nombabonto Yaku ʻala ledo Kuoseaka dota nTuamaKu! ʻ Pekirimu tutu pekiri nu manusia, ledo pekiri lako nte Alatala!”

²⁴Naupu sia pade niulikaNa ana-anaguruNa, “Isema-sema madota mangoseaka Yaku, ia kana mombakabasaka dotana mboto bo mpuu-mpuu mangoseaka Yaku. Ia kana majadi nasimbayu eva tona nanjimbuka kayu salibna, ʻhaitumo, ia kana masadia rapandasa nau ia rapatesi sabana nangoseaka Yaku. ʻ

²⁵Isema-sema mantaamaka dota rarana mboto bo matuvu ka karon mboto, ia ledo manggava katuvua nabelo sampe ri kasae-saena. Tapi isema-sema mombakabasaka dota rarana mboto bo mamate sabana ia nangoseaka Yaku, ia matuvu mabelo sampe ri kasae-saena.

²⁶Nuapa gunana rakavamiu pura-pura anu naria ri dunia tapi ledo manggava katuvua nabelo sampe ri kasae-saena? Ledo ria nuapa-nuapa namala rasulamiu ka katuvua nabelo haitu.

²⁷ʻJadi, oseakamo Yaku nau sampe mamate. ʻ Apa domo masae Yaku, Ana nu Manusia makava lako ri suruga ante kuasa bo reme lako nte TuamaKu, mosanggani-nggani ante malaeka-malaekaNa. Bo tempo haitu Kubalasi pura-pura tona nangoseaka pokaingguna.

²⁸Pariaramo tesaKu hitu! Naria bara sako-ndua komiu ri sii ledo mamate ane dopa rakitara Yaku, Ana nu Manusia, makava ri dunia hitu eva Magau.”

Matius 17

¹Ono-mbongi kaliuna haitu, i Yesus nanggeni i Petrus, i Yakobus ante tueina i Yohanes hau nantende bulu nalanga. Aga i Yesus ante ira tatalu naria hamai.

²Tempo ira hamai, nabalimo lenje i Yesus ri ngayora. LenjeNa nareme mpuu eva kareme nu mata eo, bo bajuNa nabula damo nenggila.

³Sampesanika nikita nu anaguru i Yesus haitu randua nabi nggaulu notesa nte i Yesus. Nabi randua haitu i Musa bo i Elia.

⁴Nanggita haitu, i Petrus nanguli ka i Yesus, “Pue, nabelo mpuu kita naria ri sii. Ane madota Komiu, kupovia tatalu sou ri sii, sangu ka Komiu, sangu ka i Musa bo sangu ka i Elia.”

⁵Da notesa i Petrus, nakavamo kulimu nareme nombabungu ira, bo lako riaraku kulimu haitu niepera suara nanguli, “Hitumo AnaKu nipotoveKu. Iamo nompakadamba raraKu. Pariaramo tesaNa”!

⁶Nangepe suara haitu naeka mpuumo rara nu anaguru i Yesus, sampe notungga narapa ri tana.

⁷Tapi i Yesus nanggaparai ira bo nikingisiNa bo niulikaNa, “Pembangumo. Nee maeka!”

⁸Nitingoara, nikitara aga i Yesus saitoNa. Ledo ria tona ntanina.

⁹Notua lako ri buluna haitu, i Yesus nombatagi ira, “Ane Yaku, Ana nu Manusia dopa rapakatuvu mpanjili lako ri kamateKu, nepa ratesamiu ruru ka tona anu dako nikitamiu pangane.”

¹⁰AnaguruNa nompekutana nte Ia, “Nuapa sabana guru-guru agama nanguli Nabi Elia kana makava ntani mokolu ka Magau Topepakasalama?”

¹¹Nesana i Yesus, “Nakana tesara haitu. Nabi Elia kana mokolu makava apa iamo mompakasadia pura-pura.

¹²Tapi Kuuli ka komiu, nakavamo Nabi Elia, aga ledo nisanira isema ia. Ira aga nangeva bo nompakadaa ia. Bo ivesia muni rapandasara Yaku, Ana nu Manusia.”

¹³Lako rahaitu pade nisani anaguruNa Ia nombatesaki i Yohanes Topediu.

¹⁴Tempo i Yesus ante tatalu anaguruNa nanjili bo nosinggava ante todea, nakavamo saito langgai nantaputu ri ngayo i Yesus bo nanguli,

¹⁵“Pue, poasimo anaku! Ia natorompate, nandasa mpuu ia. Ia nasaro nadungga ri apu atau ri uve.

¹⁶Nikeniku ia nte anaguruMiu tapi ledo nipakulera mompakabelo ia.”

¹⁷Nanguli i Yesus ka pura-pura tona hamai, “Natantu mpuu komiu natuvu sii-sii! Komiu nesapuaka mpuu bo ledo nomparasaya! Sakuyapa kasaena Yaku kana mosangani-nggani ante komiu bo mosabara nte komiu pade raparasayamiu! Kenimo tumai ngana tutu!”

¹⁸Bo i Yesus nompopalai seta anu nompakadua ngana haitu, bo nalai mpuumo seta haitu. Bo kaliu-liu nabelomo ngana.

¹⁹Naliu haitu, ana-anaguru nanggaparai i Yesus tempo ira domo ri tatanga ntodea, bo nekutana, “Guru, nuapa sabana ledo nipakule kami nompopalai seta pangane?”

²⁰Nesana i Yesus, “Sabana nakura pomparasayamiu. Pariaramo tesaKu hitu. Nau pomparasayamiu aga nakodi eva batu mandoe, mamala komiu mangulika bulu moitu, ‘Polinja haumo!’ bo bulu moitu molinja mpuu. Ledo ria sangaya anu ledo mamala rapoviamiu.

²¹Tapi seta eva haitu pangane aga namala rapopalai ane komiu nosambaya bo nopuasa.”

²²Tempo i Yesus bo anaguruNa nosangani-nggani ri bagia Galilea, nanguli Ia ka ira, “Domo masae, Yaku, Ana nu Manusia, radekei riaru kuasa manusia nadaa,

²³bo rapatesira. Tapi ri eo katataluna Yaku rapakatuvu mpanjili.” Nangepe tesaNa haitu, nasusa mpuumo rara anaguruNa pura-pura.

²⁴Nakavapa i Yesus bo anaguruNa ri ngata Kapernaum, naria saito topesingara balasitee ka Banua nu Alatala. Ia nanggaparai i Petrus bo nekutana, “Gurumu nombabayari balasitee ka Banua nu Alatala atau ledo?”

²⁵Nesana i Petrus, “Iyo, nibayariNa.” Naupu haitu nanjilimo i Petrus hau ri banua niponturora. Nakava hamai, dopame ia notesa nuapa-nuapa nekutanamo i Yesus, “Simon, berimba pangavamu? Isema kakanana masipato mombabayari balasitee ka magau-magau ri dunia hitu? Todeana mboto atau tupu ngata ntanina anu nidagina?”

²⁶Nesana i Petrus, “Tantu tupu ngata anu nidagina masipato mombabayari.” Nanguli i Yesus, “Ane ivesia, todeana mboto ledo paraluu mombabayari balasitee haitu. ivesia muni kita anu najadi todea nu Alatala ledo paraluu mombabayari balasitee ka Banua nu Alatala.”²⁷Tapi nau ivesia, nee kita mompakakodi rara ntona haitu. Agina komiu hau momeka ri rano. Alamo bau pamulana ramekamiu. Riara ngangana mukava sampeka doi anu magana rapombayari balasiteeta randua. Kenimo doi haitu bo bayarimo balasiteeta ka Banua nu Alatala.”

Matius 18

¹Ri tempo haitu, anaguru i Yesus nakava nte Ia nompekutana, “Pue, isema naogepa riara Poparenta nu Alatala?”

²Nangepe haitu, i Yesus nompokio saito ngana kodi bo nipopeanggaNa ri tatanga nu anaguruNa,

³bo nanguli, “Pariaramo tesaKu hitu! Ane komiu ledo mombabali inggumi bo majadi nasimbayu eva ngana kodi hitu, komiu ledo majadi todea riara Poparenta nu Alatala.

⁴Jadi tona anu mompakaede rarana bo majadi eva ngana kodi hitu, iamo naogepa riara Poparenta nu Alatala.

⁵Bo isema-sema nantarima saito ngana kodi eva hitu sabana pomparasayana Yaku, nitarimana muni Yaku.

⁶Tapi isema-sema mompakanavu saito ngana kodi anu nomparasaya Yaku sampe ia domo momparasaya, nabelopa ane sangu vatu mbaso rapantoesi ri tambolona bo ia rapakalodo rantasi nandala.

⁷Mandasamo tona ri dunia sabana mpengaya-ngaya anu nompakanavu ira riara dosa. Kana maria tona manavu, tapi mandasa mpuumo topompakanavuna!

⁸Ane rapana palemio atau kadamiu manggeni komiu movia dosa, agina pale atau kadamiu haitu ratampasi bo ratedeaka. Aginapa komiu mapudu pale atau mapudu kada asaa komiu matuvu mabelo nte Alatala ri suruga. Aginapa

ivehaitu pade maria robingga pale bo robingga kada tapi kaupuna aga ratedaka riara apu anu navaya sampe ri kasae-saena.

⁹Bo ane rapana matamiu manggeni komiu movia dosa, agina rasuisi bo ratedeaka. Aginapa komiu matuvu ante Alatala ri suruga ante matamiu sablingga. Aginapa ivehaitu pade komiu ratedeaka riara apu narakaa ante matamu robingga.

¹⁰Jadi pakabelo-belo, nee mompandaente ngana kodi eva ngana hitu. Sabana Kuuli ka komiu, malaeka-malaeka anu nombajagai ira, bate-batena naria ri ngayo nTuamaKu ri suruga.

¹¹Bo Yaku, Ana nu Manusia, nakava ri dunia ala mompakasalama tona nasalandala lako ri dala nTupu.”

¹²“Berimba panggavamiu? Rapana naria tona nompiara bimbana saatu anguna bo naria sangu nasalandala sampe nalipo. Nuapa rapoviana? Natantumo rapalaisina bimbana siopulu bo sasio ri bulu bo hau raelona sangu bimbana nalipo haitu.

¹³Pariaramo tesaKu hitu! Ane rakavana mpanjili bimbana haitu, madambapa ia manggita sangu bimbana haitu pade manggita siopulu bo sasio bimbana anu ledo nalipo.

¹⁴Ivesia muni Tuamamiu ri suruga. Ia ledo madota saitoa lako ri ngana kodi hitu malipo pomparasayana.”

¹⁵“Ane sampesuvumiu sampomparasaya movia dosa nte komiu, koi hau nte ia bo uli ka ia salana. Tapi potesa nggalinomo ruru komiu randua. Ane ratarimana tesamiu, mabelo mpanjili posampesuvumiu.

¹⁶Tapi ane ledo madota ia mantarima tesamiu, keni saito atau randua tona ntanina majadi sabi ntesamiu ante ia. Povia ivesia sabana riara Buku Gasa nitulisi ivei: ‘Ane maria tona rapangadu, kana maria randua atau tatalu sabi ala malanto ia mpuu-mpuu nasala.’ (Ulangan 19:15)

¹⁷Ane ia ledo madota mantarima tesara, popaisanimo ka todea topomparasaya. Bo ane ledo madota ia mantarima tesa belo lako nte todea haitu, ia kana

rarekemiu nasimbayu eva tona ledo nosisani ante Alatala bo eva topesingara balasitee nadaa.

¹⁸Pariaramo tesaKu hitu! Nuapa-nuapa nitagimiu ri dunia hitu, haitu anu nitagi muni ri suruga. Bo nuapa-nuapa radekeimiu rapovia ntona ri dunia hitu, haitu muni nidekei nu Alatala ri suruga.

¹⁹Pariara munimo tesaKu hitu! Nau aga nte randua komiu, ane mosangu raramiu mosambaya merapi sangaya, anu niperapimiu haitu tantu radekei nTuamaKu ri suruga ka komiu.

²⁰Apa ri umba-umba tona nasiromu sabana Yaku, nau aga randua atau tatalu, Yaku mboto naria hamai nosangani-nggani ante ira.”

²¹Naupu haitu nakava i Petrus nompekutana nte i Yesus, “Pue, ane maria sampesuvuku sampomparasaya ledo naupu-upu madaa nte yaku, sampe sako-nggani ntoto yaku kana mombaampungia ia? Bara sampe pitu-nggani?”

²²Nesana i Yesus, “Ledo aga pitu-nggani, tapi sampe moatu-atu nggani!

²³NiuliKu ivesia, sabana Poparenta nu Alatala namala rarapaka ivei: Naria saito magau anu madota momparesa doi nipake nu tomaoge.

²⁴Tempo ia nompamula nomparesa doira, naria saito tomaoge niken mantingayo ia. Tomaoge haitu nadea ntoto indana nte magau haitu.

²⁵Tapi ledo nipakule ntomaoge mombabayari indana haitu. Jadi magau nomparenta ala tomaoge haitu rapobalu mosangani ante bereina, ana-anana, bo pura-pura mbara-mbarana rabayarika indana haitu.

²⁶Nangepe haitu, nantaputumo tomaoge ri ngayo nu magau nerapi ante mpuu-mpuu rarana, ‘Pua, posabara ntanimo ruru nte yaku. Pura-pura indaku haitu kubayari pakaupu!’

²⁷Nangepe haitu, naasimo mata magau nanggita tomaoge haitu. Jadi nikabasakana tomaoge bo indana nipakalalinamo.

²⁸Tempo tomaoge haitu nesuvu ri savalikuna, ia nosintomu ante roana anu noinda sakide nte ia. Nikojenamo tambolo roana haitu bo nanguli, ‘Bayari puramo indamu nte yaku!’

²⁹Bo nantaputumo roana ri ngayona nerapi ante mpuu-mpuu rarana, ‘Posabara ntanimo ruru, le. Indaku pura-pura kubayari pakaupu.’

³⁰Tapi ledo nadota tomaoge mangepe perapi roana. Ia aga nombasuaraka roana riara ntarunggu sampe pura-pura indana haitu rabayarina.

³¹Nasusa mpuumo rara ntomaoge ntanina nanggita anu nipovia ntomaoge pangane ka roana. Jadi hau ira nte magau motesa ka ia pokainggu ntomaoge pangane.

³²Nangepe pangadu haitu, magau nompokio tomaoge anu nadaa poviana bo nanguli, ‘Iko nadaa mpuu! Pura-pura indamu nadea ntoto haitu nilalisikumo sabana iko nerapi nte yaku.

³³Nakuya iko ledo naasi matamu nanggita roamu nasimbayu eva yaku naasi matakun nanggita iko?’

³⁴Jadi nagigi mpuu rara magau nanggita tomaoge anu nadaa poviana haitu. Nidekeina tomaoge haitu riara kuasa nu topojava tarunggu rapandasa, sampe rabayarina pakaupu pura-pura indana.”

³⁵I Yesus nompakaupu porapaNa bo nanguli, “Ivesia muni TuamaKu ri suruga movia ka komiu ane ledo raampungimiu sampesuvumiu ante mpuu-mpuu raramiu!”

Matius 19

¹Naupu i Yesus nanguli pura-pura anu pangane, nalaimo Ia lako bagia Galilea hau ri bagia Yudea ri sambote Binangga Yordan.

²Nadea mpuu tona nantuntuni Ia bo ri sia Ia nompakabelo tona nadua.

³Bara sako-ndua toFarisi nakava nte i Yesus mangelo saba nte Ia. Nekutana ira, “Berimba panggavaMiu? Nangoseaka Atura-atura agamata, mamala langgai mogaaka bereina mombine ante sambara tanje?”

- ⁴Nesana i Yesus, “Apa ledo nibacamiu anu nitulisi riaru Buku Gasa? Ri lamba pamulana Alatala nompajadi manusia langgai bo mombine.
- ⁵Naupu haitu niuliNa, ‘Langgai kana mompalaisi tina tuamana bo matuvu mosangani nte bereina bo ira randua kana majadi saito.’
- ⁶Jadi ri panggita nu Alatala topoberei domo randua tapi saito. Sabana haitu, anu nipakasangu nu Alatala, nee rapopogaa nu manusia.”
- ⁷Bo nekutana vaimo toFarisi nte Ia, “Ane ivehaitu tano, nuapa sabana i Musa nompaloga langgai mombadekei sura pogaa ka bereina mombine nipogaakana?”
- ⁸Nesana i Yesus, “I Musa nompaloga komiu mogaaka bereimiu sabana komiu nakaja nipangajari. Tapi ri lamba pamulana ledo ivesia.
- ⁹Jadi epemo tesaKu hitu. Isema mogaaka bereina mombine anu ledo ria nosipogau nte langgai ntanina, bo mompoberei mombine ntanina, ia nobualo.”
- ¹⁰Naupu haitu ana-anaguru i Yesus nanguli ka Ia, “Ane ivesia kasusana atura poberei, aginapa ledo moberei!”
- ¹¹Nesana i Yesus, “Ledo pura-pura tona mompakule ledo moberei, aga ira anu nipakatantu nu Alatala.
- ¹²Apa naria tona ledo noberei sabana ivesia mamimo pantuu ka ia lako ri pompoanaka. Naria muni tona ledo noberei sabana anu nipovia ntona ka ia. Bo naria muni tona ledo noberei sabana dotana mboto, ala ia malogapa mantui pokarajaa nTupu. Isema mompakule matuvu maloa, domo moberei.”
- ¹³Naria sanggani tona nanggeni ana-anara hau nte i Yesus ala radikaNa paleNa ri karora bo mosambaya ka ira. Tapi ana-anaguru i Yesus nompokarau tona gahaitu.
- ¹⁴Nanguli i Yesus ka ana-anaguruNa, “Palambakamo ngana-ngana gahitu makava nte Yaku. Nee ratagi ira. Apa aga tona nasimbayu ingguna eva ngana-ngana gahitu masipato majadi todea riaru Poparenta nu Alatala.”

- ¹⁵Bo nidikaNa paleNa ri balengga ngana-ngana gahaitu merapi belo ka ira. Naupu haitu nalaimo Ia lako ri sia.
- ¹⁶Naria saeo saito kabilasa nakava nte i Yesus bo nekutana, “Guru, pokainggu belo mbana kupovia ala kukava katuvua mabelo sampe ri kasae-saena?”
- ¹⁷Nesana i Yesus, “Nakuya tano iko nompekutana pokainggu tobelona nte Yaku? Aga Alatala nabelo, ledo ria ntanina. Ane iko madota manggava katuvua nabelo sampe ri kasae-saena, oseakamo parenta-parenta nu Alatala.”
- ¹⁸Bo nekutana vaimo tona haitu, “Parenta-parenta umbana?” Nesana i Yesus, “Nee mepatesi, nee mobualo, nee mangangga, nee mosabi dava,
- ¹⁹bilamo tina tuamamu, bo potovemo singgamanusiamu nasimbayu eva pompotovemu karomu mboto.”
- ²⁰Nanguli kabilasa haitu ka i Yesus, “Parenta-parenta tutu nioseakaku puramo. Nuapapa masipato kupovia?”
- ²¹Nesana i Yesus, “Ane iko mpuu-mpuu madota majadi mabelo bo masipato manggava katuvua nabelo sampe ri kasae-saena, koimo pobalu puramo kakalumanamu bo dekei alina haitu ka tona napakasi ala mukava kakalumana ri suruga. Maupu haitu oseakamo Yaku!”
- ²²Nangepe tesa i Yesus, nalaimo kabilasa haitu ante nasusa rarana, sabana nadea mpuu kakalumanana.
- ²³Bo nanguli i Yesus ka ana-anaguruNa, “Pariaramo tesaKu hitu! Nakaja mpuu tona nakalumana matundu nte Alatala bo majadi todeaNa.
- ²⁴Bo Kuuli muni ka komiu, namurapa unta mesua ri puki jaru pade tona nakalumana matundu nte Alatala bo majadi todeaNa.”
- ²⁵Nangepe tesa i Yesus haitu, natekaja mpuumo anaguruNa sampe niulira, “Ane ivesia, isema tano mamala rapakasalama?”
- ²⁶I Yesus nangganoto ira bo nanguli, “Ane aga lako ri pompakule manusia, natantu ledo ntoto maria saitoa rapakasalama. Tapi ane lako ri pompakule nu Alatala pura-pura mamala majadi.”

²⁷Bo nanguli i Petrus, “Peintamo, Pue! Kami nompalaisi pura-pura anu kami bo nangoseaka Komiu. Nuapa rakava kami bara maipia?”

²⁸Nesana i Yesus ka ira, “Pariaramo tesaKu hitu. Yaku, Ana nu Manusia momparenta ante kuasa bara maipia tempo Alatala mompakabaru mpengaya-ngaya. Bo komiu topangoseaka Yaku momparenta mosanggani-nggani nte Yaku bo monturo ri sapulu randua gadera magau bo mombatangara todea Israel, haitumo muli nu sapulu randua ana i Israel.

²⁹Isema-sema nompalaisi banuana bara sampesuvuna bara tina tuamana, bara ana-anana, bara taluana sabana ia nangoseaka Yaku, tona haitu radekei saatu-nggani kadeana. Bo ia muni radekei katuvua mabelo sampe ri kasae-saena.

³⁰Tapi nadea tona narikolu sii-sii, majadi maripuri bara maipia. Bo nadea muni tona anu naripuri sii-sii, majadi marikolu bara maipia.”

Matius 20

¹I Yesus nanguli, “Tempo Alatala momparenta mpo Magau ḷbo mombabalasi pokainggu ntodeaNa bara maipia, masimbayu eva porapa hitu: Naria saito tona notalua anggur. Nasadondo mpuu ia nesuvu lako ri banuana hau mangelo tona ragajina mokarajaa ri taluana.

²Nikavana bara sako-ndua topokarajaa bo nasitujumo ira simbo sampeka doi salaka gajira saeo. Naupu sia nituduna ira hau mokarajaa ri taluana.

³Tinti sasio mpadondona, hau vaimo tupu ntalua mangelo topokarajaa hanupa. Nikitana bara sako-ndua tona ri potomu aga nonturo-nturo bayangi.

⁴Niulina ka ira, ‘Koimo komiu mokarajaa ri taluaku ria, damo kubayari gaji masipato ka komiu.’ Jadi hau mpuumo ira nokarajaa.

⁵Tinti sapulu randua hau vai tupu ntalua haitu mangelo topokarajaa hanupa. Niulina ka ira nasimbayu eva niulina ka tona pangane. Bo ivesia muni nipoviana tinti tatalu nggoviana.

⁶Nitasere tinti alima nggoviana, hau vaimo tupu ntalua haitu mangelo topokarajaa hanupa. Niposinggavakana bara sako-ndua tona aga nonturo-

nturo ledo ria pokarajaana. Nipekutanana, ‘Nokuya komiu njumaeo aga nonturo, ledo nokarajaa?’

⁷Nesana ira, ‘Ledo naria tona nombagaji kami.’ Bo nanguli tupu ntalua haitu, ‘Ane ivesia, koimo pokarajaa ri taluaku.’ Bo hau mpuumo ira.

⁸Nasolopa eo, nanguli tupu ntalua haitu ka mandorona, ‘Pokio puramo topokarajaa bo bayari puramo gajira mompamula nte tona dako nompamula nokarajaa tinti alima sampe ira anu nokarajaa lako ri mpadondoname.’

⁹Nakavamo topokarajaa anu nompamula tinti alima nggoviana, bo ira nidekei simbo sampeka doi salaka.

¹⁰Ivesiamo sampe nakava nte topokarajaa anu nokarajaa lako ri mpadondona. Nisarumakara ira rabayari melabipa pade tona dako nesua nokarajaa nggoviana, tano gaji nidekei ka ira nasimbayu ante tona ntanina haitu, aga simbo sampeka doi salaka.

¹¹Naupu ira nantarima gajira, nongaumo ira ka tupu ntalua iwei:

¹²‘Topokarajaa anu nakava nggoviana aga sajaa nokarajaa. Kami hii nokarajaa ntamo njumaeo ri kapane nu eo, tapi komiu nombadekei ka ira gaji nasimbayu ante kami!’

¹³Nanguli tupu ntalua ka topotesa haitu, ‘Sampesuvu, yaku ledo nasala nte komiu. Botuta gajimiu sampeka doi salaka saeo.

¹⁴Jadi alamo gajimiu bo palaimo. Dotaku mombadekei gaji ka tona anu nakava ri puri nasimbayu eva nidekeiku ka komiu.

¹⁵Ledo mamala yaku movia anu nipodotaku ante doiku mboto? Bara nasiriati komiu nanggita yaku movia nabelo ka tona ntanina?’ “

¹⁶Bo i Yesus nompakaupu porapa haitu ante nanguli, “Ivesia muni bara maipiapa, tona naede panggana sii-sii majadi tona malanga panggana. Bo nadea muni tona nalanga panggana sii-sii majadi tona maede panggana.”

¹⁷Tempo haitu i Yesus bo anaguruNa hau ri ngata Yerusalem. Riara polipara nipokioNa sapulu randua anaguruNa masiromu nompatani lako ri todea bo niuliNa ka ira,

¹⁸“Epemo pakabelo-belo! Sii-sii kita mantende hau ri ngata Yerusalem. Hamai ngena Yaku, Ana nu Manusia, radekeika balengga-balengga ntopanggeni pesomba bo guru-guru agama, bo Yaku rahukura mate.

¹⁹Maupu haitu Yaku radekeira ka tona ledo toYahudi. Bo Yaku rapongei-ngeikara bo racambu pakandasa, bo kaupuna Yaku rapaku ri kayu salib sampe mamate. Tapi ri eo katataluna Yaku rapakatuvu mpanjili.”

²⁰Naliu haitu berei i Zebedeus nakava nte i Yesus niporoa anana randua haitumo i Yakobus bo i Yohanes. Nantaputumo mombine haitu ri ngayo i Yesus sabana naria anu raperapina.

²¹Nekutana i Yesus, “Ina, nuapa nipodotamu?” Nesana totua mombine haitu, “Yaku madota ala anaku randua hitu monturo ri sinjoriMiu tempo Komiu momparenta eva Magau, saito ri sabingga njidiMiu bo saito ri sabingga ngganaMiu.”

²²Tapi nanguli i Yesus ka anana, “Ledo nisanimiu nuapa niperapimiu. Rapakulemiu mombarasai pepandasa anu Kurasai?” Nesana ira, “Rapakule kami!”

²³Bo nanguli i Yesus ka ira, “Nakana mami komiu mombarasai pepandasa eva pepandasa Kurasai. Tapi ledo Yaku nakuasa mompakatantu isema masipato monturo ri sabingga ngganaKu bara ri sabingga njidiKu. Ponturo haitu aga bagia ntona anu nipakatantu nTuamaKu.”

²⁴Tempo sapulu anaguru i Yesus ntanina nangepe perapi roara randua, naraumo rarara.

²⁵Tapi i Yesus nombaronde ira pura-pura bo niuliNa ka ira, “Nisanimiu mbotomo ane todea-todea anu ledo nosisani nte Alatala, topoparentara nompandasa todeara, bo pakeni-pakenira nompatundu todeara.

²⁶Tapi ledo mamala ivesia ante komiu. Isema-sema komiu madota majadi pakenimiu, ia kana majadi topotulungimiu.

²⁷Bo isema-sema madota majadi marikolu, ia kana majadi batuamiu

²⁸masimbayu eva Yaku, Ana nu Manusia. Yaku ledo nakava ri dunia hitu ala ratande ntona, tapi ala mombatulungi tona, bo mombadekei karoKu rapatesi mantolo dosa ntona dea.”

²⁹Tempo i Yesus ante ana-anaguruNa nompalaisi ngata Yerikho, nadea mpuu tona nantuntuni Ia.

³⁰Ri sia naria randua tona naburo nonturo ri soso dala. Nangepe kareba i Yesus noliu ri dala haitu, nongare-ngaremo ira, “Muli Magau Daud! Poasimo kami!”

³¹Tapi todea ri sia narau ka ira randua bo nangonteaka ira, “Nee makanano! Kalinomo!” Tapi toburo haitu aga nantambai nongare ante suara namangga, “Muli Magau Daud! Poasimo kami!”

³²Bo netaamo i Yesus bo nombaronde ira. Nekutana Ia, “Nuapa rapokonomiu Kupovia ka komiu?”

³³Nesana ira randua, “Pue, kami madota mekita!”

³⁴Naasi mpuu mata i Yesus nanggita ira, jadi nituiNa matara bo kaliu-liu namalamo nekita. Bo hau ira randua nantuntuni i Yesus.

Matius 21

¹Tempo naparamo ngata Yerusalem, ira nakava ri ngata Betfage ri kente nu Bulu Zaitun. Ri sia i Yesus nantudu randua anaguruNa mokolu.

²NiulikaNa ira, “Koimo pokolu rangata moitu. Makava hamai, kaliu-liu rakavamiu sangu keledai besina nitataka nosanggani-nggani ante anana. Volemo kaloro nu keledai ntali ana bo umbu tumai.

³Ane maria tona mompekutana komiu, ulika ira, ‘I Pue madota mompake keledai hitu sampalai bo rapopanjiNa vai ngena.’”

⁴Haitu najadi ala madupa tesa nu Alatala anu niboto nu nabi nggaulu ivei:

⁵Ulimo ka tupu ngata Sion, “Peinta! Ritumo magaumi makava nte komiu! Ia naede rarana, Ia nesavi keledai, ana nu keledai.” (Yesaya 62:11; Zakharia 9:9)

⁶Jadi hau randua anaguru i Yesus novia anu nitevaiNa ka ira.

⁷Niumburamo keledai ntali ana hau nte i Yesus. Nakava hamai nidikara baju-baju ndoera ri bengo nu keledai haitu bo nesavimo i Yesus.

⁸Tempo i Yesus noliu ri dala jama, nadea mpuu tona nombavoke baju ndoera ri dala, bo naria sanu nangala tava-tava kayu nitalera ri dala lmombabila i Yesus.

⁹Bo todea ri kolu i Yesus ante topetuntuni ri puri nongare-ngare, “Hosana! Ratoiyamo Muli Magau Daud! Maoge belo ka Magau anu nakava niposumba nu Alatala! Ratoiyamo Alatala ri suruga!” (Mazmur 118:25-26)

¹⁰Tempo i Yesus nesua ri ngata Yerusalem, nagado puramo tona ri sia. Ira nosimpekutana-tanamo, “Isema tano tona hitu?”

¹¹Nesana todea nantuntuni Ia, “Iamo i Yesus, nabi lako ri ngata Nazaret ri bagia Galilea!”

¹²Hau i Yesus nesua ri doyata Banua nu Alatala bo nipopalaiNa pura-pura tona nobalu-balu ri sia. NisumbolinakaNa meja-meja ntoposula doi bo bangku-bangku ntopobalu tonji banggebodo.

¹³NiulikaNa ira, “Riara Buku Gasa nitulisi ivei: ‘BanuaKu kana rauli banua posambaya.’ Tapi komiu ri sii nompajadi Banua nu Alatala hitu petabuni ntopeago!”

¹⁴Naliu haitu tona naburo bo tona nakejo bo nakoyo nakava nte i Yesus ri Banua nu Alatala. Bo nipakabeloNamo ira.

¹⁵Tapi balengga-balengga ntopanggeni pesomba bo guru-guru agama naraumo rarara nanggita kabaraka-kabaraka nipovia i Yesus. Bo nagigimo rarara nangepe ngana-ngana ri Banua nu Alatala nongare-ngare, “Hosana! Ratoiyamo Muli Magau Daud!”

¹⁶Niulikara i Yesus, “Ledo niepeMiu anu niuli ngana-ngana hitu? Nakuya bo ledo nitagiMiu?” Nesana i Yesus, “NiepeKumo. Nakuya tano? Ledo nibacamiu anu nitulisi riara Buku Gasa ivei: Ngana-ngana bo ngana da netomi nipatudukiMiu mantoiya Komiu.” (Mazmur 8:3)

¹⁷Naupu haitu i Yesus nompalaisi ira, pade nesuvu Ia lako ri ngata Yerusalem hau ri ngata Betania. Bo naturumo Ia sambongi hamai.

¹⁸Naeo mpadondo i Yesus ante anaguruNa nanjili hau ri ngata Yerusalem. Naaramo taiNa.

¹⁹Ri soso dala nikitaNa sanggayu kayu ara. Jadi hau Ia nanggaparai kayu haitu, tapi nau aga sangu vuana ledo ria nikavaNa, aga tavana bayangi. Jadi niuliNa ka kayu haitu, “Mompamula eo hitu, domo movua iko!” Bo kaliu-liu nalelemo kayu haitu.

²⁰Nokumaamo rara nu ana-anaguruNa. Nipekutanara nte Ia, “Berimba sampe kayu ara haitu kaliu-liu namate ivehaitu?”

²¹Nesana i Yesus, “Pariaramo tesaKu hitu. Ane komiu momparasaya, bo ledo molengga-lengga raramiu, komiu muni mamala movia anu nipoviaKu ka kayu haitu. Bo ledo aga ivesia, komiu mamala mangulika bulu hitu, ‘Kateunggatakamo! Katedaka rantasi!’, bo majadi mpuu.

²²Ane komiu momparasaya Alatala, nuapa-nuapa raperapimiu riara mposambayamiu majadi mpuu.”

²³I Yesus nesua riara doyata Banua nu Alatala bo nompaguru. Da ranja nompaguru Ia, nakavamo balengga-balengga ntopanggeni pesomba bo totua-totua ntoYahudi. Ira madota mangelo saba, jadi nipekutanara nte i Yesus, “Ante kuasa nuapa nipoviaMiu pura-pura haitu ri Banua nu Alatala? Isema nombadekei kuasa haitu ka Komiu?”

²⁴Nesana i Yesus, “Kupekutana muni nte komiu. Ane rapesanakamiu, Kuuli isema nombadekei kuasa ka Yaku movia anu haitu.

²⁵Uli ka Yaku, isema nombadekei kuasa ka i Yohanes mombadiu tona? Alatala atau manusia?” Jadi nosiulikamo pakeni ntoYahudi, “Berimba kita mesana ka

Ia? Ane raulita i Yohanes nombadiu ante kuasa lako nte Alatala, rauliNa vai ka kita, ‘Ane ivesia, nakuya ledo niparasayamiu i Yohanes?’

²⁶Tapi ane raulita kuasana lako nte manusia, naeka kita nte todea, sabana ira pura-pura nomparasaya i Yohanes mpuu-mpuu nabi nTupu.”

²⁷Jadi nesana ira ka i Yesus, “Ledo nisani kami lako ri umba kuasana.” Jadi i Yesus nanguli ka ira, “Ane ivesia, ledo muni Kuuli ka komiu isema nombadekei kuasa ka Yaku movia mpengaya-ngaya hitu.”

²⁸I Yesus nompekutana pakeni ntoYahudi, “Berimba panggavamiu? Naria saito tuama, randua anana langgai. Nanguli ia ka anana lumbua, ‘Anaku, koimo iko mokarajaa ri talua.’

²⁹Bo nesana ana lumbua, ‘Ledo yaku hau!’ Tapi naliu haitu nanjoso raramo ia bo kana hau mpuumo ia nokarajaa ri talua.

³⁰Hau vai tuamana nte anana karanduana bo niulikana, ‘Anaku, koimo iko mokarajaa ri talua.’ Tapi nesana ngana haitu, ‘Iyo, Tata. Hau yaku.’ Tano mai, ledo hau ia.”

³¹Nanguli i Yesus ka pakeni ntoYahudi haitu, “Jadi lako ri ngana randua haitu, isemana nangoseaka dota ntuamana?” Nesana ira, “Ngana paratamana.” Nanguli i Yesus ka ira, “Nakana pesanamiu. Tapi pariaramo tesaKu hitu, tona nadaa eva topesingara balasitee bo bajinga-bajinga mokolu majadi todea riaro Poparenta nu Alatala, ledo komiu.

³²Sabana, i Yohanes Topediu neonga nompatuduki dala nanao ka komiu, tapi ledo niparasayamiu ia. Tapi topesingara balasitee bo bajinga nomparasaya ia. Bo nau nikitamiu pura-pura anu nikitara, ledo najea komiu, bo ledo ntoto niparasayamiu.”

³³I Yesus nompapola tesaNa ka pakeni-pakeni ntoYahudi. NiuliNa, “Epe porapa ntanina. Naria saito tupu ntalua nombatuda anggur ri taluana. Nivalana ntiku talua haitu bo nikaena lovu ri vatu rapompea vua anggur. Bo nipoviana sou pojaga ri talua haitu. Naupu haitu nibolina talua haitu nte bara sako-ndua topokarajaa mojangina, damo rabagi aselena, bo hau ia ri ngata nakavao.

³⁴Nakavapa tempona mompupu vua anggur, nitudunamo bara sakuya-ndua batuana hau nte topokarajaa talua ala mantarima bagiana lako ri vua anggur.

³⁵Tapi topokarajaa talua haitu nombasaka batua nituduna, saito nibobara, saito nipatesira, bo saito nirempera ante vatu.

³⁶Jadi tupu ntalua nombatudu batua ntanina hau nte topokarajaa taluana. Nadeapa ira haitu pade ira pamulana, tapi ira muni nipovia ntopokarajaa talua nasimbayu mpo batua-batua pamulana.

³⁷Kaupuna nituduna anana mboto apa nipekirina, ‘Natantumo kana rabilara anaku!’

³⁸Tapi tempo topokarajaa talua haitu nanggita ana ntupu ntalua tumai, nosiulikamo ira, ‘Eh! Tumaimo ana ntupu ntalua anu rakaboli mbara-mbara ntotuana. Anumo! Rapatesitamo ia ala talua hitu raalata majadi bagiata.’

³⁹Jadi nisakaramo ana ntupu ntalua haitu bo nikenira hau ri savaliku ntalua bo nipatesira.”

⁴⁰I Yesus nompekutana pakeni ntoYahudi haitu, “Berimba panggavamiu? Ane tupu ntalua haitu manjili ngena, nuapa rapoviana ka topokarajaa haitu?”

⁴¹Nesana ira, “Natantumo rapatesina ira nadaa haitu bo rabolina taluana ka tona ntanina anu madota mombadekei ka ia bagiana lako ri asele ntalua ri tempona.”

⁴²Nanguli i Yesus ka ira, “Natantu nibacaniumo tesa riara Buku Gasa anu [nombatesa Magau Topepakasalama] ivei: Vatu nitedeaka ntopovia banua vatu haitumo anu nopokopa ka banua haitu. Haitu nipovia nTupu, bo nabelo mpuu ri panggitata!” (Mazmur 118:22-23)

⁴³Nanguli muni i Yesus ka ira, “[Ivesia muni sanu komiu nompouara Yaku.] Jadi Kuuli ka komiu, bagiामी riara Poparenta nu Alatala raala lako nte komiu bo radekei ka tona ntanina anu mangoseaka dota nu Alatala.

⁴⁴Bo isema-sema manavu ri vatu haitu marupusaka, bo isema-sema rarumpi nu vatu haitu maoya mpeje.”

⁴⁵Tempo balengga-balengga ntopanggeni pesomba bo toFarisi nangepe porapa i Yesus haitu, nisanira porapa-porapa gahaitu nipambela ka ira.

⁴⁶Jadi nipasimbukura mombasaka i Yesus. Tapi naeka ira magado todea apa nangoseaka panggava ntodea i Yesus haitu nabi.

Matius 22

¹I Yesus nombatesa porapa ntanina ka pakeni ntoYahudi. NiuliNa,

²“Poparenta nu Alatala nasimbayu nte porapa hitu. Naria saito magau novia posusa poboti ka anana langgai.

³Nituduna batua-batuana hau mompokio pura-pura tona anu nigagana makava ri posusa haitu Tapi ira nigaga haitu, ledo ria saitoa nadota hau.

⁴Jadi magau nombatudu batua-batua ntanina ante tevai ivei: ‘Koi ulika ira nigagaku, nasadia puramo. Japi bo ana-ana japi toboyana naupumo nisambale, bo nasadia puramo. Kamaimo tumai ri posusa!’

⁵Tapi tona nigaga ledo ntoto nipeilira pegaga haitu. Ira aga hau nantui bagora mboto. Naria hau ri taluana bo naria hau nombaurusi pogadena,

⁶roara ntanina aga nosaka batua-batua nitudu nu magau haitu pade nibobara bo nipatesira.

⁷Nangepe anu najadi haitu, nagigi mpuumo rara magau. Nituduna tantara-tantarana hau mompatesi topepatesi haitu bo mombatunju ngatara.

⁸Naliutaka haitu nipokiona vai batua-batuana bo nanguli ka ira, ‘Nasadiamo posusa poboti, tapi tona nigagaku ledo masipato makava.

⁹Jadi koimo hau ri dala-dala jama bo isema-sema raposinggavakamiu, gagamo ira tumai ri posusata hitu.’

¹⁰Jadi haumo batua-batuana mompasiromu pura-pura tona raposinggavakara ri dala-dala jama, tona nabelo, bo tona nadaa sampe naponu pura banua posusa haitu ante torata.

¹¹Bo nesuamo magau manggita torata-torata. Ri tatanga ntorata hamai nikitana saito tona ledo nompake pakea posusa.

¹²Nipekutana nu magaumō tona haitu, ‘Vega, nakuya tano komiu nesua ri sii ledō nopakea anu masipato rapake niposusa?’ Tapi tona haitu ledō notingo.

¹³Bo nanguli magau ka batuana, ‘Soomo palena bo kadana bo tedeakamo ia hau ri savalikuna ri ponturo nalanda. Hamai ia motumangi bo masinggiki ante kasusa.’ “

¹⁴Bo i Yesus nompakaupu porapaNa ivei: “Nadea tona nipokio, tapi aga sakide nipelisi.”

¹⁵Naupu haitu bara sako-ndua toFarisi nasiromu notesaki anu rapoviara ala mamala raopara i Yesus motesa.

¹⁶Nitudura bara sako-ndua ana-anagurura bo bara sako-ndua tona nosabingga nte Magau Herodes hau nte i Yesus bo manguli ivei: “Guru, nisani kamimo Komiu tona nanoa. Komiu nompatuduki pakalanto dota nu Alatala ka manusia. Komiu ledō naeka ante isema-sema sabana Komiu ledō nompelenje.

¹⁷Jadi uli ka kami panggavaMiu. Nangoseaka Atura-atura agamata, masipato kita mombabayari balasitee ka Magau Mbaso Kaisar atau ledō?”

¹⁸Tapi nisani i Yesusmo patujura nadaa. Haitu sampe niuliNa, “Komiu tobelo ri sumba! Nakuya komiu nompasimbuku mombaopa tesaKu?

¹⁹Popakita ka Yaku sampeka doi salaka anu nipakemiu mombayari balasitee.” Jadi nipopakitara ka Ia sampeka doi haitu.

²⁰Nekutana i Yesus, “Lenje bo sanga isema nigambara ri doi hitu?”

²¹Nesana ira, “Lenje bo sanga Magau Mbaso Kaisar.” Jadi nanguli i Yesus ka ira, “Ane ivesia, dekei ka Magau Mbaso anu masipato radekei ka Magau Mbaso, bo dekei ka Alatala anu masipato radekei ka Alatala!”

²²Nangepe pesana i Yesus haitu, nokumaa mpuumo ira. Jadi kaupuna nalaimo ira.

²³Eo haitu muni naria bara sako-ndua toSaduki nakava netingu nte i Yesus. ToSaduki nomparasaya tona namate ledō matuvu mpanjili bara maipia.

²⁴Nipekutanara nte i Yesus, “Guru, Nabi Musa nompatuduki ivei: Ane maria langgai namate ledo noana, sampesuvuna langgai kana mompoberei timbalana haitu ala moana bo ana haitu rareke muli nu sampesuvuna anu namate.

²⁵Naria nte kami tona nosampesuvu papitu langgai bayangi. Lumbuana noberei tapi dopame ira njamboko noana, namatemo ia. Naupu haitu timbala haitu nipoberei ntuei nu langgai.

²⁶Dopame noana, namate munimo tueina haitu. Bo ivesia muni najadi ante tuei katataluna sampe ri tuei kapapituna.

²⁷Kaupuna namate munimo mombine haitu.

²⁸Jadi tempo bara maipiapa, ane tona namate matuvu mpanjili, mombine haitu majadi berei isema, apa ia nipobereira pura-pura?”

²⁹Nesana i Yesus, “Nasala mpuu komiu sabana ledo nisanimiu isi Buku Gasa, bo ledo muni nisanimiu kuasa nu Alatala.

³⁰Tempo tona namate matuvu mpanjili bara maipia, katuvura masimbayu eva malaeka-malaeka ri suruga, ira domo moberei.

³¹Berimbamo? Natantu nibacamiu anu nitesa nu Alatala riara Buku Gasa, haitumo tona namate matuvu mpanjili.

³²“Nau nasaemo kamate i Abraham, i Ishak bo i Yakub, Alatala nanguli, ‘Yakumo Alatala nisomba i Abraham, i Ishak bo i Yakub.’ Batuana, ira da natuvu bo nombasomba Alatala. Apa nisanita Alatala ledo nisomba ntona namate tapi Ia nisomba ntona natuvu.”

³³Nangepe pesana i Yesus haitu, nokumaamo todea ka pepatudukiNa.

³⁴Tempo toFarisi nangepe kareba toSaduki domo nokanano sabana nidagi i Yesus, nasiromumo ira.

³⁵Bo saito ira guru agama nompasimbuku mombaopa tesa i Yesus. Nipekutanana ivei:

³⁶“Guru, lako ri pura-pura parenta ri Atura agama, umbana nopoko ntoto?”

³⁷Nesana i Yesus, “Potovemo Alatala Tupumiu ante mpuu-mpuu raramiu, ante pura-pura noto mpekirimiu, bo ante pura-pura pokainggumiu.

³⁸Haitumo parenta pamulana anu nopoko ntoto.

³⁹Bo parenta karanduana nasimbayu ante parenta pamulana ivei: Potovemo singamanusiamiu nasimbayu eva komiu nompotove karomiu mboto.

⁴⁰Pura-pura Atura agama bo pepatuduki nu nabi-nabi nggaulu nopuna lako ri randua parenta haitu.”

⁴¹Tempo toFarisi da nasiromu hamai, i Yesus nompekutana ira,

⁴²“Berimba panggavamiu? Muli isema Magau Topepakasalama anu nijanji nu Alatala nggaulu?” Nesana ira, “Muli Magau Daud nggaulu.”

⁴³Nanguli i Yesus, “Ane ivesia, nuapa sabana Magau Daud nanguli Topepakasalama haitu Puena? Apa ante pekeniaka Nosa Gasa nu Alatala, i Daud nanguli ivei:

⁴⁴Tupu nanguli ka Pueku, ‘Kaimo, ponturomo ri sabingga ngganaKu sampe pura-pura baliMu Kupopekou nte Iko.’ (Mazmur 110:1)

⁴⁵Jadi ane i Daud mboto nanguli Magau Topepakasalama haitu Puena, berimba sampe rauli Ia muli Magau Daud?”

⁴⁶Ledo ria saitoa tona namala nompesanaka i Yesus. Bo nompamula lako ri eo haitu, domo naria tona nabia nombaoa tesaNa.

Matius 23

¹Naupu haitu i Yesus nanguli ka todea bo ana-anaguruNa ivei:

²“Guru-guru agama bo toFarisi nipakakuasa mompatuduki Atura-atura agama nipapola Nabi Musa.

³Haitu sampe komiu masipato mangoseaka bo matundu ri pura-pura anu nipatudukira ka komiu. Tapi nee rapasiala pokainggura, sabana ira mboto ledo nangoseaka pepatuduki nipatudukira ka komiu.

⁴Ira aga nompakadea atura-atura bo ada-ada nakaja raoseaka bo ira nompasuu tona mangoseakana. Tapi ira mboto ledo nadota nombatulungi tona mangoseaka atura bo ada haitu.

⁵Pura-pura poviara aga nipovia ala rakita ntona. Peinta pomboli Tesa Gasa anu nipou ri kirera! Bo peinta, nandoe vera ri bivi bajura ʼmompopakita katutura nangoseaka parenta nTupu,ʼ!

⁶Nipokonora nonturo ri ponturo tobelona ri posusa bo ponturo nibila ri banua petupu.

⁷Nipokonora rabila ntona ri potomu bo nadamba rarara ane tona manggasangai ira ‘Guru’.

⁸Tapi komiu, aga saito Gurumiu bo komiu pura-pura nosampesuvu. Jadi nee radekei tona mombabila komiu bo manggasangai komiu ‘guru’.

⁹Bo nee mompakalanga tona ri dunia hitu ante manggasangai ia ‘Tuama’, sabana aga saito masipato rakasangai ‘Tuama’, Iamo Alatala, Tuamamiu ri suruga.

¹⁰Bo nee radekei tona manggasangai komiu ‘pua’ sabana aga saito masipato rakasangai ‘Pua’, Iamo Yaku, Topepakasalama anu nijanji nu Alatala.

¹¹Isema-sema majadi tomaoge ri tatangamiu, ia kana majadi potuduamiu.

¹²Isema-sema mompakaoge karna mboto, kana rapakaede nu Alatala, bo isema-sema mompakaede rarana mboto, kana rapakaoge nu Alatala.

¹³Tapi mandasa mpuumo komiu guru-guru agama bo toFarisi! Komiu aga nabelo ri sumba tapi nadaa riara. Komiu nombalava tona ntanina majadi todea riara Poparenta nu Alatala. Komiu mboto ledo madota raparenta nu Alatala bo ledo nidekeimiu tona ntanina anu madota raparentaNa.

¹⁴Mandasa mpuu komiu guru-guru agama bo toFarisi! Komiu aga nabelo ri lenje tapi nadaa riara! Komiu nombabagiu timbala-timbala ala raalasimiu banuara. Bo nitabuniakamiu pokainggumiu nadaa haitu ante nosambaya

pakandoe. Haitu sampe mantamo mpuu pehuku rapambela ka komiu bara maipia!

¹⁵Mandasa mpuu komiu guru-guru agama bo toFarisi! Komiu aga nabelo ri lenje tapi nadaa riar!  Nakadiki mpuu komiu mompatuduki tona ntanina mangoseaka pepatudukimiu.  Komiu hau nevote tasi bo nolipa nakavao mangelo nau aga saito tona mesua agamamiu. Bo nesuapa ia, komiu nanggeni ia majadi rongganipa kadaana pade komiu mboto!

¹⁶Mandasa mpuu komiu pakeni-pakeni anu naburo! Komiu nompatuduki ivei: ‘Ane tona mosumpa ante manggasangai Banua nu Alatala, ia ledo rapou sumpana haitu. Tapi ane ia mosumpa ante manggasangai bulava riar Banua nu Alatala, ia rapou nu sumpana haitu.’

¹⁷Nadoyo mpuu komiu! Komiu eva tona naburo! Nisumboliakamiumo! Umbana naogepa, bulava atau Banua nu Alatala anu nompakagasa bulava anu naria riarana? Natantumo Banua nu Alatala naogepa!

¹⁸Komiu muni nompatuduki tona ivei: ‘Isema-sema mosumpa ante manggasangai lanta pesomba ri Banua nu Alatala, ia ledo rapou sumpana haitu. Tapi ane ia mosumpa ante manggasangai pesomba nipesomba ri bavo lanta pesomba haitu, ia rapou sumpana haitu.’

¹⁹Komiu mpuu-mpuu eva toburo! Umbana naogepa, pesomba ka Alatala atau lanta pesomba? Natantumo lanta pesomba ri Banua nu Alatala haitumo naogepa apa lanta haitu nompakagasa pesomba nipesomba ri bavona.

²⁰Sabana haitu, ane tona mosumpa ante manggasangai lanta pesomba, batuana ia nosumpa ante nanggasangai lanta pesomba haitu bo muni ante pura-pura anu nipesomba ri bavona.

²¹Bo ane tona nosumpa ante manggasangai Banua nu Alatala, haitu nasimbayu mpo ia nojanji ante manggasangai Banua nu Alatala bo muni Alatala anu nonturo ri banua haitu!

²²Bo ane tona nosumpa ante manggasangai suruga, haitu nasimbayu mpo ia nosumpa ante manggasangai gadera nu Alatala ri suruga bo muni Alatala anu nonturo ri bavona!

²³Mandasa mpuu komiu guru-guru agama bo toFarisi! Komiu aga nabelo ri lenje tapi nadaa riara! Komiu nombadekei ka Alatala sabagia lako ri sapulu bagia pura-pura aselemiu, nau sampe rampa-rampa. Tapi parenta Atura-atura agama anu nambaso, evamo pokainggu nanoa, mompoasi roa, bo mompakadupa pojanji, haitu ledo nipoviamiu. Kakanana parenta mbasona haitu anu nopoko raoseakamiu, nee muni rakalingasi atura-atura ntanina.

²⁴Komiu nasimbayu mpo toburo nombanini tona ntanina! Komiu nasimbayu mpo tona nombasaringa kanjio lako ri panginuna, tapi unta niomena!

²⁵Mandasa mpuu komiu guru-guru agama bo toFarisi! Komiu aga nabelo ri lenje tapi nadaa riara. Komiu nasimbayu mpo tona notoposi boda bo tubu ri savalikuna tapi riarana batena natagara. Komiu nangoseaka ada-ada agama anu nikita ntona, tapi riara ntaimiu komiu aga nasese bo ledo ria kabasamiu naino ka mbara-mbara ntona.

²⁶Komiu mpuu-mpuu eva tona naburo! Pegasa ntanimo ruru rara nu boda ala bagia savalikuna muni majadi magasa!

²⁷Mandasa mpuu komiu guru-guru agama bo toFarisi! Komiu aga nabelo ri lenje tapi nadaa riara! Komiu nasimbayu mpo dayo nicee naputi. Ri savalikuna nagaya mpuu, tapi riarana aga buku ntomate bo matepudu anu navau.

²⁸Ivesia muni komiu. Ri panggita ntona komiu nireke tonoa. Tapi kakanana komiu aga nabelo ri lenje tapi riara ntaimiu nadaa!

²⁹Mandasa mpuu komiu guru-guru agama bo toFarisi! Komiu aga nabelo ri sumba! Komiu nompakabelo dayo nabi-nabi nu Alatala bo nombavera pakagaya dayo ntonoa.

³⁰Bo niulimiu, ‘Ane kamimo natuvu tempo totuata nggaulu, kami ledo ntoto masituju mompatesi nabi-nabi!’

³¹Tapi ante tesamiu haitu, komiu mboto nompangaku komiu muli ntopopatesi nabi-nabi, ʘbo komiu mpuu-mpuu nanjava totuamiu! ʘ

³²Jadi povia-viamo dosa nasimbayu ante dosa ntotuamiu nggaulu haitu!

³³Komiu tona nadaa bo muli ntona nadaa! Nisarumakamiu komiu ledo rapambela pehuku riarararakaa?

³⁴Pariaramo! Kutudu nabi-nabi bo tona nanoto bo guru-guru tou mompatuduki tesaKu ka komiu. Sanu rapatesimiu, sanu rapakumiu ri kayu salib, bo sanupa racambumiu riarararakaa petupumiu. Bo sanupa raraga-ragamiu lako ri sangu ngata hau ri ngata ntanina.

³⁵Haitumo sampe komiu natuvu sii-sii mombatangu pura-pura raa ntona nipatesi, nompamula lako ri pompatesi i Habel anu ledo nasala, sampe pompatesi i Zakharia, ana i Berekia. Ia nipatesi ntotuamiu ri olo Banua nu Alatala bo lanta pesomba.

³⁶Pariaramo tesaKu hitu! Komiu natuvu sii-sii rahuku sabana pura-pura anu nadaa nipovia ntotuamiu nggaulu!”

³⁷“Heh, komiu toYerusalem! Komiu nompatesi nabi-nabi bo tona nisuro nu Alatala nirempemiu vatu sampe namate! Nadea ngganimo Yaku madota mombasaliku komiu pura-pura, nasimbayu mpo manu tina nombarumutasi anana, tapi ledo nadota komiu.

³⁸Epemo! Banua nu Alatala rapalaikaNa bo domo Ia momporoa komiu.

³⁹Kuuli ka komiu, domo rakitamiu Yaku sampe makava tempona komiu manguli, ‘Maoge belo ka Ia anu nakava niposumba nu Alatala!’”

Matius 24

¹Naupu haitu i Yesus nompalaisi Banua nu Alatala. Tempo Ia nalai, nekaparaimo anaguruNa nombatuduaka ka Ia kagaya nu Banua nu Alatala bo tombi-tombi ri doyatana.

²Nanguli i Yesus ka ira, “Iyo, peintamo kagayana! Tapi pariaramo tesaKu hitu! Makava tempona bara maipia, magero puramo. Domo maria sangua vatu

potembona mosisunju ri bavo vatu ntanina, sabana pura-pura vatu haitu radurasi.”

³Naupu haitu hau ri Bulu Zaitunmo i Yesus. Tempo Ia da nonturo hamai, ana-anaguruNa nakava motesa nggalino nte Ia. Niulira, “Guru, uli ka kami, maipia majadi pura-pura anu nitesaMiu pangane, bo berimba tandana kakavaMiu bo kaupu nu dunia hitu?”

⁴Nesana i Yesus, “Pakabelo-belo! Nee sampe komiu rabagiu!

⁵Apa madea tona makava mompobalu sangaKu. Raulira, iramo Magau Topepakasalama anu nijanji nu Alatala! Bo madea tona rabagiura.

⁶Raepemiu kareba posieva napara nte komiu, bo raepemiu muni kareba posieva ri ngata nakavao. Nee maeka raramiu, sabana haitu pura-pura kana majadi, tapi dopa nakava mpuu kaupu nu dunia.

⁷Apa tempo haitu tona sangata mosieva nte tosangatana, bo magau simbo magau mosieva muni. Ri umba-umba ri dunia maria kamate ara bo lingu-lingu.

⁸Tapi kajadia haitu pura-pura aga kasusa pamulana, eva dua kole nirasai mombine tempo moana.

⁹Tempo haitu komiu rasaka bo radekei ka tona anu mompandasa komiu bo mompatesi komiu. Komiu rapovuu mata ntona lako ri umba-umba ngata sabana komiu topangoseaka Yaku.

¹⁰Bo madea topangoseaka Yaku moura pomparasayara, bo mosipobalu ntali roara sampomparasaya, bo mosipovuu matamo ira.

¹¹Bo madea nabi mpodava meumba bo madea tona rabagiura.

¹²Tempo haitu kadaa ntona mantambai, sampe madea tona domo mosimpotove.

¹³Tapi tona maroo mangoseaka Yaku sampe ri kaupuna, iramo rapakasalama.

¹⁴Bo Kareba Belo nu Poparenta nu Alatala kana rapatolele ri njumangu dunia ala pura-pura manusia mamala mangepena. Maupu haitu, pade makava kaupu nu dunia.”

¹⁵I Yesus nompapola pepatudukiNa ka anaguruNa ivei: “Nabi Daniel nggaulu nombaboto ‘Toperopu anu Nompakarunggu rara nu Alatala.’ (Topombaca tesa hitu kana pariaramo batuana!) Ane rakitamiu anu niboto Nabi Daniel haitu neangga ri Banua nu Alatala,

¹⁶haitumo tandana tona ri bagia Yudea kana mangova malai hau ri bulu ala masalama.

¹⁷Isema-sema nangosanaka ri savaliku nu banuana, tumo mesua rabanua mangala bara nuapa-nuapa. Palaimo masalisa!

¹⁸Isema-sema nokarajaa ri talua, nee manjili ri banua mangala pakeana. Palaimo masalisa!

¹⁹Ri eo haitu mandasa mpuu mombine natiana bo mombine da nompatomi anana apa makaja mpuu malai.

²⁰Perapi nte Alatala ala tempo komiu mangova malai haitu ledo mambela tempo naranindi bara eo penonto.

²¹NiuliKu ivesia sabana ri eo haitu madaa mpuu pepandasa rapambela ka manusia. Dopa sanggani najadi pepandasa eva haitu, nompamula lako ri lamba pamulana sampe sii-sii, bo domo majadi hanupa ri tempo makava.

²²Rapana tempo pepandasa haitu ledo rapakambuku, natantu nau saitoa tona ledo maria matuvu. Tapi lako ri tove nu Alatala ka todea topomparasaya anu nipelisiNa, tempo pepandasa haitu kana rapakambukuNa.

²³Ri tempo haitu, ane maria tona manguli ka komiu, ‘Peintamo! Siimo Magau Topepakasalama anu nijanji nu Alatala!’ Bara maria tona manguli, ‘Hamaimo Ia!’ Nee raparasayamiu tesara.

²⁴Apa kana meumba topodava manguli iramo Magau Topepakasalama, bo meumba muni nabi-nabi mpodava anu movia tanda-tanda nipokumaaka bo kabaraka-kabaraka mombabagiu tona. Ane mamala, nau tona nipelisi nu Alatala rabagiura muni!

²⁵Toramo! Lave nipopaisaniKu mamimo ka komiu dopame majadi haitu pura-pura, jadi nee rabagiu!

²⁶Jadi ane maria tona manguli ka komiu, ‘Peintamo! Magau Topepakasalama naria hamai ri karava bai,’ nee hau! Ane raulira, ‘Peintamo! Ritu rabanuamo Ia,’ nee raparasayamiu tesara!

²⁷Sabana tempo Yaku, Ana nu Manusia, makava mpanjili, kakavaKu malanto rakita ri umba-umba ri dunia, nasimbayu mpo kila novende ri mpandakena bo nevanta sampe ri kasolona.

²⁸Ane rakitamiu tonji kalikoa masiromu, tantu naria matepudu ri sia.”

²⁹“Maupu tempo pepandasa nadaa haitu, ‘mata eo majadi malanda bo bula domo ntoto mareme. Betue-betue manavu lako ri langi bo mpengaya-ngaya anu nakuasa ri langi ragoya.’ (Yesaya 13:10; 34:4)

³⁰Ri tempo haitu meumba tanda ri langi mompakalanto kakavaKu, Ana nu Manusia. Bo pura-pura manusia ri dunia motumangi ante eka nu rara, ane rakitara Yaku, Ana nu Manusia, manau riaru kulimu ante kuasaKu bo kaogeKu nipokumaaka.

³¹Tabue nambaso rapopomoni bo Kutudu malaeka-malaekaKu hau mompasiromu tona nipelisiKu lako ri umba-umba ri dunia.”

³²“Pariaramo pepatuduki lako ri kayu ara. Ane rakitamiu tunggu-tunggu naramata bo tavana nompamula noroya, nisanimiu naparamo tempo mapane.

³³Ivesia muni ane rakitamiu pura-pura kajadia nitesaKu pangane, rasanimiu domo mpuu masae makavamo Yaku.

³⁴Pariaramo tesaKu hitu! Dopame mamate pura-pura tona natuvu tempo haitu, kajadia-kajadia nitesaKu pangane majadimo.

³⁵Langi bo tana malipo, tapi tesaKu bate-batena sampe ri kasae-saena.”

³⁶“Ane eo bo jaa kakavaKu ngena, aga TuamaKu ri suruga, nangisanina. Ledo ria saitoa nangisanina, ledo nisani nu malaeka ri suruga bo Yaku mboto, Ana nu Alatala, ledo nisaniKu.

³⁷Tempo Yaku, Ana nu Manusia, makava bara maipia pokainggu nu manusia masimbayu mpo pokainggu ntona tempo Nabi Nuh nggaulu.

³⁸Dopame uve oge nanggabuntu ri njumangu dunia, manusia aga natuvu ivesia-siamo. Ira aga nangande nanginu bo noberei eva biasa, sampe Nabi Nuh nesua riara kapala.

³⁹Ledo nisani ntodea nuapa rapambela ka ira sampe uve oge nanggabuntu sanggani bo ira naonga puramo. Ivesia muni tempo Yaku, Ana nu Manusia, makava.

⁴⁰Jonjona, ane maria randua langgai mokaarajaa mosanggani ri talua, saito raala, bo saito maboli.

⁴¹Bo ane maria randua mombine mogili mosanggani-nggani, saito raala bo saito maboli.

⁴²Haitu sampe Kuuli, komiu kana mainga, apa ledo nisanimiu maipia makava Tupumiu.”

⁴³“Pariaramo! Ane rasani ntupu banua tinti sakuya bongina topangangga makava, natantumo mainga-inga ia bo ledo rapalambana topangangga mesua rara banuana.

⁴⁴Ivesia muni komiu kana mainga mompopea kakavaKu, apa ledo nisanimiu tempona Yaku, Ana nu Manusia, makava.”

⁴⁵“Rapana naria batua anu nanoto bo natutu neoseaka, iamo raanggataka nu madikana majadi topompasiayu pura-pura batua ntanina riara nu banua. Iamo mompasiayu kande ka batua-batua ntanina eo-eo.

⁴⁶Mabelo mpuu batua haitu ane tempo madikana manjili lako ri polipana, nipovianamo bago niparasaya ka ia.

⁴⁷Pariaramo tesaKu hitu. Madika haitu manganggataka ia majadi topompasiayu pura-pura mbara-mbarana.

⁴⁸Tapi mandasa mpuu ane batua haitu madaa pokaingguna bo nipekirina riara ntaina ivei: ‘Wee! Da masaepa pade manjili madikaku.’

⁴⁹Bo ia aga nombaboba batua-batua ntanina bo aga nangande nanginu mpasangani-nggani ante tona nalangu.

⁵⁰Tapi tempo batua haitu movia madaa ivesia, sampesanika madikana manjili ri eo bo jaa ledo nisanina.

⁵¹Bo batua haitu rapatesi. Ia ratedeaka riara narakaa, ponturo ntona aga nabelo ri sumba. Hamai ira motumangi-mangi bo masinggiki baga ante masusa mpuu rara.”

Matius 25

¹“Tempo Yaku makava mpo Magau, [maria tona mainga bo maria tona ntanina malinga] nasimbayu nte porapa hitu: Naria sapulu randaa hau mantomunaka boti langgai, simbo nanggeni poindona.

²Alima ira nadoyo, bo alima nanoto.

³Randaa nadoyo nanggeni poindo tapi ledo nipakasadiara lana raisi ri poindora ane maotimo lanana.

⁴Tapi randaa nanoto, nanggeni poindo bo nipakasadiara munimo lana raisi ri poindora ane maoti ngena lanana.

⁵Nasae mpuu nipopeara, dopa-dopa nakava boti langgai sampe naroyo matara bo namonjo puramo.

⁶Natanga bongi naria tona nongare, ‘Ritumo boti langgai! Kamaimo kadambanaka ia!’

⁷Nangepe haitu, kaliu-liu nembangumo sapulu randaa haitu bo simbo nompakasadia poindona.

⁸Bo nanguli randaa-randaa anu nadoyo ka roara nanoto, ‘Lea, dekei ka kami sakide lanamiu. Mapayamo poindo kami!’

⁹Nesana randaa nanoto, ‘Ledo magana ngena lana raisi ri poindo kami ane radekei ka komiu sanu. Aginapa komiu mangali lana nte topobalu lana.’

¹⁰Jadi haumo randaa-randaa nadoyo mangali lana. Tapi tempo ira da ri tatanga dala hau mangelo lana, nakavamo boti langgai. Bo randaa-randaa anu nasadia

poindona, nesua rabanua posusa nosanggani-nggani ante boti langgai. Naupu haitu niupimo vamba.

¹¹Naupu sia nakava munimo alima randaa nadoyo pangane. Bo nongaremo ira lako ri savalikuna, ‘Pua! Tulungi, buka ka kami vamba!’

¹²Tapi nesana boti langgai, ‘Ledo nisaniku komiu!’ “

¹³I Yesus nompakaupu porapaNa ivei: “Haitu sampe komiu kana mainga-inga, apa ledo nisanimiu eona atau jaana Yaku makava.”

¹⁴“Tempo Yaku makava mpanjili masimbayu nte porapa hitu: Saito madika nopatuju hau ri ngata nakavao. Dopame ia hau, nirondena batua-batuana bo niparasayana ka ira kakalumanana.

¹⁵Saito niparasayana ka lima-njobu mpeka doi bulava, saitopa niparasayana ka ronjobu mpeka doi bulava, bo saitopa niparasayana ka sanjobu mpeka doi bulava. Ira niparasaya ka doina nangoseaka pompakulera mompopogoli doi. Naupu haitu hau ia ri polipana.

¹⁶Tona niparasayaka lima-njobu mpeka doi bulava kaliu-liu hau nompagoli doi haitu sampe nikavana anana lima-njobu mpeka muni.

¹⁷Ivesia muni tona anu niparasayaka ronjobu mpeka doi bulava hau nipagolina doina haitu sampe nikavana anana ronjobu mpeka muni.

¹⁸Tapi tona niparasayaka sanjobu mpeka doi bulava haitu, hau nikaena lovu bo nitabuniakana doi nu madikana.

¹⁹Naliu haitu nasae mpuu pade nanjili madika. Nanjilipa ia, nirondenamo batuana ala rakitana berimba ira nombaurusi doina.

²⁰Nakavamo batua niparasayaka lima-njobu mpeka doi bulava haitu nanggeni doi bo anana lima-njobu mpekapa anu nikavana. Bo niulina, ‘Pua, komiu nomparasaya ka yaku lima-njobu mpeka doi bulava bara ipia. Peintamo! Nipagoliku doi haitu sampe nanggava anana lima-njobu mpeka muni.’

²¹Nanguli madika, ‘Nabelomo! Komiu batua nabelo, natutu nantui bago anu niparasayaka komiu. Komiu namala niparasaya ante mbara-mbara sakide.

Sabana haitu, mbara-mbara nadea kuparasayaka komiu. Kamaimo madamba mosangani ante yaku.’

²²Bo nakava munimo batua anu niparasayaka ronjobu mpeka doi bulava. Nanguli ia, ‘Pua, komiu nomparasaya ka yaku ronjobu mpeka doi bulava bara ipia. Peinta vei. Nipagoliku doi haitu sampe nanggava anana ronjobu mpeka.’

²³Nanguli madika, ‘Nabelomo! Komiu batua nabelo, bo natutu nantui bago niparasayaka komiu. Komiu namala niparasaya ante mbara-mbara sakide. Sabana haitu, madea kuparasayaka komiu. Kamaimo madamba mosangani ante yaku.’

²⁴Naupu haitu nakavamo batua niparasayaka sanjobu mpeka doi bulava. Nanguli ia, ‘Pua, nisaniku komiu tona nasoa. Komiu nangala asele ntalua anu ledo potudamiu bo komiu nosombe anu ledo posavumiu.

²⁵Naeka raraku, jadi nitabuniakaku ralovu doimiu. Peintamo! Hitumo doimiu, Pua.’

²⁶Bo nanguli madika, ‘Iko batua nadaa bo nasanda! Nisanimu yaku nangala asele ntalua anu ledo potudaku, bo nosombe anu ledo posavuku.

²⁷Ane ivesia, nakuya tano ledo nidekeimu doiku ka tona mompopoana doi ala tempo yaku makava, mamala kualala mpanjili doiku ante anana?’

²⁸Bo niuli madika ka batuana ntanina, ‘Alamo doi bulava sanjobu mpeka haitu lako nte ia, bo dekei ka batua pangane, anu naria sapulu-njobu mpeka!

²⁹Apa isema naria madea, kana ratambai ka ia sampe madea mpuu nte ia. Tapi isema naria aga sakide, raalasi puramo lako nte ia.

³⁰Bo tedeakamo batua anu ledo ria gunana haitu hau ri savalikuna ri kalandana. Hamai ia bate-batena motumangi bo masinggiki ante susa rara.’ “

³¹“Tempo Yaku, Ana nu Manusia makava mpanjili ri dunia ante reme bo kuasaKu, nosangani-nggani ante malaeka-malaekaKu, Yaku monturo ri Gadera PoparentaKu mombatangara mpo Magau.

³²Bo pura-pura manusia rapasiromu ri ngayoKu bo Yaku mogaaraka ira majadi rolunu, nasimbayu mpo topoevu nogaaraka bimbana bo tovauna.

³³Bimba, [haitumo tona novia dota nu Alatala] rapatani ri sabingga ngganaKu, bo tovau, [haitumo tona nadaa] rapatani ri sabingga njidiKu.

³⁴Bo Kuuli ka ira ri sabingga ngganaKu ivei: ‘Kamaimo komiu nipobelo nTuamaKu. Pesuamo riarra KamagauaKu, naria ponturo ri sii nipakasadia ka komiu lako ri lamba pamulana.

³⁵Sabana tempo naara taiKu, nipakandemiu. Tempo nabai tamboloKu, nipainumiu. Nau Yaku tosangatana, nitarimamiu ri banuamiu.

³⁶Tempo Yaku ledo ria pakeaKu, nidekeimiu ka Yaku pakea. Tempo Yaku nadua komiu nompelioda Yaku. Tempo Yaku nitarunggu komiu nakava nanggita Yaku.’

³⁷Bo ira ri sabingga ngganaKu maingu rarara bo manguli, ‘Pue, ipia nikita kami naara taiMiu bo nipakande kami? Ipia nikita kami Komiu nabai tambolo bo nipainu kami?’

³⁸Ipia Komiu tosangatana bo kami nantarima Komiu ri banua kami? Ipia nikita kami Komiu ledo nopakea bo nidekei kami pakea ka Komiu?’

³⁹Ipia nikita kami Komiu nadua? Ipia Komiu nitarunggu bo kami hau nompelioda Komiu?’

⁴⁰Bo Yaku, Magau, mesana, ‘Pariaramo tesaKu hitu! Belo nipoviamiu ka sampesuvu-sampesuvuKu hitu, nau tona naede panggana, haitu nasimbayu mpo belo nipoviamiu ka Yaku.’

⁴¹Maupu haitu Kuuli ka ira ri sabingga njidiKu, ‘Palaimo lako nte Yaku, komiu anu nihuku nTuamaKu! Koi hau riarra apu anu navaya sampe ri kasae-saena nipakasadia ka Magau nu Seta ante malaeka-malaeka anu nangoseaka ia.

⁴²Apa tempo naara taiKu, ledo nipakandemiu. Tempo nabai tamboloKu ledo nipainumiu.

⁴³Yaku toangatana tapi ledo nitarimamiu Yaku ri banuamiu. Yaku ledo nopakea tapi ledo nidekeimiu pakea ka Yaku. Yaku nadua bo nitarunggu, tapi komiu ledo nakava nompelioda Yaku.’

⁴⁴Bo ira manguli ka Yaku, ‘Pue, ipia nikita kami naara taiMiu, atau nabai tamboloMiu, atau Komiu toangatana atau ledo nopakea, atau nadua, atau nitarunggu bo kami ledo nantulungi Komiu?’

⁴⁵Bo Yaku mesana ka ira, ‘Pariaramo tesaKu hitu! Tempo komiu ledo nadota nantulungi sampesuvu-sampesuvuKu hitu anu naede panggana, batuana komiu ledo nadota nantulungi Yaku.’ “

⁴⁶Bo i Yesus nompakaupu tesaNa ante nanguli, “Pura-pura tona nadaa haitu rahuku sampe ri kasae-saena. Tapi tona nanao, matuvu mabelo sampe ri kasae-saena.”

Matius 26

¹Naupu i Yesus nompatuduki pura-pura haitu, niulikaNa ana-anaguruNa,

²“Nisanimumo roeopa Eo Mbaso Paskahmo. Bo Yaku, Ana nu Manusia, radekei ka baliKu bo rapakura ri kayu salib.”

³Tempo haitu balengga-balengga ntopanggeni pesomba bo totua-totua ntoYahudi nasiromu ri banua nu Pakeni nTopanggeni Pesomba anu nosanga i Kayafas.

⁴Ira nonia mombasaka i Yesus nggalino ala mamala Ia rapatesi.

⁵Tapi nosiulika ira, “Nee kita movia haitu tempo Eo Mbaso Paskah ala todea ledo magado.”

⁶Tempo i Yesus ante ana-anaguruNa naria ri ngata Betania ira nesai ri banua ntona nosanga i Simon anu nadua oge bara ipia.

⁷Da nangande ira hamai, nakavamo saito mombine nanggeni sangu botolo nipovia lako ri vatu pualam anu noisi lana dupa nasuli mpuu alina. Mombine haitu nombatoli lana dupa ri balengga i Yesus, tandana pebilana ka Ia.

- ⁸Tapi nanggita anu nipovia mombine haitu, naraumo rara ana-anaguru i Yesus bo nanguli, “Nakuya lana dupa haitu aga nipakarugi bayangi?”
- ⁹Lana dupa nasuli haitu masipato rapobalu bo alina radekei ka tona napakasi!”
- ¹⁰Nisani i Yesusmo pekirira, jadi niulikaNa ira, “Nakuya komiu nompakasusa mombine hitu? Anu nipoviana ka Yaku nabelo.
- ¹¹Apa tona napakasi bate-batena maria ri tatangamiu, tapi Yaku ledo.
- ¹²Ante nombatoli lana hitu nte Yaku, ia nompakasadia karoKu ratana bara maipia.
- ¹³Pariaramo tesaKu hitu! Ri umba-umba ri dunia Kareba Belo rapatolele, povia nu mombine hitu ratesa muni ala ratora ia.”
- ¹⁴Naupu haitu, i Yudas, saito lako ri sapulu randua anaguru i Yesus, hau nte balengga-balengga ntopanggeni pesomba
- ¹⁵bo nanguli, “Ane kupobalu i Yesus ka komiu, nuapa radekeimiu ka yaku?” Jadi nibilaramo talupulu mpeka doi salaka bo nidekeira ka i Yudas.
- ¹⁶Nompamula lako ri eo haitu i Yudas nangelo loga nabelo mombadekei i Yesus ka baliNa.
- ¹⁷Ri eo pamulana Posusa Roti Ledo Noragi, nakavamo ana-anaguru i Yesus nompekutana Ia, “Pue, ri umba rapodotaMiu rapompakasadia kami kande Paskah ka kita?”
- ¹⁸Nesana Ia, “Koimo hau ri ngata Yerusalem nte i Yanu, bo uli ka ia ivei: ‘I Guru nanguli, naparamo gantana makava nte Ia. Ia madota mangoseaka Eo Mbaso Paskah ri banuamu mosangani-nggani ante ana-anaguruNa.’ “
- ¹⁹Bo haumo ana-anaguruNa novia anu nitudu i Yesus ka ira, bo nipakasadiaramo kande Posusa Paskah.
- ²⁰Nabongipa, nonturomo i Yesus nangande nosangani-nggani ante ana-anaguruNa.
- ²¹Da nangande ira, nangulimo i Yesus, “Pariaramo tesaKu hitu. Saito komiu mompobalu Yaku ka baliKu.”

- ²²Nangepe haitu, nasusa mpuumo rarara, bo saito-saito nanguli ka Ia, “Pue, tantu ledo yaku niuliMiu.”
- ²³Nesana i Yesus, “Tona notula roti ri uta nosanggani-nggani ante Yaku, iamo mompobalu Yaku.
- ²⁴Yaku, Ana nu Manusia, kana mamate nangoseaka anu nitulisi riaru Buku Gasa. Tapi mandasa mpuu tona mompobalu Yaku! Aginapa tona haitu ledo nipoanaka ntinana.”
- ²⁵Naupu haitu nanguli i Yudas, anu mompobalu i Yesus ngena, “Guru, tantu ledo yaku niuliMiu.” Nesana i Yesus, “Tesamu mboto tu!”
- ²⁶Tempo ira da nangande, i Yesus nangala roti bo nosambaya nanguli tarima kasi ka Alatala. Naupu haitu nitubiNa roti haitu bo nibagiNa ka ana-anaguruNa bo nanguli, “Alamo roti hitu, bo kandemo. Hitumo karoKu.”
- ²⁷Naupu haitu nialaNa muni saboda uve anggur. NiuliNa tarima kasi ka Alatala pade nidekeiNa ka ira bo nanguli, “Panginu puramo komiu
- ²⁸sabana hitumo raaKu rapatiti ka todea ngena ala mompakaasa Pojanji nu Alatala nabaru. RaaKu hitu rapatiti ka todea ala dosa-dosara raampungi.
- ²⁹Toramo tesaKu hitu. Domo Kuinu sanupa uve anggur sampe makava tempona bara maipia Alatala, TuamaKu, momparenta mpo Magau. Ri Poparenta haitumo pade Kuinu uve anggur nabaru mosanggani-nggani ante komiu.”
- ³⁰Naupu haitu ira nodade sanggayu dade mombatoiya Alatala, pade nalai hau ri Bulu Zaitunmo ira.
- ³¹Bo i Yesus nanguli ka ana-anaguruNa, “Bongi hitu komiu pura-pura moleju pomparasayamiu bo rapalaisimiu Yaku, sabana nitulisi riaru Buku Gasa ivei: ‘Kupatesi topoevu bo bimba-bimbana masimpotare.’ (Zakharia 13:7)
- ³²Tapi tempo Yaku matuvu mpanjili, Yaku mokolu ka komiu hau ri bagia Galilea.”
- ³³Nanguli i Petrus, “Nau ira pura-pura moura mompalaisi Komiu, yaku ledo ntoto moura!”

³⁴Nanguli i Yesus, “Petrus, pariaramo tesaKu hitu. Bongi hitu dopame manu mototoroko, talu-ngganimu iko mombasapu Yaku.”

³⁵Nesana i Petrus, “Nau yaku mamate mosanggani ante Komiu, ledo ntoto kusapu Komiu!” Bo ivesia muni niuli nu ana-anaguruNa pura-pura ntanina.

³⁶Naupu sia i Yesus ante ana-anaguruNa hau ri sangu pampa niuli Getsemani. Nanguli Ia, “Ponturomo ri sii. Haunapa Yaku mosambaya.”

³⁷NikeniNa i Petrus bo randua ana i Zebedeus nosanggani nte Ia. Hamai nompamulamo i Yesus nasusa bo napari raraNa.

³⁸Bo niulikaNa gi Petrus, “Nasusa mpuumo raraKu. NirasaiKu eva mamate Yaku! Popea ri sii ruru. Mainga-ingamo bo posambayakamo Yaku!”

³⁹Naupu haitu, i Yesus napola haunapa sakide lako nte ira tatalu bo notungga sampe ri tana nosambaya. NiuliNa, “Tata, ane mamala, Kuperapi ala peparajea anu rapambela ka Yaku, nee rapambela ka Yaku. Tapi nee dotaKu majadi, damo aga dotaMiu majadi!”

⁴⁰Naupu haitu Ia nanjili hau nte anaguruNa tatalu haitu. NikavaNa namonjo puramo ira. NiulikaNa i Petrus, “Ha! Ledo nipakulemu mainga bo mosambaya ka Yaku nau aga sajaa?”

⁴¹Komiu kana mainga pura bo mosambaya ala komiu ledo mambela pesori! Komiu madota movia anu mabelo, tapi ledo nipakulemiu sabana komiu manusia nalente.”

⁴²Naupu haitu, hau vaimo i Yesus saitoNa nosambaya. NiuliNa, “Tata, ane peparajea hitu ledo mamala raala lako nte Yaku, palambamo, damo dotaMiu majadi.”

⁴³Naupu haitu nanjili vaimo Ia nte anaguruNa. Namonjo vaimo ira sabana naroyo gagamo matara.

⁴⁴Bo sangganipa vai Ia nompalaisi ira bo hau nosambaya katalu-ngganina. PosambayaNa nasimbayu ante posambayaNa pangane.

⁴⁵Naupu nosambaya, nanjili vai Ia hau nte anaguruNa bo nanguli, “Berimba komiu? Da namonjo bo da nangosanakapa komiu? Epemo! Nakavamo gantana Yaku, Ana nu Manusia, rapobalu ka tona nadosa.

⁴⁶Pembangumo! Peinta, nakavamo topompobalu Yaku! Haumo kita mosintomuka ia.”

⁴⁷Da notesa i Yesus, nakavamo i Yudas, saito lako ri sapulu randua anaguruNa. Ia nakava nosanggani nte todea nantipale guma bo pato, tona nitudu nu balengga-balengga ntopanggeni pesomba bo totua-totua ntoYahudi.

⁴⁸Lave niuli i Yudas mamimo ka ira tandana ala rasanira umbana i Yesus. Niulina, “Tona kueki, iamo i Yesus. Sakamo Ia!”

⁴⁹Jadi nakava hamai, i Yudas nanggaparai i Yesus bo nanguli, “Tabe, Guru!” Bo niekina i Yesus.

⁵⁰Nanguli i Yesus, “Tutu sampe tumai iko?” Bo kaliu-liu todea haitu nanggaparai i Yesus bo nisakara Ia.

⁵¹Nanggita haitu, saito lako ri anaguru anu nosanggani ante i Yesus, nangosu gumana bo nitimbena batua nu Pakeni nTopanggeni Pesomba sampe napudu talingana.

⁵²Nanguli i Yesus ka anaguruNa haitu, “Pasuamo gumamu! Apa isema-sema metimbe ante guma, ia muni rapatesi nu guma.

⁵³Nisarumakamiau ledo mamala Yaku merapi tulungi nte TuamaKu Alatala? Ane mekitulungi Yaku, masalisa ratuduNa melabi sapulu randua lunu malaekana mantulungi Yaku!

⁵⁴Tapi ane ivesia, ledo madupa tesa riaru Buku Gasa anu nanguli pura-pura hitu kana majadi nte Yaku.”

⁵⁵Pade nanguli i Yesus ka todea ri sia, “Berimbamo? Yaku hii topeago sampe komiu kana tumai ante guma bo pato mombasaka Yaku? Eo-eo Yaku nonturo nompaguru ri doyata Banua nu Alatala, tapi ledo nisakamiau Yaku!

⁵⁶Tapi domo. Kana majadi ivesia mamimo ala madupa tesa nitulisi nabi-nabi nggaulu ri Buku Gasa.” Naupu haitu nipalaika nu anaguruNa puramo Ia.

⁵⁷Bo toposaka i Yesus nangingeni Ia hau ri banua i Kayafas, Pakeni nTopanggeni Pesomba. Tempo haitu, guru-guru agama bo totua-totua ntoYahudi lave nasiromu hamai mamimo.

⁵⁸I Petrus netuntuni nggavao lako ri puri, sampe nakava ri doyata nu banua Pakeni nTopanggeni Pesomba. Nakava hamai, nesuamo ia rara doyata bo nonturo nosangganingani ante topojaga-topojaga ala rasanina nuapa majadi ante i Yesus.

⁵⁹Tempo haitu balengga-balengga ntopanggeni pesomba bo pura-pura topolibu ntanina ri Polibu Mbaso Agama Yahudi nompasimbuku mangelo tona nasadia mosabi dava ala i Yesus mamala rahuku mate.

⁶⁰Nadea tona nakava nosabi dava tapi ledo nikavara salaNa sampe Ia masipato rahuku mate. Kaupuna naria randua sabi nantingayo Polibu Mbaso haitu

⁶¹bo nanguli, “Naria sangganingani tona hitu nanguli ivei: Yaku nompakule mombagerosi Banua nu Alatala bo mombabanguna mpanjili riaru talu-eo.”

⁶²Naupu haitu neanggamu Pakeni nTopanggeni Pesomba bo nanguli ka i Yesus, “Berimba? Ledo Nupesanaka pangadura haitu?”

⁶³Tapi nau ledo nasala, i Yesus ledo notingo. Bo sangganipa Pakeni nanguli ka Ia, “Ulimo ri ngayo nu Alatala anu Natuvu, uli ka kami ane Iko mpuu-mpuu Magau Topepakasalama, Ana nu Alatala!”

⁶⁴Nesana i Yesus, “Nakana niulimiu tu. Pariaramo! Kana makava tempona bara maipia rakitamiu Yaku, Ana nu Manusia, monturo ri sabingga nggana nu Alatala toNeliu KakuasaNa, bo rakitamiu Yaku manau lako ri suruga riaru kulimu.”

⁶⁵Nangepe haitu nagigimo rara nu Pakeni nTopanggeni Pesomba sampe nibitesina mboto bajuna. Niulina, “Ia mboto nompakasimbayu karoNa ante Alatala! Niepemi mboto tesaNa nanjalai Alatala! Domo paraluu sabi-sabi ntanina!

⁶⁶Berimba pantaseremiu?” Nesana ira, “Ia masipato rahuku mamate!”

⁶⁷Naupu haitu naria sanu nantaveulusi lenje i Yesus bo nombaboba Ia. Naria sanupa nosapa Ia

⁶⁸bo nanguli, “He, Magau Topepakasalama anu nijanji nu Alatala! Boto vei, isema nombasapa Iko?”

⁶⁹Tempo haitu i Petrus da nonturo ri savalikuna ri doyata banua haitu. Saito batua mombine anu nokarajaa ri banua Pakeni nTopanggeni Pesomba nanggaparai ia bo nanguli, “Iko muni roa i Yesus toGalilea haitu!”

⁷⁰Tapi i Petrus nesapu ri ngayora pura-pura, “Ledo nakana! Ledo nisaniku nuapa niulimu!”

⁷¹Naupu haitu i Petrus hau ri bobaa nu doyata. Ri sia saito batua mombine ntanina nanggita ia bo nanguli ka tona hamai, “Tona hitu muni nosanggani-nggani ante i Yesus, toNazaret haitu.”

⁷²Tapi i Petrus nesapu vaimo ante nopinda bo nanguli, “Ledo nisaniku tona haitu!”

⁷³Dopa nasae, tona neangga hamai nanggaparai i Petrus bo nanguli, “Natantumo iko muni topangoseaka i Yesus, apa nalanto lako ri enggo ntesamu iko toGalilea!”

⁷⁴Bo nopinda vaimo i Petrus bo nanguli, “Ledo ntoto nisaniku tona haitu!” Bo eva nisuka, nototorokomo manu.

⁷⁵Bo nitora i Petrusmo tesa i Yesus pangane nanguli, “Dopame manu mototoroko ngena, talu-ngganimo iko mombasapu Yaku.” Bo nesuvumo i Petrus notumangi nonjodu-njodu ante nasusa mpuu rarana.

Matius 27

¹Naeo mpadondo, nasadondo mpuu, balengga-balengga ntopanggeni pesomba bo totua-totua ntoYahudi nasiromu nompakatantu i Yesus kana rapatesi.

²Nitipunggura Ia bo nikenira hau nte Gubernur Pilatus.

³Naupu i Yudas nompobalu i Yesus ka baliNa, niepena i Yesus nihuku mate, nanjoso raramo ia. Hau ia nte balengga-balengga ntopanggeni pesomba bo nipopanjinlina ka ira talupulu mpeka doi salaka nitarimana.

⁴Niulikana ira, “Nadosamo yaku! Yaku nompobalu tona ledo nasala bo Ia nihuku mate!” Nesana ira, “Haitu ledo urusa kami! Urusamu mboto!”

⁵Nangepe haitu, nitedaka i Yudas doi salaka haitu hau riaru Banua nu Alatala bo nalaimo ia noloe sampe namate.

⁶Balengga-balengga ntopanggeni pesomba nantidurunaka doi haitu bo nanguli, “Doi hitu doi nisulaka raa. Nantuntuni atura agamata, doi eva hitu ledo namala rapake ri Banua nu Alatala.”

⁷Jadi nasintuvu ira doi haitu rapake mangali salimpu tana anu niuli “Tana Ntopomandu Kura” majadi tana rapodayo ntona ledo toYahudi anu mamate ri ngata Yerusalem.

⁸Haitu sampe tana haitu niuli “Tana Raa” sampe sii-sii.

⁹⁻¹⁰Ivesiamo kadupana tesa nu Alatala nipapola Nabi Yeremia nggaulu anu nanguli ivei: “Ali katuvumu nipakatantu ntoIsrael aga talupulu mpeka doi salaka. Doi haitu nipakera mangali tana ntopomandu kura. nangoseaka anu niparenta nTupu ka yaku.” (Zakharia 11:12-13)

¹¹Tempo i Yesus nantingayo Gubernur Pilatus nekutana Gubernur nte Ia, “Mpuu-mpuu Iko Magau ntoYahudi?” Nesana i Yesus, “Nakana niulimiu.”

¹²Tapi tempo balengga-balengga ntopanggeni pesomba bo totua-totua ntoYahudi nompangadu Ia, nau ledo nasala ledo notingo Ia.

¹³Haitu sampe Gubernur Pilatus nekutana nte Ia, “Ledo niepeMu pura-pura pangadu ntona ka karoMu?”

¹⁴Tapi i Yesus ledo notingo nau sambela, sampe nokumaa mpuu rara Gubernur.

¹⁵Mpae-mpae ri Eo Mbaso Paskah, biasana Gubernur nombakabasaka saito tona nitarunggu nangoseaka pompelisi ntodea.

¹⁶Mpae haitu naria saito tona nitarunggu nisani ntodea nadaa mpuu, sangana i Yesus Barabas.

¹⁷Tempo i Pilatus nombatangara i Yesus, todea nasiromu. Jadi i Pilatus nekutana nte ira, “Isema rapodotamiu kukabasaka ka komiu mpae hitu? I Yesus Barabas atau i Yesus anu niuli Magau Topepakasalama anu nijanji nu Alatala?”

¹⁸I Pilatus nanguli ivesia apa nisaninamo pakeni ntoYahudi nombadekei i Yesus ka ia sabana nasiriati.

¹⁹I Pilatus da nonturo ri Ponturo Potangara haitu, nakavamo saito tona nanggeni petevai nu berei i Pilatus, nanguli ivei: “Nee ratangara parakara ntona ledo nasala haitu! Iamo sampe pangipiku nadaa ibongi.”

²⁰Tapi balengga-balengga ntopanggeni pesomba bo totua-totua ntoYahudi nompakapane rara ntodea ala raperapira i Pilatus mombakabasaka i Barabas ka ira, bo i Yesus rahuku mate.

²¹Nekutana i Pilatus nte todea, “Lako ri ira randua, isema rapodotamiu kukabasaka ka komiu?” Nesana ira, “Barabas!”

²²Bo nekutana vaimo i Pilatus, “Ane ivesia, nuapa kupovia ante i Yesus, anu niuli Magau Topepakasalama anu nijanji nu Alatala?” Nesana ira, “Pakumo Ia ri kayu salib!”

²³Nekutana vai i Pilatus, “Nakuya? Nuapa salaNa?” Tapi ira aga nongare ante suara neliu kamanggana, “Paku Ia ri kayu salib!”

²⁴Kaupuna nalantomo ka i Pilatus ledo ria gunana mompapola motesa ka ira, sabana ira aga nantambai nongare-ngare, sakidepa majadi kagado. Jadi nialana uve, nitoposina palena ri ngayo ntodea, bo niulina ka ira, “Yaku ledo manjimbuka sala lako ri kamate ntona nanao hitu. Komiumo manjimbukana.”

²⁵Nesana todea, “Ivesia mamimo! Damo kami bo muli-muli kami manjimbuka kamateNa!”

- ²⁶Naupu haitu i Pilatus nombakabasaka i Barabas ka ira. Bo nituduna tantarana mombacambu i Yesus bo mombapaku Ia ri kayu salib.
- ²⁷Naupu sia tantara nu Gubernur nanggeni i Yesus hau ri tombi potangara riaru Banua Gubernur bo nirondera pura-pura roara nasiromu nantagui i Yesus.
- ²⁸Nivonjuramo pakea i Yesus bo nipasuaraka Ia baju ndoe nalei-lei mpo baju magau.
- ²⁹Nipoviara songgo nu magau lako ri valaa nggarui bo nidikara ri balenggaNa. Nidekeira ka Ia sangu toko ri pale ngganaNa mpo toko nitipale nu magau-magau. Bo nantaputumo ira ri ngayoNa nompongei-ngeika Ia ante nanguli, “Tabe, Magau ntoYahudi!”
- ³⁰Nitaveulusira Ia bo toko ri paleNa nialara bo nibobakara balenggaNa.
- ³¹Naupupa nipongei-ngeikara ivesia, nivonjuramo baju magau haitu bo nipopasuakara mpanjilimo pakeaNa mboto. Naliu haitu nikenira hau ri savaliku ngata rapaku ri kayu salib.
- ³²Ri tatanga dala tantara-tantara nosintomuka saito langgai lako ri ngata Kirene anu nosanga i Simon. Ia nibarusura manjimbuaka kayu salib i Yesus.
- ³³Ledo nasae, nakavamo ira ri ponturo nosanga Golgota, batuana “Bulu Banga Balengga.”
- ³⁴Nakava hamai, nipainura uve anggur nigalo pakuli napai ka i Yesus. Tapi nipetamiNa sakide, ledomo nadota Ia nanginu hanupa.
- ³⁵Ri siamo ira nombapaku i Yesus ri kayu salib. Naupu haitu, nibagira pakeaNa ante notende lamoro. Isema nambela lamoro, ia manggava pakea haitu.
- ³⁶Naupu haitu nonturomo ira ri sia nombajagai Ia.
- ³⁷Ri toto balenggaNa ri kayu salib haitu nipatakara dopi nitulisi pangadura ivei: HITUMO I YESUS, MAGAU NTOYAHUDI.
- ³⁸Tempo haitu naria muni randua topeago nipaku ri kayu salib ntanina, saito ri sabingga nggana i Yesus, bo saitopa ri sabingga njidiNa.
- ³⁹Tona noliu ri sia nolito-lito balenggara bo nombadee Ia.

⁴⁰Nanguli ira, “NiuliMu Iko mamala mombagerosi Banua nu Alatala bo mombabanguna mpanjili riara talu-eo! Ane Iko mpuu-mpuu Ana nu Alatala, pakasalama karoMu mboto! Panaumo lako ri kayu salib tutu!”

⁴¹Ivesia muni balengga-balengga ntopangeni pesomba bo guru-guru agama bo totua-totua ntoYahudi nombadee-dee Ia. Niulira,

⁴²“Tona ntanina nipakasalamaNa. Tapi peinta vei! KaroNa mboto ledo namala nipakasalamaNa! Ane Ia mpuu-mpuu Magau ntoYahudi, agina Ia manau lako ri kayu salib bo kami momparasaya Ia!

⁴³Ia nanjarumaka Alatala bo niuliNa Iamo Ana nu Alatala! Jadi hitupa rapeintakata ane Alatala madota mompakasalama Ia!”

⁴⁴Bo ivesia muni i Yesus nidee ntopeago-topeago anu nipaku ri kayu salib ri sinjoriNa.

⁴⁵Natongo eo, sampesanika nalandamo njumangata haitu sampe tinti tatalu nggoviana.

⁴⁶Nitasere tinti tatalu nggoviana i Yesus nongare ante suara namangga, “Eli, Eli, lama sabakhtani?” Batuana “Alatala TupuKu, nakuya nipalaisikaMiu Yaku?”

⁴⁷Bara sako-ndua tona anu neangga ri sia nangepe Ia bo nanguli, “Ia nompokio Nabi Elia!”

⁴⁸Saito ira haitu nasalisa hau nangala sangaya eva lomo bo nibanggana riara uve anggur napoi. Naupu haitu nitatakana ri vuntu kayu bo nijujubakana ri sumba i Yesus.

⁴⁹Tapi tona ntanina nanguli, “Nepa! Popea ntani ruru. Rakitata ane Nabi Elia mpuu-mpuu makava mantulungi Ia!”

⁵⁰Naupu haitu i Yesus nongare vai ante suara namangga, bo naponjimo nosaNa.

⁵¹Ri tempo haitu muni kae povombo ri Banua nu Alatala nabite rombite lako ri bavona sampe ri tambena. Bo naria muni lingu mbaso bo vatu-vatu mbaso natebingga.

- ⁵²Nadea dayo natebuka bo nadea tona nanao anu namatemo natuvu mpanjili
- ⁵³bo nesuvu lako riara dayo-dayo haitu. Bo naupu i Yesus natuvu mpanjili nesuamo ira ri ngata Yerusalem, bo nadea tona ntanina nanggita ira.
- ⁵⁴Tempo balengga ntantara nu Magau Mbaso bo tantara-tantarana anu nombajagai i Yesus ri sia, nombarasai lingu mbaso haitu bo nanggita mpengaya-ngaya anu najadi, naeka mpuumo rarara. Niulira, “Tona hitu mpuu-mpuu Ana nu Alatala!”
- ⁵⁵Nadea mombine neangga nakavao sakide nantara kajadia-kajadia haitu. Iramo mombine-mombine anu nangoseaka i Yesus bo nantulungi Ia nompamula lako ri pokarajaaNa ri bagia Galilea.
- ⁵⁶Saito nosanga i Maria Magdalena. Saitopa nosanga i Maria, tina i Yakobus bo i Yusuf. Saitopa berei i Zebedeus.
- ⁵⁷Nasolopa eo, nakavamo saito tona nakalumana nosanga i Yusuf. I Yusuf mai lako ri ngata Arimatea bo ia muni topangoseaka i Yesus.
- ⁵⁸Hau ia nte Gubernur Pilatus nerapi karobata i Yesus. Nangepe perapina haitu, i Pilatus nantudu tantarana nombadekei karobata i Yesus ka i Yusuf.
- ⁵⁹Bo i Yusuf nangala karobata i Yesus haitu, nisompuna ante kae gandisi nalusu anu da nabaru,
- ⁶⁰bo nidikana riara dayo nipoviana ka karonu mboto anu dako nipaa ri watu nobunti. Naupu haitu nidulina watu mbaso mombaupi vamba dayo haitu, bo nalaimo ia.
- ⁶¹Tapi i Maria Magdalena ante i Maria ntanina, nonturo ri sia nantingayo dayo haitu.
- ⁶²Naeo mpadondona ri eo penonto, balengga-balengga ntopanggeni pesomba bo toFarisi hau nosinggava nte Gubernur Pilatus.
- ⁶³Nakava hamai, nanguli ira, “Pua, nitora kami tesa ntopebagiu haitu tempo Ia da natuvu. NiuliNa, ‘Maliu talu-mbongi Yaku matuvu mpanjili.’”

⁶⁴Jadi haitu sampe kami merapi ala komiu mombatudu tantara-tantara hau mombajaga dayoNa ria sampe eo katataluna ala ledo maria loga anaguruNa hau mangala karobataNa bo manguli ka todea, ‘Natuvu mpanjili Ia!’ Ane majadi ivesia, pebagiu kaupuna madaapa pade pebagiuNa pamulana.”

⁶⁵Nesana i Pilatus, “Siimo tantara-tantara. Kenimo ira bo jagaimo dayo pakabelo-belo.”

⁶⁶Jadi hau ira nombamere vatu poupi dayo ala ledo rabuka ntona. Bo nitudura tantara-tantara mombajagai dayo ala ledo maria tona mombabuka dayo haitu.

Matius 28

¹Naliu eo penonto, dopame nebonda eo, ri eo Aka hau i Maria Magdalena bo i Maria ntanina manggita dayo i Yesus.

²Sampesani naria lingu mbaso sabana malaeka nTupu nanau lako ri suruga nombaduliaka vatu poupi dayo. Naupu haitu nonturomo ia ri bavona.

³Lenjena nenggila mpo kila, pakeana naputi mpuu.

⁴Tantara-tantara anu nojaga ri sia naeka mpuu sampe nolete-lete njumanggaro. Nadunggamo ira najadi eva tomate.

⁵Bo nanguli malaeka haitu ka mombine-mombine, “Nee maeka. Nisaniku komiu nangelo i Yesus anu namate nipaku ri kayu salib.

⁶Ia domo ria ri sii. Natuvu mpanjilimo Ia nangoseaka anu niuliNa bara ipia. Kamaimo peinta ponturo nipomboli karobataNa.

⁷Bo koimo masalisa ulika ana-anaguruNa natuvu mpanjilimo Ia. Ia mokolu ka komiu hau ri bagia Galilea. Hamai rakitamiu Ia. Toramo anu nitesaku ka komiu!”

⁸Jadi nalaimo ira nasalisa lako ri dayo. Naeka ira tapi nadamba muni rarara. Nangovamo ira hau manguli anu najadi ka ana-anaguru i Yesus.

⁹Sampesani nariumo i Yesus nosintomuka ira bo nanguli, “Tabe.” Ira nanggaparai Ia bo nanggapui kadaNa mombasomba Ia.

¹⁰Nanguli i Yesus ka ira, “Nee maeka. Koi ulika sampesuvu-sampesuvuKu hau ri Galilea. Hamai rakitara Yaku.”

¹¹Nalaipa mombine-mombine pangane, bara sako-ndua tantara topojaga dayo haitu hau ri ngata nombatesaki ka balengga-balengga ntopanggeni pesomba anu najadi ri dayo pangane.

¹²Balengga-balengga ntopanggeni pesomba nasiromu nolibu ante totua-totua ntoYahudi. Bo ira nasituju mombapepe doi dea ka tantara-tantara haitu.

¹³Niulira ka tantara haitu, “Ulimiu ivei: ‘Tanga bongi pangane nakavamo topangoseaka i Yesus nangangga karobataNa tempo kami namonjo.’

¹⁴Ane Gubernur mangepe tesa haitu, damo kami motesa ka ia komiu ledο nasala, ala ledο makuya-kuya komiu.”

¹⁵Jadi tantara-tantara nangala doi haitu bo nitesa-tesara anu nitudu ka ira. Bo tesa tantara-tantara haitu batena nipatolele ri tatanga ntoYahudi sampe sii-sii.

¹⁶Bo haumo sapulu saito anaguru i Yesus ri sangu bulu ri bagia Galilea anu nipakatantu i Yesus ka ira.

¹⁷Hamai nikitara mpuu Ia bo nantaputu ira mombasomba Ia. Tapi naria sanu nonggai rarara.

¹⁸I Yesus nangaparai ira bo nanguli, “Pura-pura kuasa ri suruga bo ri dunia nidekei ka Yaku.

¹⁹Jadi koimo komiu, hau ri umba-umba ri dunia, mompatuduki tona lako ri umba-umba ngata majadi topangoseaka Yaku. Diumo ira ante kuasa nTuamata Alatala, Yaku AnaNa, bo Nosa Gasa.

²⁰Patudukimo ira ala raoseakara pura-pura anu niparentaKu ka komiu. Bo toramo! Yaku bate-batena mosanggani-nggani ante komiu sampe ri kaupu dunia.”

Markus

Markus 1

¹Hitumo tesa Kareba Belo, tesa i Yesus Kristus, Ana nu Alatala.

²Tesa hitu nompamula ante kakava i Yohanes Topediu nangoseaka anu nitulisi ri buku Nabi Yesaya nggaulu. Ante sumba nu nabi, Alatala nanguli ka AnaNa ivei: “Pariaramo! Kutudu batuaKu mokolu ka Iko ala ia mompakasadia dala ka Iko.” (Maleakhi 3:1)

³“Naria saito tona nongare-ngare ri karava bai ivei: 'Pakasadiamo dala ka Tupu! Pakanoa dala raoseNa!' ” (Yesaya 40:3)

⁴Evamo anu nitulisi pangane, ivesiamo i Yohanes Topediu neumba ri karava bai. I Yohanes nompatolele kareba lako nte Alatala ivei: “Kajeamo lako ri dosamiu bo radiu, ala komiu raampungu nu Alatala.”

⁵Bo nakavamo tona lako ri njumangu bagia Yudea bo lako ri ngata Yerusalem mangepe ia. Ira nompangaku dosa-dosara bo i Yohanes nombadiu ira ri Binangga Yordan, tandana najeamo ira lako ri dosara.

⁶I Yohanes nompake pakea nitanu lako ri bulu unta. Ia nosulepe kulimba bo kandeana nggaboro bo manisa.

⁷Ia nompatolele tesa hitu ka todea ivei: “Ri puriku ngena kana meonga saito anu nelabipa kakuasaNa pade yaku. Nau aga motungga mombavole lui sapatuNa, ledo masipato yaku.

⁸Yaku nombadiu komiu ante uve. Tapi Ia mombadiu komiu ante Nosa Gasa nu Alatala.”

⁹Tempo haitu nakavamo i Yesus lako ri ngata Nazaret ri bagia Galilea, bo i Yohanes nombadiu Ia ri Binangga Yordan.

¹⁰Tempo i Yesus neumba lako ri uve, kaliu-liu nikitaNa langi natebuka bo Nosa Gasa nu Alatala, nolenje mpo tonji banggebodo, nanau bo netuu nte Ia.

¹¹Bo naria suara lako ri suruga nanguli, “Ikomo AnaKu nipotoveKu. Ikomo nompakadamba raraKu.”

¹²Naupu haitu, Nosa Gasa nu Alatala kaliu-liu nompakeni i Yesus hau ri karava bai.

¹³Ia nonturo hamai patapulu mbongi kasaena nipesori nu Magau Seta ʼala Ia domo matundu nte Alatala tapi matundu nte Magau nu Seta. Ia nosangani-nggani ante binata-binata vura hamai, bo malaeka-malaeka nTupu nakava nompatala Ia.

¹⁴Naliu i Yohanes Topediu nisuaraka riaru ntarunggu, haumo i Yesus ri bagia Galilea mompatolele Kareba Belo lako nte Alatala.

¹⁵NiuliNa, “Nakavamo tempo nipakatantu nu Alatala. Naparamo tempona Alatala moparenta mpo Magau. Kajeamo komiu bo parasayamo Kareba Belo lako nte Alatala!”

¹⁶Tempo i Yesus noliu ri tinggi Rano Galilea, nikitaNa i Simon ante tueina i Andreas nombatendeaka jala mompemala bau ri rano haitu, apa ira topebau mami.

¹⁷Nanguli i Yesus ka ira, “Kamaimo, oseakamo Yaku, bo Kupatuduki komiu mangelo tona ntanina majadi topangoseaka Yaku.”

¹⁸Nangepe tesa haitu, kaliu-liu nipalaisiramo jalara ri sia bo hau nioseakaramo i Yesus.

¹⁹Napolamo i Yesus sakidepa, bo nikitaNa i Yakobus, ana i Zebedeus, ante tueina i Yohanes riaru sakayara nompakabelo jalara.

²⁰Nanggita ira, nanguli i Yesus, “Kamaimo! Oseakamo Yaku.” Nangepe haitu, nipalaisiramo tuamara ranjakaya nosangani-nggani ante topokarajaana bo hau nioseakaramo i Yesus.

²¹I Yesus ante topangoseaka-topangoseaka Ia hau ri ngata Kapernaum. Ri eo penonto nesuamo Ia ri banua petupu ntoYahudi bo nompamulamo nompaguru.

²²Nokumaa mpuu tona nangepe pepatudukiNa, apa Ia ledo nompaguru mpo guru-guru agama. Ia nompaguru mpo tona nakuasa mpuu.

- ²³Riara banua petupu tempona haitu, naria langgai nipesua nu seta. Sampesanika nongaremo ia ante suara namangga,
- ²⁴“He, Yesus toNazaret! RakuyaMiu kami? Komiu nakava mompakaropu kami? Nisaniku Komiu. Komiumo toGasa nitudu nu Alatala!”
- ²⁵I Yesus nanguli ka seta haitu, “Kalinomo! Palaimo lako ri karo ntona tutu!”
- ²⁶Jadi nasinggikimo tona haitu, bo nongaremo seta pakamangga bo nalaimo.
- ²⁷Nanggita haitu, nokumaa puramo todea ri sia sampe ira nosimpekutana, “Hama! Nuapa tano hitu? Sangaya pepatuduki nabaru! Ante kuasaNa nituduNa seta malai bo nalai mpuumo!”
- ²⁸Naliu haitu, natolelemo nasalisa kareba i Yesus ri njumangu bagia Galilea.
- ²⁹I Yesus ante topangoseaka-topangoseaka Ia nompalaisi banua petupu haitu bo kaliu-liu hau ri banua i Simon bo Andreas. I Yakobus bo i Yohanes muni hau nosanggani nte ira.
- ³⁰Tempo haitu matua i Simon mombine naturu ri paturuna sabana nakokora, bo niulirakamo i Yesus.
- ³¹Jadi haumo i Yesus nanggaparai totua mombine haitu. NikingisiNa pale nu mombine bo nitulungiNa ia membangu. Kaliu-liu nabelomo ia, bo hau nombakadambanaka ira.
- ³²Nasolopa eo, nakavamo tona dea nanggeni roa-roara nadua bo tona nipesua seta.
- ³³Pura-pura tupu ngata haitu nasiromu ri ngayo banua niponturo i Yesus.
- ³⁴Bo i Yesus nompakabelo nadea tona anu nadua mpengaya-ngaya, bo nadea seta nipopalaiNa muni. Ledo nidekeiNa seta-seta haitu motesa sabana nisanira Iamo toGasa lako nte Alatala.
- ³⁵Nasadondo mpuu, da naruyona, nembangumo i Yesus bo nompalaisi banua. Ia hau ri ponturo nakalinoa bo nosambaya hamai.
- ³⁶Tapi i Simon ante roa-roana nangelo Ia.

³⁷Niposinggavakarapa i Yesus, niuliramo ka Ia, “Guru, nadea tona nangelo Komiu.”

³⁸Nesana i Yesus ka ira, “Anumo, kita mompapola polipata hau ri ngata-ngata ntanina ala mamala Kupatuduki muni tona hamai, sabana haitumo patuju kakavaKu ri dunia.”

³⁹Jadi i Yesus hau nompatolele Kareba Belo ri banua-banua petupu ri njumangu ngata ri bagia Galilea. Bo Ia muni nompopalai seta-seta lako nte tona nipesua seta.

⁴⁰Naria saito tona nadua oge nakava nte i Yesus. Ia nantaputu bo nerapi nte rarana mpuu-mpuu nangulika i Yesus, “Pue, ane madota Komiu, Komiu nompakule mompakabelo yaku.”

⁴¹Naasi mpuu mata i Yesus nanggita tona haitu. Jadi nidikaNa paleNa ri karo ntona nadua haitu, bo niulikaNa, “Madota Yaku. Mabelomo komiu!”

⁴²Kaliu-liu nalipo dua ntona haitu bo nabelomo karona.

⁴³Naliu haitu, i Yesus nombatudu ia malai bo nipopaingaNa ivei:

⁴⁴“Nee mutesa ka tona anu najadi ri karomu. Tapi koimo hau nte topanggeni pesomba bo popakitamo karomu ka ia ala rakitana nabelomo karomu. Bo dekeimo pesombamu ka Alatala nangoseaka anu nipakatantu ri atura Nabi Musa, ala mompopakita ka todea iko mpuu-mpuu nabelomo.”

⁴⁵Tapi nau nitagi, kana hau nipatolelena kajadia pangane. Nitesana ka tona ri umba-umba sampe i Yesus domo namala nesua rangata. Ia nonturo ri savaliku ngata ri kalinona. Tapi naupa ivesia, todea lako ri umba-umba nakava njuu nte Ia.

Markus 2

¹Bara sako-eo kaliuna haitu, nesua vaimo i Yesus ri ngata Kapernaum. Bo natolele karebana Ia naria ri banuaNa.

²Nangepe haitu, nadeamo tona nakava nasiromu ri banua haitu sampe domo nasuka, nau ri ngayo vamba domo ria ponturo. Ri sia i Yesus nompatolele Tesa nu Alatala ka ira.

³Tempo haitu nakavamo ampa tona nombakova roara napunggu.

⁴Ledo namala ira nanggaparai i Yesus sabana tona ri sia nadea nosimpilii gaga. Jadi hau ira nompene ri bavo ata banua haitu, bo nitonggara ata ri toto i Yesus. Naliu haitu, niuluramo topunggu nte ompana.

⁵Tempo i Yesus nanggita karoso pomparasayara haitu, niulikaNamo topunggu haitu, “AnakKu, dosamu niampungimo.”

⁶Bara sako-ndua guru agama nonturo hamai nompekiri,

⁷“Berimba bo nabia Ia notesa ivesia? Ia nanjalai Alatala, apa nipakasimbayuNa kuasaNa ante kuasa nu Alatala! Ledo ria saitoa manusia namala mombaampungi dosa, aga Alatala!”

⁸Kaliu-liu nisani i Yesusmo anu nipekirira. Jadi niulikaNa ira, “Nakuya komiu nompekiri ivesia riara ntaimiu?”

⁹Ledo nakaja manguli ka topunggu, 'Dosamu niampungimo'. Nakajapa manguli 'Peanggamo, alamo ompamu bo polipamo'!

¹⁰Tapi Kupopakita ka komiu, Yaku, Ana nu Manusia, nakuasa mombaampungi dosa manusia ri dunia.” Bo nituduNamo topunggu haitu,

¹¹“Peanggamo! Alamo ompamu bo panjilimo!”

¹²Bo kaliu-liu neangga mpuumo topunggu haitu ri ngayora pura-pura. Nialanamo ompana bo nanjilimo ia. Nanggita haitu, nokumaa puramo tona ri sia, bo ira nombatoiya Alatala. Niulira, “Dopa naria nikitata kajadia ivehaitu!”

¹³Naliu haitu, hau vai sangganipa i Yesus ri tinggi rano. Nadea mpuu tona nakava nte Ia, bo Ia nompatuduki ira.

¹⁴Naupu haitu, tempo i Yesus noliu ri ngata haitu, nikitaNa saito topesingara balasitee nosanga i Lewi, ana i Alfeus, nonturo ri kantoro ntopesingara

balasitee. Nanguli i Yesus ka i Lewi, “Kamaimo, oseakamo Yaku.” Kaliu-liu neangga i Lewi bo hau nangoseaka i Yesus.

¹⁵Naliu haitu, haumo i Yesus nangande ri banua i Lewi nosanggani-nggani ante anaguruNa. Nadea topesingara balasitee bo tona niuli ntona nadea dosara nangande nosanggani-nggani ante ira, apa nadeamo tona ivehaitu nantuntuni i Yesus.

¹⁶Tempo guru-guru agama anu nangoseaka pepatuduki ntoFarisi nanggita i Yesus nangande nosanggani-nggani ante topesingara balasitee bo tona nadosa, niulikara anaguru i Yesus, “Nakuya gurumi u nangande nosanggani-nggani ante topesingara balasitee bo tona nadosa?”

¹⁷Nangepe pepekutanara haitu, i Yesus norapa ka ira ivei: “Tona ledo nadua ledo paraluu rapakulisi nu dokutoro, aga tona nadua. Patuju kakavaKu hitu mompokio tona nadosa mangoseaka Yaku, ledo mompokio tona nanoa.”

¹⁸Naria sanggani topangoseaka i Yohanes Topediu bo toFarisi nopuasa. Tempo haitu naria tona nakava nte i Yesus bo nekutana nte Ia, “Nakuya ana-anaguru i Yohanes bo topangoseaka toFarisi nopuasa, tapi topangoseaka Komiu ledo nopuasa?”

¹⁹Nesana i Yesus ante porapa. NiuliNa ivei: “Ledo masipato torata mopuasa tempo ponika ane boti langgai da nosanggani ante ira.

²⁰Tapi makava tempona boti langgai raala lako nte ira. Tempo haitumo pade mopuasa ira.”

²¹I Yesus nompapola tesaNa, “Ledo ria tona notampala baju rantana ante kae nabaru. Apa kae nabaru mekonjo mombabitesi baju ranta haitu. Kaupuna mantambai kaluona bite nu baju.

²²Ivesia muni ante uve anggur. Ledo ria tona nombaisi uve anggur nabaru ri pomboli njae anu domo nagini. Sabana, uve anggur da nabaru morende bo mevoya mompakapasa pomboli njae haitu. Kaupuna uve anggur mabubu puramo. Jadi uve anggur nabaru kana raboli ri pomboli nabaru muni.”

²³Tempo eo penonto ntoYahudi, i Yesus ante anaguruNa noliu ri talua gando. Ana-anaguruNa nombakaleti gando sakide pade nitiera [bo niontara].

²⁴Jadi nanguli toFarisi, “Peinta vei! Nakuya anaguruMu nombaliunaka atura agamata? Apa nitagi nu agama nokarajaa ri eo penonto.”

²⁵⁻²⁶Nesana i Yesus, “Dopa nibacamiu anu nipovia Magau Daud nggaulu? Tempo i Abyatar najadi Pakeni nTopanggeni Pesomba, i Daud ante roa-roana naara taira bo ledo ria kandeara. Jadi i Daud nesua riaru Banua nu Alatala bo nikandena roti nipesomba ka Alatala. Bo nidekeina muni ka roa-roana, naupa nangoseaka atura-atura agama aga topanggeni pesomba namala mangande roti haitu. [Tapi naupa ivesia, i Daud ledo nisalai.]”

²⁷Pade i Yesus nompakaupu tesaNa ivei: “Eo penonto nipakatantu nu Alatala ala mantulungi manusia. Manusia nipajadi nu Alatala ledo ala rapandasa mangoseaka ada-ada eo penonto.

²⁸Jadi Yaku, Ana nu Manusia, nakuasa manguli nuapa masipato rapovia ri eo penonto.”

Markus 3

¹Naupu sia i Yesus nesua vai ri banua petupu. Ri sia naria saito langgai nakoyo palena sabingga.

²Bara sako-ndua toFarisi ri sia nompariara pakabelo-belo ala rakitara i Yesus mompakabelo tona haitu ri eo penonto, ala mamala rapangadura.

³Nanguli i Yesus ka tona nakoyo palena haitu, “Kaimo!”

⁴Pade i nipekutanaNa toFarisi naria ri sia, “Nangoseaka atura-atura agama nuapa nipaloga ka kita ri eo penonto, movia mabelo atau madaa? Mompakasalama tona atau mompatesi?” Tapi ira ledo nadota nesana.

⁵Jadi i Yesus neili nangganoto tona ri sia. Narau mpuu raraNa tapi nabuku muni raraNa nanggita ira nakaa gaga bagara. Ledo ntoto naasi matara nanggita tona nakoyo palena. Bo nanguli Ia ka tona haitu, “Odomo palemu!” Niodo ntona haitu mpuumo palena, bo nabelomo.

⁶Naupu haitu nesuvumo toFarisi lako ri banua petupu haitu bo hau nosimpotesa ante tona nosabingga ka Magau Herodes, mangelo dala mompatesi i Yesus.

⁷I Yesus ante anaguruNa hau ri Rano Galilea. Nadea mpuu tona lako ri bagia Galilea nantuntuni ira. Nadea muni tona nakava lako ri bagia Yudea,

⁸lako ri Yerusalem, lako ri bagia Idumea, lako ri bagia sambote Binangga Yordan, bo lako ri ngata Tirus bo Sidon. Ira nakava nte i Yesus sabana niepera i Yesus novia kabaraka-kabaraka.

⁹Nadea mpuu tona nasiromu ri sia sampe i Yesus nombatudu ana-anaguruNa mompakasadia sangu sakaya ka Ia ala nee sampe Ia raposiupisira.

¹⁰Nadea mpuu tona nipakabeloNa bara ipia sampe pura-pura tona nadua nosimpago nompasimbuku mompakapara nte Ia ala ira mamala manggabe Ia.

¹¹Tona nipesua nu seta, nggani-nggani nanggita i Yesus, kana nantaputu ira ri ngayoNa bo nongare-ngare, “Komiumo Ana nu Alatala!”

¹²Tapi i Yesus nombatagi ira, “Nee mpuu ratesamiu isema Yaku!”

¹³Naupu haitu nantendemo i Yesus hau ri bulu, pade nipokioNa isema-sema nipodotaNa mangoseaka Ia, bo hau mpuumo ira.

¹⁴Nakavapa ira, nipelisiNamo sapulu randua majadi suroNa ala ira momporoa Ia bo ratuduNa hau mompatolele Kareba Belo.

¹⁵Bo nidekeiNa kuasa ka ira mompopalai seta-seta.

¹⁶Hitumo sangara sapulu randua haitu: i Simon anu nipoposangaNa i Petrus,

¹⁷i Yakobus bo tueina i Yohanes, ana-ana i Zebedeus. Ira randua nidaena Boanerges, batuana “Ana-ana nu guru kede” .

¹⁸Naria muni i Andreas, i Filipus, i Bartolomeus, i Matius, i Tomas, i Yakobus ana i Alfeus, i Tadeus, i Simon lako ri partei Zelot,

¹⁹bo i Yudas Iskariot anu mompobalu i Yesus.

²⁰Naupu sia i Yesus nanjili hau ri banua. Tapi nakava vai sanupa tona dea nasiromu, sampe Ia ante anaguruNa ledo nakapo nangande.

²¹Sampesuvu i Yesus nangepe anu nipoviaNa haitu bo nisarumakara nabayamo Ia. Jadi nakavamo ira mangala Ia.

²²Nangulimo guru-guru agama nakava lako ri ngata Yerusalem ivei: “Ia nipesua i Beelzebul, Magau nu Seta. Magau nu Seta haitumo nombadekei kuasa ka Ia nompopalai seta!”

²³Jadi i Yesus nombaronde todea haitu bo notesa porapa ka ira ivei: “Berimba Magau nu Seta mompopalai setana mboto?”

²⁴Ane maria saito magau bo todeana bate-batena nosipobali, ledo masae mageromo kamagaua haitu.

²⁵Bo ane tona sambanua ledo maria posintuvura bo aga mosipobali, ira sambanua haitu aga masimptare.

²⁶Ivesia muni ante Magau nu Seta. Ane Magau nu Seta mompopalai roana bo seta-setana mosipobali, natantum kamagauana ledo ntoto maroso, aga magero.

²⁷Ledo ria saitoa tona mamala mesua riaru banua ntona naroso bo mangago mbara-mbarana ane tona naroso haitu ledo ratipungguna ntani ruru. Malihu haitu pade mamalamo isi banua raalasina. ₁Ivesia muni Yaku namala nompopalai seta, sabana Yaku nokolu nombadagi Magau nu Seta.

²⁸Pariaramo tesaKu hitu! Pura-pura dosa manusia bo tesa-tesa nesalai, mamala raampungu.

²⁹Tapi isema-isema nombasalai Nosa Gasa, ledo raampungu. Sabana, pesalaina haitu mai dosa sampe ri kasae-saena.”

³⁰I Yesus nanguli ivesia sabana naria tona nanguli Ia nipesua nu seta ₁tano mai, kuasaNa lako ri Nosa Gasa.

³¹Naupu haitu nakavamo tina i Yesus bo sampesuvu-sampesuvuNa. Ira nepopea ri savalikuna bo nitudura tona hau mombaronde i Yesus.

³²Tempo haitu tona dea nonturo nantagui i Yesus. Niulikara Ia, “Guru, naria tinaMiu bo sampesuvuMiu ri savalikuna. Nielora Komiu.”

³³Nesanamo i Yesus, “Isema kakanana tinaKu bo sampesuvuKu?”

³⁴Pade nikanotoNa pura-pura toponturo ri sinjoriNa bo niuliNa, “Komiumo hii tinaKu bo sampesuvu-sampesuvuKu!

³⁵Apa isema-sema nangoseaka dota nu Alatala, iamo sampesuvuKu bo tinaKu.”

Markus 4

¹Naria saeo i Yesus nompaguru ri tinggi rano Galilea. Nadea mpuu tona nombatagui Ia. Jadi Ia nesavi bo nonturo riara sakaya bo todea neangga ri kabatana ri tinggi rano.

²Nadea ngayana nipepatudukikaNa ante nompake porapa ivei:

³“Epemo! Naria saito toposavu.

⁴Tempo ia nosavu, sanu savua nanavu ri dala. Bo tonji-tonji nakava nanteosi savua haitu sampe naupu.

⁵Naria muni sanu savua nanavu ri tana navatu. Savua haitu nasalisa natuvu sabana tanana ledo nakumba.

⁶Tapi napanepa eo, nalelemo bo nangaumo sabana ledo nandala kalena.

⁷Bo naria muni sanu savua nanavu ranggarui. Karui haitu natuvu bo nangupisi savua sampe ledo nabelo katuvuna bo ledo novua.

⁸Bo naria muni sanu savua nanavu ri tana naboya. Savua haitu natuvu sampe nambaso bo novua nabelo. Savua haitu novua talupulu-nggani kadeana, naria sanu onopulu-nggani bo naria muni sanu saatu-nggani kadeana vuana.”

⁹Bo nanguli munimo i Yesus ka ira, “Isema-sema naria talingana, pariaramo porapa hitu.”

¹⁰Tempo i Yesus damo saitoNa, nakavamo ana-anaguruNa sapulu randua nosangani-nggani ante tona ntanina anu nangepe porapa niuliNa pangane bo nipekutanara batuana porapa haitu.

¹¹Nangulimo i Yesus ka ira, “Bara ipia dopa nisani nu manusia berimba Poparenta nu Alatala. Alatala nompopaisanina ka komiu, tapi tona ledo najadi todea riara Poparenta nu Alatala kana rapatuduki ante porapa-porapa,

¹²ala madupa tesa ri Buku Gasa ivei: 'Tona gahaitu masaro manggita tapi ledo rasanira batuana. Raepera tapi ledo rasanira batuana. Mbelaka ira majea bo raampungu nu Alatala.' ” (Yesaya 6:9-10)

¹³Naupu sia nangulimo i Yesus ka ira, “Ane ledo nisanimiu batuana porapa pangane, berimbamo rasanimiu porapa-porapa ntanina?

¹⁴Toposavu haitu nirapaka tona nompatolele Tesa nu Alatala.

¹⁵Savua nanavu ri bivi dala, nirapaka tona anu nangepe Tesa nu Alatala, tapi Magau nu Seta nakava nangala tesa dako nesua riara ntaira.

¹⁶Savua nanavu ri tana navatu nirapaka tona anu nangepe Tesa nu Alatala bo kaliu-liu nadamba nantarima tesa haitu.

¹⁷Tapi ledo naroso pomparasayara, nasimbayu mpo tuda-tuda ledo naroso pokalena. Tempo ira nipandasa bara nipakasusa sabana nomparasaya Tesa haitu, kaliu-liu nouramo rarara.

¹⁸Savua nanavu ranggarui nirapaka tona anu nangepe Tesa nu Alatala,

¹⁹tapi nabago gaga rarana nompekirika katuvura mboto. Ira aga naino ka doi bo nadidi ka mbara-mbara mpengaya-ngaya ri dunia. Haitu pura-pura nangupi Tesa nu Alatala sampe ledo ria aselena riara nggatuvura.

²⁰Savua nanavu ri tana naboya nirapaka tona anu nangepe Tesa nu Alatala bo nantarima Tesa haitu. Kaupuna naria asele lako ri Tesa haitu riara nggatuvura, naria sanu talupulu-nggani kadeana, naria onopulu-nggani kadeana bo naria sanupa saatu-nggani kadeana.”

²¹Bo nanguli munimo i Yesus ka ira, “Natantumo ane kita motunju poindo, ledo rataloduta ntonda atau radikata ri tambe mpaturu! Tantu poindo haitu radikata ri kalangana.

²²Haitu nogambara ka kita, pura-pura anu nitabuniaka sii-sii kana rapakalanto ngena, bo pura-pura anu dopa nisani ntona sii-sii kana rasani ntona pura bara maipia.

²³Isema-sema naria talingana kana rapariarana TesaKu hitu!”

²⁴Pade i Yesus nompapola tesaNa ivei: “Pariaramo tesaKu hitu! Posuka nipakemiu nosuka ka tona ntanina, haitu muni rapake nu Alatala mosuka ka komiu, bo ratambaikiNa melabipa vai.

²⁵Isema-sema mantarima bo mangoseaka Tesa nu Alatala, kana ratambaika pangisanina Tesa haitu. Tapi isema-sema ledo mantarima bo mangoseaka Tesa nu Alatala, pangisani anu naria nte ia ralelakasi lako nte ia.”

²⁶Bo nangulimo i Yesus, “Ane Alatala momparenta mpo Magau, kajadina nasimbayu mpo anu najadi nte toposavu ri taluana.

²⁷Bongina toposavu haitu namonjo, eona ia nemata. Savua haitu bate-batena natuvu sampe nambaso. Ledo nisani ntupu ntalua berimba sampe savua haitu natuvu.

²⁸Tana mbotomo mompakatuvu pae haitu. Pamulana nesuvu kadana. Naupu haitu novua pae, bo kaupuna naisimo pae.

²⁹Ane natasamo pae, haumo tona mokato apa nakavamo tempona mokato.”

³⁰Nanguli muni Yesus, “Nuapa mamala rapasimbayuka Poparenta nu Alatala? Porapa nuapa rapaketa?

³¹Poparenta nu Alatala namala nirapaka batu mandoe, anu nakodi ntoto.

³²Tapi ane rasavu mandoe haitu, matuvu, mambasopa pade uta-uta ntanina bo motinggu mbaso, sampe tonji-tonji ri laerava namala mojomu bo mekanaluu ri sia.”

³³Ivesiamo i Yesus nompaguru todea ante nompake mpengaya-ngaya porapa, nangoseaka pompakulera mombapaha.

³⁴Ia bate-batena nompake porapa ane notesa ka todea. Tapi ane nosanggani-nggani ante ana-anaguruNa, ledo nipakeNa, bo pura-pura tesaNa nitenteiNa pakalanto ka ira.

³⁵Nggoviana haitu muni, i Yesus nangunaka ana-anaguruNa, “Anumo! Hau kita mosakaya mevote rano.”

³⁶I Yesus da nonturo riara sakaya, jadi ana-anaguruNa nompalaisi todea bo hau nesavi sakaya nte i Yesus bo nalaimo ira. Naria muni tona ri bara sako-angu sakaya ntanina nantuntuni sakayara.

³⁷Dopa nasae ntoto polipara, sampesanika nakavamo poiri narimboso nompakambaso balumba nu rano. Balumba-balumba haitu nombarumpa sakayara sampe uve rano nesua riara sakayara, bo sakidepa natala.

³⁸Tempo haitu i Yesus namonjo ri luna ri puri nu sakaya. Jadi hau ana-anaguruNa mombalike Ia bo nanguli, “Guru, ledo napari raraMiu kita malodo nte sakaya?”

³⁹Jadi nembangumo i Yesus bo nompopetaa poiri bo nanguli ka balumba-balumba mbaso, “Penontomo! Kalinomo!” Bo poiri nenonto mpuumo bo nalino munimo uve rano haitu.

⁴⁰Nangulimo i Yesus ka anaguruNa, “Nakuya komiu naeka? Nakuya bo dopa niparasayamiu Yaku?”

⁴¹Jadi naeka bo nokumaa mpuumo ana-anaguruNa. Nosimpekutanamo ira, “Isema tano tona hitu sampe nau poiri bo balumba natundu nanturusi parentaNa?”

Markus 5

¹Naupu haitu i Yesus ante ana-anaguruNa nakava ri sambote Rano Galilea ri bagia Gerasa.

²Tempo i Yesus nanau lako ri sakaya nakavamo saito langgai nesuvu lako ri podayo. Tona haitu nipesua nu seta.

³Ia nonturo ri tatanga nu podayo, bo domo naria saitoa tona nompakule mantipunggu ia, naupa ante rante.

⁴Nadea ngganimo kadana bo palena nirante ntona, tapi rante haitu nipudusina bo ase nitipunggu kadana namala nikotosakana. Ledo ria saitoa nompakule nombataamaka ia.

⁵Eo bongi ia aga nanjayo hau-tumai ri podayo bo ri bunti-buntina, nongarengare bo nombabakasi karona mboto ante watu.

⁶Da nggavaona nikitanamo i Yesus. Jadi nangovamo ia hau mosinggavaka i Yesus bo nantaputu ri ngayoNa.

⁷Namangga mpuu ia nongare, “He! Yesus, Ana nu Alatala anu Neliu KalangaNa! RakuyaMiu yaku? Ri panggita nu Alatala kuperapi nee rapandasaMiu yaku!”

⁸Niulina ivesia sabana lave nitudu i Yesus mamimo seta haitu ivei: “He, Seta! Palaimo lako ri tona hitu!”

⁹Pade nipekutana i Yesusmo tona haitu, “Isema sangamu?” Nesanamo seta haitu, “Sangaku Njobu-njobu, sabana nadea mpuu kami.”

¹⁰Seta-seta haitu nerapi njuu nte i Yesus, nee mpuu rapopalai ira lako ri bagia haitu.

¹¹Napara ri sia, nadea mpuu bavu nangelo kandeara ri kente nu bulu.

¹²Jadi seta-seta nesua nte tona haitu nerapi nte i Yesus, “Palogamo kami mesua riaru bavu-bavu gahaitu!”

¹³Jadi i Yesus nombadekei seta-seta gahaitu hau nte bavu dea. Jadi seta-seta gahaitu nesuvu mpuumo bo nesua riaru bavu dea. Bavu gahaitu nte ronjobu kadeana, nipesua nu setapa, notingganavu puramo lako ri dapala hau rarano bo nalodo puramo.

¹⁴Jadi nangovamo topojava bavu haitu bo nombatesa kajadia haitu ka tona riaru ngata bo ri buluna napara ngata haitu. Pade nesuvumo tona nompeintaka anu najadi.

- ¹⁵Nakavapa ira nte i Yesus, nikitara tona nipesua nu seta pangane nonturomo. Ia nobajumo bo nanotomo pekirina. Jadi naeka puramo ira nanggita ia.
- ¹⁶Tona nanggita kajadia haitu notesa anu najadi nte tona nipesua nu seta, bo nitesara muni anu najadi nte bavu dea.
- ¹⁷Naupu haitu todea nombasaravi i Yesus malai lako ri bagia haitu.
- ¹⁸Tempo i Yesus nesavi sakaya vaimo, tona nipesua nu seta pangane nerapi nte mpuu-mpuu ala ia rapaloga mantuntuni i Yesus.
- ¹⁹Tapi i Yesus nombatagi ia ivei: “Nee. Panjilimo iko hau nte sampesuvumu bo uli ka ira anu nipovia nu Alatala ka iko bo pompoasiNa iko.”
- ²⁰Jadi haumo tona haitu bo nompamulamo ia nompatolele anu nipovia i Yesus ka ia ri bagia Sapulu Ngata. Nangepe tesana haitu, nokumaa puramo tona.
- ²¹Naupu sia, i Yesus nesavi sakaya hau ri sambote rano. Nakava hamai, nadea mpuu tona nasiromu nte Ia.
- ²²Da ri tinggi rano Ia, nakavamo saito pakeni ri banua petupu ntoYahudi nosanga i Yairus. Tempo nikitana i Yesus, nantaputumo ia ri kadaNa
- ²³bo nerapi ante rarana mpuu-mpuu, “Guru, anaku mombine nadua ntamo, damo kamatena. Tulungi! Hau kita ri banuaku bo dika paleMiu ri karona ala mabelo mpanjili bo nepa mamate!”
- ²⁴Jadi haumo i Yesus nosangani-nggani ante i Yairus. Nadea mpuu tona nantuntuni ira bo nomposimpilii i Yesus.
- ²⁵Ri sia naria saito mombine sapulu rompaemo naraa njuu.
- ²⁶Mpendua ngganimo ia nipakulisi ante mpengaya-ngaya pakuli nu dokutoro, sampe naupumo doina nipombayarina, ledo nabelo duana aga nantambai kadaana.
- ²⁷Mombine haitu nangepe kareba i Yesus, jadi hau ia ri tatanga ntodea, nanggaparai puri i Yesus bo nombakabe bajuNa,
- ²⁸sabana nipekirina, “Nau aga bajuNa kukabe mabelomo yaku.”

- ²⁹Sanggaupu nikabena, nenontomo raana bo nirasaina nabelomo.
- ³⁰Tempo mombine haitu nanggabe bajuNa, i Yesus kaliu-liu nombarasai kuasaNa nesuvu lako ri karoNa. Jadi neilimo Ia ri tatanga ntodea haitu bo nanguli, “Isema nanggabe bajuKu pangane?”
- ³¹Nesanamo ana-anaguruNa, “NikitaMiu mbotomo tona dea damo nosimpai. Bo Komiu nekutana isema nanggabe Komiu?”
- ³²Tapi i Yesus nombalele mata nangelo topanggabe bajuNa.
- ³³Nisani nu mombine haitu anu najadi ri karona. Jadi noletemo ia naeka, bo nantaputu ri ngayo i Yesus bo nenoa iamo nanggabe baju i Yesus pangane.
- ³⁴Nangepe haitu, nangulimo i Yesus, “AnaKu, nabelomo iko sabana iko nomparasaya Yaku. Panjilimo. Damo Alatala mompakatinonto raramu. Nabelomo iko! Domo murasai dua haitu hanupa.”
- ³⁵Da notesa i Yesus, nakavamo bara sako-ndua tona lako ri banua i Yairus, pakeni ri banua petupu pangane. Nangulimo ira ka i Yairus, “Pua, namatemo anamiau. Tumo mompakalenge i guru hau ri banuamiau.”
- ³⁶Tapi i Yesus ledo nompariara tesara haitu. NiulikaNa i Yairus, “Nee maeka. Parasayamo Yaku!”
- ³⁷Bo ledo nidekei i Yesus tona dea mantuntuni Ia hau ri banua i Yairus. Aga i Petrus, i Yakobus bo i Yohanes nidekeiNa hau mosanggani nte Ia.
- ³⁸Tempo ira nakava ri banua i Yairus, nikita i Yesusmo tona nakanano mpuu. Naria tona notumangi mpojea ante suara namangga.
- ³⁹Nesuamo i Yesus hau riera banua bo nanguli ka ira, “Nakuya komiu nakanano bo notumangi-mangi mpojea ivehitu? Ngana haitu ledo namate aga namonjo!”
- ⁴⁰Nangepe i Yesus nanguli ngana haitu aga namonjo, nipongirikaramo. Jadi i Yesus nompopalai pura-pura ira haitu, pade nikenina tina tuama ngana nadua haitu bo anaguruNa hau nosanggani-nggani nte Ia riera tombi nu ngana.
- ⁴¹Naupu sia, nikingisiNa pale ngana haitu bo niuliNa, “Talita kum,” batuana: “Ana, Kuuli ka iko, pembangumo!”

⁴²Kaliu-liu nembangu mpuumo ngana mombine haitu bo nolipamo. Umuru nu ngana haitu sapulu rompaemo. Pura-pura tona nanggita kajadia haitu nokumaa mpuu.

⁴³I Yesus nombatagi ira, “Nee mpuu ratesa ka tona ntanina anu najadi ri sii!” Bo nituduNa ira mompakande ngana haitu.

Markus 6

¹Naupu haitu, i Yesus nompalaisi ngata haitu bo nanjili hau ri ngataNa mboto nosangani-nggani ante ana-anaguruNa.

²Ri eo penonto, Ia nompaguru ri banua petupu. Todea hamai nokumaa mpuu nangepe pepatudukiNa. Nanguli ira, “Lako ri umba nipangisaniNa pura-pura haitu? Noto nuapa nidekei ka Ia? Berimba sampe nipakuleNa novia kabaraka-kabaraka?”

³Apa ledo Ia aga pande kayu, ana i Maria bo tuaka i Yakobus, Yoses, Yudas bo i Simon? Bo tueiNa mombine naria muni ri tatangata ri sii!” Jadi naduamo rarara bo nipoarara pepatudukiNa.

⁴Pade nangulimo i Yesus ka ira, “Saito nabi nibila ntona ri umba-umba. Tapi ri ngatana mboto bo ri tatanga nu sampesuvu-sampesuvu bo tina tuamaNa, Ia ledo nibila.”

⁵Ri ngata haitu ledo nadea kabaraka nipovia i Yesus, aga nompakabelo bara sako-ndua tona nadua ante nombadika paleNa ri karora.

⁶Bo nahera mpuu i Yesus nanggita ira ledo nomparasaya. Naupu haitu haumo i Yesus nompesayoki ngata-ngata ntanina ri bagia haitu, bo nompatolele Tesa nu Alatala.

⁷NirondeNa sapulu randua anaguruNa bo nituduNa ira randua-randua hau nompatolele Kareba Belo. NidekeiNa kuasa ka ira mompopalai seta-seta.

⁸I Yesus nompatotosi ka ira ivei: “Nee madea anu rakenimiu riara mpolipamiu. Nee manggeni baku atau batutu, atau doi. Aga toko polipa namala rakenimiu.

⁹Komiu mamala mosandale, tapi nee manggeni rontonga baju.”

¹⁰Bo niuliNa muni, “Ane komiu ratarima ntona riara banuara, ponturomo ri sia sampe makava gantana komiu mompalaisi ngata haitu.

¹¹Tapi ane maria tupu ngata ledo madota mantarima komiu ri ngatara bo ledo rapokonora mangepe pepatudukimiu, tapaimo sovu lako ri kadamiu tempo komiu mompalaisi ngata haitu, tandana Alatala mompoara ira.”

¹²Naupu haitu, haumo ira sapulu randua mompatolele ka todea kana majea lako ri dosara.

¹³Bo nadea seta nipopalaira lako ri karo ntona nipesua nu seta, bo nigesera lana tona nadua bo nipakabelora.

¹⁴Magau Herodes muni nangepe kareba i Yesus, sabana sanga i Yesus natolelemo ri umba-umba. Naria sanu tona nanguli, “Ia haitu i Yohanes Topediu natuvu mpanjili! Haitu sampe Ia nakuasa novia kabaraka-kabaraka ivesia!”

¹⁵Naria sanu tona ntanina nanguli, “Iamo mai, Nabi Elia natuvu mpanjili.” Bo naria muni nanguli, “Ia haitu nabi nasimbayu nte nabi-nabi nggaulu.”

¹⁶Tapi tempo Magau Herodes nangepe tesa-tesa haitu niulina, “Natantumo Ia haitu i Yohanes Topediu. Bara ipia nituduku tona nombatampa balenggana. Tapi sii-sii ia natuvu mpanjili!”

¹⁷⁻¹⁸Magau Herodes nanguli ivesia sabana anu najadi bara ipia nte i Herodias. Magau Herodes nompoberei i Herodias, nau kakanana i Herodias berei i Filipus, tuaka Magau Herodes mboto. Mpendua nggani i Yohanes Topediu nangonteaka Magau Herodes ivei: “Nangoseaka Atura-atura nu Alatala, ledo masipato komiu mompoberei eramiu mboto!” Jadi Magau Herodes nombatudu tona nombasaka i Yohanes, bo nirantera ia bo nisuarakara riara ntarunggu.

¹⁹Bo nadua mpuumo rara i Herodias nanggita i Yohanes. Ia madota i Yohanes rapatesi tapi ledo najadi,

²⁰sabana Magau Herodes naeka rarana nte i Yohanes. Nisanina i Yohanes tona nanao bo nagasa rarana. Jadi nisalikuna i Yohanes bo ledo nidekeina rapatesi.

Ane niepena tesa i Yohanes, domo nasilonga pekirina, tapi nasana muni rarana nangepe tesana.

²¹Kaupuna i Herodias nanggava loga nabelo ala i Yohanes mamala rapatesi. Ri eo pombatoraki Magau Herodes, nipoviana posusa bo nigagana pura-pura tomaoge, tadulako-tadulako bo totua-totua lako ri njumangu bagia Galilea.

²²Ri posusa haitu ana i Herodias randaa nesua nolodi nabelo ri ngayora pura-pura. Randaa haitu mpuu-mpuu nompakadamba rara Magau Herodes bo toratana haitu. Jadi nangulimo i Herodes ka randaa haitu, “Ulimo nuapa-nuapa mupodota, kana kudekei ka iko.”

²³Magau nojanji bo nosumpa ka randaa haitu, “Nuapa-nuapa muperapi kana kudekei ka iko, nau sampe santanga lako ri pura-pura bagia Poparentaku!”

²⁴Nangepe haitu, nesuvumo randaa hau nekutana nte tinana, “Ina, nuapa masipato kuperapi nte Magau?” Nesanamo tinana, i Herodias, “Perapimo balengga i Yohanes Topediu!”

²⁵Jadi nasalisa-lisamo randaa haitu nanjili hau nte Magau bo nerapi, “Yaku merapi balengga i Yohanes Topediu ratuu ri dula bo rakeni ka yaku hitu-hitu!”

²⁶Nangepe perapi randaa haitu, nasusa mpuumo rara i Herodes. Tapi ledo nabia ia mompoara perapi haitu sabana ia nojanji bo nosumpa ri ngayo ntoratana.

²⁷Jadi nitudunamo nasalisa saito topojava hau mompatesi i Yohanes. Hau mpuumo tona haitu mombatampa balengga i Yohanes ri tarunggu.

²⁸Pade nikeninamo balengga i Yohanes nituu ri dula bo nidekeina ka randaa haitu, pade randaa haitu nombadekei ka tinana.

²⁹Sampangepe kajadia haitu, nakavamo anaguru i Yohanes mangala karobatana ri tarunggu bo nitanara ri dayo.

³⁰Anaguru i Yesus nanjili lako nompatolele Kareba Belo, bo nasiromu mpanjili nte i Yesus bo notesa pura-pura anu nipoviara bo nipatudukikara.

³¹Pade nangulimo i Yesus ka ira, “Anumo, kita hau ri kalinona mangosanaka!” NiuliNa ivesia sabana nadea mpuu tona damo nosinjambeiki nakava sampe nau nangande ledo nakapo.

³²Jadi nosakayamo ira hau ri ponturo kalinona.

³³Tapi nadea tona nanggita ira bo nisani ntodea patujura. Jadi, nadea tona lako ri pura-pura ngata ri bagia haitu, nompari-mpari hau nangose dala ri kabatana mompasintou i Yesus ante anaguruNa ri ponturo rakalaura.

³⁴Tempo i Yesus nanau lako ri sakaya, nikitaNa nadea mpuu tona nompopea Ia. Naasi mpuu mataNa nanggita ira apa ira nasimbayu mpo bimba-bimba ledo ria topoevuna. Jadi Ia nompatuduki mpengaya-ngaya pepatuduki ka ira.

³⁵Nauru nggoviapa, nangulimomo anaguruNa, “Guru, domo masae mabongimo bo ponturo hitu nakalinoa.

³⁶Agina rapopanjiliMiumo todea gahaitu ala ira mamala mangali kande ri ngata-ngata napara ri sii.”

³⁷Tapi nesana i Yesus, “Komiumo mombadekei kande ka ira.” Nanguli vai anaguruNa, “Hai, berimbamo? Hau raalika? Ane raalika roti rakande ntona ivehaitu gaga kadeana, bara aga gaji ntona valu-mbula pade magana!”

³⁸Nekutanamo i Yesus, “Sakuya kadeana roti naria nte komiu? Paresa ntani ruru!” Naupu niparesara niuliramo ka i Yesus, “Lima-angupa roti bo rombaapa bau.”

³⁹Pade nitudu i Yesusmo ira mompasiayu todea ala ira motagu-tagu monturo ri kavoko naramata.

⁴⁰Jadi nonturomo ira notagu-tagu, naria saatu santagu, naria limapulu santagu.

⁴¹I Yesus nangala lima-angu roti bo rombaa bau haitu, pade nitingoaNa langi bo nosambaya, nanguli tarima kasi ka Alatala. Naupu haitu, nitubi-tubiNa roti bo nidekeiNa ka ana-anaguruNa mompalele ka todea gahaitu. Ivesia muni nipoviaNa ante bau rombaa.

⁴²Ira pura-pura nangande sampe nabosu.

- ⁴³Naupupa todea nangande, haumo anaguruNa nompasiromu roti bo bau labina nikande ntodea. Sapulu rotondapa tubi-tubi roti bo bau naboli.
- ⁴⁴Kadea langgai nangande, nitasere lima-njobu.
- ⁴⁵Naupu haitu, kaliu-liu nitudu i Yesusmo anaguruNa mesavi sakaya, mokolu hau ri ngata Betsaida ri sambote rano. Apa Ia da mompopanjili todea hau ri ngatara mboto.
- ⁴⁶Nogaapa nte todea, haumo Ia mosambaya ri bulu.
- ⁴⁷Nabongipa, ri tatanga ntasimo sakayara, tapi i Yesus da naboli ri kabatana.
- ⁴⁸NikitaNa nandasamo anaguruNa nombavose sakayara sabana poiri narimboso nantomunaka ira. Nitasere tinti tatalu bobayana, nakavamo i Yesus nolipa ri bavo nu uve bo Ia madota mombaliunaka ira.
- ⁴⁹Nikitarapa Ia nolipa ri bavo nu uve, nisarumakara bara mboa,
- ⁵⁰jadi nongare-ngare ira sabana navangгаа puramo. Tapi i Yesus kaliu-liu nanguli ka ira, “Nee maeka! Pakaroso raramiu! Yaku hii.”
- ⁵¹Pade nesavimo Ia riera sakaya nosinggani nte ira, bo nenontomo poiri mbaso. Nokumaa bo naingu mpuu rarara.
- ⁵²Naupa nikitaramo kajadia ante roti pangane, ledo nisanira isema kakanana i Yesus, sabana da nakumba pompahara.
- ⁵³Sanggavote i Yesus bo anaguruNa ri tinggi rano napara bagia Genesaret, nesampomo sakayara.
- ⁵⁴Dako nesuvu lako ri sakaya, kaliu-liu nisani ntonamo i Yesus.
- ⁵⁵Jadi nangova ira hau ri ngata-ngata napara ri sia bo nikovara tona nadua ante ompa paturuna hau ri ngata nikakava i Yesus.
- ⁵⁶Ri umba-umba ngata nikalau i Yesus, kana naria tona nanggeni tona nadua hau ri potomu. Bo niperapira nte i Yesus ante mpuu-mpuu ala tona nadua haitu mamala manggabe bajuNa, nau aga doena. Bo isema-sema nanggabe doe nu bajuNa, kana nabelo.

Markus 7

¹Naria saeo, salunu toFarisi bo bara sako-ndua guru agama lako ri ngata Yerusalem nakava mosinggava nte i Yesus.

²Nikitara bara sako-ndua anaguru i Yesus nangande mpale, bo palera nireke naruto apa ledo nemanjo nantuntuni ada ntoFarisi.

³ToFarisi bo nadea toYahudi ntanina natutu mpuu nangoseaka ada haitu, ira ledo nangande ane dopa nemanjo nantuntuni ada-ada ntotuara.

⁴Ivesia muni ane ira manjili lako ri potomu. Dopame ira nangande, kana nipegasara ntani karora pade mamala mangande. Bo nadea muni ada-ada ntanina nioseakara. Evamo, cara motoposi boda, jolo, kura, bo paturu.

⁵Haitu sabana toFarisi bo guru-guru agama haitu nekutana nte i Yesus, “Nakuya ana-anaguruMiu ledo nangoseaka ada-ada ntotuata? Nakuya ira nangande bo ledo nemanjo ntani ruru?”

⁶Nangulimo i Yesus ka ira, “Komiu aga tona nabelo ri sumba! Nakana mpuu tesa nu Alatala niboto Nabi Yesaya nggaulu, notesa komiu! 'Tona hitu nombasomba Yaku aga ri sumba, tapi riaru ntaira ledo nipeilira Yaku.

⁷Ledo ntoto ria gunana ira mombasomba Yaku sabana pepatuduki nipepatudukikara niulira atura-aturaKu tano aga ada-ada nu manusia.' (Yesaya 29:13)

⁸Parenta nu Alatala nipoaramiu bo ada-ada nu manusia nikangisimiu pakaroso.”

⁹Bo nanguli munimo i Yesus ka ira, “Natau mpuu komiu nompoara parenta nu Alatala ala komiu mompakasisi ada-adamiu mboto.

¹⁰Jonjona, Nabi Musa nanguli ivei: 'Bilamo tina tuamamu!' Bo niulina muni, 'Isema-sema mombapindasi tuamana atau tinana, kana rapatesi.'

¹¹Tapi komiu nompatuduki ivei: Domo paraluu kita mombabila tina tuamata asaa raulita ivei: 'Nuapa masipato kudekei ka komiu totua, naupumo nisombaku ka Alatala.'

¹²Jadi domo nipalogamiu ia mantulungi tina tuamana.

¹³Ante pepatuduki ivehaitu, domo niparibavomiu Tesa nu Alatala, damo aga ada-adamiu nioseakamiu. Bo da nadeapa muni anu ntanina ivehaitu nipoviamiu.”

¹⁴Naupu sia, i Yesus nombaronde todea vai bo niulikaNa, “Epemo, ala rasanimiu!

¹⁵Ledo ria sangaya nuapa-nuapa lako ri savalikuna mesua riaranta manusia mamala mompakaruto ira. Tapi pokainggu nadaa anu nopuna lako riaranta manusia, haitumo mompakaruto ira.

¹⁶Isema-sema naria talingana kana rapariarana pakabelo-belo tesaKu hitu.”

¹⁷Naupu haitu, i Yesus nompalaisi todea bo nesua hau rabanua. Pade nekutanamo anaguruNa nuapa batuana porapa nitesaNa pangane.

¹⁸Nangulimo i Yesus ka ira, “Hai! Dopa muni nipahamiu? Ledo ria sangaya kande nikande nu manusia mamala mompakaruto ia.

¹⁹Sabana kande haitu ledo nesua riaranta pekirina, tapi aga nesua riaranta likona, bo lako ri tai likona aga nesuvu mpanjili.” Ante nanguli tesa haitu, i Yesus nompakatantu mpengaya-ngaya kande mamala rakande, bo ledo ria nipopali.

²⁰Pade nanguli vai i Yesus, “Anu nesuvu lako ri pekiri nu manusia, haitumo mompakaruto ia.

²¹Apa lako riaranta haitumo neumba pekiri-pekiri nadaa, anu nangeni ia mogau nabuga, mangangga, mepatesi,

²²mobualo, madoko ka mbara-mbara, movia anu nadaa, mebagiu, majampa, masiriati, mesalai, malanga rara, bo metidojo.

²³Pokainggu nadaa ivehaitu neumba lako riaranta manusia bo haitumo mompakaruto ira.”

²⁴Naupu haitu i Yesus hau ri bagia napara ngata Tirus. Nakava hamai nesuamo Ia rabanua. PatujuNa ala ledo rasani ntodea, tapi kakavaNa haitu ledo namala nitabuniaka.

25-26Ri sia naria saito mombine ledo toYahudi lako ri bagia Fenisia. Anana mombine nipesua nu seta. Jadi niepenapa kareba i Yesus naria ri ngata haitu, nakavamo ia nantaputu ri ngayo i Yesus bo nerapi ante rarana mpuu, “Tulungimo yaku, popalaimo seta lako nte anaku!”

27Tapi nanguli i Yesus ka ia, “Yaku kana mantulungi toYahudi ntani ruru. Apa ledo masipato roti nipasadia ka ngana aga radekeika asu.”

28Nangulimo mombine haitu, “Nakana, Pue. Tapi asu-asu ri tambe meja muni nangande vero-vero nu roti nanavu lako nte ngana-ngana.”

29Bo nangulimo i Yesus ka mombine haitu, “Nakana tesamu. Jadi, panjilimo! Lako ri pomparasayamu tutu nalaimo seta lako nte anamu.”

30Jadi nanjilimo mombine haitu hau ri banuana. Nikavana anana naturu bo nabelomo, bo nalai mpuumo seta.

31Naupu haitu nalaimo i Yesus lako ri bagia Tirus, bo nipapolaNamo polipana noliu ngata Sidon hau ri Rano Galilea pade noliu ri bagia Sapulu Ngata.

32Nakava hamai naria bara sako-ndua tona nanggeni ka Ia saito tobongo ledo nasova notesa. Bo ante mpuu-mpuu rarara, niperapira ala i Yesus mombadika paleNa bo mompakabelo talinga ntobongo haitu.

33I Yesus nombataniaka tobongo haitu hau santanina, bo nidikaNa koya mpaleNa ri bolo ntalinga ntona haitu ntimali-mali. Pade niveulusiNa bo nituiNa dila ntona haitu.

34Naupu haitu nitingoaNamo langi bo nosuu nosaNa bo nanguli, “Efata!” Batuana, “katebukamo” .

35Eva nisuka, nabelo mpuumo talinga ntona haitu bo nasovamo notesa.

36I Yesus nombatagi tona gahaitu, nee rapatolele kajadia haitu ka tona ntanina. Tapi nggosena nitagi, nggosenamo nipatolelera.

37Bo pura-pura tona nokumaa ntoto nangepe kajadia haitu. Bo niulira, “Pura-pura anu nipoviaNa nabelo! Tona nabongo najadi neepe bo tona nabobo najadi notesa!”

Markus 8

¹Naria vai saeo nadea mpuu tona nasiromu. Ledo ria anu rakandera jadi nironde i Yesusmo anaguruNa bo niulikaNa,

²“Naasi mpuumo mataKu nanggita todea gahitu apa talu-eomo kasaena ira nosangani nte Yaku, bo domo ria kandeara.

³Ane Kutudu ira manjili nte ara, natantu maletu ri dala. Apa sanu ira nakava lako ri ngata nakavao.”

⁴Nesanamo anaguruNa, “Kita ri kataolosana ivehitu, ri umba rapangalata kande rapakandeka tona damo nadea ivehitu sampe mabosu?”

⁵Nekutanamo i Yesus, “Sako-angu roti nte komiu?” Nesana ira, “Pitu-angu.”

⁶Nangepe haitu i Yesus nantudu todea monturo ri tana puramo. Nonturopa todea, nialaNa roti pitu-angu haitu bo niuliNa tarima kasi ka Alatala. Pade nitubi-tubiNa roti haitu bo nidekeiNa ka ana-anaguruNa mompalele ka todea. Jadi anaguruNa nangala roti haitu bo nibagi-bagira ka todea.

⁷Naria muni bau kodi bara sako-mbaa nte ira. Bo naupu i Yesus nosambaya nanguli tarima kasi, nituduNamo anaguruNa mombabagi bau haitu muni ka todea.

⁸Pura-pura tona nangande sampe nabosu. Naupu haitu anaguru i Yesus nompasiromu labi-labi nu roti bo bau nikandera haitu, pitu-tonda ponupa kadeana.

⁹Topangande haitu naria pata-njobu kadeana. Naupupa ira nangande nituduNa nanjilimo.

¹⁰Nalaipa todea haitu, nesavi sakayamo i Yesus ante anaguruNa hau ri bagia Dalmanuta.

¹¹Naria bara sako-ndua toFarisi nakava nosinjanai nte i Yesus ala mombaopa tesaNa. Niperapira Ia movia tanda nabaraka, haitumo tandana Ia mpuu-mpuu niposumba nu Alatala.

¹²Nasau rara i Yesus nangepe perapira, jadi nosuu nosaNa bo nanguli, “Nakuya komiu natuvu sii-sii nangelo tanda nabaraka? Pariaramo tesaKu hitu! Ledo ntoto maria tanda Kupopakita ka komiu!”

¹³Naupu haitu nalaimo i Yesus lako nte todea gahaitu bo nesavi sakaya hau ri sambote rano.

¹⁴Tempo nesavi sakaya, ledo nitora nu anaguru i Yesus manggeni baku. Aga sangu roti naria riara sakaya haitu.

¹⁵Nangulimo i Yesus ka ira, “Pakabelo-belo! Komiu kana mainga nte ragi ntoFarisi bo ragi Magau Herodes.”

¹⁶Nangepe i Yesus notesa ivehaitu, ledo nisanira ledo roti mpuu nitesaNa. Jadi nosiulikamo ira, “NiulikaNa ivesia sabana ledo ria roti nte kita bara.”

¹⁷Tapi nisani i Yesus anu nitesara haitu. Jadi niulikaNa ira, “Nakuya komiu aga notesa roti ledo naria? Dopa nanoto raramiu? Dopa nisanimiu batuana? Nakumba mpuu pompahamiu!

¹⁸Komiu nomata tapi nakuya komiu ledo nekita? Komiu notalinga, tapi nakuya komiu ledo neepe? Ledo nitoramiu anu nipoviaKu pangane?

¹⁹Tempo Yaku nombatubi-tubi lima-angu roti ka lima-njobu tona, sako-tondapa labina nipasiromumiu?” Nesana ira, “Sapulu rotondapa.”

²⁰Bo nanguli Ia, “Tempo pitu-angu roti nitubiKu ka pata-njobu tona, sako-tondapa labina nipasiromumiu?” Nesana ira, “Pitu-tondapa.”

²¹Bo nanguli i Yesus, “Jadi dopa nipahamiu?”

²²Naupu sia, hau ira sampe nakava ri ngata Betsaida. Hamai naria tona nanggeni saito langgai naburo ka i Yesus. Ira nerapi mpuu ala i Yesus mantui mata ntoburo haitu bo mompakabelo matana.

²³I Yesus nangingisi pale ntoburo haitu bo nombanini ia hau ri savaliku ngata. Pade nitoveulusiNa mata ntona haitu bo niramunaNa ante paleNa bo nanguli, “Nikitamumo luona?”

- ²⁴Tona haitu nompeintaka luona bo nanguli, “Iyo, nikitakumo tona, tapi aga mpo kayu-kayu nolipa hau tumai.”
- ²⁵Nidika i Yesus vai paleNa sangganipa ri mata ntoburo haitu. Bo mata ntoburo nabelomo. Jadi nekitamo ia, bo nalanto ntotomo nikanotona luona.
- ²⁶Naupu haitu nangulimo i Yesus ka ia, “Koimo panjili ri banuamu, nee mesua rangata.”
- ²⁷Naupu haitu i Yesus ante anaguruNa hau ri ngata-ngata napara ngata Kaisarea Filipi. Da ranja mpolipara nekutanamo i Yesus, “Ane panguli ntona, isema kakanana Yaku hii?”
- ²⁸Nesana ira, “Naria tona nanguli Komiu i Yohanes Topedi, bo naria sanupa nanguli Komiu Nabi Elia. Bo naria muni tona nanguli Komiu nabi nggaulu.”
- ²⁹Bo nekutana vai i Yesus, “Tapi ane pangulimiu, isema Yaku hii?” Nesana i Petrus, “Komiu Magau Topepakasalama anu nijanji nu Alatala!”
- ³⁰Nangepe pesana haitu, nangulimo i Yesus, “Nee ratesa ka tona ntanina isema Yaku.”
- ³¹Naliu haitu, nompamulamo i Yesus nompatuduki anaguruNa. “Yaku, Ana nu Manusia, kana mombarasai mpengaya kasusa, Yaku kana rapoara ntotua ntoYahudi bo balengga-balengga ntopanggeni pesomba bo guru-guru agama. Yaku kana rapatesi bo ri eo katataluna, Yaku kana matuvu mpanjili.”
- ³²Haitu pura-pura nitesaNa pakalanto ka ira. Nangepe haitu, i Petrus nompakeni i Yesus hau ri sabinggana bo niulikana, “Guru, nee motesa ivesia!”
- ³³Tapi i Yesus neili nangganoto anaguruNa pura-pura, bo nituduNa i Petrus, “Palai haumo, Magau nu Seta! Pekirimu tu pekiri nu manusia, ledo pekiri nu Alatala!”
- ³⁴Naliu haitu, nirondeNamo todea bo anaguruNa bo niulikaNa, “Isema-sema madota mangoseaka Yaku, kana rakabasakana dotana mboto bo manjimbuaka kayu salibna bo mpuu-mpuu mangoseaka Yaku. ǁHaitumo, ia kana masadia rapandasa nau sampe rapatesi sabana ia nangoseaka parentaKu.”³⁵Apa isema-

sema aga nangoseaka dota rarana mboto bo natuvu ka karonu mboto, kana mamate bo ledo manggava katuvua nabelo sampe ri kasae-saena. Tapi isema-sema mombakabasaka dota rarana mboto sabana ia nangoseaka Yaku bo nanggeni Kareba Belo, nau ia rapatesi, iamo matuvu mabelo sampe ri kasae-saena.

³⁶Nuapa gunana ane rakavamiu pura-pura anu naria ri dunia hitu tapi ledo manggava katuvua nabelo sampe ri kasae-saena?

³⁷Ledo ria nuapa-nuapa anu namala rasulamiu ka katuvua nabelo haitu.

³⁸Isema-sema maeya matana manguli ia topangoseaka Yaku bo maeya matana nte pepatudukiKu ri tatanga ntodea anu nadosa bo ledo natutu nangoseaka Alatala, Yaku muni maeya mataKu manguli ia topangoseaka Yaku tempo Yaku makava mpanjili. Apa Yaku, Ana nu Manusia, makava mpanjili ri dunia hitu ante reme bo kuasa nTuamaKu, mosangani-nggani ante malaeka-malaeka nagasa!”

Markus 9

¹I Yesus nanguli ka ira, “Pariaramo tesaKu hitu! Naria bara sako-ndua komiu ri sii, dopa mamate ane dopa rakitara Alatala momparenta ante kuasaNa.”

²Ono-mbongi kaliuna haitu, i Yesus nanggeni i Petrus, i Yakobus bo i Yohanes nosangani-nggani nantende hau ri bulu nalanga. Aga i Yesus ante ira tatalu hamai. Tempo ira hamai, nikitara nabalimo lenje i Yesus ri ngayora.

³PakeaNa naramputi bo nenggila. Ledo ria saitoa tona ri dunia mamala mompakaputi mpo kaputi bajuNa haitu.

⁴Nikitara muni Nabi Elia bo Nabi Musa notesa-tesa nte i Yesus.

⁵Jadi nangulimo i Petrus ka i Yesus, “Guru, nasana mpuu kita ri sii. Nabelopa kami mompovia tatalu sou ri sii. Sangu ka Komiu, sangu ka Nabi Musa bo sangu ka Nabi Elia.”

⁶I Petrus nanguli ivesia, sabana naeka mpuu rarara tatalu bo domo nisanina nuapa masipato rauli.

⁷Naupu sia, nakavamo kulimu nombabungu ira bo niepera suara lako ri kulimu haitu nanguli, “Hitumo AnaKu nipotoveKu. Epemo tesaNa!”

⁸Sampesanika nilele matara bo nipeintara domo naria tona randua pangane, damo i Yesus saitoNa naria.

⁹Tempo ira notua lako ri bulu haitu, i Yesus nompainga ira, “Nepa ratesamiu ka tona anu nikitamiu hitu dopame Yaku, Ana nu Manusia, matuvu mpanjili lako ri kamateKu.”

¹⁰Niturusira pepaingaNa haitu, tapi ira mboto nosimpekutana nuapa patuju i Yesus nanguli matuvu mpanjili lako ri kamateNa.

¹¹Bo nipekutanara ka i Yesus, “Nuapa sabana guru-guru agama nanguli Nabi Elia kana makava mokolu ka Magau Topepakasalama?”

¹²Nesana i Yesus, “Nabi Elia kana mokolu mami ala mompakasadia mpengayanya. Tapi berimba Yaku, Ana nu Manusia? Ri Buku Gasa niuli muni Ana nu Manusia kana mombarasai madea kasusa bo rapoara ntona.

¹³Tapi Kuuli ka komiu, kakanana nakavamo Nabi Elia, bo tona nompovia ia nangoseaka dotara mboto, evamo nitulisi riara Buku Gasa.”

¹⁴Tempo i Yesus, ante i Petrus, i Yakobus bo i Yohanes nanjili hau mosinggava nte anaguruNa ntanina, nikitara nadea tona nantagui anaguruNa. Bo naria bara sako-ndua guru agama nosinjanai ante ira.

¹⁵Tempo todea nanggita i Yesus, nokangaa ira bo nompari-mparimo nanggadambanaka Ia.

¹⁶Nekutanamo i Yesus, “Nuapa niposinjanaikamiu pangane?”

¹⁷Nesanamo saito lako ri tatanga ntodea, “Guru, nikeniku ka Komiu anaku nabobo apa nipesua nu seta.

¹⁸Nggani-nggani ia nipesua nu seta, kana nadungga ri tana, ngangana nobura, nasinggamu bo nakoyo karon. Niulikumo ka anaguruMiu mompopalai seta haitu, tapi ledo nipakulera.”

¹⁹Jadi nanguli i Yesus ka ira, “Komiu natuvu sii-sii ledo mpuu nomparasaya! Sakuyapa kasaena Yaku kana mosangani-nggani nte komiu pade raparasayamiu? Keni tumaimo ngana tutu!”

²⁰Jadi nikenira mpuumo ngana haitu ka i Yesus. Tempo seta riaru ngana haitu nanggita i Yesus, kaliu-liu nasinggamu ngana haitu sampe ia nadungga bo nokaduli-duli ante ngangana nobura.

²¹Pade nekutanamo i Yesus nte tuama nu ngana haitu, “Sakuyamo kasaena anamu nombarasai dua hitu?” Nesana tuamana, “Lako ri kakodiname.

²²Nadea ngganimo ia nipakadungga nu seta haitu riaru apu atau ri uve ala ia mamate. Ane rapakuleMiu mompakabelo duana, poasimo kami! Tulungimo kami!”

²³Nangulimo i Yesus ka ia, “Nuapa sabana niulimu ane Kupakule? Tantu mami Kupakule! Pura-pura namala majadi ka tona nomparasaya!”

²⁴Kaliu-liu nongaremo tuama nu ngana haitu, “Pue, niparasayaku Komiu! Tapi pomparasayaku da nakura, tulungimo ala maroso pomparasayaku!”

²⁵I Yesus nanggita kasae-sae nantambaimo kadea ntona netagui, jadi nisalarakaNamo seta ante suara namangga ivei: “Heh, iko seta nompakabobo bo nompakabongo ngana hitu! Palaimo lako ri karonu bo tumo mesua nte ia.”

²⁶Seta haitu nongare nompakasinggiki pakaroo ngana haitu bo nesuvu mpuumo. Ngana haitu eva namatemo nikita, sampe nadeamo tona nanguli, “Namatemo ia.”

²⁷Tapi i Yesus nanggingisi pale nu ngana haitu bo nombatulungi ia nembangu bo neangga mbotomo ngana haitu.

²⁸Tempo i Yesus nesua rabanua ante anaguruNa, nekutanamo ira, “Pue, nakuya sampe ledo nipakule kami mompopalai seta pangane?”

²⁹Nesanamo i Yesus, “Aga posambaya mompakule mompopalai seta ivehaitu.”

³⁰I Yesus ante anaguruNa mompalaisi ponturo haitu noliu ri bagia Galilea. Patuju i Yesus ala ledo rasani ntona ri umbu Ia,

³¹sabana Ia da nompatuduki anaguruNa. NipatudukiNa ira ivei: “Yaku, Ana nu Manusia, kana radekei riaru kuasa nu manusia bo rapatesira. Tapi ri eo katataluna Yaku matuvu mpanjili.”

³²Tapi ledo nisanira batua ntesaNa haitu, bo naeka rarara mompekutana batuana nte Ia.

³³I Yesus bo anaguruNa nakava ri ngata Kapernaum. Sampesua Ia riaru banua, nipekutanaNamo anaguruNa, “Nuapa niposimpekutanakamiu ri dala pangane?”

³⁴Tapi ira ledo notingo, apa ira nosimpekutanaka isema ira nalangapa panggana.

³⁵Naliu haitu, nonturomo i Yesus bo nirondeNamo anaguruNa sapulu randua haitu, bo nanguli, “Isema-sema madota malanga panggana, ia kana majadi batua bo potudua nu roana.”

³⁶Naliu i Yesus notesa ivesia, nialaNamo saito ngana kodi bo nidikaNa ri tatangara pade nikapuiNa bo niulikaNa ira,

³⁷“Isema-sema nantarima ngana kodi eva hitu sabana pomparasayana Yaku, nitarimana muni Yaku. Bo isema-sema nantarima Yaku, ledo aga Yaku nitarimana, tapi nitarimana muni TuamaKu anu nantudu Yaku tumai.”

³⁸Nangulimo i Yohanes ka Yesus, “Guru, nikita kami tona nompopalai seta ante kuasa lako ri sangaMiu. Tona haitu nitagi kami sabana ia ledo nosamporoa ante kita.”

³⁹Tapi nangulimo Yesus, “Nee ratagimiu ia! Apa ane tona novia kabaraka ante kuasa lako ri sangaKu, ledo rapakulena kaliu-liu manjalai Yaku.

⁴⁰Apa isema-sema ledo nangeva kita, ia nosabingga ka kita.

⁴¹Pariaramo tesaKu hitu! Isema-sema mombadekei uve inu ka komiu sabana komiu topangoseaka Yaku, ia kana manggava tambona bara maipia.”

⁴²“Isema-sema mompakanavu saito ngana kodi sampe ngana haitu domo nomparasaya Yaku, agina rapantoesi vatu mbaso ri tambolona bo ratedeaka rantasi.

⁴³Ane rapana palemio manggeni komiu movia dosa, tampasimo palemio haitu! Aginapa komiu matuvu nte Alatala ri suruga ante palemio sabingga, pade komiu ratedaka ante pale robingga hau ri narakaa, riara apu anu ledo mapayapaya.

⁴⁴[Hamai tona bate-batena rakande nggaule bo rapandasa nu apu.]

⁴⁵Bo ane rapana kadamiu manggeni komiu movia dosa, tampasimo kadamiu haitu! Aginapa komiu matuvu nte Alatala ri suruga ante kada sanggada pade ratedeaka riara narakaa ante kadamiu ronggada.

⁴⁶[Hamai tona bate-batena rakande nggaule bo rapandasa nu apu.]

⁴⁷Bo ane rapana matamiu manggeni komiu movia dosa, suimo matamiu haitu! Aginapa komiu majadi todea nu Alatala riara PoparentaNa ante mata sabingga, pade ratedaka riara narakaa ante matamiu robingga.

⁴⁸Hamai tona bate-batena rakande nggaule bo rapandasa nu apu.

⁴⁹Nantuntuni atura i Musa, pura-pura pesomba ka Alatala kana ragarai. Ivesia muni pura-pura tona kana rapegasa ante kasusa bo kapari.

⁵⁰Gara nabelo mami, tapi ane gara mamolimo, berimba mapaga mpanjili? Ivesia muni komiu, topangoseaka Yaku. Komiu kana masimbayu mpo gara bo nee rapalamba pomparasayamiu malente. Komiu kana matuvu mosinggabelo nte roa ntanina.”

Markus 10

¹Naupu haitu i Yesus ante anaguruNa nompalaisi ponturo haitu bo hau ri bagia Yudea bo nombavote Binangga Yordan. Hamai nadea vai tona nakava nte Ia bo nipatudukiNa vai ira, nangoseaka kabiasaNa.

²Tempo Ia nompatuduki, naria bara sako-ndua toFarisi nanggaparai Ia mombaopa tesaNa bo nekutana, “Berimba panggavaMiu? Nangoseaka Atura-atura agamata, mamala langgai mogaaka bereina?”

³Nesanamo i Yesus, “Berimba parenta niuli Nabi Musa ka komiu?”

⁴Nesana ira, “I Musa nompaloga langgai movia sura posompo upu poberei bo mogaa nte bereina mombine.”

⁵Nanguli vai i Yesus ka ira, “Atura haitu nitulisi i Musa ka komiu sabana komiu nakaja nipangajari.

⁶Tapi ri lamba pamulana tempo Alatala nompajadi dunia, Ia nompajadi manusia langgai bo mombine.

⁷Haitu sampe langgai kana mompalaisi tina tuamana bo matuvu mosangani nte bereina,

⁸bo ira randua kana majadi saito. Jadi domo rareke randua, tapi saito.

⁹Sabana haitu, anu nipakasangu nu Alatala, ledo namala rapopogaa nu manusia!”

¹⁰Tempo i Yesus ante anaguruNa nesua riaru banua, nekutana vaimo anaguruNa, nuapa niuliNa pangane.

¹¹Nesana i Yesus, “Isema-sema mompogaaka bereina mombine bo mompoberei mombine ntanina, ia nobualoni bereina paratama.

¹²Bo ane bereina mombine mompogaaka bereina langgai bo mompoberei langgai ntanina, ia muni nobualo.”

¹³Naria saeo, tona nanggeni ana-anara hau nte i Yesus ala radikaNa paleNa ri karora bo merapi Alatala mombadekei belo ka ira. Tapi anaguruNa nompokarau tona gahaitu.

¹⁴Nanggita haitu naraumo rara i Yesus sampe niulikaNa anaguruNa, “Dekeikamo ngana-ngana gahitu makava nte Yaku! Nee ratagi ira, apa aga tona noinggu mpo ngana gahitu majadi todea riaru Poparenta nu Alatala.

¹⁵Pariaramo tesaKu hitu! Isema-sema ledo natundu nte Alatala nasimbayu mpo ngana kodi natundu nte totuana, ia ledo mamala majadi todea riaru Poparenta nu Alatala.”

¹⁶Naliu nanguli ivehaitu, nikapuiNamo ngana-ngana gahaitu bo nidikaNa paleNa nte ngana gahaitu saito-saito bo niperapiNa belo ka ira.

¹⁷Tempo i Yesus mompapola polipana, naria saito tona nangova mosinggavaka Ia. Tona haitu nantaputu ri ngayo i Yesus bo nanguli, “Guru belo, nuapa masipato kupovia ala kukava katuvua mabelo sampe ri kasae-saena?”

¹⁸Nesanamo i Yesus, “Nakuya niulimuka Yaku nabelo? Ledo ria saitoa tona nabelo, aga Alatala.

¹⁹Tantu nisanimu parenta-parenta nu Alatala anu nanguli, nee mepatesi, nee mobualo, nee mangangga, nee mosabi dava, nee mebagiu, bo bilamo tina tuamamu.”

²⁰Nesana tona haitu, “Guru, pura-pura parenta haitu nioseakakumo lako ri kakodiku.”

²¹Naasi mata i Yesus nangganoto tona haitu bo niuliNa, “Sangupa vai paraluu mupovia. Koimo pobalu pura-pura kakalumanamu bo dekei alina haitu ka tona napakasi, ala mukava kakalumana ri suruga. Maupu haitu, oseakamo Yaku.”

²²Nangepe tesa i Yesus, nakurumo kire ntona haitu bo nalaimo ia ante susa rara, sabana nadea mpuu kakalumanana.

²³Naupu haitu i Yesus neili nompeinta anaguruNa, bo nanguli ka ira, “Nakaja mpuu tona nakalumana matundu nte Alatala bo majadi todeana!”

²⁴Nahera mpuu anaguruNa nangepe tesaNa haitu. Tapi Ia nompapola tesaNa ka ira, “Ana-anaKu, nakaja mpuu majadi todea riaru Poparenta nu Alatala.

²⁵Namurapa unta mesua ri puki jaru pade tona nakalumana matundu nte Alatala bo majadi todeana.”

²⁶Nangepe tesaNa haitu nantambai kahera nu anaguruNa sampe ira nosimpekutana, “Ane ivesia, isema tano mamala rapakasalama?”

²⁷I Yesus nangganoto ira bo nanguli, “Ane aga pompakule nu manusia, ledo majadi. Tapi ane pompakule nu Alatala, pura-pura mamala majadi.”

²⁸Jadi nangulimo i Petrus, “Peintamo, Pue! Kami nompalaisi pura-pura anu kami bo nangoseaka Komiu.”

²⁹Nangulimo i Yesus, “Pariaramo! Tona nompalaisi banuana bo sampesuvuna, bara tina tuamana, bara anana, bara taluana sabana ia nangoseaka Yaku, bo nompatolele Kareba Belo,

³⁰ia kana mantarima melabi kadeana sii-sii. Ia manggava saatu nggani kadeana banua, sampesuvu, tina, ana, bo talua. Bo rakavana muni pepandasa. Bo ri tempo makava, ia matuvu mabelo sampe ri kasae-saena.

³¹Tapi nadea tona narikolu sii-sii kana majadi tona maripuri. Bo tona naripuri sii-sii kana majadi tona marikolu.”

³²I Yesus ante anaguruNa da ranja mpolipa hau ri ngata Yerusalem. I Yesus nokolumo. Jadi nahera mpuu rara anaguruNa nompekirika anu majadi hamai ngena. Tona ntanina anu netuntuni ri purira naeka. I Yesus nombaronde sangganipa vai anaguruNa sapulu randua bo notesa ka ira anu majadi ri karoNa ngena.

³³NiuliNa, “Epemo! Sii-sii kita mantende hau ri ngata Yerusalem. Hamai Yaku, Ana nu Manusia, radekei ka balengga-balengga ntopanggeni pesomba bo guru-guru agama, bo rahukura mate. Bo Yaku radekeira ka tona ledo toYahudi.

³⁴Yaku kana rapongei-ngeikara bo ratoveulusira. Bo Yaku racambura bo rapatesira. Tapi ri eo katataluna Yaku matuvu mpanjili.”

³⁵Naupu haitu i Yakobus bo i Yohanes, ana-ana i Zebedeus, nanggaparai i Yesus bo nanguli, “Guru, kami madota ala rapoiyoMiu anu raperapi kami hitu.”

³⁶I Yesus nanguli, “Nuapa nipokonomiu Kupovia ka komiu?”

³⁷Nesanamo ira, “Ane temponamo Komiu momparenta ante kuasa mpo Magau, palogamo saito kami monturo ri sabingga ngganaMiu bo saitopa ri sabingga njidiMiu.”

³⁸Nanguli i Yesus ka ira, “Ledo nisanimiu anu niperapimiu. Rapakulemiu mombarasai pepandasa anu Kurasai, bo masadia komiu mamate mpo Yaku?”

³⁹Nesana ira, “Rapakule kami!” Nangulimo Yesus ka ira, “Natantu mamimo komiu kana mombarasai pepandasa bo kamate anu Kurasai.

⁴⁰Tapi ledo Yaku nakuasa mompakatantu isema masipato monturo ri sabingga ngganaKu bo ri sabingga njidiKu. Aga Alatala nompakatantu isema masipato monturoka ponturo haitu.”

⁴¹Nangepe perapira haitu, naraumo ira sapulu ka i Yakobus bo i Yohanes.

⁴²Jadi i Yesus nombaronde ira bo nanguli, “Nisanimiu todea-todea anu ledo nosisani nte Alatala, toparentara nompandasa todeara, bo pakeni-pakenira nompatundu todeara.

⁴³Tapi ledo mamala ivesia nte komiu! Isema-sema komiu madota majadi pakenimiu, ia kana majadi topotulungimiu.

⁴⁴Bo isema-sema komiu madota majadi marikolu, ia kana majadi batua ntodea.

⁴⁵Sabana nau Yaku, Ana nu Manusia, ledo nakava ratande ntona tapi ala mantulungi tona bo mombadekei karoKu rapatesi mantolo dosa ntodea.”

⁴⁶I Yesus ante anaguruNa nakava ri ngata Yerikho. Tempo i Yesus ante anaguruNa nalai lako ri Yerikho, nadea mpuu tona ntanina nosanggani nte ira. Naria saito toburo nosanga i Bartimeus, ana i Timeus, nonturo ri soso dala bo nerapi-rapi.

⁴⁷Niepena kareba i Yesus toNazaret noliu ri sia, nongaremo ia, “He Yesus, Muli Magau Daud, poasimo yaku!”

⁴⁸Nadea tona nombasalaraka ia ala malino. Tapi aga nitambainapa kamanggana nongare, “He, Muli Magau Daud, poasimo yaku!”

⁴⁹Nangepe pepongare haitu netaamo i Yesus, bo nanguli ka tona hamai, “Rondemo ia tumai!” Jadi nironderamo toburo haitu bo niulira, “Pakaroo raramu! Peanggamo! NirondeNa iko.”

⁵⁰Nangepe haitu, nitedakana ntalikumo baju ndoena bo neangga nasalisa bo nompari-mpari hau nte i Yesus.

⁵¹Nekutanamo i Yesus, “Nuapa mupodota Kupovia ka iko?” Nesana toburo haitu, “Guru, yaku madota mekita!”

⁵²Pade nangulimo i Yesus, “Panjilimo, nabelomo matamu sabana iko nomparasaya Yaku!” Kaliu-liu nekitamo mata ntona haitu, bo nituntuninamo i Yesus riara mpolipana.

Markus 11

¹Tempo i Yesus ante anaguruNa naparamo ngata Yerusalem, ira nakava ri ngata Betfage bo ngata Betania ri kente nu Bulu Zaitun. I Yesus nombatudu randua anaguruNa mokolu.

²NiuliNa, “Koimo, pokolu hau ri ngata napara moitu. Tempo komiu mesua rangata, rakavamiu sangu ana keledai nitataka anu dopa sangani nipesavi ntona. Volemo ana keledai haitu bo umbumo tumai.

³Bo ane maria tona mompekutana nuapa sabana nivolekamiu keledai tutu, uli ka ia, 'I Pue madota mompake keledai hitu sampalai bo rapo panjiliNa ri sii ngena.' “

⁴Jadi haumo ira randua bo nikavara mpuu sangu ana keledai nitataka ri soso dala ri bobaa nu banua. Nivoleramo kaloro nu ana keledai haitu.

⁵Bara sako-ndua tona neangga ri sia nompekutana, “Nakuya nivolekamiu keledai tutu?”

⁶Anaguru haitu nesana ante pesana niuli i Yesus ka ira. Jadi nidekei ntonamo keledai haitu rakenira.

⁷Niumburamo ana keledai haitu hau nte i Yesus. Nakava hamai, nilampira ante baju ndoera bengo nu keledai pade nipesavi i Yesus.

⁸Nadea tona hamai nombavo ke baju ndoera ri dala mombabila Ia bo naria muni tona nombatale tava-tava nialara ri talua.

- ⁹Tona ri kolu bo ri puri, nongare-ngare puramo, “Hosana! Ratoiyamo Alatala! Maoge belo ka Ia anu nakava niposumba nu Alatala!
- ¹⁰Perapi Tupu mompakaroso poparenta nu Magau anu nakava hitu, poparenta muli ntotuata Magau Daud. Ratoiyamo Alatala ri suruga!” (Mazmur 118:25-26)
- ¹¹Nakava ri ngata Yerusalem, nesuamo i Yesus ri Banua nu Alatala. Naupu nipeintaNa pura anu naria hamai, nalaimo Ia ante anaguruNa sapulu randua haitu manjili hau ri ngata Betania, apa nanggoviamo.
- ¹²Naeo mpadondo, tempo ira nalai lako ri ngata Betania, naaramo tai i Yesus.
- ¹³Da nggavaona nikitaNamo sanggayu kayu ara nagumbu tavana. Jadi haumo Ia nanggaparai kayu haitu mompeintaka bara maria vuana. Nakava hamai, aga tavana bayangi nikitaNa. Nau sangu vuana ledo ria nikavaNa apa dopa tempo mpovuana.
- ¹⁴Pade niuliNa ka kayu ara haitu, “Nompamula eo hitu domo maria tona mangande vuamu hanupa!” AnaguruNa nangepe Ia nombapindasi kayu ara haitu.
- ¹⁵Pade napolamo ira ri ngata Yerusalem. Nakava hamai i Yesus nesua ri doyata nu Banua nu Alatala. Bo nipopalaiNa tona nobalu-balu hamai. NisumbolinakaNa meja-meja ntoposula doi bo bangku-bangku ntopobalu-balu tonji bangebodo.
- ¹⁶Bo ledo nidekeiNa tona manggeni gade nuapa-nuapa moliu ri doyata Banua nu Alatala.
- ¹⁷I Yesus nompatuduki todea ri sia. Nanguli Ia, “Riara Buku Gasa nitulisi ivei: 'BanuaKu rauli banua posambaya ka tona njumangata. Tapi komiu nompajadi Banua nu Alatala hitu petabuni ntopeago!' ” (Yesaya 56:7; Yeremia 7:11)
- ¹⁸Balengga-balengga ntopanggeni pesomba bo guru-guru agama nangepe anu najadi haitu. Jadi nieloram dala mompatesi i Yesus. Naeka rarara nanggita Ia, sabana pura-pura tona nokumaa nangepe pepatudukiNa.
- ¹⁹Nggoviana i Yesus ante anaguruNa nesuvu hau ri savaliku kota haitu.

²⁰Naeo mpadondo sanggaeo mpisina, noliumo ira ri kayu ara anu nipindasi i Yesus. Nikitara kayu haitu namate sampe ri kalenamo.

²¹Jadi nitora i Petrusmo kajadia riavi. Niulina ka Yesus, “Guru, peinta vei! Kayu ara nipindasiMiu riavi namatemo!”

²²Nangulimo i Yesus, “Parasayamo Alatala!

²³Pariaramo tesaKu hitu: mamala komiu manguli ka bulu hitu, 'Kateunggatakamo bo katedaka hau rantasimo!' Bo anu haitu mpuu-mpuu rapovia ka komiu, asaa raparasayamiu anu niulimiu haitu majadi mpuu bo ledo morompenga pekirimiu.

²⁴Jadi Kuuli ka komiu, nuapa-nuapa raperapimiu riera posambayamiu, parasayamo pomperapimiu haitu nipooyo nu Alatalamo, bo ratarimamiu mpuu.

²⁵Bo ane komiu mosambaya, ampungi ntani tona novia sala nte komiu, ala komiu muni raampungi nTuamamiu ri suruga.

²⁶[Tapi ane komiu ledo mombaampungi tona novia sala nte komiu, natantumo Tuamamiu ri suruga ledo muni raampungiNa kasalamiu].”

²⁷I Yesus ante anaguruNa nanjili vai hau ri ngata Yerusalem. Tempo i Yesus nolipa-lipa ri doyata Banua nu Alatala, nakavamo balengga-balengga ntopanggeni pesomba, guru-guru agama bo totua-totua ntoYahudi.

²⁸Nekutanamo ira nte i Yesus, “Ante kuasa lako ri umba nipoviaMiu pura-pura hitu ri Banua nu Alatala? Isema nombadekei kuasa haitu ka Komiu?”

²⁹Nesana i Yesus, “Kupekutana muni nte komiu. Ane rapesanakamiu, Kuuli isema nombadekei kuasa ka Yaku novia anu haitu.

³⁰Uli ka Yaku, isema nombadekei kuasa ka i Yohanes nombadiu tona? Alatala atau manusia?”

³¹Jadi nosiulikamo ira, “Ane raulita i Yohanes nombadiu ante kuasa nu Alatala, tantu i Yesus mompekutana nuapa sabana ledo niparasayata i Yohanes.

³²Tapi nakaja muni ane raulita i Yohanes aga nombadiu ante kuasa nu manusia.” Niulikara ivesia sabana ira naeka ka todea apa nadea tona nomparasaya i Yohanes mpuu-mpuu nabi nu Alatala.

³³Jadi nesanamo ira, “Ledo nisani kami.” Jadi nangulimo i Yesus ka ira, “Ane ivesia, ledo muni Kuuli ka komiu isema nombadekei kuasa ka Yaku novia mpengaya-ngaya hitu.”

Markus 12

¹I Yesus notesa ka ira ante nompake porapa ivei: “Naria saito langgai notuda anggur ri taluana. Talua haitu nivalana ntiku-ntiku bo nikaena lovu rapompea uve anggur bo nipoviana sou pojaga. Naupu haitu, nibolinamo taluana haitu nte bara sako-ndua topokarajaa mojampangina damo rabagi aselena, bo nalaimo ia hau ri ngata nakavao.

²Nakavapa tempona mompupu vuana, nitudunamo saito batua hau nte topojangangi talua mombatarima bagiana lako ri asele ntalua haitu.

³Nakavapa batua haitu, ledo nidekeikara asele ntalua aga nisakara bo nibobara. Naupu haitu nipopalaira boamo.

⁴Naliu haitu, nitudu ntupu ntalua vai saitopa batua ntanina hau nte topojangangi talua. Tapi tona haitu muni aga nibobara sampe nabere balenggana, bo nipakaeyara.

⁵Pade nitudu ntupu ntalua vai saito batua ntanina. Tapi batua haitu nipatesira. Bo ivesia muni nipoviara ante batua-batua ntanina. Naria aga nibobara, bo naria ntanina nipatesira.

⁶Kaupuna damo saito naboli nte tupu ntalua, haitumo anana nipotovena. Nituduna muni anana haitu hau nte topojangangi talua apa nipekirina, 'Natantumo rabilara anaku.'

⁷Tapi nikitara ana ntupu ntalua nakava, nosiulikamo ira, 'Tumaimo anana anu rakaboli mbara-mbara ntotuana. Anumo, rapatesita ia ala taluana hitu majadi bagiata.'

⁸Jadi ana ntupu ntalua haitu nisakara bo nipatesira, bo karobatana nitedeakara ri savaliku ntalua anggur haitu.”

⁹Bo nekutanamo i Yesus ka pakeni ntoYahudi haitu, “Jadi nuapa rapovia ntupu ntalua anggur haitu? Natantumo ia kana makava mompatesi topokarajaa talua haitu bo mombadekei taluana ka tona ntanina.

¹⁰Natantu nibacaniumo tesa riaru Buku Gasa anu nanguli ivei: 'Vatu anu nitedeaka ntopovia banua vatu haitumo nopokopa ka banua haitu.

¹¹Haitu nipovia nTupu, bo nabelo mpuu ri panggitata!' ” (Mazmur 118:22-23)

¹²Naupu haitu, pakeni ntoYahudi nompasimbuku mombasaka i Yesus, sabana nisanira iramo nipambela ri porapaNa pangane. Tapi naeka ira ka todea. Jadi nalaimo ira.

¹³Naupu haitu pakeni-pakeni ntoYahudi haitu nantudu bara sako-ndua toFarisi ante tona nosabingga ka Magau Herodes hau mombaopa tesa i Yesus.

¹⁴Nakava nte i Yesus, niuliramo, “Guru, nisani kami Komiu tona nanao. Komiu ledo naeka nte isema-sema sabana Komiu ledo nompelenje. Komiu mpuu-mpuu nanao nompatuduki pakalanto dota nu Alatala ka manusia. Jadi berimbamo? Nangoseaka Atura-atura agamata, mamala kita mombabayari balasitee ka Magau Mbaso Kaisar atau ledo?

¹⁵Paraluu kita mombayari atau ledo?” Tapi nisani i Yesus patujura nombaopa tesaNa. Jadi nanguli Ia, “Nakuya komiu nompasimbuku mombatoliani Yaku? Keni tumai sampeka doi salaka Kupeinta.”

¹⁶Jadi nikenira mpuumo. Bo nekutanamo Ia, “Lenje bo sanga isema ri doi hitu?” Nesanamo ira, “Lenje bo sanga Magau Mbaso Kaisar.”

¹⁷Pade nanguli i Yesus ka ira, “Ane ivesia, dekei ka Magau Mbaso anu masipato radekei ka Magau Mbaso, bo dekeimo ka Alatala anu masipato radekei ka Alatala!” Nokumaa mpuumo ira nangepe pesanaNa.

¹⁸Naliu haitu nakavamo bara sako-ndua toSaduki netingu nte i Yesus. Ira toYahudi anu nomparasaya tona namate ledo matuvu mpanjili bara maipia. Jadi nekutanamo ira nte i Yesus,

¹⁹“Guru, Nabi Musa notulisi atura hitu ka kita: Ane maria langgai noberei bo dopame ira noana namatemo ia, sampesuvuna mboto kana mompoberei timbalana haitu ala momuli bo ana haitu rareke muli nu langgai anu namatemo pangane.

²⁰Jadi papitu ira nosampesuvu aga langgai bayangi. Lumbuana nobereimo tapi dopame noana ira, namatemo ia.

²¹Bo tueina karanduana nompoberei timbalana haitu, tapi dopame noana, namate munimo ia. Bo ivesia muni najadi ante sampesuvuna katataluna

²²sampe sampesuvuna kapapituna. Ledo ria saitoa ira nomuli. Kaupuna, mombine haitu namate munimo.

²³Tempo tona namatemo matuvu mpanjili bara maipia, isema kakanana berei nu mombine haitu? Apa ia nipobereira papitu.”

²⁴Nesanamo i Yesus, “Nasala mpuu komiu, sabana ledo nisanimiu isi nu Buku Gasa bo ledo muni nisanimiu kuasa nu Alatala.

²⁵Tempo tona namate matuvu mpanjili bara maipia, katuvura masimbayu mpo malaeka-malaeka ri suruga. Ira domo moberei.

²⁶Berimbamo? Tantu nibacamiu anu nitulisi riaru Buku Nabi Musa, tona namatemo matuvu mpanjili. Tora ngena tesa kajadia santungu gumbu navaya tapi ledo napapu. ‘Nau nasaemo kamate i Abraham, i Ishak bo i Yakub’, tempo haitu Alatala nanguli ka i Musa, ‘Yakumo Alatala nisomba i Abraham, i Ishak, bo i Yakub.’

²⁷Batuana, ira da natuvu bo nombasomba Alatala. Apa nisanita ledo tomate nombasomba Alatala, tapi tona natuvu. Komiu mpuu-mpuu nasala!”

²⁸Tempo haitu nakavamo saito guru agama nantalingai i Yesus ante toSaduki haitu. Niepena pesana i Yesus nabelo, jadi nipekutanamo i Yesus, “Parenta umbana nopoko ntoto lako ri pura-pura parenta naria?”

²⁹Nesana i Yesus, “Parenta anu nopoko ntoto iamo ivei: 'Epemo toIsrael! Alatala Tupu nisombata, bo Ia aga saito-itoNa.

³⁰Potovemo Tupu ante mpuu-mpuu raramiu, bo ante pura-pura noto mpekirimiu, bo pura-pura pokainggumiu bo pura-pura pompakulemiu.’

³¹Bo Parenta karanduana, 'Potovemo singgamanusiamiu nasimbayu mpo pompotovemi karomiu mboto.' Ledo naria parenta ntanina nopokopa pade parenta randua hitu.”

³²Nangulimo guru agama haitu, “Nakana mpuu niuliMiu, Guru. Ledo ria Alatala ntanina, aga Ia saito-itoNa.

³³Kita manusia kana mompotove Alatala ante mpuu-mpuu rarata bo ante pura-pura pompahata bo ante pura-pura pompakuleta. Bo kita muni kana mompotove singgamanusiata nasimbayu mpo pompotoveta karota mboto. Haitu nelabipa nopoko pade nombadekei mpengaya-ngaya pesomba nipalabu atau pesomba-pesomba ntanina ka Alatala.”

³⁴I Yesus nompeinta guru agama haitu nabelo pesanana. Jadi nangulimo i Yesus, “Iko naparamo majadi todea riaro Poparenta nu Alatala.” Naliu haitu, domo naria sanupa tona nabia nekutana nte i Yesus.

³⁵Tempo i Yesus nompaguru ri doyata Banua nu Alatala, nipekutanaNa nte todea, “Berimba sampe guru-guru agama nanguli Magau Topepakasalama muli Magau Daud?

³⁶Magau Daud mboto notesaki Magau Topepakasalama ante pekeniaka Nosa Gasa, ivei: Tupu nanguli ka Pueku, 'Kamaimo, ponturomo ri sabingga ngganaKu Sampe Kupopekou pura-pura baliMu nte Iko.' (Mazmur 110:1)

³⁷Magau Daud mboto nanguli Magau Topepakasalama haitu Puena, jadi berimba sampe rauli Ia muli Magau Daud?” Nadamba mpuu todea nangepe i Yesus nompaguru ira.

³⁸Tempo i Yesus da nompaguru, niulikaNa todea, “Komiu kana mainga ante guru-guru agama. Nipokonora nolipa-lipa ante baju nandoe bo nipokonora rabila ntona ri potomu.

³⁹Nipokonora nonturo ri ponturo anu nibila riaru banua-banua petupu bo ri ponturo nabelo ri posusa.

⁴⁰Nibagiura timbala-timbala ala mangalasi banuara. Bo nitabuniakara pokainggura nadaa haitu ante nosambaya pakandoe. Mantamo mpuu pehuku ka ira ngena!”

⁴¹I Yesus hau nonturo nantingayo peti pomboli doi pedekei ri doyata Banua nu Alatala. NipariaruNa tona nombasuaraka doira riaru peti haitu. Nadea tokalumana nombasuaraka doi dea riaru mpeti haitu.

⁴²Bo nakava muni saito timbala napakasi mpuu bo ia nombasuaraka rompeka doi kodi.

⁴³Pade nironde i Yesusmo anaguruNa, bo niulikaNa, “Pariaramo! Nadeapa pedekei ntimbala napakasi haitu pade pedekei ntona ntanina.

⁴⁴Ira nombadekei lako ri labi nu kakalumanara, tapi nau timbala haitu napakasi mpuu, nidekeina pura-pura doi naria nte ia, anu niparaluuna ka katuvuna mboto.”

Markus 13

¹Tempo i Yesus nesuvu lako ri doyata Banua nu Alatala, naria saito anaguruNa nanguli ka Ia, “Guru, peinta kagayana Banua nu Alatala bo tombi-tombi ri doyata hitu! Nagaya mpuu, vatuna singga mbaso bo naroso!”

²Nesana i Yesus, “Iyo, peintamo banua-banua nagaya haitu. Tapi nggapurinapa, domo maria sangua vatu potembona mosisunju ri bavo vatu ntanina, sabana pura-pura vatu haitu radurasi.”

³I Yesus nonturo ri Bulu Zaitun nosintingayoka Banua nu Alatala. Tempo haitu i Petrus, i Yakobus, i Yohanes bo i Andreas nekutana nte Ia nggalino-lino,

⁴“Guru, uli ka kami maipia majadi anu niuliMiu pangane? Nuapa tandana mompakatantu naparamo kajadia nitesaMiu pangane?”

⁵Nesana i Yesus, “Pakabelo-belo, nee sampe komiu rabagiu.

⁶Madea tona makava mompobalu sangaKu. Raulira iramo Magau Topepakasalama! Bo madea tona rabagiura.

⁷Ane raepemiu kareba posieva napara nte komiu bara nakavao nte komiu, nee maeka! Pura-pura haitu kana majadi ntani ruru, tapi haitu dopa nakava mpuu kaupu nu dunia.

⁸Tempo haitu tona sangata mosieva nte toangatana, bo magau simbo magau mosieva muni. Bo ri umba-umba ri dunia kana maria lingu bo maria muni kamate ara. Pura-pura haitu da kasusa pamulana, eva dua kole nirasai mombine tempo noana.

⁹Komiu kana mainga-inga sabana komiu rasaka bo rakeni rapangadu ri ngayo ntopotangara. Komiu raboba riara banua-banua petupu bo rakeni rapoposintingayoka gubernur-gubernur bo magau-magau sabana komiu nomparasaya Yaku. Bo haitumo loga ka komiu motesa pomparasayamiu Yaku ka ira.

¹⁰Bo Kareba Belo kana rapotolele ka pura-pura manusia ri dunia dopame makava kaupu nu dunia.

¹¹Ane komiu rasaka bo rakeni ratangara, nee makini raramiu mompekirika anu raulimiu. Ane makavamo gantana motesa, ulimo anu radekei ka komiu raulimiu. Sabana tesa-tesa raulimiu haitu ledo mopuna lako nte komiu mboto, tapi lako ri Nosa Gasa nu Alatala.

¹²Bo tempona haitu muni maria tona mombadekei sampesuvuna mboto rapatesi sabana sampesuvuna nomparasaya Yaku. Bo maria totua mombadekei anana mboto rapatesi. Ngana-ngana mangeva tina tuamara mboto bo mombadekei ira rapatesi.

¹³Komiu rapovuu mata ntodea sabana komiu nangoseaka Yaku. Tapi isema-sema naroo pomparasayana sampe ri kaupuna, ia kana rapakasalama nu Alatala.”

¹⁴“Nabi Daniel nggaulu nombaboto kakava 'Toperopu anu nompakarunggu rara nu Alatala'. (Isema-sema mombabaca tesa hitu kana rapariana batuana.) Jadi ane rakitamiu anu niboto Nabi Daniel neangga ri ponturo anu ledo masipato rapeanggana, haitumo tandana tona nonturo ri bagia Yudea kana mangova malai hau ri bulu ala masalama.

¹⁵Isema-sema nangosanaka ri savaliku nu banuana, tumo mesua rabanua mangala nuapa-nuapa. Palaimo masalisa!

¹⁶Isema-sema nokarajaa ri talua, tumo manjili ri banua mangala pakeana. Palaimo masalisa!

¹⁷Ri eo haitu mandasa mpuu mombine natiana bo mombine da nompatomi anana apa makaja malai!

¹⁸Posambayamo ala pepandasa haitu ledo majadi ri tempo ranindi.

¹⁹Apa ri tempo haitu maria pepandasa anu nadaa mpuu, anu dopa naria nirasai manusia lako ri pamulana dunia nipajadi nu Alatala. Bo domo majadi hanupa ri tempo makava.

²⁰Rapana tempo pepandasa haitu ledo rapakambuku nTupu, natantu nau saitoa tona ledo ria matuvu. Tapi lako ri tove nu Alatala ka todea topomparasaya anu nipelisiNa, tempo pepandasa haitu kana rapakambukuNa.

²¹Ri tempona haitu ane maria tona manguli ka komiu, 'Peintamo! Siimo Magau Topepakasalama!' bara raulira 'Hamaimo Ia!' nee raparasayamiu tesara haitu.

²²Sabana meumba topodava manguli iramo Magau Topepakasalama, bo meumba muni nabi-nabi mpodava. Ira pura-pura movia tanda-tanda nipokumaaka bo kabaraka-kabaraka mombabagiu tona. Ane mamala, nau damo tona nipelisi nu Alatala rabagiura muni.

²³Tapi komiu kana mainga sabana dopame majadi, lave nipopaisaniKu mamimo pura-pura hitu ka komiu.”

²⁴⁻²⁵“Maupu tempo pepandasa nadaa haitu, kuasa-kuasa ri langi ragoya pura, mata nu eo majadi malanda, bula domo mareme, bo betue-betue manavu lako ri langi.

²⁶Bo ri tempo haitu pura-pura manusia ri dunia manggita Yaku, Ana nu Manusia, manau riaru kulimu. Bo rakitara kaogeKu bo kuasaKu nipokumaaka.

²⁷Maupu haitu, Kutudu malaeka-malaekaKu hau mompasiromu tona nipelisiKu lako ri umba-umba ri dunia.”

²⁸“Pariaramo pakabelo pepatuduki lako ri kayu ara. Ane nikitamiu tinggunguna naramata bo tavana noroyamo, nisanimumo naparamo tempo mapane.

²⁹Ivesia muni ane rakitamiu pura-pura kajadia pangane, rasanimumo domo mpuu masae makavamo Yaku.

³⁰Pariaramo tesaKu hitu! Dopame mamate pura-pura tona natuvu tempo haitu, pura-pura kajadia nitesaKu pangane majadimo.

³¹Langi bo tana malipo, tapi tesaKu bate-batena sampe ri kasae-saena.”

³²“Ane eo bo jaa kakavaKu ngena, aga TuamaKu ri suruga nangisanina. Ledo ria saitoa tona ntanina nangisanina. Ledo nisani nu malaeka ri suruga bo Yaku mboto, Ana nu Alatala, ledo nisaniKu.

³³Jadi mainga-ingamo bo jagaimo, apa ledo nisanimumo maipia Yaku makava.

³⁴Haitu nasimbayu nte porapa hitu: Naria saito tona hau ri ngata nakavao. Dopame ia hau, nidekeina mami kuasa ka batua-batuana mombaurusi banuana. Saito-saito nipakatantuna pokarajaa ka ira. Bo topo jagai vamba nitevaina mainga-inga ante kakavana.

³⁵Jadi, ivesia muni komiu kana mainga mompopea kakavaKu, apa ledo nisanimumo maipia Yaku, tupu banua, manjili, bara nggoviana, bara tanga bongi, bara bobayana, atau bara mebonda eo.

³⁶Ane sampesanika Yaku makavamo, nee sampe Kukava komiu da namonjo.

³⁷Anu nitesaKu hitu ka komiu, Kutesa muni ka pura-pura tona. Komiu kana mainga mompopea kakavaKu!”

Markus 14

¹Tempo haitu da rombongipa pade Eo Mbaso Paskah bo Posusa Roti Ledo Noragi. Balengga-balengga ntopanggeni pesomba bo guru-guru agama nangelo dala mombasaka i Yesus nggalino bo mompatesi Ia.

²Tapi niulira, “Nee rasakata Ia tempo eo posusa haitu, ala nee magado todea.”

³Tempo i Yesus naria ri ngata Betania, Ia hau ri banua i Simon anu nadua oge bara ipia. Da nonturo nangande ri sia, nakavamo saito mombine nanggeni sangu botolo nipovia lako ri watu pualam. Botolo haitu noisi lana dupa nasuli mpuu alina anu nipovia lako ri kale navangi. Mombine haitu nombakotosaka tambolo botolo haitu bo nitolina lana dupa ri balengga i Yesus, tandana pebilana ka Ia.

⁴Nanggita haitu, naria bara sako-ndua tona hamai narau bo nosiulika, “Nakuya nipakarugika lana nasuli?”

⁵Lana haitu mamala rapobalu ante alina melabi taluatu doi salaka bo doi haitu namala radekei ka tona napakasi.” Jadi nipokarauramo mombine haitu.

⁶Tapi nanguli Yesus ka ira, “Palambamo ia! Nakuya komiu nompakasusa ia? Ia novia anu nabelo ka Yaku.

⁷Tona napakasi nasaro naria ri tatangamiu bo komiu mamala mantulungi ira maipia tempo rapodotamiu. Tapi Yaku hii, ledo bate-batena mosangani ante komiu.

⁸Mombine hitu novia anu nipakulena. Ia nombatoli lana dupa ka Yaku mompakasadia karoKu ratana.

⁹Pariaramo tesaKu hitu. Ri umba-umba ri dunia Kareba Belo rapatolele, povia nu mombine hitu kana ratesa muni ala ratora ia.”

¹⁰Naupu sia, i Yudas, saito lako ri sapulu randua anaguru i Yesus, hau nte balengga-balengga ntopanggeni pesomba. Patujuna mompobalu i Yesus ka ira.

¹¹Tempo niepera tesa i Yudas haitu, nadamba mpuumo rarara bo nojanji mombadekei doi ka ia. Naupu haitu nompamulamo i Yudas mangelo loga nabelo mombadekei i Yesus ka baliNa.

¹²Nakavamo eo matana Posusa Roti Ledo Noragi, haitumo tempo toYahudi nosambale ana bimba rakande ri posusa Paskah. Eo haitu nakavamo anaguru i Yesus mompekutana, “Pue, ri umba ponturo rakalau kami mompakasadia kande posusa Paskah ka Komiu?”

¹³Jadi nitudu i Yesusmo randua anaguruNa, “Koimo komiu randua hau ri ngata Yerusalem. Hamai raposintomukamiu saito langgai nanggeni gumba noisi uve. Tuntunimo ia

¹⁴hau ri banua rapesuana bo ulimo ka tupu nu banua hamai, 'I Guru nanguli ivei: ri umba tombi Kupangande kande Paskah mosanggani-nggani ante ana-anaguruKu?’

¹⁵Bo tupu banua haitu mombatuduaka ka komiu sangu tombi mbaso ri kalangana. Tombi haitu nasiayumo, naria puramo gana. Pasadiamo kande Paskah hamai ka kita.”

¹⁶Jadi haumo randua anaguruNa ri kota. Bo nikavara nasimbayu mpuu mpo anu niuli i Yesus ka ira pangane. Nakava hamai, nipasadiaramo kande Posusa Paskah.

¹⁷Nabongipa, nakavamo i Yesus nosanggani-nggani ante anaguruNa sapulu randua bo hau nesua riaru tombi nipompasadia kande haitu.

¹⁸Tempo ira da nangande, nangulimo i Yesus ka ira, “Pariaramo! Saito komiu anu nosanggani-nggani nangande nte Yaku hitu, mompobalu Yaku ka baliKu.”

¹⁹Nangepe haitu nasusa mpuumo rarara, bo nekutanamo ira saito-saito nte i Yesus, “Pue, tantu ledo yaku niuliMiu.”

²⁰Nesana i Yesus, “Iamo mai saito lako ri komiu sapulu randua hitu, anu nombatula roti ri uta nosanggani-nggani nte Yaku.

²¹Yaku, Ana nu Manusia, kana mamate, nangoseaka anu nitulisi riera Buku Gasa. Tapi mandasa mpuu tona mompobalu Yaku! Aginapa ia ledo nipoanaka ntinana.”

²²Tempo ira da nangande, i Yesus nangala roti bo nosambaya nanguli tarima kasi ka Alatala. Naupu haitu nitubiNamo roti haitu pade nidekeiNa ka anaguruNa bo niuliNa, “Alamo roti hitu bo kandemo, hitumo karoKu.”

²³Naupupa haitu nialaNa munimo saboda uve anggur bo niuliNamo tarima kasi ka Alatala, pade nidekeiNa ka anaguruNa. Bo niinura pura-pura.

²⁴Naupu haitu niuliNamo, “Hitumo raaKu ngena anu mompakaasa Pojanji nu Alatala nabaru. RaaKu hitu rapatiti ala madea tona rapakasalama.

²⁵Pariaramo! Domo Kuinu uve anggur hanupa sampe makava tempona bara maipia Alatala moparenta mpo Magau. Ri Poparenta haitumo pade Kuinu uve anggur nabaru.”

²⁶Naupu ira nodade sanggayu dade nombatoiya Alatala, nalaimo ira lako ri ngata haitu hau ri Bulu Zaitun.

²⁷Nangulimo i Yesus ka ira, “NisaniKu, moleju pura-pura pomparasayamiu ngena. Apa tesa nu Alatala nitulisi ri Buku Gasa nanguli ivei: 'Kupatesi topoevu bo bimba-bimbana masimpotare.' (Zakharia 13:7)

²⁸Tapi tempo Yaku matuvu mpanjili, Yaku mokolu ka komiu hau ri bagia Galilea.”

²⁹Nangulimo i Petrus, “Naupa ira pura-pura mompalaisi Komiu, yaku ledo moura!”

³⁰Pade nangulimo i Yesus ka ia, “Pariaramo tesaKu hitu! Dopame rombati manu mototoroko bongi hitu, talu-ngganimo iko mombasapu Yaku.”

³¹Tapi nangasabia vai i Petrus nanguli, “Ledo! Nau yaku mamate mosangani ante Komiu, ledo ntoto kusapu Komiu!” Bo ivesia muni niuli nu anaguruNa pura-pura ntanina.

³²Nakavamo ira ri pampa nosanga Getsemani. Nanguli i Yesus ka anaguruNa, “Ponturomo ri sii. Yaku da hau mosambaya.”

³³NikeniNa i Petrus, i Yakobus bo i Yohanes hau mosangani nte Ia. Nasusa bo napari mpuu raraNa.

³⁴Jadi niulikaNamo ira, “Nabuku mpuu raraKu, nirasaiKu eva mamatemo. Popea ri siimo bo mainga-inga!”

³⁵I Yesus napola haunapa sakide lako nte ira tatalu, pade notungga Ia ri tana bo nosambaya. NiperapiNa ante TuamaNa, ane mamala rakabasaka Ia lako ri peparajea haitu.

³⁶NiuliNa, “Tata! Ledo ria anu ledo rapakuleMiu movia. Ane mamala, peparajea anu rapambela ka Yaku hitu nee rapambela ka Yaku! Tapi nee dotaKu majadi, damo aga dotaMiu majadi.”

³⁷Naupu haitu nanjilimo i Yesus nte anaguruNa. NikavaNa namonjo puramo ira tatalu. Bo niulikaNa i Simon Petrus, “Simon! Namonjomo iko? Ledo nipakulemu mainga-inga nau aga sajaa?”

³⁸Komiu kana mainga pura bo mosambaya ala komiu ledo mambela pesori! Komiu madota movia anu nabelo, tapi ledo nipakulemiu sabana komiu manusia nalente.”

³⁹Naliu haitu, hau vai Ia nosambaya sangganipa mpo posambayaNa pangane.

⁴⁰Naupu nosambaya, nanjilimo Ia hau nte anaguruNa. NikavaNa namonjo vaimo ira sabana naroyo gagamo matara. Bo domo nisanira nuapa raulira ka i Yesus.

⁴¹Tempo i Yesus nanjili katalu-ngganina, nipekutanaNa vaimo ira, “Da namonjo bo da nangosanakapa komiu? Naganamo! Nakavamo gantana Yaku, Ana nu Manusia, radekei riaru kuasa ntona nadosa.

- ⁴²Pembangumo! Haumo kita. Peinta! Nakavamo tona mompobalu Yaku!”
- ⁴³Da notesa i Yesus, nakavamo saito anaguruNa nosanga i Yudas, nituntuni ntodea nanggeni guma bo pato. Ira nitudu nu balengga-balengga ntopanggeni pesomba, guru-guru agama, bo totua-totua ntoYahudi.
- ⁴⁴Dopame ira hau, lave nipakatantu i Yudas mamimo tandana ka ira ala rasanira umbana i Yesus. Niulina, “Tona kueki ngena, Iamo i Yesus. Sakamo bo kenimo Ia bo jagai pakabelo.”
- ⁴⁵I Yudas kaliu-liu nanggaparai i Yesus bo nombatabe Ia nanguli, “Guru!” pade niekina.
- ⁴⁶Bo todea nikenina nekaparai munimo bo nisakara i Yesus.
- ⁴⁷Tapi saito anaguruNa anu napara ri sia, nobitu gumana bo nitimbena batua nu Pakeni nTopanggeni Pesomba, napudu talingana sabingga.
- ⁴⁸Nangulimo i Yesus ka todea haitu, “Nisarumakamiau Yaku topeago sampe komiu kana tumai ante guma bo pato mombasaka Yaku?”
- ⁴⁹Eo-eo Yaku nompaguru ri doyata Banua nu Alatala bo komiu naria ri sia muni, tapi ledo nisakamiau Yaku! Tapi ivesia mamimo kana majadi ala madupa tesa nitulisi riara Buku Gasa.”
- ⁵⁰Naupu haitu nipalaika nu anaguruNa puramo Ia.
- ⁵¹Naria saito kabilasa aga nompake kae linen sabala, nolipa ri puri i Yesus. Todea mombasaka ia,
- ⁵²tapi nivonjusina kae haitu, bo nangova novuloa.
- ⁵³I Yesus nikenira hau ri banua Pakeni nTopanggeni Pesomba. Pura-pura balengga-balengga ntopanggeni pesomba, guru-guru agama, bo totua-totua ntoYahudi lave nasiromu mamimo hamai.
- ⁵⁴I Petrus netuntuni nggavao ri puri i Yesus bo todea sampe nesua riara doyata nu banua nu Pakeni nTopanggeni Pesomba. Nakava hamai, nonturomo ia nanderu nosanggani-nggani ante topojava.

⁵⁵Tempo haitu balengga-balengga ntopanggeni pesomba ante pura-pura topolibu ntanina ri Polibu Mbaso Agama Yahudi nompasimbuku mangelo tona mosabi dava ala i Yesus mamala rahuku mate. Tapi ledo ntoto nikavara salaNa.

⁵⁶Nadea tona nipokiora nosabi dava ka i Yesus, tapi pangadura ledo nasimbayu, saitona sangayana.

⁵⁷Neangamo bara sako-ndua tona ntanina nompangadu Ia ivei:

⁵⁸“Niepe kami tona hitu nanguli, 'Kugerosi Banua nu Alatala hitu anu nipovia mpale manusia, bo riaro tempo talu-eo Kubangu banua ntanina anu ledo rapovia mpale nu manusia.' “

⁵⁹Tapi pangadura haitu muni ledo nasimbayu, aga nosisala ante tesa nu roara.

⁶⁰Jadi Pakeni nTopanggeni Pesomba neangga ri ngayora pura-pura nompekutana i Yesus ivei: “Ledo Mupesanaka pangadura?”

⁶¹Tapi i Yesus ledo notingo. Nau ledo nasala, Ia ledo ntoto nesana. Jadi nekutana vai Pakeni nTopanggeni Pesomba, “Ikomo Magau Topepakasalama, Ana nu Alatala Nitoiya?”

⁶²Nesanamo i Yesus, “Yakumo hia. Bo rakitamiu pura-pura Yaku, Ana nu Manusia, monturo ri panggana nu Alatala toNeliu KakuasaNa, bo rakitamiu Yaku manau riaro kulimu lako ri suruga.”

⁶³Nangepe haitu, nagigimo rara nu Pakeni nTopanggeni Pesomba sampe nibitesina mboto bajuna bo nanguli, “Domo kita paraluu sabi hanupa!

⁶⁴Niepeta mbotomo tesaNa nanjalai Alatala! Berimba pantaseremiu?” Nesana puramo ira, “Ia masipato rahuku mate!”

⁶⁵Bo naria bara sako-ndua ira nompamula nantoveulusi i Yesus. Ira nombabonggo mataNa bo nombajaguru Ia ante nanguli, “Heh nabi! Boto vei, isema nombajaguru Iko!” Bo topo jaga muni nangala Ia bo nibobara.

⁶⁶Tempo i Petrus da naria ri doyata nu banua haitu, nakavamo saito mombine. Mombine haitu batua Pakeni nTopanggeni Pesomba.

⁶⁷Nikitana i Petrus nonturo nanderu ri sia. Nikanotosina pakabelo lenje i Petrus bo niulina, “Iko muni saito tona nomporea i Yesus toNazaret haitu!”

⁶⁸Tapi i Petrus nesapu. Niulina, “Ledo! Ledo nisaniku nuapa niulimu bo ledo muni nisaniku batua ntesamu!” Naupu haitu nalaimo i Petrus hau ri bobaa banua. Eva nisuka tempona haitu, nototorokomo manu.

⁶⁹Tempo i Petrus da naria ri sia, nikita nu batua mombine pangane vai ia. Jadi niulinamo ka tona neangga ri sia, “Langgai haitu muni saito roaNa.”

⁷⁰Tapi nesapu vai i Petrus. Ledo nasae kaliuna haitu, nangulimo tona neangga ri sia ka i Petrus, “Natantumo iko muni saito roaNa, apa iko muni toGalilea!”

⁷¹Tapi nopinda-pindamo i Petrus. Ia nosumpa bo nanguli, “Ledo ntoto nisaniku tona niulimu tutu!”

⁷²Bo eva nisuka, nototorokomo manu karongganina. Bo nitora i Petrusmo tesa i Yesus pangane ka ia nanguli, “Dopame rombati manu mototoroko, talungganimo iko mombasapu Yaku.” Jadi nonjodu-njodumo i Petrus notumangi.

Markus 15

¹Sanggaeo mpisina, pura-pura balengga-balengga ntopanggeni pesomba ante guru-guru agama, totua-totua, bo topolibu ntanina lako ri Polibu Mbaso Agama, nasintuvu bo nosangu patujumo. Nitipungguramo i Yesus pade nikenira hau nte Gubernur Pilatus.

²Nekutanamo i Pilatus nte i Yesus, “Nakana mpuu Iko Magau ntoYahudi?” Nesana i Yesus, “Nakana niulimiu.”

³Balengga-balengga ntopanggeni pesomba nompangadu i Yesus ante mpengaya-ngaya pangadua.

⁴Bo i Pilatus nekutana vai hanupa nte i Yesus, “Ledo madota Iko mesana ka tesara? Epemo nadea mpuu peraira ka Iko.”

⁵Tapi i Yesus ledo nesana nau aga sambela sampe nokumaa mpuu rara i Pilatus.

⁶Mpae-mpae ri Eo Mbaso Paskah, kabiasa nu Gubernur nombakabasaka saito tona nitarunggu, nangoseaka pomperapi ntodea.

- ⁷Tempona haitu naria bara sako-ndua tona nitarunggu sabana nompatesi tona tempo nangeva pomarenta. Saito ira nosanga i Barabas.
- ⁸Jadi nakavamo todea nte i Pilatus nerapi ala rakabasakana ka ira saito tona nitarunggu nangoseaka kabiasana.
- ⁹Jadi nesana i Pilatus, “Madota komiu ane kukabasaka Magau ntoYahudi ka komiu?”
- ¹⁰Niulina ivesia sabana nisaninamo balengga-balengga ntopanggeni pesomba nanggeni i Yesus ka ia sabana nasiriati.
- ¹¹Tapi balengga-balengga ntopanggeni pesomba nompakapane rara ntodea ala i Barabasmu rakabasaka ka ira.
- ¹²Nekutana vaimo i Pilatus nte ira, “Ane ivesia, nuapa kupovia nte tona hitu anu niulimiu Magau ntoYahudi?”
- ¹³Nongaremo ira, “Pakumo Ia ri kayu salib!”
- ¹⁴Nekutana vai i Pilatus nte ira, “Sala nuapa nipoviaNa?” Tapi ira aga nantambai nongare ante suara namangga mpuu, “Pakumo Ia ri kayu salib!”
- ¹⁵I Pilatus madota mompakasana rara ntodea. Jadi nikabasakanamo i Barabas ka ira, bo nitudunamo tantarana mombacambu i Yesus, pade nidekeinamo i Yesus rapatesi rapaku ri kayu salib.
- ¹⁶Tantara-tantara nanggeni i Yesus hau ri tombi potangara riara banua Gubernur Pilatus. Bo nirondera pura-pura roara masiromu.
- ¹⁷Nipasusakara baju magau nakamao ka i Yesus, bo nipoviara muni songgo nu magau lako ri karui bo nipoposonggokara.
- ¹⁸Naupu haitu, nipongei-ngeikaramo Ia bo nitabera, “Tabe, Magau ntoYahudi!”
- ¹⁹Naupu haitu nibobara ntokomo balenggaNa bo nitoveulusiramo. Pade nantaputumo ira ri ngayoNa bo nongei-ngei nombasomba Ia.
- ²⁰Naupupa nipongei-ngeikara ivesia, nivonjuramo baju nakamao haitu bo nipopasusakara mpanjili pakeaNa mboto. Pade nikenira hau ri savaliku ngata rapaku ri kayu salib.

²¹Ri tatanga dala, nibarusuramo saito tona nosanga i Simon mombasimbuaka kayu salib i Yesus. I Simon haitu tuama i Aleksander bo i Rufus lako ri ngata Kirene, bo tempo haitu ia da ri polipana hau ri ngata Yerusalem.

²²Napolamo ira sampe nakava ri ponturo anu niuli “Golgota,” batuana “Bulu Banga Balengga” .

²³Ira nombadekei uve anggur anu nigalo ante pakuli mur ka i Yesus, tapi ledo nadota Ia manginuna.

²⁴Pade nipakuramo Ia ri kayu salib. Naupu haitu niposibagi-bagiramo pakeaNa ante notende lamoro ala matantu isema rakamalakana.

²⁵Tempo i Yesus nipakura ri kayu salib, nitasere tinti sasio mpadondona.

²⁶Ri kayu salibNa naria dopi nitulisi anu nipangadu ka Ia ivei: MAGAU NTOYAHUDI.

²⁷Naria muni randua topeago nipaku ri kayu salib ntanina nosanggani-nggani ante i Yesus, saito ri pangganaNa bo saitopa ri panggaiNa.

²⁸Ivesiamo kadupa tesa nitulisi ri Buku Gasa nanguli, “Ia nireke tona nadaa.”

²⁹Tona noliu ri sia noundu-undumo balenggara nombadee Ia. Niulira, “He! Iko madota mombagerosi Banua nu Alatala bo mombabanguna mpanjili riara talu-eo!

³⁰Anumo, panaumo lako ri kayu salib tutu bo pakasalama karoMu mboto!”

³¹Ivesia muni balengga-balengga ntopanggeni pesomba bo guru-guru agama nombadee Ia. Nosiulikamo ira saito-saito, “Tona ntanina nipakasalamaNa. Tapi karoNa mboto ledo namala nipakasalamaNa!

³²Ane Ia mpuu-mpuu Magau ntoIsrael, Magau Topepakasalama, agina Ia manau lako ri kayu salib ala rakitata bo raparasayata Ia!” Bo tona nipaku ri kayu salib ri sinjori i Yesus muni nombadee Ia.

³³Natongo eo, njumangu bagia haitu nitaulandana talu-jaa kasaena, nompamula lako ri tinti sapulu randua sampe tinti tatalu nggoviana.

³⁴Tinti tatalu nggoviana, nongaremo i Yesus ante suara namangga, “Eloi, Eloi, lama sabakhtani?” batuana, “Alatala, TupuKu! Nakuya nipalaisikaMiu Yaku?”

³⁵Nangepe Ia nongare, nangulimo bara sako-ndua tona ri sia, “Epe! Ia nompokio Nabi Elia!”

³⁶Bo nangovamo saito tona nangala sangaya eva lomo bo nitomena ri uve anggur napoi bo nidikana ri vuntu kayu pade nijujubakana ri sumba i Yesus ante nanguli, “Rapopeata bo rapeintata bara makava mpuu Nabi Elia mantoraka Ia lako ri kayu salib!”

³⁷Naupu haitu nongare vaimo i Yesus sangganipa ante suara namangga ntoto bo naponjimo nosaNa.

³⁸Bo tempo haitu muni, nabitemo kae povombo riara Banua nu Alatala. Kae haitu nabite rombite lako ri bavona sampe ri tambena.

³⁹Naria balengga ntantara neangga ri ngayo kayu salib i Yesus. Tempo niepena pongare i Yesus bo nikitana kamateNa ivehaitu, nangulimo ia, “Tona hitu mpuu-mpuu Ana nu Alatala!”

⁴⁰Naria muni bara sako-ndua mombine neangga nompeintaka nggavao. Ri tatangara muni naria i Maria Magdalena, i Maria tina i Yoses bo i Yakobus muda. Bo naria muni i Salome.

⁴¹Iramo mai mombine anu nangoseaka bo nantulungi i Yesus tempo Ia ri bagia Galilea. Bo ri sia nadea muni mombine ntanina anu nosinggani nte Ia hau ri ngata Yerusalem.

⁴²Eo haitu nambela eo pompasadia ka eo penonto, apa mailena eo penontomo. Uru nggovia haitu,

⁴³nakavamo saito toArimatea nosanga i Yusuf. Ia saito lako ri Polibu Mbaso Agama Yahudi bo nibila ntodea. Ia muni nantongoraka tempona Alatala moparenta mpo Magau. Ia nompebia hau mantingayo i Pilatus merapi karobata i Yesus.

⁴⁴Nahera mpuu i Pilatus nangepe i Yesus nasalisa namate. Jadi nirondena balengga ntantara bo nipekutanana, “Nakana mpuu i Yesus namatemo?”

⁴⁵Niepenapa tesa nu balengga ntantara nanguli namate mpuumo i Yesus, nipaloganamo i Yusuf mangala karobata i Yesus.

⁴⁶Jadi niali i Yusufmo kae gandisi nalusu raposompu, bo nitaarakana karobata i Yesus lako ri kayu salib pade nisompuna ante kae nialina haitu. Bo nidikana karobata i Yesus haitu ri bolo watu anu nipaa rapodayo. Naupu haitu nidulikanamo sangu watu mbaso rapombatutui vamba dayo haitu.

⁴⁷Tempo haitu i Maria Magdalena bo i Maria tina Yoses nanggita ponturo nipombaboli karobata i Yesus.

Markus 16

¹Naliupa eo penonto, hau i Maria Magdalena, i Maria tina Yakobus, nosangani ante i Salome nangali rampa-rampa navangi rakenira rapolanaira karobata i Yesus.

²Bo ri eo Aka mpadondo mpisina, eo paratama minggu haitu dako nebonda eo, hau ri dayomo mombine tatalu pangane.

³Ri tatanga mpolipara nosimpekutanamo ira, “Isema mombaduliaka watu potutui dayo haitu ka kita?”

⁴Tapi nakavapa ri dayo, nikitara nateduliakamo watu mbaso haitu.

⁵Pade nesuamo ira riaro bolo watu nipajadi dayo. Nikitara saito kabilasa nobaju bula nonturo ri sabingga ngganara. Natekaja bo naeka mpuu rarara.

⁶Tapi nangulimo kabilasa haitu ka ira, “Nee maeka! Nisaniku komiu nangelo i Yesus toNazaret anu namate nipaku ri kayu salib. Ia natuvu mpanjilimo, domo ria Ia ri sii! Peintamo! Hitu paturu nipombaboli ntona karobataNa.

⁷Tapi koimo komiu bo uli ka ana-anaguruNa bo ka i Petrus. Ia mokolu ka komiu hau ri bagia Galilea. Hamai rakitamiu Ia nangoseaka anu niuliNa ka komiu bara ipia.”

⁸Jadi nesuvumo ira lako ri dayo bo nangova nalai, sabana natekaja bo naeka mpuumo rarara. Ira ledo notesa nuapa-nuapa ka isema-sema sabana naeka. [Mombine gahaitu hau nte i Petrus bo roa-roana, bo kaliu-liu nitesara pura-pura anu niuli nu kabilasa haitu ka ira. Naupu sia i Yesus nantudu anaguruNa hau ri umba-umba ri dunia lako ri mpanauna sampe ri mpandakena mompatolele Kareba lako nte Alatala anu notesaki katuvua nabelo sampe ri kasae-saena. Kareba haitu nagasa bo ledo nabali-bali sampe ri kasae-saena.]

⁹[Eo Aka mpadondona, naliu i Yesus natuvu mpanjili lako ri kamateNa, nipopakitaNamo karoNa ka i Maria Magdalena. I Maria haitumo mombine anu nikabasaka i Yesus lako ri kuasa nu seta papitu bara ipia.

¹⁰Nanggitapa i Yesus, haumo i Maria mosinggava nte roa-roa i Yesus anu da notumangi-mangi sabana nabuku rarara.

¹¹Tapi tempo niepera tesana nanguli i Yesus natuvu mpanjili bo nikitano Ia, ledo ntoto niparasayara tesa haitu.

¹²Naliu haitu i Yesus nompopakita karoNa ante lenje ntanina ka randua roaNa tempo ira nolipa hau ri ngata ntanina.

¹³Naupu sia, nanjilimo ira randua bo notesa kajadia haitu ka roa-roara ntanina. Tapi roara haitu ledo muni nomparasaya tesara.

¹⁴Naupu haitu, i Yesus nompopakita karoNa ka sapulu saitopa anaguruNa tempo ira nonturo nangande nosangani-nggani. NionteakaNa ira sabana nakura pomparasayara bo nakaa bagara sampe ledo nadota nomparasaya tesa nu roara anu nanggita Ia natuvu mpanjili.

¹⁵NiulikaNa ira, “Koimo komiu, hau ri njumangu dunia, mompatolele Kareba Belo ka pura-pura tona ri dunia.

¹⁶Isema-sema ledo momparasaya Kareba Belo haitu, kana rahuku. Tapi isema-sema momparasaya Yaku bo radiu tandana ia topangoseaka Yaku, ia rapakasalama.

¹⁷Tona nomparasaya radekeika kuasa movia kabaraka-kabaraka, evamo mompopalai seta-seta ante kuasaKu. Ira motesa ante basa-basa anu ledo nipegurura.

¹⁸Ane ira rateo nu ule atau manginu panginu naracu, ledo makuya-kuya ira. Bo radikara palera ri karo ntona nadua bo tona haitu mabelomo.”

¹⁹Naupu i Yesus notesa ivesia ka ira, neoremo Ia hau ri suruga bo nonturo ri sabingga nggana nu Alatala.

²⁰Naupu haitu, haumo ana-anaguruNa nompatolele Kareba Belo ka tona ri umba-umba, bo Tupu mboto nokarajaa nosanggani-nggani ante ira. Ia nombadekei ka ira kuasa movia kabaraka-kabaraka ala mompakaroso tesa nipatolelera haitu.]

Lukas

Lukas 1

- ¹Teopilus nibilaku: Nadeamo tona nompasimbuku notulisi nakana sunju pura-pura anu nipovia i Yesus ri tatangata.
- ²Nitulisira nangoseaka tesa nipatolele ka kita, haitumo tesa ntona nanggita kajadia haitu ante matara mboto lako ri pamulana.
- ³Jadi naupu yaku nomparesa pura-pura kajadia haitu pakabelo-belo, nompamula lako ri pantepuuna, nipekiriku nabelopa ane yaku muni motulisi makana sunju ka komiu.
- ⁴Nitulisiku buku hitu, ala rasanimiu anu nipatuduki ka komiu mpuu-mpuu nakana.
- ⁵Tempo Magau Herodes nomparenta ri bagia Yudea, naria saito topanggeni pesomba ntoYahudi nosanga i Zakharia. Ia mai saito lako ri lunu ntopanggeni pesomba nipoposanga lunu muli i Abia. Bereina nosanga Elisabet. Ia muni muli ntopanggeni pesomba.
- ⁶Katuvura njamboko mpuu-mpuu nompakadamba rara nu Alatala, sabana ira njamboko natundu ri pura-pura parenta bo atura nu Alatala.
- ⁷Ira ledo noana sabana Elisabet nagampa, bo ira njamboko muni natuamo.
- ⁸Naria sanggani, tempo lunu muli i Abia nanggava lelana, i Zakharia nobago nanggeni pesomba ri Banua nu Alatala.
- ⁹Nipoviara lamoro nangoseaka kabiasara, rapompakatantu isema motunju dupa ri ngayo nu Alatala. Lamoro haitu nambela i Zakharia, jadi iamo nesua motunju dupa riaru Banua nu Alatala.
- ¹⁰Tempo ia da notunju dupa, todea nosambaya ri savalikuna.
- ¹¹Tempo haitu saito malaeka nu Alatala neonga nte i Zakharia. Malaeka haitu neangga ri panggana nu meja potunju dupa.
- ¹²Natekaja bo naeka mpuu rara i Zakharia nanggita malaeka.

¹³Tapi nanguli malaeka, “Nee maeka, Zakharia. Nitarima nu Alatalamo posambayamu. Bereimu i Elisabet moana saito ngana langgai, bo mupoposanga Yohanes.

¹⁴Madamba mpuu raramiu bo madea tona ntanina madamba muni tempo ngana haitu rapoanaka.

¹⁵Ia majadi tomaoge ri panggita nu Alatala. Ia ledo manginu anu nepakalangu. Lako ri pompoanakame, ia rakuasai Nosa Gasa nu Alatala.

¹⁶Madea toYahudi rakenina mpanjili ka Tupura, Alatala.

¹⁷Ia majadi suro nu Alatala, naroso bo nakuasa mpo Nabi Elia nggaulu. Ia mompoposinggabelo ana-ana nte tuamara bo tona ledo nangoseaka Alatala rakenina mpanjili ri dala nakana. Pura-pura anu pangane rapoviana ala mompakasadia rara ntodea mantarima Alatala.”

¹⁸Nangepe tesa nu malaeka, nekutanamo i Zakharia, “Berimba kusani anu tutu majadi? Yaku natuamo, bo bereiku natua munimo.”

¹⁹Nesana malaeka, “Yakumo hii Gabriel. Yaku nasaro nipojoa ri ngayo nu Alatala! Yaku niposumbaNa mompasimbayu kareba belo hitu ka iko.

²⁰Anu niuliku pangane majadi mpuu ri tempo nipakatantu nu Alatala! Tapi ledo niparasayamu tesaku, jadi domo mamala iko motesa. Iko mabobo sampe rapoanaka anamu!”

²¹Tempo haitu nadea tona ri savalikuna nompopea i Zakharia. Nahera ira, nakuya nasae gaga ia riara Banua nu Alatala?

²²Nesuvupa ia, domo namala notesa ka ira. Damo palena niviatakana notesa ka ira, apa ia nabobomo. Nanggita ia nabobomo, nisani ntonamo naria bara nuapa nipeintana riara Banua nu Alatala.

²³Naupupa bago i Zakharia ri Banua nu Alatala, nalaimo ia lako ri Yerusalem bo nanjili hau ri ngatana mboto.

²⁴Ledo sakuya kasaena naliu haitu, natianamo bereina i Elisabet. Lima-mbula kasaena ledo nesuvu-suvu ia lako rabanuana.

- ²⁵I Elisabet nanguli, “Ivesia tano kabelo i Pue nte yaku. Ia nompakalipo eya nu mataku lako ri kagampaku.”
- ²⁶Tempo i Elisabet ono-mbulamo katianana, Alatala nantudu malaekaNa i Gabriel, hau ri ngata Nazaret ri bagia Galilea.
- ²⁷Malaeka Gabriel nitudu hau mangulika saito randaa, nosanga i Maria. Randaa haitu notengea nte langgai nosanga i Yusuf, muli Magau Daud.
- ²⁸Malaeka haitu neonga ri ngayo i Maria bo nanguli, “Heh, Maria. Iko tona nipotove nTupu! Tupu momporoa iko!”
- ²⁹Natekaja i Maria nangepe tesa nu malaeka, bo nipekirina riaru ntaina, “Nuapa batuana tesa haitu?”
- ³⁰Nanguli malaeka ka i Maria, “Nee maeka, Maria, sabana naoge belo nidekei nu Alatala ka iko.
- ³¹Iko matiana bo mompoanaka saito ngana langgai bo kana mupoposanga Ia i Yesus.
- ³²Ia rapakaoge nu Alatala bo rakasangai Ana nu Alatala, toNeliu Kaogena. Alatala mompajadi Ia magau mpo totuaNa nggaulu, Magau Daud.
- ³³Ia momparenta toYahudi mpo Magau sampe ri kasae-saena. Bo poparentaNa haitu ledo maupu-upu.”
- ³⁴Nanguli i Maria ka malaeka Gabriel, “Yaku hii da narandaa. Berimba anu tutu majadi ri karoku?”
- ³⁵Nesana malaeka, “Nosa Gasa makava nte iko, bo kuasa nu Alatala toNeliu Kaogena, maria nte iko. Haitumo sabana ngana mupoanaka rakasangai Nagasa, Ana nu Alatala.
- ³⁶Tora ngena i Elisabet, sampesuvumu. Ono-mbulamo ia natiana. Tano natuamo ia bo niuli ntona nagampa.
- ³⁷Pura-pura anu niuliku ka iko kana majadi, apa ledo ria tesa nu Alatala ledo madupa.”

- ³⁸Pade nangulimo i Maria, “Yaku hii batua i Pue, radupaiNamo anu niulimiu tutu ri karoku.” Naupu sia nalaimo malaeka.
- ³⁹Ledo nasae kaliuna haitu, haumo i Maria ri sangu ngata ri buluna ri bagia Yudea.
- ⁴⁰Ia hau ri banua i Zakharia. Tempo ia nesua rabanua, nitabenamo i Elisabet.
- ⁴¹Nangepe petabe i Maria, nokalelomo ngana riara i Elisabet. Bo i Elisabet nipesua Nosa Gasa nu Alatalamo,
- ⁴²bo notesa ante suara namangga ivei: “Ikomo nipotove nu Alatala nelabipa pade pura-pura mombine ntanina, bo Alatala mompotove ngana mupoanaka.
- ⁴³Yaku mpuu-mpuu nibila nu Alatala, apa tina nTupuku nakava ri banuaku mboto.
- ⁴⁴Niepekupa petabemu, nadamba ngana riaraku, sampe nokalelo ia.
- ⁴⁵Nabelo mpuu iko, sabana niparasayamu anu niuli nTupu ka iko mpuu-mpuu majadi.”
- ⁴⁶Nanguli i Maria, “Ante raraku mpuu kutoiya i pue,
- ⁴⁷bo nadamba mpuu raraku, sabana Alatalamo Magau nompakasalama yaku.
- ⁴⁸Yaku aga batuaNa napakasi, tapi ledo nalinga raraNa nantora yaku. Mompamula sii-sii, pura-pura manusia manguli yakumo nipotove nu Alatala.
- ⁴⁹Raulira ivesia sabana Alatala toNeliu KakuasaNa, novia anu nabelo ka yaku. Nagasa mpuu Ia!
- ⁵⁰Alatala nompoasi tona natundu nte parentaNa, sampe ri muli nu mulira.
- ⁵¹NipoviaNa tanda-tanda nipokumaaka ante kuasaNa bo nipakagarona tona nasombo sampe niara ledo najadi.
- ⁵²Magau-magau nakuasa nilelakaNa panggara, bo tona naede rara nipakaogeNa.
- ⁵³Tona naara, nipakabosuNa sampe nabasa ante mpengaya anu nabelo. Bo tona nakalumana nipopalaiNa ante pale boa.

54-55 Alatala nantulungi todeaNa toIsrael, sabana ledo nalinga raraNa pojanjiNa nte Nabi Abraham, totuata nggaulu. Haitumo, Ia nojanji mompoasi i Abraham ante pura-pura mulina sampe ri kasae-saena.”

56 Nitasere talu-mbula kasaena i Maria nonturo nosanggani ante i Elisabet, pade nanjili hau ri banuana mboto.

57 Nakavamo tempona i Elisabet moana, nipoanakana saito ngana langgai.

58 Tempo roana bo sampesuvuna nangepe kabelo nu Alatala nte i Elisabet, ira pura-pura nadamba sanggani nte ia.

59 Nagana valu-eo umuru nu ngana haitu, nakavamo ira mombasuna bo mompoposanga ngana haitu. Ira madota mompoposanga ia i Zakharia, nantuntuni sanga ntuamana,

60 tapi nanguli tinana, “Nemo! Ia kana rapoposanga i Yohanes.”

61 Tapi nanguli ira, “Ledo ria saitoa lako ri sampesuvumi nosanga Yohanes!”

62 Jadi niviatakaramo palera bo nipekutanara i Zakharia, “Isema kakanana rapoposanga ka ngana hitu?”

63 I Zakharia nerapi sampeka vatu tulisi pade nitulisina, “Sangana i Yohanes.” Nanggita haitu, nokumaa puramo ira.

64 Naupu i Zakharia notulisi haitu, kaliu-liu namalamo ia notesa bo nitoiyana Alatala.

65 Nanggita kajadia pangane, nokumaa pura-pura tona nonturo ri sia. Bo kareba haitu natolelemo ri njumangata ri bulu ri bagia Yudea.

66 Pura-pura tona nangepe anu najadi haitu nompekiri riaru ntaira, “Majadi nuapa ngana haitu ngena?” Niulira ivesia sabana nikitara kuasa nu Alatala naria ante ngana haitu.

67 Tempo haitu i Zakharia, tuama nu ngana haitu, nikuasai Nosa Gasa nu Alatala sampe nipasimbayuna tesa nTupu ka ira, haitumo anu rapovia nTupu ngena.

68 Niulina, “Ratoiyatamo Alatala, Tupu ntoIsrael! Nakavamo Ia mantulungi kita todea nipelisiNa bo nombakabasaka kita lako ri balita.

⁶⁹NidekeiNa ka kita saito Magau naroso anu mompakasalama kita. Magau haitu muli Magau Daud, anu natundu nte parenta nu Alatala nggaulu.

⁷⁰Alatala notesa ka nabi-nabi nipelisiNa nggaulu, bo nijanjiNa

⁷¹mompakasalama kita lako ri balita, bo lako ri kuasa ntona nompovuu mata kita.

⁷²NijanjiNa muni mompoasi totuata nggaulu, bo mompakadupa pojanjiNa naroso ka ira.

⁷³⁻⁷⁵PojanjiNa nggaulu ka totuata i Abraham naroso mpuu. Alatala nojanji mombakabasaka kita muli i Abraham lako ri balita, ala kita mamala metupu nte Ia, ante ledo ria ekata. NijanjiNa ka kita ala mamala kita metupu nte Ia, ante rara magasa bo manoa sampe ri kaupu nggatuvuta ri dunia.”

⁷⁶Pade nanguli i Zakharia ka anana, “Iko, anaku, rakasangai nabi nu Alatala toNeliu KaogeNa, sabana iko majadi suro nTupu. Iko manguli ka topangoseaka Tupu, ira kana masadia mantarima Ia.

⁷⁷Iko mompopaisani ka todea nTupu ira rapakasalama ane dosara niampungi nu Alatala.

⁷⁸⁻⁷⁹Alatala mpuu-mpuu nompoasi kita. Eva mata nu eo nebonda mpadondona mompakareme dunia, ivesia muni peongaNa mompakasalama kita. Apa Ia makava mompakareme pekiri ntona natuvu ri kalandana bo naeka mamate. Ia makava mompakasalama kita bo manggeni kita hau ri dala kabelona.”

⁸⁰Ana i Zakharia haitu, kasae-sae kambaso-mbaso karonu bo kanoto-noto rarana. Nambasopa, haumo ia nonturo ranggarava bai, nantongoraka gantana ia mompamula mompatolele tesa nu Alatala ka toYahudi.

Lukas 2

¹Tempo haitu Magau Mbaso Kaisar Agustus nompurenta ala pura-pura sanga ntona riaru poparentana ratulisi riaru buku sensus ri ngata ntotuara mboto.

²Sensus pamulana haitu nipovia tempona i Kirenius najadi gubernur ri propinsi Siria.

- ³Pura-pura tona hau ri ngata ntotuara mboto ala sangara ratulisi riaru buku sensus.
- ⁴Ivesia muni i Yusuf. Ia nalai lako ri ngata Nazaret ri bagia Galilea, hau ri ngata Betlehem ri bagia Yudea, ngata pompoanaka Magau Daud, sabana i Yusuf muli Magau Daud.
- ⁵I Yusuf hau nosanggani-nggani nte tengena i Maria anu da natiana, ala sangara ratulisi hamai.
- ⁶Tempo ira naria ri ngata Betlehem, nakavamo tempona i Maria moana.
- ⁷Ia noanaka saito ngana langgai, ana lumbua. Ngana haitu nibunguna ante kae lampi, pade nidulina riaru potande kanda binata, sabana ledo ria paturu ka ira ri banua pesaira haitu.
- ⁸Bongi pompoanaka i Yesus, naria topoevu nojagai bimbara ranggarava napara ngata haitu.
- ⁹Sampesnika neongamo saito malaeka nu Alatala ri sinjorira, bo reme nu Alatala nombavanta ira. Nanggita haitu naeka mpuu ira.
- ¹⁰Tapi nanguli malaeka ka ira, “Nee maeka, apa yaku nakava nanggeni kareba belo ka komiu pura-pura, bo kareba haitu mompakadamba pura-pura tona.
- ¹¹Bongina hitu ri ngata pompoanaka Magau Daud, nipoanakamo saito magau mompakasalama komiu. Iamo i Pue, anu nipelisi nu Alatala.
- ¹²Hitumo tandana ala rasanimiu nakana tesaku; ngana haitu nibungu ante kae lampi bo nidulina ri potande kanda binata.”
- ¹³Sampesnika nadeamo roa nu malaeka neonga bo nombatoiya Alatala ivei:
- ¹⁴“Ratoiyamo Alatala ri suruga! Bo ri dunia, tona nipokonoa nu Alatala manggava katuvua nabelo!”
- ¹⁵Naupu haitu malaeka pangane nompalaisi ira bo nanjili hau ri suruga. Nosiunakamo topoevu, “Kaimo, kita hau ri Betlehem manggita anu najadi, anu nitesa i Pue ka kita.”

- ¹⁶Ira nompari-mpari hau. Nikavara i Maria bo i Yusuf ante ngana nidulina riarapotande kande binata.
- ¹⁷Nikitarapa ngana haitu, nitesaramo anu niuli nu malaeka ka ira, haitumo, anu majadi nte ngana haitu ngena.
- ¹⁸Pura-pura tona nangepe tesa ntopoevu pangane nokumaa.
- ¹⁹Tapi i Maria nompariara pura-pura anu niepena, bo nitanondoakana.
- ²⁰Naupu sia topoevu notingguli hau ri karava nipombolira bimbara. Nitoyara Alatala, sabana pura-pura anu niepera bo nikitara nakana mpuu nangoseaka anu nitesa malaeka ka ira.
- ²¹Nagana valu-eo umuru nu ngana, nipoviaramo ada posuna. Pade nipoposangara ngana haitu i Yesus, nangoseaka tesa nu malaeka ka i Maria, dopame i Yesus nikatianaka ntinaNa.
- ²²Nakavamo tempona, i Yusuf bo i Maria hau ri Banua nu Alatala ri ngata Yerusalem movia ada pompakagasa karo i Maria naupu noana, nangoseaka Atura agama nipapola Nabi Musa. Ngana haitu niken muni hau ri ngata Yerusalem ala rapovia ada popatani Ia ka Alatala.
- ²³Haitu nipoviara nangoseaka anu nitulisi ri Buku Atura Agama ivei: “Pura-pura ngana langgai lumbua, kana rakeni rapatani ka Alatala.”
- ²⁴I Yusuf bo i Maria nanggeni pesomba sabana, nangoseaka atura nitulisi ri Buku Atura Agama, ira kana manggeni rombaa tonji togou atau rombaa ana ntonji banggebodo.
- ²⁵Tempo haitu ri ngata Yerusalem naria langgai nosanga i Simeon. Ia tona nanoa, anu natundu nte parenta nu Alatala bo nantongoraka tempona Alatala mompakasalama todea toIsrael. Nosa Gasa nu Alatala naria nte ia.
- ²⁶Nosa Gasa haitu nompopaisani ka ia, dopa ia mamate ane dopa rakitana Magau Topepakasalama anu nijanji nu Alatala.

²⁷I Simeon nipakeni Nosa Gasa nu Alatala mesua ri Banua nu Alatala. Tempona haitu muni, i Yusuf bo i Maria nanggeni i Yesus ala rapoviaka ada niparenta ri Atura agama nipapola Nabi Musa.

²⁸Jadi niala i Simeon ngana haitu bo nisalungguna pade nitoyana Alatala, ivei:

²⁹“Pue, nadupamo pojanjiMiu. Sii-sii yaku, batuaMiu hitu, mamala mamate masana,

³⁰apa matakū mbotomo nanggita Topepakasalama lako nte Komiu

³¹Iamo Magau Topepakasalama nidekeiMiu ka pura-pura manusia.

³²Iamo reme nombavanta rara ntai manusia pura-pura anu dopa nosisani nte Komiu, ala raparasayara Komiu. Bo Iamo sabana todeaMiu toIsrael rabila nu manusia pura-pura.”

³³Nangepe i Simeon nombatesa anu majadi nte Anara haitu, nokumaamo tina tuamaNa.

³⁴I Simeon nosambaya merapi Alatala mombadekei belo ka ira. Niulikana i Maria, tina nu Ngana haitu, “Ngana hitu mpuu-mpuu nipelisi nu Alatala ala madea toIsrael manavu sabana Ia, tapi madea toIsrael ntanina rapakasalamaNa. Ia majadi tanda lako nte Alatala tapi madea tona mangeva Ia.

³⁵Ivesiamo rapakalantoNa pekiri rara ntaira. Bo masusa muni raramiu. Peparajeamiu masimbayu mpo guma mantosu rara ntaimiu.”

³⁶Naria muni saito nabi mombine natua mpuumo. Sangana i Hana, ana i Panuel muli i Asyer. Nagana pitu-mpae ia noberei,

³⁷natimbalamo ia. Nau natimbalamo, ledō nipalaisina Banua nu Alatala. Eo bongi ia netupu nte Alatala ante nosambaya bo nopuasa. Tempo haitu i Hana noumuru valupulu bo pata-mpaemo.

³⁸Jadi tempo i Yesus nikenri ri Banua nu Alatala, eva nisuka, neonga muni i Hana, bo nikitano i Yesus. Jadi nitoyana Alatala, bo nitesana Ngana haitu

ka pura-pura tona nantongoraka tempona Alatala mombakabasaka toYerusalem lako ri balira.

³⁹Naupu pura-pura anu niparenta nu Alatala riaru AturaNa nipovia i Yusuf bo i Maria, nanjilimo ira hau ri ngata Nazaret ri bagia Galilea.

⁴⁰Ngana haitu nantambai kambasona, bo nantambai karosona. Napore katauna bo ia nipotove nu Alatala.

⁴¹Mpae-mpae tina tuama i Yesus hau ri ngata Yerusalem nantuntuni posusa eo mbaso ntoYahudi anu niuli Posusa Paskah.

⁴²Kasapulu-rompaekana umuru i Yesus, haumo ira ri Yerusalem nangoseaka kabiasara.

⁴³Naliutakapa posusa haitu, notinggulimo tina tuamaNa. I Yesus netiboli ri ngata Yerusalem, tapi ledo nisani ntina tuamaNa.

⁴⁴Nisarumakara Ia nolipa nosangani-nggani ante todea. Saeo ntuamo kakavaona polipara haitu, pade nielora i Yesus ri tatanga nu sampesuvura bo vegara. Tapi ledo nikavara i Yesus.

⁴⁵Jadipa, notingguli vai ira hau ri ngata Yerusalem mompaelo Ia.

⁴⁶Nagana katalu-mbongina pade nikavara Ia ri Banua nu Alatala. Ia nonturo ri sia nangepe guru agama notesa bo nipekutana-tanaNa ira.

⁴⁷Pura-pura tona nangepe Ia nokumaa, sabana natau mpuu Ia nesanaka guru agama.

⁴⁸Tina tuamaNa muni nokumaa nanggita ia ri sia. Nanguli tinaNa ka Ia, “Yesus, nakuya Iko nompovia kami ivehitu? Yaku nte tuamaMu nasesa mpuu mompaelo Iko!”

⁴⁹Nesana Ia, “Nakuya nielokamiu Yaku? Ledo nisanimiu Yaku kana maria ri banua nTuamaKu?”

⁵⁰Tapi ledo nisani ntina-tuamaNa nuapa batuana pesana i Yesus.

⁵¹Naupu haitu, notinggulimo i Yesus nosangani-nggani nte tina tuamaNa hau ri ngata Nazaret, bo natundu nte totuaNa. Pura-pura anu najadi haitu, niboli ntinaNa riara ntaina.

⁵²Kasae-sae nantambaimo kambaso i Yesus bo nantambaimo katauNa, bo nantambai nipotove nu Alatala bo manusia.

Lukas 3

¹Ri kasapulu lima-mpaena poparenta Magau Mbaso Kaisar Tiberius, i Pontius Pilatus najadi gubernur ri bagia Yudea, bo i Herodes noparenta ri bagia Galilea. I Filipus, tuaka i Herodes, noparenta ri propinsi Iturea bo propinsi Trakhonitis, bo i Lisantias noparenta ri bagia Abilene.

²I Hanas bo i Kayafas najadi Pakeni nTopanggeni Pesomba ntoYahudi. Tempo haitu muni i Yohanes, ana i Zakharia, nonturo ri karava bai. Alatala nangulika i Yohanes mompatolele tesaNa ka todea.

³Jadi, haumo i Yohanes ri bagia napara Binangga Yordan, nompatolele tesa nu Alatala ka pura-pura tona hamai ivei: “Kajeamo lako ri dosa-dosamiu, bo dekeimo karomiu radiu, ala komiu raampungu nu Alatala.”

⁴Pepatuduki i Yohanes haitu nompakadupa anu nitulisi riara buku Nabi Yesaya nggaulu, ivei: “Naria tona nongare-ngare ri karava bai: ‘Domo masae makava i Pue. Pakasadio dala ka Ia. Pakanoa dala raoseNa.

⁵Lembana kana raisi, bulu bo bunti-buntina kana rapakarano. Dala noleko-leko kana rapakanoro bo lovu-lovu kana raivu pakarata.

⁶Pura-pura tona ri njumangu ngata mompeinta Alatala mompakasalama manusia.’ ” (Yesaya 40:3-5)

⁷Nadea tona neonga mekidu nte i Yohanes. Niulikana ira, “Komiu noakala nasimbayu mpo ule! Nisarumakamiu ane komiu radiu, komiu ledo rapambela pehuku nu Alatala bara maipia! Haitu ledo nakana!

⁸Ane komiu mpuu-mpuu majea, popakitamo ante pokainggu nabelo. Nee rapekirimiu, ‘Kita hii muli Nabi Abraham, jadi pehuku nu Alatala ledo

rapambela ka kita!’ Haitu muni ledo nakana! Kuuli ka komiu, ane Alatala madota, nau vatu-vatu hitu mamala rapajadiNa muli i Abraham.

⁹Pehuku nu Alatala nasimbayu mpo baliu, nasadiamo rapotovo kayu sampe ri kalena ane ledo naria vuana nabelo. Kayu ledo nabelo vuana haitu ratovosi bo ratedaka ri mata nu apu.”

¹⁰Pade nekutana todea, “Ane ivesia, nuapa masipato rapovia kami?”

¹¹Nesana i Yohanes, “Tona rontonga bajuna, kana radekeina santonga ka tona ledo ntoto naria bajuna. Tona nokandea kana radekeina sanu ka roana ledo ria kandeanana.”

¹²Naria muni topesingara balasitee nakava mekidu nte i Yohanes bo nekutana, “Guru, nuapa masipato rapovia kami?”

¹³Nesana i Yohanes, “Nee raperapimiu melabi lako ri kadea balasitee nipakatantu pomarentamiu.”

¹⁴Naria muni tantara-tantara nakava nekutana nte i Yohanes, “Berimba nte kami? Nuapa masipato rapovia kami?” Nesana i Yohanes, “Tumo momparangga tona bo nee raagosimiu doina. Nee raelomiu nelabi lako ri gajimiu. Naganamo gajimiu.”

¹⁵Tempo haitu todea nompekutana-tana bara i Yohanes hitumo Magau Topepakasalama nijanji nu Alatala, anu nipopeara.

¹⁶Nisani i Yohanes pompekirira. Jadi niulikana ira pura-pura, “Yaku mombadiu komiu ante uve, tandana najeamo komiu. Tapi da nariapa saito ngena meonga nelabipa kakuasaNa pade yaku. Naogepa Ia pade yaku sampe nau mombavole lui nu sapatuNa, ledo masipato yaku. Ia mombadiu komiu ante Nosa Gasa, bo apu.

¹⁷Ia nasimbayu mpo tona novaro pae. Nasadiamo Ia ante tapi ri paleNa mombavaro pura-pura paena sampe magasa. Pae naisi raboliNa riara gampiri, tapi meena rapalabusiNa ri mata nu apu ledo mapaya-paya.”

¹⁸Ivesiamo i Yohanes nompatuduki tona bo mpengaya-ngaya pepatuduki nipakena tempo nompatolele Kareba Belo.

¹⁹Naria sanggani i Yohanes nangonteaka Magau Herodes anu nomparenta ri bagia Galilea, sabana mpengaya-ngaya anu nadaa nipoviana. Nionteakana apa i Herodes nangala i Herodias bo nipobereisina. I Herodias erana mboto, berei ntuaakana.

²⁰Tapi Magau Herodes ledo najea, ia aga nantambai kadaana bo nitarunguna i Yohanes.

²¹Dopame i Yohanes nisuaraka riarar ntarunggu, naria saeo ia nombadiu todea. Naupu todea nidiuna, i Yesus muni nidiuna. Tempo i Yesus nosambaya, natebukamo langi

²²bo Nosa Gasa nolenje mpo tonji banggebodo, netuu nte Ia. Pade naria suara lako ri suruga nanguli, “Ikomo AnaKu nipotoveKu. Ikomo nompakadamba raraKu.”

²³Tempo i Yesus nompamula pokarajaaNa, umuruNa nitasere talupulu mpaemo. Nangoseaka panggava ntodea, Ia ana i Yusuf, Yusuf ana i Eli;

²⁴Eli ana i Matat; Matat ana i Lewi; Lewi ana i Malkhi; Malkhi ana i Yanai; Yanai ana i Yusuf;

²⁵Yusuf ana i Matica; Matica ana i Amos; Amos ana i Nahum; Nahum ana i Hesli; Hesli ana i Nagai;

²⁶Nagai ana i Maat; Maat ana i Matica; Matica ana i Simeis; Simeis ana i Yosekh; Yosekh ana i Yoda;

²⁷Yoda ana i Yohanan; Yohanan ana i Resa; Resa ana i Zerubabel; Zerubabel ana i Sealtiel; Sealtiel ana i Neri;

²⁸Neri ana i Malkhi; Malkhi ana i Adi; Adi ana i Kosam; Kosam ana i Elmadam; Elmadam ana i Er;

²⁹Er ana i Yesua; Yesua ana i Eliezer; Eliezer ana i Yorim; Yorim ana i Matat; Matat ana i Lewi;

³⁰Lewi ana i Simeon; Simeon ana i Yehuda; Yehuda ana i Yusuf; Yusuf ana i Yonam; Yonam ana i Elyakim;

³¹Elyakim ana i Melea; Melea ana i Mina; Mina ana i Matata; Matata ana i Natan; Natan ana i Daud;

³²Daud ana i Isai; Isai ana i Obed; Obed ana i Boas; Boas ana i Salmon; Salmon ana i Nahason;

³³Nahason ana i Aminadab; Aminadab ana i Admin; Admin ana i Arni; Arni ana i Hezron; Hesron ana i Peres; Peres ana i Yehuda;

³⁴Yehuda ana i Yakub; Yakub ana i Ishak; Ishak ana i Abraham; Abraham ana i Terah; Terah ana i Nahor;

³⁵Nahor ana i Serug; Serug ana i Rehu; Rehu ana i Peleg; Peleg ana i Eber; Eber ana i Salmon;

³⁶Salmon ana i Kenan; Kenan ana i Arpakhсад; Arpakhсад ana i Sem; Sem ana i Nuh; Nuh ana i Lamekh;

³⁷Lamekh ana i Metusalah; Metusalah ana i Henokh; Henokh ana i Yared; Yared ana i Mahalaleel; Mahalaleel ana i Kenan

³⁸Kenan ana i Enos; Enos ana i Set; Set ana i Adam; Adam ana nu Alatala.

Lukas 4

¹Naupu i Yesus nidiu, Ia nikuasai Nosa Gasa nu Alatala. Ia nompalaisi Binangga Yordan, pade niken Nosa Gasa hau ranggarava bai.

²Patapulu-mbongi kasaena Ia nonturo sumai bo nipesori Magau nu Seta. Patapulu-mbongi Ia sumai ledo ria nuapa-nuapa nikandeNa sampe naara mpuu taiNa.

³Nanguli Magau nu Seta ka Ia, “Ane Komiu mpuu-mpuu Ana nu Alatala, tudumo vatu hitu majadi kande!”

⁴Nesana i Yesus, “Naria nitulisi riaru Buku Gasa ivei: ‘Ledo aga kande mompakatuvu manusia.’”

- ⁵Naupu haitu nikenina vai i Yesus hau ri bulu nalanga. Aga sampida mata nipopakita Magau nu Setamo ka i Yesus pura-pura kamagauana ri dunia.
- ⁶Pade nanguli Seta ka i Yesus, “Kuasa momparenta pura-pura kamagaua, bo pura-pura kakalumanara kudekei ka Komiu, sabana pura-pura hitu yaku tupuna bo namala kudekei ka isema-sema kupodota.
- ⁷Pura-pura majadi bagiaMiu ane rasombaMiu yaku.”
- ⁸Pade nesana i Yesus, “Riara nu Buku Gasa nitulisi ivei: ‘Komiu kana mombasomba Alatala, Tupumiu. Aga Iamo masipato rapetupumiu.’”
- ⁹Naupu haitu nikeni Magau nu Seta vaimo i Yesus hau ri ngata Yerusalem bo nituuna ri vumbu Banua nu Alatala pade niulina, “Ane Komiu mpuu-mpuu Ana nu Alatala, potingganavumo Komiu lako rahitu.
- ¹⁰Ledo makuya Komiu, sabana riara Buku Gasa nitulisi ivei: ‘Alatala mombatudu malaekaNa mombasaliku Komiu.
- ¹¹Ratandera mpale Komiu ala nau kadaMiu ledo mambela watu.”
- ¹²Nesana i Yesus, “Naria Tesa nu Alatala nanguli ivei: ‘Nee mupesori Alatala, Tupumu.’”
- ¹³Naupu Magau nu Seta nompesori i Yesus ante mpengaya akala, nipalaisinamo i Yesus bo nantongoraka loga mabelo mompesoriNa mpanjili.
- ¹⁴Naupu sia i Yesus nikuasai Nosa Gasa bo notinggulimo Ia hau ri bagia Galilea. Tona ri umba-umba ngata hamai notesaki anu nipovia i Yesus.
- ¹⁵Ia nompaguru ri banua petupu ntoYahudi bo pura-pura tona nombatoiya Ia.
- ¹⁶I Yesus hau ri Nazaret, ri ngata pompakambaso Ia. Nangoseaka kabiasaNa ri eo penonto, Ia nesua ri banua petupu, bo neangga nombabaca isi Buku Gasa.
- ¹⁷Buku Nabi Yesaya nidekei ka Ia. NitimpaNa, nikavaNa bagia hitu pade nibacaNa ivei:
- ¹⁸“Nosa Gasa nu Alatala naria nte Yaku, sabana Iamo nompelisi Yaku manggeni Kareba Belo ka tona napakasi. Ia nomposumba Yaku mangulika tona nitavani,

rakabasaka. NituduNa Yaku mangulika tona naburo, mamala mekita mpanjili. NituduNa Yaku mombakabasaka tona nipobatua.

¹⁹NituduNa muni Yaku mompasimbayu ka komiu kakava nu Alatala mompakasalama todeaNa.” (Yesaya 61:1-2)

²⁰Naupu nibacaNa, nitutuiNamo bo nipopanjiNamo ka topojaga ri sia. Naupu haitu nonturomo Ia bo pura-pura tona riaru banua petupu haitu nompeintaka Ia, mangepe anu rauliNa.

²¹I Yesus nompamulamo nompatuduki ira. NiuliNa, “Anu nibacaKu pangane, dako nipakadupa eo hitu ante peongaKu.”

²²Pura-pura tona ri sia nokumaa nangepe Ia, sabana nabelo mpuu anu niuliNa. Niulira, “Nabelo mpuu anu nitesaNa! Berimba bo mamala Ia motesa ivehaitu? Ia aga ana i Yusuf!”

²³Nanguli i Yesus ka ira, “Natantu raulimiu porapa hitu ka Yaku: ‘Dokutoro, pakabelo karomu mboto. Ane Komiu mpuu-mpuu nabi, popakitaMiu muni kabarakaMiu ri ngataMiu mboto mpo anu niepe kami nipoviaMiu ri ngata Kapernaum.’

²⁴Pariaramo tesaKu hitu! Ledo ria saitoa nabi nipakaoge ntona ri ngatana mboto!

²⁵Tora anu najadi tempo Nabi Elia nggaulu. Talu-mpae santanga kasaena kapane nu eo, ledo ria uda, najadimo kaara mpai neliu gantana ri njumangata. Tempo haitu nadea timbala ri ngata ntoYahudi.

²⁶Naupa ivesia, Nabi Elia ledo nitudu nu Alatala hau mantulungi timbala ntoYahudi. Aga nituduNa hau ri ngata Sarfat napara ngata Sidon mantulungi saito timbala ledo toYahudi.

²⁷Ivesia muni najadi tempo Nabi Elisa natuvu, nadea toYahudi nadua oge. Tapi ledo naria saitoa toYahudi nipakabelo Nabi Elisa. Aga i Naaman toSiria nipakabelona. Sia sampe niuliKu, ledo ria saitoa nabi nipakaoge ntona ri ngatana mboto!”

- ²⁸Nieperapa tesa i Yesus, narau mpuu rara ntona riara banua petupu haitu.
- ²⁹Jadi neanggamo ira nompopalai i Yesus mesuvu lako ri ngatara, bo nikenira la hau ri tinggi nu bingge nipongatara haitu. Patujura mombajunuaka Ia lako ri tinggi bingge langa haitu.
- ³⁰Tapi i Yesus noliu ri tatangara, bo kapola-pola nalai.
- ³¹I Yesus hau ri ngata Kapernaum ri bagia Galilea. Ri sia Ia nompaguru ri banua petupu ri eo penonto.
- ³²Nokumaa pura ira ri sia nangepe pepatudukiNa, apa Ia notesa mpo tona nakuasa.
- ³³Riara banua petupu haitu, naria saito langgai nipesua nu seta. Ia nongare ante suara namangga,
- ³⁴“He, Yesus, toNazaret! RakuyaMiu kami? Komiu nakava mompakaropu kami? Nisaniku isema Komiu. Komiumo ToGasa nitudu nu Alatala!”
- ³⁵I Yesus nanguli ka seta haitu, “Kalinomo! Palaimo lako ri karo ntona hitu!” Seta haitu nombadunganaka tona haitu ri tatanga ntodea bo nalaimo ia, bo ledo nipakaduana.
- ³⁶Nanggita kajadia pangane nokumaa puramo tona ri sia, bo notesamo ira, “Natantu mpuu tesa ntona haitu! Ante kuasaNa nipopalaiNa seta, bo nalai mpuumo!”
- ³⁷Naupu haitu natolelemo kareba i Yesus ri njumangu bagia haitu.
- ³⁸Nesuvumo i Yesus nompalaisi banua petupu haitu, hau ri banua i Simon. Matua i Simon mombine nakokora ntamo bo tona hamai nerapi ala i Yesus mantulungi ia.
- ³⁹Jadi hau i Yesus neangga ri sinjori mombine haitu, pade nipopalaiNa dua kokora haitu. Jadi nabelo mpuumo matua i Simon, bo kaliu-liu nembangu ia hau mombakadambanaka ira.
- ⁴⁰Nasolo eo, nadeamo tona nanggeni roara nadua mpengaya ka i Yesus. Jadi i Yesus nombadika paleNa ri karo ntona saito-saito, bo nompakabelo ira.

⁴¹NipopalaiNa muni seta lako ri tona nipesua nu seta. Seta-seta haitu nesuvu bo nongare-ngare, “Komi Ana nu Alatala!” Tapi i Yesus nangulika seta-seta haitu, “Kalino!” Ledo nidekeiNa ira notesa, sabana nisanira Iamo Magau Topepakasalama anu nijanji nu Alatala.

⁴²Sanggaeona nalaimo i Yesus lako ri ngata haitu hau ri kalinona. Todea nangelo Ia sampe nikavara. Nipasimbukura nompatetaa i Yesus ala Ia ledo mompalaisi ngatara.

⁴³Tapi nanguli i Yesus ka ira, “Yaku niposumba nu Alatala mompatolele Kareba Belo ka todea. Jadi Yaku kana hau muni ri ngata ntanina mompatolele Kareba Belo anu notesaki Poparenta nu Alatala.”

⁴⁴Jadi haumo Ia nompatolele Kareba Belo ri banua petupu ri njumangata ri bagia Yudea.

Lukas 5

¹Naria sanggani i Yesus neangga nompaguru ri tinggi Rano Genesaret. Nadea tona nosiaso madota mangepe tesa nu Alatala.

²NikitaNa randua sakaya ri bivi rano. Tempo haitu topompemala bau nanaumo lako ri sakayara bo notoposi jalara.

³I Yesus hau nesavi sakaya, haitumo sakaya i Simon, bo nituduNa i Simon mombasoro sakaya haitu makavao sakide lako ri bivi rano. I Yesus nonturo riarra sakaya, bo lako ranjakaya Ia nompaguru todea.

⁴Naupu Ia nompaguru todea, niulikaNamo i Simon, “Vose hau ri kandalana sakidepa sakayamiu pade tendeaka jalamiu mosaka bau.”

⁵Nesana i Simon, “Guru, sambongi ntuamo kami nompemala bau tapi nau sambaa ledo ntoto naria nikava kami. Tapi apa Komi netudu, jadi ratendeaka kami sangganipa jala mompemala bau.”

⁶Jadi naupu nitendeakara jalara pangane, nadea mpuu bau nikavara. Naponu jalara, sampe jalara nompamula mabite.

⁷Sabana haitu, ira nekitulungi nte roara ri sakaya ntanina, “Kamai ruru, le! Tulungimo kami!” Nakavamo roara bo nosangani-nggani nombakosini bau riara sakaya randua haitu. Naponu pura sakaya randua nikosinira bau sampe sakaya sakidepa natala.

⁸Tempo i Simon Petrus nanggita haitu, nantaputumo ia ri ngayo i Yesus bo nanguli, “Nee mapara nte yaku, Pue, apa yaku tona nadosa!”

⁹Niulina ivesia sabana ia ante roana nokumaa mpuu nanggita kadea nu bau namala nijalara.

¹⁰Ivesia muni roa i Simon, haitumo i Yakobus bo i Yohanes, ana i Zebedeus. Nanguli i Yesus ka i Simon, “Nee maeka. Komiu topebau mami, tapi nompamula sii-sii komiu mompaelo tona bo mompatuduki ira mangoseaka Yaku.”

¹¹Naupu nangepe tesa i Yesus, nikeniramo sakaya randua haitu hau ri kabatana. Pade nipalaisira pura-puramo anura bo hau nioseakara i Yesus.

¹²Naria sanggani i Yesus ri sangu ngata. Ri ngata haitu naria saito langgai nadua oge njumanggaro. Nikitanapa i Yesus, notunggamo ia sampe ri tana ri ngayo i Yesus bo mpuu-mpuu nerapi, “Pue, ane madota Komiu, Komiu nompakule mompakabelo yaku.”

¹³Nangepe tesa ntona haitu, i Yesus nombadika paleNa ri karo ntona haitu bo nanguli, “Madota Yaku. Mabelomo iko!” Kaliu-liu nabelo mpuumo tona haitu.

¹⁴I Yesus nombatagi tona haitu, “Nee mutesa ka tona anu najadi ri karomu. Koimo hau nte topanggeni pesomba bo popakitamo karomu ka ia ala rakitana nabelomo karomu. Bo dekeimo pesombamu ka Alatala nangoseaka parenta Nabi Musa, ala mompopakita ka todea iko mpuu-mpuu nabelomo.”

¹⁵Tapi kareba povia i Yesus natolele ri umba-umba sampe nadea mpuu tona neonga mangepe tesaNa bo nekipakabelo.

¹⁶Tapi i Yesus nasaro hau ri kalinona nosambaya.

¹⁷Naria sanggani i Yesus nompaguru bo naria bara sako-ndua toFarisi ante guru agama nonturo ri sia nangepe Ia. Ira lako ri mpengaya-ngaya ngata ri bagia Galilea bo Yudea bo lako ri ngata Yerusalem muni. Alatala nombadekei kuasa ka i Yesus mompakabelo tona nadua.

¹⁸Tempo haitu bara sako-ndua tona nombakova topunggu naturu ri ompa. Nipasimbukura manggeni topunggu haitu hau mesua rabanua bo ratuu ri ngayo i Yesus.

¹⁹Tapi ledo nipakulera nesua, sabana nosimpilii gaga tona ri sia. Jadipa nikeniramo topunggu haitu hau nompene ri bavo nu ata ntalumbu. Nibonggara ata haitu pade niulura topunggu ante ompana hau ri ngayo i Yesus ri tatanga ntodea.

²⁰I Yesus nanggita karoso pomparasayara, jadi niuliNamo, “Sampesuvu, dosamu niampungimo.”

²¹Nangepe haitu guru agama bo toFarisi ri sia nompekiri, “Isema ntoto tona hitu sampe nabia nompasimbayu karoNa nte Alatala! Ledo ria manusia nompakule mombaampungi dosa manusia, aga Alatala!”

²²Nisani i Yesus pekiri nu guru agama bo toFarisi haitu. Jadi niulikaNa ira, “Nakuya komiu nompekiri ivesia riarantaimiu?”

²³Ledo nakaja manguli ‘Dosamu niampungimo.’ Nakajapa manguli ‘Peanggamo bo polipamo!’

²⁴Tapi Kupopakita ka komiu Yaku, Ana nu Manusia, nakuasa mombaampungi dosa manusia ri dunia.” Pade nituduNa topunggu haitu, “Peanggamo, alamo ompa paturumu bo potinggulimo!”

²⁵Nangepe haitu, neangga mpuumo topunggu ri ngayo ntodea. Nialanamo ompa paturuna bo nanjili hau ri banuana nantoiya Alatala.

²⁶Nanggita haitu, ira pura-pura nokumaa mpuu bo nitoyara Alatala. Naeka munimo rarara bo niulira, “Nabaraka mpuu kajadia nikitata eo hitu!”

²⁷Naliu haitu, i Yesus nesuvu lako ri banua bo nikitaNa saito topesingara balasitee nosanga i Lewi, nonturo riara kantoro ntopesingara balasitee. I Yesus nangulika ia, “Oseakamo Yaku!”

²⁸Nangepe haitu neangamo i Lewi bo nipalaisinamo pura-pura bagona bo hau nioseakana i Yesus.

²⁹Naupu sia, i Lewi novia posusa ka i Yesus ri banuana. Nadea topesingara balasitee ante tona ntanina nangande nosangani-nggani nte ira ri posusa haitu.

³⁰Naria bara sako-ndua toFarisi ante guru agamara. Ledo nadamba rarara nanggita i Yesus hau ri posusa. Niulikara topangoseaka i Yesus, “Nakuya komiu nangande bo nanginu nosangani-nggani ante topesingara balasitee bo tona nadosa?”

³¹Nesana i Yesus, “Tona ledo nadua, ledo paraluu rapakulisi nu dokutoro, aga tona nadua.

³²Ivesia muni Yaku. Yaku ledo nakava mompokio tona nanao, tapi mompokio tona nadosa majea lako ri dosara.”

³³ToFarisi ante guru-guru agama pangane nanguli ka i Yesus, “Anaguru i Yohanes nasaro nopuasa bo nosambaya. Ivesia muni anaguru ntoFarisi. Tapi anaguruMiu aga nangande bo nanginu. Nakuya ira ledo nopuasa?”

³⁴Nanguli i Yesus ka ira, “Ane da naria boti langgai ri posusa ponika, ledo masipato torata mopuasa.

³⁵Tapi makava tempona boti langgai raala lako nte ira. Tempo haitu pade mopuasa ira.”

³⁶Naliu haitu naria porapa niuli i Yesus ka ira. NiuliNa, “Ledo ria tona mombabitesi baju nabaru bo raalana sambite ratampalakana baju naranta. Apa ane ivesia, tantu baju nabaru haitu mabite, bo kae nipotampala haitu ledo muni mabelo rakita ri baju ranta.

³⁷Ivesia muni ante uve anggur. Ledo ria tona mombaisi uve anggur nabaru ri pomboli njae, apa uve anggur nabaru morende mompakapasa pombolina. Ane mapasa pombolina, mabubusaka sanggani uve anggur. Jadi mageromo pombolina bo marugimo uve anggur.

³⁸Kakanana, uve anggur nabaru kana raboli ri pomboli nabaru muni.

³⁹Maupu manginu uve anggur njae ledo rapokono ntona manginu uve anggur nabaru, sabana raulira, ‘Narasapa uve anggur njae.’ ”

Lukas 6

¹Naria saeo, nambela eo penonto, i Yesus ante ana-anaguruNa noliu ri talua gando. Ana-anaguruNa nokaleti gando, nitiera bo niontara.

²Nanggita poviara haitu, bara sako-ndua toFarisi ri sia nangonteaka ira, “Nakuya komiu nombaliunaka atura agamata? Nitagi nu agama mokarajaa ri eo penonto!”

³Nesana i Yesus, “Dopa nibacamiu anu nipovia Magau Daud nggaulu? Tempo ia ante roa-roana naara taira,

⁴ia nesua riaru Banua nu Alatala bo nialana roti nipesomba ka Alatala. Nikandena roti haitu bo nidekeina muni ka roana. Kakanana, nangoseaka atura agamata, aga topanggeni pesomba masipato mangande roti haitu. Tapi naupa ivesia, i Daud ledo nisalai.”

⁵Bo ledo muni masipato komiu mombasalai Yaku, Ana nu Manusia. Yaku nakuasa manguli nuapa masipato rapovia ri eo penonto.”

⁶Ri eo penonto ntanina, i Yesus hau nompaguru ri banua petupu ntoYahudi. Ri sia naria saito tona nakoyo pale ngganana.

⁷Bara sako-ndua guru agama ante toFarisi nangganotosi i Yesus pakabelo-belo ala rakitara bara mompakabelo tona nadua haitu Ia ri eo penonto. Ira madota mangelo sala i Yesus rapangadura.

⁸Tapi nisaniNa pekirira. Jadi niulikaNa tona nakoyo palena haitu, “Kaimo, peangga ri sii!” Bo hau mpuumo tona haitu neangga ri sia.

⁹I Yesus nekutana nte ira pura-pura, “Nangoseaka atura agamata, nuapa nipaloga ka kita rapoviata ri eo penonto? Movia anu nabelo atau movia anu nadaa? Mantulungi tona atau mompatesi?”

¹⁰Naupu i Yesus nanguli ivesia, neilimo Ia nangganoto pura-pura tona ri sia, pade niulikaNa tona nakoyo palena, “Odomo palemu!” Niodona palena, nabelo mpuumo.

¹¹Nanggita haitu nagigi mpuu rara nu guru-guru agama bo toFarisi haitu. Jadi nolibu ira nuapa mamala rapoviara nte i Yesus.

¹²Tempo haitu, i Yesus ante topangoseaka Ia hau nantende ri bulu. Nakava sumai Ia nosambaya ka Alatala njambongi ntua.

¹³Naeo mpadondo, nipasiromuNa puramo tona nangoseaka Ia, pade nipelisiNa sapulu randua lako nte ira majadi anaguruNa, ala ira mompapola tesa nu Alatala ka todea.

¹⁴⁻¹⁶Tona nipelisiNa haitu iamo: i Simon nidaeNa i Petrus, i Andreas tuei i Simon, i Yakobus, i Yohanes, i Filipus, i Bartolomeus, i Matius, i Tomas, i Yakobus ana i Alfeus, i Simon lako ri partai Zelot, haitumo partai Maradeka ntoYahudi, i Yudas ana i Yakobus, ante i Yudas Iskariot, anu nompobalu i Yesus.

¹⁷Naupu i Yesus nompelisi anaguruNa, notuamo Ia nosangani-nggani ante ana-anaguruNa lako ri bulu haitu. Tempo ira natudu ri lembana, nadea mpuu topeoseaka ntanina nompopea ri sia bo nadea muni tona neonga lako ri umba-umba ri bagia Yudea, lako ri ngata Yerusalem, lako ri ngata Tirus bo Sidon ri tinggi ntasi.

¹⁸Ira nakava mangepe tesa i Yesus bo rapakabeloNa. Tona nipesua nu seta nakava muni bo nipakabeloNa.

¹⁹Nadea tona nompasimbuku manggabe karo i Yesus sabana naria kuasa nu Alatala nesuvu lako nte Ia anu nompakabelo pura-pura ira.

²⁰I Yesus nangganoto ana-anaguruNa bo niulikaNa, “Nabelo mpuu komiu tona napakasi, sabana komiumo majadi todea riaro Poparenta nu Alatala.

- ²¹Nabelo mpuu komiu anu naara sii-sii, sabana komiu rapakabosu. Nabelo mpuu komiu nasusa rara sii-sii, sabana raramiu rapakasana.
- ²²Nabelo mpuu komiu ane rapovuu mata ntona, rasuko ntona, rasalai ntona bo sangamiu rapakadaa ntona sabana komiu nangoseaka Yaku, Ana nu Manusia.
- ²³Apa ivesia muni nipovia ntotuara nggaulu ka nabi-nabi nu Alatala. Jadi ane rapoviara ivehaitu muni komiu, kana madamba mpuu raramiu, sabana naoge belo ri suruga nipakadia nu Alatala ka komiu.
- ²⁴Mandasa mpuu komiu anu nakalumana sii-sii, sabana nikavamiu puramo anu nompakasana raramiu.
- ²⁵Mandasa mpuu komiu anu nabosu sii-sii, sabana komiu maara ngena. Mandasa mpuu komiu anu nadamba sii-sii, sabana komiu masusa bo motumangi ngena.
- ²⁶Mandasa mpuu komiu ane pura-pura tona nombatoiya komiu, sabana ivesia muni totuamiu nggaulu nombatoiya nabi mpodava.”
- ²⁷“Tapi Kuuli ka komiu topangepe tesaKu sii-sii: Potovemo balimiu, povia anu nabelo ka tona navuu matana nte komiu.
- ²⁸Perapi belo ka topompindasi komiu bo posambayaka tona novia nadaa ka komiu.
- ²⁹Ane rasapa ntona sabingga kalimpimiu, nee rapesava. Taa ka ia vai sabinggapa rasapana. Ane raalasi ntona buyamiu, dekeika muni bajumiu.
- ³⁰Ane tona merapi nte komiu, dekeimo ka ia. Bo ane mbara-mbaramiu raalasi ntona, nee raperapimiu mpanjili anu nialana.
- ³¹Nuapa-nuapa rapodotamiu rapovia ntona ka komiu, ivesia muni rapoviamiu ka tona.
- ³²Ane komiu mompotove tona anu nompotove komiu, nee rasarumakamiu Alatala nombatoiya komiu. Nau tona nadosa nipotovera muni tona anu nompotove ira.

³³Ane komiu aga mokainggu nabelo nte tona anu nokainggu nabelo nte komiu, nee rasarumakamiu Alatala mombatoiya komiu, sabana tona nadosa nokainggu ivesia muni.

³⁴Bo ane komiu mompopainda doimiu ka tona nompakule mompopanjili doimiu, nee rasarumakamiu Alatala mantoiya komiu, sabana tona nadosa muni mompopainda doira ka tona nadosa ntanina ane rasanira tona haitu nompakule mompopanjili doira.

³⁵Kakanana ledo ivesia! Komiu kana mompotove balimiu, bo povia anu nabelo ka ira. Ane tona meada nte komiu, dekei ka ia bo nemo rapopea rapopanjilina. Ane ivesia pokainggumiu, naoge mpuu belo radekei ka komiu bo komiu majadi ana-ana nu Alatala toNeliu KaogeNa, apa Ia muni novia anu nabelo ka tona nadaa bo tona ledo nisanina notarima kasi.

³⁶Komiu muni kana mepotove nasimbayu eva pepotove nu Alatala, Tuamamiu.”

³⁷“Nee rapakasalamiu tona ala komiu ledo rapakasala nu Alatala. Nee mompakatantu sala ntona kana rahuku, ala komiu ledo rahuku nu Alatala. Ampungimo tona ntanina ala komiu muni raampungi nu Alatala.

³⁸Dekei ka tona ntanina ala Alatala muni mombadekei ka komiu. Bo pedekei nu Alatala nabelo mpuu, kadeana nasimbayu mpo posuka naponu niparoo bo nigoya ala namala raisi vai sampe maponu suu. Apa posuka nipakemiu ka tona ntanina, haitu muni raposuka ka komiu.”

³⁹I Yesus notesa sangu porapa ka topangoseaka Ia. “Ledo masipato toburo mombanini toburo ntanina. Natantu ira randua aga manavu mpasanggani riaralovu.

⁴⁰Ledo ria ngana sikola naogepa pade guruna. Tapi ane matamamo posikolana, masimbayumo ia nte guruna.

⁴¹Nakuya komiu namala nanggita dosa nu roamiu nakodi mpo garupu ri matana, tapi dosamiu mboto nambaso mpo baloti ri matamiu ledo nikitamiu?

⁴²Berimba komiu mamala manguli ka roa, ‘He, sampesuvu, mai kulelaka garupu ri matamu,’ iyapa baloti ri matamiu mboto ledo nikitamiu! Komiu aga tobelo ri sumba! Lelaka ntani ruru baloti ri matamiu ala mamala komiu mekita bo mombalelaka garupu ri mata nu sampesuvumiu!”

⁴³“Ledo naria kayu nabelo novua nadaa. Ledo muni naria kayu nadaa novua nabelo.

⁴⁴Pura-pura kayu nisani lako ri vuana. Vua ara ledo nipupu lako ri lemo ntasi bo anggur ledo nipupu lako ri valaa karui.

⁴⁵Ivesia muni manusia. Tona nabelo, nabelo muni pokaingguna bo potesana, sabana pekiri rara ntaina nabelo. Bo tona nadaa, pokaingguna bo potesana muni nadaa sabana pekiri rara ntaina nadaa. Apa tesa nisovadakana nopuna lako ri pekiri rara ntaina.”

⁴⁶Nangulimo i Yesus, “Nakuya komiu noronde Yaku ‘Pue, Pue’ tapi ledo nioseakamiu parentaKu?

⁴⁷Tona nakava nte Yaku nangepe bo nangoseaka tesaKu,

⁴⁸ia nasimbayu mpo topovia banua. Nikaena pakandala tana bo nipoviana pandasi vatu. Tempo lono bo uve binangga nanggabuntu nodala ri banua, banua haitu ledo nogoya sabana pandasina naroso.

⁴⁹Tapi isema-isema aga niepena bayangi tesaKu bo ledo nioseakana, ia nasimbayu mpo tona novia banua ledo nipandasi. Tempo lono oge nodala ri banua, banua haitu kaliu-liu naombo bo nagero ntotomo.”

Lukas 7

¹Naupu i Yesus notesa ka todea, haumo Ia ri ngata Kapernaum.

²Hamai naria saito balengga ntantara nu Magau Roma bo naria muni batua nipotovenana. Batua haitu nadua ntamo, damo kamatena.

³Tempo balengga ntantara haitu nangepe kareba i Yesus, nituduna bara sako-ndua totua ntoYahudi hau merapi tulungi nte i Yesus makava mompakabelo batuanya nadua.

⁴Tempo totua ntoYahudi nakava ri ngayo i Yesus, ira mpuu-mpuu nerapi tulungi nte i Yesus ivei: “Tadulako haitu tona masipato ratulungiMiu,

⁵sabana nipotovena kita toYahudi bo nidekeina muni doi rapombangu banua petuputa.”

⁶Jadi hau mpuumo i Yesus nosangani-nggani ante ira. Naparapa i Yesus ri banuana, nitudu nu balengga ntantaramo bara sako-ndua roana hau mantomunaka i Yesus bo manguli, “Pue, ledo paraluu Komiu makava ri banuaku, sabana yaku ledo toYahudi. Ledo masipato yaku mantarima Komiu ri banuaku.

⁷Ledo masipato yaku mosintomu nte Komiu. Nau aga rauliMiu sambela rombela, mabelomo batuaku.

⁸Nisaniku ia mabelo sabana yaku muni natundu ri parenta nu puaku. Bo naria muni tantara-tantara natundu nte parentaku. Ane kuulika saito tantara, ‘Koimo’, ia kana hau. Ane kuulika tantara ntanina, ‘Katumai,’ ia kana tumai. Ane kuulika batuaku, ‘Povia anu haitu,’ kana rapoviana.”

⁹Nokumaa mpuu i Yesus nangepe tesa nu balengga ntantara haitu. Jadi neili Ia bo nangulika todea nangoseaka Ia, “Natantu mpuu pomparasaya ntona hitu! Nau todea toYahudi, muli i Israel, dopa ria nikavaKu pomparasayana naroso mpo pomparasaya ntona hitu.”

¹⁰Tempo tona nitudu gahaitu nanjili ri banua, nikavara batua haitu nabelo mpuumo.

¹¹Naliutaka haitu, i Yesus hau ri ngata Nain. AnaguruNa hau nosangani-nggani nte Ia bo nadea muni tona ntanina nantuntuni Ia.

¹²Tempo i Yesus napara ri bobaa mesua rangata, nikitaNamo topokova tomate nesuvu lako riarangata haitu. Tomate haitu ngana langgai, saito-itona antimbala. Nadea muni tona lako ri ngata haitu nomporea timbala haitu.

¹³Tempo i Yesus nanggita ia, naasi mpuumo mataNa. NiulikaNa, “Nee motumangi, Ina.”

¹⁴Pade hau i Yesus nanggaparai tomate nikova ntona haitu bo nikingginisiNa pokova. Jadi, topokova tomate haitu nenonto. Nanguli i Yesus, “He, kabilasa, Kuuli ka iko, pembangumo!”

¹⁵Pade nembangu mpuumo tomate haitu. Ia nonturo bo nompamulamo notesa. Naupu haitu i Yesus nangulika tinana, “Siimo anamu, Ina.”

¹⁶Tona nanggita kajadia haitu, naeka puramo bo nitoyara Alatala ivei: “Nabi nakuasa neumba ri tatangata! Alatala mpuu-mpuu nakavamo mombatulungi todeaNa!”

¹⁷Kareba haitu natolelemo ri njumangu bagia Yudea, bo muni ri ngata-ngata napara Yudea.

¹⁸Ana-anaguru i Yohanes Topediu notesa ka i Yohanes pura-pura anu nipovia i Yesus. Nangepe haitu, nirondena randua anaguruna,

¹⁹bo nituduna hau mompekutana i Yesus ivei: “Komiumo hii Magau Topepakasalama anu makava nangoseaka pojanji nu Alatala? Atau bara da mariapa tona ntanina rapopea kami?”

²⁰Jadi haumo randua anaguruna mompekutana i Yesus, ivei: “I Yohanes nombatudu kami mekutana nte Komiu ivei: ‘Komiumo hii Magau Topepakasalama anu makava nangoseaka pojanji nu Alatala, atau bara da mariapa tona ntanina rapopea kami?’ “

²¹Tempo haitu i Yesus nompakabelo todea bo nompopalai seta lako ri karo ntona, bo nadea muni toburo nipakabeloNa sampe namala ira nekita mpanjili.

²²Jadi, nesanamo i Yesus ka tona nitudu i Yohanes, “Panjilimo komiu, bo ulika i Yohanes pura-pura anu nikitamiu bo niepemi: tona naburo nekitamo, tona napunggu nolipamo, tona nadua oge nabelomo, tona nabongo neepemo, tona namate natuvu mpanjilimo, bo Kareba Belo lako nte Alatala nipatolele munimo ka tona napakasi.

²³Nabelo mpuu tona ledo noura nomparasaya Yaku.”

²⁴Nalaipa tona nitudu i Yohanes pangane, nitesaNamo katuvu i Yohanes ka todea ivei: “Nuapa patujumiu hau ranggarava bai nompeinta i Yohanes bara ipia? Hau nanggita tona nonggai rarana, eva jono niburu mpoiri hau tumai?

²⁵Tantu ledo! Jadi hau manggita nuapa komiu? Bara manggita tona nobaju nagaya? Tantu ledo, apa tona nobaju nagaya bo nagana mpengaya katuvuna, aga nonturo ri banua magau.

²⁶Jadi, hau manggita nuapa komiu? Tantumo hau manggita nabi. Tapi pariaramo! I Yohanes naogepa pade nabi ntanina.

²⁷Iamo topompakasadia rara ntodea mantarima Yaku, nangoseaka anu nitulisi ri Buku Gasa nggaulu. Alatala nanguli ivei: ‘Pariaramo! Kutudu suroKu mokolu ka Iko, ala ia mompakasadia dala ka Iko.’ ” (Maleakhi 3:1)

²⁸Nanguli i Yesus, “Toramo! Lako ri pura-pura tona nipoanaka ri dunia hitu, ledo ria saitoa tona naogepa pade i Yohanes. Tapi nau tona ledo ria nturona ri Poparenta nu Alatala, naogepa ia pade i Yohanes.”

²⁹Tempo todea bo topesingara balasitee nangepe i Yesus notesaki i Yohanes, nipokonoram nia nu Alatala bo ira madota radiu i Yohanes, tandana ira najea lako ri dosara.

³⁰Tapi toFarisi ante guru-guru agama ledo nadota nantarima nia nu Alatala ka ira. Ira ledo nadota radiu i Yohanes.

³¹Pade nanguli i Yesus, “Kuuli pakalanto ka komiu inggu ntona nadaa anu natuvu sii-sii.

³²Ira nasimbayu mpo ngana-ngana nonturo ri potomu, sangaya-sangaya niulika, ledo nioseakara. Ira aga nosipongare nte roara, ‘Kami nantavusi suli bo nodade-dade mompakadamba raramiu tapi ledo nadamba komiu. Kami nodade nasusa mpo tempo kamate tapi ledo notumangi komiu.’

³³Ivesia muni najadi nte kami bo i Yohanes. I Yohanes nakava, nopuasa ledo nangande, bo ledo muni nanginu uve anggur, bo niulimiu ia nipesua nu seta!

³⁴Yaku, Ana nu Manusia nakava nangande bo nanginu mpo tona biasa, bo niulimiu ivei: ‘Peintamo tona haitu! Nadoko, nalangu, vega ntopesingara balasitee bo vega ntodosa!’

³⁵Tapi naupa ivesia, rasanita kanoto nia nu Alatala apa aselena rakita ri pokainggu ntopangoseaka Ia.”

³⁶Naria saito toFarisi nosanga i Simon. Nigagana i Yesus mangande ri banuana. Jadi haumo i Yesus ri banuana, nonturo bo nangande.

³⁷Ri ngata haitu naria saito mombine nadosa, pokaingguna ledo masipato. Niepena i Yesus ria nangande ri banua ntoFarisi haitu, hau ia nanggeni botolo kodi nipovia lako ri vatu pualam. Botolo haitu noisi lana vangsi.

³⁸Ia nakava nanggaparai kada i Yesus bo notumangi. Uve matana nombabanggasi kada i Yesus jadi nipaisina buluana sampe nabai, bo niekina bo nitolina lana vangsi kada i Yesus.

³⁹Nanggita haitu, nompekirimo i Simon, “Tona hitu ledo nabi. Ane rapana Ia nabi, tantu rasaniNa isema mombine nanggangisi Ia haitu, apa mombine haitu nadosa.”

⁴⁰Nanguli i Yesus ka i Simon, “Simon, naria sangaya Kuuli ka iko.” Nesana i Simon, “Iyo, ulimo, Guru.”

⁴¹Pade nanguli i Yesus, “Naria randua tona noinda nte topompopainda doina. Saito noinda limaatu doi salaka bo saito limapulu doi salaka.

⁴²Randua topanginda doi haitu, ledo nipakulera nombabayari pakaupu indara. Nanguli tupu nu doi ka ira randua ivei: ‘Doiku niindamiu randua, domo kusingara nte komiu.’ ” Pade nanguli i Yesus ka i Simon, “Lako nte ira randua haitu, isema nipotovenapa tupu nu doi?”

⁴³Nanguli i Simon, “Panggavaku, tona nadeapa indana haitu nipotovenapa tupu nu doi.” Nesana i Yesus, “Nakana panggavamu tutu.”

⁴⁴Pade neili i Yesus nompeinta mombine pangane bo niulikaNa i Simon, “Peintamo mombine hitu! Yaku nakava ri banuamu, ledo nipakasadiamu uve

Kupotoposi kadaKu nangoseaka adata ka torata. Tapi mombine hitu notoposi kadaKu ante uve matana bo nipakabaina ante buluana.

⁴⁵Iko ledo nikadambanakamu nte peeki tempo Yaku dako nakava ri banuamu, tapi mombine hitu ledo ria kabasana nombaeKi kadaKu lako ri lamba kakavaKu sampe ri sii.

⁴⁶Iko ledo nombatoli lana vangi ri balenggaKu, nangoseaka adata ka torata tapi mombine hitu nombatoli lana vangi ri kadaKu.

⁴⁷Jadi Kuuli ka iko, Simon, dosana nadea haitu niampungi nu Alatalamo, sabana nambaso mpuu pepotovena. Tapi ane tona aga sakide dosana niampungi, aga sakide muni pepotovena.”

⁴⁸Pade nanguli i Yesus ka mombine haitu, “Dosamu niampungi puramo.”

⁴⁹Tona ntanina nonturo nangande nosanggani ante i Yesus nosimpekutana, “Isema ntoto Ia sampe nisarumakaNa Ia namala mombaampungi dosa?”

⁵⁰Tapi i Yesus nanguli ka mombine haitu, “Iko nipakasalama sabana iko nomparasaya Yaku. Panjilimo, damo Alatala mompakatinonto raramu!”

Lukas 8

¹Naupu sia, i Yesus hau nompebutu ngata nompatolele Kareba Belo, anu notesaki Poparenta nu Alatala. AnaguruNa sapulu randua hau nosanggani-nggani ante Ia,

²bo naria muni bara sako-ndua mombine nomporoa ira. Mombine gahaitu nipakabelo i Yesus lako ri duara bo seta-seta nipopalaiNa lako ri karora. Saito roara nosanga i Maria Magdalena. Naria papitu seta nipopalai i Yesus lako ri karonna bara ipia.

³Naria muni i Yohana, berei i Khuza tona nipomboli doi Magau Herodes. Bo naria muni i Susana bo da nadeapa mombine ntanina. Mombine gahaitu nompake doira mboto nantulungi i Yesus bo ana-anaguruNa.

⁴Ledo naupu-upu tona lako ri mpengaya-ngaya ngata nakava nte i Yesus. Nadeapa ira nasiromu, nitesaNamo porapa ka ira ivei:

⁵“Naria tona hau nosavu. Tempo ia nosavu, naria sanu savua nanavu ri bivi dala, sanu nijejesi ntona bo sanu niteosi ntonji sampe naupu.

⁶Naria muni savua nanavu ri tana navatu. Savua haitu natuvu tapi ledo nasae nalelemo sabana ledo naria uve nombabanggasi kalena.

⁷Naria muni savua nanavu ranggarui. Savua haitu natuvu singgani ante karui, tapi kaupuna namatemo savua haitu sabana nipasiupisi nggarui.

⁸Bo naria muni savua nanavu ri tana naboya, bo nabelo mpuu katuvuna sampe vuana saatu-nggani kadeana.” Naupu notesa ivehaitu, nangulimo i Yesus, “Isema-sema naria talingana, pariaramo porapa hitu!”

⁹Ana-anaguruNa nekutana nte Ia, “Nuapa batuana porapa pangane?”

¹⁰Nesana i Yesus, “Bara ipia dopa nisani nu manusia berimba Poparenta nu Alatala. Sii-sii Alatala nompopaisanina ka komiu. Tapi tona ntanina aga nipatuduki ante porapa ala ‘rapariara, tapi nau rapeintara ledo rasanira nuapa najadi, bo nau raepera ledo rasanira batuana.’

¹¹Ivei batuana porapa pangane: savua nirapaka Tesa nu Alatala.

¹²Savua nanavu ri dala, nirapaka tona nangepe Tesa nu Alatala tapi nakava Magau nu Seta nangalasi Tesa haitu lako nte ira ala domo raparasayara bo rapakasalama.

¹³Savua nanavu ri tana navatu, nirapaka tona nangepe Tesa nu Alatala bo nitarimara nte damba rara. Tapi ledo naroso pomparasayara, nasimbayu nte tuda-tuda ledo naroso pokalena. Tempo ira nipesori, nouramo rarara bo domo nomparasaya.

¹⁴Savua nanavu ranggarui, nirapaka tona nangepe Tesa nu Alatala bo niparasayana. Tapi ira aga nompekirika katuvura ri dunia, ira madota makalumana bo madota matuvu masana ri dunia. Pura-pura haitu nompakabago ira sampe ira ledo napola nangoseaka Tesa nu Alatala bo katuvura ledo naria gunana.

¹⁵Savua nanavu ri tana naboya, nirapaka tona nanao bo nabelo rarara. Niepera Tesa nu Alatala bo nipariarara. Ira bate-batena nangoseaka Tesa nu Alatala sampe noguna mpuu katuvura.”

¹⁶“Ledo ria tona nombatunju poindo bo nitaungona ntonda bara nidikana ri tambe mpaturu. Tantu rabolina ri kalangana ala pura-pura topesua rabanua manggita karemena.

¹⁷Pura-pura anu nitabuniaka sii-sii kana rapopakita ngena, bo anu dopa nisani sii-sii kana rapopaisani ngena.

¹⁸Jadi pariara pakabelo-belo Tesa nu Alatala niepemi, sabana isema-sema mantarima bo mangoseaka Tesa haitu kana ratambaika pangisanina Tesa haitu. Tapi isema-sema ledo ratarimana bo ledo rauseakana Tesa nu Alatala, pangisani sakide naria nte ia ralelakasi lako nte ia.”

¹⁹Naria sanggani tina i Yesus ante sampesuvu-sampesuvuNa nakava madota mosinggavaka Ia. Ledo namala sabana nadea gaga tona nombatagui Ia.

²⁰Naria saito tona nanguli ka i Yesus, “Guru, tinaMiu ante sampesuvu-sampesuvuMiu ria ri savalikuna. Ira madota mosinggava nte Komiu.”

²¹Tapi nanguli i Yesus ka todea, “Isema-sema nangepe bo nangoseaka Tesa nu Alatala, tona haitumo nireke tinaKu bo sampesuvuKu.”

²²Naria sanggani i Yesus ante anaguruNa nesavi sakaya. I Yesus nanguli ka ira, “Hau kita ri sambote rano.” Jadi haumo ira.

²³Tempo ira da ranja mpopajala sakaya, namonjomo i Yesus. Sampesanika, narimbosomo poiri bo balumba mbaso nombarumpa sakayara. Uve nesua riarasakaya, sakidepa matala.

²⁴Jadipa haumo anaguruNa nombalike i Yesus, “Guru, Guru! Mamatemo kita!” Nangepe topelike, nembangumo i Yesus. NipopetaaNa poiri bo balumba mbaso, netaa mpuumo! Bo rano haitu natinontomo.

²⁵Nangulimo i Yesus ka ana-anaguruNa, “Nakuya komiu ledo nomparasaya Yaku?” Nokumaa bo naeka anaguruNa. Ira nosimpekutana, “Hai! Isema ntoto tano tona hitu? NiparentaNa poiri bo uve bo nioseakara mpuu!”

²⁶Naupu haitu i Yesus ante anaguruNa napola nosakaya sampe nakava ri bagia Gerasa, nosinjabote ante bagia Galilea.

²⁷⁻²⁹Hamai naria saito langgai lako ri kota nipesua nu seta. Nasaemo ia nabaya, ledo nobaju bo ledo nadota nonturo ri banua. Ia aga nonturo ri podayo. Ia nasaro nipesua nu seta. Nau nirante palena bo kadana, bo nijagai mpuu-mpuu, da namalapa rante haitu nirantasina, bo nipakeni nu seta-seta hau ranggarava bai. Tempo i Yesus nanau ri tana, haumo tona nipesua nu seta haitu mompasintou i Yesus. Nongare ia bo nekadungga ri ngayoNa. I Yesus nantudu seta haitu malai lako ri karo ntona haitu. Jadi nongaremo tona nipesua nu seta haitu ante suara namangga, “Yesus, Ana nu Alatala anu Neliu KaogeNa! RakuyaMiu yaku? Kuperapi, nee mpuu rapandasaMiu yaku!”

³⁰Nipekutana i Yesus tona haitu, “Isema sangamu?” Nesana tona haitu, “Sangaku Njobu-njobu.” Niulina ivesia sabana nadea mpuu seta nombakuasai ia.

³¹Seta-seta haitu mpuu-mpuu nerapi nte i Yesus, “Nee ratudu kami hau rapandasa nu Alatala ri lovu ledo rapakule mantuvu kandalana!”

³²Ledo nakavao lako ri sia, naria bavu dea nangelo kandeara ri kente-kente nu bulu. Seta-seta haitu mpuu-mpuu nerapi nte i Yesus, “Palogamo kami mesua riara bavu gahaitu.” Jadi nipalogaNamo.

³³Jadi seta-seta nesuvu mpuu lako ri tona haitu bo nolinja nesua riara nu bavu dea. Naupu sia, nangovamo bavu dea haitu notingganavu lako ri tinggi dapala hau riara rano bo nalodomo.

³⁴Tempo topojaga bavu haitu nanggita bavu nijagaira namate puramo, nangovamo ira hau nombatesa kajadia haitu ka tona rangatara bo ri ngata ntanina napara ri sia.

³⁵Nangepe tesa ntopojaga bavu, hau puramo ira manggita anu najadi. Tempo ira nakava nte i Yesus, nikitara tona nipesua nu seta pangane nakabasakamo lako ri seta-seta bo nonturo ri sinjori i Yesus. Nopakeamo ia bo nanotomo rarana. Nanggita haitu, naeka puramo ira.

³⁶Tona nanggita kajadia haitu notesa ka tona ntanina berimba tona nipesua nu seta nipakabelo i Yesus.

³⁷Pade pura-pura tona ri bagia Gerasa haitu nerapi nte i Yesus ante mpuu-mpuu rarara ala rapalaisiNa ngatara haitu, sabana naeka mpuu ira. Jadi i Yesus nesavi sakaya hau manjilimo.

³⁸Tona nikabasaka lako ri seta haitu nerapi ante mpuu-mpuu rarana ala ia muni mamala mantuntuni i Yesus. Tapi i Yesus nantudu ia,

³⁹“Panjilimo, tesa ka tonamo anu nipovia nu Alatala ka iko.” Jadi hau mpuumo tona haitu ri njumangu ngatana bo nitesanamo pura-pura anu nipovia i Yesus ka ia.

⁴⁰Tempo i Yesus nanjili lako ri sambote rano, Ia nitomunaka ntodea ante damba rara, apa ira nompopea kakavaNa.

⁴¹Ri sia, naria saito pakeni ri banua petupu nosanga i Yairus. Nantaputu ia ri kada i Yesus bo nerapi nte rarana mpuu-mpuu ala i Yesus hau ri banuana,

⁴²apa anana saito-itona, ana mombine noumuru sapulu rompae, nadua ntamo, damo kamatena. Nangepe haitu, haumo i Yesus ri banuana. Tempo ira da ranja mpolipa hau ri banua i Yairus, todea nomposimpilii i Yesus.

⁴³Ri sia naria saito mombine sapulu rompaemo naraa njuu. [Naupu puramo doina nekipakulisi nte dokutoro tapi ledo nabelo bo] ledo ria tona nompakule mompakabelo ia.

⁴⁴Mombine haitu nanggaparai puri i Yesus bo nikabena doe baju i Yesus. Kaliu-liu netaa raana.

⁴⁵Nekutanamo i Yesus, “Isema nanggabe Yaku pangane?” Pura-pura tona nesapu, bo i Petrus nanguli, “Guru, ri sii nadea tona nosiaso ri sinjoriMiu bo nomposimpii Komiu.”

⁴⁶Tapi nanguli i Yesus, “Naria mpuu tona nanggabe Yaku pangane. NisaniKu naria kuasa nesuvu lako nte Yaku.”

⁴⁷Mombine haitu nombarasai poviana pangane domo namala ratabuniaka, nisani i Yesusmo. Jadi nakavamo ia nte eka bo nantaputu ri ngayo i Yesus. Bo niulina ri ngayo ntodea ri sia nuapa sabana sampe nikabekana baju i Yesus. Bo niulina muni kaliu-liu nabelomo ia.

⁴⁸Pade nangulimo i Yesus ka ia, “AnaKu, nabelomo iko sabana iko nomparasaya. Panjilimo iko. Damo Alatala mompakatinonto iko.”

⁴⁹I Yesus da notesa ka mombine haitu, nakavamo tona lako ri banua i Yairus. Nanguli ia ka i Yairus, “Pua, namatemo anamu. Tumo mompakalenge i Guru hau ri banuamiu.”

⁵⁰Tapi niepe i Yesus tesa haitu bo niulikaNa i Yairus, “Nee maeka. Parasayamo Yaku, mabelo ngena anamu.”

⁵¹Nakava ira ri banua i Yairus, ledo nidekei i Yesus sambara tona mesua riarana mosanggani nte Ia. Aga i Petrus, i Yohanes, bo i Yakobus ante tina tuama nu ngana haitu nidekeiNa mesua mosanggani ante Ia.

⁵²Tempo haitu, pura-pura tona nasiromu ri sia nantete notumangi sabana ngana haitu namatemo. Tapi i Yesus nanguli ka ira, “Tumo motumangi! Ngana haitu ledo namate, aga namonjo.”

⁵³Nangepe tesa i Yesus, aga nipongirikara apa nisanira ngana mombine haitu namate mpuumo.

⁵⁴Tapi i Yesus hau nesua riarantombi bo nikangisiNa pale nu ngana haitu. Pade niuliNa, “Ana, pembangumo!”

⁵⁵Nyawa nu ngana haitu naria mpanjili. Jadi kaliu-liu nembangu ngana haitu. Pade nitudu i Yesusmo ira mombadekei kande ka ngana.

⁵⁶Nanggita kajadia haitu nokumaa mpuu tina tuamana. I Yesus nombatagi ira, “Nee ratesa ka tona ntanina anu najadi ri sii.”

Lukas 9

¹I Yesus nompasiromu sapulu randua anaguruNa bo nidekeiNa kuasa ka ira mompopalai seta bo mompakabelo tona nadua mpengaya-ngaya.

²NituduNa ira hau mompakabelo tona nadua bo mompatolele kareba Poparenta nu Alatala.

³Dopame ira nalai, i Yesus nanguli ka ira, “Nee manggeni nuapa-nuapa riaru polipamiu. Nee manggeni toko polipa bara batutu, bara baku, bara doi, bara rontonga baju.

⁴Ane ratarima ntona komiu, ponturomo ri sia sampe komiu malai lako ri ngata haitu.

⁵Ane ledo ratarima ntona komiu, palaikamo ngata haitu bo tapaimiu sovu lako ri kadamiu, tandana Alatala mompoara ira.”

⁶Naupu sia, hau ira nompebutu ngata mompatolele Kareba Belo, bo mompakabelo tona nadua ri umba-umba.

⁷Magau Herodes Antipas anu nompurenta ri bagia Galilea, nangepe lelenu pura-pura kajadia haitu. Naingu rarana, sabana tona nanguli i Yohanes Topediu natuvu mpanjilimo.

⁸Naria muni sanu tona nanguli Nabi Elia nggaulu neumba mpanjili. Bo tona ntanina nanguli bara nabi ntanina natuvu mpanjili.

⁹Nanguli i Herodes, “Nitudukumo tona nombatampa balengga i Yohanes bara ipia. Jadi i Yesus hii, isema kakanana Ia? Nadeamo lelenu Ia niepeku.” Haitu sampe i Herodes nompasimbuku mosinggava nte i Yesus.

¹⁰Naupu ana-anaguru i Yesus nompatolele Kareba Belo bo mompakabelo tona nadua, nanjilimo ira. Bo pura-pura anu nipoviara hamai, nitesara ka i Yesus. Naupu haitu, ira niunaka i Yesus hau nompatani ri sangu ngata nosanga Betsaida.

¹¹Tapi nisani ntodea patuju i Yesus, jadi nituntuniramo Ia. I Yesus nantarima ira bo nipatudukiNa ka ira Poparenta nu Alatala. Bo nipakabeloNa muni tona nadua.

¹²Domo masae masolomo eo, anaguru i Yesus sapulu randua nakava nangulika Ia, “Guru, agina ratuduMiu tona gahaitu hau mangelo kande bo ponturo ri ngata-ngata napara ri sii, apa ponturo hitu nakalinoa.”

¹³Tapi nanguli i Yesus ka ira, “Komiumo mompakande ira.” Nesanamo anaguruNa, “Hai! Berimbamo? Aga lima-angu roti bo rombaa bau naria nte kami. Paraluu kami hau mangali roti ka tona damo nadea hii?”

¹⁴[Kadeana ira ri sia nitasere lima-njobu langgai.] Nanguli i Yesus ka anaguruNa, “Ulika ira monturo motagu-tagu, limapulu tona santagu.”

¹⁵Anaguru i Yesus nanturusi anu niuliNa ka ira.

¹⁶Naupu sia i Yesus nangala lima-angu roti bo rombaa bau pangane, pade nitingoana langi bo niuliNa tarima kasi ka Alatala. Nitubi-tubiNamo roti ante bau haitu pade nidekeiNa ka anaguruNa mombabagi-bagi ka todea.

¹⁷Ira pura-pura nangande sampe nabosu. Naupu nangande, anaguruNa nompasromu labi nu kande, sapulu rotunda ponupa naboli.

¹⁸Naria sanggani, i Yesus da nosambaya saitoNa, nakavamo anaguruNa nte Ia. I Yesus nekutana nte ira, “Nantuntuni tesa ntodea, isema Yaku hii?”

¹⁹Nesana ira, “Naria tona nanguli Komiu i Yohanes Topediu. Naria muni nanguli Komiu Nabi Elia nggaulu. Naria muni tona nanguli Komiu bara nabi ntanina natuvu mpanjili.”

²⁰I Yesus nekutana vai, “Tapi nantuntuni panggavamiu, isema Yaku?” Nesana i Petrus, “Komiu Magau Topepakasalama anu nijanji nu Alatala!”

²¹Naupu sia, i Yesus nombatagi ira ivei: “Nee mpuu raulimiu ka isema-sema, Yaku Magau Topepakasalama anu nijanji nu Alatala!”

²²Yaku, Ana nu Manusia, kana rapandasa bo rapoara ntotua ntoYahudi ante balengga-balengga ntopanggeni pesomba bo guru-guru agama. Yaku rapatesi tapi ri eo katataluna Yaku rapakatuvu mpanjili.”

²³Naupu sia niulikaNa todea ri sia, “Isema-sema madota mangoseaka Yaku, kana rakabasakana dotana mboto. Ia kana manjimbuaka kayu salibna eo-eo. Haitumo, ia kana masadia rapandasa nau sampe rapatesi bo mpuu-mpuu mangoseaka parentaKu.

²⁴Isema-sema aga nangoseaka dota nu rarana mboto bo natuvu ka karon mboto, ledo manggava katuvu nabelo sampe ri kasae-saena. Tapi isema-sema mombakabasaka dotana mboto sabana nangoseaka Yaku, nau ia rapatesi, iamo matuvu mabelo sampe ri kasae-saena.

²⁵Nuapa gunana rakavamiu pura-pura anu naria ri dunia, tapi ledo rakavamiu katuvua nabelo sampe ri kasae-saena?

²⁶Isema-sema maeya matana manguli ia topangoseaka Yaku bo maeya matana nte pepatudukiKu, Yaku muni maeya mataKu manguli ia topangoseaka Yaku tempo Yaku meonga lako ri suruga. Yaku, Ana nu Manusia, manau ante reme bo kuasaKu bo kuasa nTuamaKu bo malaeka-malaekaNa nagasa.

²⁷Pariaramo! Naria bara sako-ndua komiu ri sii dopa mamate ane dopa rakitara Alatala moparenta mpo Magau.”

²⁸Nitasere saminggu kaliu i Yesus nombadekei pangajari ka ira, nikenina i Petrus, i Yohanes ante i Yakobus hau nantende ri bulu, mosambaya.

²⁹Da nosambaya i Yesus, nabalimo lenjeNa bo bajuNa najadi naramputi bo nenggila.

³⁰Sampesanika, neumbamo tona randua notesa ante Ia, haitumo i Musa bo i Elia, nabi nu Alatala.

³¹Ira randua neonga riar reme lako ri suruga. Ira notesa kamate i Yesus anu domo masae rapakadupa ri ngata Yerusalem.

- ³²Tempo haitu, i Petrus bo roana randua naluru namonjo. Nematapa ira, nikitara i Yesus nareme bo randua tona neangga ri sinjoriNa.
- ³³Tempo tona randua haitu mompalaisi i Yesus, nangulimo i Petrus, “Guru, nasana mpuu kita ri sii. Agina kami movia tatalu sou ri sii, sangu ka Komiu, sangu ka Nabi Musa bo sangu ka Nabi Elia.” Ledo nisani i Petrus batua nu tesa nisovadakana.
- ³⁴Da ranja mpotesa i Petrus, nakavamo kulimu nombabungu ira pura-pura, sampe naeka mpuu anaguruNa tatalu haitu.
- ³⁵Lako riaru kulimu naria suara nanguli, “Hitumo AnaKu nipelisiKu. Epemo tesaNa!”
- ³⁶Nalino suara haitu, nikitara damo i Yesus saitoNa ri sia. Tesa niepera haitu nipariarara bo anu nikitara ledo kaliu-liu nitesara ka tona ntanina.
- ³⁷Kamailena, i Yesus ante anaguruNa notua lako ri bulu haitu. Nakava ri lembana nadea mpuu tona neonga mosinggava nte i Yesus.
- ³⁸Naria saito langgai lako ri tatanga ntodea haitu nompongare i Yesus, “Guru! Tulungi peinta ruru anaku, anaku langgai aga saito-itona.
- ³⁹Ane nesua seta ri karonu, kaliu-liu nongare ia bo karonu nanggaradii sampe ngangana nobura. Seta haitu ledo nenonto-nonto nompandasa ia, bo ledo nadota nesuvu lako nte ia.
- ⁴⁰Niulikukamo anaguruMiu mompopalai seta haitu, tapi ledo nipakulera.”
- ⁴¹Nangepe haitu, nangulimo i Yesus ka ira, “Natantu mpuu komiu natuvu sii-sii! Komiu nesapuaka mpuu bo ledo nomparasaya! Sakuyapa kasaena Yaku kana mosangani nte komiu bo mosabara nte komiu pade raparasayamiu?” Pade nituduNa tuama nu ngana nadua haitu, “Keni tumai anamu!”
- ⁴²Tempo ngana haitu nolipa hau ri ngayo i Yesus, nidungganaka nu setamo ia bo karonu nanggaradii-dii. Tapi i Yesus mompopalai seta bo nipakabeloNamo ngana haitu. Nabelopa ngana haitu, niuliNa ka tuama nu ngana, “Siimo anamu.”

⁴³Nanggita kambaso kabaraka nu Alatala haitu, nokumaa mpuu todea ri sia. Todea da nokumaapa nanggita pura-pura anu nipoviaNa. Jadi niulikaNa anaguruNa,

⁴⁴“Pariaramo tesaKu hitu: Yaku, Ana nu Manusia nitoiya ntona sii-sii, tapi makava tempona Yaku radekei riaru kuasa nu manusia.”

⁴⁵Tapi ledo nisani nu anaguruNa batua ntesaNa. Batua nu tesa haitu nitabuniaka ala ledo rapahara. Bo ledo muni nabia ira nompekutana nuapa batua ntesaNa.

⁴⁶Anaguru i Yesus nosinggarauka isema ira haitu nalangapa panggana.

⁴⁷Nisani i Yesus pekirira. Jadi nialaNa saito ngana kodi bo nipopeanggaNa ri sinjoriNa,

⁴⁸bo niulikaNa ira, “Isema-sema nantarima ngana hitu sabana pomparasayana Yaku, nasimbayu mpo nitarimana muni Yaku. Bo isema-sema nantarima Yaku, nitarimana muni Alatala anu nantudu Yaku. Jadi isema-sema naede rarana, iamo nalangapa panggana ri panggita nu Alatala.”

⁴⁹Nanguli i Yohanes ka i Yesus, “Guru, nikita kami tona nompopalai seta ante kuasaMiu. Tona haitu nitagi kami, apa ia ledo samporoa nte kita.”

⁵⁰Tapi nanguli i Yesus ka ia, “Nee ratagimiu ia, sabana isema-sema ledo nangeva komiu, ia nosabingga ka komiu.”

⁵¹Naparamo tempona i Yesus meore hau ri suruga, nipakatantuNamo Ia kana hau ri ngata Yerusalem.

⁵²NituduNa bara sako-ndua topangoseaka Ia mokolu ka Ia ala mompakasadia mpengaya-ngaya ka Ia. Jadi hau ira nesua rangata ntoSamaria.

⁵³Tapi tona ri ngata haitu ledo nadota nantarima i Yesus sabana nisanira patujuNa hau ri posusa ntoYahudi ri ngata Yerusalem.

⁵⁴Niepe i Yakobus bo i Yohanespa tona ri ngata haitu ledo nadota mantarima i Yesus, niulira ka i Yesus, “Pue, ane rapodotaMiu, raperapi kami apu lako ri langi manau mompalabu ira.”

⁵⁵Tapi i Yesus nompeili ira randua bo nangonteaka ira.

⁵⁶Naupu sia, napolamo ira hau ri ngata ntanina.

⁵⁷I Yesus ante anaguruNa nompapola polipara bo naria tona nanguli ka Ia, “Guru, yaku madota mantuntuni Komiu. Nau damo ri umba rakalauMiu, kuoseaka Komiu!”

⁵⁸Pade nesana i Yesus, “Asulaku naria bolona bo tonji naria jumuna, tapi Yaku, Ana nu Manusia ledo ria banuaKu Kupaturu.”

⁵⁹I Yesus nanguli ka tona ntanina, “Kamaimo, oseakamo Yaku!” Tapi nesana tona haitu, “Guru, paloga ntanimo ruru yaku manjili nte tuamaku. Mamate tuamaku pade tumai yaku mangoseaka Komiu.”

⁶⁰Nesana i Yesus, “Palambakamo tona namate mombatana tona namate. Tapi komiu, koimo hau ri umba-umba mompatolele kareba Poparenta nu Alatala.”

⁶¹Naria muni tona ntanina nanguli ka i Yesus, “Guru, yaku muni madota mangoseaka Komiu. Tapi pakaloga ntani ruru yaku hau mopalakana nte kami sambanua.”

⁶²Nanguli i Yesus ka ia, “Ledo nabelo ane topopajeko nasaro meili ri puri. Ivesia muni tona nasaro nantora anu nipalaisina, ledo masipato majadi topokarajaa ri Poparenta nu Alatala.”

Lukas 10

¹Naliutaka haitu, i Pue Yesus nompelisi pitupulu topangoseaka Ia ntanina. Tona pitupulu haitu nituduNa randua-randua samporoa mokolu ka Ia hau ri pura-pura ngata rakalauNa.

²Dopame ira hau, niuliNa ka ira, “Nadea tona nasadia mantarima Kareba Belo. Ira nasimbayu mpo pae natasa, nasadiamo rakato. Nadea mpuu pae nasadiamo rakato, tapi topokato ledo nadea. Jadi, perapimo nte Alatala tupu ntalua, ala ratuduNa tona hau mokato ri taluaNa.

³Jadi, koimo komiu, tapi pakabelo! Apa komiu Kutudu hau ri tatanga ntona nadaa. Komiu masimbayu ante ana nu bimba nipopalai ri tatanga nu asulaku.

⁴Nee manggeni doi bara batutu rapomboli baku, bara sapatu ropasa. Nee mokalera gaga ri dala motesa-tesa ka tona.

⁵Ane komiu mesua ri banua ntona uli ntani ruru, ‘Kuperapi Alatala mombadekei belo ka komiu sambanua!’

⁶Ane ratarima ntupu banua mabelo, Alatala mpuu-mpuu mombadekei belo ka ira. Tapi ane tupu banua ledo madota mantarima komiu, Alatala ledo mombadekei belo ka ira.

⁷Ane ratarima ntupu banua komiu, ponturo ri siamo. Inumo bo kandemo anu radekeina ka komiu, sabana topokarajaa masipato mantarima tambona. Nee molinja-linja hau ri banua ntanina.

⁸Ane komiu makava ri sangu ngata bo ratarima nu balengga ngata mabelo, kandemo kanda anu radekeina ka komiu.

⁹Pakabelomo tona nadua ri ngata haitu bo ulika ira, ‘Naparamo tempona Alatala moparenta mpo Magau ri tatangamiu.’

¹⁰Tapi ane komiu makava ri sangu ngata bo ledo ratarima ntona ri ngata haitu, koi hau ri dala mbaso riar ngata haitu bo uli ivei:

¹¹‘Komiu nompoara tesa kami, jadi sovu lako ri ngatamiu anu nekantaka ri kada kami ratapai kami ri ngayomiu. Haitu majadi pepatora ka komiu Alatala mompoara komiu. Tapi naupa ivesia, pariaramo! Naparamo tempona Alatala moparenta mpo Magau.’ “

¹²Pade nanguli i Yesus ka ira pitupulu, “Pariaramo! Ri Eo Potangara ri kaupu dunia, melabipa kadaana pehuku nu Alatala ka tona haitu pade pehuku rapambela ka toSodom nadaa mpuu.”

¹³I Yesus nompapola tesaNa ivei: “Mandasa mpuu komiu toponturo ri ngata Korazim! Bo mandasa mpuumo komiu toponturo ri ngata Betsaida, sabana komiu ledo najea! Ane rapana kabaraka nipoviaKu ri ngatamiu, Kupovia ri ngata Tirus bo ngata Sidon natantu nasaemo kajeara, nau ira ledo toYahudi! Bo tantu nasae munimo popakeara karu bo podikara avu ri balenggara,

tandana nabuku rarara bo nanjosomo nokainggu nadaa. Komiu toYahudi nikitamiu kabaraka-kabaraka haitu, tapi komiu ledo ntoto najea.

¹⁴Jadi tempo Alatala mombatangara manusia ngena, pehuku ka komiu toYahudi melabipa kantamona pade pehuku ka toponturo ri ngata Tirus bo Sidon.

¹⁵Komiu toponturo ri ngata Kapernaum! Nisarumakamiu komiu raore hau ri suruga! Tapi ledo ntoto nakana! Komiu aga ranavusaka ri narakaa!”

¹⁶Pade nanguli i Yesus ka topangoseaka Ia, “Isema-sema nantarima tesamiu, nitarimana muni tesaKu. Isema-sema nompoara komiu, nipoarana muni Yaku. Bo isema-sema nompoara Yaku, nipoarana muni Alatala anu nombatudu Yaku.”

¹⁷Bara sakuya kasaena naliu haitu, pitupulu topangoseaka i Yesus nanjili lako ri ngata-ngata nikalaura pangane. Nadamba mpuu rarara bo niulira, “Pue, nau seta natundu nte kami bo nalai tempo nipopalai kami nte kuasaMiu!”

¹⁸Nanguli i Yesus ka ira, “NikitaKu Magau nu Seta nanavu lako ri langi eva kila.

¹⁹Jadi, pariaramo! Yaku mombadekei kuasa ka komiu ala rapakulemiu mombajeje ule bo supitole bo mombadagi pura-pura karoso nu balita, bo ledo ria nuapa-nuapa mamala mombakuyasi komiu.

²⁰Naupa ivesia, nee madamba raramiu sabana seta-seta natundu nte komiu. Agina madamba sabana sangamiu nitulisi riara buku nu Alatala ri suruga.”

²¹Tempo haitu muni Nosa Gasa nu Alatala nombakuasai i Yesus bo Ia nosambaya nte damba raraNa ivei: “Tata, Komiu Tupu nu langi bo tana! Nosukuru mpuu Yaku sabana nipopaisaniMiu pura-pura anu pangane ka tona ledo natau. Tapi nitabuniakaMiu ka tona nangisani bo tona napande, apa ivesiamo dotaMiu.”

²²Pade nanguli i Yesus ka tona ri sia, “Pura-pura nidekei nTuamaKu ka Yaku. Ledo ria tona mpuu-mpuu nosisani nte Yaku Ana nu Alatala, aga TuamaKu

Alatala. Bo ledo ria tona mpuu-mpuu nosisani ante TuamaKu, aga Yaku, AnaNa mboto bo isema-sema Kupodota, Kupopaisanika TuamaKu ka ia.”

²³Naupu haitu i Yesus neili nompeintaka anaguruNa bo notesa ala ledo raepen tona ntanina. NiuliNa ka ira ivei: “Nabelo mpuu komiu sabana komiu nanggita pura-pura anu nipoviaKu.

²⁴Pariaramo! Tempo nggaulu nadea nabi bo magau madota manggita anu nikitamiu sii-sii, tapi ledo nikitara. Naoge rarara mangepe anu niepemiui sii-sii, tapi ledo niepera.”

²⁵Naria saito guru agama ntoYahudi neangga ri sia. Ia madota mombaopa tesa i Yesus. Jadi nekutana ia, “Guru, nuapa masipato kupovia ala yaku mamala matuvu sampe ri kasae-saena?”

²⁶Nesana i Yesus, “Nuapa nitulisi riaru Buku Atura Agama? Nuapa nibacamiu ri sia?”

²⁷Nesana tona haitu, “Anu nitulisi ri sia: Potovemo Tupumu, Alatala ante mpuu-mpuu raramu, ante pura-pura pekirimu, pura-pura pokainggumu bo pura-pura pompakulemu. Potovemo singgamanusiamu mpo pompotovemu karomu mboto.”

²⁸Nanguli i Yesus ka ia, “Nambelamo pesanamu tutu. Poviamo mpo anu niulimu tutu ala iko matuvu mabelo sampe ri kasae-saena.”

²⁹Tapi guru agama haitu ledo nadota radagi, nisarumakana nanoamo pokaingguna. Jadi nekutana vai ia nte i Yesus, “Isema singgamanusiaku kana kupotove?”

³⁰Nesana i Yesus ante porapa hitu; “Naria saito toYahudi notua lako ri ngata Yerusalem hau ri ngata Yerikho. Ri tatanga polipana, ia nosinggavaka topeago, bo pura-pura pakeana ante mbara-mbarana naupu niagora. Ia nibobara sakidepa namate, bo nipalaisira bayangimo.

³¹Dopa nasae kaliutakana haitu, naria saito topanggeni pesomba ntoYahudi noliu ri sia. Nikitanapa tona niboba haitu, netalilimo ia bo napolamo.

³²Ivesia muni toLewi anu nokarajaa ri Banua nu Alatala. Ia muni noliu ri sia. Nikitanapa tona niboba ntopeago pangane, aga nipetalilikana muni bo napolamo ia.

³³Naupu haitu, naria saito toSamaria noliu ri sia muni. Nikitanapa tona niboba haitu, naasi mpuu matana.

³⁴Hau ia nombatotoaka tona haitu. Nipegasana uve anggur belana bo nipakulisina ante lana pade nibonggona kae. Naupu haitu nisavirakana ri keledai, pade nikenina ri banua ponturo ntorata bo nipiarana ri sia.

³⁵Naeo mpadondo toSamaria haitu nombasuvuraka rompeka doi salaka bo nidekeina ka tupu banua nipesaira haitu, pade niulina, ‘Jagai ruru tona nadua hitu. Ane ledo magana, damo manjili yaku pade kubayari.’ “

³⁶I Yesus nompakaupu tesaNa bo nekutana nte guru agama anu madota mombaopa tesaNa, ivei: “Nantuntuni pangavamiu, lako ri tona tatalu haitu, isema nompotove tona niago pangane?”

³⁷Nesana guru agama, “Tona naasi matana nantulungi tona haitu.” Nanguli i Yesus, “Koimo, bo povia ivesia muni!”

³⁸Naupu haitu i Yesus ante anaguruNa nompapola polipara, nesai ri sangu ngata. Ri sia naria saito mombine nosanga i Marta nogaga i Yesus hau ri banuana.

³⁹Naria saito sampesuvuna mombine, nosanga i Maria. I Maria haitu nakava nonturo napara kada i Yesus bo nompetalingai pepatudukiNa.

⁴⁰Tapi i Marta nasesa katoratana haitu. Jadi hau i Marta nanguli ka i Yesus, “Guru, nabelo tano nipekiriMiu sampesuvuku nompalamba yaku nokarajaa saitoku? Tudumo ia tumai mantulungi yaku.”

⁴¹Nesana i Yesus, “Heh, Marta, nikitaKu iko nabago bo nasesa raramu nompekirika mpengaya-ngaya.

⁴²Tano mai aga sangaya nopoko, haitumo mangepe tesa nu Alatala. I Maria nompelisi tobelona, anu ledo mamala raalasi ntona lako nte ia.”

Lukas 11

¹Naria sanggani i Yesus hau nosambaya. Naupu Ia nosambaya, nangulimo saito anaguruNa, “Pue, patuduki muni kami mosambaya mpo i Yohanes Topediu nompatuduki anaguruna nosambaya.”

²Nanguli i Yesus ka ira, “Ane komiu mosambaya, ulimiu ivehitu: ‘Tata, aga Komiu masipato rapetupu bo rapakaoge. Komiumo Magau kami. Perapi Komiu momparenta ri dunia hitu.

³Dekei ka kami kande niparaluu kami eo-eo.

⁴Ampungimo dosa kami mpo kami muni nombampungi pura-pura tona nasala nte kami. Bo nee rapalamba kami rapesori.’ “

⁵Naliu haitu, i Yesus nanguli ka anaguruNa, “Rapana saito komiu hau ri banua nu roamiu tanga bongi bo manguli ka ia, ‘Sampesuvu, mai sakide kandeamiu,

⁶naria roaku da ri polipana dako nesai ri banuaku. Tapi ledo naria anu kupakande ka ia.’

⁷Rapana roamiu mesana ivei: ‘Nee rabato yaku! Vamba nikapukumo bo kami ntali ana naturumo. Domaku membangu mombadekei ka iko anu niperapimu.’

⁸Jadi berimbamo? Kuuli ka komiu, naupa komiu novega rapa, ledo madota roamiu membangu bo mombadekei anu niperapimiu. Tapi, kaupuna ia kana membangu mombadekei ka komiu anu niparaluumiu, sabana komiu ledo naeya matamiu nerapi njuu nte ia.

⁹Jadi, Kuuli ka komiu, perapimo nte Alatala bo radekeiNa ka komiu. Elomo, bo rakavamiu. Tanedemo vamba bo vamba raunggeNa ka komiu.

¹⁰Apa isema-sema merapi, kana radekei ka ia. Isema-sema mompaelo, kana rakavana. Bo isema-sema mantanede vamba, kana raungge ka ia.

¹¹Ane anamiu merapi bau ntasi, ule radekeimiu?

¹²Ane anamiu merapi ntalu, supitole radekeimiu? Tantu ledo!

¹³Naupa komiu tona nadosa, nisanimiu nombadekei anu nabelo ka anamiu. Nemopa Tuamata ri suruga. Ia mpuu-mpuu nombadekei Nosa Gasana ka isema-sema merapi nte Ia.”

¹⁴Naria sanggani i Yesus nompopalai seta lako nte tona nipakabobo nu seta. Nalaipa seta, namalamo tobobo haitu notesa. Nanggita haitu nokumaa puramo todea ri sia.

¹⁵Tapi naria muni sanu nanguli, “Ia namala nompopalai seta ante kuasa lako nte i Beelzebul, Magau nu Seta.”

¹⁶Naria muni tona madota mombaopa tesa i Yesus. Jadi niperapira tanda nabaraka rapopakitana ka ira, ala rasanira Ia mpuu-mpuu niposumba nu Alatala.

¹⁷Tapi nisani i Yesus patujura. Jadi niulikana ira, “Ane maria saito magau bo todeana bate-batena mosipobali, natantu kamagauana haitu magero. Bo ane tona sambanua bate-batena mosipobali, tantu magaro pobanuara.

¹⁸Ivesia muni Magau nu Seta. Ane seta-setana mosipobali, tantu mageromo kamagauana. Niuliku ivesia, sabana niulimiu Yaku nompopalai seta ante kuasa lako nte i Beelzebul, Magau nu Seta. Tapi ledo nakana. 〔Natantu Magau nu Seta ledo madota mompopalai seta-setana mboto.〕

¹⁹Naria muni ana-anagurumiu mboto nompopalai seta-seta. Uli ka Yaku, ante kuasa isema nipopalaira seta-seta? Natantu ante kuasa nu Alatala! Jadi povia nu anagurumiu mboto nompakalanto peraimiu tutu nasala!

²⁰Yaku nompopalai seta-seta ante kuasa nu Alatala. Jadi haitu nompopakita ka komiu, Alatala nompamulamo nompamenta ri tatangamiu!”

²¹“Ane maria tona maroso mombajagai banuana bo magana pura-pura pareva posievana, ledo makuya mbara-mbarana.

²²Tapi ane tona narosopa makava mangeva tupu banua haitu, radagina bo raalasina puramo pareva posieva anu nisarumaka ntupu banua haitu. Bo mbara-mbara rabanua haitu rapobagina nte roana. 〔Jadi Yaku nompopalai seta-seta apa Yaku nakuasapa.〕”

²³Nanguli munimo i Yesus, “Isema ledo nosabingga nte Yaku, iamo nangeva Yaku. Bo isema ledo nantulungi riara pokarajaaKu, iamo nompakagero pokarajaaKu.”

²⁴I Yesus nompakasimbayu manusia ante banua, niuliNa, “Ane seta nesuvu bo nompalaisi saito manusia, ia nolilive hau tumai ri ponturo nangau mangelo ponturo rapangosanakana. Bo ane ledo rakavana raulina, ‘Aginapa yaku manjili hau nte tona nipalaisiku ria.’

²⁵Makava ia ri sia, rakavana tona haitu eva banua boa, ledo ria toponturona bo banua haitu naupu nipegasa bo nipasiayu.

²⁶Jadi ia hau mompokio papitu seta ntanina anu nadaapa pade ia mboto. Bo ira makava mesua bo monturo riara ntona haitu. Kaupuna katuvu ntona haitu melabipa kadaana pade pamulana bara ipia.”

²⁷Naupu i Yesus nanguli haitu, naria saito mombine ri olo ntodea nanguli ka Ia nte suara namangga, “Nabelo mpuu mombine anu nompoanaka Komiu bo nompatomi Komiu!”

²⁸Tapi nesana i Yesus, “Nakana, tapi nabelopa tona nangepe tesa nu Alatala bo nioseakana.”

²⁹Todea da nombatagui i Yesus, jadi nipapolaNamo tesaNa ivei: “Nadaa mpuu tona natuvu sii-sii! Niperapira Yaku movia tanda nabaraka ḷala rasanira Yaku mpuu-mpuu niposumba nu Alatalaḷ. Tapi ledo ria tanda rapopakita ka ira. Aga tanda mpo anu najadi nte Nabi Yunus nggaulu rapopakita ka ira.

³⁰Anu najadi ri karo Nabi Yunus najadi tanda nipokumaaka ntona ri ngata Niniwe nggaulu. Ivesia muni Yaku, Ana nu Manusia. Anu majadi ri karoKu ngena majadi tanda rapokumaaka ntona tempo sii-sii.

³¹Ri Eo Potangara bara maipia, magau mombine tana Syeba rapakatuvu mpanjili mosanggani-nggani ante komiu anu natuvu sii-sii. Bo ia mombasalai pokainggumi sabana ia nakava lako ri ngata nakavao mangepe pepatuduki Magau Salomo, anu nanoto mpuu pekirina. Tapi sii-sii naria saito ri tatangamiu

naogepa bo nanotopa pade Magau Salomo, tapi ledo nadota komiu nomparasaya tesaNa.

³²Ivesia muni ri Eo Potangara tupu ngata Niniwe rapakatuvu mpanjili mosanggani-nggani nte komiu anu natuvu sii-sii. Bo ira mombasalai pokainggumiu sabana ira najeamo nangepe tesa Nabi Yunus. Sii-sii naria saito ri tatangamiu naogepa pade Nabi Yunus, tapi ledo nadota komiu nomparasaya tesaNa.”

³³“Ledo naria tona mombatunju poindo bo ratabuniakana ranggapeo bara rataungona ntonda. Natantu poindo haitu kana raboli ri kalangana ala pura-pura topesua rabanua manggita karemena.

³⁴Mata nirapaka poindo nu karo. Ane matata nabelo, nalanto pekitata. Tapi ane navurau matata, ledo malanto rakitata nuapa-nuapa. Ivesia muni pekiri rara ntaita.

³⁵Jadi, pakabelo-belo! Nee sampe pekiri rara ntaita majadi malanda.

³⁶Ane pekiri rara ntaita nareme bo ledo naria nuapa-nuapa nalanda, pura-pura katuvuta mareme mpuu mpo anu nivanta mpoindo.”

³⁷Naupu i Yesus notesa, naria saito toFarisi nombagaga Ia hau mangande ri banuana, jadi hau mpuumo Ia.

³⁸ToFarisi haitu nahera nanggita i Yesus ledo nantuntuni ada ntoFarisi nemanjo ntani pade nangande.

³⁹Haitu sampe i Yesus nanguli ka ia, “Komiu toFarisi nangoseaka ada-ada agama anu nikita ntona, tapi raramiu nadaa bo nainoka mbara-mbara ntona ntanina. Komiu nasimbayu mpo tona notoposi boda bo suraya ri savalikuna tapi riarana bate-batena natagara!

⁴⁰Nadoyo mpuu komiu! Alatala ledo aga nompajadi karomiu tapi nipajadiNa muni rara ntaimiu!

⁴¹Dekeimo ka tona napakasi ante belo rara bo ivesiamo pura-pura majadi magasa ka komiu.

⁴²Mandasa mpuu komiu toFarisi! Komiu nombadekei ka Alatala sabagia lako ri sapulu bagia pura-pura asele panggaviamiu, sampe nau rampa-rampa nakodi mpo tumbavani, kula, bo rampa-rampa ntanina. Nabelo poviamiu tutu, tapi parenta anu nantudu kita mokainggu manoa bo mompotove Alatala, ledo nipeilimiu! Tano haitumo parenta nopoko raoseakamiu bo nee muni rakalingasimiu parenta ntanina.

⁴³Mandasa mpuu komiu toFarisi! Nipokonomiu nonturo ri ponturo nabelo ri banua petupu, bo nipokonomiu muni rabila ntona ri potomu.

⁴⁴Mandasa mpuu komiu! Komiu nasimbayu mpo dayo ledo naria tandana. Tona nojeje dayo haitu tapi ledo nisanira naria anu naruto riarana. Komiu nabelo ri savalikuna tapi rara ntaimiu nadaa.”

⁴⁵Naria saito lako ri guru-guru agama ri sia nanguli ka i Yesus, “Guru, ante tesaMiu tutu, nislaiMiu muni kami!”

⁴⁶Nesana i Yesus, “Mandasa muni komiu guru-guru agama! Komiu nompakadea atura bo ada nakaja raoseaka ntona bo nipasuumiu tona mangoseakana. Tapi komiu mboto ledo nantulungi ira mangoseakana!

⁴⁷Mandasa mpuu komiu! Komiu nompakabelo dayo nabi-nabi nu Alatala, tano totuamiu mboto nompatesi nabi-nabi haitu!

⁴⁸Pokainggumiu nompakalanto komiu nasintuvu nte pokainggu ntotuamiu. Ira nompatesi nabi-nabi bo komiu nompakaramba dayora!

⁴⁹Sabana haitu, Noto nu Alatala nanguli pakalanto ivei: ‘Nabi-nabi bo suro-suroKu Kutudu hau nte ira gahaitu. Sanu rapatesira, bo sanu rapandasara.’
 ┌Alatala nanguli ivesia sabana nisaniNa komiu anu natuvu sii-sii nasimbayu kadaamiu ante totuamiu nggaulu.」⁵⁰Jadi komiu anu natuvu sii-sii rahuku nu Alatala sabana kamate nu nabi pura-pura anu nipatesi lako ri pompajadi duniame.

⁵¹Nompamula lako ri pompatesi i Habel sampe ri pompatesi i Zakharia anu najadi ri doyata Banua nu Alatala ri olo nu lanta pesomba bo Banua nu Alatala.

Parasayamo! Komiu natuvu sii-sii mpuu-mpuu rahuku sabana pokainggu ntotuamiu!

⁵²Mandasa mpuu komiu guru-guru agama! Kakanana komiumo masipato mompatuduki tona mosisani nte Alatala. Tapi komiu mboto ledo nadota mosisani nte Alatala, bo komiu nombalava tona ntanina anu madota mosisani nte Alatala.”

⁵³Naupu notesa ivesia nalaimo i Yesus. Nompamula lako ri tempo haitu, nadua mpuu rara nu guru-guru agama bo toFarisi nte Ia. Nipasimbukura mangopa tesa i Yesus ala ratesaNa mpengaya-ngaya,

⁵⁴bo nikanotosira njuu Ia mbelaka masala anu rauliNa bo mamala rapangadura.

Lukas 12

¹Nonjobu-njobu tona nasiromu ri sia mompeinta i Yesus, sampe nosimpai nosijeje-jeje kada. I Yesus nangulika anaguruNa, “Pakabelo! Komiu kana mainga nte ragi ntoFarisi. Batuana, nee sampe komiu mompasiala pokainggura aga nabelo ri lenje tapi rarara nadaa!

²Tapi pokainggu nitabuniakara kana rasani ntona, sabana pura-pura anu nitabuniaka sii-sii kana malanto rakita ngena, bo pura-pura rahasia kana rasani ntodea ngena.

³Jadi anu nitesamiu bongina, raepe ntona eona. Bo anu nipanggalivayakamiu ka roa riaro ntombi, rapatolele ka todea ri savalikuna!”

⁴“Vega-vegaKu, pariaramo! Nee maeka ka tona madota mompatesi komiu, sabana maupu haitu domo ria nuapa-nuapa mamala rapoviara ka komiu.

⁵Kuuli ka komiu isema masipato rapokaekamiu! Aginamo komiu maeka nte Alatala, sabana Ia nakuasa mompatesi karomiu bo mombanavusaka komiu riaro narakaa! Pariaramo tesaKu hitu! Aga Alatala masipato rapokaekamiu!

⁶Natantu nisanimiu tonji rone nipobalu lima-mbaa rompeka doi kodi. Nau ledo nadea alina ri panggita manusia, ledo ria sambaa ledo nitara nu Alatala.

⁷Iyapa tonji rone nitoraNa, nemopa komiu. Nau bulua ri balenggamiu nirekeNa bo nisaniNa pura. Jadi nee maeka, apa nipotove nu Alatalapa kita pade tonji rone nadea.”

⁸“Pariaramo! Isema-sema manguli ri ngayo ntodea, ia topangoseaka Yaku, Yaku muni manguli ri ngayo malaeka-malaeka nu Alatala, ia topangoseaka Yaku.

⁹Tapi isema-sema nanguli ri ngayo manusia, ledo nisanina Yaku, Yaku muni manguli ri ngayo malaeka-malaeka nu Alatala, ledo nisaniKu ia.

¹⁰Isema-sema nompakadaa Yaku, Ana nu Manusia, mamala raampungi. Tapi isema-sema nombasalai Nosa Gasa nu Alatala, ledo raampungi.

¹¹Ane komiu rakeni ntona ri ngayo ntopotangara ri banua petupu, atau ri ngayo pomarenta sabana komiu nangoseaka Yaku, nee makini raramiu mompekirika nuapa raulimiu mombasaliku karomiu.

¹²Apa tempo haitu, Nosa Gasa nu Alatala mboto mompatuduki ka komiu nuapa masipato raulimiu.”

¹³Saito lako ri todea nanguli ka i Yesus, “Guru, tudumo sampesuvuku mombabagi ka yaku bagiaku lako ri kaboli kakalumana ntuama kami.”

¹⁴Nesanamo i Yesus, “Sampesuvu, isema nanganggataka Yaku majadi topobagi kakalumana ka komiu?”

¹⁵Pade nanguli i Yesus ka todea, “Pakabelo-belo! Nee madamba gaga raramiu ante mbara-mbara, sabana naupa mbara-mbaramiu nadea ledo haitu mompakajadi katuvumiu mabelo.”

¹⁶I Yesus norapa mompakalanto tesaNa pangane ivei: “Naria saito tona nakalumana, tanana nabelo bo aselena nadea mpuu.

¹⁷Tona haitu nompekiri, ‘Nuapa kupovia? Domo ria pomboli asele poviaku.’

¹⁸Naupu nipekirina, nitesanamo ka karonu mboto, ‘Ivei kupovia. Kugerosi gampiri kodi hitu bo kupoviaka gampiri mbasona bo kuboli ri sia asele poviaku bo mbara-mbaraku.

¹⁹Maupu haitu domo mokarajaa yaku, apa nadea mpuu mbara-mbara niboliku, madea mpae pade maupu. Jadi mamala yaku motondodo-ndodo, mangande, manginu bo matuvu masana.’

²⁰Tapi Alatala nanguli ka ia, ‘Heh, todayo! Bonggi hitu iko mamate. Pura-pura anu nipakasadiamu, isema tupuna ngena?’ “

²¹Kaupu tesa haitu i Yesus nanguli, “Ivesiamo majadi nte tona nompasimbuku nompasiromu kakalumana ka karon mboto, tapi katuvuna napakasi ri panggita nu Alatala.”

²²Pade nanguli i Yesus ka anaguruNa ivei: “Kuuli ka komiu, nee makini raramiu mompekirika katuvumi bar nuapa rakandemi, bara baju nuapa rapakemi,

²³apa katuvuta nopokopa pade kande bo karota nopokopa pade pakeata

²⁴Peintamo tonji kalikoa. Ira ledo notuda pae, ledo nokato, bo ledo naria gampiri pomboli kandeara. Tapi naupa ivesia, Alatala nombadekei kande ka ira! Nemopa komiu anu nipotoveNapa pade tonji!

²⁵Nuapa gunana makini raramiu? Nau damo makini njuu raramiu, ledo ria saitoa komiu mompakule mantambai umurumi, nau aga sambongi.

²⁶Ane ledo rapakulemiu movia anu nakodi haitu, rapokuya makini raramiu, mompekirika anu ntanina?

²⁷Peintamo sese nu bunga ranggarava. Bunga haitu natuvu nau ledo nokarajaa, ledo nantanu kae rapovia baju. Tapi naupa ivesia, Kuuli ka komiu, Magau Salomo anu nakalumana mpuu, ledo ria pakeana nagaya mpo sese nu bunga!

²⁸Jadi ane Alatala nompakagaya bunga-bunga ranggavoko anu aga natuvu sampalai bo rapalabusimo, nemopa komiu! Natantu Ia nombadekei pakea niparaluumiu! Nakura mpuu pomparasayamiu!

²⁹Jadi nee maingu bo makini raramiu mompekirika nuapa rakandemi bara nuapa rainumi!

30Haitu pura anu nielo ntona ledo nosisani nte Alatala. Tapi ledo paraluu makini raramiu, sabana Alatala Tuamamiu, nisaniNa pura-pura anu niparaluumi.

31Jadi pasimbukumo ala Alatala momparenta riaru katuvumi, bo pura-pura anu ntona haitu radekeiNa muni ka komiu.”

32I Yesu nompapola tesaNa ivei: “Nau ledo nadea komiu anaguruKu, nee maeka, sabana komiu nipelisi nTuamamiu Alatala, lako ri kabelo ranaNa ala komiu moparenta mosangani-nggani nte Ia riaru poparentaNa.

33Jadi pobalumo mbara-mbarami bo dekeimo alina haitu ka tona napakasi. Poviamo batutu doi anu ledo mamala magero. Batuana, poviamo anu mompakadamba rara nu Alatala. Ivesiamo komiu momboli kakalumana ri suruga, anu ledo maupu-upu bo ledo rapangangga ntona atau rakandesi nu saipa.

34Pasimbukumo mompakadea kakalumana ri suruga. Apa ri umbu naria kakalumanami, ri sia muni pekirimi.”

35-36I Yesu notesa sangu porapa ivei: “Komiu kana masadia tempo Yaku makava. Komiu kana mainga nasimbayu mpo batua-batua nompopea kakava nu madikara lako ri posusa ponika. Batua haitu bate-batena masadia bo poindora ledo rapepayara. Ane makava madikara mombatanede vamba, masalisa vamba haitu raungge ka ia.

37Nabelo mpuu batua haitu ane manjili madikara bo rakavana ira da nemata! Pariaramo! Madika haitu mompasua baju pokarajaa bo ratuduna ira monturo, bo ia mboto mombasondu kande ka ira!

38Nabelo mpuu batua-batua nikavana nasadia nompopea kakava nu madikara, naupa ia makava tanga bongi bara bobayana.”

39Pade nanguli munimo i Yesu, “Pariaramo porapa hitu! Ane rasani ntupu banua tinti sakuya topangangga makava, natantum rajagaina banuana bo ledo rapalambana topangangga mesua rabanua.

⁴⁰Ivesia muni komiu. Komiu kana mainga mompopea kakavaKu, apa ledo nisanimiu tempona Yaku, Ana nu Manusia makava.”

⁴¹I Petrus nekutana, “Pue, porapa haitu nirapaMiu ka kami atau ka todea ntanina muni?”

⁴²Nesanamo i Yesus, “Haitu niuliKu ka batua nanoto bo natutu neoseaka. Tona haitu raanggataka nu madikana majadi topompasiayu pura-pura batua ntanina riara banua. Iamo mompasiayu kande ka batua-batua ntanina eo-eo.

⁴³Mabelo mpuu batua haitu ane tempo madikana manjili, nipovianamo bago niparasaya ka ia.

⁴⁴Pariaramo tesaKu hitu! Madika haitu manganggataka ia majadi topompasiayu pura-pura mbara-mbarana.

⁴⁵Tapi mandasa mpuu batua haitu ane aga mompekiri riara ntaina ivei: ‘Wee! Da masaepa pade manjili madikaku.’ Bo ia aga nombaboba batua-batua ntanina langgai bo mombine, bo aga mangande manginu bo malimpuno.

⁴⁶Tempo batua haitu movia madaa ivesia, sampesanika madikana manjilimo ri eo bo jaa ledo nisanina. Batua haitu rahuku bo ratedaka ri savalikuna nasimbayu mpo tona ledo natundu nte Alatala.

⁴⁷Ane batua nisanina dota nu madikana, tapi ledo nainga bo ledo nipoviana dota nu madikana, ia kana rajeani pakandasa.

⁴⁸Tapi ane ledo nisani nu batua nuapa nipodota nu madikana bo nipoviana anu nasala sampe masipato rahuku, ia aga raboba sakide. NiuliKu ivesia sabana tona nidekeika nadea, nadea muni ratuntu lako nte ia. Tona niparasayaka nadea, nadea muni rasarumaka lako nte ia.”

⁴⁹I Yesus nanguli, “Kakanana Yaku nakava mompapusu manusia ri dunia ante pehuku nu Alatala. Naoge mpuu raraKu rapanakimo apu haitu!

⁵⁰Tapi da nariapa peparajea kana Kurasai. Bo nasusa mpuu raraKu ane dopa majadi.

⁵¹Nisarumakamiu kakavaKu mompoposinggabelo tona ri dunia hitu, tapi ledo nakana! KakavaKu aga mompoposieva tona.

⁵²Nompamula sii-sii ane maria alima tona sambanua, ira matebagi-bagi bo mosieva. Ira tatalu mosieva ante ira randua.

⁵³Totua langgai mosieva ante anana langgai. Totua mombine mosieva ante anana mombine. Bo mosieva muni ante maniana mombine.”

⁵⁴Nanguli munimo i Yesus ka todea, “Ane nikitamiu kulimu neumba ri mpanauna, nisanimiu domo masae maudamo. Bo mpuu-mpuu mauda.

⁵⁵Ane nikitamiu pouri neburu lako ri puluna, nisanimiu kana mapane eo. Bo mpuu-mpuu mapane eo.

⁵⁶Komiu aga tobelo ri sumba! Komiu natau nantasere ravana bo nompetandaina. Nakuya ledo nisanimiu anu nipovia nu Alatala sii-sii?”

⁵⁷“Nakuya ledo nipekirimiu mbotomo pokainggu mbana nabelo?

⁵⁸Rapana, ane komiu rapangadu ntona bo hau ri ngayo ntopotangara, agina komiu mosieloka belo nte topangadu haitu tempo komiu da ri tatanga dala. Nee sampe komiu rakenina mpuu ratangara ri ngayo ntopotangara bo topotangara haitu mombadekei komiu ka polisi ala rasuaraka riara ntarunggu.

⁵⁹Pariaramo! Komiu ledo rasuvuraka lako ri tarunggu ane dopa nibayarimiu pakaupu vayamiu!”

Lukas 13

¹Tempona haitu naria tona notesa ka i Yesus, nombatesa bara sako-ndua toGalilea nipatesi Gubernur Pilatus tempo ira nombadekei binata pesomba ka Alatala.

²Nangepe kareba haitu nanguli i Yesus, “Nee rapekirimiu toGalilea namate haitu sabana dosara nadeapa pade dosa ntoGalilea ntanina.

³Tantu ledo! Tapi Kuuli ka komiu, ane komiu ledo majea movia dosa, komiu rahuku pura.

⁴Toramo tona sapulu uvalu anu namate napara Kola Siloam tempo ira nirumpi nu banua langa. Nee rapekirimiu ira namate sabana nadeapa dosara pade dosa ntoYerusalem ntanina!

⁵Ledo ntoto nakana! Kuuli vai ka komiu sangganipa, ane komiu ledo majea movia dosamiu, natantu komiu pura-pura rahuku muni.”

⁶Naupu sia i Yesus notesa porapa hitu, ivei: “Naria sanggayu kayu ara nituda ntona ri taluana. Naria saeo, tupu ntalua hau nangelo vua kayu haitu, tapi ledo ria sangua vuana nikavana.

⁷Jadi niulikana topokarajaa talua haitu, ‘Peintamo! Talu-mpaemo kasaena tumai njuu yaku mangelo vuana, tapi nau sangua vuana ledo ria nikavaku. Agina ratovosimo kayu hitu. Ledo ria gunana, aga nompakarugi boya ntana.’

⁸Tapi nesana topokarajaa talua haitu, ‘Pua, palambakamo ruru kayu hitu matuvu sampaepa. Kutonggo tana ri punana bo kudika pupu.

⁹Rakitata ruru. Bara movua mpae meonga. Tapi ane ledo movua ngena, ratovositamo.’ “

¹⁰Naria saeo ri eo penonto, i Yesus nompaguru ri banua petupu.

¹¹Ri sia naria saito mombine nipakabunggu nu seta, sapulu valu-mpaemo kasaena. Ia nabunggu bo domo nanoro neangga.

¹²Tempo i Yesus nanggita mombine haitu, nipokioNa bo niulikaNa, “Ina, mabelomo komiu.”

¹³Pade nidikaNa paleNa ri karo nu mombine, kaliu-liu nanoro karon, bo nitoiyanamo Alatala.

¹⁴Tempo pakeni ri banua petupu haitu nanggita i Yesus nompakabelo tobunggu ri eo penonto, naraumo rarana. Bo niulikana todea ri sia, “Riara saminggu naria ono-eo nipakatantu ka kita mokaarajaa. Kakavamo komiu rapakabelo ri eo ntanina, aga nee ri eo penonto!”

¹⁵Nangepe tesa haitu, nangulimo i Yesus, “Komiu aga tobelo ri sumba! Ri eo penonto pura-pura komiu nombakabasaka japimiu, bara jaramiu, bo nikenimiu rapopainu.

¹⁶Tapi ri sii, naria saito mombine, muli i Abraham, nipou nu Magau Seta sapulu valu-mpaemo kasaena. Ledo masipato ia rakabasaka lako ri kuasa nu seta ri eo penonto?”

¹⁷Tesa i Yesus, nompakaeya topangeva Ia. Tapi tona ntanina nadamba pura nanggita kabaraka nipoviaNa.

¹⁸Naupu haitu i Yesus nanguli, “Berimba kajadina Poparenta nu Alatala? Nuapa Kupasimbayuka?”

¹⁹Kajadina nasimbayu ante porapa hitu: naria sangu batu mandoe anu nituda ri talua. Batu mandoe haitu natuvu sampe najadi kayu mbaso. Nadea tonji nakava novia jumuna ri tinggu kayu haitu.”

²⁰Nanguli vaimo i Yesus, “Nuapa Kupakasimbayuka kajadina Poparenta nu Alatala?”

²¹Kajadina nasimbayu ante raga niala mombine bo nipasigalona ante talu-njuka labu nu gando. Naupu nipasigalona, nenggamba puramo labu nu gando haitu.”

²²Tempo i Yesus nompapola polipana hau ri ngata Yerusalem, Ia noliu ri ngata-ngata ntanina bo nompaguru.

²³Naria tona nakava nekutana nte Ia, “Pue, ledo madea tona rapakasalama?” Nesanamo i Yesus,

²⁴“Tona rapakasalama namala nirapaka tona mesua ri vamba napii. Pasimbukumo mesua ri vamba napii haitu. Apa nadea tona mompasimbuku mesua tapi ledo rapakulera.

²⁵Apa ane rapana, tupu nu banua membangu mombatutui vamba, bo komiu meangga ri savalikuna mombatanede vamba bo manguli, ‘Pua, ungge ka kami vamba!’ tupu nu banua haitu aga mesana ivei: ‘Ledo nisaniku komiu!’

²⁶Bo komiu manguli, ‘Kami nangande, nanginu nosangani-nggani ante komiu, pua. Bo komiu muni nompaguru ri ngata kami bara ipia!’

²⁷Tapi tupu nu banua haitu aga mesana ka komiu, ‘Ledo nisaniKu komiu, bo ledo nisaniKu lako ri umba komiu. Palaimo lako ri sii. Komiu pura-pura tona nadaa!’

²⁸Tempo komiu manggita i Abraham, i Ishak, bo i Yakub mosangani-nggani ante pura-pura nabi nggaulu mosusa madamba-damba ri Poparenta nu Alatala, motumangi komiu bo masusa mpuu raramiu sabana komiu rapopalai hau ri savalikuna!

²⁹Madea tona ntanina anu ledo toYahudi majadi todea ri Poparenta nu Alatala. Ira makava lako ri mpandakena, mpanauna, tasina, bo lako ri puluna mosusa madamba-damba ri Poparenta nu Alatala.

³⁰Pariaramo! Nadea tona naripuri sii-sii, majadi marikolu. Bo nadea tona narikolu sii-sii, majadi maripuri.”

³¹Tempona haitu muni, naria bara sako-ndua toFarisi nakava nte i Yesus bo nanguli, “Komiu kana malai lako ri sii, sabana Magau Herodes madota mompatesi Komiu!”

³²Tapi nesana i Yesus, “Koi ulika topeakalani haitu ivei: ‘Eo hitu bo maile Yaku da mompopalai seta-seta, bo mompakabelo tona nadua. Maipua pade Kupakaupu pokarajaaKu.

³³Tapi eo hitu, maile bo maipua, kana Kupapola polipaKu hau ri ngata Yerusalem, apa ledo nabelo nabi rapatesi ri ngata ntanina.’

³⁴He, komiu toYerusalem! Komiu mompatesi nabi-nabi, bo tona nisuro nu Alatala nirempemiu watu sampe namate! Nadea ngganimo Yaku madota mombasaliku komiu pura-pura, nasimbayu mpo manu tina nombarumutasi anana, tapi ledo nadota komiu.

³⁵Sabana haitu, Banua nu Alatala rapalaikaNa. Kuuli ka komiu, domo rakitamiu Yaku sampe makava tempona komiu manguli, ‘Maoge belo ka Ia anu nakava niposumba nu Alatala!’”

Lukas 14

¹Naria saeo ri eo penonto, i Yesus hau nangande ri banua pakeni ntoFarisi. Tona ri sia nompariara nuapa rapovia i Yesus.

²Naria tona nadua neonga ri ngayo i Yesus. Kadana bo palena nebangga puramo.

³Nanggita tona haitu, nekutanamo i Yesus nte guru-guru agama bo toFarisi ri sia, “Nantuntuni atura agamata, mamala kita mompakabelo tona nadua ri eo penonto, atau ledo?”

⁴Tapi ira ledo nadota nesana. Jadi i Yesus nombadika paleNa ri karo ntona nadua haitu bo nipakabeloNa bo nituduNa manjilimo.

⁵Naupu haitu, niuliNa ka guru-guru agama bo toFarisi, “Ane rapana anamiu bara japimiu manavu ralovu ri eo penonto, natantu rasoreakamiu masalisa ri eo haitu muni.”

⁶Nangepe tesa i Yesus haitu, ledo ria saitoa ira nabia nesana.

⁷Ri banua ntoFarisi pangane, i Yesus nanggita torata-torata nompelisi ponturo tobelona. Sabana haitu, nipatudukiNa ira ante porapa hitu:

⁸“Ane komiu ragaga hau ri posusa poboti, nee monturo ri ponturo tobelona. Apa ane makava torata naogepa pade komiu,

⁹tupu nu banua anu nombagaga komiu kana manguli ka komiu, ‘Merapi ampu, ponturo hitu nipakasadia ka torata hitu. Komiu kana molinja ri ponturo ntanina.’ ” I Yesus nompapola tesaNa ivei: “Natantu maeya matamiu molinja ri purina.

¹⁰Jadi, ane komiu ragaga hau ri posusa, aginamo monturo ri purina ala tupu nu banua makava manguli ka komiu, ‘Katumai, monturo ri sii.’ Ane ivesia rapoviamiu, komiu rapakaoge ri ngayo ntorata ntanina pura-pura.

¹¹Isema-sema nompakalanga rarana mboto, kana rapakaede nu Alatala. Bo isema-sema nompakaede rarana mboto, kana rapakaoge nu Alatala.”

¹²Pade i Yesus notesa ka tupu nu banua ri sia, “Ane komiu mombagaga tona makava mangande ri posusa, bara eona bara bongina, nee ragagamiu roamiu, bara sampesuvumi bar tona nakalumana nosadoyata nte komiu, apa ragagara mpanjili komiu ngena. Jadi ivesiamo rapoviara mombabalasi pokainggumi nabelo.

¹³Ane komiu movia posusa, gagamo tona napakasi, tona nakeru, tona napunggu bo tona naburo.

¹⁴Ane ivesia rapoviamiu, Alatala mombadekei belo ka komiu. Sabana ledo rapakule tona ivehaitu mombabalasi pokainggumi nabelo. Pokainggumi nabelo haitu rabalasi nu Alatala tempo tona nanao rapakatuvu mpanjili lako ri kamatena.”

¹⁵Naria tona nangande nosinggani-nggani ri posusa haitu nangepe tesa i Yesus bo nanguli: “Mabelo mpuu tona mangande mosinggani-nggani ante Alatala ri posusa mbaso ri Poparenta nu Alatala bara maipia.”

¹⁶I Yesus nesana ante porapa ivei: “Naria sanggani tona novia posusa mbaso bo nadea tona nigagana.

¹⁷Tempo nasadiamo posusa, nituduna batuana hau mangulika tona nigagana ivei: ‘Kamaimo, nasadia puramo!’

¹⁸Tapi tona nigaga, saito-saito aga notanje. Saito nanguli, ‘Yaku dako nangali salimpu tana bo kana hau kupeinta ntani ruru. Merapi ampu yaku, ledo majadi tou!’

¹⁹Tona ntanina nanguli, ‘Yaku dako nangali japi lima-ndai bo da kupesoba mompakena. Merapi ampu yaku, ledo majadi tou!’

²⁰Bo tona ntanina nanguli, ‘Dako noberei yaku, jadi ledo makapo tou!’

²¹Batua haitu nanjili manggeni tesara ka tupu nu posusa. Narau mpuu rara ntupu posusa, bo niulikana batuana pangane, ‘Koimo masalisa hau ri ngata, ri dala mbaso bo dala kodi, bo keni tumai tona napakasi, tona nakeru, tona naburo bo tona napunggu!’

²²Jadi naupu nipoviana pura-pura anu niparenta ka ia, niulinamo, ‘Pua, nipoviakumo anu niulimiu. Nadea tona nakava tapi da nariapa ponturo naloga.’

²³Jadi nanguli tupu nu posusa ka batuana haitu, ‘Ane ivesia, koi hau ri dala mbaso bo dala kodi ri savaliku ngata. Saravimo tona tumai, ala maponu pura ponturo ri banuaku!

²⁴Kuuli ka komiu, ledo ria saitoa tona nigagaku kudekei mangande nuapa-nuapa ri posusaku hitu!’ “

²⁵Nadea tona hau nantuntuni i Yesus ri polipana. Jadi neilimo Ia bo nanguli ka ira,

²⁶“Isema-sema madota mangoseaka Yaku, kana rapotovenapa Yaku pade tina tuamana, bereina, ana-anana, sampesuvu-sampesuvuna, bo karon mboto. Ane ledo rapotovenapa Yaku pade ira pura-pura, bo nelabipa pade karon mboto, ledo mamala ia majadi topangoseaka Yaku.

²⁷Isema-sema ledo madota manjimbuaka kayu salibna bo mangoseaka Yaku, ledo mamala majadi topangoseaka Yaku.

²⁸Rapana, ane maria saito komiu madota movia banua mbaso, natantu dopame mombabangu, kana rarekena ntani ruru doina bara magana bara ledo.

²⁹Apa ane maupumo doina, tano da pandasi najadi, natantu tona manggita poviana haitu aga mompongirika ia.

³⁰Raulira, ‘Hai, naoge rarana nompovia banua mbaso tapi ledo nipakulena mompakaupuna.’

³¹Ivesia muni ane magau ante surudaduna sapulu njobu hau mosieva nte magau ntanina ante ropulu njobu surudaduna. Natantu dopame hau, kana rapekirina ntani ruru bara rapakule nu surudaduna mangeva surudadu dea nu magau ntanina.

³²Ane nisanina ledo rapakule nu surudaduna mangevana, natantu da makavao balina, rasuronamo tona hau merapi posinggabelo.

³³Jadi, ivesia muni ante komiu. Dopame komiu majadi topangoseaka Yaku, kana rapekirimiu ntani ruru. Ane ledo masadia komiu mombakabasaka pura-pura anu naria nte komiu, ledo mamala komiu majadi topangoseaka Yaku.”

³⁴“Gara noguna mami. Tapi ane gara mamolimo, berimba mompakapaga mpanjili?

³⁵Domo ria gunana. Ledo namala rapake mompakaboya tana, ledo muni rapajadi pupu. Damo ratedaka nggoo. Isema-sema naria talingana, pariaramo tesaKu hitu!”

Lukas 15

¹Naria sanggani nadea topesingara balasitee ante tona ntanina, anu niuli ntodea nadaa pokainggura, nakava nangepe tesa i Yesus.

²Nanggita haitu, toFarisi bo guru agama nongau. “Hm! Ledo nabelo tona hitu! Ia nosimporoa ante tona nadaa bo nangande singgani nte ira!”

³Nangepe tesara haitu, nesana vai i Yesus ante porapa hitu ka ira:

⁴“Rapana, ane roamiu mompatuvu bimba saatu anguna bo malipo sangu, nuapa rapoviana? Tantu rapalaisina bimbana siopulu bo sasio ranggarava bo hau raelona sangu bimbana nalipo haitu sampe rakavana.

⁵Ane rakavana bimbana haitu, rasimbuakana manjili ante damba rarana.

⁶Makava ri banua, rapasiromuna roana bo tona nosadoyata nte ia bo raulikana, ‘Kamaimo kita madamba-damba, sabana nikavakumo bimbaku nalipo!’

⁷Ivesia muni ri suruga. Ane saito tona nadaa majea, kadamba nu isi suruga naogepa pede kadamba ka siopulu bo sasio tona nanao anu ledo paraluu majea.”

⁸I Yesus nompapola tesaNa ante porapa ntanina ivei: “Rapana maria mombine ante doi salaka sapulu-mpekana. Ane malipo sampeka, nuapa rapoviana? Natantu ratunjuna poindo bo rasaevena banuana mangelo pakabelo sampe rakavana doi nalipo haitu.

- ⁹Ane rakavana doina haitu, rapasiromuna roana bo tona nosadoyata nte ia ivei: ‘Kamaimo kita madamba-damba, sabana doiku nalipo nikavaku mpanjili.’
- ¹⁰Ivesia muni malaeka-malaeka nu Alatala. Madamba mpuu rarara ane saito tona najea nokainggu nadaa.”
- ¹¹Notesa vaimo i Yesus ante porapa hitu, “Naria saito totua langgai, randua anana, langgai pura.
- ¹²Ana kaupuna nanguli ka tuamana, ‘Tata, dekei ka yakumo bagiaku lako ri kakalumanamiu.’ Jadi, nibagi ntuamanamo kakalumanana ka anana randua.
- ¹³Bara sako-eo kaliuna, ngana kaupu haitu nompobalu bagiana pura-pura, bo hau ri ngata nakavao. Hamai ia nompakaupu doina nggoo-nggoo, natuvu nompesana.
- ¹⁴Naupu purapa doina, najadimo kaara mpai ri ngata haitu sampe ia muni napepa.
- ¹⁵Pade hau ia nokarajaa ka tona ri ngata haitu. Tona haitu nombatudu ia hau mojaga bavu ri talua.
- ¹⁶Naara mpuu taina sampe nau tibo bavu mbeki rakandena. Tapi ledo ria saitoa tona nombadekei kandeana ka ia.
- ¹⁷Kaupuna, nanotomo rarana, bo nipekirina, ‘Tona nokarajaa ka tuamaku nelabi-labi kandeara, tapi yaku ri sii mamate ara.
- ¹⁸Yaku kana manjili hau nte tuamaku bo kuuli ka ia ivei: Tata, nadosamo yaku ri ngayo nu Alatala bo ri ngayomi muni.
- ¹⁹Tata, domo masipato yaku rareke anamiu, aginamo rarekemiu batua.’
- ²⁰Naupu nompekiri ivesia, nanjilimo ia hau nte tuamana. Da nakavao ia, nikita ntuamanamo. Naasi mpuu mata ntuamana nanggita anana. Nangova ia nantomunaka anana. Nakava nte anana nikapuina anana bo niekina.
- ²¹Pade nanguli ngana haitu ka tuamana, ‘Tata, nadosamo yaku ri ngayo nu Alatala bo ri ngayomi muni. Domo masipato yaku rareke anamiu.’

²²Tapi tuamana nombaronde batua-batuana bo nituduna, ‘Koi ala masalisa baju nabelo bo popasuaka ia. Pasuaka muni sinji ri koya mpalena bo sapatu ri kadana.

²³Maupu haitu, koi ala ana japi toboyana bo sambalemo. Kita mangande madamba-damba,

²⁴sabana anaku hitu, mamala raulita namatemo, tapi siipa natuvu mpanjilimo. Ia nalipomo, tapi siipa nikava mpanjilimo.’ Jadi nipoviara posusa, bo nadamba-damba.

²⁵Tempo ira nadamba-damba ri banua, anana lumbua da ri talua. Nanjilipa ia, bo naparamo nte banuara, niepena musi bo suara ntopomore.

²⁶Nirondena saito batua bo nipekutanana, ‘Nokuya tona nadea ri banua?’

²⁷Nesana batua haitu, ‘Nanjilimo tueimiu. Jadi tuamamiu nombatudu kami mosambale japi toboyana sabana anana nalipo nakava ante nabelo.’

²⁸Nangepe haitu, naraumo rara ana lumbua sampe ledo nadota ia mesua riaru banua. Jadi nesuvu tuamana mantingengesi ia mesua.

²⁹Tapi nanguli ngana haitu ka tuamana, ‘Nompae-mpaemo yaku nokarajaa mpo batuamiu. Ledo ria sanggani niliunakaku anu niparentamiu kaku. Tapi nau sangu ana ntovau ledo ria nidekeimiu kaku ala yaku madamba-damba ante roaku.

³⁰Damo nakava anamiu nompakaupu kakalumanamiu nikenina hau nongei ka bajinga, bo nisambalekamiu japi ka ia.’

³¹Nesana tuamana haitu, ‘Anaku, iko batena naria ri sii nte yaku. Pura-pura anuku, iko mami tupuna.

³²Tapi kita masipato mosusa madamba sabana tueimu namate, natuvu mpanjili. Ia nalipomo tapi sii-sii nikavata mpanjili.’ ”

Lukas 16

¹I Yesus notesa porapa hitu ka anaguruNa: “Naria saito tona nakalumana bo naria muni saito topompasiayu kakalumanana. Tokalumana nangepe perai ntona ka topompasiayu haitu, nompakarugi kakalumana nggoo.

²Jadi nipokiona topompasiayu haitu bo niulikana, ‘Natantu mpuu pokainggumu niepeku! Dekei kakumo buku nu doi pokarajaamu nompasiayu kakalumanaku. Domo iko mompasiayu kakalumanaku!’

³Nangepe haitu, nompekirimo topompasiayu kakalumana, ‘Hai, berimbamo yaku hii? Puaku madota mombakabasaka yaku. Nuapa kupovia ngena? Ane motonggo, domo kupakule. Ane merapi-rapi ri dala, maeya matakku.

⁴Ha, ivei kupovia! Kupakaluu rara ntona noinda nte puaku, jadi ane rakabasaka i pua yaku ngena, ratarimara yaku ri banuara.’

⁵Jadi naupu sia, hau ia nompokio pura-pura tona noinda doi nte puana. Nanguli ia ka tona paratama, ‘Sakuya indamu nte puaku?’

⁶Nesana tona haitu, ‘Saatu gumba nu lana.’ Nanguli topompasiayu haitu, ‘Sii sura indamu. Ponturo ri sii, tulisimo limapulu gumba nu lana.’

⁷Naupu sia, niulikana tona karanduana, ‘Sakuya indamu?’ Nesana tona haitu, ‘Sanjobu karu pae.’ Pade nangulimo topompasiayu haitu, ‘Siimo sura indamu. Tulisimo valu-atu karu.’

⁸Tempo tona nakalumana haitu nangepe anu nipovia ntopompasiayu ledo nanoa haitu, nitoiyanamo topompasiayu haitu sabana natau noakala mangelo katuvu mabelo. Apa tona ledo nosisani nte Alatala natau nompasiayu katuvura nte roara. Nataupa ira pade tona natuvu ri reme nTupu nompasiayu katuvura ka tempo makava.

⁹Kuuli ka komiu, pakemo kakalumana ri dunia hitu mombatulungi tona ntanina, ala tempona kakalumana dunia domo maria gunana, komiu ratarima nu Alatala ri ponturo anu batena sampe ri kasae-saena ri suruga.

¹⁰Tona namala niparasaya ante mbara-mbara sakide, namala muni niparasaya ante mbara-mbara nadea. Tapi ane ia ledo nokainggu nanoa ante mbara-mbara sakide, ia ledo mokainggu manoa ante mbara-mbara nadea.

- ¹¹Jadi ane komiu ledo namala niparasaya ante kakalumana ri dunia nadaa hitu, isema momparasaya komiu ante kakalumana nabelo ri suruga?
- ¹²Ane komiu ledo namala niparasaya ante mbara-mbara ntona ntanina ri dunia hitu, isema mombadekei ka komiu kakalumana majadi bagiamiu mboto ri suruga?
- ¹³Ledo rapakule nu batua saito matundu nte madika randua. Sabana, saito rapotovenana bo saitopa ledo rapeilina. Saito raoseakana parentana bo saitopa rapoarana. Ivesia muni komiu. Ane komiu mompotove mbara-mbara ri dunia hitu, ledo rapakulemiu mpuu-mpuu mangoseaka dota nu Alatala.”
- ¹⁴ToFarisi nangepe pura-pura anu nitesa i Yesus pangane, aga nipongirikara i Yesus sabana ira topompotove doi.
- ¹⁵Tapi i Yesus nanguli ka ira, “Ri ngayo ntona ntanina, komiu nikita nabelo, tapi nisani nu Alatalamo pura-pura isi rara ntaimiu. Anu nabelo ntoto ri panggita manusia, haitumo nipovuu mata nu Alatala.
- ¹⁶Atura-atura agama nidekei Nabi Musa ka kita, bo pepatuduki nu nabi-nabi ntanina rapake sampe peonga i Yohanes Topediu. Nompamula lako ri tempo i Yohanes haitu, Kareba Belo anu notesa Poparenta nu Alatala, nipatolele njuu. Bo tona nompasimbuku mpuu majadi todea nu Alatala.
- ¹⁷Atura-atura agama nidekei Nabi Musa ledo molese. Namurapa langi bo tana maopo, pade sangu hurupu lako ri Atura-atura haitu molese. Haitu bate-batena maria.”
- ¹⁸Pade nanguli munimo i Yesus, “Isema-sema langgai nompogaaka bereina pade noberei nte mombine ntanina, ia nobualo. Bo tona nompoberei mombine nipogaaka, ia muni nobualo.”
- ¹⁹I Yesus nompapola tesaNa ante porapa hitu: “Naria saito tona nakalumana, pakeana mpo pakea nu magau nasuli mpuu alina. Katuvuna eo-eo mpo toposusa.
- ²⁰Naria saito tona napakasi nidika ntona ri vamba ntona nakalumana. Topakasi haitu nosanga i Lazarus. Ia nabaka njumanggaro.

²¹Ia madota mangande rombo nggandea nanavu lako ri meja ntokalumana haitu. Napakasi ntoto ia sampe asu-asu muni nakava nombadila bakana.

²²Nakavamo tempona tona napakasi haitu namate bo ia niken nu malaeka hau ri ponturo nabelo ri sinjori Nabi Abraham. Tona nakalumana namate munimo bo nitana. Ia niken hau ri ponturo ntomate.

²³Nandasa mpuu ia ri sia. Nitingoana ri kalangana, nikitana Nabi Abraham ri ponturona nakavao, bo i Lazarus nonturo ri sinjorina.

²⁴Nongaremo tokalumana haitu, ‘Tuamaku, Abraham, poasimo yaku! Tudumo i Lazarus mombalome koya mpalena ri uve pade tumai mombabanggasi dilaku, nandasa mpuu yaku ri mata nu apu hitu.’

²⁵Tapi nesana i Abraham, ‘Toramo anaku, tempo iko ri dunia, nikavamu puramo belona, tapi i Lazarus aga nanggava anu nadaa. Sii-sii ia nipakadamba, bo iko nipandasa.

²⁶Bo ri olota naria salu nandala ntoto. Tona ri sii ledo namala tou, bo tona ri situ ledo namala tumai.’

²⁷Nangepe haitu, tona nasugi nanguli, ‘Ane ivetu tano, kuperapi mpuu-mpuu nte komiu, tudumo i Lazarus hau ri banua ntuamaku.

²⁸Da nariapa alima sampesuvuku hamai. Tudumo i Lazarus hau mompainga ira ala ira ledo mesua ri ponturo pepandasa hitu.’

²⁹Nesana i Abraham, ‘Nariamo Buku Atura Agama nitulisi Nabi Musa bo Buku nu Nabi-nabi nte ira. Dekeikamo ira mangoseaka anu nitulisi riara buku-buku haitu!’

³⁰Tapi nesana tokalumana, ‘Ledopa magana. Tapi ane maria tona namate matuvu mpanjili hau nte ira, tantu ira majea movia dosa.’

³¹Tapi nesana i Abraham, ‘Ane ledo rapariarara parenta Nabi Musa bo nabi-nabi ntanina, tantu ledo muni raparasayara nau maria tomate matuvu mpanjili!’ ”

Lukas 17

- ¹I Yesus nanguli ka anaguruNa, “Natantu kana maria mpengaya-ngaya anu mompakanavu tona riara dosa. Tapi masilaka mpuu topepakanavu!
- ²Agina rapantoesi vatu mbaso ri tambolona bo ratedaka hau rantasi. Mabelopa haitu pade rapakanavuna roa ledo naroso pomparasayana sampe movia dosa.
- ³Sabana haitu, pakabelo-belo! Ane maria sampesuvumiu movia dosa onteakamo! Bo ane manjoso raramo ia bo merapi ampu, ampungimo ia.
- ⁴Ane pitu-nggani saeo rapoviana anu nadaa ka komiu bo nggani-nggani ia makava nte komiu merapi ampu, ampungimo ia.”
- ⁵Pade nanguli anaguruNa, “Pue, pakaroso pomparasaya kami.”
- ⁶Nesana i Yesus, “Ane rapana pomparasayamiu masimbayu kambasona mpo batu nu mandoe, mamala raulimiu ka kayu mbaso hitu, ‘Kaubimo! Koi polinja hau rantasi.’ Natantu kayu haitu molinja mpuu.”
- ⁷“Rapana, saito lako nte komiu maria batua nopoajeko, bara nompoevu bimbaranggarava. Tempo batua haitu manjili lako ranggarava, natantu ledo raulimiu ka ia, ‘Kamai masalisa mangande!’
- ⁸Ledo ivesia. Natantu aga raulimiu ka ia, ‘Koi pasadia kandeaku. Pasuamo baju nagasa bo sondumo kandeaku. Maupu yaku mangande bo manginu pade iko.’
- ⁹Natantu batua haitu ledo masipato ratoiya sabana ia aga nangoseaka parenta nu puana.
- ¹⁰Ivesia muni komiu. Ane maupumo rapoviamiu pura-pura anu niparenta nu Alatala ka komiu, ulimo, ‘Kami hii aga batua biasa. Ledo masipato ratoiya. Kami aga nangoseaka anu niparenta ka kami.’ “
- ¹¹Ri polipana hau ri ngata Yerusalem, i Yesus noliu ri pobingga bagia Samaria bo Galilea.
- ¹²Tempo Ia nesua rangata, naria sapulu tona nadua oge nombatomunaka Ia. Ira neangga nggavao
- ¹³bo nongare, “Yesus! Poasimo kami!”

¹⁴Pade nikanotoNamo ira bo niulikaNa, “Koimo pekiparesa karomiu nte topanggeni pesomba, nangoseaka Atura-atura agama nipapola Nabi Musa.” Nangepe haitu, hau mpuumo ira. Tempo ira da nolipa, nabelo puramo karora.

¹⁵Saito ira, nikitana karon nabelomo, nanjili vai ia hau nte i Yesus bo nombatoiya-toiya Alatala ante suara namangga.

¹⁶Ia notungga sampe ri tana ri ngayo i Yesus bo nanguli tarima kasi. Ia mai toSamaria.

¹⁷I Yesus nanguli ka ia, “Sapulu tona nipakabeloKu pangane. Ri umbamo sasiopa?”

¹⁸Nakuya aga saito hitu nanjili nanguli tarima kasi nte Alatala? Bo ia ledo toYahudi!”

¹⁹Pade nanguli i Yesus ka tona haitu, “Peanggamo bo kapolamo. Nabelomo iko sabana iko nomparasaya Yaku!”

²⁰Naria bara sako-ndua toFarisi nekutana nte i Yesus, maipia majadi Poparenta nu Alatala. Nesana i Yesus, “Poparenta nu Alatala ledo nompamula ante tanda-tanda nikita.

²¹Ledo maria tona manguli, ‘Peintamo, siimo Poparenta nu Alatala,’ atau ‘Peintamo, hamaimo Poparenta nu Alatala!’ Sabana Poparenta nu Alatala naria riara ntai ntona.”

²²Naupu haitu i Yesus nanguli ka anaguruNa, “Makava tempona ngena, maoge mpuu raramiu manggita Yaku, Ana nu Manusia, nau aga saeo, tapi domo rakitamiu Yaku.

²³Tempo haitu, tona manguli ka komiu, ‘Peintamo, moitu Ia’, bara manguli ‘Siimo Ia’. Tapi nee raoseakamiu ira.

²⁴Sabana tempo Yaku makava mpanjili ngena, kakavaKu malanto rakita ri umba-umba dunia, nasimbayu mpo kila novende ri laerava bo nombavanta njumangu langi.

- ²⁵Tapi dopame makava tempona haitu, Yaku kana rapandasa bo rapoara ntona natuvu sii-sii.
- ²⁶Tempo Yaku Ana nu Manusia makava bara maipia, pokainggu manusia masimbayu ante pokainggu manusia tempo Nabi Nuh nggaulu.
- ²⁷Ira bate-batena nangande, nanginu bo nosipoberei njuu sampe tempo Nabi Nuh nesua riaru kapalana. Nakava uve oge nombaongasi pura-pura ira.
- ²⁸Ivesia muni inggu ntona ri ngata Sodom nggaulu tempo i Lot nonturo hamai. Ira nangande bo nanginu, nompobalu, neali, notuda-tuda bo nombangu banua.
- ²⁹Tapi tempo i Lot nalai lako ri ngata Sodom, eo haitu muni nanaumo apu ante watu colonggata navaya lako ri suruga nompakaropu ira sangata.
- ³⁰Ivesia muni pokainggu ntona bara maipia tempo Yaku, Ana nu Manusia makava.
- ³¹Tempo kakavaKu haitu, tona nangosanaka ri savaliku nu banuana, nee mesua rabanua mangala mbara-mbarana. Ivesia muni tona ri taluana. Nee manjili hau ri banua.
- ³²Toramo anu najadi nte berei i Lot tempo ia neili nompeinta ngata Sodom. Ia najadi tinja gara.
- ³³Isema-sema nompasimbuku nangoseaka dotana mboto, bo natuvu ka karona mboto, ledo manggava katuvu mabelo sampe ri kasae-saena. Tapi isema-sema nombakabasaka dotana mboto sabana nangoseaka Yaku, nau ia rapatesi, iamo matuvu mabelo sampe ri kasae-saena.
- ³⁴Pariaramo! Tempo Yaku makava, ane randua tona maturu ri sangu paturu bongi haitu, saito raala bo saito maboli.
- ³⁵Maria mombine randua mogili mosanggani-nggani, saito raala bo saito maboli.
- ³⁶[Randua tona mokarajaa ri talua, saito raala bo saito maboli.]”

³⁷Naupu sia ana-anaguru i Yesus nekutana, “Pue, ri umba rakajadina haitu ngena?” Nesana i Yesus, “Ane tonji kalikoa nasiromu, tantu naria matepudu ri sia.”

Lukas 18

¹Naupu haitu i Yesus nompatuduki anaguruNa ante notesa sangu porapa ala ira masaro mosambaya bo nee masau rara.

²NiuliNa ivei: “Ri sangu ngata naria topotangara anu ledo naeka nte Alatala bo ledo muni nipeilina singgamanusiana.

³Ri ngata haitu mai naria muni saito mombine natimbala nasaro nakava nte topotangara bo nekisaliku ivei: ‘Tulungimo yaku mantingayo baliku!’

⁴Pamulana topotangara haitu ledo nadota mantulungi timbala pangane. Tapi kaupuna nipekirina, ‘Nau yaku ledo naeka nte Alatala bo ledo muni nipeiliku singgamanusiaku,

⁵aginamo kutulungi mombine hitu ala domo rabatona yaku. Ane ledo kutulungi ia, ledo maupu-upu ia tumai mombalengesi yaku.’ “

⁶Nanguli i Yesus ka anaguruNa, “Pariaramo anu niuli ntopotangara anu ledo nanao haitu!

⁷Iyapa tona ledo nanao, nadota nantulungi timbala nerapi nte ia, nemopa Alatala! Natantu ratulungiNa todea nipelisiNa anu nekakai nte Ia eo bongi. Nee rapekirimiu Ia aga nokalera-lera mantulungi ira.

⁸Parasayamo: masalisa ratulungiNa ira. Tapi tempo Yaku, Ana nu Manusia makava mpanjili ri dunia hitu, da mariapa tona mpuu-mpuu momparasaya Yaku?”

⁹I Yesus notesa porapa hitu ka tona nompekiri iramo tona nabelo bo nompandaente tona ntanina.

¹⁰Nanguli i Yesus, “Naria randua tona hau nosambaya ri Banua nu Alatala. Saito toFarisi, bo saito topesingara balasitee.

¹¹ToFarisi haitu neangga bo nosambaya riara ntaina, ‘Pue, yaku nosukuru nte Komiu sabana yaku hii ledo nasimbayu ante tona ntanina, haitumo topebagiu, tona natenggo rarana, bo tona nobualo. Yaku nosukuru apa yaku ledo nasimbayu ante topesingara balasitee moitu.

¹²Ronggani saminggu yaku nopuasa, bo nidekeiku ka Komiu sabagia lako ri sapulu bagia asele panggaviaku pura-pura.’

¹³Tapi topesingara balasitee haitu neangga nakavao nosambaya. Ledo nabia ia nantingoa ri langi. Ia nanjoso rara bo nosapa-sapa bambarana bo nanguli, ‘Alatala, poasimo yaku, apa yaku tona nadosa.’ “

¹⁴Nanguli i Yesus, “Kuuli ka komiu, tempo ira randua nanjili, topesingara balasitee nitarima nu Alatala, tapi toFarisi ledo. Apa, isema-sema nompakaoge karon a mboto, kana rapakaede nu Alatala, tapi isema-sema nompakaede rarana, kana rapakaoge nu Alatala.”

¹⁵Nadea tona nanggeni ngana kodi hau nte i Yesus ala radikaNa paleNa ri ngana haitu bo merapi Alatala mombadekei belo ka ira. Nanggita haitu, ana-anaguruNa nompokarau ira.

¹⁶Tapi i Yesus nompokio ngana-ngana haitu bo niulikaNa anaguruNa, “Dekeikamo ngana-ngana gahitu makava nte Yaku. Nee ratagi ira, sabana aga tona nasimbayu ingguna mpo ngana-ngana gahitu masipato majadi todea ri Poparenta nu Alatala.

¹⁷Pariaramo tesaKu hitu! Isema-sema ledo natundu nte Alatala nasimbayu mpo ngana kodi natundu nte totuana, ia ledo mamala majadi todea nu Alatala.”

¹⁸Naria saito pakeni ntoYahudi nekutana nte i Yesus, “Guru belo, nuapa kupovia ala kukava katuvua mabelo sampe ri kasae-saena?”

¹⁹Nesana i Yesus, “Nakuya niulimuka Yaku nabelo? Ledo ria saitoa tona nabelo, aga Alatala.

²⁰Natantu nisanimu parenta-parenta nu Alatala anu nanguli, nee mobualo, nee mepatesi, nee mangangga, nee mosabi dava, bo bilamo tina tuamamu.”

²¹Nesana tona haitu, “Pura-pura parenta haitu nioseakakumo lako ri kakodiku.”

²²Nangepe haitu, nangulimo i Yesus ka ia, “Da naria sangayapa kana mupovia. Pobalu pura-pura kakalumanamu bo dekei alina haitu ka tona napakasi ala mukava kakalumana ri suruga. Maupu sia, oseakamo Yaku!”

²³Nangepe tesa i Yesus haitu, nasusamo rarana, sabana ia tona nakalumana mpuu.

²⁴Nisani i Yesus nasusa rara ntona haitu. Sia sampe niuliNa, “Nakaja mpuu tona nakalumana matundu nte Alatala bo majadi todeaNa.

²⁵Namurapa sangu unta mesua ri puki nu jaru, pade tona nakalumana matundu nte Alatala bo majadi todeaNa.”

²⁶Tona nangepe tesa i Yesus nanguli, “Ane ivesia, isema tano mamala rapakasalama?”

²⁷Nanguli i Yesus, “Anu ledo rapakule nu manusia nipakule nu Alatala.”

²⁸Jadi nanguli i Petrus ka i Yesus, “Peintamo, Pue! Kami nompalaisi pobanua kami bo nangoseaka Komiu.”

²⁹Nanguli i Yesus ka ira, “Pariaramo tesaKu. Isema-sema nompalaisi banuana, bara bereina, bara sampesuvuna, bara tina tuamana, bara anana sabana ia nangoseaka Alatala,

³⁰madea nggani kadeana rakavana ri dunia hitu. Bo ri tempo makava ratarimana katuvu nabelo sampe ri kasae-saena.”

³¹I Yesus nompasiromu sapulu randua anaguruNa pade niulikaNa, “Epemo! Sii-sii kita mantende hau ri ngata Yerusalem. Hamai kana madupa pura-pura anu nitulisi nabi-nabi nggaulu, haitumo anu majadi ante Yaku, Ana nu Manusia.

³²Yaku kana radekei ka tona ledo toYahudi. Yaku rabirisikara mata, rapongei-ngeikara, bo ratoveulusira.

³³Yaku racambu pakandasa bo rapatesira. Tapi ri eo katataluna Yaku matuvu mpanjili.”

³⁴Pura-pura anu nitesa i Yesus haitu ledo nipaha nu anaguruNa. Batua ntesaNa haitu nitabuniaka ka ira. Jadi ledo nisanira nuapa nitesa i Yesus.

³⁵Tempo i Yesus napara ngata Yerikho, naria saito toburo nonturo nerapi-rapi ri bivi dala.

³⁶Niepena tona nadea noliu, nipekutanana tona, “Nuapa najadi?”

³⁷Nesana tona, “I Yesus, toNazaret moliu ri sii.”

³⁸Nangepe haitu, nongaremo toburo, “Yesus, Muli Magau Daud, poasimo yaku!”

³⁹Tona ri kolu i Yesus narau ka toburo bo nombasalaraka ia, “Nee makanano! Kalino iko!” Tapi toburo haitu aga nantambai kamanggana nongare, “Yesus, Muli Magau Daud, poasimo yaku!”

⁴⁰Nangepe toburo nongare, netaamo i Yesus, bo nituduNa tona manggeni toburo ka Ia. Nakavapa toburo, nipekutana i Yesusmo,

⁴¹“Nuapa mupodota Kupovia ka iko?” Nesanamo toburo, “Pue, yaku madota mekita!”

⁴²Nanguli i Yesus ka ia, “Ane ivesia, pekitamo! Mabelomo matamu, sabana iko nomparasaya Yaku!”

⁴³Kaliu-liu namala mpuumo nekita toburo haitu, bo haumo ia nantuntuni i Yesus bo nombatoiya Alatala. Pura-pura todea ri sia anu nanggita kajadia haitu, nantoiya Alatala.

Lukas 19

¹Nakava ri ngata Yerikho, nolipa njuu i Yesus noliu ri sia.

²Ri ngata haitu naria saito pakeni ntopesingara balasitee, nosanga i Zakheus. Nasugi mpuu ia.

³Ia madota manggita i Yesus, tapi ledo nikitana sabana naede karonu bo nadea mpuu tona nombatagui i Yesus.

⁴Jadi i Zakheus nangova nokolu bo nompene kayu ri bivi nu dala ala mamala ia mompeinta i Yesus tempo moliu ri sia.

⁵Tempo i Yesus nakava ri puna kayu haitu, nitingoaNamo i Zakheus, bo niulikaNa, “Zakheus, panaumo masalisa, apa eo hitu Yaku mesai ri banuamu.”

⁶Jadi, nompari-mparimo i Zakheus nanau bo nitarimana i Yesus ante damba rarana.

⁷Tapi pura-pura tona nanggita i Yesus hau ri banua i Zakheus, nongua-ngua. “Hm, ledo nabelo i Yesus nesai ri banua ntodosa!”

⁸Naupu haitu neanggamo i Zakheus ri ngayo ntodea bo nanguli ka i Yesus, “Pue, santanga mbara-mbaraku kudekei ka tona napakasi. Isema-sema nibagiuku, kupopanجلي ka ia pata-nggani kadeana.”

⁹Nangulimo i Yesus, “Eo hitu nipakasalamamo komiu sambanua, sabana komiu nomparasaya Alatala, nasimbayu mpo i Abraham totuamiu nggaulu nomparasaya Alatala.

¹⁰Yaku, Ana nu Manusia, nakava ri dunia hitu ala mangelo bo mompakasalama tona nasalandala.”

¹¹Tempo tona da nangepe tesa i Yesus pangane, nitesaNa sangupa porapa ka ira. Apa tempo haitu naparamo Ia ri ngata Yerusalem, bo nisarumaka ntodea masalisa mompamula Poparenta nu Alatala ri dunia, tano dopa.

¹²Jadi i Yesus nompasimbayu karoNa mboto ka ana madika nte porapa hitu: “Naria saito ana madika, patujuna hau ri ngata nakavao ala ralanti nu Magau Mbaso majadi madika. Maupu sia pade manjili tumai moparenta ri ngatana mboto.

¹³Dopame ia hau, nipokiona ntani sapulu batwana bo nidekeikana simbo sampeka doi bulava ka ira. Pade niulikana, ‘Doi hitu rapagolimiu sampe manjili yaku.’

¹⁴Naupu notesa ivehaitu nalaimo ia. Tapi tona ri ngatana mboto navuu matara nte ia. Jadi nitudura topanggeni tesa hau ri ngata nakavao haitu. Nakava sumai

topanggeni tesa haitu nanguli ka Magau Mbaso, ‘Kami ledo madota ana madika hitu majadi madika ri ngata kami.’

¹⁵Tapi naupa topanggeni tesa nanguli ivesia, ana madika pangane kana ralanti majadi madika ri ngatara. Naupu haitu nanjilimo madika hau ri ngatana mboto. Nakava ri banuana, nironдена sapulu batuana anu nidekeikana doi bulava ala rasanina sakuya ana nu doi nikavara.

¹⁶Batua paratama nanguli, ‘Pua, doi bulavamiu sampeka haitu nipagoliku najadi sapulu-mpekana.’

¹⁷Pade nanguli madika ka batuana haitu, ‘Nabelomo! Iko batua nabelo. Iko namala raparasaya ante mbara-mbara sakide. Sabana haitu, iko Kupajadi topomparenta sapulu ngata.’

¹⁸Jadi batua karanduana nakava bo nanguli, ‘Pua, doimu sampeka nipagoliku najadi lima-mpeka.’

¹⁹Pade nanguli madika ka ia, ‘Nabelo! Iko Kuanggataka majadi topomparenta lima ngata.’

²⁰Pade nakavamo batua ntanina nanguli, ‘Pua, siimo doi bulava sampeka nidekeimiu ka yaku. Nibunguku ante kae bo nitabuniakaku.

²¹Naeka yaku nte komiu, sabana nisaniku komiu nasoa. Komiu nangala anu ledo pombolimiu, bo nangala asele ri talua anu ledo potudamiu.’

²²Nesana madika ka batua haitu, ‘Iko tu batua nadaa! Tesamu mboto kupake mombatangara iko. Nisanimu Yaku nasoa, bo Yaku nangala anu ledo pomboliku bo Yaku nangala asele ri talua anu ledo potudaku.

²³Ane ivesia, nakuya ledo nidekeimuka doiku haitu ka tona mompopoana doi ala tempo yaku makava mamala kualu mpanjili doiku ante anana!’

²⁴Pade nanguli madika ka tona ri sia, ‘Alamo doi bulavana sampeka haitu bo dekei ka batua anu naria doi bulava sapulu-mpekana.’

²⁵Tapi tona pangane nanguli ka madika, ‘Pua, nariamoina doi sapulu-mpekana!’

²⁶Nesana madika haitu, ‘Kuuli ka komiu, isema-sema namala raparasaya ante anu nidekei ka ia, kana ratambai ka ia. Tapi isema-sema ledo namala raparasaya, anu naria sakide nte ia ralelakasi lako nte ia.

²⁷Hitupa, keni tumai ri ngayoku bali-baliku anu ledo nadota nantarima yaku majadi madikara. Patesimo ira pura-pura ri ngayoku hitu!’ “

²⁸Naupu i Yesus notesa pura-pura haitu, nokolumo Ia hau nantende ri Yerusalem.

²⁹Napara ngata Betfage bo Betania ri kente nu Bulu Zaitun, nituduNa randua anaguruNa hau mokolu.

³⁰Dopame nalai ira, niulikaNa, “Koi pokolu ri ngata moitu! Makava hamai, rakavamiu sangu ana keledai nitataka. Ana keledai haitu dopa sanggani nipesavi ntona. Volemo keledai haitu bo keni tumai.

³¹Ane maria tona mompekutana, ‘Nakuya nivolekamiu keledai tutu?’ ulika ia, ‘I Pue madota mompakena.’ “

³²Jadi haumo randua anaguruNa haitu bo nikavara mpuu anu niuli i Yesus ka ira.

³³Tempo nivolera ana keledai haitu, nekutanamo tupuna, “Nakuya nivolekamiu keledai tutu?”

³⁴Nesanamo ira, “I Pue madota mompakena.”

³⁵Pade niumbura ana keledai haitu hau nte i Yesus. Nidikara baju ndoera ri bovate nu keledai bo nitulungira i Yesus mesavi. Naupu haitu nipapolaramo polipara.

³⁶Tempo i Yesus noliu ri sia nesavi keledai, todea nombavoke baju ndoera rapolampi dala raoseNa, tandana pombabilara Ia.

³⁷Tempo i Yesus napara ri ngata Yerusalem ri dala notua lako ri Bulu Zaitun, pura-pura todea nantuntuni Ia, nompamula nongare-ngare nantoiya Alatala ante damba rara sabana pura-pura kabaraka nikitara.

³⁸Niulira, “Maoge belo ka Magau anu nakava niposumba nu Alatala! Ratoiyamo Alatala ri suruga! Ri suruga naria katuvu nabelo!” (Mazmur 118:26)

³⁹Naria bara sako-ndua toFarisi ri tatanga ntodea haitu nompongare Ia, “Guru, salaraka anaguruMiu, nee mokanano!”

⁴⁰Tapi nesana i Yesus, “Kuuli ka komiu, ane ledo mokanano ira, natantu watu-watu hitu kana mongare mombatoiya Yaku!”

⁴¹I Yesus naparamo nte ngata Yerusalem, sampe namala nikitaNa bo nitangisiNamo isi ngata haitu.

⁴²NiuliNa, “Pakasi ranga! Mabelo mpuu ane eo hitu rasanimiu, anu manggeni katuvu mabelo ka komiu. Tapi hitupa nitabuniaka ka komiu, domo rasanimiu.

⁴³Apa makava tempona ngena, ngatamiu ravala ntiku nu balimiu. Balimiu mompatiku komiu sampe ledo mamala komiu mesuvu.

⁴⁴Ngatamiu ragerosira ngena, bo komiu pura-pura rapatesira. Ledo maria sangu watu nipakemiu novia ngata hitu rapalambara mosisunju. Haitu pura majadi ngena sabana ledo nipeilimiu tempo hitu Alatala nakavamo mompakasalama komiu.” Naupu i Yesus notesa ivesia, nesuamo Ia riaru ngata Yerusalem.

⁴⁵Naupu sia i Yesus hau nesua ri doyata Banua nu Alatala bo nipopalaiNa topobalu-balu ri sia.

⁴⁶NiulikaNa ira, “Riaru Buku Gasa nitulisi ivei: ‘BanuaKu majadi banua posambaya.’ Ivesia niuli nu Alatala, tapi komiu ri sii nompajadi Banua nu Alatala hitu petabuni ntopeago!”

⁴⁷Eo-eo i Yesus nesua nompaguru ri doyata Banua nu Alatala. Balengga ntopanggeni pesomba ante guru-guru agama bo totua-totua ntoYahudi madota mompatesi Ia.

⁴⁸Tapi ledo nikavara dala mompatesi Ia, sabana pura-pura todea nadamba gagamo nangepe tesaNa.

Lukas 20

¹Naria saeo i Yesus nompaguru bo nompatolele Kareba Belo ka todea ri doyata Banua nu Alatala. Sampesanika nakavamo balengga-balengga ntopanggeni pesomba, guru-guru agama bo totua-totua ntoYahudi

²nanguli ka Ia, “Uli ka kami, ante kuasa isema nipoviaMiu pura-pura hitu ri Banua nu Alatala? Isema nombadekei kuasa haitu ka Komiu?”

³Nanguli i Yesus, “Yaku muni mekutana nte komiu. Uli ka Yaku,

⁴isema nombadekei kuasa ka i Yohanes nombadiu tona? Kuasana haitu lako nte Alatala atau lako nte manusia?”

⁵Jadi pakeni ntoYahudi nosimpekutana, “Berimba kita mesana ka Ia? Ane raulita i Yohanes nombadiu ante kuasa lako nte Alatala, aga rauliNa ka kita, ‘Jadi nakuya ledo niparasayamiu i Yohanes?’

⁶Tapi ane raulita kuasana lako nte manusia, natantu todea mombarempe kita ante watu, sabana ira pura-pura nomparasaya i Yohanes mpuu-mpuu nabi.”

⁷Jadi nesana ira, “Ledo nisani kami lako nte isema kuasana.”

⁸Nanguli i Yesus ka ira, “Ane ivesia, ledo muni Kuuli ka komiu kuasa isema nipakeKu novia pura-pura hitu.”

⁹Naupu haitu i Yesus notesa porapa ka todea ivei: “Naria saito langgai notuda salimpu talua anggur. Taluana haitu nidekeikana ka bara sako-ndua topokarajaa mojanggina, damo mobagi aselena. Pade nalaimo ia hau ri ngata ntanina bo nasae nonturo hamai.

¹⁰Nakava tempona mompupu vua, nitudunamo batuana hau nte topokarajaa talua ala radekeikara sabagia lako ri asele ntaluana. Tapi, topokarajaa talua aga nombaboba batua haitu bo nombatudu ia manjili ante pale nggoo.

¹¹Jadi tupu ntalua haitu nantudu vai saito batua ntanina, tapi batua haitu muni niboba bo nipakaeya ntopokarajaa haitu, pade nitudu nanjili ante pale nggoo muni.

¹²Pade nitudu nu tupu ntalua vai batuana katataluna. Tapi batua haitu muni nibobara sampe nabaka bo nitedakara hau ri savaliku ntalua haitu.

¹³Kaupuna tupu nu talua nanguli, ‘Nuapa kupovia? Aginamo anaku mboto anu nipotoveku kutudu hau nte ira. Natantu rabilara ia.’

¹⁴Tapi tempo topokarajaa talua nanggita ana ntupu talua nakava ri talua, nosiulikamo ira, ‘Tumaimo ana ntupu ntalua. Ia ngena rakaboli mbara-mbara ntuamana. Rapatesitamo ia, ala talua hitu majadi bagiata.’

¹⁵Jadi nikenira ana ntupu ntalua haitu hau ri savaliku ntalua bo nipatesiramo.” Nanguli i Yesus ka topangepe porapa haitu, “Jadi, nuapa rapovia ntupu ntalua ka topokarajaa haitu?

¹⁶Natantu rapatesina pura-pura ira, bo radekeina taluana ka tona ntanina mojangpangina.” Topangepe porapa haitu nanguli ka i Yesus, “Nee mpuu sampe majadi ivehaitu!”

¹⁷I Yesus nompeintaka ira bo nanguli, “Nuapa batuana anu nitulisi riaru Buku Gasa ivei: ‘Vatu nitedaka ntopovia banua, vatu haitumo nopokopa ka banua haitu.’ ” (Mazmur 118:22)

¹⁸I Yesus nombarapaka karoNa mboto ante vatu. NiuliNa, “Isema-sema manavu ri vatu haitu marupusaka bo isema-sema rarumpi nu vatu haitu, maoya mpeje.”

¹⁹Nisani nu guru-guru agama bo balengga-balengga ntopanggeni pesomba, porapa haitu nipambela i Yesus ka ira. Sabana haitu, naoge rarara mombasaka i Yesus tempo haitu muni, tapi naeka ira ka todea.

²⁰Jadi nielora loga mabelo mombasaka Ia. Nitudura bara sako-ndua tona hau mompomata i Yesus. Nitunggaira netingu nangelo tesaNa masala, ala i Yesus mamala rakeni rapangadu ri ngayo gubernur.

²¹Tona nitudura pangane hau nte i Yesus bo nanguli, “Guru, nisani kami pura-pura tesaMiu bo anu nipepatudukikaMiu nakana. Nisani kami muni Komiu ledo nompelenje, Komiu nanao nompatuduki pakalanto dota nu Alatala ka manusia.

²²Jadi, uli ka kami: nantuntuni atura-atura agamata, masipato kita mombabayari balasitee ka Magau Mbaso Kaisar atau ledo?”

- ²³Tapi nisani i Yesus akalara mombaopa tesaNa. Jadi niulikaNa ira,
- ²⁴“Popakita ka Yaku sampeka doi.” Naupu sia nidekei ntona haitu sampeka doi. Nekutanamo i Yesus, “Lenje bo sanga isema ri doi hitu?” Nesana ira, “Magau Mbaso Kaisar.”
- ²⁵Nanguli i Yesus ka ira, “Ane ivesia, dekeimo ka Magau Kaisar anu masipato radekei ka Magau Kaisar, bo dekeimo ka Alatala anu masipato radekei ka Alatala.”
- ²⁶Kaupuna, ledo ria sambelaa tesaNa nasala nikavara ri ngayo ntodea. Nokumaa ira nangepe pesana i Yesus, bo domo nokanano ira.
- ²⁷Naria bara sako-ndua toSaduki nakava nte i Yesus. (ToSaduki haitumo salunu toYahudi anu nanguli tona namate ledo matuvu mpanjili lako ri kamatena ri tempo makava.) Nanguli ira ka i Yesus,
- ²⁸“Guru, Nabi Musa notulisi atura hitu ka kita: ‘Ane maria saito langgai noberei bo namate dopame naria anana, sampesuvuna mboto kana mompoberei timbala haitu ala momuli majadi muli ka bereina namate haitu.’
- ²⁹Naria papitu langgai nosampesuvu. Ana lumbua noberei tapi dopame noana, namatemo ia.
- ³⁰Tueina karanduana nompoberei timbala haitu, tapi dopame noana, namate munimo ia.
- ³¹Ivesia muni najadi nte tueina katataluna sampe tuei kaupuna. Pura-pura namate dopame noana.
- ³²Kaupuna namate munimo mombine.
- ³³Jadi, tempo tomate rapakatuvu mpanjili lako ri kamatena, isema kakanana berei nu mombine haitu? Apa ia nipobereira papitu.”
- ³⁴Nesana i Yesus, “Tona ri dunia hitu noberei.
- ³⁵Tapi ane tona masipato rapakatuvu nu Alatala mpanjili bo manggava bagia ri dunia nabaru, domo moberei.

³⁶Ira masimbayu ante malaeka nu Alatala, domo mamate. Ira majadi ana-ana nu Alatala sabana ira nipakatuvu nu Alatala mpanjilimo.

³⁷Nabi Musa mboto nompakalanto ka kita tomate matuvu mpanjili. Ri tesa santungu gumbu navaya anu ledo nikande nu apu, i Musa nanguli, ‘Alatala Tupu nisomba i Abraham, i Ishak bo i Yakub.’

³⁸Jadi lako ri tesa Nabi Musa, nisanita ira da natuvu. Apa ledo tomate nombasomba Alatala, tapi tona natuvu nombasomba Ia. Apa ri panggita nu Alatala pura-pura tona da natuvu.”

³⁹Naupu i Yesus nanguli ivesia, bara sako-ndua guru agama ri sia nanguli ka Ia, “Guru, nabelo mpuu pesanaMiu.”

⁴⁰Jadi domo nabia ira nekutana hanupa nte i Yesus.

⁴¹I Yesus nompekutana ira, “Berimba sampe niuli ntona Magau Topepakasalama iamo muli Magau Daud?

⁴²Tano i Daud mboto nanguli Ia Puena. Riara Buku Mazmur, i Daud notulisi ivei: ‘Tupu nanguli ka Pueku, “Ponturomo ri sabingga ngganaKu,

⁴³sampe pura-pura baliMu Kupopekou nte Iko.” ’ (Mazmur 110:1)

⁴⁴Jadi ane i Daud mboto nanguli Magau Topepakasalama haitu Puena, berimba sampe rauli Ia muli Magau Daud?”

⁴⁵Tempo todea da nangepe tesaNa, niulikaNamo ana-anaguruNa ivei:

⁴⁶“Pakabelo-belo, nee rapasialamiu pokainggu nu guru-guru agama. Nipokonora nanjayo-njayo nobaju ndoe ala rabila ntona. Nipokonora rapakaoge ntona ri potomu. Ane nesua ri banua petupu, nipokonora nonturo ri ponturo nabelo. Ivesia muni ri posusa. Nipokonora nonturo ri ponturo tobelona.

⁴⁷Nibagiura timbala-timbala ala raalasira banua ntimbala haitu. Bo nitabuniakara pokainggura nadaa ante nosambaya pakandoe. Natantu mantamo mpuu pehuku ka ira ngena!”

Lukas 21

- ¹Tempo i Yesus da ri Banua nu Alatala, nikitaNa tona nakalumana nombasuaraka doira ri peti pomboli doi pedekei.
- ²NipeintaNa muni saito timbala napakasi mpuu nombasuaraka rompeka doi kodi.
- ³Nanggita haitu, nanguli i Yesus, “Pariaramo! Nadeapa pedekei ntimbala napakasi haitu pade pedekei ntona ntanina.
- ⁴Ira nombadekei lako ri labi nu kakalumanara, tapi nau timbala haitu napakasi mpuu, nidekeina pura-pura doi naria nte ia, anu niparaluuna mboto ka katuvuna.”
- ⁵Naria bara sako-ndua notesa ka i Yesus. Nitesara Banua nu Alatala nipakaramba ante watu-watu nagaya mpuu bo mbara-mbara naramba nidekei ntona ka Alatala. Tapi nanguli i Yesus,
- ⁶“Makava tempona ngena pura-pura anu nikitamiu hitu magero. Domo maria sangua watu potembona mosisunju ri bavo watu ntanina, sabana pura-pura watu haitu radurasi.”
- ⁷Ana-anaguru i Yesus nekutana, “Guru, maipia majadi pura-pura anu nitesaMiu tutu? Nuapa tandana ane maparamo tempona?”
- ⁸Nesana i Yesus, “Pakabelo-belo! Nee sampe komiu rabagiu. Madea ngena tona makava mompobalu sangaKu. Raulira iramo ‘Magau Topepakasalama.’ Bo raulira muni, nakavamo kaupu nu dunia! Tapi nee raoseakamiu tesara.
- ⁹Ane raepemiu kareba posieva bo kagado, nee maviora. Haitu pura-pura kana majadi ntani ruru. Tapi dopa haitu mpuu kaupu nu dunia.”
- ¹⁰NipapolaNa tesaNa, “Tona sangata mosieva nte tosangatana bo magau simbo magau mosieva muni.
- ¹¹Ri umba-umba ri dunia maria lingu mbaso bo ara mpai bo dua naronja. Ri langi maria kajadia mepakaeka bo tanda-tanda ledo nasaro nikita.
- ¹²Tapi dopame majadi pura-pura haitu, komiu rasaka ntona bo rapandasara. Komiu ratangara ri banua petupu bo rasuaraka riara ntarunggu. Komiu rakeni

muni ri ngayo nu magau-magau bo gubernur-gubernur sabana komiu nangoseaka Yaku.

¹³Haitumo loga nabelo ka komiu motesa pomparasayamiu Yaku ka ira.

¹⁴Pakaliangu raramiu ala nee makini raramiu mompekirika nuapa raulimiu bara berimba komiu mesana ka ira mombasaliku karomiu.

¹⁵Apa Yaku mboto mombadekei ka komiu tesa-tesa bo noto mpekiri sampe ledo maria saitoa balimiu mompakule mombadagi bara mombabali tesamiu.

¹⁶Tempona haitu nau tina tuamamiu, sampesuvu sararamiu bo roamiu mompobalu komiu ka balimiu. Maria sanu komiu rapatesira.

¹⁷Komiu rapovuu mata ntodea, sabana komiu nangoseaka Yaku.

¹⁸Tapi naupa ivesia, ledo makuya-kuya komiu, nau sambesa buluamiu ledo ria malipo.

¹⁹Ane komiu bate-batena momparasaya bo ledo moura, komiu mpuu-mpuu manggava katuvu mabelo sampe ri kasae-saena.”

²⁰“Ane rakitamiu ngata Yerusalem rapatiku nu tantara balira, rasanimumo domo masae ngata Yerusalem ragerosi.

²¹Tempona haitu tona ri bagia Yudea kana masalisa malai hau ri buluna. Tona ri ngata Yerusalem kana mesuvu lako rangata haitu bo tona ri savaliku ngata nee mesua rangata.

²²Tempo haitu tempo pehuku nu Alatala ala madupa pura-pura anu nitulisi ri Buku Gasa.

²³Napakasi mpuu mombine natiana bo mombine da nompatomi anana tempo haitu apa makaja malai. Ngata haitu mombarasai peparajea ntamo bo Tupu mombahuku todeaNa.

²⁴Sanu ira rapatesi ante guma. Sanu rasaka ratavani nu balira bo rakeni hau ri ngata-ngata ntanina. Bo ngata Yerusalem raparenta ntona ledo toYahudi sampe magana tempona nipakatantu nu Alatala ka ira.”

- ²⁵“Tempo haitu maria tanda-tanda nipokaeka rakitamiu ri mata nu eo, bula, bo ri betue-betue. Pura-pura manusia maeka rarara bo maingu mangepe pogu balumba mbaso ri tasi moruu mpo guru kede.
- ²⁶Tempona haitu tona malipo rarara sabana ekara mompekirika nuapa majadi ri dunia, apa pura-pura anu nakuasa ri langi ragoya.
- ²⁷Maupu haitu, rakitaramo Yaku, Ana nu Manusia, manau riaru kulimu. Bo rakitaramo kuasaKu bo kaogeKu nipokumaaka.
- ²⁸Tempo pura-pura kajadia haitu mompamula majadi, peangga pakaroso bo nee makini raramiu, apa domo masae komiu rapakasalama nu Alatalamo.”
- ²⁹Naupu haitu, i Yesus notesa porapa ka ana guruNa ivei: “Peintamo kayu ara, bo kayu ntanina.
- ³⁰Ane rakitamiu kayu noroyamo, natantu nisanimiu naparamo tempo mapane.
- ³¹Ivesia muni ane rakitamiu pura-pura kajadia niuliku pangane, rasanimiu domo masae Alatala mpuu-mpuu momparenta mpo Magau.
- ³²Pariaramo tesaKu hitu! Dopame mamate pura-pura tona natuvu tempo haitu, pura-pura kajadia nitesaKu pangane majadimo.
- ³³Langi bo tana malipo tapi tesaKu bate-batena sampe ri kasae-saena.”
- ³⁴⁻³⁵“Pakabelo! Komiu kana mainga, apa Yaku, Ana nu Manusia, sampesanika makavamo. Nee sampe Kukava komiu aga mosusa bo manginu sampe malangu, atau masesa rara mompekirika katuvumiu eo-eo sampe komiu ledo masadia. Apa Yaku makava nte pura-pura manusia ri umba-umba ri dunia bo kakavaKu masimbayu mpo tolia.
- ³⁶Komiu kana mainga-inga bo masaro mekakai nte Alatala ala rapakulemiu mombatidamaka pura-pura anu majadi haitu bo ledo maeya matamiu mantingayo Yaku, Ana nu Manusia.”
- ³⁷Eona, i Yesus nompaguru ri Banua nu Alatala bo bongina hau naturu ri Bulu Zaitun.

³⁸Mpadondo-mpadondo todea nakava ri Banua nu Alatala mangepe pepatuduki i Yesus.

Lukas 22

¹⁻²Naparamo eo posusa ntoYahudi niuli Posusa Roti Ledo Noragi. Posusa haitu niuli muni Posusa Paskah. Balengga-balengga ntopanggeni pesomba bo guru-guru agama da nangelo dalapa mompatesi i Yesus nggalino-lino, apa naeka ira ka todea.

³Tempo haitu Magau nu Seta nesua riara ntai i Yudas anu niuli Iskariot, saito lako ri sapulu randua anaguru i Yesus.

⁴Naupu nipesua nu Magau Seta, hau ia nosinggava nte balengga-balengga ntopanggeni pesomba bo pakeni ntopojaga Banua nu Alatala, motesaka berimba rapobaluna i Yesus ka ira.

⁵Nadamba mpuu rarara nangepe anu niuli i Yudas bo ira nojanji mombadekei doi ka ia.

⁶Nadotamo i Yudas. Jadi, hau ia mangelo loga mompobalu i Yesus ka ira tempo ledos ria todea.

⁷Nakavamo eo matana Posusa Roti Ledo Noragi, haitumo tempona mosambale ana bimba rakande ri Posusa Paskah haitu.

⁸I Yesus nombatudu i Petrus bo i Yohanes ivei: “Koi pasadiamiu kandeas Paskah ka kita.”

⁹Nekutanamo ira randua, “Pue, ri umba rapodotaMiu rapompakasadia kandeas haitu?”

¹⁰Nesana i Yesus, “Tempo komiu mesua rangata, raposinggavakamiu saito langgai manjimbuaka gumba nte uve. Tuntunimo ia hau ri banua rapesuana.

¹¹Pade ulika tupu banua ivei: ‘I Guru nanguli ivei: ri umba tombi Kupangande kandeas Paskah mosangani-nggani ante ana-anaguruKu?’

¹²Bo tupu banua haitu mombatuduaka ka komiu sangu tombi mbaso ri kalangana nagana ante parevana. Ri siamo rapompakasadiamiu kande Paskah ka kita.”

¹³Haumo i Petrus bo i Yohanes nesua rangata. Nikavara nasimbayu mpuu mpo anu niuli i Yesus ka ira. Jadi nipakasadiaramo kande Paskah.

¹⁴Nakavamo tempo mangande kande Posusa Paskah haitu, i Yesus nangande singgani-nggani ante anaguruNa ri banua haitu.

¹⁵NiulikaNa ira, “Naoge mpuu raraKu mangande mosinggani-nggani ante komiu ri Posusa Paskah hitu dopame Yaku rapandasa.

¹⁶Kuuli ka komiu, domo Kukande hanupa kande Paskah sampe Alatala mompamenta pura-pura manusia bo anu nirapaka Posusa hitu rapakadupa.”

¹⁷Naupu sia i Yesus nangala saboda uve anggur bo niuliNa tarima kasi nte Alatala. Pade niuliNa ka anaguruNa, “Alamo uve anggur hitu bo inumo, saito-saito.

¹⁸Kuuli ka komiu, nompamula hitu, domo Kuinu hanupa uve anggur sampe majadimo Popamenta nu Alatala.”

¹⁹Naupu sia, niala i Yesus munimo roti. Naupu niuliNa tarima kasi nte Alatala, nitubi-tubiNa roti haitu bo nibagiNa ka ira bo niuliNa, “Roti hitu karoKu Kudekei mombatolosi komiu. Kandemo roti hitu rapombatora Yaku.”

²⁰Ivesia muni naupu nangande, nialana saboda uve anggur bo niuliNa, “Panginu hitu tandana Pojanji nu Alatala nabaru anu rapakaasa nte raaKu matiti ka komiu.

²¹Peintamo! Topompobalu Yaku naria nosinggani-nggani ante Yaku ri sii.

²²Yaku, Ana nu Manusia kana mamate mami nangoseaka anu nipakatantu nu Alatala. Tapi mandasa mpuu tona mompobalu Yaku!”

²³Nangepe haitu, nosimpekutanamo anaguru i Yesus, “Isema lako nte kita hitu mompobalu i Yesus?”

²⁴Pade anaguru i Yesus nosinjanaika isema ira naogepa.

²⁵Nangepe haitu, i Yesus nanguli ka ira, “Ane todea-todea anu ledo nosisani nte Alatala, magaura nabiasa nompatundu todeana bo tomaoge-tomaoge nompokono rauli ntona topesaliku.

²⁶Tapi ledo ivesia nte komiu. Kakanana isema naoge kana majadi masimbayu mpo tona naede, bo pakenimiu kana majadi masimbayu mpo batua.

²⁷Isema naogepa, tona nonturo nangande, atau tona nosondu ka ia? Natantu naogepa toponturo. Tapi Yaku Tupumiu, naria ri tatangamiu najadi toposondu ka komiu. «Jadi ledo masipato komiu masesa mompekirika isema naogepa!»

²⁸Tempo Yaku nombarasai susa bo pari, ledo nipalaisimiu Yaku.

²⁹Jadi, Kudekei kuasa ka komiu moparenta, masimbayu mpo TuamaKu Alatala nombadekei kuasa ka Yaku moparenta todeana.

³⁰Jadi komiu muni madamba mangande bo manginu ante Yaku ri PoparentaKu tempo Yaku majadi Magau. Bo komiu monturo ri sapulu randua gadera magau bo moparenta tona lako ri sapulu randua valaa ntoIsrael.”

³¹Pade nanguli i Yesus ka i Simon Petrus, “Simon, epemo tesaKu! Magau nu Seta nipaloga nu Alatalamo mompesori komiu pura-pura nasimbayu mpo topovaro pae.

³²Tapi niposambayaKukamo iko, Simon, ala pomparasayamu ledo moura. Jadi maupu iko rapesori bo muoseaka mpanjili Yaku, iko kana mompakaroso pomparasaya nu roamu.”

³³Pade nesana i Petrus, “Pue, ledo kupalaisi Komiu! Yaku nasadia ratarunggu mosangganing-ggani nte Komiu!”

³⁴Tapi nesana i Yesus, “Pariaramo, Petrus! Dopame mototoroko manu ngena bobaya, talu-ngganimo iko mombasapu Yaku!”

³⁵Naupu haitu i Yesus nanguli ka anaguruNa pura-pura, “Bara ipia nituduKu komiu hau mompatolele Kareba Belo lako nte Alatala, bo ledo nidekeiKu komiu manggeni doi bara batutu bara sapatu. Berimba tempo haitu, naria anu nakura nte komiu?” Nesana ira, “Kami ledo nakura nuapa-nuapa.”

³⁶Pade nanguli i Yesus, “Nakana tesamiu. Tapi sii-sii isema naria doina bara batutuna kana rakenina. Isema ledo naria gumana kana rapobaluna bajuna raalikana guma.

³⁷Sabana, naria anu nitulisi riara Buku Gasa nanguli, ‘Magau Topepakasalama rareke ntona todaa.’ Anu nitulisi haitu mpuu-mpuu majadi ri karoKu. Apa anu nitulisi ri Buku Gasa anu nombatesa Yaku, nipakadupa sii-sii.”

³⁸Pade nanguli anaguruNa, “Pue, siimo guma romata.” Nesana i Yesus, “Naganamo.”

³⁹Naupu sia, i Yesus nesuvu lako rangata haitu bo hau nantende ri Bulu Zaitun nangoseaka kabiasaNa. Bo ana-anaguruNa muni hau nosinggani-nggani nte Ia.

⁴⁰Nakava sumai, niulikaNamo ira, “Komiu kana mosambaya ala komiu ledo mambela pesori.”

⁴¹Pade haunapa Ia sakide lako nte ira. Kakavaona nitasere samporempetaka watu. Ia nantaputu bo nosambaya:

⁴²“Tata, ane rapodotaMiu, lelakasimo peparajea hitu anu rapambela ka Yaku. Tapi nee dotaKu majadi, tapi dotaMiu majadi.”

⁴³[Pade nakavamo saito malaeka lako ri suruga mompakaroso raraNa.

⁴⁴Nasusa mpuu raraNa, sampe Ia nosambaya mpuu-mpuu bo iniNa eva raa natiti ri tana.]

⁴⁵Naupu nosambaya, neanggamo i Yesus bo nanjili hau nte anaguruNa. NikavaNa namonjo puramo ira, nikeni kabuku nu rarara.

⁴⁶NiuliNa ka ira, “Pembangumo! Nakuya komiu aga namonjo? Pembangumo bo posambayamo ala komiu ledo mambela pesori.”

⁴⁷Da notesa i Yesus ka ira, nakavamo bara sako-pulu tona nikeni i Yudas, anaguru i Yesus. I Yudas nanggaparai i Yesus bo nitabena ante peeki, nangoseaka ada ntoYahudi.

⁴⁸Tapi nanguli i Yesus, “Yudas, ante petabemu tutumo tano iko mompobalu Yaku, Ana nu Manusia ka baliKu.”

⁴⁹Tempo nisani nu anaguruNapa i Yesus rasaka, nangulimo ira, “Pue, ratimbe kami ante guma ira?”

⁵⁰Saito ira netimbe mpuumo bo nambela batua nu Pakeni nTopanggeni Pesomba bo napudu talinga ngganana.

⁵¹Tapi i Yesus nombatagi ira, “Nee metimbel!” Bo nituiNa talinga ntona bo nipakabeloNa.

⁵²Pade niulikaNa balengga-balengga ntopanggeni pesomba, pakeni-pakeni topojaga Banua nu Alatala, bo totua-totua ngata nakava ri sia mombasaka Ia, niuliNa: “Yaku hii ledo topeago sampe komiu kana makava ante guma bo pato mosaka Yaku!

⁵³Eo-eo Yaku naria nosangani ante komiu ri Banua nu Alatala, tapi ledo nisakamiu Yaku. Damo bongina hitu pade nabia komiu nakava mombasaka Yaku. Hitumo logamiu, loga nu Magau Seta!”

⁵⁴Nisakara mpuumo i Yesus bo nikenira hau ri banua nu Pakeni nTopanggeni Pesomba. I Petrus netuntuni nggavao lako ri purina.

⁵⁵Ri doyata naria apu nipadumpu ntona rapanderu. Jadi haumo i Petrus nonturo nte topanderu haitu.

⁵⁶Naria batua mombine nompelepi ia nonturo napara apu haitu nanguli, “Tona haitu muni roa i Yesus!”

⁵⁷Tapi i Petrus nesapu, “Ledo nakana! Ledo nisaniku Ia!”

⁵⁸Dopa nasae naria vai tona ntanina ri sia nanggita i Petrus bo nanguli ka ia, “Iko muni saito roara!” Tapi nanguli i Petrus, “Ledo! Ledo yaku, le!”

⁵⁹Nitasere saja kaliuna, nanguli vai saito, “Ia haitu mpuu-mpuu roa i Yesus, sabana ia muni toGalilea!”

⁶⁰Tapi nesana i Petrus, “Ledo nisaniku nuapa niulimu!” Da notesa i Petrus, eva nisuka nototorokomo manu.

⁶¹Pade neilimo i Yesus nangganoto i Petrus. Jadi nitora i Petrusmo anu niuli i Yesus ka ia pangane ivei: “Dopame mototoroko manu ngena bobaya, talu-ngganimo iko mombasapu Yaku.”

⁶²Pade nesuvumo i Petrus hau ri savalikuna bo notumangi natesumonde-monde.

⁶³Tona nombajaga i Yesus nompongei-ngeika Ia bo nibobara.

⁶⁴Nibonggora mataNa bo nipekutanara, “He, nabi! Boto vei isema nombaboba Iko!”

⁶⁵Nadea muni tesa-tesara nadaa nompongeika Ia.

⁶⁶Naeo mpadondo nasiromumo tona ri Polibu Mbaso Agama Yahudi, haitumo totua-totua ntoYahudi, balengga-balengga ntopanggeni pesomba, bo guru-guru agama. Pade nikenira i Yesus hau ri ngayo ntoPolibu haitu.

⁶⁷Niulikara i Yesus, “Ane iko mpuu-mpuu Magau Topepakasalama, ulimo ka kami!” Nesana i Yesus, “Nau damo Kupesanaka, ledo raparasayamiu tesaKu,

⁶⁸bo ane Kupekutana komiu, tantu ledo rapesanakamiu.

⁶⁹Aga hitu Kuuli ka komiu: nompamula sii-sii Yaku, Ana nu Manusia monturo ri sabingga nggana nu Alatala anu Neliu KakuasaNa.”

⁷⁰Pade nekutana vai ira pura-pura, “Jadi, Ikomo hii tano Ana nu Alatala?” Nesana i Yesus, “Nakana niulimiu, Yakumo hii Ana nu Alatala.”

⁷¹Pade nosiulikamo ira, “Domo paraluu raelota sabi ntanina, apa niepeta salaNa lako ri tesaNa mboto!”

Lukas 23

¹Jadi neangga puramo toPolibu Mbaso haitu hau manggeni i Yesus ri ngayo Gubernur Pilatus.

²Ri sia ira nombarai Ia. Niulikara i Pilatus, “Tona hitu nikava kami nompatuduki tona mangeva pomarenta. NitagiNa tona mombayari balasitee ka Magau Mbaso Kaisar, bo niuliNa Iamo i Kristus, saito Magau.”

- ³Nekutanamo Gubernur Pilatus, “Nakana mpuu Iko Magau ntoYahudi?” Nesana i Yesus, “Nakana niulimiu.”
- ⁴Gubernur Pilatus nangulika balengga-balengga ntopanggeni pesomba bo todea haitu, “Niparesakumo tona hitu, ledo ntoto naria salaNa nikavaku!”
- ⁵Tapi aga nantambaipa pebarusura bo nanguli, “PepatudukiNa nompakapane rara ntodea ri njumangu ngata ri bagia Yudea hitu. Ia nompamula nompatuduki ri bagia Galilea, sampe nakava ri sii munimo.”
- ⁶Nangepe haitu, nekutanamo Gubernur Pilatus, “ToGalilea Ia hii?” Nesana tona, “Iyo, toGalilea Ia.”
- ⁷Nisaninapa i Yesus toGalilea, nitudunamo tona manggeni i Yesus hau ri ngayo Magau Herodes, apa Magau Herodes noparenta ri Galilea. Bo tempo haitu, Magau Herodes naria muni ri ngata Yerusalem.
- ⁸Nadamba mpuu rara Magau Herodes nanggita i Yesus, apa nasaemo pangepena kareba i Yesus bo naoge rarana manggitaNa. Nisarumakana muni bara mamala rakitana kabaraka rapovia i Yesus.
- ⁹Haitumo sampe nadea pompekutanana nte i Yesus, tapi i Yesus ledo nesana.
- ¹⁰Balengga-balengga ntopanggeni pesomba bo guru-guru agama neangga ri sia muni bo nanggarasese nombarai i Yesus.
- ¹¹Jadi Magau Herodes ante tantarana nanjalai Ia bo nipongei-ngeikara. Nipopasuakara baju magau ka i Yesus, pade nikenira mpanjili ka Gubernur Pilatus.
- ¹²Magau Herodes ante Gubernur Pilatus bara ipia nosipobali. Tapi nompamula eo haitu, nosimpovegamo ira.
- ¹³Gubernur Pilatus nompasiromu balengga-balengga ntopanggeni pesomba, totua ngata, bo todea ntanina,
- ¹⁴pade niulikana ira pura-pura, “Tona hitu nikenimiu ka yaku bo niulimiu Ia nompakeni tona nangeva pomarenta. Niparesakumo Ia ri ngayomiu pura-pura, tapi ledo ntoto nikavaku anu niraimiu ka Ia.

- ¹⁵Ivesia muni panggava Magau Herodes, apa nipopanjinina tumai ka yaku. Tona hitu ledo novia nuapa-nuapa masipato rahuku mate ka Ia.
- ¹⁶Sabana haitu, kutudu tantaraku mombaboba bo mombakabasaka Ia.”
- ¹⁷[I Pilatus nanguli ivesia apa nantuntuni kabiasara, tempo Posusa Paskah, ia kana mombakabasaka ka ira saito tona nitarunggu.]
- ¹⁸Tapi pura-pura tona ri sia nongare-ngare, “Patesimo Ia! Kabasakamo i Barabas ka kami!”
- ¹⁹(I Barabas haitu nitarunggu sabana ia nangeva pomarenta ri ngata Yerusalem, bo ia topepatesi.)
- ²⁰I Pilatus madota mombakabasaka i Yesus, jadi niulina vai sangganipa ri ngayo ntodea.
- ²¹Tapi nongare vaimo ira, “Pakumo Ia ri kayu salib! Pakumo Ia ri kayu salib!”
- ²²Katalu-ngganina i Pilatus notesa ri ngayora, “Tapi nuapa salaNa? Ledo ria sangua salaNa nikavaku sampe masipato Ia rapatesi.”
- ²³Tapi ira aga nantambaipa kamanggana pongarera, “I Yesus kana rapaku ri kayu salib!” Kaupuna, padagimo ira, apa ira ledo naupu-upu nongare.
- ²⁴Jadi kaupuna i Pilatus nombabotusi bo nompoiyo perapi ntodea,
- ²⁵bo nikabasakana ka ira tona niperapira, haitumo i Barabas, anu nitarunggu sabana nangeva pomarenta bo nepatesi. Bo i Yesus nidekeina ka tantara Roma mompatesi nangoseaka dota nu pakeni ntoYahudi.
- ²⁶Naupu haitu nikenira i Yesus hau rapatesira. Ri tatanga dala, nipotomuramo saito toKirene nosanga i Simon. Ia dako nakava ri kota Yerusalem. Nipopetaara ia bo nibarusura manjimbuaka kayu salib i Yesus ri puriNa.
- ²⁷Nadea ntoto tona nantuntuni i Yesus. Naria muni bara sako-ndua mombine netuntuni. Mombine gahaitu notumangi, nantangisi Ia.
- ²⁸I Yesus neili nompeinta ira bo nanguli, “Mombine toYerusalem! Nee ratangisimiu Yaku. Aginamo tangisi karomiu mboto bo anamiu,

²⁹apa makava tempona ngena rauli ntona, ‘Nabelo mpuu mombine nagampa anu ledo sanggania noana bo ledo sanggania nompatomi ngana!’

³⁰Tempo haitu rauli ntona ka bulu, ‘Rumpimo kami!’ bo raulira ka buntina, ‘ivumo kami!’ Mandasa mpuu komiu ngena!

³¹Sabana, ane rapoviara ivesia sii-sii nte kayu mata evamo Yaku tonoa, berimba muni rapoviara ngena nte kayu ngau evamo komiu totenggo? Tantu mandasa ntotopa komiu ngena!”

³²Tempo haitu nikenira muni randua tona rapatesi sanggani nte i Yesus. Tona randua haitu nadaa mami.

³³Tempo nakava ri buntina nosanga Banga Balengga, nipakuramo i Yesus ri kayu salib. Bo tona nadaa randua haitu nipakura munimo ri kayu salib ntanina, saito ri sabingga nggana i Yesus, bo saito ri sabingga njidiNa.

³⁴Naupu haitu i Yesus nosambaya, “Tata, ampungimo ira. Ledo nisanira nuapa nipoviara.” Tantara anu nombapaku i Yesus, notende lamoro ala rasanira isema rakamalakana pakea i Yesus.

³⁵Nadea tona neangga ri sia nantarana. Naria muni pakeni-pakeni ntoYahudi nompongeika i Yesus. Niulira, “Hm! Tona ntanina nipakasalama. Ane mpuu-mpuu Ia Magau Topepakasalama nipelisi nu Alatala, dekeikamo Ia mompakasalama karoNa mboto!”

³⁶Tantara muni nompongeika Ia. Ira nanggaparai i Yesus bo nombaduduaka uve anggur napoi ka Ia.

³⁷Niulira, “Ane Iko mpuu-mpuu Magau ntoYahudi, pakasalama mbotomo karoMu!”

³⁸Ri kayu salib ri bavo balengga i Yesus nitulisi ivei: HITUMO MAGAU NTOYAHUDI.

³⁹Saito tona nadaa anu nipaku ri kayu salib ri sinjori i Yesus, nombadee Ia, “Heh, le! NiuliMu Iko Magau Topepakasalama. Ane makana, le, pakasalamamo karoMu bo pakasalama muni kami!”

- ⁴⁰Tapi tona nadaa ntanina haitu nombatagi roana. Niulina, “Nee ivesia! Ledo naeka iko nte Alatala? Kita pura-pura nosangani-nggani nihuku mate.
- ⁴¹Bo kita randua hii masipato rahuku nasinjuru ante pokaingguta nadaa. Tapi tona hitu ledo ntoto nasala!”
- ⁴²Niulina ka i Yesus, “Yesus, tora muni yaku tempo Komiu makava majadi Magau.”
- ⁴³Nanguli i Yesus ka ia, “Pariaramo tesaKu hitu. Eo hitu muni iko mosangani-nggani ante Yaku ri Firdaus.”
- ⁴⁴Nitasere tinti sapulu randua tanga eo, domo nevangga mata nu eo. Pura-pura ngata haitu najadi nalanda sampe tinti tatalu nggoviana.
- ⁴⁵Pade kae povombo ri Banua nu Alatala nabite najadi rombite.
- ⁴⁶Naupu haitu i Yesus nongare ante suara namangga, “Tata, siimo nyawaKu!” Naupu nanguli ivesia, naponjimo nosaNa.
- ⁴⁷Tempo balengga nu tantara nanggita anu najadi, nitoiyanamo Alatala. Niulina, “Nakana mpuu tona hitu ledo ria salaNa.”
- ⁴⁸Todea anu nakava nantara pura-pura kajadia haitu nikitara i Yesus namatemo. Jadi nanjilimo ira nosapa-sapa bambarara apa nanjoso rarara.
- ⁴⁹Pura-pura roa i Yesus bo mombine anu nosangani nte Ia lako ri bagia Galilea, neangga nggavao nompeintaka pura-pura anu najadi haitu.
- ⁵⁰⁻⁵¹Naria langgai nosanga i Yusuf, lako ri ngata Arimatea ri bagia Yudea. Ia tona nabelo bo pokaingguna nanao. Ia nantongoraka tempona Alatala moparenta mpo Magau. Ia saito lako ri Polibu Mbaso Agama Yahudi tapi ledo nasituju ia ante potangara bo poviara nompatesi i Yesus.
- ⁵²I Yusuf hau nte i Pilatus nerapi karobata i Yesus radekei ka ia ratanana.
- ⁵³Nitaurakana karobata i Yesus lako ri kayu salib, pade nisompuna ante kae gandisi nabelo. Naupu haitu nibolina karobata i Yesus riara dayo, ri watu nipaa. Dayo haitu da nabaru dopa ria sanggani nipodayo.

⁵⁴Haitu najadi nggoviana ri eo pompakasadia ka eo penonto. Nangoseaka kabiasa ntoYahudi, nompamula kasolo nu eo, ira nitagi nokarajaa sabana nompamulamo eo penonto.

⁵⁵Mombine nomporea i Yesus lako ri bagia Galilea, hau nantuntuni i Yusuf manggita dayo. Nikitara muni berimba karobata i Yesus niboli riara dayo.

⁵⁶Naupu haitu nanjilimo ira hau rangata, pade nipakasadiara rampa-rampa bo lana dupa radika ri karobata i Yesus. Eo sunjuna haitu eo penontomo, jadi nenontomo ira nokarajaa, nantuntuni atura agama ntoYahudi.

Lukas 24

¹Eo Aka sanggaeo mpisina, mombine gahaitu hau ri dayomo nanggeni rampa-rampa nipakasadiara ka karobata i Yesus.

²Nakava ri dayo, nikitara nateduliakamo vatu nipotutui dayo haitu.

³Jadi nesuamo ira riara dayo, tapi domo naria karobata i Yesus ri sia.

⁴Tempo ira neangga ri sia bo da naingu rarara nompekirika kajadia haitu, sampesanika neongamo randua malaeka nu Alatala nopakea nenggila neangga ri sinjorira.

⁵Naeka mpuu rara mombine gahaitu sampe ira notungga narapa ri tana. Nangulimo randua malaeka haitu ka ira, “Nakuya komiu nangelo tona natuvu ri ponturo ntona namate?

⁶Domo naria Ia ri sii. Natuvu mpanjilimo Ia! Toramo anu nitesaNa ka komiu tempo Ia da naria ri bagia Galilea.

⁷NiuliNa, ‘Yaku, Ana nu Manusia, kana radekei ka tona nadosa, bo mamate rapaku ri kayu salib, tapi ri eo katataluna Yaku matuvu mpanjili.’ “

⁸Nangepe anu niuli nu malaeka haitu, nitoraramo tesa i Yesus bara ipia.

⁹Jadi nanjilimo ira lako ri dayo haitu, bo nitesara pura-pura anu najadi pangane ka anaguruNa sapulu saito bo ka pura-pura topangoseaka Ia ntanina.

¹⁰Mombine pangane iamo: i Maria Magdalena, i Yohana, i Maria tina Yakobus, ante mombine-mombine ntanina. Nitesara pura-pura anu najadi pangane ka anaguruNa,

¹¹tapi ana-anaguru gahaitu ledo niparasayara anu nitesa nu mombine gahaitu, apa nisarumakara aga tesa nikarara mboto.

¹²Tapi i Petrus neangga bo nangova hau ri dayo haitu. Ia notungga, nompeinta riarana. Nikitana damo kae sompuna bayangi ri sia. Domo naria karobata i Yesus. Nanggita haitu nanjilimo i Petrus, nokumaa nompekirika anu najadi.

¹³Eona haitu muni, randua topangoseaka i Yesus nolipa hau ri ngata Emaus, nitasere sapulu sakilo kakavaona lako ri ngata Yerusalem.

¹⁴Ira notesa nggalako dala, nombatesa anu najadi ante i Yesus.

¹⁵Da notesa-tesa nosinjula pekiri ira, sampesanika neongamo i Yesus bo nolipa nosangani-nggani nte ira.

¹⁶Nikitara i Yesus, tapi ledo nisanira Ia apa naria anu nompakabali matara.

¹⁷Nanguli i Yesus ka ira, “Nuapa nitesamiu pangane?” Netaamo ira randua haitu ante buku rara.

¹⁸Nesanamo saito anu nosanga i Kleopas, “Lako ri pura-pura tona ri ngata Yerusalem bara aga Komiu saitoMiu ledo nangisani anu najadi bara sako-mbongi naliu!”

¹⁹Nekutana i Yesus, “Nuapa najadi?” Nesana ira, “Anu najadi nte i Yesus, toNazaret! Ia nabi nu Alatala. TesaNa bo poviaNa nakuasa mpuu ri panggita nu Alatala, bo muni ri panggita ntodea.

²⁰Tapi balengga-balengga ntopanggeni pesomba bo totua-totua nu ngatata nombadekei Ia ka pomarenta ala rahuku mate, bo nipakura Ia ri kayu salib.

²¹Kami nanjarumaka Iamo mombakabasaka kita toIsrael lako ri balita. Bongi hitu katalu-mbonginamo Ia namate.

²²Tapi bara sako-ndua mombine roa kami nompakatekaja kami, apa bobayana pangane ira hau ri dayo i Yesus,

²³tapi ledo nikavara karo batana ri sia. Ira nanjili nanguli ka kami nikitara malaeka lako nte Alatala bo malaeka haitu nanguli ka ira, i Yesus natuvu mpanjilimo.

²⁴Naupu haitu, bara sako-ndua roa kami hau ri dayo bo nikavara anu nitesa nu mombine pangane ivesia mpuu, tapi ledo nikitara i Yesus.”

²⁵Nangepe haitu, i Yesus nanguli ka ira, “Nadoyo mpuu komiu! Nakumba mpuu pekirimiu momparasaya anu nitesa nu nabi-nabi nggaulu!

²⁶Magau Topepakasalama mombarasai peparajea ntani ruru dopame rapakaoge.”

²⁷I Yesus nombatesa ka ira pura-pura anu nitulisi ri Buku Gasa, anu nombaboto karoNa mboto, nompamula lako ri buku-buku nitulisi Nabi Musa sampe ri buku-buku nabi ntanina.

²⁸Nakava ri ngata Emaus, i Yesus madota mompapola polipana.

²⁹Tapi ira nompopetaa Ia. “Mesai ri sii ante kamimo ruru, apa nanggoviamo, masolomo eo.” Jadi i Yesus nesua nosanggani ante ira hau rabanua.

³⁰Tempo Ia nonturo nangande sanggani ante ira, nialana roti pade niuliNa tarima kasi ka Alatala. Naupu haitu nitubiNa roti haitu bo nibagiNamo ka ira.

³¹Damo rahaitu pade nanoto rarara bo nisanira, Iamo i Yesus. Naupu haitu, napaya ri belaNamo, domo ria nikitara i Yesus.

³²Pade nosiulikamo ira, “Siamo sampe nasana rarata tempo Ia notesa ka kita ri dala pangane bo nombatentei isi Buku Gasa ka kita!”

³³Jadi jaa haitu munimo ira nanjili hau ri ngata Yerusalem. Hamai nikavara anaguru i Yesus sapulu saitopa nasiromu ante tona ntanina.

³⁴Tona nasiromu haitu nanguli ka ira randua, “I Yesus mpuu-mpuu natuvu mpanjilimo! Ia neonga nte i Simon Petrus!”

³⁵Nangepe haitu, randua topangoseaka i Yesus anu dako neonga haitu, nombajaritai anu najadi nte ira ri dala hau ri ngata Emaus, bo berimba nisanira i Yesus tempo Ia notubi roti.

³⁶Da notesa-tesa ira haitu, sampesanika i Yesus neangga ri tatangara, bo nanguli, “Kuperapi Alatala mompakatinonto raramiu!”

³⁷Tapi natekaja ira bo naeka mpuu rarara. Nisarumakara bara mboa.

³⁸Jadi i Yesus nanguli ka ira, “Nakuya komiu naeka bo nonggai raramiu?”

³⁹Peintamo paleKu bo peinta muni kadaKu. Yaku mpuumo hii! Tuimo ala rasanimiu Yaku ledo mboa. Apa mboa ledo ria isina bo bukuna. Tapi Yaku hii, naria isiKu bo bukuKu.”

⁴⁰Naupu sia, nipopakitaNa ka ira valea nu paku ri paleNa bo ri kadaNa.

⁴¹Nadamba mpuu rarara tapi nokumaa muni. Da nonggai rarara. Jadi i Yesus nanguli vai ka ira, “Naria anu rakande ri sii?”

⁴²Jadi nidekeikaramo sanggoto bau ntasi nitunu.

⁴³I Yesus nangala bau haitu bo nikandeNa ri ngayora ala rasanira Ia ledo mpuu mboa.

⁴⁴Naupu haitu, niuliNamo ka ira, “Hitumo niuliKu ka komiu bara ipia tempo Yaku da naria nosangani ante komiu. Pura-pura anu niboto nu nabi-nabi nggaulu nantesaki Yaku, kana rapakadupa. Haitumo, anu nitulisi ri Buku Atura Agama nitulisi Nabi Musa, Buku Nabi-nabi ntanina, bo Buku Mazmur.”

⁴⁵NipakanotoNa pekirira ala rapakulera mombapaha isi Buku Gasa.

⁴⁶NiuliNa ka ira, “Riara Buku Gasa nitulisi, Magau Topepakasalama kana rapandasa bo rapatesi bo eo katataluna matuvu mpanjili lako ri kamateNa.

⁴⁷Kareba Belo kana rapatolele ka pura-pura manusia; ala ira majea lako ri dosara bo Alatala mombaampungira ira sabana anu nipovia nu Magau Topepakasalama. Kareba haitu kana rapatolele mompamula lako ri ngata Yerusalem hitu sampe ri njumangu dunia.

⁴⁸Komiumo sabina pura-pura anu najadi nte Yaku.

⁴⁹Pariaramo! Kupopanau ka komiu Nosa Gasa anu nijanji nTuamaKu Alatala. Jadi popeamiu ri sii ri ngata Yerusalem sampe kuasa nu Alatala manau nte komiu.”

⁵⁰Naupu haitu, i Yesus nanggeni ana-anaguruNa hau ri savaliku ngata Yerusalem napara ngata Betania. Ri sia nilaerakaNa paleNa bo nerapi Alatala mombadekei belo ka ira pura-pura.

⁵¹Da nosambaya, nolanggamo i Yesus lako ri ngayora, bo neore hau ri suruga.

⁵²Nantaputumo anaguruNa mombasomba Ia. Naupu sia nanjilimo ira hau ri ngata Yerusalem ante rara nadamba ntoto.

⁵³Ira naria njuu ri Banua nu Alatala nombatoiya Alatala.

Yohanes

Yohanes 1

- ¹Ri lamba pamulana naria mamimo Tesa nu Alatala. Tesa haitu nosangani-nggani ante Alatala, bo Ia nasimbayu nte Alatala.
- ²Lako ri lamba pamulana Tesa nu Alatala nosangani-nggani ante Alatala.
- ³Iamo nipopale nu Alatala nompajadi pura-pura anu naria. Nau sangaya ledoria rapajadi ane ledo Ia.
- ⁴Iamo puna katuvua nabelo, bo katuvua nabelo nompakareme pekiri nu manusia.
- ⁵Reme haitu nevanta ri kalandana ri dunia hitu. Bo kalanda haitu ledo ntoto nompakule nompepayana.
- ⁶Naria saito tona nosanga i Yohanes. Ia nakava nisuro nu Alatala.
- ⁷I Yohanes nakava nosabi nompopaisani reme haitu, ala pura-pura manusia mamala momparasaya.
- ⁸Ia mboto ledo reme haitu, ia aga notesa nompopaisani reme haitu.
- ⁹Reme haitu reme nakana anu nakava ri dunia nompakareme pura-pura manusia.
- ¹⁰Tesa nu Alatala naria mamimo ri dunia, tapi nau Ia nipopale nu Alatala nompajadi dunia, manusia ri dunia ledo nadota nangisaniNa.
- ¹¹Ia nakava ri ngataNa mboto, tapi tona ri ngataNa haitu ledo nadota nantarima Ia.
- ¹²Tapi isema-sema nantarima Ia bo nomparasaya Ia, nidekeikaNa kuasa majadi ana-ana nu Alatala.
- ¹³Ira najadi ana-ana nu Alatala ledo sabana nipoanaka ntotuaru, atau lako ri dota manusia bara dota ntumara. Tapi sabana Alatala mboto nompajadi ira anaNa.

¹⁴Ia anu niuli Tesa nu Alatala haitu najadi manusia bo nonturo ri tatangata ri dunia hitu. Bo nikitata kuasaNa bo kaogeNa, haitumo kuasa bo kaoge nitarimaNa lako nte TuamaNa apa Ia AnaNa saito-itoNa. Iamo sampe nisanita mpuu Alatala bo toveNa ka kita.

¹⁵I Yohanes nompopaisani ka todea isema niuli Tesa nu Alatala haitu. Nongaremo ia, “Hitumo Ia anu niuliku bara ipia. Niuliku kana maria tona makava ri puriku anu naogepa pade yaku. Ia naogepa pade yaku sabana lako ri lamba pamulana dopame yaku nipoanaka naria mamimo Ia.”

¹⁶Naoge mpuu tove i Yesus Kristus ka kita sampe ledo ria kaupu-upuna belo nidekeiNa ka kita.

¹⁷Lako nte Nabi Musa nitarimata Atura-atura agama. Tapi lako nte i Yesus Kristus sampe mpuu-mpuu nisanita Alatala bo toveNa ka kita.

¹⁸Dopa naria saitoa tona nanggita Alatala. Tapi AnaNa saito-itona anu nasimbayu nte Alatala bo narapa nte Ia, Iamo nompopaisani Alatala ka kita.

¹⁹Pakeni-pakeni ntoYahudi ri ngata Yerusalem nantudu bara sako-ndua topanggeni pesomba bo toLewi hau nte i Yohanes Topediu mompekutana ia ivei: “Isema kakanana komiu tutu?”

²⁰Nangepe haitu, ledo nitabuniaka i Yohanes nuapa-nuapa tapi nitovontoona, “Yaku hii ledo Magau Topepakasalama anu nijanji nu Alatala.”

²¹Bo nipekutanara vai ia, “Ane ivesia, isema tano komiu? Bara komiumo tu Nabi Elia?” Nesana i Yohanes, “Ledo.” Bo nekutana vaimo ira, “Bara komiumo tu nabi anu nijanji nu Alatala makava bara maipia?” Nesana i Yohanes, “Ledo muni.”

²²Bo nanguli vaimo ira, “Ane ivesia, uli ka kami isema kakanana komiu ala mamala ratesa kami ka tona nantudu kami tumai. Kakanana isema komiu?”

²³Nesana i Yohanes, “Yakumo hii tona nitesa Nabi Yesaya nggaulu ivei: ‘Naria saito tona nongare-ngare ri karava bai: pakasadia dala ka Tupu!’ ” (Yesaya 40:3)

²⁴Ira bara sako-ndua haitu anu nitudu ntoFarisi.

²⁵Ira muni nompekutana ia, “Ane komiu ledo Magau Topepakasalama, ledo Nabi Elia, bo ledo muni nabi nijanji nu Alatala makava, nakuya tano komiu nombadiu tona? Ante kuasa isema?”

²⁶Nesana i Yohanes, “Yaku nombadiu tona ante uve tandana ira najea lako ri dosara. Tapi ri tatangamiu naria saito tona dopa nisanimiu.

²⁷Ia haitu makava maliu yaku. Tapi Ia naogepa pade yaku sampe nau mombavole lui sapatuNa, ledo masipato yaku.”

²⁸Pura-pura haitu najadi ri ngata Betania ri sambote Binangga Yordan ri ponturo i Yohanes nombadiu tona.

²⁹Eo kamailena i Yohanes nanggita i Yesus nakava tumai nanggaparai ia, bo niulina ka tona hamai, “Peintamo! Tumaimo Ana Bimba nipakasadia nu Alatala anu mompakalali dosa manusia!

³⁰Iamo nitesaku bara ipia tempo niuliku ka komiu kana makava saito tona ri puriku anu naogepa pade yaku, sabana dopame yaku nipoanaka, naria mamimo Ia lako ri lamba pamulana.

³¹Yaku mboto bara ipia dopa nisaniku Ia haitu Magau Topepakasalama. Tapi patuju kakavaku nombadiu tona ante uve, ala Ia rapopaisani ka toIsrael.”

³²Bo naria muni tesa i Yohanes ntanina ivei: “Nikitaku Nosa Gasa nu Alatala nanau lako ri langi nolenje mpo tonji banggebodo netuu ri karoNa.

³³Tempo haitu, dopa nisaniku Ia Magau Topepakasalama. Tapi Alatala anu nantudu Yaku nombadiu tona ante uve, Iamo nanguli ka yaku bara ipia ivei: ‘Ane nukita Nosa GasaKu manau metuu ri tona saito, Ia haitumo nombadiu tona ante Nosa GasaKu.’ “

³⁴Bo i Yohanes nompapola tesana, “Yaku mboto nanggita kajadia haitu bo nombasabiki: Iamo mai Ana nu Alatala!”

³⁵Eo kamailena naria vaimo i Yohanes nosanggani-nggani ante randua topangoseaka ia.

³⁶Tempo nikitara i Yesus noliu ri sia, nangulimo i Yohanes, “Peintamo! Haitumo Ana Bimba nu Alatala!”

³⁷Tempo randua topangoseaka i Yohanes haitu nangepe tesana, hau nioseakaramo i Yesus.

³⁸I Yesus neili ntaliku nanggita ira nangoseaka Ia. Bo nipekutanaNa, “Nuapa nielomiu?” Nesanamo ira randua, “Rabi, ri umba ponturoMiu?” (Batuana Rabi, Guru.)

³⁹Nesana i Yesus, “Kaimo ala rasanimiu.” Tempo haitu nitasere tinti ampa nggoviana. Jadi hau mpuumo ira randua nanggita ponturo i Yesus. Bo ira nosangani ante Ia eo haitu.

⁴⁰I Andreas saito lako ri ira randua anu nangepe tesa i Yohanes pangane, hau nioseakanamo i Yesus. I Andreas nosampesuvu nte i Simon Petrus.

⁴¹Naliu i Andreas nosinggava nte i Yesus, haumo ia nasalisa nangelo sampesuvuna i Simon bo nanguli, “Kami nosinggava nte Mesias!” (Batuana “Magau Topepakasalama anu nijanji nu Alatala”. Riara basa Yunani “Kristus”.)

⁴²Bo nikeninamo i Simon hau nte i Yesus. Tempo ira nakava hamai, nikita i Yesusmo i Simon bo niuliNa, “Iko Simon ana i Yohanes. Tapi nompamula sii-sii sangamu i Kefas.” (Kefas nasimbayu batuana ante Petrus, batuana, “vatu”.)

⁴³Eo kmailena i Yesus nonia hau ri bagia Galilea. Ia nompotomu i Filipus, bo niulikaNa, “Kaimo, oseakamo Yaku.”

⁴⁴I Filipus haitu tona lako ri ngata Betsaida, haitumo ngata ponturo i Andreas bo i Petrus.

⁴⁵Bo hau i Filipus nosinggava nte i Natanael bo niulikana, “Kami nosinggava nte tona nitesa Nabi Musa riara Buku Atura Agama bo nitesa ri Buku Nabi-nabi ntanina, haitumo i Yesus lako ri ngata Nazaret, ana i Yusuf.”

⁴⁶Tapi nesanamo i Natanael, “Ah! Ledo nisarumakaku anu nabelo meumba lako ri ngata Nazaret!” Nanguli Filipus ka ia, “Kaimo. Peinta mbotomo!” Bo hau mpuumo i Natanael.

⁴⁷Tempo i Yesus nanggita i Natanael nakava nte Ia, niulikaNa, “Peintamo! Hitumo saito toIsrael mpuu! Ledo ntoto naria katenggona.”

⁴⁸Nangepe tesa haitu nanguli i Natanael ka i Yesus, “Berimba sampe nisaniMiu yaku?” Nesanamo i Yesus, “Dopame i Filipus hau nompokio iko, nikitaKumo iko hamai ri puna kayu ara.”

⁴⁹Nangepe tesa haitu nangulimo i Natanael, “Guru, Komiumo Ana nu Alatala! Komiu mpuu-mpuu magau ntoIsrael!”

⁵⁰Nanguli i Yesus ka ia, “Iko nomparasaya sabana niuliKu nikitaKu iko hamai ri puna kayu ara. Tapi kana mukita kajadia nabarakapa pade kajadia hitu.”

⁵¹Bo niuli i Yesus ka pura-pura ira, “Pariaramo tesaKu hitu, rakitamiu langi matebuka bo malaeka-malaeka nu Alatala manau mompene ri ngayoKu, Ana nu Manusia.”

Yohanes 2

¹Rombongi kaliuna kajadia haitu, naria posusa ponika ri ngata Kana ri bagia Galilea. Tina Yesus naria hamai.

²I Yesus bo anaguruNa muni nigaga hau ri posusa haitu.

³Da ranja mposusa, naotimo uve anggur. Jadi nanguli tina Yesus ka Ia, “Domo ria uve anggurra. Naoti puramo.”

⁴Nanguli i Yesus ka tinaNa, “Ina, nakuya niulimiu ka Yaku? Dopa nakava tempona Yaku mompopakita kuasaKu.”

⁵Bo nangulimo tinaNa ka topokarajaa ri posusa haitu, “Poviamo nuapa-nuapa ratuduNa ka komiu ngena.”

⁶Ri sia naria aono gumba mbaso nipovia lako ri vatu nipasadia rapomboli uve rapotoposi kada bo pale nangoseaka ada-ada ntoYahudi. Sangu gumba haitu, isina saatu lite uve.

⁷Nanguli i Yesus ka topokarajaa ri posusa haitu, “Isimo gumba-gumba haitu ante uve.” Jadi niisira mpuumo sampe naponu.

⁸Naupu haitu nanguli i Yesus, “Sibumo sakide uve haitu, bo kenimo ka tupu mposusa.” Jadi nikeniramo uve haitu ka tupu mposusa.

⁹Tupu mposusa haitu nompetami sakide uve nikenira. Domo aga uve nggoo, najadi uve anggurmo. Ledo nisanina lako ri umba uve anggur haitu. Aga tona nombasibu uve pangane nangisani. Naupu tupu mposusa nompetami uve anggur haitu, nipokiona boti langgai

¹⁰bo niulikana, “Biasana tona nompatala uve anggur tobelona ntani ruru, bo ane torata nabasamo nanginu pade nipatala ka ira uve anggur biasa. Tapi komiu, nibolimi uve anggur tobelona sampe sii-sii!”

¹¹Haitumo kabaraka pamulana nipovia i Yesus tempo Ia ri ngata Kana ri bagia Galilea. Ia nompopakita kuasaNa ante kabaraka haitu bo ana-anaguruNa nomparasaya Ia.

¹²Naupu posusa haitu i Yesus hau ri ngata Kapernaum nosanggani-nggani ante tinaNa bo sampesuvu-sampesuvuNa bo ana-anaguruNa. Bo ira nonturo hamai bara sako-mbongi kasaena.

¹³Naparapa Eo Mbaso Paskah ntoYahudi, haumo i Yesus ri ngata Yerusalem.

¹⁴Ri doyata nu Banua nu Alatala nipeintaNa tona nobalu-baluu japi, bimba bo tonji banggebodo. Bo naria muni toposula doi nonturo hamai.

¹⁵Nanggita haitu, i Yesus novia cambu lako ri kaloro bo nipopalaiNa pura-pura ira lako ri Banua nu Alatala nosanggani-nggani ante bimba bo japi haitu. Bo doi ntoposula doi nikamburakaNa bo meja-mejara nisumbolinakaNa.

¹⁶Bo niulikaNa topobalu tonji banggebodo haitu, “Keni haumo pura-pura anu tutu lako ri sii! Banua nTuamaKu nee rapajadi banua pogade!”

¹⁷Nanggita pokainggu i Yesus haitu, nitora nu ana-anaguruNamo anu nitulisi riarara Buku Gasa ivei: “Pepotoveku ka banuaMiu, Pue, mompakamate yaku.” (Mazmur 69:9)

¹⁸Naupu haitu pakeni-pakeni ntoYahudi nangeva i Yesus bo nanguli, “Kabaraka nuapa rapoviaMu tandana Iko nakuasa nompopalai tona ivesia?”

¹⁹Nesana i Yesus, “Geromo banua nu Alatala hitu bo Kubangu mpanjili riara tempo talu-eo.”

²⁰Nanguli vai toYahudi, “Ba! Tona nokarajaa patapulu bo ono-mpae kasaena novia Banua nu Alatala hitu. Berimba Iko mamala mombabanguna mpanjili riara talu-eo?”

²¹Tapi banua nu Alatala nipatuju i Yesus haitumo karoNa mboto.

²²Naliu i Yesus natuvu mpanjili lako ri kamateNa, nitora nu anaguruNamo tesaNa hitu. Bo niparasayaramo anu nitulisi riara Buku Gasa bo anu nitesa i Yesus mboto.

²³Tempo i Yesus da naria ri ngata Yerusalem tempo Posusa Paskah, nadeamo tona nomparasaya Ia sabana nikitara kabaraka-kabaraka nipoviaNa.

²⁴Tapi i Yesus mboto ledo nomparasaya ira sabana nisaniNa isi rara ntaira pura-pura.

²⁵Ledo paraluu tona mompakalanto inggu manusia ka Ia sabana nisaniNa puramo isi rara ntai manusia.

Yohanes 3

¹Naria saito toFarisi nosanga i Nikodemus. Ia pakeni agama ntoYahudi.

²Ia nakava nte i Yesus tempo nabongi bo nanguli, “Guru, nisani kami Komiu tu nisuro nu Alatala mompatuduki kami. Sabana, ledo ria saitoa tona mompakule movia kabaraka mpo anu nipoviaMiu tutu ane Alatala ledo nosangani nte ia.”

³Nesana i Yesus, “Pariaramo tesaKu hitu, ledo ria saitoa tona mamala majadi todea riara Poparenta nu Alatala ane ia ledo rapoanaka mpanjili.”

⁴Nekutana i Nikodemus nte Ia, “Mamala tona natuamo rapoanaka mpanjili? Mamala ia mesua vai riara ntai ntinana bo rapoanaka mpanjili?”

⁵Nesana i Yesus, “Pariaramo tesaKu hitu; ane tona ledo rapoanaka ante uve bo ante kuasa Nosa Gasa nu Alatala, tona haitu ledo mamala majadi todea riara Poparenta nu Alatala.

⁶Karota najadi lako ri manusia, tapi katuvu nabaru najadi lako ri kuasa Nosa Gasa nu Alatala.

⁷Jadi nee mahera ane Kuuli ka komiu, komiu kana rapoanaka mpanjili.

⁸Poiri neburu hau ri umba nipodotana. Kita nangepe vuuna tapi ledo nisanita lako ri umba kakavana bo hau ri umba rakalauna. Ivesia muni kuasa Nosa Gasa nu Alatala nompoanaka tona mpanjili.”

⁹Bo nekutana vaimo i Nikodemus, “Berimba sampe haitu mamala majadi?”

¹⁰Nesana i Yesus, “Iko tu guru ntoYahudi anu nibila. Berimba bo ledo nisanimu?”

¹¹Pariaramo tesaKu hitu. Kami hii notesa anu nisani kami, bo kami nanguli anu nikita kami mboto, tapi komiu pura-pura ledo nadota momparasaya tesa kami.

¹²NitesaKu anu najadi ri dunia hitu, ledo niparasayamiu. Berimbamo raparasayamiu ane Kutesa ka komiu anu najadi ri suruga?

¹³Dopa ria saitoa tona neore hau ri suruga nanggita anu najadi hamai. Aga Yaku, Ana nu Manusia anu nanau lako ri suruga tumai ri dunia nanggitanya.

¹⁴Nabi Musa nggaulu novia sanggayu ule tambaga ri karava bai bo nianggatakana pakalanga ri tinja sambesa ala isema-sema mantingoa ule haitu ledo mamate. Yaku, Ana nu Manusia kana raanggataka pakalanga, nasimbayu mpo ule haitu,

¹⁵ala isema-sema momparasaya Yaku, manggava katuvua mabelo sampe ri kasae-saena.

¹⁶Apa Alatala mpuu-mpuu nompotove manusia sampe nidekeiNa AnaNa saito-itoNa, ala isema-sema momparasaya AnaNa ledo rapopogaa lako nte Alatala tapi manggava katuvua mabelo sampe ri kasae-saena.

¹⁷Apa patuju nu Alatala nombatudu AnaNa makava ri dunia hitu, ledo ala mombahuku manusia tapi ala ira rapakasalamaNa.

¹⁸Isema-sema nomparasaya Ana nu Alatala haitu ledo rahuku. Tapi isema-sema ledo nomparasaya, nihuku nu Alatalamo sabana ledo niparasayara Ana nu Alatala saito-itoNa haitu.

¹⁹Ana nu Alatala nakava ri dunia eva reme nombavanta kalandana, tapi manusia nihuku sabana nipokonorapa kalandana pade karemena apa pokainggura nadaa.

²⁰Isema-sema novia nadaa ledo ntoto nipokonora reme. Ira ledo ntoto madota manggaparai reme haitu ala pokainggura nadaa haitu ledo rakita.

²¹Tapi isema-sema nangoseaka Alatala anu nakana, ira manggaparai reme haitu ala pokainggura malanto rakita nangoseaka dota nu Alatala.”

²²Naupu haitu nalaimo i Yesus ante anaguruNa hau ri bagia Yudea. Hamai Ia nonturo bara sakuya kasaena ante ira bo nombadiu tona, tandana ira najadi topangoseaka Ia.

²³⁻²⁴Tempo haitu i Yohanes Topediu dopa nisuaraka riara ntarunggu. Ia nombadiu tona ri ngata Ainon napara ngata Salim, sabana ri sia nadea uve. Bo ledo naupu-upu tona nakava nekidiu nte ia.

²⁵Ri sia ana-anaguru i Yohanes nosinjanai nte saito toYahudi. Ira nosinjanaika ada-ada pompakagasa karo anu nituntuni ntoYahudi.

²⁶Pade ana-anaguruna haitu hau nte i Yohanes bo nanguli, “Guru, da nitoramiu tona nosangani ante komiu ri sambote Binangga Yordan, anu nituduakamiu ka kami bara ipia? Hitupa Ia muni nombadiu tona, bo nadea mpuu tona hau nte Ia.”

²⁷Nesana i Yohanes, “Ledo makuya. Ledo ria saitoa manggava nuapa-nuapa ane ledo radekei nu Alatala ka ia.

²⁸Niepemi mbotomo tesaku bara ipia. Niuliku yaku ledo Magau Topepakasalama anu nijanji nu Alatala. Yaku aga tona nisuro mokolu ka Magau haitu.

²⁹⁻³⁰Ia kana mantambai rabila tapi yaku domo. Rapana ri posusa ponika, boti langgai nibila apa iamo mompoberei boti mombine. Tapi ane vega nu boti langgai anu nombaurusi poboti, ia aga neangga ri sinjori boti langgai, bo nadamba mpuumo rarana nangepe suara nu boti langgai nadamba haitu. Yaku nasimbayu ante topourusi poboti haitu. Nadamba mpuumo raraku apa nadea tona nangoseaka i Yesus.

³¹I Yesus anu nanau lako ri suruga naogepa pade pura-pura manusia. Manusia biasa lako ri dunia hitu, aga nombatesa anu najadi ri dunia hitu. Tapi Ia anu nanau lako ri suruga naogepa pade pura-pura manusia.

³²Ia notesaki anu nikitaNa bo niepeNa, tapi ledo nadea tona nomparasaya tesaNa haitu.

³³Tapi isema-sema nomparasaya tesaNa haitu, raulina Alatala mpuu-mpuu nakana.

³⁴Tona nisuro nu Alatala, Iamo nompapola tesa nu Alatala, sabana Alatala nombadekei Nosa Gasana ka Ia, ledo ria pantaaNa.

³⁵Tuamata Alatala nompotove AnaNa, bo nidekeiNa Ia mombakuasai pura-pura.

³⁶Isema-sema momparasaya AnaNa, manggava katuvua mabelo sampe ri kasae-saena. Tapi isema-sema ledo nekou nte AnaNa ledo manggava katuvua mabelo haitu. Ia aga rapambela rau rara nu Alatala sampe ri kasae-saena.”

Yohanes 4

¹ToFarisi nangepe lelana nadeamo tona hau nekidiu nte i Yesus ala majadi topangoseaka Ia sampe nadeapa topangoseaka i Yesus pade i Yohanes Topediu.

²(Kakanana aga ana-anaguru i Yesus nombadiu tona, ledo i Yesus mboto.)

³Jadi nisanipa i Yesus niepe ntoFarisimo lelana haitu, nalaimo Ia lako ri bagia Yudea bo nanjili hau ri bagia Galilea.

⁴Riara polipana haitu, naria paraluuNa noliu ri bagia Samaria.

⁵Jadi nakavamo i Yesus ri ngata Sikhar ri bagia Samaria. Ngata haitu napara tana nidekei i Yakub ka anana i Yusuf nggaulu.

⁶Hamai naria buvu niuli Buvu i Yakub. Jadi nenontomo i Yesus bo nonturo ri sinjori buvu haitu, sabana nalenge Ia nolipa. Tempo haitu natongomo eo.

⁷⁻⁸Ana-anaguru i Yesus napola hau riaru ngata haitu mangali kandea. Tempo i Yesus nonturo ri buvu haitu, nakavamo saito mombine toSamaria manambu uve. Nanguli i Yesus ka ia, “Ina, dekei ka Yaku hanu uve Kuinu.”

⁹Nanguli mombine toSamaria haitu ka Ia, “Ha! Komiu tu toYahudi, yaku hii toSamaria. Berimba sampe Komiu merapi uve inu lako nte yaku?” Niulina ivesia sabana nabiasa toYahudi ledo nosimpokono ada ante toSamaria.

¹⁰Nesanamo i Yesus, “Ane musani anu nidekei nu Alatala bo ane musani isema Yaku anu nerapi uve inu lako nte iko, natantu muperapi muni lako nte Yaku bo Kudekei ka iko uve anu nombadekei katuvua mabelo.”

¹¹⁻¹²Naupu haitu nanguli vaimo mombine haitu, “Berimbamo? I Yakub totua kami nggaulu, nokae buvu hitu. Bo kami nikabolina. Ia mboto nanginu uve lako ri buvu hitu bo ivesia muni ana-anana bo binata-binata nipiarana. Naogepa Komiu pade i Yakub? Ledo ria posibuMiu raposibu uve, bo buvu nandala mpuu. Lako ri umba rapangalaMiu uve anu nombadekei katuvua mabelo nitesaMiu tutu?”

¹³Nesana i Yesus, “Isema-sema manginu uve lako ri buvu hitu da mabaipa tambolona.

¹⁴Tapi isema-sema manginu uve Kudekei ka ia, domo mabai tambolona sampe ri kasae-saena. Sabana uve Kudekei ka ia haitu majadi uve mpemata moili lako riaru ntaina bo nombadekei katuvua mabelo ka ia sampe ri kasae-saena.”

¹⁵Nangepe haitu nanguli mombine, “Ane ivesia, Guru, dekei ka yakumo uve haitu ala domo mabai tamboloku bo domo malenge yaku tumai manambu uve ri sii.”

¹⁶Nanguli i Yesus ka ia, “Koi ala ntani bereimu tumai.”

¹⁷Nesana mombine haitu, “Yaku ledo noberei.” Nanguli i Yesus ka ia, “Nakana mpuu niulimu tutu iko ledo noberei.

¹⁸Apa alimamo langgai nompoberei iko bo langgai anu naria nte iko sii-sii ledo bereimu. Jadi nakana tesamu.”

¹⁹Bo nesana mombine haitu, “Guru, natantumo Komiu nabi.

²⁰Totua kami nggaulu nombasomba Alatala ri bavo nu bulu hitu. Tapi Komiu toYahudi nanguli aga ri ngata Yerusalem masipato tona mombasomba Alatala.”

²¹Nesana i Yesus ka ia, “Ina, pariaramo tesaKu hitu. Kana makava tempona tona domo mombasomba Tuamata Alatala ri bulu hitu bo domo muni ri ngata Yerusalem.

²²Komiu toSamaria ledo nisanimiu mpuu Alatala. Tapi kami toYahudi nisani kami isema nisomba kami, apa Magau Topompakasalama manusia meumba lako nte kami toYahudi.

²³Tapi makava tempona bara maipia, bo kakanana tempo haitu nariumo, tona anu mpuu-mpuu mombasomba Tuamata Alatala kana mombasomba Ia ante petulungi nu Nosa Gasana nangoseaka pepatuduki nakana. Pesomba ivehaitu nipokono nu Alatala.

²⁴Alatala nosa. Jadi isema-sema madota mombasomba Ia kana mombasomba Ia ante petulungi nu Nosa Gasana nangoseaka pepatuduki nakana.”

²⁵Nesana vai mombine haitu, “Nisaniku kana makava Magau Topepakasalama anu niuli i Kristus. Ane Ia haitu makava, Ia kana motentei pakalanto mpengaya-ngaya ka kita.”

²⁶Nanguli i Yesus ka mombine haitu, “Yaku anu notesa ka iko hitu-hitu, Yakumo tona niulimu tutu.”

²⁷Da ranja mpotesa ira, nakavamo ana-anaguru i Yesus lako riarara ngata. Natekaja ira nanggita i Yesus notesa nte mombine haitu. Tapi ledo ria saitoa nabia nompekutana mombine haitu, “Nuapa paraluumu?” Ledo muni nabia ira nompekutana i Yesus, “Nuapa sabana Komiu notesa nte mombine haitu?”

²⁸Naupu sia, mombine haitu nomboli posibuna ri sia bo nanjili hau ri ngata. Nakava hamai niulina ka tona ri ngata haitu,

²⁹“Kamaimo! Kita hau mompeinta langgai ria anu nombatesa ka yaku pura-pura anu nipoviaku. Bara suga Iamo Magau Topepakasalama anu nijanji nu Alatala.”

³⁰Nangepe tesa mombine haitu, nesuvumo ira lako ri ngata haitu hau mompeinta i Yesus.

³¹Puri mombine rou rangata, nanguli ana-anaguru i Yesus ka Ia, “Kaimo Guru, mangandemo kita.”

³²Tapi nesana i Yesus, “Nariamo kandeaku anu ledo nisanimiu.”

³³Nangepe haitu, nosipekutanamo anaguruNa, “Naria tona nanggeni kandeaku ka Ia?”

³⁴Jadi nanguli i Yesus ka ira, “Mangoseaka dota nu Alatala anu nantudu Yaku, bo mompakaupu pokarajaa niparasayaNa ka Yaku, haitumo kandeaku.

³⁵Biasa niuli ntona ivei: ‘Da pata-mbulapa pade mokato.’ Tapi Kuuli ka komiu, peintamo pae ri talua nakunimo, nasadiamo rakato.

³⁶Topokato nompamulamo nantarima tambora apa nipasiromura asele anu manggeni katuvua nabelo sampe ri kasae-saena. Jadi topotuda bo topokato madamba-damba mpasanggani. [Asele nipasiromura, batuana manusia anu manggava katuvua mabelo sampe ri kasae-saena.]

³⁷Nakana mpuu tesa anu nanguli, “Tosaitona notuda, tona ntanina nokato.”

³⁸Komiu Kutudu hau mokato anu ledo nitudamiu. Tona ntanina notuda bo komiumo mangala asele mpanggaviara.”

³⁹Nadea toSamaria lako ri ngata haitu nomparasaya i Yesus sabana nieperamo tesa nu mombine pangane nanguli, “Ia notesa ka yaku pura-pura anu nipoviaku.”

⁴⁰Jadi hau ira mosinggava nte i Yesus bo niunakara Ia mesai ri ngatara bara sakuya kasaena. Jadi nesai mpuumo i Yesus hamai rombongi kasaena.

⁴¹Bo nantambaimo kadea ntona nomparasaya i Yesus sabana niepera mbotomo tesaNa.

⁴²Naupu sia, niulikara mombine haitu, “Sii-sii niparasaya kami mpuumo, ledo aga lako ri tesamu tapi niepe kami mbotomo tesaNa. Bo nisani kamimo Ia mpuu-mpuu Magau Topompakasalama manusia.”

⁴³Naliu karombongina, haumo i Yesus ri bagia Galilea.

⁴⁴Evamo niuliNa mboto, “Saito nabi ledo nibila ntona ri ngatana mboto.”

⁴⁵Jadi tempo Ia nakava ri bagia Galilea, Ia nitarima ntoGalilea ante damba rara. Apa ira muni nangoseaka Eo Mbaso Posusa Paskah ri ngata Yerusalem bara ipia bo nikitara mbotomo pura-pura anu nipovia i Yesus hamai.

⁴⁶Bo hau vaimo Ia ri ngata Kana ri bagia Galilea, ngata nipompajadiNa uve najadi uve anggur bara ipia. Ri ngata Kapernaum naria saito tomaoge anu nokarajaa ri banua magau, anana langgai nadua ntamo.

⁴⁷Sampangepe i Yesus nakavamo ri bagia Galilea lako ri bagia Yudea, hau ia mosinggava nte i Yesus bo nerapi tulungi mpuu-mpuu ala i Yesus hau ri ngata Kapernaum mompakabelo anana damo kamatena.

⁴⁸Nangepe haitu, nanguli i Yesus ka ia, “Komiu pura-pura, ane ledo rakitamiu tanda-tanda nipokumaaka bo kabaraka-kabaraka, ledo ntoto raparasayamiu.”

⁴⁹Nanguli tomaoge haitu ka i Yesus, “Pue, masalisa kita hau kamba da naria nosana.”

⁵⁰Nanguli Yesus ka ia, “Panjilimo! Nabelomo anamu!” Nangepe haitu, niparasaya ntomaogemo tesa i Yesus ka ia. Jadi nanjilimo ia.

⁵¹Da ri dala ia, netomunakamo bara sako-ndua batuana nanguli, “Nabelomo anamiu!”

⁵²Jadi nekutanamo ia, “Ipia pamulana anaku nabelo?” Nesana ira, “Riavi tanga eo nitasere tinti sangu nanaumo panena.”

⁵³Bo nitora ntomaogemo tinti sangu riavi i Yesus nanguli ka ia, “Nabelomo anamu!” Naliu haitu, ira sambanua nomparasaya i Yesus puramo.

⁵⁴Haitumo tanda karanduana nipokumaaka nipovia i Yesus tempo Ia nakava ri bagia Galilea lako ri bagia Yudea.

Yohanes 5

¹Bara sakuya kasaena naliu haitu, nanjilimo i Yesus hau ri ngata Yerusalem mantuntuni eo mbaso ntoYahudi hamai.

²Ri ngata Yerusalem naria bobaa ngata nosanga “Bobaa Bimba”. Napara bobaa haitu naria sangu kola niuli riara basa ntoYahudi Kola Betesda. Nantalili kola haitu naria lima-angu tambale nagaya anu nisouni.

³Ri tambale-tambale gahaitu nadea mpuu tona nadua naturu. Naria tona naburo, naria tona nakejo, naria tona napunggu bo dua ntanina. Ira pura-pura nompopea uve mojompe.

⁴Apa sanggani-nggani malaeka nu Alatala nanau ri uve kola haitu nompopojompe uvena. Bo isema-sema mokolu mesua riara uve tempo uve haitu nojompe, kaliu-liu nabelo lako ri duana.

⁵Ri sia naria saito langgai nadua talupulu bo valu-mpaemo kasaena.

⁶I Yesus nanggita todua haitu naturu ri sia. NisaniNapa sakuyamo kasaena duana haitu, nipekutanaNamo, “Madota iko mabelo?”

⁷Nesana tona nadua haitu, “Guru, ledo naria tona manggeni yaku hau riara kola tempo uve kola haitu nojompe. Da nompasimbuku yaku hau mesua, nariumo tona ntanina nokolu nesua riara uve.”

⁸Bo nanguli i Yesus ka ia, “Peanggamo! Anggatakamo ompamu bo polipamo!”

⁹Kaliu-liu nabelomo tona haitu. Nianggatakanamo ompana bo nolipamo ia. Tempo haitu nambela eo penonto.

¹⁰Sabana haitu, nangulimo pakeni-pakeni ntoYahudi ka tona nipakabelo haitu, “Eo hitu eo penonto. Nantuntuni Atura agama, ledo mamala iko mosimbuaka ompamu!”

¹¹Tapi nanguli tona haitu, “Tona nompakabelo yaku pangane nanguli ka yaku, ‘Anggatakamo ompamu bo polipamo!’ “

¹²Nekutanamo toYahudi haitu, “Isema nantudu iko manganggataka ompamu bo molipa?”

¹³Tapi tona dako nipakabelo haitu, ledo nisanina isema nompakabelo ia, sabana i Yesus netinggalipomo ri tatanga ntoidea haitu.

¹⁴Naupu haitu i Yesus nosinggava nte tona haitu riaru Banua nu Alatala, bo niulikaNa ka ia, “Peinta vei! Nabelomo iko. Jadi tumo mupovia dosa ala iko ledo mambela anu nadaapa vai pade duamu tutu.”

¹⁵Naupu sia, haumo tona haitu nte pakeni ntoYahudi bo nanguli i Yesusmo nompakabelo ia.

¹⁶Jadi nompamula lako ri kabelo ntona haitu, nieloram dala mompandasa i Yesus, sabana nipakabeloNa tona nadua ri eo penonto.

¹⁷Tapi nanguli i Yesus ka ira, “TuamaKu bate-batena nokarajaa sampe ri eo hitu, bo Yaku muni kana mokarajaa.”

¹⁸Nangepe tesa i Yesus haitu, pakeni ntoYahudi nompasimbuku mpuu mangelo dala mompatesi Ia. Apa Ia ledo aga nombaliunaka atura-atura eo penonto tapi niuliNa muni Alatala TuamaNa mboto. Ivesiamo Ia nompakasimbayu karoNa ante Alatala.

¹⁹Jadi nanguli i Yesus ka pakeni ntoYahudi haitu, “Pariaramo tesaKu hitu. Yaku ledo mamala movia nuapa-nuapa nangoseaka dotaKu mboto, tapi anu nikitaKu lako nte TuamaKu, haitumo nipoviaKu. Nuapa-nuapa nipovia nTuamaKu, haitu muni Kupovia.

²⁰Sabana, TuamaKu nompotove Yaku, AnaNa, bo nipopakitaNa ka Yaku pura-pura anu nipoviaNa. Bo rapopakitaNa tanda-tanda nelabipa kabarakana pade anu nipoviaKu pangane ala rapokumaakamiu.

²¹TuamaKu nompakatuvu mpanjili tona namate bo nombadekei katuvua nabaru ka ira. Ivesia muni Yaku, AnaNa, nombadekei katuvua nabaru ka isema-sema nipodotaKu.

²²TuamaKu mboto ledo mombatangara tona, sabana kuasa mombatangara manusia nidekeiNamo ka Yaku, AnaNa,

²³ala pura-pura tona nombabila Yaku, AnaNa, nasimbayu mpo pebilara Ia. Isema-sema ledo nombabila Yaku, batwana ia ledo muni nombabila TuamaKu anu nantudu Yaku.

²⁴Pariaramo tesaKu, isema-sema nangepe tesaKu bo nomparasaya Alatala anu nantudu Yaku, ia manggava katuvua nabelo sampe ri kasae-saena. Ia ledo mambela pehuku bo ledo rapopogaa lako nte Alatala tapi nariumo katuvua nabaru nte ia.

²⁵Pariaramo tesaKu hitu. Kana makava tempona bara maipia, bo sii-sii nakavamo tempona haitu, tona namatemo mangepe suaraKu, Ana nu Alatala, bo ira anu mangepena bo mangoseakana, manggava katuvua mabaru.

²⁶Apa TuamaKu Alatala nakuasa nombadekei katuvua nabaru, bo ivesia muni Yaku, AnaNa nidekeiNa kuasa ka Yaku nombadekei katuvu nabaru.

²⁷Bo nidekeiNa muni kuasa ka Yaku mombatangara manusia sabana Yakumo tona niuli Ana nu Manusia.

²⁸Nee mokumaa mangepe tesaKu hitu, sabana kana makava tempona pura-pura tomate mangepe suaraKu

²⁹bo mesuvu lako ponturora. Tona nabelo pokainggura matuvu mpanjili bo manggava katuvua mabelo sampe ri kasae-saena. Bo tona nadaa pokainggura matuvu mpanjili ala rahuku.”

³⁰Bo nanguli munimo i Yesus ka pakeni-pakeni ntoYahudi, “Yaku ledo namala novia nuapa-nuapa nangoseaka dotaKu mboto. Yaku nombatangara nangoseaka anu niepeKu lako nte TuamaKu. PotangaraKu nanao apa Yaku ledo nangoseaka dotaKu mboto tapi aga dota nTuamaKu anu nombatudu Yaku.

³¹Ane aga Yaku saitoKu motesaki karoKu mboto „bo ledo ria sabi ntanina„, dopa rasanimiu ane tesaKu namala raparasayamiu atau ledo.

³²Tapi naria saito tona ntanina anu nompakalanto isema Yaku. ƘTuamaKu sabiKu, bo nisaniKu tesaNa haitu nakana.

³³Komiu nombasuro tona hau nte i Yohanes Topediu bo anu niulina nakana mami.

³⁴Kakanana ledo paraluu manusia mompakalanto isema Yaku. Tapi Kupopatora ka komiu tesa i Yohanes ala komiu mamala rapakasalama.

³⁵I Yohanes Topediu haitu nasimbayu mpo poindo nevangga bo nanggeni reme ka komiu. Bo komiu nadamba mpuu nangepe tesana. Tapi kadamba nu raramiu haitu aga sampalai.

³⁶Tapi naria sangayapa anu nompakalanto isema Yaku, bo anu haitu nopokopa pade sabi i Yohanes Topediu, haitumo pokarajaaKu. PokarajaaKu niparasaya nTuamaKu ka Yaku ala Kupakaupu. Pokarajaa haitumo nompakalanto Yaku hii nitudu nTuamaKu.

³⁷Bo TuamaKu anu nantudu Yaku, Ia muni nompakalanto isema Yaku. Dopa sanggani niepemi suaraNa bo dopa muni sanggania nikitamiu lenjeNa.

³⁸Tesa-tesaNa ledo nipariaramiu, apa ledo niparasayamiu Yaku nituduNa.

³⁹Komiu natutu neguru isi Buku Gasa sabana niulimiu riara buku haitu rakavamiu katuvua mabelo sampe ri kasae-saena. Tano isi Buku Gasa haitumo anu nompakalanto isema Yaku.

⁴⁰Tapi naupa komiu natutu neguru Buku Gasa, komiu bate-batena ledo nadota momparasaya Yaku ala rakavamiu katuvua mabelo haitu.

⁴¹Yaku ledo mbeki ratoiya nu manusia.

⁴²Tapi nisaniKu komiu ledo ntoto nompotove Alatala.

⁴³Yaku nakava nte komiu ante kuasa nTuamaKu tapi komiu ledo nadota nantarima Yaku. Ane tona ntanina nakava nte komiu ante kuasana mboto, tona haitumo nitarimamiu.

⁴⁴Berimbamo komiu mamala momparasaya Yaku? Apa komiu aga madota rabila nu roa. Ledo nipasimbukumi manggava pebila nu Alatala Saito-itoNa!

⁴⁵Tapi naupa ivesia, nee rasarumakamiu Yaku mompakasala komiu ri ngayo nTuamaKu bara maipia. Naria tona mompakasala komiu, haitumo Nabi Musa anu nisarumakamiu.

⁴⁶Apa ane komiu mpuu-mpuu nomparasaya tesa Nabi Musa, natantumo raparasayamiu muni Yaku, sabana karoKu hitumo anu nitesa Nabi Musa riaru buku-bukuna.

⁴⁷Tapi ane ledo niparasayamiu anu nitulisi Nabi Musa, berimbamo komiu mamala momparasaya tesaKu?”

Yohanes 6

¹Naliu haitu, i Yesus hau nevote Rano Galilea, anu niuli muni Rano Tiberias.

²Nadea mpuu tona nantuntuni Ia sabana nikitaramo tanda-tanda nipokumaaka nipoviaNa nompakabelo tona nadua.

³Nakava ri sambote rano, i Yesus ante ana-anaguruNa nantende ri buntina bo nonturomo.

⁴Tempo haitu naparamo Eo Mbaso Paskah ntoYahudi.

⁵Tempo i Yesus nompeili ntiku, nikitaNa tona dea nakava nte Ia. Bo niulikaNa i Filipus, “Ri umba rakalauta mangali kandeadea radekei ka tona dea hitu?”

⁶Nisani i Yesus mamimo anu rapoviaNa ngena tapi niuliNa ivesia ala mombauji i Filipus.

⁷Nesanamo i Filipus, “Nau roatu kadeana doi salaka raalika roti, ledo magana rapakande ka tona dea hitu. Nau damo rabagi ka ira aga mbo sakide, ledo magana.”

⁸Pade saito anaguruNa ntanina anu nosanga i Andreas, sampesuvu i Simon Petrus, nanguli

⁹“Siimo ngana langgai anu nobaku lima-angu roti jelai bo rombaa bau. Tapi nuapa batuana haitu ka tona ivehitu kadeana?”

¹⁰Nanguli i Yesus, “Tudumo todea monturo.” Ri ponturo haitu nakavoko. Jadi tona dea haitu nonturo puramo ri bavo nggavoko haitu. Kadea nu langgai hamai nitasere lima-njobu.

¹¹Naupu haitu, i Yesus nangala roti bo nanguli tarima kasi ka Alatala. Bo nitubi-tubiNa roti haitu ka todea anu nonturo ri sia. Ivesia muni nipoviaNa ante bau. Bo tona dea haitu nangande sampe nabosu.

¹²Nabosupa ira, nangulimo i Yesus ka ana-anaguruNa, “Pasiromu puramo labi-labi nu roti bo bau haitu. Nee sampe maria anu ratedaka.”

¹³Jadi lako ri lima-angu roti jelai nikande ntodea haitu, nipasiromura labina, da naganapa sapulu rotonda.

¹⁴Nipeinta ntodeapa anu nipovia i Yesus, notesamo ira, “Mpuu-mpuu Ia mai nabi nisarumakata makava ri dunia!”

¹⁵Nisani i Yesus ira nopatuju makava mompasuu Ia majadi magaura. Jadi nalaimo Ia saitoNa hau ri bulu.

¹⁶Nggoviana haitu, notuamo ana-anaguru i Yesus hau ri rano.

¹⁷Bo nesavi sakayamo ira hau mevote ri ngata Kapernaum. Nabongimo tapi i Yesus dopa nakava nte ira.

¹⁸Tempo haitu nakavamo poiri narimboso sampe nambasomo balumba rano.

¹⁹Ira novose sakaya nitasere bara lima kilo atau ono-kilo lako ri talinti, pade nikitara i Yesus nolipa ri bavo nu uve rano tumai nantotoaka sakayara. Nanggita haitu, navioramo rarara.

²⁰Tapi nanguli i Yesus ka ira, “Nee maeka! Yaku hii!”

²¹Nangepe haitu, nadambamo rarara nompopompene i Yesus riarra sakayara. Bo sampesanika nakavamo sakayara ri talinti anu nikalaura.

²²Naeo mpadondo, todea anu naboli ri sambote rano haitu nangelo i Yesus. Nitorara aga sangu sakaya hamai riavi. Bo nitorara i Yesus ledo nesavi sakaya nosangani-nggani ante ana-anaguruNa, aga ira bayangi nesavi sakaya hau ri sambotena.

²³Naupu sia, nakavamo bara sakuya sakaya ntanina lako ri ngata Tiberias nesampo napara ponturo ntodea nangande roti naupu i Yesus nanguli tarima kasi nte Alatala.

²⁴Nisani ntodeapa i Yesus domo naria hamai bo domo muni naria ananaguruNa, nesavi sakaya munimo ira hau mangelo i Yesus ri ngata Kapernaum.

²⁵Tempo tona dea nosintomu nte i Yesus ri sambote rano, nipekutanaramo, “Guru, ipia Komiu nakava ri sii?”

²⁶Nesanamo i Yesus, “Pariaramo tesaKu! Komiu nangelo Yaku sabana komiu nangande roti sampe nabosu. Ledo nisanimiu patuju ntanda nabaraka nipoviaKu haitu.

²⁷Nee aga mokaarajaa ala manggava kandeana anu masalisa maupu atau mavai. Agina komiu mokaarajaa ala manggava kandeana anu ledo mavai bo anu mombadekei katuvua mabelo sampe ri kasae-saena. Yaku, Ana nu Manusia mombadekei kandeana haitu ka komiu, sabana Yakumo nianggataka nTuamaKu Alatala mantui pokaarajaa haitu.”

²⁸Pade nekutanamo ira, “Nuapa masipato rapovia kami ala pokainggu kami rapokonoa nu Alatala?”

²⁹Nesana i Yesus, “Iveimo anu nipokonoa nu Alatala: Parasayamo Yaku anu nituduNa.”

³⁰Bo nanguli vaimo ira, “Ane ivesia, tanda nuapa rapoviaMiu ala rakita kami bo raparasaya kami Komiu? Povia nuapa rapoviaMiu?”

³¹Apa totua kami nggaulu nangande roti anu niuli ‘manna’ ri karava bai. Haitu nitulisi riara Buku Gasa ivei: ‘NidekeiNa ka ira kandeana lako ri suruga rakandera.’”

³²Nanguli i Yesus ka ira, “Pariaramo tesaKu, ledo i Musa bara ipia anu nombadekei kandeana lako ri suruga ka komiu. Tapi TuamaKu anu mombadekei kandeana mpuu lako ri suruga ka komiu.

³³Apa kandeana nopuna lako ri Alatala, haitumo Ia anu nanau lako ri suruga bo nombadekei katuvua ka manusia.”

³⁴Nanguli vaimo todea haitu, “Ane ivesia, Guru, dekei ka kamimo kandeana haitu eo-eo.”

³⁵Nanguli i Yesus ka ira, “Yakumo hii kandeana anu nombadekei katuvua haitu. Isema-sema makava nte Yaku, domo maara, bo isema-sema momparasaya Yaku, domo mabai tambolona sampe ri kasae-saena.

³⁶Tapi evamo niuliKu ka komiu pangane, naupa nikitamiumo Yaku, ledo niparasayamiu.

³⁷Pura-pura tona nidekei nTuamaKu ka Yaku kana momparasaya Yaku, bo isema-sema momparasaya Yaku ledo ntoto Kupoara.

³⁸Apa Yaku nanau lako ri suruga, ledo movia dotaKu mboto, tapi movia anu nipodota nu Alatala anu nantudu Yaku.

³⁹Bo iveimo dota nu Alatala anu nantudu Yaku, ala ledo malipo nau saitoa lako ri pura-pura tona nidekeiNa ka Yaku. Ira pura-pura kana Kupakatuvu mpanjili ri kaupu nu dunia.

⁴⁰Iveimo dota nTuamaKu, ala pura-pura tona anu mombasani bo momparasaya Yaku, AnaNa, manggava katuvua mabelo sampe ri kasae-saena. Bo Kupakatuvu mpanjili ira ri kaupu nu dunia.”

⁴¹Nangepe tesa haitu nongutu-ngutumotoYahudi ri sia, sabana i Yesus nanguli, “Yakumo hii kandeana anu nanau lako ri suruga.”

⁴²Nosimpotesamo ira, “Bai! Ledo Ia hitu i Yesus ana i Yusuf? Nisanita pura tina tuamaNa. Berimba sampe niuliNa Ia nanau lako ri suruga?”

⁴³Nangepe haitu, nangulimo i Yesus ka ira, “Nee mongutu.

⁴⁴Ledo ria saitoa mamala momparasaya Yaku ane ledo rakeniaka nTuamaKu anu nantudu Yaku. Bo isema-sema momparasaya Yaku, kana Kupakatuvu mpanjili ri kaupu nu dunia.

⁴⁵Riara buku nabi-nabi nitulisi ivei: ‘Pura-pura tona rapatuduki nu Alatala.’ (Yesaya 54:13) Jadi isema-sema mompariara pepatuduki nTuamaKu bo meguru lako nte Ia, tantu raparasayana Yaku.

⁴⁶Nee rasarumakamiu nariamo tona nanggita TuamaKu. Yaku anu nakava lako nte Alatala, aga Yaku saitoKu nanggita Ia.

⁴⁷Pariaramo tesaKu hitu, isema-sema nomparasaya Yaku, matuvu mabelo sampe ri kasae-saena.

⁴⁸Yakumo hii kandeana anu nombadekei katuvua nabelo.

⁴⁹Totuamiu nggaulu nangande kandeana anu niuli ‘manna’ ri karava bai, bo ira pura-pura namate.

⁵⁰Tapi ledos ivesia ante kandeana anu nanau lako ri suruga. Isema-sema mangande kandeana haitu ledos mamate.

⁵¹Yakumo hii kandeana anu nanau lako ri suruga, anu nombadekei katuvua nabelo haitu. Isema-sema mangande kandeana hitu, matuvu mabelo sampe ri kasae-saena. Kandeana anu nombadekei katuvua nabelo, batuana isi karoKu anu Kudekei ala manusia mamala matuvu mabelo „sampe ri kasae-saena.”

⁵²Nangepe tesa i Yesus haitu, nosinjanai mbotomo toYahudi. Nosipekutanamo ira, “Berimba tona haitu mamala mombadekei isi karoNa rakandeta?”

⁵³Bo nanguli i Yesus ka ira, “Pariaramo tesaKu hitu, ane komiu ledos mangande isi karoKu, Ana nu Manusia, bo ledos manginu raaKu, komiu ledos ntoto matuvu mabelo.

⁵⁴Tapi isema-sema mangande isi karoKu bo manginu raaKu, iamo matuvu mabelo sampe ri kasae-saena, bo Kupakatuvu mpanjili ia ri kaupu nu dunia.

⁵⁵Apa, isi karoKu haitumo kandeana mpuu bo raaKu haitumo panginu mpuu.

⁵⁶Isema-sema mangande isi karoKu bo manginu raaKu, iamo maroo mosangu rara ante Yaku bo Yaku maroo mosangu rara ante ia.

⁵⁷TuamaKu anu nantudu Yaku, Iamo puna katuvua nabelo, bo katuvuKu nopuna lako nte Ia. Ivesia muni tona anu mangande isi karoKu, katuvuna mopuna lako nte Yaku.

⁵⁸Yakumo hii kande anu nanau lako ri suruga. Kande hitu ledo nasimbayu nte ‘manna’ nikande ntotuamiu nggaulu. Naupa ira nangande ‘manna’ haitu, namatemo ira. Tapi isema-sema mangande kande hitu matuvu mabelo sampe ri kasae-saena.”

⁵⁹Pura-pura tesa haitu nitesa i Yesus tempo nipatudukiNa tona riara banua petupu ri ngata Kapernaum.

⁶⁰Naupu nangepe tesa i Yesus haitu, nadeamo topangoseaka Ia nanguli, “Hu! Nakaja gaga pepatuduki hitu! Isema mompakule mangoseaka tesa eva haitu?”

⁶¹Nisani i Yesusmo topangoseaka Ia nongutu-ngutu ivesia, jadi niulikaNa ira, “Noura raramiu mangepe pepatudukiKu pangane?”

⁶²Natantu nau rakitamiu Yaku, Ana nu Manusia meore mpanjili hau ri ponturoKu pamulana, dopa muni raparasayamiu.

⁶³Kuasa nu manusia ledo mompakule nombadekei katuvua nabelo, aga Nosa Gasa nu Alatala. Tesa-tesa niuliKu ka komiu, nakava lako ri Nosa Gasa bo tesa-tesa haitumo nombadekei katuvua nabelo.

⁶⁴Tapi da naria sanu komiu ledo nomparasaya.” I Yesus nanguli ivesia sabana nisaniNa mamimo lako ri pamulana isema ledo momparasaya bo isema mompobalu Ia bara maipia.

⁶⁵Pade niuliNa muni, “Haitu sampe niuliKu ka komiu pangane, ledo ria saitoa mamala momparasaya Yaku ane ledo rapaloga nTuamaKu.”

⁶⁶Nompamula lako ri eo haitu, nadea topangoseaka i Yesus nompalaisi Ia bo domo nadota nangoseaka Ia.

⁶⁷Jadi i Yesus nompekutana anaguruNa sapulu randua haitu, “Berimbamo? Rapalaisimi muni Yaku?”

⁶⁸Nesana i Simon Petrus, “Pue, nte isema rakalau kami? Aga Komiu nombatesa tesa anu nombadekei katuvua mabelo sampe ri kasae-saena.

⁶⁹Kami nomparasayamo bo nisani kami, Komiumo ToGasa anu nakava lako nte Alatala.”

⁷⁰Nesana i Yesus, “Yaku mbotomo nompelisi komiu sapulu randua tutu. Tapi naupa ivesia, naria saito komiu nipopale nu Magau Seta!”

⁷¹Tona nipatuju i Yesus iamo i Yudas ana i Simon Iskariot. Apa naupa i Yudas haitu saito lako nte ira sapulu randua, ia haitumo anu mompobalu i Yesus ngena.

Yohanes 7

¹Naupu haitu, i Yesus hau nompesayo ngata-ngata ri bagia Galilea. Domo nadota Ia hau ri bagia Yudea sabana pakeni-pakeni ntoYahudi hamai da nangelo dala mompatesi Ia.

²Tempo haitu naparamo eo mbaso ntoYahudi anu niuli Posusa Sou Tava.

³Tuei-tuei i Yesus nanguli ka Ia, “Aginamo Iko hau ri bagia Yudea ala pura-pura topangoseaka Iko hamai rakitara muni kabaraka-kabaraka Mupovia.

⁴Apa isema-sema madota rasani ntodea, ledo ratabuniakana poviana. Jadi popakitamo tanda nipokumaaka nipoviaMu ka todea.”

⁵Niulira ivesia sabana nau i Yesus sampesuvura mboto, ledo muni niparasayara Ia.

⁶Nesanamo i Yesus, “Dopa tempona Kupopakita karoKu. Ane komiu, ledo nompetempo ane maria loga hau,

⁷apa ledo ria tona navuu matana nte komiu. Tapi Yaku nipovuu mata ntona nadaa ri dunia hitu sabana Yaku nantuenaka pokainggura nadaa.

⁸Koimo komiu ri posusa haitu. Yaku dopa hau, sabana dopa nakava tempoKu.”

⁹Ivesiamo i Yesus notesa ka sampesuvu-sampesuvuNa. Bo naupu haitu, Ia da naboli ri bagia Galilea.

- ¹⁰Nalaipa sampesuvu i Yesus hau ri Yerusalem, hau munimo Ia saitoNa. Ia hau ri posusa haitu nggalino-lino ala ledo rasani ntodea.
- ¹¹Ri posusa haitu, pakeni-pakeni ntoYahudi nangelo Ia. Ira nekutana-tana, “Ri umba tano Ia?”
- ¹²Ri tatanga ntodea nadeamo tona nosikalivaya nanguli i Yesus. Naria sanu nanguli, “Ia tona nabelo.” Tapi naria muni sanu nanguli, “Ledo! Ia nombabagiu todea!”
- ¹³Tapi ledo ria saitoa tona nabia nanguli ri ngayo ntodea, sabana naeka ira ka pakeni-pakeni ntoYahudi.
- ¹⁴Nagantanga posusa haitu pade nesua i Yesus hau ri doyata Banua nu Alatala bo nompamulamo nompatuduki tona.
- ¹⁵Pakeni ntoYahudi nokumaa mpuu nangepe pepatuduki i Yesus, bo nanguli, “Hai ! Nakuya sampe nadea mpuu nisaniNa, tano mai Ia ledo nosikola?”
- ¹⁶Nesana i Yesus ka ira, “PepatudukiKu ledo lako ri pangisaniKu mboto, tapi lako nte Alatala anu nantudu Yaku.
- ¹⁷Isema-sema madota mangoseaka dota nu Alatala, natantumo rasanina pepatudukiKu hitu lako nte Alatala, bo ledo lako nte Yaku mboto.
- ¹⁸Isema-sema nompatuduki lako ri pangisanina mboto, ia mbeki ratoiya ntona. Tapi isema-sema [ledo nompekirika karon mboto tapi] nompasimbuku ala topantudu ia haitu ratoiya, iamo nanao, ledo ria tenggona.
- ¹⁹Nabi Musa nombadekei ka komiu Atura-atura agama nggaulu, tapi ledo ria saitoa komiu natutu nangoseaka Atura-atura haitu. Ane ledo nakana tesaKu hitu, nakuya komiu nompasimbuku mompatesi Yaku?”
- ²⁰Nesanamo tona dea haitu, “Iko nipesua nu seta! Isema nompasimbuku mompatesi Iko?”
- ²¹Nesana i Yesus, “Aga sangaya kabaraka nipoviaKu bara ipia bo komiu nahera sabana nipoviaKu ri eo penonto.

²²Komiu biasa nombasuna ana langgaimiu ri eo penonto nangoseaka atura nidekei Nabi Musa, nau kakanana ada haitu ledo nopuna lako nte i Musa tapi lako nte totuamiu nggaulu.

²³Komiu novia ada posuna ri eo penonto ala ledo raliunakamiu Atura-atura anu nidekei i Musa. Jadi nakuya komiu narau ka Yaku nompakabelo saito tona nadua njumanggaro ri eo penonto?

²⁴Nee mompakasala tona nangoseaka anu nikita matamiu, tapi nangoseaka kanoana!”

²⁵Naupu haitu naria bara sako-ndua toYerusalem nanguli, “Ledo Ia hitumo tona nielo nu pakeni-pakeni ala rapatesira?”

²⁶Tapi peintamo! Ia notesa ri ngayo ntodea bo ledo ria saitoa tona nombabali tesaNa. Nee-nee bara nisani nu pakenita Iamo Magau Topepakasalama anu nijanji nu Alatala!

²⁷Tapi ledo bara. Apa ane Magau Topepakasalama makava, ledo rasanita lako ri umba kakavana. Tapi tona hitu, nisanita lako ri umba kakavaNa.”

²⁸Jadi tempo i Yesus da nompatuduki ri doyata Banua nu Alatala, nitesaNa ante suaraNa namangga, “Nisanimiu tano isema Yaku bo lako ri umba kakavaKu? Yaku ledo nakava nangoseaka dotaKu mboto, tapi Yaku nakava nangoseaka dota nu Alatala anu nombatudu Yaku. Iamo masipato raparasaya. Ledo ntoto nisanimiu Ia,

²⁹tapi Yaku nosisani ante Ia, sabana Yaku nakava lako nte Ia bo Iamo nantudu Yaku tumai.”

³⁰Nangepe haitu, nipasimbukura mombasaka Ia. Tapi ledo ria saitoa nompakule nombasakaNa sabana dopa nakava tempona nipakatantu nu Alatala.

³¹Tapi nadea lako ri todea haitu nomparasaya Ia. Niulira, “Magau Topepakasalama mpuumo Ia, apa nadea mpuu kabaraka nipoviaNa!”

³²ToFarisi nangepe todea nanggalivaya notesa i Yesus. Haitumo sabana ira bo balengga-balengga ntopanggeni pesomba ntoYahudi nantudu bara sako-ndua topojaga Banua nu Alatala hau mombasaka i Yesus.

³³Tempo haitu, i Yesus nanguli ka todea, “Sampalaipa Yaku mosanggani-nggani ante komiu pade hau manjili nte Ia anu nantudu Yaku.

³⁴Komiu mangelo Yaku, tapi ledo rakavamiu Yaku. Bo ledo mamala komiu hau ri ponturo Kukalau.”

³⁵Nangepe tesa i Yesus haitu, naingumo pakeni ntoYahudi. Nosimpekutanamo ira, “Hau ri umba tano Ia sampe ledo rakavata Ia? Bara hau nte toYahudi anu nonturo ri ngata-ngata ntona ledo toYahudi bo mompatuduki tona ledo toYahudi?

³⁶Nuapa muni batuana tesaNa nanguli kita mangelo Ia tapi ledo rakavata Ia, bo ledo mamala kita hau ri ponturo rakalauNa?”

³⁷Ri eo kaupuna, eo matana posusa haitu, i Yesus neangga ri doyata Banua nu Alatala bo notesa ante suara namangga, “Isema-sema nabai tambolona, kamaimo nte Yaku bo manginu.

³⁸Isema-sema nomparasaya Yaku kana maria uve moili lako riara ntaina anu mombadekei katuvua nabelo, nangoseaka anu nitulisi riara Buku Gasa.”

³⁹Uve nipatuju i Yesus, haitumo Nosa Gasa nu Alatala anu radekei ka tona nomparasaya Ia. Tempo haitu, Nosa Gasa dopa nidekei ka topomparasaya sabana i Yesus dopa neore hau ri suruga bo nipakaoge nu Alatala.

⁴⁰Nadea tona nangepe tesa i Yesus haitu bo naria sanu ira nanguli, “Natantumo Ia nabi anu nijanji nu Alatala nggaulu!”

⁴¹Bo naria muni sanu ira nanguli, “Ia hitumo Magau Topepakasalama anu nijanji nu Alatala!” Tapi naria muni sanu tona nanguli, “Ledo! Magau Topepakasalama ledo makava lako ri bagia Galilea!

⁴²Apa riaru Buku Gasa nitulisi Magau Topepakasalama meumba lako ri muli Magau Daud, bo makava lako ri ngata Betlehem ngata nipompoanaka Magau Daud.”

⁴³Jadipa todea haitu nosinjanai, sanu nomparasaya i Yesus, sanu ledo.

⁴⁴Naria bara sako-ndua ira madota mombasaka Ia, tapi ledo ria saitoa nabia nangingisiNa.

⁴⁵Naupu sia, topojaga Banua nu Alatala anu nitudu mombasaka i Yesus pangane, nanjili hau nte toFarisi bo balengga-balengga ntopanggeni pesomba. Nakava hamai, toFarisi bo balengga-balengga haitu nanguli ka ira, “Nakuya ledo nikenimiu tona haitu tumai?”

⁴⁶Nesanamo topojaga Banua nu Alatala haitu, “Dopa naria niepe kami tona notesa mpo Ia.”

⁴⁷Nesanamo toFarisi, “NibagiuNa munimo komiu?”

⁴⁸Peintamo! Ledo ntoto ria pakeni agama atau toFarisi nomparasaya Ia!

⁴⁹Aga todea biasa gahaitu nomparasaya, apa ledo nisanira Atura-atura agama. Nasurukavumo ira!”

⁵⁰Saito toFarisi hamai nosanga i Nikodemus. Sangganimo ia hau nte i Yesus. Nanguli ia ka roa-roana,

⁵¹“Nangoseaka Atura-atura agamata, ledo mamala rapakasalata tona ane dopa niepeta parakarana bo dopa niparesata pokaingguna.”

⁵²Nesana roa-roana toFarisi, “Nakuya nialikukamiu Ia? Komiu muni toGalilea? Paresamo Buku Gasa pakabelo-belo! Rakitamiu ledo ria saitoa nabi meumba lako ri bagia Galilea!”

⁵³Naupu haitu, nanjilimo ira pura-pura hau ri banuara mboto.

Yohanes 8

¹Tapi i Yesus hau ri Bulu Zaitun.

- ²Kamaile bobayana, hau vaimo Ia nesua ri doyata Banua nu Alatala, bo nakavamo todea nasiromu nte Ia. Nonturomo Ia bo nompatuduki ira.
- ³Tempo haitu, nakavamo guru-guru agama bo toFarisi nanggeni saito mombine nikavara nobualo. Mombine haitu nipopeanggara ri ngayo ntodea.
- ⁴Bo niulikara i Yesus, “Guru, mombine hitu nikava kami nobualo.
- ⁵Riara Atura-atura agama, naria parenta i Musa nanguli, ane mombine nokainggu ivesia kana rarempe ante vatu sampe mamate. Jadi berimba panggavaMiu pokainggu nu mombine hitu?”
- ⁶Patuju nu pompekutanara haitu mombatoliani tesa i Yesus ala mamala rapakasalara Ia. Tapi i Yesus ledo notingo. Ia aga notungga notulisi tana ante koya-mpaleNa.
- ⁷Tapi ledo nenonto ira nompekutana-tana. Jadi kaupuna niumberaka i Yesusmo balenggaNa bo nanguli, “Isema-sema komiu ledo nadosa, iamo mokolu mombarempe mombine hitu ante vatu.”
- ⁸Naupu i Yesus notesa ivesia, notungga vaimo Ia notulisi tana ante koya-mpaleNa.
- ⁹Nangepe tesa i Yesus haitu, nalai saito-saitomo ira lako ri sia, nompamula lako ri totua sampe tona namuda. Kaupuna nalai puramo, naboli damo i Yesus ante mombine pangane batena neangga ri belana.
- ¹⁰Bo niumberaka i Yesus balenggaNa bo niulikaNa mombine haitu, “Ri umba puramo tona pangane? Domo ria topombahuku iko?”
- ¹¹Nesana mombine haitu, “Domo ria, Pue.” Nanguli i Yesus, “Yaku muni ledo mombahuku iko. Panjilimo bo tumo rapovia dosa.”
- ¹²Naupu haitu nanguli vaimo i Yesus ka todea, “Yakumo hii reme dunia. Isema-sema mangoseaka Yaku ledo matuvu ri kalandana, tapi manggava reme anu mombadekei katuvua mabelo.”
- ¹³Nesana toFarisi, “Aga tesaMu mboto tu! Jadi ledo nakana.”

¹⁴Nesana i Yesus, “Nau karoKu mboto nitesaKu, nakana tesaKu sabana nisaniKu lako ri umba kakavaKu bo hau ri umba Kukalau. Tapi ledo nisanimiu lako ri umba kakavaKu bo hau ri umba Kukalau.

¹⁵Komiu nompakasala tona nangoseaka pompekirimiu mboto. Yaku ledo nompakasala tona.

¹⁶Tapi ane rapana Kupakasala tona, natantumo pobotusiKu manoa, sabana ledo aga pobotusiKu saitoKu tapi pobotusi nTuamaKu anu nantudu Yaku.

¹⁷Riara Atura-atura agama naria nitulisi ivei: ‘Ane maria randua sabi masimbayu tesara riara potangara, tesara namala raparasaya.’

¹⁸Naria randua anu nombasabiki Yaku. Yaku mboto saito, bo karanduana TuamaKu anu nantudu Yaku.”

¹⁹Bo nekutana vaimo ira, “Ri umba TuamaMu?” Nesana i Yesus, “Ledo nisanimiu mpuu Yaku. Bo ledo muni nisanimiu mpuu TuamaKu. Ane rapana nisanimiu mpuu Yaku, natantu rasanimiu mpuu TuamaKu.”

²⁰Tesa i Yesus haitu nitesaNa ri doyata Banua nu Alatala tempo Ia nompatuduki tona napara peti pomboli doi pesomba. Ledo ria saitoa tona namala mombasaka Ia sabana dopa nakava tempoNa.

²¹Bo nanguli vaimo i Yesus ka todea, “Yaku malai lako ri sii bo raelomiu Yaku, tapi komiu aga rapopogaa lako nte Alatala sabana dosamiu. Komiu ledo mamala hau ri ponturo Kukalau.”

²²Nangepe haitu, nosiulikamo pakeni ntoYahudi, “Bara Ia mopatuju mompatesi karoNa mboto, sabana niuliNa kita ledo mamala hau ri ponturo rakalauNa.”

²³Tapi nanguli i Yesus ka ira, “Komiu nopuna lako ri dunia hitu, tapi Yaku nopuna lako ri suruga. Komiu todea ri dunia hitu, tapi Yaku ledo.

²⁴Haitu sampe niuliKu ka komiu, komiu mamate bo rapopogaa lako nte Alatala sabana dosamiu. NiuliKumo isema Yaku. Ane ledo raparasayamiu tesaKu haitu, komiu mpuu-mpuu mamate bo rapopogaa lako nte Alatala sabana dosamiu.”

²⁵Bo nekutana vaimo toYahudi, “Kakanana, isema tano Iko?” Nesana i Yesus, “Domo ria gunana Kutesa ka komiu!

²⁶Da nadeapa mamala Kuuli mompakasala komiu, tapi ledo Kuuli. Aga anu niepeKu lako nte Ia anu nantudu Yaku, haitumo Kutesa ka manusia ri dunia. Bo Ia namala raparasaya.”

²⁷Ledo nisanira i Yesus notesaki TuamaNa ri suruga.

²⁸Haitu sampe niuliNa vai ka ira, “NiuliKu ka komiu isema Yaku. Bo maupu komiu manganggataka Yaku, Ana nu Manusia, [ri kayu salib], tempo haitu pade rasanimiu tesaKu hitu nakana bo rasanimiu muni ledo ria sangayaa nipoviaKu nangoseaka dotaKu mboto. Tapi Yaku bate-batena notesa nangoseaka anu nipatuduki nTuamaKu ka Yaku.

²⁹Ia anu nantudu Yaku, Ia muni nomporoa Yaku. Ledo rapalambaNa Yaku saitoKu, sabana Yaku bate-batena novia anu nompakadamba raraNa.”

³⁰Naliu i Yesus notesa ivesia, nadeamo tona nomparasaya Ia.

³¹Naupu haitu, i Yesus nanguli ka toYahudi anu nomparasaya Ia, “Ane komiu maroo mangoseaka tesaKu, komiu mpuu-mpuu topangoseaka Yaku.

³²Bo ane ivesia, rasanimiumo pepatuduki nakana sampe komiu rakabasaka lako ri pobatuamiu.”

³³Nesana pakeni ntoYahudi, “Kami hii muli i Abraham. Dopa sanggania kami nipobatua ntona. Berimba bo niuliMiu kami domo rapobatua?”

³⁴Nesana i Yesus ka ira, “Pariaramo tesaKu hitu. Isema-sema novia dosa, iamo nipobatua nu dosa.

³⁵Ane batua, ledo natantu makuasa riaru banua nu madika. Tapi ane ana nu madika, natantumoa ia makuasa riaru banua ntuamana.

³⁶Jadi, ane Ana nu Alatala mbotomo mombakabasaka komiu [lako ri dosa], makabasaka mpuumo komiu!

³⁷NisaniKu komiu pura-pura muli i Abraham. Tapi nau damo ivesia, komiu madota mompatesi Yaku, sabana ledo nipokonomiu mantarima pepatudukiKu.

³⁸Anu nikitaKu nte TuamaKu, haitumo nitesaKu ka komiu. Tapi komiu aga novia anu nipatuduki ntuamamiu ka komiu.”

³⁹Nesana ira ka i Yesus, “Tuama kami i Abraham.” Nanguli i Yesus, “Ane komiu mpuu-mpuu muli i Abraham, natantumo pokainggumi mabelo, nasimbayu mpo pokainggu i Abraham.

⁴⁰Yaku nompasimbayu ka komiu pepatuduki nakana anu niepeKu lako nte Alatala, tapi komiu aga nompasimbuku mompatesi Yaku. Ledo ivesia pokainggu i Abraham!

⁴¹Pokainggumi tu nanjava pokainggu ntuamamiu mboto!” Nesana vaimo ira, “Kami ledo ana vone! Tuama kami aga saito, haitumo Alatala.”

⁴²Nanguli i Yesus ka ira, “Ane Alatala tuamamiu, tantu rapotovemi Yaku, sabana Yaku nopuna lako nte Ia. Yaku nakava ledo nangoseaka dotaKu mboto, tapi nangoseaka dota nu Alatala anu nantudu Yaku.

⁴³Natantumo ledo nipahamiu tesaKu sabana ledo nipokonomiu mantarima pepatudukiKu.

⁴⁴Komiu nasimbayu ante tuamamiu, Magau nu Seta! Komiu batena madota mangoseaka dotana. Lako ri pamulaname ia bate-batena topepatesi. Ia ledo nosabingga ka anu nakana, sabana ledo ria nuapa-nuapa nakana riarantaina. Masipato ia modava, apa ia topodava mami bo puna nu dava.

⁴⁵Yaku notesa anu nakana ka komiu, bo ledo niparasayamiu sabana komiu muni topodava.

⁴⁶Coba popakita ka Yaku dosaKu! Nakana anu nitesaKu, jadi nakuya ledo niparasayamiu?

⁴⁷Tona nopuna lako nte Alatala mompariara tesa nu Alatala. Tapi komiu ledo mompariara tesaNa sabana komiu ledo nopuna lako nte Alatala.”

⁴⁸Nangepe tesa haitu, nangulimo toYahudi ka i Yesus, “Hm! Nakana mpuu niuli kami! Iko nipesua nu seta! Iko nasimbayu mpo toSamaria naruto!”

⁴⁹Nesana i Yesus, “Yaku ledo nipesua nu seta. Yaku nombabila TuamaKu, tapi aga nisalaimiu Yaku.

⁵⁰Yaku ledo mbeki rabila ntona. Tapi TuamaKu madota Yaku rabila ntona bo Iamo topotangara nanao.

⁵¹Pariaramo tesaKu hitu. Isema-sema mangoseaka tesaKu ledo mamate sampe ri kasae-saena.”

⁵²Nangepe haitu nanguli toYahudi ka i Yesus, “Hitupa nisani kamimo nipesua nu seta mpuumo Iko! I Abraham bo nabi-nabi nggaulu namate puramo. Tapi panguliMu, isema-sema nangoseaka tesaMu ledo mamate sampe ri kasae-saena!

⁵³Berimbamo? Naogepa Iko pade tuputa i Abraham? Ia bo nabi-nabi nggaulu namate puramo! Isema ntoto Iko sampe Iko nabia notesa ivesia?”

⁵⁴Nesana i Yesus, “Ane Yaku nombabila karoKu mboto, ledo ntoto maria batuana. Tapi TuamaKu nombabila Yaku bo Iamo anu nipangakumiu Alatala nisombamiu,

⁵⁵nau komiu ledo nosisani ante Ia. Tapi Yaku nosisani belo ante Ia. Ane rapana Kuuli Yaku ledo nosisani ante Ia, tantu Yaku majadi topodava nasimbayu mpo komiu. Tapi Yaku mpuu-mpuu nosisani ante Ia bo Yaku natutu nangoseaka tesaNa.

⁵⁶Totuamiu nggaulu i Abraham, nadamba mpuu rarana sabana nisanina rakitana Yaku makava. Nikitanamo bo nadamba mpuumo rarana.”

⁵⁷Nanguli vaimo toYahudi, “Ba! Iko tu dopa rakavana lima-pulu mpaе umuruMu! Berimba sampe Iko nanguli nikitaMumo i Abraham, totua kami nggaulu?”

⁵⁸Nesanamo i Yesus, “Pariaramo tesaKu. Dopame i Abraham nipoanaka, naria mamimo Yaku!”

⁵⁹Nangepe tesa i Yesus haitu, nangala vatumo toYahudi mombarempe Ia. Tapi Ia netinggalipo lako ri tatangara bo nalai lako ri Banua nu Alatala haitu.

Yohanes 9

- ¹Tempo i Yesus noliu, nikitaNa saito tona naburo mami lako ri pompoanaka.
- ²Nekutanamo ana-anaguru i Yesus, “Guru, isema nadosa sampe tona hitu naburo mami lako ri pompoanaka? Totuana atau ia mboto?”
- ³Nesana i Yesus, “Ledo ia nadosa, ledo muni totuana. Tapi haitu najadi ala kuasa nu Alatala mamala rakita riara nggatuvuna.
- ⁴Ane eona da narava, kita kana movia pokarajaa nu Alatala anu nantudu Yaku. Apa ane mabongimo domo mamala mokaarajaa.
- ⁵Sanggariana Yaku riara dunia hitu, Yakumo reme anu nompakareme pekiri nu manusia.”
- ⁶Naupu nitesaNa ivesia, niteveulusiNamo tana bo nipinjukiNa pade nigeseNa ri mata ntoburo.
- ⁷Pade nituduNa, “Koi doupimo matamu ri uve Kola Siloam.” Siloam batuana “Nitudu.” Jadi hau mpuumo toburo haitu. Nakava ri Kola Siloam, nidoupinamo matana. Nanjilipa ia, nekita mo matana.
- ⁸Tona nosadoyata ante ia bo tona nanggita ia nerapi-rapi ri bivi dala bara ipia, nosipekutana, “Ledo ia haitu tona nonturo ri bivi dala nerapi-rapi bara ipia?”
- ⁹Naria sanu nanguli, “Nakana! Iamo!” Tapi naria muni sanu tona nanguli, “Ledo ia, aga lenjena nasimbayu.” Tapi ia mboto nanguli, “Yakumo!”
- ¹⁰Jadi nipekutanaramo, “Berimba sampe matamu nekita?”
- ¹¹Nesana ia, “Tona nosanga i Yesus notoveulusi tana, bo nipinjukiNa sakide tampo haitu, bo nigeseNa ri matakuku. Pade nituduNa yaku hau mombadousi matakuku ri Kola Siloam. Jadi hau mpuumo yaku bo naupu nendou namalamo matakuku nekita.”
- ¹²Nekutana vaimo ira, “Ri umbamo tona haitu?” Nesana toburo, “Ledo nisaniku.”

13-14Tempo i Yesus nombagalo tana ante veuluNa bo nompopekita mata ntoburo haitu nambela eo penonto. Jadi haitumo sampe toburo anu nabelomo matana niken ntona hau ri ngayo ntoFarisi.

15Bo toFarisi muni nompekutana toburo, “Berimba sampe matamu nipopekita?” Nesana ia, “NigeseNa tampo matakupade nidousiku bo namalamo matakunekita.”

16Bara sako-ndua toFarisi haitu nanguli, “Natantumo i Yesus haitu ledo lako nte Alatala, sabana Ia ledo nangoseaka atura-atura eo penonto.” Tapi naria muni sanu nanguli, “Umbamo tona nadosa mamalamovia kabaraka ivehaitu?” Jadi nosisala panggava ira.

17Jadi nipekutana ntoFarisi vaimo toburo, “Berimba panggavamu, apamatamu nipakabeloNa.” Nesana toburo, “Ia nabi.”

18Tapi ledo niparasaya ntoFarisi tona haitu mpuu-mpuu naburo bo dako nipopekita matana. Jadi nipokiora tina tuama ntoburo nipakabelo matana haitu

19bo nipekutanara, “Nakana mpuu hitumo anamiu anu niulimiu naburo mami lako ri pompoanaka? Berimba sampe sii-sii nabelomo matana?”

20Nesana tina tuama ntoburo haitu, “Nisani kami, ia mpuu-mpuu ana kami, bo ia mpuu-mpuu naburo mami lako ri pompoanaka.

21Tapi bara berimba sampe ia namala nekita sii-sii, ledo nisani kami. Bo ledo muni nisani kami bara isema nompakabelo matana. Aginamo ia mboto rapekutanamiu. Ia nambasomo. Ia mbotomo mamalamo mesanaka pompekutanamiu.”

22Tina tuamana nanguli ivesia sabana naekamo ira ka toFarisi. Apa toFarisi haitu nasintuvumo isema-sema mompangaku i Yesus Magau Topepakasalama anu nijanji nu Alatala, domo radekei metupu ri banua petupu.

23Haitumo sampe tina tuamana nanguli, “Ia nambasomo. Aginapa ia mboto rapekutanamiu.”

²⁴Naupu haitu, nipokiora vai sangganipa toburo haitu bo nipekutanara, “Ulimo anu nakana ri ngayo nu Alatala! Nisani kamimo tona nompakabelo matamu haitu tona nadosa!”

²⁵Bo nesana toburo haitu, “Ledo nisaniku bara nadosa Ia bara ledo. Tapi anu nisaniku, pangane yaku naburo, tapi hitupa nekitamo matakū.”

²⁶Bo nanguli vaimo toFarisi ka ia, “Nuapa nipoviaNa ka iko? Berimba pompakabeloNa matamu?”

²⁷Nesana toburo haitu, “Nitesakumo ka komiu pangane tapi ledo niparasayamiu. Nakuya rapekutanamiu vai? Madota muni komiu mangoseaka Ia?”

²⁸Naraumo ira bo niraira ivei: “Ikomo tu topangoseaka Ia, kami ledo! Kami topangoseaka i Musa!

²⁹Nisani kami Alatala notesa nte i Musa nggaulu. Tapi tona haitu, ledo nisani kami unu nu apuNa.”

³⁰Bo nesana vaimo toburo haitu, “Hai! Nahera mpuu yaku! Ledo nisanimiu lako ri umba kakavaNa, tapi Ia nompakabelo matakū naburo!

³¹Nisanita Alatala ledo nangepe posambaya ntona nadosa, tapi Ia nompetingai posambaya ntona netupu nte Ia bo nangoseaka dotaNa. ³²“Ane tona haitu ledo lako nte Alatala, berimbamo Ia mompakabelo matakū?” Lako ri lamba pamulana dopa sanggani niepeta naria tona namala nompakabelo mata ntona naburo mami lako ri pompoanaka.

³³Ane tona haitu ledo lako nte Alatala, natantumo Ia ledo mamala movia nuapa-nuapa.”

³⁴Nesana ira, “Hih! Iko tu todosa mami lako ri pompoanaka! Ledo ntoto masipato iko mompatuduki kami!” Jadi nompamula lako ri eo haitu, domo nidekeira tona haitu metupu ri banua petupu.

³⁵Niepe i Yesusmo tona haitu domo radekei metupu ri banua petupu ntoYahudi, hau Ia mosinggavaka bo nipekutanaNa, “Berimbamo? Niparasayamu Ana nu Manusia?”

³⁶Nesana tona haitu, “Isema tona niuliMiu, Guru? Uli ka yaku ala kuparasaya Ia.”

³⁷Nanguli i Yesus ka ia, “Nikitamumo Ia. Iamo notesa ante iko.”

³⁸Bo nanguli tona haitu, “Ane ivesia, Pue! Niparasayakumo!” Bo nantaputumo ia mombasomba i Yesus.

³⁹Nanguli i Yesus ka ia, “Patuju kakavaKu ri dunia hitu ala mompakalanto sala ntona ala tona naburo mamala mekita, bo tona nisarumakana nekita, majadi maburo.”

⁴⁰Naria bara sako-ndua toFarisi neangga ri sia bo niepera i Yesus nanguli ivesia, nekutanamo ira, “NisarumakaMu kami hii naburo muni?”

⁴¹Nesana i Yesus, “Ane rapana komiu naburo mami, natantumo ledo nadosa komiu. Tapi komiu nanguli namala nekita. Haitu sampe komiu bate-batena nadosa.”

Yohanes 10

¹“Pariaramo tesaKu hitu. Ane tona aga nompene vala nesua riarra gimpu bo ledo nesua ri bobaa, tona haitu topangangga bo topeago.

²Tapi topoevu bimba-bimba haitu, nesua ri bobaa nu gimpu.

³Topojaga gimpu mombabuka bobaa ka ia, bo bimba-bimba haitu mombatalingai suarana ane rapokiona sangara sangu-sangu. Bo rakenina ira hau ri savalikuna.

⁴Ane nesuvu ri savalikuna puramo bimba, topoevu molipa mokolu ka bimbana haitu. Bo bimba-bimba haitu mangoseaka purina, sabana nisanira suara ntopoevu.

⁵Bimba-bimba haitu ledo mangoseaka tona ntanina, tapi aga rapalaikara tona haitu, sabana ledo nisanira suarana.”

- ⁶I Yesus notesa porapa haitu ka toFarisi, tapi ledo nisanira batuana.
- ⁷Sabana haitu, nanguli vaimo i Yesus ka ira, “Pariaramo tesaKu hitu! Yakumo hii bobaa rapesua nu bimba hau riara gimpu.
- ⁸Pura-pura tona nakava nokolu ka Yaku, aga topangangga bo topeago. Tapi bimba-bimba ledo nombatalingai suarara.
- ⁹Yakumo hii bobaa. Isema-sema mesua modala nte Yaku rapakasalama. Ia mamala mesua bo mesuvu manggava kande.
- ¹⁰Ane topangangga, ia aga tumai mangangga, mepatesi, bo mompakagero. Tapi Yaku hii nakava ala manusia manggava katuvua mabelo bo katuvua haitu ledo ria kakurana.”
- ¹¹“Yakumo hii topoevu nabelo. Yaku nasadia mamate ala bimbaKu matuvu.
- ¹²Tona nigaji anu ledo topoevu bimba bo ledo muni tupu nu bimba, ane rakitana asulaku makava mombaraga bimba-bimba, aga rapalaikana bimba-bimba haitu apa ledo bimbana mboto. Jadi bimba haitu raraga bo rasaka nu asulaku sampe masimpotare.
- ¹³Tona nigaji haitu mangova malai sabana ia aga nigaji. Ledo rapotovena bimba-bimba haitu.
- ¹⁴⁻¹⁵Yakumo hii topoevu nabelo. TuamaKu nisaniNa Yaku bo Yaku nisaniKu muni Ia. Ivesia muni nisaniKu pura-pura bimbaKu bo bimba-bimbaKu nisanira Yaku. Bo Yaku mamate ala bimba-bimbaKu mamala matuvu.
- ¹⁶Da nariapa bimba-bimbaKu ntanina anu dopa nesua riara gimpu hitu. Ira muni kana Kukeni tumai. Ira mombatalingai suaraKu bo pura-pura bimbaKu majadi salunu rapoevu ntona saito.
- ¹⁷TuamaKu nompotove Yaku sabana Yaku nasadia nombadekei karoKu rapatesi ala Yaku matuvu mpanjili.
- ¹⁸Ledo ria saitoa tona mamala mompatesi Yaku ane ledo Kudekei. Tapi Yakumo anu mombadekei karoKu rapatesi nangoseaka dotaKu mboto. Yaku nakuasa

mombadekei karoKu rapatesi bo Yaku nakuasa muni matuvu mpanjili, sabana haitumo niparenta nTuamaKu ka Yaku.”

¹⁹Nangepe tesa i Yesus haitu, nosinjanai vai toYahudi.

²⁰Nadea ira nanguli, “Ia haitu nipesua nu seta! Nagila ntotomo Ia! Rapokuya raepeta tesaNa?”

²¹Tapi naria muni sanu tona nanguli, “Ledo! Ane tona nipesua nu seta, ledo ivesia tesana! Natantum seta ledo mamala mompakabelo tona naburo!”

²²Naliu haitu, nakavamo gantana Posusa Mombatora Pobaruki Banua nu Alatala ri ngata Yerusalem. Posusa haitu nambela tempo naranindi.

²³I Yesus nolipa ri tambale ri doyata Banua nu Alatala anu nosanga Tambale Magau Salomo.

²⁴Bo nakavamo pakeni ntoYahudi nantagui Ia hamai. Nekutanamo ira, “Sampe maipia Iko mompakaingu kami? Ane Iko mpuu-mpuu Magau Topepakasalama anu nijanji nu Alatala, uli pakalanto ka kami!”

²⁵Nesana i Yesus, “NiuliKumo ka komiu, tapi ledo niparasayamiu. Kabaraka-kabaraka nipoviaKu ante kuasa lako nte TuamaKu nompopaisani ka komiu isema Yaku hii.

²⁶Tapi ledo ntoto niparasayamiu sabana komiu ledo bimba-bimbaKu.

²⁷Bimba-bimbaKu nantalingai tesaKu bo nisaniKu ira bo nioseakara Yaku.

²⁸Yaku nombadekei ka ira katuvu mabelo sampe ri kasae-saena bo ira ledo ntoto rapopogaa lako nte Alatala. Ledo ntoto maria saitoa tona mamala mangago bimbaKu lako nte Yaku.

²⁹TuamaKu niparasayakaNa ka Yaku bimba-bimba haitu bo Iamo naogepa pade pura-pura anu naria. Ledo ntoto ria saitoa tona mamala mangago ira lako nte Ia.

³⁰Yaku bo TuamaKu ledo ria posisalana, aga saito.”

³¹Nangepe tesaNa haitu, niala ntoYahudimo vatu raporempera i Yesus.

³²Tapi nanguli i Yesus ka ira, “Nadeamo povia nabelo lako nte TuamaKu nipopakitaKu ka komiu. Povia umbana sampe rarempemiu vatu Yaku?”

³³Nesana toYahudi, “Ledo poviaMu nabelo sampe Iko rarempe kami vatu. Tapi sabana Iko nompandaente Alatala. Iko aga manusia biasa, tapi Iko nompakasimbayu karoMu ante Alatala!”

³⁴Nesana i Yesus, “Riara Atura-atura agamamiu, naria tesa nu Alatala ʼka pakeni ntoYahudi nggaulu,ʼ nitulisi ivei: ‘Komiu pura-pura nanjava Alatala.’

³⁵Anu nitulisi riara Buku Gasa haitu ledo nabali-bali tapi bate-batena nakana sampe ri kasae-saena. Tona nantarima tesa nu Alatala nggaulu haitu niuliNa ‘nanjava Alatala’,

³⁶nemopa Yaku! Apa Yakumo hii nipelisi nu Alatala bo nituduNa tumai ri dunia! Jadi nakuya komiu nanguli Yaku nompandaente Alatala sabana niuliKu Yakumo hii Ana nu Alatala?

³⁷Ane rapana ledo Kupovia pokarajaa niparasaya nTuamaKu ka Yaku, nee raparasayamiu Yaku.

³⁸Tapi nipoviaKu pokarajaa haitu jadi kana raparasayamiumo Yaku. Nau ledo madota komiu momparasaya tesaKu, kana raparasayamiu sabana anu nipoviaKu. Ivesiamo rasanimiu mpuu-mpuu Yaku nosangu rara nte TuamaKu bo TuamaKu muni nosangu rara nte Yaku.”

³⁹Nangepe haitu, pakeni ntoYahudi nompasimbuku vaimo mombasaka i Yesus, tapi nalaimo Ia.

⁴⁰Naupu haitu, haumo i Yesus nanjili ri sambote Binangga Yordan. Bo Ia naroo hamai ri ponturo i Yohanes Topediu nombadiu tona bara ipia.

⁴¹Nadea tona hau nosinggava nte Ia. Bo simbo notesamo ira, “I Yohanes ledo ntoto novia kabaraka. Tapi ia nantesa i Yesus bo tesana haitu nakana mpuu!”

⁴²Bo nadea tona hamai nomparasaya i Yesus.

Yohanes 11

¹⁻²Naria saito langgai nosanga i Lazarus anu nonturo ri ngata Betania nosangani-nggani ante sampesuvuna mombine anu nosanga i Maria bo i Marta. I Maria mombine nombatoli lana dupa ri kada i Yesus bo nipakabaina ante buluana. Naria sanggani i Lazarus nadua ntamo.

³Jadi sampesuvuna randua nombatudu tona hau mangulika i Yesus ivei: “Pue, vega nipotoveMiu nadua.”

⁴Nangepe kareba haitu, nangulimo i Yesus, “Duana haitu dopa rapomatena. Haitu najadi ala Alatala mompopakita kuasaNa. Bo lako ri duana haitu, rasani ntona Yaku, Ana nu Alatala, nakuasa muni.”

⁵I Yesus nompotove i Marta, i Maria bo i Lazarus.

⁶Tapi tempo niepeNa karebana i Lazarus nadua, nitunggaiNa rombongipa kasaena pade hau Ia.

⁷Naliu rombongi haitu, niuliNa ka ana-anaguruNa, “Anumo, kita manjili hau ri bagia Yudea.”

⁸Nesana anaguruNa, “Guru, dopa nasae toYahudi hamai madota mombaremppe Komiu ante vatu sampe mamate. Nuapa sabana sii-sii Komiu madota hau vai?”

⁹Nanguli i Yesus ka ira, “Saeo sapulu rojaa kasaena. Tona nolipa ri eona, ledo matepasunu vatu kadana, apa nikitana reme anu nombavanta dunia.

¹⁰Tapi tona nolipa tempo nabongi, matepasunu vatu kadana sabana ledo ria nuapa-nuapa nompakareme dalana.”

¹¹Ivesiamo tesa i Yesus ka anaguruNa. Naupu haitu, nipapolaNa tesaNa ka ira. NiuliNa, “Vegata i Lazarus namonjomo. Tapi hau Kulike ia.”

¹²Bo nesana ana-anaguru i Yesus, “Ane namonjo mpuumo i Lazarus, tantu ia kana mabelo mpanjili lako ri duana haitu.”

¹³Nisarumaka nu anaguruNa namonjo biasa i Lazarus. Tano mai patuju tesa i Yesus nanguli i Lazarus namatemo.

¹⁴Haitumo sabana i Yesus notovontoo ka ana-anaguruNa, “I Lazarus namatemo.

¹⁵Nadamba raraKu Yaku ledo naria hamai tempo ia namate, sabana kamatena haitu manggeni belo ka komiu ala raparasayamiu Yaku. Anumo, haumo kita mompeinta i Lazarus.”

¹⁶Bo i Tomas anu nidae “Ngana Rapi” nanguli ka roa-roana anaguru i Yesus, “Anumo, kita mangoseaka Ia ala kita muni mamate mosanggani-nggani ante Ia.”

¹⁷Tempo i Yesus nakava ri ngata Betania, pata-mbongimo kasaena i Lazarus ri dayo.

¹⁸Ngata Betania haitu napara ngata Yerusalem, nitasere talu-kilo kakavaona.

¹⁹Jadi nadeamo toYahudi nakava nte i Marta bo i Maria mompakavoe rarara sabana sampesuvura i Lazarus namatemo.

²⁰Niepe i Martapa naparamo i Yesus, hau ia mantomunaka Ia. I Maria nepopea ri banuana.

²¹Nosinggavapa nte i Yesus, nangulimo i Marta ka Ia, “Pue, ane naria Komiu ri sii tempo haitu, ledo mamate sampesuvuku i Lazarus.

²²Tapi naupa ivesia, nisaniku nuapa-nuapa raperapiMiu sii-sii, radekei nu Alatala ka Komiu.”

²³Nanguli i Yesus ka i Marta, “Sampesuvumu haitu da matuvu mpanjili.”

²⁴Nanguli i Marta, “Iyo. Nisaniku ia matuvu mpanjili ri kaupu nu dunia tempo pura-pura tona namate matuvu mpanjili.”

²⁵Nanguli i Yesus ka i Marta, “Yakumo anu nompakatuvu mpanjili tona namate bo Yakumo nombadekei katuvua nabelo. Isema-sema nomparasaya Yaku, nau ia mamatemo, ia batena matuvu mabelo.

²⁶Bo isema-sema natuvu nabelo bo nomparasaya Yaku, ledo mamate bo rapopogaa lako nte Alatala sampe ri kasae-saena. Niparasayamu anu niuliKu hitu?”

²⁷Nanguli i Marta, “Iyo, Pue. Niparasayakumo Komiu tu Ana nu Alatala, Magau Topepakasalama anu nijanji nu Alatala makava ri dunia.”

- ²⁸Naupu i Marta notesa ka i Yesus ivesia, hau ia nompokio i Maria bo nanggalivaya ka ia, “Nakavamo i Guru. Ia madota mosinggava nte iko.”
- ²⁹Nangepe tesa i Marta haitu, neangamo i Maria hau nasalisa mosinggava nte i Yesus.
- ³⁰Tempo haitu, i Yesus dopa nesua rangata Betania. Ia da ri savalikuna, ri ponturo niposinggavaNa ante i Marta.
- ³¹ToYahudi anu nompakavoe rara i Maria ri banuana nanggita ia nompari-mpari hau. Jadi hau muni ira netuntuni ri puri. Nisarumakara ia hau ri dayo mantangisi sampesuvuna.
- ³²Nakavapa i Maria nte i Yesus, nantaputumo ia ri ngayoNa bo nanguli, “Pue, ane naria Komiu ri sii bara ipia, natantumo ledo mamate sampesuvuku.”
- ³³Tempo i Yesus nanggita i Maria nte toYahudi anu nomporoa ia notumangi-mangi, nasusa mpuumo raraNa.
- ³⁴Bo nekutanamo Ia, “Ri umba dayona?” Nesanamo ira, “Pue, kaimo, hau rapeintata.”
- ³⁵Notumangimo i Yesus.
- ³⁶Nanggita haitu, nanguli toYahudi anu nantuntuni i Maria pangane, “Peintamo. Nipotove i Yesus mpuumo i Lazarus.”
- ³⁷Tapi naria muni sanu ira nanguli ka roa, “Tona naburo namala nipakabeloNa. Nakuya bo ledo namala nipakabeloNa i Lazarus nadua ala ia ledo mamate?”
- ³⁸I Yesus nanggaparai dayo i Lazarus ante susa raraNa. Dayo haitu bolo vatu ri kente nu bulu, vambana niupi ante vatu mbaso.
- ³⁹Nanguli i Yesus, “Lelakamo vatu haitu!” Tapi nanguli i Marta, sampesuvu ntomate haitu, “Pue, natantu navaumo ia, apa pata-mbongimo ia riar dayona.”
- ⁴⁰Nanguli i Yesus ka i Marta, “Nuapa niuliKu ka iko pangane? Ane muparasaya, mukita kaoge kuasa nu Alatala!”

⁴¹Naupu sia, nilelakaramo vatu mbaso nipombatutui dayo haitu. Pade nitingoa i Yesusmo langi bo nosambaya, “Tata, Yaku nosukuru sabana posambayaKu hitu niepeMiumo.

⁴²NisaniKu Komiu bate-batena nangepe posambayaKu, tapi niuliKu ivesia ala raepe ntona ri sii ala raparasayara Komiumo nombatudu Yaku tumai ri dunia.”

⁴³Naupu notesa ivesia, nongaremo i Yesus ante suara namangga, “Lazarus! Pesuvumo!”

⁴⁴Bo nesuvu mpuumo i Lazarus lako riara nu dayo. Kadana bo palena da nibeve sompu bo balenggana da nipou kae. Bo nanguli i Yesus ka ira, “Volemo pompouna ala mabelo ia molipa.”

⁴⁵Nadea toYahudi nakava mompakavoe rara i Maria bo nikitara anu nipovia i Yesus. Bo nadeamo ira nomparasaya Ia.

⁴⁶Tapi naria muni sanu hau nte toFarisi nombatesa ka ira anu nipovia i Yesus.

⁴⁷Jadi balengga-balengga ntopanggeni pesomba bo toFarisi nompasiromu toPolibu Mbaso Agama Yahudi. Niulira ka topolibu anu nasiromu haitu, “Nuapa masipato rapoviata? Nadea mpuu kabaraka nipovia ntona haitu.

⁴⁸Ane kita batena mompalamba Ia ivesia, natantumo pura-pura tona momparasaya Ia ngena! Bo kaupuna tantara nu Magau Mbaso ri ngata Roma makava mombagero Banua nu Alatala bo pura-pura ngatata!”

⁴⁹Naria saito ira nosanga i Kayafas, anu najadi Pakeni nTopanggeni Pesomba mpae haitu. NiulikaNa ira, “Ledo nisanimiu nuapa-nuapa!

⁵⁰Ledo ntoto nipekirimiu kabelo ka todea! Aginapa saito tona mamate pade todea rapakaropu! Agina saito mamate manjambei todea!”

⁵¹Kakanana tesa i Kayafas haitu ledo nitesana lako ri pekirina mboto, tapi ia niposumba nu Alatala sabana ia Pakeni nTopanggeni Pesomba mpae haitu. Ia nombaboto kamate i Yesus manjambei todea toYahudi.

⁵²Bo ledo aga toYahudi, tapi nibotusina muni i Yesus mamate ka pura-pura ana-ana nu Alatala ntanina ri umba-umba ri dunia, ala ira rapasiromu majadi sangu.

⁵³Jadi nompamula lako ri eo haitu, pakeni ntoYahudi nasintuvumo mompatesi i Yesus.

⁵⁴Sabana haitu, i Yesus domo noliu ri ngata-ngata ntoYahudi, ala domo rakita ntona. Tapi nalai Ia lako ri bagia Yudea hau ri ngata Efraim napara karava bai. Bo naroo hamai nosangani-nggani ante anaguruNa.

⁵⁵Tempo haitu naparamo eo mbaso agama Yahudi anu niuli Eo Mbaso Paskah. Jadi nadeamo tona lako ri ngata-ngata ntoYahudi nantende hau ri ngata Yerusalem ala mantuntuni ada pompakagasa karora dopame rapamula Eo Mbaso Paskah.

⁵⁶Nakava hamai, nielo-elora i Yesus. Bo ane ira nasiromu ri Banua nu Alatala, nosimpekutana ira, “Berimba panggavamiu? Makava Ia ri posusa ngena, atau ledo?”

⁵⁷Tapi balengga-balengga ntopanggeni agama bo toFarisi lave niulira mami, “Isema-sema nangisani ponturo i Yesus, kana raulina ka kami ala Ia mamala rasaka!”

Yohanes 12

¹Ono-eopa pade Eo Mbaso Paskah, i Yesus hau ri ngata Betania, ngata niponturo i Lazarus nipakatuvuNa mpanjili lako ri kamatena bara ipia.

²Hamai nipovia posusa mombabila i Yesus. I Marta nantulungi nanggeni kande ka toposusa bo i Lazarus nonturo ri tatangara nangande nosangani-nggani ante i Yesus.

³Tempo ira nonturo hamai, i Maria nangala sabotolo lana vangi narwastu anu nasuli mpuu alina, nitasere santanga lite isina. Bo nakavamo ia mombatoli lana haitu ri kada i Yesus tandana pebilana, bo nipakabaina ante buluana. Bo riarabania haitu navangi mpuu soana lako ri lana vangi haitu.

⁴Nanggita haitu, notesamo saito anaguru i Yesus anu nosanga i Yudas Iskariot anu mompobalu Ia bara maipia. Niulina,

⁵“Nakuya ledo nipobaluka lana nasuli alina haitu nte alina taluatu doi salaka bo alina haitu radekei ka tona napakasi?”

⁶Kakanana ledo tona napakasi nitora i Yudas, tapi aga karonu mboto apa ia topelea. Iamo anaguru anu niparasaya nombaboli doira, bo sanggani-sanggani nipeleana doi haitu. Haitu sampe niulina ivesia.

⁷Tapi nangulimo i Yesus ka i Yudas, “Dekeikamo ia movia haitu, sabana anu nipoviana haitu mantora eo pombatana Yaku ngena.

⁸Tona napakasi bate-batena maria ri tatangamiu, tapi Yaku ledo.”

⁹Nadea mpuu toYahudi nangepe lлена i Yesus naria ri ngata Betania. Jadi haumo ira manggita i Yesus bo muni manggita i Lazarus anu nipakatuvuNa mpanjili lako ri kamatena.

¹⁰Balengga-balengga ntopanggeni agama nasintuvu mompatesi i Lazarus muni.

¹¹Sabana, naupu i Lazarus nipakatuvu mpanjili, nadeamo toYahudi domo nadota nangoseaka balengga-balengga ntopanggeni agama. Ira aga nangoseaka i Yesus bo nanjarumaka Ia.

¹²Naeo mpadondo, todea anu nakava ri ngata Yerusalem mantuntuni posusa Paskah, niepera i Yesus makava ri ngata Yerusalem muni.

¹³Jadi nialara tava nandate bo hau ira nombatomunaka i Yesus bo nongare-ngaremo ira, “Hosana! Ratoiyamo Alatala! Maoge belo ka Ia anu nakava niposumba nu Alatala! Iamo Magau ntoIsrael!” (Mazmur 118:26)

¹⁴I Yesus nanggava sangu ana keledai bo nipesaviNa. PesaviNa haitu nompakadupa tesa nitulisi riara Buku Gasa ivei:

¹⁵“Kadambamo komiu tupu ngata Yerusalem! Peintamo! Magaumi makava nesavi ana nu keledai!” (Zakharia 9:9)

¹⁶Jadi nibila ntodea mpuu i Yesus tempo Ia nesua riara ngata Yerusalem. Tapi dopa nisani nu ana-anaguruNa batuana. Naliu Ia natuvu mpanjili lako ri

kamateNa bo neore hau ri suruga, pade nisanira pebila ntodea ka i Yesus nompakadupa anu nitulisi riara Buku Gasa pangane.

¹⁷Todea anu nosangani-nggani ante i Yesus tempo Ia nompokio i Lazarus lako riara dayo bo nompakatuvu mpanjili ia, todea gahaitumo notesa kajadia haitu ka tona ntanina.

¹⁸Jadi nadea tona hau nombatomunaka i Yesus, sabana niepera i Yesus novia kabaraka haitu.

¹⁹Nanggita haitu, nosimpotesamo toFarisi, “Nidagimo kita! Peinta vei! Pura-pura tona ri dunia hau nangoseaka Ia!”

²⁰Ri tatanga ntodea hau metupu nte Alatala ri ngata Yerusalem tempo posusa Paskah haitu, naria muni bara sako-ndua toYunani.

²¹Ira nakava nangulika i Filipus, “Ane mamala, kami madota mosinggava nte i Yesus.” (I Filipus haitu tona lako ri ngata Betsaida ri bagia Galilea.)

²²Nangepe perapira haitu, hau i Filipus notesa ka i Andreas bo ira randua hau nanguli perapi haitu ka i Yesus.

²³I Yesus notesa kamateNa ka ira. NiuliNa, “Nakavamo tempona Alatala mompopakita kaoge Ana nu Manusia, haitumo kaogeKu.

²⁴Pariaramo tesaKu hitu: ane angu mpae ledo ratuda ri tana, pae haitu bate-batena aga sangu, ledo movua. Tapi ane angu mpae haitu ratuda ri tana, kaupuna pae haitu movua madea.

²⁵Isema-sema aga nompotove katuvuna ri dunia hitu kana malipo katuvuna bara maipia. Tapi isema-sema ledo nompotove katuvuna riara dunia hitu, manggava katuvua mabelo sampe ri kasae-saena.

²⁶Isema-sema mokaarajaa ka Yaku kana mangoseaka Yaku ala ri umba-umba Kukalau, ia mosangani-nggani nte Yaku. Bo isema-sema mokaarajaa ka Yaku natantu rabila nTuamaKu.

²⁷Hitupa nasusa mpuumo raraKu. Nuapa Kuuli? Madota Kuperapi TuamaKu mombakabasaka peparajea anu majadi ri karoKu ngena. Tapi ledo Kuperapi ivesia, sabana patuju kakavaKu ri dunia hitu ala mombarasai peparajea haitu.”

²⁸Jadi nanguli i Yesus ka TuamaNa, “Tata, popakita kaogeMiu ka manusia!” Naupu niuliNa ivesia, nriamo suara lako ri langi nanguli, “NipopakitaKumo kaogeKu bo Kupopakita vai.”

²⁹Nangepe suara haitu, sanu tona nanguli naria guru kede. Tapi naria muni sanu ira nanguli malaeka notesa ka i Yesus.

³⁰Jadi nanguli i Yesus ka ira, “Tesa niepemi pangane ledo aga mompakaroso raraKu, tapi mompakaroso raramiu.

³¹Sii-sii nakavamo tempona dosa nu manusia ri dunia ratangara. Sii-sii temponamo Magau nu Seta anu nakuasa ri dunia, radagi.

³²Bo tempo Yaku raanggataka pakalanga ri tinja, Kupakeni pura-pura manusia mangoseaka Yaku.”

³³I Yesus notesa ivesia ala mompopaisani ka ira dala kamateNa ri kayu salib ngena.

³⁴Bo nanguli todea ka Ia, “Lako ri Buku Atura Agama, nisanita Magau Topepakasalama anu nijanji nu Alatala kana matuvu sampe ri kasae-saena. Jadi berimba sampe niuliMiu Ana nu Manusia kana mamate raanggataka pakalanga ri tinja? Isema Ana nu Manusia haitu?”

³⁵Nesana i Yesus, “Damo sampalai reme maroo nte komiu. Jadi agina komiu molipa tempo da nareme ala komiu ledo rakava nu landa. Tona nolipa riaro kalandana ledo nisanina hau ri umba rakasondana.

³⁶Parasayamo Yaku kamba da naria nosanggani-nggani ante komiu nompakareme dunia ala komiu batena matuvu riaro reme.” Naupu i Yesus notesa ivesia, nalaimo Ia lako nte todea bo domo nadota Ia rakitara.

³⁷Naupa nadeamo kabaraka nipoviaNa ri ngayora, ledo niparasayara Ia.

³⁸Haitu najadi ala madupamo tesa nitulisi Nabi Yesaya nggaulu ivei: “Pue, ledoria tona nomparasaya kareba nikeni kami ka ira! Nau kuasaMiu nipopakita ka ira, ledo muni nipariarara.” (Yesaya 53:1)

³⁹Jadi ira ledo nompakule nomparasaya, sabana Tupu nompakakaa bagara. Evamo tesa nipasimbayu Nabi Yesaya ivei:

⁴⁰“Tupu nompakaburo matara bo nompakakaa bagara, ala matara ledo mekita bo rarara ledo mesani, ala ira ledo manjili nte Ia bo rapakabeloNa.” (Yesaya 6:10)

⁴¹Nabi Yesaya nanguli ivesia sabana nisaninamo kaoge anu maria nte i Yesus bo nibotona.

⁴²Naupa ivesia, nadea muni pakeni ntoYahudi nomparasaya i Yesus. Tapi ira aga nomparasaya nggalino sabana naeka ira nte toFarisi, nee-nee ira domo radekei metupu ri banua petupu.

⁴³Ira nomparasaya nggalino sabana nipokonorapa ratoiya nu manusia pade ratoiya nu Alatala.

⁴⁴Bo i Yesus nanguli nte suara namangga ri tatanga ntodea, “Isema-sema nomparasaya Yaku, ledo aga nomparasaya Yaku tapi niparasayana muni Alatala anu nantudu Yaku.

⁴⁵Bo isema-sema nanggita Yaku, nikitana muni Alatala anu nantudu Yaku.

⁴⁶Yaku tumai ri dunia mompakareme manusia, ala isema-sema momparasaya Yaku domo monturo ri kalandana.

⁴⁷Ane maria tona mangepe tesaKu tapi ledo raoseakana tesa haitu, ledo Yaku mombahuku ia. Apa Yaku nakava ri dunia hitu, ledo mombahuku manusia, tapi mompakasalama manusia.

⁴⁸Tona nompoara Yaku bo ledo nompariara tesaKu, naria anu mombahuku ira. TesaKu haitu mombahuku ira ri kaupu nu dunia,

⁴⁹apa Yaku ledo notesa nangoseaka dotaKu mboto. Yaku aga nanguli anu niparenta nTuamaku ka Yaku, sabana Iamo nantudu Yaku makava ri dunia.

⁵⁰Bo nisaniKu muni parentaNa haitu mombadekei katuvua mabelo sampe ri kasae-saena. Jadi tesa nitesaKu ka komiu aga nangoseaka anu niparenta nTuamaKu ka Yaku.”

Yohanes 13

¹Tempo haitu naparamo Eo Mbaso Paskah. Bo nisani i Yesus naparamo gantana rapalaisiNa dunia hitu bo manjili hau nte TuamaNa. Ia mpuu-mpuu nompotove ira anu najadi todeaNa ri dunia bo nipotoveNa sampe ri kaupuna.

²I Yesus bo ana-anaguruNa nonturo nangande nosangani-nggani bo bongina haitu Magau nu Seta netuu ri pekiri i Yudas ana i Simon Iskariot ala mompobalu i Yesus ka baliNa.

³Nisani i Yesus TuamaNa Alatala nombadekei pura-pura kuasa ka Ia. Bo nisaniNa muni Ia nakava lako nte Alatala bo Ia manjili hau nte Alatala.

⁴Jadi neanggamo Ia nombavonju baju ndoeNa, bo nialaNa handu nipoukaNa kopeNa.

⁵Naupu haitu nitoliNa uve riaro loya. Bo nitoposiNa kada nu anaguruNa saito-saito pade nipakabaiNa ante handu nipompouNa kopeNa.

⁶Tempo i Yesus nakava nte i Simon Petrus, nanguli i Petrus ka Ia, “Pue, Komiu tano mombatoposi kadaku?”

⁷Nanguli i Yesus ka ia, “Sii-sii dopa nisanimu batuana anu nipoviaKu hitu. Nggapurina pade musani.”

⁸Tapi nanguli vaimo i Petrus ka i Yesus, “Nee, Pue! Nee mpuu ratoposiMiu kadaku!” Nesanamo i Yesus, “Ane ledo Kutoposi kadamu, iko ledo mpuu anaguruKu.”

⁹Nangepe haitu, nanguli i Simon Petrus, “Ane ivesia, Pue, nee aga kadaku ratoposiMiu tapi paleku bo balenggaku muni.”

¹⁰Tapi nanguli i Yesus ka ia, “Tona naupu nandiu nagasa njumanggaromo, domo paraluu radiu. Aga kadana kana ratoposi pakagasa. Komiu nagasamo, aga saito ledo nagasa.”

¹¹Niuli i Yesus ivesia sabana nisaniNa isema mompobalu Ia ka baliNa. Haitu sampe niuliNa, “Aga saito ledo nagasa.”

¹²Naupu i Yesus notoposi kadara, nipasuaNa mpanjili baju ndoeNa, bo nonturo mpanjili Ia pade nipekutanaNamo ana-anaguruNa, “Nisanimiu batuana anu dako nipoviaKu ka komiu pangane?”

¹³Niulimiu Yaku Gurumiu bo Tupumiu, bo tesamiu haitu nakana, sabana Yaku mpuu-mpuu Gurumiu bo Tupumiu.

¹⁴Jadi ane Yaku, Gurumiu bo Tupumiu, nompakaede raraKu notoposi kadamiu, komiu muni masipato mompakaede raramiu motoposi kada roa.

¹⁵Yaku najadi jonjo ka komiu ala komiu mositulungi, nasimbayu mpo Yaku nantulungi komiu notoposi kadamiu.

¹⁶Pariaramo tesaKu hitu, batua ledo naogepa pade madikana. Ivesia muni tona nitudu ledo naogepa pade topetudu.

¹⁷Hitupa nisanimumo pepatuduki hitu. Jadi mabelo mpuu komiu ane raoseakamiu pepatuduki hitu.

¹⁸Anu niuliKu pangane ledo nambela komiu pura-pura. NisaniKu mamimo tona nipelisiKu, bo kana rapakadupa anu nitulisi riara Buku Gasa ivei: ‘Tona nangande nosanggani-nggani ante Yaku, iamo najadi baliKu.’

¹⁹Dopame majadi anu haitu, Kuuli mami ka komiu ala tempo anu haitu majadi ngena, rasanimiu mpuu isema Yaku.

²⁰Pariaramo tesaKu hitu, isema-sema nantarima tona nituduKu, nitarimana muni Yaku. Bo isema-sema nantarima Yaku, nitarimana muni TuamaKu anu nantudu Yaku.”

²¹Naupu i Yesus notesa pura-pura haitu, nasusa mpuumo raraNa. Bo niuliNa, “Pariaramo tesaKu hitu, naria saito komiu mompobalu Yaku ka baliKu.”

²²Naingu mpuumo rara nu ana-anaguruNa nangepe tesaNa haitu sampe ira aga nosikanoto sabana ledo nisanira isema niuliNa.

²³Saito anaguruNa anu nipotoveNa nonturo ri sinjoriNa.

²⁴Jadi i Simon Petrus nanggaundu roana haitu bo nanguli, “Pekutana nte i Guru bara isema niuliNa haitu.”

²⁵Jadi anaguruNa anu nonturo ri sinjori i Yesus nekutana, “Pue, isema niuliMiu pangane?”

²⁶Nesana i Yesus, “Tona Kudekeika roti Kutula ri uta, iamo nipatujuKu.” Naupu haitu nialaNameo santubi roti bo nitulaNa ri uta pade nidekeiNa ka i Yudas, ana i Simon Iskariot.

²⁷Niala i Yudaspa roti haitu, kaliu-liu nesuamo Magau nu Seta riaro ntaina. Bo nanguli i Yesus ka i Yudas, “Anu mupovia, poviamo masalisa!”

²⁸Ledo ria saitoa ira sampangande haitu nangisani patuju i Yesus notesa ivehaitu ka i Yudas.

²⁹Naria sanu nompekiri i Yesus nombatudu i Yudas hau mangali bara nuapanuapa rapakera riaro posusa haitu, bara mombadekei doi ka tona napakasi, apa i Yudas topomboliaka doira.

³⁰Jadi naupu i Yudas nangala roti lako nte i Yesus, nalaimo ia. Tempo haitu nabongimo.

³¹Nalaipa i Yudas, nangulimo i Yesus ka anaguruNa, “Sii-sii rakita ntonamo kaogeKu, Ana nu Manusia. Bo lako ri anu majadi ri karoKu ngena, rakita ntonamo kaoge nu Alatala.

³²Ane rakita ntona kaoge nu Alatala lako ri anu majadi ri karoKu ngena, Alatala mboto mompopakita kaogeKu ka ira, bo domo masae rapopakitaNa mpuu.

³³Ana-anaKu, domo masae Yaku mosanggani-nggani ante komiu. Raelomiu Yaku ngena, tapi ledo rakavamiu. Haitu niuliKu ka pakeni-pakeni ntoYahudi bara ipia, ivesia muni Kuuli ka komiu: ri umba Kukalau komiu ledo mamala metuntuni.

³⁴Naria parenta nabaru Kudekei ka komiu ivei: Komiu kana mosimpotove. Yaku nompotove komiu, ivesia muni komiu kana mosimpotove.

³⁵Ane mosimpotove komiu, rasani ntodeamo komiu mpuu-mpuu ana-anaguruKu.”

³⁶Bo nekutanamo i Petrus, “Pue, hau ri umba Komiu?” Nesana i Yesus, “Ri umba Kukalau, iko dopa mamala metuntuni. Bara maipiapa pade mutuntuni Yaku.”

³⁷Nesana i Petrus, “Pue, nakuya sampe ledo mamala yaku mantuntuni Komiu sii-sii? Nasadiamo yaku mamate manjaliku Komiu!”

³⁸Nesana i Yesus, “Mpuu-mpuu iko madota mamate manjaliku Yaku? Pariaramo tesaKu hitu, dopame mototoroko manu ngena, talu-ngganimo iko mombasapu Yaku.”

Yohanes 14

¹Nanguli i Yesus ka ana-anaguruNa, “Nee masusa raramiu. Parasayamo Alatala, bo parasaya munimo Yaku.

²Ri banua nTuamaKu naloga ponturo. Yaku hau mompakasadia ponturo ka komiu. Ane ledo ivesia, natantumo Kuuli ka komiu.

³Bo maupu Yaku hau mompakasadia ponturo ka komiu, Yaku kana manjili tumai mombatomunaka komiu ala ri umba Kuponturo, ri sia muni raponturomiu.

⁴Ponturo Kukalau haitu, nisanimumo dalana.”

⁵Nangulimo i Tomas ka Ia, “Pue, ledo nisani kami hau ri umba rakalauMiu. Jadi berimbamo rasani kami dala hau?”

⁶Nesana i Yesus, “Yakumo hii dala, Yakumo nompopaisani anu nakana bo Yakumo nombadekei katuvua nabelo. Ledo ria saitoa mamala makava ri ngayo nTuamaKu ane ledo ante Yaku.

⁷Ane nisanimiu mpuu Yaku, rasanimiu muni TuamaKu. Bo nompamula sii-sii nisanimumo Ia bo nikitamiumo Ia.”

⁸Nanguli i Filipus ka i Yesus, “Pue, popakita ka kami TuamaMiu ala maosa rara kami.”

⁹Nesanamo i Yesus, “Ai, Filipus! Nasaemo Yaku nosangani-nggani ante komiu. Dopa nisanimu isema Yaku? Isema-sema nanggita Yaku, nikitana munimo TuamaKu. Jadi berimba sampe niulimu ivesia, ‘Popakita ka kami TuamaMiu?’

¹⁰Dopa niparasayamu Yaku nasimbayu nte TuamaKu bo TuamaKu nasimbayu nte Yaku? Anu niuliKu ka komiu pura-pura, ledo tesaKu mboto tapi tesa lako nte TuamaKu anu nosangu rara nte Yaku. Iamo anu novia pura-pura pokarajaa haitu.

¹¹Parasayamo tesaKu hitu, Yaku mpuu-mpuu nosangu ante TuamaKu bo TuamaKu muni nosangu ante Yaku. Nau ledo niparasayamiu tesaKu, parasayamo sabana nikitamiumo kabaraka-kabaraka nipoviaKu.

¹²Pariaramo tesaKu hitu, isema-sema nomparasaya Yaku, mamala movia anu nipoviaKu. Bo ledo aga haitu, madeapa vai rapoviana pade anu nipoviaKu, sabana Yaku hau manjili nte TuamaKu.

¹³Bo nuapa-nuapa raperapimiu sabana komiu topangoseaka Yaku, kana Kupovia ka komiu, ala rakita ntona kaoge nTuamaKu.

¹⁴Nuapa-nuapa raperapimiu sabana komiu topangoseaka Yaku, kana Kupovia ka komiu.”

¹⁵“Ane komiu nompotove Yaku, raoseakamiu parenta-parentaKu.

¹⁶Bo Kuperapi nte TuamaKu ala radekeiNa ka komiu Topetulungi ntanina, anu maroo nte komiu sampe ri kasae-saena.

¹⁷Topetulungi haitumo Nosa Gasa nu Alatala anu mompopaisani anu nakana ka komiu. Tona ri dunia hitu anu ledo nomparasaya, ledo mamala mantarima Ia sabana ledo nikitara Ia bo ledo nosisani ante Ia. Tapi komiu nosisani ante Ia sabana Ia nosangani-nggani ante komiu sii-sii, bo domo masae Ia monturo riara ntaimiu.

¹⁸Ledo Kupalaisi mpo ngana pailu komiu, apa Yaku manjili vai tumai nte komiu.

- ¹⁹Damo sampalai rakita ntona Yaku ri dunia hitu. Tapi komiu da rakitamiu Yaku. Bo komiu matuvu mabelo sabana Yaku matuvu mpanjili.
- ²⁰Ane makavamo tempo haitu, rasanimumo Yaku nosangu ante TuamaKu bo komiu muni nosangu ante Yaku, bo Yaku nosangu ante komiu.
- ²¹Isema-sema mompariara bo mangoseaka parenta-parentaKu, iamo nompotove Yaku. Bo isema-sema nompotove Yaku, ia muni raportove nTuamaKu, bo Yaku mboto mompotove ia bo mompopaisani karoKu ka ia.”
- ²²Bo nekutana i Yudas (ledo i Yudas Iskariot), “Pue, nuapa sabana Komiu aga mompopaisani karoMiu ka kami, ledo ka pura-pura manusia ri dunia?”
- ²³Nesana i Yesus, “Isema-sema nompotove Yaku raoseakana tesaKu. Bo TuamaKu mompotove ia bo Yaku ante TuamaKu makava monturo mosangganingani ante ia.
- ²⁴Tapi tona ledo nompotove Yaku, ledo nioseakana tesaKu. Tesa niepemi hitu ledo lako nte Yaku mboto, tapi lako nte TuamaKu anu nantudu Yaku.
- ²⁵Pura-pura haitu nitesaKu kamba da nosangganingani kita.
- ²⁶Tapi ane Nosa Gasa nu Alatala makava, rapatudukiNa ka komiu mpengayangaya bo rapopatoraNa ka komiu pura-pura anu nitesaKu ka komiu. Apa Iamo Topetulungi anu ratudu nTuamaKu manjambei Yaku.
- ²⁷Katinonto rara Kudekei ka komiu, haitumo katinonto nu raraKu mboto. Bo anu Kudekei ka komiu haitu ledo nasimbayu nte anu nidekei nu dunia nadaa ka komiu. Jadi nee masusa raramiu, nee maeka.
- ²⁸Toramo anu niuliKu pangane, Yaku malai, tapi manjili vai tumai nte komiu. Ane mpuu-mpuu komiu mompotove Yaku, madamba mpuu raramiu sabana Yaku hau manjili nte TuamaKu, anu naogepa pade Yaku.
- ²⁹Sii-sii niuliKu mamimo ka komiu dopame majadi anu nitesaKu pangane, ala tempo madupa ngena, raparasayamiumo Yaku.

³⁰Domo madea tesa Kuuli ka komiu, sabana gantanamo Magau nu Seta makava. Ia nombakuasai tona nadaa ri dunia hitu tapi ia ledo nakuasa momparenta Yaku.

³¹Naupa ivesia, pepandasa anu majadi ri karoKu ngena, kana majadi ala rasani nu manusia ri dunia Yaku nompotove TuamaKu bo novia pura-pura anu niparentaNa ka Yaku. Kaimo, malai kita.”

Yohanes 15

¹I Yesus nompapola tesaNa, “Yakumo hii valaa anggur nakana, bo TuamaKu tupu ntalua anggur haitu.

²Tinggu-tingguKu anu ledo novua nikoto bo nitedakaNa. Tapi tinggu-tinggu novua nipegasaNa pakabelo-belo ala mantambai kadea vuana.

³Komiu tu nagasamo sabana nipariaramiumo pepatuduki nitesaKu ka komiu.

⁴Komiu kana maroo mosangu rara nte Yaku bo Yaku muni maroo mosangu rara nte komiu. Tinggu-tinggu nogaa lako ri batana ledo movua. Aga tinggu-tinggu anu nosintaka nte batana haitu movua. Ivesia muni komiu ledo movua ane komiu ledo maroo mosangu rara nte Yaku.

⁵Yakumo hii valaa anggur bo komiumo tu tinggu-tingguna. Ane komiu maroo mosangu rara nte Yaku bo Yaku maroo mosangu rara ante komiu, komiu movua madea. Tapi ane komiu mogaa lako nte Yaku, ledo rapakulemiu movia nuapa-nuapa.

⁶Tona ledo naroo nosangu rara nte Yaku kana ratedeaka nasimbayu mpo tinggu nu valaa ratedeaka sampe mangau. Tinggu-tinggu nangau haitu aga rapasiromu ratedeaka ri mata nu apu bo rapalabu.

⁷Ane komiu maroo mosangu rara nte Yaku bo tesaKu maroo riara ntaimiu, perapimo nuapa-nuapa nipokonomiu bo radekei ka komiu.

⁸Ane komiu movua madea, natantu komiu mpuu-mpuu anaguruKu. Bo poviamiu haitu mompopakita kaoge nTuamaKu ka tona.

- ⁹Yaku nompotove komiu nasimbayu mpo TuamaKu nompotove Yaku. Komiu kana maroo mosangu rara nte Yaku ala rarasaimiu pepotoveKu.
- ¹⁰Ane raoseakamiu parenta-parentaKu, komiu bate-batena mombarasai pepotoveKu, nasimbayu mpo Yaku muni nangoseaka parenta nTuamaKu bo bate-batena nombarasai pepotoveNa.
- ¹¹Pura-pura hitu niuliKu ka komiu ala kadamba nu raraKu mamala muni rarasaimiu bo kadamba nu raramiu haitu ledo ria makura.
- ¹²Ivei parentaKu: posimpotovemo, masimbayu mpo Yaku nompotove komiu.
- ¹³Ane saito tona mamate manjambei vega-vegana, ia mpuu-mpuu nompotove vegana haitu. Ledo ria pepotove naogepa pade haitu.
- ¹⁴Bo komiu mpuu-mpuu vegaKu ane komiu mangoseaka parenta-parenta nidekeiKu ka komiu.
- ¹⁵Komiu domo Kuuli batua, sabana batua ledo nisanina nia nu madikana. Tapi hitupa komiu Kuuli vegaKu sabana pura-pura anu niepeKu lako nte TuamaKu, nitesaKu muni ka komiu.
- ¹⁶Ledo komiu nompelisi Yaku, tapi Yaku nompelisi komiu bo nombatudu komiu hau movua madea, haitumo vua anu ledo maupu-upu. Ane komiu movua ivesia, nuapa-nuapa raperapimiu lako nte TuamaKu sabana komiu topangoseaka Yaku, kana radekeiNa ka komiu.
- ¹⁷Jadi siimo parentaKu ka komiu: posimpotovemo.”
- ¹⁸I Yesus nompapola tesaNa ka ana-anaguruNa ivei: “Tona nadaa ri dunia, nompovuu mata komiu, tapi toramo, Yaku nokolupa nipovuu matara.
- ¹⁹Ane rapana komiu nosangu pekiri ante tona ledo nomparasaya Yaku, natantumo rapotovera komiu sabana komiu roara mboto. Tapi komiu ledo nosangu pekiri ante ira, sabana Yaku nompelisi komiu bo nopatani komiu ka Yaku. Jadi haitu sampe komiu nipovuu matara.

²⁰Toramo tesa niuliKumo ka komiu: batua ledο naogepa pade madikana. Ane Yaku nipandasara, natantumo komiu muni rapandasara. Ane nioseakara pepatudukiKu, natantumo raoseakara muni pepatudukimiu.

²¹Pura-pura haitu rapoviara ka komiu sabana komiu najadi topangoseaka Yaku, apa ledο nisanira mpuu Alatala anu nantudu Yaku.

²²Ane rapana Yaku ledο nakava bo ledο nompatuduki ka ira, tantu ira ledο rapakasala sabana dosara. Tapi nakavamo Yaku bo nipatudukimo ira. Jadi domo mamala raulira ledο nisanira pokainggura nadosa.

²³Isema-sema navuu matana nanggita Yaku, navuu muni matana nanggita TuamaKu.

²⁴Ane rapana ledο nipoviaKu kabaraka-kabaraka ri ngayora anu ledο sanggani nipovia ntona ntanina, tantu ira ledο rapakasala sabana dosara. Tapi nikitaramo kabaraka-kabaraka haitu bo ira batena navuu matara nanggita Yaku bo TuamaKu muni. [Jadi ira kana rapakasala sabana dosara haitu.]

²⁵Haitu najadi ala madupa tesa nitulisi riaru Buku Gasa ivei: ‘Ira navuu matara nanggita Yaku nau ledο naria sabana.’

²⁶Kutudu Topetulungi lako nte TuamaKu tumai nte komiu, haitumo Nosa Gasa nu Alatala anu mompopaisani anu nakana. Tempo makava Ia, Iamo mompopaisani Yaku ka komiu.

²⁷Bo komiu muni mompopaisani Yaku ka todea sabana komiu nosangganingani ante Yaku lako ri pamula panggaviaKu ri dunia hitu.”

Yohanes 16

¹I Yesus nompapola tesaNa ka ana-anaguruNa ivei: “Pura-pura haitu niuliKu ka komiu ala komiu ledο moura momparasaya.

²Komiu domo radekei metupu ri banua petupu ntoYahudi. Bo makava tempona topompatesi komiu rasarumakara poviara haitu mompakadamba rara nu Alatala.

³Rapoviara ivesia ka komiu sabana ira ledo nosisani ante TuamaKu bo ledo muni nosisani nte Yaku.

⁴NitesaKu mami ka komiu, komiu rapovuu matantona, ala tempo haitu majadi ngena, ratoramiu nariamo nitesaKu ka komiu.” “Tesa hitu ledo niuliKu ka komiu lako ri pamulana sabana Yaku da nosangani-nggani ante komiu.

⁵Tapi sii-sii Yaku hau nte TuamaKu anu nantudu Yaku, bo ledo ria saitoa komiu nompekutana hau ri umba Kukalau.

⁶Nasusa mpuu raramiu sabana niuliKu pangane Yaku malai.

⁷Tapi tesaKu hitu nakana: nabelopa ka komiu ane malai Yaku. Apa ane ledo hau Yaku, Topetulungi ledo makava tumai nte komiu. Tapi ane hau Yaku, Kutudu Ia tumai nte komiu.

⁸Ane makava Topetulungi, Ia mompakalanto batuana dosa ka manusia ri dunia. Bo rapakalantoNa muni batuana anu nanao, bo batuana pehuku nu Alatala.

⁹RapakalantoNa manusia nadosa sabana ledo niparasayara Yaku.

¹⁰RapakalantoNa muni Yaku nanao, sabana sii-sii Yaku hau nte TuamaKu bo domo rapeintamiu.

¹¹Bo rapakalantoNa muni Alatala mpuu-mpuu mombahuku manusia, apa nihukuNamo Magau nu Seta anu nombakuasai manusia nadaa ri dunia hitu.

¹²Da nadeapa Kutesa ka komiu tapi dopa rapakulemiu mantarimana sii-sii.

¹³Tapi ane makavamo Nosa Gasa haitu, Iamo mompopaisani ka komiu pura-pura anu nakana. Ia ledo motesa nangoseaka dotaNa mboto. Tapi anu niepeNa lako nte TuamaKu, haitumo ratesaNa. Bo ratesaNa ka komiu muni anu majadi ri tempo makava.

¹⁴RapopaisaniNa kaogeKu ka komiu, sabana anu nitarimaNa lako nte Yaku, haitumo rapopaisaniNa ka komiu.

¹⁵Pura-pura anu naria nte TuamaKu, anuKu pura. Haitumo sampe niuliKu ka komiu, anu nitarima nu Nosa Gasa lako nte Yaku, haitumo rapopaisaniNa ka komiu.”

¹⁶I Yesus nompapola tesaNa ka anaguruNa ivei: “Sampalaipa domo rapeintamiu Yaku. Ledo masae kaliuna haitu, rapeintamiu vaimo Yaku.”

¹⁷Nangepe tesaNa haitu, nosipekutana anaguruNa, “Nuapa ntoto patujuNa nanguli ka kita sampalaipa domo rapeintata Ia, bo ledo masae kaliuna haitu, rapeintata vaimo Ia? Bo nuapa muni patuju ntesaNa nanguli Ia hau nte TuamaNa?”

¹⁸Nosipekutana njuumo ira, “Nuapa patuju ntesaNa ‘Sampalaipa’? Ledo ntoto nisanita patuju ntesaNa haitu.”

¹⁹Nisani i Yesus ira madota mompekutana Ia. Jadi niulikaNa ira ivei: “NikitaKu komiu nosipekutana nuapa patuju ntesaKu pangane tempo niuliKu ‘Sampalaipa domo rapeintamiu Yaku bo ledo masae kaliuna haitu, rapeintamiu vaimo Yaku’.

²⁰Pariaramo tesaKu hitu, komiu motumangi-mangi mpojea manggita anu majadi nte Yaku, tapi baliKu ri dunia hitu madamba-damba. Raramiu masusa tapi kasusa raramiu mabali majadi madamba.

²¹Ane mombine damo kapoanana, natantumo nasusa mpuu rarana sabana nakavamo tempona moana. Tapi ane nesuvumo anana haitu, domo nitorana susa rarana. Nadamba mpuu rarana sabana ngana nesuvu ri dunia.

²²Ivesia muni ante komiu. Sii-sii nasusamo raramiu. Tapi Yaku mosinggava vai nte komiu bo tempo haitu komiu madamba mpanjili. Bo ledo maria saitoa tona mamala mompakalipo kadamba nu raramiu haitu.

²³Tempo haitu, komiu domo mekutana nuapa-nuapa nte Yaku. Pariaramo tesaKu. Nuapa-nuapa raperapimiu lako nte TuamaKu sabana komiu nangoseaka Yaku, kana radekeiNa ka komiu.

²⁴Nau komiu topangoseaka Yaku, sampe sii-sii komiu dopa nomperapi nuapa-nuapa. Jadi perapimo bo radekei ka komiu ala raramiu mpuu-mpuu madamba!”

²⁵“Tesa niuliKu ka komiu hitu aga nijalili. Tapi makava tempona domo Kujalili ka komiu, tapi Kutovontoomo motesaki TuamaKu ka komiu.

²⁶Tempo haitu komiu mbotomo merapi nte TuamaKu sabana komiu nangoseaka Yaku. Ledo paraluu Kuperapi nuapa-nuapa lako nte TuamaKu ka komiu.

²⁷Sabana, TuamaKu mboto nompotove komiu. Ia nompotove komiu sabana komiu nompotove Yaku bo niparasayamiumo Yaku hii nakava lako nte Ia.

²⁸Yaku nakava lako nte TuamaKu tumai ri dunia hitu. Hitupa Kupalaisi dunia hitu bo manjili hau nte TuamaKu.”

²⁹Bo nangulimo anaguruNa ka Ia, “Hitupa nitovontooMiumo notesa ka kami, domo aga nijaliliMiu.

³⁰Nisani kamimo Komiu nangisani mpengaya-ngaya. Ledo paraluu tona nompekutana Komiu sabana nisaniMiu mamimo pompekutanara. Haitumo sampe niparasaya kamimo Komiu mpuu-mpuu nakava lako nte Alatala.”

³¹Nesanamo i Yesus, “Niparasayamiu mpuumo?

³²Pariaramo! Kana makava tempona, bo nakavamo tempo haitu, komiu mosimpogaa. Komiu simbo manjili hau ri banuamiu mboto mompalaisi Yaku saitoKu. Tapi Yaku ledo aga saitoKu sabana TuamaKu naria nosanggani-nggani ante Yaku.

³³Pura-pura tesaKu pangane nitesaKu ka komiu ala matinonto raramiu sabana komiu mosangu rara nte Yaku. Ri dunia hitu komiu rapandasa. Tapi pakaroso raramiu! Apa kuasa nadaa ri dunia hitu nidagiKumo!”

Yohanes 17

- ¹Naupu i Yesus notesa ivesia, nitingoaNamo langi bo niuliNa ivei: “Tata, nakavamo tempona! Popaisanimo kuasa bo kaogeKu ka tona ala Yaku, AnaMiu, mamala mompopaisani kuasa bo kaogeMiu.
- ²NidekeiMiumo kuasa ka Yaku, kuasa moparenta pura-pura manusia ala mamala Kudekei katuvua mabelo sampe ri kasae-saena ka tona nidekeiMiu ka Yaku.
- ³Iveimo sampe manusia matuvu mabelo sampe ri kasae-saena: ira mosisani nte Komiu, Alatala aga saito-itoMiu nakana, bo ira mosisani muni ante Yaku, i Yesus Kristus, anu nituduMiu.
- ⁴NipopaisaniKu kuasa bo kaogeMiu ri dunia hitu ante nompakaupu pokarajaa niparasayaMiu ka Yaku.
- ⁵Tata, hitupa dekeimo kuasa bo kaoge ka Yaku ri situ nte Komiu, haitumo kuasa bo kaoge anu naria nte Yaku tempo Yaku nosanggani-nggani nte Komiu dopame dunia nipajadi.”
- ⁶“Tata, nipopaisaniKumo Komiu ka tona nidekeiMiu ka Yaku lako ri dunia hitu. Ira todeaMiu mami, bo ira nidekeiMiu muni ka Yaku. Nioseakaramo tesaMiu
- ⁷bo hitupa nisaniramo pura-pura anu naria nte Yaku, nopuna lako nte Komiu.
- ⁸Apa nitesaKu ka ira puramo tesa niuliMiu ka Yaku, bo tesa-tesa haitu nitarimara puramo. Tata, nisanira Yaku mpuu-mpuu nakava lako nte Komiu, bo niparasayara Komiu nantudu Yaku.
- ⁹Yaku mosambaya ka ira. Ledo pura-pura manusia Kuposambayaka tapi aga ira anu nidekeiMiu ka Yaku, sabana ira haitu mpuu-mpuu todeaMiu.
- ¹⁰Pura-pura tona anu najadi todeaKu, najadi todeaMiu muni. Bo pura-pura tona anu najadi todeaMiu najadi todeaKu muni. Bo kuasaKu bo kaogeKu nalanto nikita riar nggatuvura.
- ¹¹Domo masae Yaku monturo ri dunia hitu. Yaku tou nte Komiu, tapi anaguruKu da monturo ri dunia hitu. O, Tata! Komiu nagasa! Jagaimo ira ante

kuasaMiu, haitumo kuasa nidekeiMiu ka Yaku. Jagaimo ira ala ira mosangu rara nasimbayu mpo Yaku nosangu rara nte Komiu.

¹²Tempo Yaku da nosangani-nggani ante ira, Yakumo nombajagai ira ante kuasaMiu, haitumo kuasa nidekeiMiu ka Yaku. NijagaiKu anaguruKu sampe ledo ria saitoa ira nalipo, aga ia anu masipato rapopogaa lako nte Komiu sampe ri kasae-saena ala madupa anu nitulisi riara Buku Gasa.

¹³Sii-sii Yaku tou nte Komiu, Tata. Pura-pura anu niuliKu hitu nitesaKu ka anaguruKu tempo Yaku da naria ri sii ri dunia, ala ira mpuu-mpuu madamba nasimbayu mpo Yaku mpuu-mpuu nadamba.

¹⁴NipasimbayuKu ka iramo tesaMiu sampe tona riara dunia hitu navuu matara nanggita anaguruKu. Sabana, anaguruKu haitu ledo nosangu pekiri ante ira, nasimbayu mpo Yaku muni ledo nosangu pekiri ante tona haitu.

¹⁵Ledo Kuperapi Komiu mangala ira lako ri dunia hitu. Tapi Kuperapi ala Komiu mojagai ira lako ri Magau nu Seta.

¹⁶Ira ledo nosangu pekiri ante tona ledo nomparasaya, nasimbayu mpo Yaku muni ledo nosangu pekiri ante tona haitu.

¹⁷Patudukimo ira ante TesaMiu nakana sampe ira majadi todeaMiu nagasa. TesaMiu haitumo pepatuduki nakana.

¹⁸NituduKu ira hau nte tona ntanina riara dunia hitu, nasimbayu mpo Yaku nituduMiu tumai ri dunia.

¹⁹Tata, Kudekei katuvuKu ka Komiu bo novia dotaMiu, ala manggeni belo ka anaguruKu, haitumo ala ira mpuu-mpuu mangoseaka pepatuduki nakana bo majadi todeaMiu nagasa.”

²⁰“Ledo aga anaguruKu hitu Kuposambayaka, tapi Kuposambayaka muni pura-pura tona anu majadi topomparasaya Yaku bara maipia sabana raepera tesa-tesa rapatolele nu anaguruKu hitu.

²¹Tata, Kuperapi ala ira pura-pura mosangu rara nasimbayu mpo Yaku nosangu rara nte Komiu bo Komiu nosangu rara nte Yaku. Kuperapi ala ira muni

mosangu rara nte Kita ala pura-pura manusia momparasaya Komiumo anu nantudu Yaku hitu.

²²NidekeiKu ka iramo kaoge nidekeiMiu ka Yaku ala ira mosangu rara nasimbayu mpo Kita muni nosangu rara.

²³Yaku nosangu rara nte ira bo Komiu nosangu rara nte Yaku ala ira mpuu-mpuu mosangu rara. Ane ira mpuu-mpuu mosangu rara, kana rasani nu manusia Komiu nantudu Yaku bo Komiu nompotove ira, nasimbayu mpo pompotoveMiu Yaku.

²⁴Tata, anu nipodotaKu ala tona nidekeiMiu ka Yaku haitu mamala mosangani-nggani nte Yaku ri ponturoKu ala rakitara kuasaKu bo kaogeKu. Kuasa bo kaoge haitu nidekeiMiu ka Yaku, sabana nipotoveMiu Yaku lako ri lamba pamulana dopame dunia nipajadi.

²⁵O, Tata, Komiu nanao! Manusia ri dunia hitu ledo nosisani nte Komiu, tapi Yaku nosisani nte Komiu. Bo anaguruKu hitu nisanira Komiu nantudu Yaku.

²⁶NipopaisaniKumo Komiu ka ira. Bo da Kupopaisani hanupa Komiu ka ira ala Ira mompotove tona ntanina nasimbayu mpo Komiu nompotove Yaku, bo ala Yaku mboto monturo riarantaira.”

Yohanes 18

¹Naupu i Yesus nosambaya, haumo Ia nosangani-nggani ante ana-anaguruNa hau ri sambote salu Kidron. Hamai naria sangu pampa. I Yesus ante anaguruNa hau nesua riarapampa haitu.

²I Yudas, topompobalu i Yesus, nisanina muni pampa haitu apa i Yesus nasaro nasiromu nte anaguruNa hamai.

³Jadi i Yudas nanggeni salunu tantara nu Magau Mbaso Roma bo topo jaga Banua nu Alatala hau ri pampa haitu. Ira nitudu nu balengga-balengga ntopanggeni pesomba bo toFarisi bo nikenira poindo, sulo bo pareva posieva.

⁴Nisani i Yesus puramo anu majadi ri karoNa. Haitu sampe Ia hau nanggaparai tona dea haitu bo nekutana, “Isema nielomiu?”

⁵Nesanamo ira, “I Yesus toNazaret.” Nesanamo i Yesus, “Yakumo hii i Yesus.” I Yudas topompobalu i Yesus neangga ri sia nosanggani-nggani nte tona dea haitu.

⁶Tempo i Yesus nanguli ka ira, “Yakumo hii i Yesus,” noura ntalikumo tona dea haitu bo nadungga singganimo.

⁷Pade nekutana vaimo i Yesus, “Isema nielomiu?” Nesanamo ira, “I Yesus toNazaret.”

⁸Bo nangulimo i Yesus, “NiuliKumo ka komiu pangane, Yakumo hii i Yesus. Ane Yaku mpuu nielomiu, palogamo roaKu hitu malai.”

⁹I Yesus notesa ivesia ala mompakadupa tesa niuliNa pangane ivei: “Tata, lako ri pura-pura topeoseaka nidekeiMiu ka Yaku ledo ria saitoa nalipo.”

¹⁰Nangepe haitu, i Simon Petrus nombabitu gumana bo nisoena batua nu Pakeni nTopanggeni Pesomba anu nosanga i Malkus, napudu talinga ngganana.

¹¹Tapi nangulimo i Yesus ka i Simon Petrus, “Pasua gumamu! Nisarumakamu Kupoara preparajea nidekei nTuamaku ka Yaku tano?”

¹²Naupu haitu tantara-tantara nu Magau Mbaso Roma ante balenggara bo topojava Banua nu Alatala nombasaka i Yesus bo nitipunggura paleNa.

¹³Nikenira ntani ruru i Yesus hau nte i Hanas, matua langgai i Kayafas. I Kayafas haitu tona najadi Pakeni nTopanggeni Pesomba mpae haitu.

¹⁴Iamo nanguli ka pakeni-pakeni ntoYahudi bara ipia, “Aginapa saito tona mamate manjambei todea.”

¹⁵I Simon Petrus bo saito anaguru ntanina nantuntuni i Yesus. Anaguru saito haitu nosisani ante Pakeni nTopanggeni Pesomba. Jadi ia namala nesua nosanggani-nggani ante i Yesus ri doyata banua nu Pakeni haitu.

¹⁶Tapi i Petrus nepopea ri savaliku bobaa. Jadi anaguru ntanina anu niposisani nu Pakeni haitu, nanjili hau ri savalikuna. Bo nitesana ka mombine nojava bobaa ala i Petrus radekei mesua riarara doyata haitu. Bo nikenina i Petrus nesua riarana.

¹⁷Nesuapa i Petrus, nangulimo mombine nojaga bobaa haitu, “Apa ledo iko muni saito anaguruNa tano?” Nesana i Petrus, “Ledo!”

¹⁸Bongina haitu naranindi. Jadi bara sako-ndua batua bo topojava Banua nu Alatala nompanaki apu nipanderura ri doyata haitu. Bo i Petrus muni neangga nosanggani-nggani nanderu ante ira.

¹⁹Tempo haitu nompamulamo i Hanas, Pakeni nTopanggeni Pesomba bara ipia nompekutana i Yesus, “Isema pura anaguruMiu, bo nuapa pura nipatudukiMiu ka ira?”

²⁰Nesanamo i Yesus, “Yaku nasaro notovontoo notesa ri ngayo ntodea. Yaku nasaro notesa ri banua petupu bo ri Banua nu Alatala, ponturo nikasiromu ntoYahudi. Ledo ria sanggania nitabuniakaKu tesaKu.

²¹Jadi nuapa sabana nipekutanamiu Yaku? Agina todea anu nangepe tesaKu rapekutanamiu. Ira nangisani anu nitesaKu haitu.”

²²Tempo i Yesus notesa ivesia, naria saito topojava Banua nu Alatala neangga napara i Yesus. Nisapana lenje i Yesus, bo niulina, “Ledo nabelo Iko nesana ivesia ka Pakeni nTopanggeni Pesomba!”

²³Nesanamo i Yesus, “Ane nasala tesaKu, uli pakalanto anu nasala. Tapi ane nakana tesaKu hitu, nuapa sabana nisapakamu Yaku?”

²⁴Naupu haitu, i Hanas nantudu tona manggeni i Yesus nitipunggura haitu hau nte i Kayafas anu najadi Pakeni nTopanggeni Pesomba mpae haitu.

²⁵Tempo i Simon Petrus da nanderu mpeangga ri sia, naria vaimo tona nekutana nte ia, “Apa ledo iko muni saito anaguru ntona haitu?” Tapi nesapu vaimo i Petrus, “Ledo!”

²⁶Naria munimo saito batua nu Pakeni nTopanggeni Pesomba ri sia. Ia nambela raposampesuvu ntona napudu talingana nisoesi i Petrus. Ia muni nekutana, “Ledo iko nikitaku ri pampa nosanggani-nggani ante i Yesus pangane?”

²⁷Tapi nesapu vaimo i Petrus, “Ledo!” Nesanapa i Petrus, kaliu-liu nototorokomo manu.

²⁸Da bobayana ntoto, nikeniramo i Yesus lako ri banua i Kayafas hau ri banua nu Gubernur. Pakeni-pakeni ntoYahudi mboto ledo nesua riaru banua Gubernur Pilatus haitu, sabana ira majadi maruto nangoseaka Atura-atura agamara, bo ledo mamala mangande kande posusa Paskah ngena.

²⁹Sabana haitu, i Pilatus nesuvu hau ri savalikuna mosinggavaka ira bo nipekutanana, “Nuapa sala ntona hitu sampe nipangadumiu?”

³⁰Nesanamo ira, “Pua, ane ia ledo tona nadaa, natantu ledo rakeni kami tumai ka komiu.”

³¹Nanguli i Pilatus ka ira, “Alamiumo Ia, bo ratangaramiu mbotomo salaNa nangoseaka atura-atura agamamiu!” Tapi nesana pakeni ntoYahudi haitu, “Ledo ria kuasa kami mombahuku mate tona.”

³²Haitu najadi mompakadupa tesa i Yesus tempo Ia notesa dala kamateNa.

³³Nangepe haitu, nesua vaimo i Pilatus hau riaru banuana bo nituduna tona manggeni i Yesus ka ia. Bo nipekutanana i Yesus, “Nakana mpuu Iko Magau ntoYahudi?”

³⁴Nesana i Yesus, “Nisanimiu mboto atau tona nanguli ka komiu?”

³⁵Nanguli i Pilatus, “Nisaniku tano? Yaku ledo toYahudi! TodeaMu mboto bo balengga-balengga ntopanggeni agama nanggeni Iko tumai nte yaku. Sala nuapa ntoto nipoviaMu?”

³⁶Nesana i Yesus, “PoparentaKu ledo nopuna lako ri dunia hitu. Ane rapana Yaku masimbayu nte magau lako ri dunia hitu, natantumoto pangoseaka Yaku kana meeva ala Yaku ledo rasaka bo rakeni ka pakeni-pakeni ntoYahudi. Tapi poparentaKu ledo nopuna lako ri dunia hitu.”

³⁷Bo nekutana vaimo i Pilatus, “Ane ivesia tano, magau mpuu Iko?” Nesanamo i Yesus, “Nakana niulimiu tutu tu, Yaku hii magau. Yaku tumai nipoanaka ri dunia ante patuju mompopaisani anu nakana. Isema-sema nompotove anu nakana, rapariarana tesaKu.”

³⁸Nekutana i Pilatus, “Nuapa anu nakana?” Naupu haitu nesuvu vaimo i Pilatus lako riara banuana hau mangulika toYahudi, “Ledo ntoto naria nikavaku sala ntona hitu.

³⁹Tapi nangoseaka kabiasamiu, ane Eo Mbaso Paskah kana kukabasaka ka komiu saito tona nitarunggu. Madota komiu kukabasaka ka komiu Magau ntoYahudi hitu?”

⁴⁰Tapi nongaremo ira ante suara namangga, “Nee! Nemo Ia rakabasaka! Agina i Barabas rakabasaka ka kami!” I Barabas mai topeago.

Yohanes 19

¹Naupu haitu i Pilatus nantudu tantara-tantarana mombacambu i Yesus.

²Naupu nicambura, nipongeikara i Yesus. Nipoviara songgo magau lako ri karui bo nipoposonggora ka i Yesus. Naupu haitu, nipasuakara Ia santonga baju nakamao mpo baju magau.

³Bo nikaparaira i Yesus bo nipongei-ngeikara ante nanguli, “Tabe, Magau ntoYahudi!” Bo nisapa-saparamo lenje i Yesus.

⁴Naupu haitu, nesuvu vaimo i Pilatus hau ri savalikuna nanguli ka toYahudi, “Peintamo! Ia kukeni mesuvu tumai nte komiu ala rasanimiu ledo ntoto naria salaNa nikavaku.”

⁵I Yesus nikenira nesuvu ri savalikuna nosonggo karui bo nobaju magau nakamao. Bo nanguli i Pilatus ka todea haitu, “Peintamo! Hitumo Ia!”

⁶Nanggita i Yesus, nongare-ngaremo balengga-balengga ntopanggeni agama bo topojava-topojava Banua nu Alatala nanguli, “Pakumo Ia ri kayu salib! Pakumo Ia ri kayu salib!” Nesana i Pilatus ka ira, “Alamiu mbotomo Ia, bo pakumi mbotomo Ia ri kayu salib, sabana tona hitu ledo ntoto naria salaNa nikavaku.”

⁷Nesana toYahudi ka ia, “Nangoseaka atura-atura kami, tona hitu masipato rapatesi sabana Ia nompangaku karoNa Ana nu Alatala!”

⁸Nangepe tesa ntoYahudi haitu, nantambaimo kaeka rara i Pilatus.

⁹Jadi nesua mpanjilimo ia riaru banuana bo i Yesus muni niken i nesua. Bo nekutanamo i Pilatus, “Tona lako ri umbu Iko tu?” Tapi ledo nesana i Yesus.

¹⁰Jadi nanguli vaimo i Pilatus ka Ia, “Nakuya ledo nipesanakaMu tesaku? Yaku nakuasa mombakabasaka Iko, bo nakuasa muni mombapaku Iko ri kayu salib!”

¹¹Nesana i Yesus, “Ane Alatala ledo mombadekei kuasa ka komiu, komiu ledo mamala mombakuasai karoKu. Jadi dosa ntona anu nanggeni Yaku tumai nte komiu nambasopa pade dosamiu.”

¹²Nangepe tesa i Yesus, nipasimbuku i Pilatusmo mombakabasaka i Yesus. Tapi nongare vaimo toYahudi, “Isema-sema nompangaku karonu magau, iamo bali nu Magau Mbaso Kaisar! Jadi ane komiu mombakabasaka tona tutu, komiu muni bali nu Magau Mbaso Kaisar!”

¹³Nangepe peparangga ntoYahudi haitu, niken i Pilatusmo i Yesus hau ri savalikuna bo nonturomo ia ri gadera potangara ri ponturo niuli “Jaula Vatu.” Ane riaru basa Ibrani, sangana “Gabata.”

¹⁴Tempo haitu nambela eo pompakasadia ka eo penonto, nitasere tongo eo. Nangulimo i Pilatus ka toYahudi, “Siimo magaumiu!”

¹⁵Jadi nongare-ngaremo ira, “Patesimo Ia! Patesimo Ia! Pakumo Ia ri kayu salib!” Nanguli i Pilatus ka ira, “Hm! Pangulimiu masipato kupaku magaumiu ri kayu salib?” Nesanamo balengga-balengga ntopanggeni agama, “Aga Magau Mbaso Kaisar magau kami!”

¹⁶Kaupuna nidagi i Pilatus, bo nidekeina i Yesus ka ira ala Ia rapatesi ri kayu salib. Nialaramo i Yesus bo niken i ntantara-tantara hau ri savalikuna.

¹⁷Nesuvumo Ia lako ri ngata haitu bo nisimbuakana mboto kayu salibNa hau ri ponturo niuli “Bulu Banga Balengga.” Riaru basa Ibrani sangana “Golgota.”

¹⁸Ri siamo i Yesus nipakura ri kayu salib. Ri tempo haitu naria muni randua tona ntanina nipaku ri kayu salibra, saito ri sabingga ngganaNa, saito ri sabingga njidiNa bo i Yesus ri tatangara.

¹⁹I Pilatus nantudu tantarana mompataka dopi ri kayu salib i Yesus. Nitulisi ri dopi haitu ivei: I YESUS TONAZARET, MAGAU NTOYAHUDI.

²⁰Nadea toYahudi nombaca anu nitulisi ri dopi haitu sabana pompaku i Yesus napara ngata Yerusalem, bo tesa haitu nitulisi riaru talu-ngaya basa, haitumo basa Ibrani, basa Latin, bo basa Yunani.

²¹Nanggita haitu, nangulimo balengga-balengga ntopanggeni agama ka i Pilatus, “Nee ratulisimiu Magau ntoYahudi. Agina ratulisimiu ‘Panguli ntona hitu, iamo Magau ntoYahudi.’ “

²²Tapi nesana i Pilatus, “Anu nitulisiku haitu, batena haitumo! Domo rabaliki.”

²³Naupu tantara-tantara nombapaku i Yesus ri kayu salib, nialara pakeaNa bo nibagi-bagira pata-bagia, simbo sabagia. Baju ndoeNa nialara muni. Baju haitu ledo naria podauna, aga nitanu ivesiamo santonga.

²⁴Haitu sampe tantara-tantara nanguli, “Nee rabitesita baju ndoe hitu. Agina kita mompenoa lamoro. Isema mambela lamoro, iamo manggava baju hitu.” Haitu najadi ala madupa tesa nitulisi riaru Buku Gasa ivei: “Ira momposibagi pakeaKu, bo baju ndoeKu raposipenoara.” (Mazmur 22:18) Jadi anu nipovia ntantara-tantara nompakadupa anu nitulisi.

²⁵Tina i Yesus nosanggani-nggani ante sampesuvuna mombine neangga napara kayu salib. Naria muni i Maria berei i Klopas bo i Maria Magdalena.

²⁶I Yesus nanggita tinaNa neangga hamai ri sinjori anaguru nipotoveNa, niuliNamo ka tinaNa, “Ina, reke anamumo ia.”

²⁷Bo niuliNa munimo ka anaguruNa haitu, “Reke tinamumo ia.” Jadi nompamula lako ri eo haitu, anaguru pangane nantarima tina i Yesus monturo ri banuana.

²⁸Nisani i Yesus naupu puramo bagoNa. Jadi notesamo Ia ala madupa tesa nitulisi riaru Buku Gasa. NiuliNa, “Nabai tamboloKu.”

²⁹Hamai naria sangu tubu niisi uve anggur napoi. Jadi tona nangala sangaya eva lomo bo nitomera riara uve anggur haitu. Naupu sia, nitosura ri vuntu kayu hisop sanggoto bo nipopainukara i Yesus.

³⁰Naupu i Yesus nompetami uve anggur napoi haitu niuliNamo, “Naupu puramo.” Naupu haitu notunggamo Ia bo naponjimo.

³¹Eo haitu eo pompakasadia ka eo penonto, bo eo penonto haitu nambela eo pamulana posusa Paskah ntoYahudi. Nantuntuni ada ntoYahudi ledo mamala karobata ntona nipaku ri kayu salib rapalamba moloe hamai sampe eo penonto, nemopa eo penonto haitu Eo Mbaso. Jadi haitu sampe pakeni-pakeni ntoYahudi nerapi nte i Pilatus ala kada ntona nipaku ri kayu salib haitu raboba pakakoto ala 〔tona haitu masalisa mamate bo〕 karobatara masalisa ratauraka lako ri kayu salib.

³²Jadi haumo tantara-tantara mombaboba pakakoto kada-kada ntona randua anu nipaku ri kayu salib ri sinjori i Yesus.

³³Tapi tempo ira nakava nte i Yesus, nikitara namatemo. Jadi ledo najadi nibobara pakakoto kada i Yesus.

³⁴Tapi naria saito tantara nombatosu usu i Yesus ante tavalana. Niosunapa tavalala haitu, kaliu-liu nesuvumo raa ante uve lako ri usu i Yesus.

³⁵Tona nanggita kajadia haitu, iamo nompopaisani kajadia haitu ka komiu ala komiu muni momparasaya. Nakana tesana haitu bo nisanina mbotomo tesana haitu nakana.

³⁶Pura-pura haitu najadi ala madupa anu nitulisi riara Buku Gasa ivei: “Ledo ria sangua bukuna rapakakoto.”

³⁷Bo naria muni tesa ntanina riara Buku Gasa nanguli, “Ira mantingoa tona nitosura tavalala.”

³⁸Naupu haitu, i Yusuf toArimatea hau nomperapi karobata i Yesus lako nte i Pilatus. I Yusuf haitu topangoseaka i Yesus, aga ledo nisani ntona sabana ia naeka ka pakeni ntoYahudi. Perapi i Yusuf haitu nipooyo i Pilatus. Jadi haumo i Yusuf nantauraka karobata i Yesus lako ri kayu salib.

³⁹I Yusuf niporoa i Nikodemus, anu nakava nanggita i Yesus tempo bara ipia bongi. I Nikodemus nanggeni galo rampa-rampa navangi nosanga mur bo gaharu, nitasere talu-pulu kilo kantamona.

⁴⁰Bo ira randua nangala karobata i Yesus bo nisompura ante kae gandisi tobelona bo nidikara rampa-rampa navangi pangane, nangoseaka ada ntoYahudi mombasompu tomate.

⁴¹Napara ri savaliku ngata pompaku i Yesus ri kayu salib, naria salibo pampa. Ri pampa haitu naria sangu dayo nabaru, haitumo vatu nipaa bo dopa sanggani nipake.

⁴²Jadi karobata i Yesus nibolira riara dayo haitu, sabana dayo haitu napara bo domo masae pamulana eo penonto.

Yohanes 20

¹Ri eo Aka mpadondo mpisina da naruyo, i Maria Magdalena hau ri dayo i Yesusmo. Nakava ri dayo, nikitana vatu nipotutui dayo haitu nateduliakamo lako ri vamba nu dayo.

²Jadi nangovamo ia hau nte i Simon Petrus bo anaguru nipotove i Yesus, bo niulina, “Niala ntonamo karobata i Yesus lako riara nu dayo, bo ledo nisani kami bara ri umba nipombolira!”

³Nangepe haitu, nalaimo i Petrus bo anaguru ntanina haitu hau ri dayo.

⁴Nangovamo ira randua, tapi anaguru ntanina haitu nagasipa pade i Petrus. Jadi ia nokolu nakava ri dayo.

⁵Nakava ri dayo, notunggamo ia nompeinta riara dayo. Nikitana kae gandisi niposompu i Yesus hamai. Tapi ia ledo nesua riara dayo haitu.

⁶Pade nakavamo i Simon Petrus ri purina. Ia kaliu-liu nesua riara dayo haitu. Nikitana kae gandisi niposompu i Yesus hamai.

⁷Bo nikitana muni kae nipompou balengga i Yesus. Tapi kae haitu ledo nipasangani ante kae gandisi, aga nitika pakabelo niboli santanina.

- ⁸Pade nesua munimo anaguru ntanina anu nokolu nakava ri dayo pangane. Nikitanapa kae haitu, niparasayana munimo i Yesus natuvu mpanjili.
- ⁹Sampe eo haitu dopa muni nisanira patuju ntesa nitulisi riaru Buku Gasa nggaulu anu nanguli i Yesus kana matuvu mpanjili lako ri kamateNa.
- ¹⁰Naupu haitu nanjilimo ira randua hau ri banuara.
- ¹¹Tapi i Maria Magdalena da neangga notumangi-mangi ri savaliku nu dayo haitu. Ia notumangi bo notungamo nompeintaka riaru dayo.
- ¹²Ri sia nikitana randua malaeka nobaju nabula mpuu nonturo ri bela pomboli karobata i Yesus. Saito nonturo ri bela nu balenggaNa bo saito ri bela nu kadaNa.
- ¹³Bo nekutanamo malaeka-malaeka haitu, “Ina, nakuya komiu notumangi-mangi?” Nesana i Maria, “Tupuku niala ntonamo lako ri sii bo ledo nisaniku ri umba nipombolira.”
- ¹⁴Naupu haitu, neili ia bo nikitana i Yesus neangga ri sia, tapi ledo nisanina Iamo mai i Yesus.
- ¹⁵Nekutanamo i Yesus, “Ina, nakuya iko notumangi? Isema nielomu?” Nisarumaka i Maria bara topokarajaa ri pampa haitu. Jadi nesanamo ia, “Ane komiu nangala karobataNa lako ri sii, ulimo ka yaku bara ri umba nipombolimi ala kusani bo hau kuala Ia.”
- ¹⁶Nanguli i Yesus ka ia, “He, Maria.” Nangepe haitu, neili i Maria bo nanguli riaru basa Ibrani, “Rabuni!” (Batwana, “Guru.”)
- ¹⁷Nanguli i Yesus ka ia, “Nee rakabe Yaku, apa Yaku dopa neore hau nte TuamaKu. Tapi koimo hau nte sampesuvu-sampesuvuKu bo uli ka ira ivei: ‘Yaku hau nte TuamaKu bo Tuamamiu, haitumo Alatala nisombaKu bo nisombamiu.’ “
- ¹⁸Jadi hau mpuumo i Maria Magdalena nte ana-anaguru i Yesus bo niulina, “Nikitakumo i Pue!” Bo nitesana muni ka ira pura-pura anu nitesa i Yesus ka ia.

¹⁹Ri eo Aka bongina, ana-anaguru i Yesus nasiromu ri sangu banua. Vamba nu banua haitu nigunji sabana ira naeka ka pakeni ntoYahudi. Sampesanika, neongamo i Yesus neangga ri tatangara, bo nanguli, “Kuperapi Alatala mompakatinonto raramiu!”

²⁰Naupu i Yesus nombatabe ira ivesia, nipopakitaNamo paleNa bo usuNa ka ira. Nadamba mpuumo rarara nanggita i Yesus.

²¹Bo nanguli vaimo i Yesus, “Kuperapi Alatala mompakatinonto raramiu! Yaku mombasuro komiu, nasimbayu mpo TuamaKu nombasuro Yaku.”

²²Naupu haitu nitavusiNamo ira ante nosaNa bo nanguli, “Tarimamo Nosa Gasa nu Alatala.

²³Ane raampungimiu dosa ntona, dosara raampungu nu Alatala muni, bo ane ledo raampungimiu dosa ntona, dosara ledo muni raampungu nu Alatala.”

²⁴I Tomas, saito lako ri sapulu randua anaguru i Yesus, niuli muni “Ngana Rapi”. Ia ledo naria nosanggani-nggani ante roa-roana tempo i Yesus nakava nompopakita karoNa ka ira.

²⁵Jadi nanguli ana-anaguruNa ntanina ka i Tomas, “Nikita kamimo i Pue!” Tapi nanguli i Tomas, “Ane dopa kukita valea nu paku ri paleNa bo kudika koya-mpaleku ri bela nu paku, bo ane dopa muni kudika paleku ri valea ntavala ri usuNa, dopa kuparasaya.”

²⁶Naliu valu-mbongi, nasiromu vaimo ana-anaguru i Yesus riara nu banua haitu, bo i Tomas naria muni nosanggani-nggani ante roana ri sia. Vamba nigunji puramo tapi sampesanika, neongamo i Yesus neangga ri tatangara, bo nanguli, “Kuperapi Alatala mompakatinonto raramiu!”

²⁷Naupu haitu, niuliNa ka i Tomas, “Peintamo paleKu hitu. Dikamo koya-mpalemu ri sii. Bo dikamo palemu ri valea ntavala ri usuKu hitu. Tumo mabatabata raramu, tapi parasayamo!”

²⁸Bo nanguli i Tomas ka i Yesus, “Tupuku! Alatala nisombaku!”

²⁹Nanguli i Yesus ka i Tomas, “Iko nomparasaya sabana nikitamu Yaku. Tapi nabelopa tona nomparasaya nau ledo nikitana Yaku.”

³⁰Da nadeapa tanda-tanda nipokumaaka ntanina nipovia i Yesus tempo Ia da naria nosangani-nggani ante ana-anaguruNa anu ledo nitulisi riara buku hitu.

³¹Tapi anu nitulisi riara buku hitu, patujuna ala manggeni komiu momparasaya i Yesus mpuu-mpuu Magau Topepakasalama, Ana nu Alatala. Bo patujuna muni ala komiu mamala manggava katuvua mabelo sampe ri kasae-saena sabana niparasayamiu Ia.

Yohanes 21

¹Naupu haitu, i Yesus nompopakita karoNa sangganipa ka anaguruNa ri bivi Rano Galilea. Iveimo tesana.

²Bara sako-ndua anaguru i Yesus nasiromu ri sia, haitumo i Simon Petrus, i Tomas anu nidae “Ngana Rapi”, i Natanael lako ri ngata Kana ri bagia Galilea, bo randua ana i Zebedeus, bo randua anaguruNa ntanina.

³Nanguli i Simon Petrus ka roa-roana, “Hau mompemala bau ri rano yaku.” Nesana roana, “Hau muni kami.” Jadi hau ira nosangani-nggani nesavi sakaya. Nojala baumo ira njambongi ntua tapi ledo ntoto ria bau namala nialara.

⁴Nebonda eo, neangamo i Yesus ri bivi rano, tapi ledo nisani nu anaguruNa Ia haitu i Yesus.

⁵I Yesus nompongare anaguruNa riara sakaya, “Berimbamo, le? Naria bau nikavamiu?” Nesana ira, “Ledo ntoto naria.”

⁶Nanguli i Yesus ka ira, “Tendeakamo jalamiu ri sabingga nggana nu sakayamiu. Rakavamiu ngena bau.” Jadi nitendeakara mpuumo jala ri sabingga nggana sakayara. Ledo nipakulera nombasoreaka jala haitu apa nadea mpuu bau nesua rajalara.

⁷Anaguru anu nipotove i Yesus nanguli ka i Petrus, “I Pue, tano!” Niepe i Petrus tesa haitu, nipasuana mpanjili bajuna, sabana ia ledo nobaju pangane. Bo nekavantumo ia hau riarano rano norabu hau ri kabatana.

⁸Ana-anaguru i Yesus ntanina haitu netuntuni nte sakaya hau ri kabatana bo nombataja jala naponu ante bau, sabana domo nakavao lako ri kabatana, nitasere saatu metere kakavaona.

⁹Tempo ira nanau lako ri sakaya, nikitara naria ruti nu apu da narega ri sia, bo ri bavo nu ruti haitu naria bau bo naria muni roti.

¹⁰Nanguli i Yesus ka ira, “Keni tumai bara sako-mbaa bau nipemalamiu tutu.”

¹¹Jadi i Simon Petrus nesavi riarano sakaya bo nitajana jala haitu sampe ri kabatana. Jala haitu naponu ante bau mbase, kadeana pura-pura saatu limapulu bo talu-mbaa. Tapi naupa ivesia kadeana, ledo nabite jala haitu.

¹²Bo niuli i Yesus vaimo ka anaguruNa, “Kamaimo kita mangande.” Ledo ntoto naria tona nabia nekutana nte i Yesus, “Isema Komiu?” Sabana nisanira puramo ia haitu i Pue.

¹³Hau i Yesus nangala roti bo nibagiNa ka ira. Bo ivesia muni nipoviaNa ante bau.

¹⁴Haitu katalu-ngganina i Yesus nompopakita karoNa ka ana-anaguruNa naliu ia natuvu mpanjili lako ri kamateNa.

¹⁵Naupu ira nangande, i Yesus nompekutana i Simon Petrus, “Simon, ana i Yohanes, nambasopa tove mu ka Yaku pade tove nu roa-roamu haitu?” Nesana i Petrus, “Iyo, nisaniMiu mboto, Pue, nipotoveku Komiu.” Nanguli Yesus ka ia, “Ane ivesia, piaramo ana-ana bimbaKu.”

¹⁶Bo nekutana i Yesus karongganina, “Simon, ana i Yohanes, nipotovemu mpuu Yaku?” Nesana i Petrus, “Iyo, nisaniMiu mboto, Pue, nipotoveku Komiu.” Nanguli i Yesus, “Ane ivesia, poevumo bimba-bimbaKu.”

¹⁷Bo i Yesus nekutana vai katalu-ngganina, “Simon, ana i Yohanes, nipotovemu mpuumo Yaku?” Nangepe haitu, nasusa mpuumo rara i Petrus, sabana talu-

ngganimo i Yesus nompekutana ia. Jadi nesana i Petrus, “Pue, nisaniMiu mpengaya-ngaya. NisaniMiu nipotoveku Komiu.” Nanguli i Yesus, “Ane ivesia, piaramo bimba-bimbaKu.

¹⁸Pariaramo tesaKu hitu, tempo iko da namuda iko mboto nompou kopemu bo hau ri umba-umba nipodotamu. Tapi ane matuamo iko, iko kana mombadekei palemu ratipunggu ntona ntanina, bo iko rakeni ntona hau ri ponturo anu ledo nipokonomu.”

¹⁹Ante jalili haitu i Yesus nompopaisani dala nggamate i Petrus bara maipiapa, anu mompopakita kaoge nu Alatala. Naupu haitu nangulimo i Yesus ka i Petrus, “Nee menonto mangoseaka Yaku!”

²⁰Naupu haitu neilimo i Petrus bo nikanotona anaguru anu nipotove i Yesus. Anaguru haitumo anu nonturo ri sinjori i Yesus tempo ira nangande bongina, anu nekutana, “Isema mompobalu Komiu, Pue?”

²¹Jadi nekutanamo i Petrus, “Pue, nuapa majadi ante roaku moitu?”

²²Nesana i Yesus, “Ane rapana Yaku madota ia matuvu sampe Yaku makava mpanjili ri dunia hitu, haitu ledo paraluu musani. Tapi iko, nee menonto mangoseaka Yaku!”

²³Lako rahaitu natolelemo kareba ka topomparasaya i Yesus nanguli anaguru nipotoveNa haitu ledo mamate. Tapi ledo ivesia tesa i Yesus. Ivei niuliNa: “Ane rapana Yaku madota ia matuvu sampe Yaku makava mpanjili ri dunia hitu, haitu ledo paraluu musani.”

²⁴I Yohanes hii anaguru nitesa ri bavona, iamo nanggita bo notesaki kajadia haitu. Bo ia muni notulisi kajadia haitu riaru buku hitu. Bo nisanita anu nitesana haitu mpuu-mpuu nakana.

²⁵Da nadeapa anu ntanina nipovia i Yesus. Ane rapana ratulisi pura kajadia haitu, nipekiriku dunia hitu ledo masuka rapomboli pura-pura buku ratulisi.

Suro-Suro

Suro-Suro 1

¹Teopilus nibilaku: Riara bukuku paratama, nitulisiku pura-pura pepatuduki i Pue Yesus bo pura-pura anu nipoviaNa lako ri pantepuuna

²⁻³sampe Ia neore hau ri suruga. Naliu Ia namate bo natuvu mpanjili, Ia nasaro nompopakita karoNa ka suro-suroNa nipelisiNa bara ipia, ala rasanira Ia mpuu-mpuu natuvu mpanjili. Riara tempo patapulu bongina nikitara mpuumo Ia, bo Ia nombatesa Poparenta nu Alatala ka ira. Dopame Ia hau ri suruga, nidekeiNa parenta-parenta ka suro-suroNa ante kuasa Nosa Gasa.

⁴Naria saeo i Yesus nasiromu nte ira, niulikaNa ira, “Nepa ruru malai lako ri ngata Yerusalem. Popeamo sampe TuamaKu Alatala mompopanau Nosa Gasa nipejanjikaNa, evamo niuliKu muni ka komiu bara ipia.

⁵Toramo! I Yohanes nombadiu tona ante uve, tandana ira najea lako ri dosara. Tapi bara sako-eopa radiu ante Nosa Gasamo komiu.”

⁶Tempo suro-suro i Yesus nasiromu nosanggani nte Ia, nipekutanara, “Pue, sii-sii rakabasakaMiu kita toYahudi lako ri balita ala kita mamala momparenta ngatata mboto?”

⁷Nesana i Yesus, “Aga TuamaKu nakuasa mompakatantu eona bo jaana. Ledo paraluu rasanimiu.

⁸Tapi komiu manggava kuasa ane Nosa Gasa nu Alatala manau nte komiu. Bo komiu mompatolele karebaKu ka tona ri ngata Yerusalem, ri bagia Yudea bo Samaria, sampe ri njumangu dunia.”

⁹Naupu i Yesus nanguli ivehaitu, neoremo Ia lako ri ngayora hau ri suruga. Ira nangingoa nangganoto Ia sampe nalipo lako ri panggitarra, sabana kulimu nombabungu Ia.

¹⁰Tempo ira da nangingoa langi nangganoto peore i Yesus, sampesanika neongamo randua malaeka nopakea mputi neangga ri sinjorira.

¹¹Nanguli malaeka haitu, “Heh, toGalilea! Nakuya komiu aga neangga ri sii, nantingoa langi? I Yesus anu nikitamiu pangane neore rou ri surugamo. Ivesia muni Ia manjili lako ri suruga tumai ri dunia, nasimbayu mpo nikitamiu pangane.”

¹²Naupu haitu, suro-suro i Yesus notinggulimo lako ri Bulu Zaitun bo hau ri ngata Yerusalem. Bulu haitu nitasere sangu kilo kakavaona lako ri Yerusalem.

¹³Nakava ri Yerusalem, hau ira ri banua ponturora bo nompene ri tombi kalangana. Sanga nu suro-suro haitu iamo: i Petrus, i Yohanes, i Yakobus, i Andreas, i Filipus, i Tomas, i Bartolomeus, i Matius, i Yakobus ana Alfeus, i Simon Zelot topangeva pomarenta, bo i Yudas ana Yakobus.

¹⁴Ira nasaro nasiromu nosangu rara nosambaya. I Maria tina Yesus, ante bara sako-ndua mombine ntanina, bo sampesuvu-sampesuvu i Yesus nasiromu muni nosambaya nosanggani-nggani ante ira.

¹⁵Naria saeo, nitasere saatu ropulu kadeara nasiromu. Neanggamo i Petrus ri tatanga nu sampesuvu sampomparasaya bo nanguli,

¹⁶“Sampesuvu pura-pura. Anu nitulisi riaru Buku Gasa nombatesa i Yudas kana madupa. Tempo nggaulu Magau Daud nompasimbayu tesa nu Nosa Gasa nanguli i Yudas, anu nanggeni tona mosaka i Yesus.

¹⁷I Yudas haitu roata, sabana i Yesus mboto nompelisi ia majadi suroNa nasimbayu mpo kita.”

¹⁸(I Yudas haitu nangali salimpu tana ante doi nikavana tempo ia nompobalu i Yesus. Ri tana haitu ia nanavu bo namate. Taina nasemparaka sampe isi rarana nakamburaka ri savalikuna.

¹⁹Pura-pura tona nonturo ri ngata Yerusalem nangepe kajadia haitu. Sia sampe tana haitu nipoposangara “Akeldama.” Batuana riaru basara mboto “Tana Nikabubu nu Raa”.)

²⁰Nanguli vaimo i Petrus, “Riaru Buku Mazmur naria tesa nombaboto i Yudas ivei: ‘Banua ponturona majadi sou boa. Domo maria tona monturo riarana.’

(Mazmur 69:26) Bo naria muni anu nitulisi ivei: ‘Aginamo pokarajaana raala ntona ntanina.’ ” (Mazmur 109:8)

²¹⁻²²Bo i Petrus nompapola tesana ivei: “Sampesuvu-sampesuvu, haitumo sampe kita kana mompelisi saito tona lako nte kita mboto, ala ia mosanggani-nggani nte kita mompatolele kareba i Pue Yesus natuvu mpanjili lako ri kamateNa. Tona rapelisita haitu kana lako ri kita samporoa anu nangoseaka i Pue Yesus ri umba-umba nikalauNa bara ipia, lako ri tempo i Yohanes nompamula nombadiu tona, sampe i Yesus neore hau ri suruga.”

²³Jadi tona nasiromu ri sia nompelisi randua roara manjambei i Yudas, haitumo i Yusuf Barsabas (anu nidae i Yustus) bo i Matias.

²⁴⁻²⁵Naupu haitu nosambayamo ira ivei: “Pue, nisaniMiu isi rara ntai manusia pura-pura. Jadi popaisani ka kamimo isema nipelisiMiu lako ri randua tona hitu majadi suro manjambei i Yudas. Apa i Yudas nombakabasaka bagona bo nihuku nangoseaka pokaingguna.”

²⁶Naupu ira nosambaya, nitenderamo lamoro, bo nambela sanga i Matias. Jadi nompamula lako ri eo haitu, i Matias nireke saito lako ri sapulu randua suro i Pue Yesus.

Suro-Suro 2

¹Nanggava eo mbaso ntoYahudi anu niuli Eo Pentakosta, pura-pura topangoseaka i Yesus ri sia nasiromu ri sangu banua.

²Sampesanika niepera moni lako ri langi eva vuu mpoiri narimboso. Moni haitu niepe ri umba-umba riara banua nikasiromura haitu.

³Bo nikitara eva vaya nu apu nolenje mpo dila nakamburaka nasindele ri umba-umba bo netuu nte ira saito-saito.

⁴Ira pura-pura nikuasai Nosa Gasa nu Alatala bo nompamulamo notesa ante mpengaya basa ntanina nisovadakara nangoseaka anu nidekei nu Nosa Gasa ka ira.

⁵Tempo haitu nadea toYahudi ntanina lako ri ngata-ngata ri njumangu dunia nonturo ri ngata Yerusalem. Ira haitu tona natundu nte Alatala.

⁶Tempo niepe ntona moni mpo vuu mpoiri haitu, nadea mpuu tona nakava nasiromu. Natekaja ira sabana niepera basara mboto namala nipotesa ntopangoseaka i Yesus.

⁷Nahera bo nokumaa mpuu ira nosimpotesa, “Berimbamo hii? Tona notesa-tesa haitu toGalilea pura!

⁸Berimba sampe niepeta ira notesa ante basa-basata lako ri ngata-ngatata mboto?

⁹Kita hii tona lako ri umba-umba, lako ri tana Partia, Media, Elam, lako ri tana Mesopotamia, Yudea bo Kapadokia. Naria muni lako ri tana Pontus bo Asia,

¹⁰lako ri tana Frigia bo Pamfilia, lako ri tana Mesir bo lako ri tana Libia napara ngata Kirene. Naria muni lako ri ngata mbaso Roma.

¹¹Sanu kita toYahudi bo sanu nesua agama Yahudi. Naria tona nakava lako ri levuto Kreta bo lako ri tana Arab. Kita hitu tona lako ri mpengaya basa, tapi niepeta ira nombatesa kabaraka-kabaraka nipovia nu Alatala ante basa mpengaya-ngaya!”

¹²Nokumaa puramo ira bo naingu mpuu rarara sampe nosipekutana-tana, “Nuapa batuana kajadia hitu?”

¹³Tapi naria muni tona ntanina hamai aga nepongei-ngeika. Ira nanguli, “Ah, tona haitu, bara nalangu!”

¹⁴Nangepe tesa ntona haitu, neanggamo i Petrus nosangani-nggani ante sapulu saito suro ntanina, bo notesamo ia ka todea ante suara namangga. Niulina, “Sampesuvu-sampesuvuku toYahudi, bo pura-pura toponturo ri ngata Yerusalem! Epemo pakabelo-belo, kupakalanto ka komiu batuana anu najadi ri sii pangane.

¹⁵Kami hii ledo nalangu mpo nibatamiu. Dopa tempo panginu, da tinti sasio mpadondona.

¹⁶Tapi kajadia pangane, haitumo peonga nu Nosa Gasa nijanji nu Alatala nangoseaka tesaNa nipapola Nabi Yoel nggaulu, ivei:

¹⁷Alatala notesa: Ri tempo napara kaupu nu dunia bara maipia, Kupopanau NosaKu ka pura-pura manusia. Ana-anamiu, langgai bo mombine, mompasimbayu tesaKu ka komiu. Kabilasa-kabilasamiu manggita anu Kupopakita ka ira. Bo totua-totuamiu mangipika anu Kupopangipika ira.

¹⁸Sampe batua-batuaKu muni, langgai bo mombine, Kudekeika Nosa Gasa ri tempo nijanjiKu haitu. Bo ira mompasimbayu pura-pura anu Kuuli ka ira.

¹⁹Kupopakita ka komiu kabaraka-kabaraka ri langi bo tanda-tanda nipokumaaka ri dunia. Maria raa bo apu bo unu nu apu.

²⁰Mata nu eo mabali majadi malanda, bula majadi mpo raa, dopame makava eo mbaso anu ledo ria kasimbayuna, haitumo Eo Tupu mombatangara manusia.

²¹Bo isema-sema mekakai nte Tupu, ia kana rapakasalama.’ ” (Yoel 2:28-32)

²²I Petrus nompakapola tesana ivei: “Sampesuvu-sampesuvuku toIsrael! Pariaramo tesaku hitu! Alatala nompopakita ka komiu pura-pura, Ia mpuu-mpuu nompelisi bo nantudu i Yesus toNazaret, sabana nidekeikaNa kuasa movia kabaraka bo tanda-tanda nipokumaaka. Nisanimiu mboto tesaku hitu nakana, sabana kajadia haitu pura-pura najadi ri tatangata.

²³I Yesus haitu nidekei nu Alatala ka komiu bo nipatesimiu. Ia nidekeimiu ka tona nadaa nombapaku ri kayu salib. Tano mai, anu najadi haitu nangoseaka nia nipakatantu nu Alatala lako ri pamulana, apa nisaniNa mami lako ri pamulana anu majadi ante i Yesus.

²⁴Komiu nompatesi i Yesus, tapi Alatala nompakatuvu mpanjili Ia lako ri kamateNa. NikabasakaNa Ia lako ri kuasa kamatea, sabana Ia ledo ntoto namala rataamaka ri ponturo ntona namate.

²⁵Magau Daud nggaulu nombaboto i Yesus matuvu mpanjili ivei: ‘Nikitaku Tupu nasaro nombajagai yaku. Ia ri sabingga ngganaku mombatulungi yaku ala yaku ledo molengga ragoya nuapa-nuapa.

²⁶Haitumo sampe nadamba raraku, bo sumbaku nombasovadaka tesa-tesa petoiya. Bo karoku muni manjarumaka kuasaMiu,

²⁷Sabana, ledo rapalambaMiu yaku maboli ri ponturo ntomate. Ledo rapalambaMiu karobataku maboli riara dayo sampe mapopo majadi avu, sabana Yaku batuaMiu nipelisiMiu.

²⁸NituduakaMiu ka yaku dala matuvu mabelo sampe ri kasae-saena. Melabipa kadamba raraku apa Komiu nosangani-nggani ante yaku.’ ” (Mazmur 16:8-11)

²⁹I Petrus nompapola tesana ivei; “Sampesuvu-sampesuvuku, kuuli pakalanto ka komiu, i Daud, magau ntotuata namate bo nitana. Dayona da namala nikita sampe eo hitu.  Jadi natantu ledo karobatana mboto anu nipatujuna. 

³⁰⁻³¹Alatala nojanji bo nipakarosoNa ante sumpa, kana maria saito lako ri muli i Daud mboto raanggataka majadi magau bara maipia. Nisani i Daud pojanji haitu bo ia muni nabi, jadi nisanina anu rapovia nu Alatala. Nibotona Magau Topepakasalama anu nijanji nu Alatala matuvu mpanjili lako ri kamateNa. I Daud nanguli: ‘Ia ledo rapalamba maboli ri ponturo ntomate, karobataNa ledo maboli riara dayo sampe mapopo majadi avu.’ (Mazmur 16:10)

³²I Yesusmo hii niuli i Daud pangane, sabana Iamo tona nipakatuva nu Alatala mpanjili. Kami pura-pura hii najadi sabiNa, sabana kami mboto nanggita i Yesus natuvu mpanjili.

³³Ia nianggataka nu Alatala bo nipoponturo ri ponturo nibila ri sabingga nggana nu Alatala ri suruga. Bo nitarimaNa Nosa Gasa nijanji nTuamaNa, Alatala. Jadi sampesuvu-sampesuvu, pangane nikitamiu bo niepemi kami notesa nte mpengaya basa. Haitu najadi sabana kuasa Nosa Gasa anu nipopanau i Yesus ka kami.

³⁴Jadi patuju nu tesa Magau Daud pangane, ledo nanguli karna mboto, sabana natantu ledo i Daud natuvu mpanjili bo neore hau ri suruga. Tapi i Daud nanguli ivei: “Tupu nanguli ka Pueku: Ponturomo ri sabingga ngganaKu

³⁵sampe Kupopekou pura-pura baliMu nte Iko!’ ” (Mazmur 110:1)

³⁶Bo i Petrus nompakaupu tesana, bo nanguli, “Jadi sampesuvu-sampesuvu, haitumo sampe kita toIsrael pura-pura, kana rasanita mpuu-mpuu, i Yesus hitumo anu nipakumiu ri kayu salib, Iamo nipelisi nu Alatala majadi Tupu bo Magau Topepakasalama!”

³⁷Tempo todea nangepe tesa i Petrus haitu, nasilonto ntoto riarara. Bo nipekutanara nte i Petrus bo suro-suro ntanina, “Sampesuvu-sampesuvu, ane ivesia, nuapa masipato rapovia kami?”

³⁸Nesanamo i Petrus, “Kajeamo lako ri dosa-dosamiu, bo komiu saito-saito kana radiu, tandana komiu nomparasaya i Yesus Kristus, bo Alatala mombaampungi komiu bo mombadekei Nosa Gasana ka komiu.

³⁹Apa Alatala nojanji mombadekei Nosa Gasana ka komiu pura-pura, bo ka muli nu mulimiu, bo ka tona ri ngata nakavao. PojanjiNa haitu ka pura-pura tona nipokio nTuputa Alatala majadi todeana.”

⁴⁰Ledo aga ivesia tesa i Petrus, tapi ante nadea tesa-tesa ntanina nipatudukina bo nipaingana todea. Niulikana ira, “Kajeamo bo rapakasalama, ala komiu ledo rapambela pehuku nu Alatala anu rapambela ka tona nadaa ri ngata hitu anu nompatesi i Yesus!”

⁴¹Naupu nangepe tesa i Petrus, nantambaimo kadea ntona nomparasaya i Yesus, bo ira nidiu, tandana ira topangoseaka Ia. Bo ri eo haitu tona nomparasaya i Yesus natetambai talu-njobu kadeana.

⁴²Topangoseaka i Yesus nabaru haitu natutu mpuu nangepe pepatuduki nu suro-suro, bo ira nasaro nasiromu nosanggani-nggani. Ira nasaro nangande nosanggani-nggani nombatubi roti mantora kamate i Yesus, bo nosambaya nosanggani-nggani.

⁴³Nadea mpuu kabaraka bo tanda-tanda nipokumaaka nipovia nu suro-suro sampe nokumaa bo naeka todea.

⁴⁴Pura-pura topomparasaya nosangu rara, bo nuapa-nuapa naria ante ira nipakera mpasanggani-nggani.

⁴⁵Nasaro naria ira nompobalu kakalumanara bo mbara-mbarara, bo doina haitu nibagi-bagi ka ira pura nangoseaka anu niparaluura.

⁴⁶Eo-eo ira nasiromu ri doyata Banua nu Alatala. Ira notava-tava nasiromu ri banuara notubi-tubi roti nantora i Yesus, bo nangande nosangani-nggani ante damba rarara bo ante liangu rara.

⁴⁷Ira nasaro nombatoiya Alatala bo pura-pura todea ntanina nompodamba ira. Bo eo-eo nantambai kadea ntona nipakasalama nu Alatala.

Suro-Suro 3

¹Naria saeo i Petrus bo Yohanes hau ri Banua nu Alatala tinti tatalu ede eo, haitumo tempo posambaya ntoYahudi.

²Ri bobaa mbaso anu niuli Bobaa Nagaya, naria saito langgai napunggu mami lako ri pompoanaka. Eo-eo ia nikeni hau ri bobaa haitu ala mamala mantande palena merapi-rapi nte topoliu nesua hau mosambaya ri Banua nu Alatala.

³Tempo nikitana i Petrus bo i Yohanes noliu mesua hau ri Banua nu Alatala, niulurakanamo palena merapi doi nte ira randua.

⁴Jadi nikanotoramo topunggu haitu bo nanguli i Petrus ka ia, “Peintamo kami!”

⁵Topunggu haitu nompeintaka ira bo nisarumakana bara maria anu radekeira ka ia.

⁶Tapi nanguli i Petrus ka ia, “Yaku ledo naria doiku, tapi anu naria nte yaku, haitumo kudekei ka iko. Ante kuasa i Yesus Kristus toNazaret, polipamo!”

⁷Pade nikangisi i Petrusmo pale nggana ntopunggu, bo nitulungina ia meangga. Kaliu-liu narosomo kadana ante buku dalina.

⁸Ia kaliu-liu nekavantu bo neangga bo nompamula nolipa hau tumai. Naupu sia, nesuamo ia riara doyata Banua nu Alatala nosangani-nggani nte i Petrus bo i Yohanes. Ia nolipa bo nekavantu-vantu nantoiya Alatala.

⁹Pura-pura tona riara Banua nu Alatala nanggita ia nolipa bo nantoiya-toiya Alatala.

¹⁰Pade nanotomo rarara, iamo toperapi nabiasa nonturo ri Bobaa Nagaya nerapi-rapi nte tona. Nokumaa bo natekaja ira nanggita anu najadi nte topunggu haitu.

¹¹Topunggu pangane nantuntuni i Petrus bo i Yohanes njuu. Tempo ira tatalu nakava ri tambale ri Banua nu Alatala niuli Tambale Magau Salomo, pura-pura tona nangova hau nasiromu ri ngayora, apa natekaja ira nanggita topunggu haitu nolipamo.

¹²Tempo i Petrus nanggita todea gahaitu, niulikana ira, “Sampesuvu-sampesuvuku toIsrael! Nakuya komiu nokumaa nanggita anu najadi pangane? Nakuya nikanotosikamiu kami? Natantu nisarumakamiu tona hitu nolipa sabana kabaraka kami mboto, atau sabana poagama kami naroso. Tapi ledo ntoto nakana!

¹³Alatala anu nisomba ntotuata bo Nabi Abraham, i Ishak, bo i Yakub, Iamo nombabila bo nompakaoge BatuaNa i Yesus. I Yesus haitumo nidekeimiu ka pomarenta, bo Iamo nipoaramiu ri ngayo i Pilatus tempo i Pilatus madota mombakabasaka Ia.

¹⁴Ia nanao bo nabelo, tapi nipoaramiu Ia bo nisaravimiu i Pilatus mombakabasaka topepatesi ka komiu.

¹⁵Komiumo nombatudu tona nompatesi Ia, tano Iamo topombadekei katuvu nabelo sampe ri kasae-saena ka manusia. Bo Alatala nompakatuvu mpanjili Ia lako ri kamateNa. Kami najadi sabiNa, sabana kami mboto nanggita i Yesus natuvu mpanjili.

¹⁶Jadi sampesuvu-sampesuvu, nikitamiu topunggu hitu bo nisanimumo ia. Ia nomparasaya i Yesus, jadi i Yesus nompakaroso kadana. Nikitamiu mboto, ia nabelo mpuumo sabana pomparasayana i Yesus.

¹⁷Sampesuvu-sampesuvu, nau komiu bo totua-totua ngatata nompatesi i Yesus, nisaniku komiu novia anu haitu sabana ledo nisanimiu Iamo Magau Topepakasalama.

¹⁸Nabi-nabi nggaulu anu niposumba nu Alatala nanguli Magau Topepakasalama kana mombarasai susa bo pari. Anu nipoviamiu hitu nompakadupa anu niuli nu Alatala ka nabi-nabiNa.

¹⁹Jadi sampesuvu-sampesuvu, komiu kana majea lako ri dosa-dosamiu bo matundu nte Alatala ala dosa-dosamiu ralelakaNa.

²⁰Bo Alatala mompakaroso bo mompakasana raramiu. Bo Ia muni mombatudu i Yesus makava nte komiu, sabana i Yesus hitumo nipelisi nu Alatala majadi Magau anu mompakasalama komiu.

²¹I Yesus kana monturo ri suruga sampe makava tempona Alatala mompakabaruru pura-pura, evamo nitesaNa ka nabi-nabi nipelisiNa nggaulu.

²²Sampesuvu-sampesuvu, naria tesa Nabi Musa nggaulu nombatesa i Yesus ivei: ‘Tupumiu Alatala manganggataka saito lako ri sampesuvumiu mboto majadi nabi nasimbayu mpo yaku. Komiu kana mangoseaka nuapa pura raulina ka komiu.

²³Isema-sema ledo mangoseaka anu rauli nu nabi haitu, ia kana rataniaka lako nte todea nu Alatala bo rapatesi.’ (Ulangan 18:15,18,19; Imamat 23:29)

²⁴Nabi-nabi ntanina anu nompasimbayu tesa lako nte Alatala nggaulu, nompamula lako ri Nabi Samuel sampe nabi-nabi natuvu purina, ira pura nombatesa anu najadi ri tempo sii-sii.

²⁵Janji-janji nu Alatala anu nipasimbayu nu nabi-nabi, nambela komiu sii-sii. Pojanji nipovia nu Alatala nte totuamiu nggaulu nambela muni nte komiu. Alatala nojanji ka Nabi Abraham, totuata nggaulu ivei: ‘Lako ri mulimu ngena, Kudekei belo ka pura-pura manusia ri dunia.’ (Kajadia 22:18; 26:4) Jadi sampesuvu-sampesuvu, komiumo nantarima belo nijanji nu Alatala haitu!

²⁶Haitumo sabana Alatala nanganggataka BatuaNa i Yesus, bo nantudu Ia tumai nte kita toYahudi ntani ruru, ala radekeiNa belo ka kita, haitumo, Ia manggeni kita majea lako ri pokaingguta nadaa.”

Suro-Suro 4

- ¹Tempo i Petrus bo i Yohanes da notesa ka todea riara Banua nu Alatala, nakava bara sako-ndua topanggeni pesomba, pakeni ntopojaga Banua nu Alatala, bo toSaduki.
- ²ToSaduki ledo nomparasaya tomate matuvu mpanjili. Jadi narau mpuu ira nangepe i Petrus bo Yohanes nompatuduki ka todea i Yesus natuvu mpanjili lako ri kamateNa. Sabana, pepatudukira haitu nompakalanto tomate matuvu mpanjili.
- ³Jadi nisakara randua suro haitu bo nisuarakara riara ntarunggu. Tempo haitu nabongimo, dopa namala ira ratangara. Jadi i Petrus bo i Yohanes nitaha ri sia sampe maile mpadondo.
- ⁴Tapi topangepe pepatuduki nu suro-suro pangane, nadeamo nomparasaya i Yesus. Jadi kadea ntopomparasaya i Yesus nantambai sampe nitasere lima-njobu tonana.
- ⁵Naeo mpadondo, pakeni-pakeni agama Yahudi, totua-totua ntoYahudi bo guru-guru agama nolibu ri Yerusalem.
- ⁶Ira nolibu ante Pakeni nTopanggeni Pesomba, iamo i Hanas, bo muni ante sampesuvuna i Kayafas, i Yohanes, i Aleksander, bo sampesuvu-sampesuvuna ntanina.
- ⁷Nasiromu purapa ira, nipekikeniramo i Petrus bo i Yohanes mantingayo ira pura-pura. Jadi nompamulamo ira nomparesa i Petrus bo i Yohanes ante nekutana, “Berimba komiu nompakabelo topunggu hitu? Ante kuasa nuapa, ante kuasa isema nipakemiu nompakabelo ia?”
- ⁸Jadi i Petrus nikuasai nu Nosa Gasa nu Alatala, bo nesanamo ia, “Totua-totua, pakeni ntodea bo pakeni agama.
- ⁹Kami nitangara sii-sii, sabana kami nantulungi saito topunggu, bo komiu madota mangisani berimba sampe tona hitu nipakabelo.
- ¹⁰Jadi ala rasanimiu bo ala rasani nu sampesuvuta toIsrael pura muni, kami manguli ka komiu, tona hitu nipakabelomo bo ia neangga ri ngayomiu pura-

pura sabana kuasa lako nte i Yesus Kristus toNazaret. Komiu nombapaku i Yesus ri kayu salib sampe namate, tapi Alatala nompakatuvu Ia mpanjili.

11I Yesusmo niuli vatu ri Buku Gasa ivei: ‘Vatu nitedaka ntopovia banua, vatu haitumo nopokopa ka banua haitu.’ ” (Mazmur 118:22)

12I Petrus nompapola tesana, “Aga i Yesus namala mompakasalama manusia, sabana ri njumangu dunia ledo ria saitoa tona ntanina nipakakuasa nu Alatala mompakasalama manusia, aga i Yesus saitoNa.”

13Topolibu haitu nokumaa pura-pura nanggita kabia i Petrus bo i Yohanes notesa, nemopa nisanira randua suro haitu aga tona biasa anu ledo nosikola nalanga. Lako rahaitu nisanira mpuumo randua suro haitu nosamporoa nte i Yesus bara ipia.

14Topolibu ledo namala nompoara tesa i Petrus bo i Yohanes, sabana topunggu nipakabelo haitu neangga ri ngayora nosanggani-nggani ante i Petrus bo i Yohanes.

15Jadi nitudura suro haitu rakeni hau ri savalikuna sampalai, bo topolibu pangane nosimpekutana,

16“Nuapa rapoviata ka tona randua haitu? Nisani ntoponturo ri ngata Yerusalem pura kabaraka nipokumaaka nipoviara. Ledo mamala rapoarata kajadia haitu.

17Tapi ala kareba hitu domo matolele hanupa, aginamo raparanggata ira randua bo raulita ka ira nee mpuu ratesamiu i Yesus ka tona ntanina.”

18Naupu haitu nirondera mpanjili randua suro pangane bo niulikara, “Tumo motesa atau mompatuduki i Yesus ka tona!”

19Tapi nesana i Petrus bo i Yohanes, “Pekirimi mbotomo mbana masipato rapovia kami ri panggita nu Alatala, mangoseaka parentamiu atau mangoseaka parenta nu Alatala.

20Kami hii ledo mamala menonto motesa anu nikita kami bo anu niepe kami mboto.”

²¹Ledo nikava ntopolibu anu masipato rahuku ka i Petrus bo Yohanes. Jadi niparanggara vaimo randua suro haitu pade nikabasakaramo, sabana naeka ira ka todea. Apa pura-pura todea nantoiya Alatala sabana kabaraka haitu.

²²Nokumaa mpuu todea sabana topunggu nipakabelo haitu, nelabimo patapulu-mpae umuruna.

²³Naupu i Petrus bo Yohanes nikabasaka, nanjilimo ira hau ri ponturo nu roara. Nakava ri sia, nitesara ka roara pura-pura anu niuli ntopolibu ka ira, haitumo balengga-balengga ntopanggeni pesomba bo pakeni-pakeni ntoYahudi ntanina.

²⁴Naupu roara nangepe tesara haitu, pura-pura ira nosangu rara nekakai nte Alatala ivei: “Pue, Komiumo Topompajadi langi, tana, tasi, bo pura-pura isina.

²⁵Komiu nombadekei tesa ka totua kami nggaulu Magau Daud. I Daud batuaMiu bo ante kuasa Nosa Gasamiu nitesana mami manusia mangeva i Yesus, ivei: ‘Narau todea anu ledo nosisani nte Alatala. Bo todea-todea novia nia anu ledo ria gunana.

²⁶Magau-magau ri dunia nasiromu nasadia meeve, bo totua-totua ngata nasintuvu mangeva Alatala bo Magau Topepakasalama nipelisiNa.’ (Mazmur 2:1-2)

²⁷O Pue, dopa nasae ri ngata hitu, Magau Herodes bo i Pontius Pilatus nasiromu ante toIsrael bo tona ledo nosisani nte Komiu. Patujura mangeva i Yesus, BatuaMiu nagasa, anu nipelisiMiu majadi Magau Topepakasalama.

²⁸Ira nasintuvu nompatesi i Yesus. Tapi kakanana anu nipoviara aga nompakadupa anu nipakatantuMiu mami lako ri pamulana nangoseaka kuasaMiu bo dotaMiu.

²⁹Pue, epemo tesara nomparangga kami. Kami batuaMiu, bo kami merapi tulungi nte Komiu ala kami ledo maeka mompatolele tesaMiu.

³⁰Pue, tulungi ala tona nadua mamala rapakabelo bo kabaraka bo tanda nipokumaaka majadi ante kuasa i Yesus, BatuaMiu nagasa.”

³¹Naupu ira nosambaya, banua nikasiromura haitu nogoya. Ira pura-pura nikuasai nu Nosa Gasa nu Alatala, bo nipatolelera tesa nu Alatala bo domo ntoto naeka rarara.

³²Pura-pura topangoseaka i Yesus natuvu nosangu rara bo nosangu pekiri. Ledo ria saitoa nanguli mbara-mbarana anuna mboto. Anu naria ante ira, anura mpasanggani-nggani.

³³Suro-suro ledo naupu-upu nompatolele kareba i Pue Yesus natuvu mpanjili, bo naroso mpuu tesara. Bo Alatala nabelo mpuu nte ira pura-pura.

³⁴⁻³⁵Ledo ria saitoa ira nakura nuapa-nuapa, sabana isema naria tanana bara banuana nipobaluna, nikenina ali nu tana bara banua haitu ka suro-suro rapake ka todea. Doi haitu nibagi-bagi nu suro-suro ka isema-sema naria paraluu.

³⁶⁻³⁷Ivesia muni nipovia i Yusuf. Nipobaluna tanana bo doi haitu nikenina bo nidekeina ka suro-suro i Yesus. I Yusuf haitu toLewi lako ri levuto Siprus. Suro-suro nombadae ia i Barnabas, batuana, “topompakavoe rara ntona.”

Suro-Suro 5

¹Tapi naria muni saito langgai ntanina nosanga i Ananias, bereina nosanga i Safira. Ira njamboko nompobalu salimpu tanara.

²Bo doi ali ntana nipobalura haitu, sagaa nibolira ka ira mboto, bo sagaa nikeni i Ananias ka suro-suro. Nangulimo i Ananias, “Hitu puramo doi ali ntana nipobalu kami.” Poviana haitu nisani nu bereina muni.

³Nanguli i Petrus ka ia, “Ananias, nakuya iko nompalamba Magau nu Seta nombakuasai raramu sampe nidavaimu Nosa Gasa nu Alatala? Iko nombaboliaka doimu sagaa ka iko mboto.

⁴Dopame nipobalumu tana haitu, iko mami tupuna. Bo naupu tana haitu nipobalumu, doi ali ntana haitu iko muni tupuna. Nakuya sampe naria patuju riara ntaimu nompovia anu nadaa? Iko ledo aga nodava ka manusia, tapi iko nodava ka Alatala!”

⁵⁻⁶Naupu i Ananias nangepe tesa i Petrus, kaliu-liu nadunggamo ia bo namate. Bo nakava bara sako-ndua kabilasa mombasompu karobatana, bo nikenira hau ratana ri savalikuna. Pura-pura tona naeka mpuu nangepe anu najadi haitu.

⁷Bara talu-jaa kaliuna i Ananias namate, nesua munimo bereina i Safira. Dopa nisanina anu dako najadi.

⁸I Petrus nanguli ka ia, “Uli ka yaku, tana nipobalumi njamboko haitu, aga hitu puramo alina?” Nesana i Safira, “Nakana. Tutu puramo alina.”

⁹Nanguli i Petrus ka ia, “Nakuya iko bo bereimu i Ananias nasintuvu nombabagiu Nosa Gasa nu Alatala? Epemo! Tona nombatana bereimu, dako nanjili lako ri dayo. Iko muni rakenira hau ratana ri savalikuna!”

¹⁰Nangepe tesa haitu, nadunggamo i Safira bo kaliu-liu namate ri ngayo i Petrus. Tempo kabilasa-kabilasa pangane nesua, nikavara i Safira namate munimo. Bo nikenira karobatana hau ri savalikuna bo nitanara ri sinjori dayo bereina i Ananias.

¹¹Nangepe kajadia haitu, naeka puramo topomparasaya i Yesus bo tona ntanina muni.

¹²Nadea mpuu kabaraka bo tanda-tanda nipokumaaka nipovia nu suro-suro ri mata ntodea. Bo topangoseaka i Yesus nosangu rara nasiromu ri Banua nu Alatala ri Tambale Magau Salomo.

¹³Tona ntanina anu ledo nomparasaya i Yesus ledo nabia nakava masiromu ante ira, tapi naupa ivesia, topomparasaya gahaitu mpuu-mpuu nipakaoge ntodea.

¹⁴Kasae-sae katambai-mbai kadea ntopangoseaka i Yesus, langgai bo mombine.

¹⁵Nanggita kabaraka-kabaraka nipovia nu suro-suro, nadea tona nadua nikeni ante paturu bara ante ompa bo nituu ri dala. Apa nisarumakara ane moliu i Petrus ngena, nau aga vayona mambela sakide, mabelomo ira.

¹⁶Noumbe-umbe tona nakava lako ri ngata-ngata napara Yerusalem nanggeni tona nadua bo tona nipesua seta. Bo pura-pura tona haitu nipakabeloramo.

¹⁷Kaupuna Pakeni nTopanggeni Pesomba ante roa-roana anu nangoseaka pepatuduki ntoSaduki, nasiriatimo nanggita kadea ntona nomparasaya i Yesus. Jadi ira nompamula nompandasa suro-suro i Yesus.

¹⁸Nisakara suro-suro, bo nisuarakara riarara ntarunggu ngata.

¹⁹Tapi bongina haitu saito malaeka nu Alatala nombaungge vamba-vamba ntarunggu bo nanggeni suro-suro hau ri savalikuna. Nanguli ia,

²⁰“Koimo, peangga ri doyata Banua nu Alatala bo patolelemo ka todea kareba katuvu nabaru.”

²¹Naupu nangepe tesa haitu, hau mpuumo suro-suro nanturusi anu niuli nu malaeka ka ira. Nasadondo mpuu ira hau ri doyata Banua nu Alatala bo nompamulamo nompatuduki tona ri sia. Tempo haitu Pakeni nTopanggeni Pesomba ante roa-roana nompokio pura-pura pakeni-pakeni ntoYahudi masiromu ri Polibu Mbaso Agama. Nitudura tona hau mangala suro-suro lako ri tarunggu, rakeni ratangara ri ngayora.

²²Tempo tona nitudu haitu nakava ri tarunggu, ledo nikavara suro-suro ri sia. Jadi nanjilimo ira hau manguli ka toPolibu Mbaso Agama.

²³Niulira, “Nakavapa kami ri tarunggu, nikita kami vamba ntarunggu niupi bo nigunji pakabelo-belo bo topojava-topojava naria pura ri vamba. Tapi tempo kami nombaungge vamba haitu, ledo ria saitoa tona nikava kami riarana.”

²⁴Nangepe tesa haitu, pakeni ntopojava Banua nu Alatala bo balengga-balengga ntopanggeni pesomba, naingu mpuu rarara nompekirika anu najadi ante suro-suro, bo naeka nompekirika anu majadi ngena.

²⁵Dopa nasae, nakavamo saito langgai nanguli ka ira, “Epe vei! Tona nisuarakamiu riarara ntarunggu, hitupa nompatuduki todea ri Banua nu Alatalamo!”

²⁶Nangepe tesa haitu, pakeni ntopojava Banua nu Alatala ante pura-pura roana hau nialara mpanjili suro-suro. Tapi ledo niduasira, apa naeka ira ka todea. Niulira bara rarempe ntodea ante vatu ira ane raduasira suro-suro.

²⁷Suro-suro nikenira nesua nantingayo Polibu Mbaso. Pade Pakeni nTopanggeni Pesomba nomparesa ira, ivei:

²⁸“Komiu nitagi kami bara ipia, nee mpuu mompatolele pepatuduki i Yesus. Tapi ledo nepangala komiu, nggosena nipatolelemiu pepatuduki haitu ri njumangu ngata Yerusalem, bo niulimiu muni, i Yesus haitu namate nipatesi kami!”

²⁹Nesana i Petrus bo suro-suro ntanina, “Kami kana mangoseaka parenta nu Alatala, bo ledo parenta nu manusia.

³⁰Komiu nantudu tona mompatesi i Yesus bo mombapaku Ia ri kayu salib. Tapi Alatala anu nisomba ntotuata nggaulu, Iamo nompakatuvu i Yesus mpanjili lako ri kamateNa.

³¹Bo Alatala nompakaoge i Yesus bo nipoponturoNa Ia ri sabingga ngganaNa, bo nidekeiNa ka Ia kuasa momparenta bo mompakasalama kita, ala kita toIsrael radekei loga majea lako ri dosa-dosata bo raampungu.

³²Kamimo hii sabina pura-pura kajadia haitu, kami bo Nosa Gasa anu nidekei nu Alatala ka pura-pura topangoseaka parentaNa.”

³³Nangepe tesa-tesa nu suro-suro, nadua mpuu rara ntoPolibu Mbaso, sampe ira nasintuvu mompatesi suro-suro haitu.

³⁴Tapi riaru Polibu Mbaso naria saito toFarisi nosanga i Gamaliel. Ia guru agama mpuu-mpuu nipakaoge ntodea. Ia neangga bo nantudu tona manggeni suro-suro mesuvu ri savalikuna sampalai ala ledo raepera tesana.

³⁵Naupu haitu niulikana ka toPolibu Mbaso haitu, ivei: “Sampesuvu-sampesuvuku toIsrael! Kita kana mompekiri pakabelo-belo anu rapoviata ka tona hitu,

³⁶apa bara sako-mpae naliu neumba i Teudas. Pangulina ia tona nabaraka sampe nitasere pataatu tona nangoseaka ia. Tapi ia muni nipatesi bo pura-pura topangoseaka ia nasimpotare.

³⁷Naupu haitu, tempo nitulisi pura-pura sanga ntona riara buku sensus, neumba munimo i Yudas, tona lako ri bagia Galilea. Ia muni nompadidi todea nangoseaka ia. Tapi ia muni nipatesi bo pura-pura topangoseaka ia muni nagaro.

³⁸Sabana haitu, kuuli ka komiu, nee rakuya-kuyamiu topangoseaka i Yesus hitu. Palambamo ira, sabana ane pepatudukira bo anu nipoviara aga nopuna lako ri manusia, tantu maopo ngena.

³⁹Tapi ane pepatudukira bo anu nipoviara nopuna lako nte Alatala, ledo rapakuleta mombadagi ira. Ledo aga haitu! Nee sampe kita mangeva Alatala!” Naupu toPolibu Mbaso nangepe tesa i Gamaliel, nitarimaramo tesana.

⁴⁰Bo nipokiora suro-suro mesua mpanjili. Nakava ri sia, suro-suro haitu niporo pade nitagi vai: “Tumo mompatuduki kareba i Yesus ka tona!” Naupu sia pade nikabasakamo.

⁴¹Suro-suro nompalaisi Polibu haitu bo nadamba mpuu rarara sabana ira nireke nu Alatala masipato mombarasai kasusa bo kapari sabana pangoseakara i Yesus.

⁴²Bo eo-eo ri Banua nu Alatala bo muni ri banua-banua ntona, ira nompatolele Kareba Belo bo nompatuduki ka tona i Yesusmo Magau Topepakasalama anu nijanji nu Alatala.

Suro-Suro 6

¹Kasae-sae kadea-dea topangoseaka i Yesus. Tempo haitu topangoseaka i Yesus deanapa toYahudi. Sanu ira nobasa Yunani, bo sanu nobasa basara mboto. Tempo haitu topobasa Yunani ledo nadamba nte topobasa Yahudi. Topobasa Yunani nanguli, “Timbala-timbala kami ledo nanggava doi balanja eo-eo mpo anu nipalele ka timbala-timbala ntanina.”

²Sabana haitu, suro-suro sapulu randua haitu nompasiromu pura-pura topangoseaka i Yesus bo nanguli ka ira, “Ledo nabelo ane menonto kami mompatolele tesa nu Alatala aga mompakasiayu kandeamiu.

³Jadi aginapa rapelisimiu papitu tona lako nte komiu mboto radekeika bago haitu. Pelisimo tona nabelo sangana, nanoto, bo nikuasai Nosa Gasa nu Alatala, bo pura-pura bago haitu radekei kami ka ira.

⁴Bo ivesiamo kami suro-suro mamala mombatui bago kami mboto, haitumo mosambaya ka Alatala bo mompatolele tesaNa.”

⁵Naupu nangepe tesa nu suro-suro pangane, nasituju puramo topangoseaka i Yesus ante tesa haitu. Jadi nipelisiramo i Stefanus, saito tona naroso pomparasayana i Yesus bo muni ia nikuasai nu Nosa Gasa nu Alatala. Nipelisira muni i Filipus, bo i Prokhorus, i Nikanor, i Timon, i Parmenas, bo i Nikolaus lako ri ngata Antiokhia. Ia ledo toYahudi, tapi ia nesua agama Yahudi.

⁶Tona papitu haitu nikenikara ka suro-suro bo naupu nosambaya, suro-suro nombadika palera ri balengga ntona haitu mombalanti ira majadi topotulungi suro-suro.

⁷Ivesiamo kareba nu Alatala nipatolele njuu bo kadea ntopomparasaya i Yesus ri ngata Yerusalem nantambai mpuumo. Bo nadea muni topanggeni pesomba nangoseaka i Yesus.

⁸I Stefanus mpuu-mpuu nipobelo nu Alatala. Bo naria kuasa nu Alatala nte ia sampe nadea kabaraka bo tanda nipokumaaka nipoviana ri ngayo ntodea.

⁹Tapi naria muni tona nangeva ia. Ira haitu toYahudi anu nosambaya ri banua petupu niuli Banua Petupu nu Batua-Batua Nikabasaka. Ira toYahudi ntanina lako ri ngata Kirene bo ngata Aleksandria. Ira bo toYahudi lako ri propinsi Kilikia bo lako ri propinsi Asia nangeva bo nosisanai nte i Stefanus.

¹⁰Tapi ledo nipakulera nombasapu anu niuli i Stefanus, sabana Nosa Gasa nu Alatala nombadekei kapande ka ia notesa.

¹¹Jadi nidekeira doi mate ka bara sako-ndua tona ala raulira, “Niepe kami tona haitu nanjalai Nabi Musa bo Alatala.”

¹²Ivesiamo ira nompakapane rara ntodea bo totua-totua ntoYahudi bo guru-guru agama sampe narau rarara nte i Stefanus. Jadi hau ira nombasaka i Stefanus, pade nikenira ratangara ri ngayo Polibu Mbaso Agama Yahudi.

¹³Nikenira muni sabi-sabi mpodava ri ngayo ntoPolibu haitu mombatesa i Stefanus anu ledo nakana-kanaka. Sabi-sabi haitu nanguli, “I Stefanus nasaro nanjalai Banua nu Alatala anu nagasa, bo nasaro muni nisalaina Atura-atura nu Alatala anu nipapola Nabi Musa ka kita.

¹⁴Niepe kami ia nanguli i Yesus toNazaret mombagerosi Banua nu Alatala bo mombabaliki pura-pura ada anu nidekei i Musa ka kita.”

¹⁵Pura-pura tona ri Polibu Mbaso haitu nangganotosi i Stefanus. Bo nikitara lenje i Stefanus nasimbayu mpo lenje nu malaeka.

Suro-Suro 7

¹Pakeni nTopanggeni Pesomba nompekutana i Stefanus, “Berimba? Nakana anu niulira?”

²Nesana i Stefanus, “Totua-totua bo sampesuvu-sampesuvu. Epemo tesaku hitu. Dopame i Abraham totuata nggaulu nolinja hau ri ngata Haran, tempo ia da nonturo ri tana Mesopotamia, Alatala toNeliu KaogeNa nakava nte ia.

³Alatala nanguli ka i Abraham, ‘Palaisimo ngatamu bo sampesuvumu hitu. Koimo hau ri ngata Kupopakita ka iko.’

⁴Jadi nalai mpuumo i Abraham nompalaisi ngata ntoKasdim, bo nolinja hau ri ngata Haran. Naliu kamate ntuamana, Alatala nantudu ia molinja lako ri ngata Haran tumai ri tana Israel, tana niponturota sii-sii.

⁵Tempo haitu, ledo naria tana nipopobagiaka nu Alatala ka i Abraham. Nau aga sandanga ledo ria nidekeiNa ka ia. Tapi Alatala nojanji mombadekei tana hitu ka i Abraham sampe ri muli nu mulina. Tempo Alatala nojanji haitu, i Abraham dopa noana.

⁶Tapi iveimo tesa niuli nu Alatala ka i Abraham, ‘Mulimu monturo mpo topesovo ri ngata ntona. Tupu ngata haitu mompobatua ira, bo mompandasa ira pataatu mpae kasaena.

⁷Tapi maupu haitu, Kuhuku tona nompobatua ira. Bo mulimu mesuvu lako ri ngata haitu, bo manjili metupu nte Yaku ri sii ri ngata hitu.’

⁸Naupu notesa ivesia, nitudu nu Alatalamo i Abraham bo muli-mulina rasuna, tandana pojanjiNa nte i Abraham. Jadi tempo i Ishak ana i Abraham nipoanaka, ia nisuna i Abraham tempo umuruna da valu-eo. Ivesia muni i Ishak nombasuna anana i Yakub, bo i Yakub muni nombasuna anana sapulu randua anu najadi totua-totuata toYahudi.

⁹Totua-totuata, nasiriati nanggita tueira i Yusuf, sampe ia nipobalura ka toMesir. Ia nipajadi batua, tapi Alatala nombatulungi ia,

¹⁰bo nombakabasaka ia lako ri pura-pura kasusana. Alatala nombadekei ka ia kapande anu nompakadamba rara i Firaun, Magau ntoMesir, sampe Firaun nombalanti ia majadi gubernur ri tana Mesir, bo topourusi pura-pura isi banuana.

¹¹Naliu haitu, nakavamo tempo ara mpai ri tana Mesir bo ri tana Kanaan, sampe pura-pura manusia hamai nasusa mpuu. Ivesia muni totua-totuata, domo mpuu naria kandeara.

¹²Tapi tempo i Yakub nangepe naria kandeana ri tana Mesir, nituduna anana, totua-totuata haitu, hau ri tana Mesir mangali kandeana. Haitumo polipara paratama hau ri tana Mesir.

¹³Karongganinapa ira hau, i Yusuf nompopaisani ka sampesuvu-sampesuvuna haitu, ‘Yakumo hii i Yusuf.’ Lako ri sia pade nisani nu Magau Mesir sampesuvu-sampesuvu i Yusuf.

¹⁴⁻¹⁵Naupu haitu i Yusuf nompakatu kareba ka tuamana i Yakub nerapi ala tuamana ante pura-pura ira sangata molinja hau ri tana Mesir. Jadi i Yakub sangata nolinja hau ri tana Mesir. Kadeana ira pura-pura pitupulu bo alima. Bara sako-mpae kasaena ira nonturo ri sia, namatemo i Yakub. Ivesia muni anana, totua-totuata nggaulu.

¹⁶Buku mboara niken i hau ri ngata Sikhem, bo nitana ri dayo niali Nabi Abraham bara ipia lako ri muli i Hemor ri Sikhem ante doi salaka.

¹⁷Nasaemo kaliuna haitu, naparamo tempo Alatala mompakadupa pojanjiNa ka i Abraham. Totuata ri tana Mesir nantambai njuumo kadeana.

- ¹⁸Nasae-sae naria saito magau ntanina nomparenta ri tana Mesir, ledo nisanina i Yusuf.
- ¹⁹Magau haitu nadaa mpuu nompandasa totua-totuata bo nombabagiu ira. Niparentana ala ngana-ngana dako nesuvu kana ratedakara ala mamate pura.
- ²⁰Tempo haitumo i Musa nipoanaka. I Musa ngana nagaya mpuu. Talu-
mbulamo kasaena ia nipatuvusi ntina tuamana, „sampe domo namala ia
nitabuniaka ntotuana.
- ²¹Bo tempo ia niken i niboli ri savaliku ngata, saito ana mombine Magau Firaun
nanggava ngana haitu. Jadi nialana bo nipatuvusina mpo anana mboto.
- ²²Pura-pura pangisani bo ada-ada ntoMesir nipatuduki ka i Musa, sampe ia
najadi tona naroso mpuu tesana bo poviana.
- ²³Nagana patapulu mpae umuruna, neumbamo dota rarana hau manggita
sampesuvu-sampesuvuna toIsrael.
- ²⁴Nakava ri sia, nikitana saito toIsrael niboba ntoMesir. Jadi hau ia
mombasaliku sampesuvuna niboba haitu bo nipatesinamo toMesir.
- ²⁵Nisarumaka i Musa rasani nu sampesuvu-sampesuvuna toIsrael iamo nipelisi
nu Alatala mombakabasaka ira lako ri pobatua ntoMesir. Tano ledo mpuu
nisanira.
- ²⁶Kamailekana, hau vai ia bo nikitana randua toIsrael nosibaga. Ia
nompasimbuku mompoposinggabelo ira randua. Nanguli ia, ‘Komi tu
nosampesuvu! Nakuya komi nosibaga, le?’
- ²⁷Tapi tona nombaboba roana haitu nombajunaka i Musa, bo nanguli, ‘Isema
nangangataka iko majadi totua ngata atau topotangara kami?’
- ²⁸Iko bara madota mompatesi yaku nasimbayu mpo toMesir nipatesimu riavi!’
- ²⁹Nangepe haitu, nalaimo i Musa lako ri tana Mesir, sabana poviana nompatesi
toMesir nisani ntonamo. Hau ia nonturo ri tana Midian. Bo hamai ia noberei
bo noana randua ngana langgai.

³⁰Patapulu mpae kaliuna, nakavamo saito malaeka nte i Musa ri karava bai napara Bulu Sinai. Malaeka haitu neonga riaru apu ri santungu gumbu navaya.

³¹Nokumaa i Musa nanggita gumbu navaya bo hau ia manggaparai bo niparesana gumbu haitu. Pade niepena suara nTupu nanguli,

³²‘Yakumo hii Alatala anu nisomba ntotuamu nggaulu, Tupu i Abraham, i Ishak bo i Yakub.’ Nangepe haitu, naekamo rara i Musa sampe nolete bo domo nabia ia mompeinta gumbu navaya haitu.

³³Nanguli vaimo Alatala ka ia, ‘Vonju sapatumu, apa tana nipeanggamu tutu tana nagasa.

³⁴NikitaKu bo nipariaraKu kandasa ntodeaKu ri tana Mesir. Bo niepeKumo pekakaira nerapi tulungi. Haitu sampe Yaku nanau mombakabasaka ira. Jadi panggalivomo, iko Kutudu manjili hau ri tana Mesir mombakabasaka ira!’ Ivesiamo tesa nu Alatala ka i Musa.

³⁵I Musa hitumo anu ledo nipokono ntoIsrael bo nipoarara ante tesa ivei: ‘Isema nanganggataka iko majadi totua ngata atau topotangara kami?’ Tapi ia mpuu-mpuu nipelisi nu Alatala manggeniaka ira bo mombakabasaka ira lako ri pobatua ntoMesir. Haitu nipoviana ante petulungi nu malaeka anu nakava nte ia ri gumbu navaya.

³⁶I Musamo mai tona nanggeni todea toIsrael nesuvu lako ri tana Mesir, bo nipoviana kabaraka-kabaraka bo tanda-tanda nipokumaaka ri tana Mesir, ri Tasi Nalei bo ri karava-karava bai patapulu mpae kasaena.

³⁷I Musa muni nanguli ka todea toIsrael, ‘Alatala mombadekei ka komiu saito Nabi nasimbayu mpo yaku, rapelisiNa lako nte komiu mboto.’

³⁸I Musa muni naria nosanggani-nggani nte todea toIsrael ri karava bai, bo i Musamo mai najadi topetariolo ntotuata ante malaeka anu notesa ka ia ri Bulu Sinai. I Musamo mai nantarima tesa natuvu lako nte Alatala bo nipapolana ka kita.

³⁹Naupa ivesia, totua-totuata ledo ntoto nioseakara tesa i Musa. Nisapuakara tesana bo ira madota manjili hau ri tana Mesir.

⁴⁰Niulira ka i Harun, tuaka i Musa, ‘Povia ka kami sangu pinoito anu mamala manggeniaka kami. Apa domo nisani kami bara nuapamo najadi nte i Musa anu nanggeni kami nesuvu lako ri tana Mesir!’

⁴¹Jadipa, nipoviaramo sangu pinoito nolenje mpo ana japi. Naupu haitu nikenira pesomba bo nisambaleka binata ka pinoito haitu, bo nipoviara posusa mombatoiya anu nipovia mpalera mboto.

⁴²Jadi Alatala nompalaisi ira bo nompalamba ira nombasomba betue-betue ri langi. Haitu nitulisi riara buku nu nabi-nabi ivei: ‘O, toIsrael! Nisambalemiu binata rapesombamiu ri karava bai patapulu mpae kasaena, tapi ledo nisombamiu kaKu.

⁴³Ledo aga haitu, tapi tenda pesomba ka viata Molokh nikenikenimiu nosanggani-nggani ante pinoito nolenje mpo betue viata Refan! Pinoito-pinoito haitumo nipoviamiu rasombamiu. Haitu sabana komiu kana Kutedaka makavao, haunapa lako ri tana Babel!’ (Amos 5:25-27)

⁴⁴Sampesuvu-sampesuvu. Tempo totua-totuata naria ri karava bai, naria nte ira tenda petupu, tandana Alatala nonturo nosanggani-nggani ante ira. Tenda haitu nipoviara nantuntuni parenta nu Alatala ka i Musa bo nantuntuni gambara nipopakita nu Alatala ka ia.

⁴⁵Tenda haitu nidekei ka mulira bo ira nanggeni tenda haitu tumai ri tana Kanaan hitu. Tempo haitu Alatala nompopalai tupu ngata Kanaan bo i Yosua nanggeniaka toIsrael nompemala ngata anu niponturota sii-sii. Bo tenda haitu da nipakera metupu nte Alatala sampe ri tempo Magau Daud.

⁴⁶Magau Daud nompakadamba rara nu Alatala bo niperapina nte Alatala ala ia rapaloga movia banua raponturo nu Alatala, haitumo Alatala nisomba i Yakub.

⁴⁷Tapi damo anana, Magau Salomo nombabangu Banua nu Alatala.

⁴⁸Naupa ivesia, Alatala anu Neliu KaogeNa, ledo nonturo ri banua nipovia nu manusia. Apa riara buku nu nabi nitulisi ivei:

⁴⁹‘Langi gaderaKu bo tana potande kadaKu. Banua nuapa rapoviamiu Kuponturo? Ri umba ponturo Kupangosanaka?’

⁵⁰Sabana, dunia ante pura-pura isina, Yaku mboto nompajadina!’ Ivesiamo tesa nu Alatala. (Yesaya 66:1-2)

⁵¹Sampesuvu-sampesuvu, nakaa mpuu bagamiu! Bo komiu mpuu-mpuu netibongo! Ledo nadota komiu mangepe bo mangoseaka Tesa nu Alatala! Komiu batena nasimbayu mpo totuamiu nggaulu nangeva Nosa Gasa nu Alatala!

⁵²Ledo ria saitoa nabi ledo nipandasa ntotuamiu nggaulu. Nipatesira muni nabi-nabi anu nompatolele kareba kakava i Yesus, Batua nu Alatala nanao. Bo sii-sii nipobalumi bo nipatesimiu Batua nu Alatala haitu!

⁵³Komiumo nantarima Atura-atura nu Alatala anu nidekei nu malaeka-malaeka ka totuata nggaulu, tapi ledo nipokonomiu nangoseakana!”

⁵⁴Nangepe tesa i Stefanus pangane, nadua mpuumo rara ntoPolibu Mbaso Agama sampe nanggiki baga pura ira.

⁵⁵Tapi i Stefanus nikuasai nu Nosa Gasa nu Alatala, bo nantingoa langi. Nikitana reme nu Alatala. Bo nikitana muni i Yesus neangga ri sabingga nggana nu Alatala.

⁵⁶Nanguli i Stefanus, “Peintamo! Nikitaku langi natebuka bo i Yesus, Ana nu Manusia neangga ri sabingga nggana nu Alatala ri suruga!”

⁵⁷Nangepe haitu, toPolibu Mbaso nongare-ngare bo nombaramu talingara ala domo raepera hanupa tesa i Stefanus. Nangova puramo ira hau mombasaka i Stefanus.

⁵⁸Nidiisakara hau ri savaliku ngata, bo nirempera watu. Sabi-sabi mpodava ri Polibu Mbaso pangane, nombavonju bajura bo nibolira nte tona nosanga i Saulus, ala mabelo ira mombarempe i Stefanus.

⁵⁹Tempo i Stefanus da nirempera, nekakaimo ia, “Pue Yesus, siimo nyawaku!”

⁶⁰Bo nantaputu ia bo nongare ante suara namangga, “Pue, ampungimo dosara hitu!” Naupu haitu, namatemo ia.

Suro-Suro 8

¹I Saulus nadamba apa i Stefanus nipatesira. Nompamula eo haitu todea topangoseaka i Yesus ri ngata Yerusalem mpuu-mpuu nipandasa ntoYahudi sampe ira nasimpotare hau ri njumangu ngata ri bagia Yudea bo Samaria. Aga suro-suro i Yesus ledo nalai.

²Tona natundu nte Alatala nombatana i Stefanus ri dayo, bo nombatangisi ia ante nasusa mpuu rarara.

³I Saulus nompasimbuku njuu mompandasa topangoseaka i Yesus ala domo raparasayara i Yesus. Nipebutuna banuara nipesuana bo isema-sema nomparasaya i Yesus, langgai bo mombine, niumbunjaina ri savalikuna bo nisuarakana riara ntarunggu.

⁴Topomparasaya nasimpotare haitu, nompatolele kareba lako nte Alatala ri umba-umba.

⁵Saito ira nosanga i Filipus. Ia hau ri ngata Samaria bo nipatolelena ka tona hamai i Yesusmo Magau Topepakasalama anu nijanji nu Alatala.

⁶Tempo todea nangepe i Filipus notesa bo nikitara kabaraka-kabaraka nipoviana, nipariarara mpuumo anu nitesana haitu.

⁷Apa nadea seta nipopalaina lako nte tona. Seta-seta haitu nesuvu bo nongare-ngare. Nadea muni tona nakoyo, tona nakejo, bo tona napunggu nipakabelona.

⁸Jadi nadamba mpuumo rara ntona ri ngata Samaria.

⁹Ri ngata haitu naria saito toposibalimata nosanga i Simon. Bara sakuya kasaena ia nompopokumaa todea ri ngata Samaria sabana poviana. Bo niulina iamo tona nabaraka.

¹⁰Pura-pura tona ri ngata haitu, tomaoge bo tona biasa, nompariara tesana. Niulira, “I Simon mai naria baraka ntupu anu niuli ‘Baraka Oge!’”

¹¹Nasae mpuumo ia nompopokumaa ira ante posibalimatana sampe ira pura-pura nompariara ia.

¹²Tapi i Filipus nompatolele Kareba Belo ka ira. Kareba Belo haitu nanguli Poparenta nu Alatala bo i Yesus Kristus, Magau Topepakasalama.

Niparasayaramo kareba haitu bo ira nidiumo, langgai bo mombine, tandana ira nomparasaya i Yesus.

¹³I Simon mboto nomparasaya, bo naupu ia nidiu, nituntunina njuumo i Filipus. Nokumaa mpuu ia nanggita kabaraka-kabaraka bo tanda-tanda nipokumaaka nipovia i Filipus.

¹⁴Suro-suro ri ngata Yerusalem nangepe kareba tona ri ngata Samaria nantarima tesa nu Alatalamo. Jadi nitudura i Petrus bo i Yohanes hau ri Samaria.

¹⁵Tempo i Petrus bo Yohanes nakava hamai, niposambayakara toSamaria anu nomparasaya i Yesus ala Nosa Gasa nu Alatala manau nte ira.

¹⁶Apa Nosa Gasa nu Alatala dopa nanau mombakuasai ira. Ira aga nidiu, tandana ira nomparasaya i Pue Yesus.

¹⁷Jadi, i Petrus bo i Yohanes nombadika palera ri balengga ntoSamaria haitu bo Nosa Gasa nanau nte ira mpuu.

¹⁸Nikita i Simon suro-suro nombadika palera ri balengga ntona haitu bo Nosa Gasa nombakuasai ira. Jadi nikeninamo doi ka i Petrus bo Yohanes apa ia madota mangali kabaraka haitu.

¹⁹Niulina, “Dekei ka yaku muni kuasa tutu ala yaku muni mamala mombadika paleku ri balengga ntona sampe ira rakuasai Nosa Gasa nu Alatala.”

²⁰Tapi nesana i Petrus, “Masurukavu mpuu iko bo doimu! Nisarumakamu kabaraka nidekei nu Alatala mamala raali ante doi?”

²¹Iko ledo ntoto masipato metuntuni riara pokarajaa kami hitu, sabana raramu ledo nanao ri panggita nu Alatala.

²²⁻²³Nisaniku iko tu nasiriati bo iko nipobatua dosa! Jadi, kajeamo lako ri patujumu nadaa, bo perapimo nte i Pue ala raampungina pekirimu nadaa tutu!”

²⁴Nanguli i Simon, “Ai! Tulungi posambayakamiu yaku, perapi nte i Pue ala anu niulimiu tutu ledo mambela yaku.”

²⁵Naupu i Petrus bo Yohanes nosabi bo nompatolele tesa i Pue ka todea, nanjilimo ira hau ri ngata Yerusalem. Bo riaru polipara haitu nipatolelera Kareba Belo ri ngata dea ri bagia Samaria.

²⁶Naria malaeka nu Alatala nakava nangulika i Filipus, “Koimo hau ri puluna sampe mukava dala motua lako ri ngata Yerusalem hau ri ngata Gaza.” (Dala haitu domo nasaro niose.)

²⁷⁻²⁸Jadi haumo i Filipus. Tempo haitu naria saito toEtiopia ri dala haitu notua lako ri ngata Yerusalem hau manjili ri ngatana mboto. Ia tona nalanga panggana bo ia nipakakuasa nombaurusi kakalumana i Kandake, Magau Mombine ri tana Etiopia. Tona haitu dako nombasomba Alatala ri ngata Yerusalem bo ia nodoka nanjili hau ri ngatana mboto. Tempo ia nonturo riaru dokana, ia nombabaca buku nitulisi Nabi Yesaya nggaulu.

²⁹Jadi Nosa Gasa nanguli ka i Filipus, “Koi ragamo doka tona hautu.”

³⁰Jadi nangovamo i Filipus hau mantotoaka doka haitu. Niepena tona riaru nu doka nombaca buku nitulisi Nabi Yesaya. Jadi nekutanamo i Filipus, “Nisanimiu batuana anu nibacamiu tutu, pua?”

³¹Nesana toEtiopia, “Berimba kusani ane ledo ria tona mombabatuasina ka yaku?” Pade niunakana i Filipus mesavi ri doka, bo monturo ri sinjorina.

³²Hitumo tesa-tesa lako ri buku Nabi Yesaya nibacana haitu: Ia mpo bimba niumbu rakeni rasambale, mpo ana bimba ledo nombee nigau buluna. Ivesia muni ia ledo ntoto ria sambelaa notesa.

³³Ia nislai bo ledo nitangara nanao. Ia nasalisa nipatesi sampe ledo ria mulina mamala ratutura ntona. (Yesaya 53:7-8)

³⁴Nanguli toEtiopia haitu ka i Filipus, “Uli kaku isema kakanana niuli Nabi Yesaya tempo nitesana tona nirapaka bimba, karonu mboto atau tona ntanina?”

³⁵Jadi, i Filipus nompasimbayu Kareba Belo i Yesus ka tona haitu nompamula lako ri tesa-tesa nibacana pangane.

³⁶Riara polipara haitu, nikitara uve napara dala. Nanguli toEtiopia, “Peintamo! Moitu uve. Mamala yaku radiu sii-sii?”

³⁷[Nesanamo i Filipus, “Ane niparasayamiu mpuu, mamala komiu radiu.” Nanguli toEtiopia haitu, “Niparasayaku i Yesus Kristus Iamo Ana nu Alatala!”]

³⁸Naliu sia, nipopetaanamo dokana, bo nanaumo ira randua lako ri doka bo hau riara nu uve. ToEtiopia haitu nidiu i Filipusmo, tandana niparasayana i Yesus.

³⁹Nesore ira lako riara nu uve, Nosa Gasa nu Alatala nangala i Filipus lako ri sia bo domo nikita ntoEtiopia. ToEtiopia haitu nompapola polipana bo nadamba mpuu rarana.

⁴⁰Ledo nisani-sani, nariumo i Filipus ri ngata Asdod. Nipapolana polipana bo nipatolelena Kareba Belo i Yesus ka todea ri pura-pura ngata sampe nakava ri ngata Kaisarea.

Suro-Suro 9

¹Ri tempo haitu, i Saulus da nompararai njuu mompatesi topangoseaka i Pue Yesus. Ia hau ri ngayo nu Pakeni nTopanggeni Pesomba,

²bo nerapi sura kuasa rakenikana ka pakeni agama ri banua petupu ntoYahudi ri ngata Damsyik. Patujuna, ane rakavana topangoseaka Papatuduki i Yesus, bara langgai bara mombine, rasakana bo rakenina hau ratangara ri ngata Yerusalem.

³Riara polipana hau ri ngata Damsyik, tempo napara ngata haitu, sampesanika naria reme nevanta lako ri langi nantiku ia.

⁴Nadungamo ia bo niepena suara nanguli ka ia, “Saulus, Saulus! Nakuya iko nompandasa Yaku?”

⁵Nekutana i Saulus, “Isema komiu, pua?” Nesana topotesa haitu, “Yakumo i Yesus, tona nipandasamu.

⁶Jadi peanggamu! Koimo pesua riara ngata moitu. Hamai pade rauli ka iko anu masipato mupovia.”

- ⁷Tona nomporoa i Saulus haitu natekaja mpuu sampe ledo nipakulera notesa, sabana ira muni nangepe suara haitu, tapi ledo nikitara topotesa.
- ⁸Jadi neanggamo i Saulus, bo nibulana matana, tapi domo nekita, jadi damo ninini roana nesua ri ngata Damsyik.
- ⁹Talu-mbongi kasaena ia ledo nekita bo ledo muni nangande ledo nanginu nuapa-nuapa.
- ¹⁰Ri ngata Damsyik naria saito topangoseaka i Yesus nosanga i Ananias. Naria anu nipopakitana ka ia bo i Pue Yesus nanguli ka ia, “Ananias!” Nesana i Ananias, “Iyo, sii yaku, Pue!”
- ¹¹I Pue nanguli, “Koimo hau ri dala nosanga Dala Noa. Elomo ri sia saito tona lako ri ngata Tarsus nosanga i Saulus. Hitu-hitu ia nosambaya.
- ¹²Riara panggitana nikitana iko nakava nombadika palemu ri balenggana ala matana mekita mpanjili.”
- ¹³Nesanamo i Ananias, “Pue, niepeku nadea tona notesa i Saulus haitu. Niulira nadea mpuu todeaMiu nipandasana ri ngata Yerusalem
- ¹⁴Sii-sii ia nakava muni ri sii, nidekei kuasa lako ri balengga-balengga ntopanggeni pesomba mombasaka pura-pura kami topomparasaya Komiu.”
- ¹⁵Tapi nanguli i Pue, “Koimo! Apa nipelisiKumo ia mokarajaa ka Yaku mompatolele karebaKu ka tona ledo noagama Yahudi, ka magau-magau bo ka todea toIsrael muni.
- ¹⁶Damo Yaku mboto manguli ka ia kasusa rakavana sabana nioseakana Yaku bo nipatolelena karebaKu.”
- ¹⁷Jadi haumo i Ananias ri banua i Yudas ri Dala Noa. Bo nesuamo ia riaru banua bo nidikana palena ri balengga i Saulus, bo nanguli, “Sampesuvuku Saulus. I Pue Yesus nikitamu ri tatanga nu dala tempo komiu nolipa tumai, Iamo nombatudu yaku tumai, ala komiu mekita mpanjili bo rakuasai nu Nosa Gasa nu Alatala.”

¹⁸Naupu i Ananias notesa haitu, kaliu-liu nanavu anu eva ruke lako ri mata i Saulus sampe nekita mpanjilimo ia. Naupu haitu, nembangumo i Saulus bo nidiu, tandana niparasayanamo i Yesus.

¹⁹Naupu nidiu, nangandemo ia bo naroso mpanjili bukuna. Naupu haitu, i Saulus nonturo nte topangoseaka i Yesus ri ngata Damsyik bara sako-mbongi kasaena.

²⁰Tempo haitu muni, ia kaliu-liu hau ri banua-banua petupu ntoYahudi ri Damsyik nompatolele kareba i Yesus ka toYahudi. Ia nanguli, “Yesusmo Ana nu Alatala!”

²¹Nokumaa pura tona nangepe i Saulus. Niulira, “Berimba tano tona hitu? Ledo ia hitu nompatesi topangoseaka i Yesus ri ngata Yerusalem? Bo tumai munimo ia ante patujuna mombasaka topangoseaka i Yesus ri sii bo manggeni ira ratangara ri ngayo balengga-balengga ntopanggeni pesomba!”

²²Tapi nasae-sae nantambai-mbai karoso i Saulus nompatuduki tona. Ia mpuu-mpuu natau nompakalanto ka ira, i Yesusmo Magau Topepakasalama anu nijanji nu Alatala, sampe toYahudi nonturo ri ngata Damsyik domo nipakulera nombabali tesana.

²³Bara sakuya kasaena kaliuna haitu, toYahudi nasintuvu mompatesi i Saulus.

²⁴Eo bongi ira nompopea nojaga ri bobaa-bobaa ri tembo nu ngata haitu. Ane mesuvu ia, rapatesira. Tapi niara haitu nisani i Saulus.

²⁵Jadi naria sambongi topangoseaka i Saulus nombadika i Saulus riarara karanji mbaso, bo niulura ia lako ri bavo nu tembo ngata haitu hau ri savaliku nu ngata, ʼala mamala malai lako ri tona madota mompatesi ia.ʼ

²⁶I Saulus nalai lako ri ngata Damsyik hau ri ngata Yerusalem. Ri sia ia nompasimbuku mosanggeni nte topangoseaka i Yesus. Tapi ira da naeka nte ia. Dopa niparasayara ia mpuu-mpuu topangoseaka i Yesus.

²⁷Jadi i Barnabas hau nombatulungi i Saulus. Nikenina ia hau motesa nte suro-suro. I Barnabas notesa ka ira berimba i Saulus nanggita i Pue Yesus ri tatanga

nu dala, bo i Pue notesa ka ia. Nitesana muni kabia i Saulus nompatolele kareba i Yesus ka tona ri ngata Damsyik.

²⁸Nangepe tesa i Barnabas, nitarima nu suro-suromo i Saulus monturo singgani nte ira. Naupu sia, i Saulus nompatolele kareba i Pue Yesus ri njumangu ngata Yerusalem bo ledo ria eka nu rarana.

²⁹Bo nitesana muni ka toYahudi anu nobasa Yunani bo nosinjanai nte ira. Tapi ira aga nompasimbuku mompatesi ia.

³⁰Topomparasaya ntanina niepera i Saulus rapatesi, jadi nikeniramo ia notua hau ri ngata Kaisarea bo nitudura hau manjili ri ngata Tarsus, ngatana mboto.

³¹Jadi todea topangoseaka i Yesus ri njumangu bagia Yudea, Galilea bo Samaria domo nipandasa. Kasae-sae kadea-dea tona nomparasaya i Yesus, bo todea topomparasaya nantambai karoso pomparasayara sabana ira natundu nte Alatala, bo sabana Nosa Gasa nantulungi ira.

³²I Petrus hau ri umba-umba nompelioda todea nu Alatala. Naria sanggani ia nesai ri ngata Lida.

³³Ri sia, niposinggavakana saito langgai nosanga i Eneas. I Eneas mai napunggu, bo valu-mpaemo kasaena domo ntoto namala nembangu.

³⁴Nanguli i Petrus ka ia, “Eneas, i Yesus Kristus mompakabelo iko. Pembangumo, pasiayumo paturumu.” Naupu haitu kaliu-liu nabelomo i Eneas bo nembangu mpuumo ia.

³⁵Pura-pura tona nonturo ri ngata Lida bo ri ngata Saron nanggita i Eneas nabelomo. Jadi niparasayara munimo i Pue Yesus.

³⁶Napara ngata Lida naria ngata ntanina nosanga Yope. Ri ngata Yope naria saito mombine topangoseaka i Yesus, sangana i Tabita. (Riara basa Yunani sangana i Dorkas, batuana “rusa”.) Pokaingguna nabelo, bo ia nasaro nantulungi tona napakasi.

³⁷Tempo haitu nadua i Tabita bo namatemo. Naupu mboana nidu, nikeni niboli riara ntombi ri kalangana.

³⁸Topangoseaka i Yesus ri ngata Yope nangepe i Petrus naria ri ngata Lida. Bo ngata Yope ledo nakavao lako ri ngata Lida pangane. Sia sampe nitudura randua tona hau manguli petevai ka i Petrus ivei: “Kamai masalisa tumai ri ngata Yope.”

³⁹Nangepe tesa ntona randua haitu, haumo i Petrus nantuntuni ira hau ri ngata Yope. Nakava ri sia, ia niken i hau ri tombi ri kalangana haitu. Pura-pura timbala notumangi nantagui i Petrus bo nipopakitara ka ia baju-baju bo pakea nidau i Tabita ka ira tempo ia da natuvu.

⁴⁰I Petrus nantudu ira mesuvu pura, pade nantaputu ia nosambaya. Naupu haitu, nitingayona mboa i Tabita bo nanguli, “Tabita, pembangumo!” Naupu i Petrus nanguli ivesia, nibula i Tabitamo matana. Nikitanapa i Petrus, nembangumo ia bo nonturo.

⁴¹Bo i Petrus nanggungisi palena nantulungi ia meangga. Naupu sia i Petrus nompokio timbala-timbala pangane bo topomparasaya ri sia bo niulikana ira, “Siimo roamiu, natuvu mpanjilimo ia.”

⁴²Kareba kajadia haitu natolele ri njumangu ngata Yope, sampe nadeamo tona nomparasaya i Pue Yesus.

⁴³Naliu haitu, bara sako-mbongipa i Petrus nonturo ri ngata Yope haitu ri banua ntopokarajaa kulimba nosanga i Simon.

Suro-Suro 10

¹Ri ngata Kaisarea naria saito langgai nosanga i Kornelius. Ia tantara nu Magau Mbaso Kaisar bo ia balengga ntantara anu nombabalenggai saatu tantara ntanina anu niuli Lunu ntoItalia.

²I Kornelius natundu nte Alatala. Naupa ira ledo toYahudi tapi ira sambanua netupu nte Alatala. Ia nasaro nantulungi toYahudi anu napakasi, bo ia nasaro nosambaya ka Alatala.

³Naria saeo nitasere tinti tatalu ede eo, naria anu nipopakita ka ia, haitumo, saito malaeka nu Alatala nakava nombaronde ia, “Kornelius!”

⁴Naeka mpuu i Kornelius nanggita malaeka haitu. Nesana i Kornelius, “Nuapa, tua?” Nanguli malaeka, “Posambayamu nitarima nu Alatalamo, bo nitornaNa kabelo raramu nantulungi tona napakasi.

⁵Jadi tudumo tona hau ri ngata Yope mangulika tona nosanga i Simon Petrus tumai.

⁶Ia nesai ri banua ntopokarajaa kulimba anu nosanga i Simon, anu nonturo ri talinti.”

⁷Naupu haitu, nalaimo malaeka. I Kornelius nompokio randua topokarajaa lako riara nu banuana. Nipokiona muni saito tantara niparasayana, anu netupu nte i Alatala muni.

⁸I Kornelius notesa ka ira tatalu anu dako najadi riara mpanggitana, pade nituduna ira hau ri ngata Yope mompokio i Simon Petrus.

⁹Natanga eo ri eo kamailena, tempo ira tatalu da ri polipara maparamo ngata Yope, i Petrus nompene mosambaya ri ata nu banua anu nantalumbu.

¹⁰Da nosambaya, naara mpuumo taina, madota mangande. Da nompopea kande rapakasadia, naria anu nipopakita ka ia.

¹¹Nikitana langi natebuka bo naria eva sabala kae tarapaa nabini niloe ri sokina pata-njoki nateuluraka lako ri langi sampe ri tana.

¹²Riara nu kae tarapaa haitu naria mpengaya-ngaya binata: naria nokada pata-nggada, naria nenjoyo, bo naria muni tonji-tonji navura.

¹³Pade naria suara nanguli ka ia, “Petrus, peanggamo! Sambalemo binata-binata hitu bo kandemo!”

¹⁴Tapi nesana i Petrus, “Ledaku, Pue! Dopa sanggani nikandeku anu nipopali bara anu naruto nantuntuni Atura agama!”

¹⁵Tapi suara haitu nanguli vai ka ia, “Anu niuli nu Alatala nabelo, nee muuli nipopali!”

¹⁶Anu nipopakita ka ia, nisili sampe talu-nggani. Naupu haitu kae tarapaa ante binata pangane nateoretaka mpanjili hau ri langimo.

¹⁷Naingu mpuu rara i Petrus nompekirika batuana anu nikitana pangane. Da nompekiri-pekiri i Petrus, nakavamo tona tatalu anu nitudu i Kornelius mangelo banua i Simon. Ira neangga ri vambana

¹⁸bo nekutana, “Naria torata nesai nte komiu ri sii nosanga i Simon Petrus?”

¹⁹I Petrus da nompekirika batuana anu nipopakita ka ia pangane, Nosa Gasa nu Alatala nanguli ka ia, “Petrus, naria tatalu tona nakava nompaelo iko.

²⁰Panau masalisa hau ri tambena. Nau ira ledo toYahudi, nee makaja raramu mantuntuni ira, sabana Yaku mboto nantudu ira tumai.”

²¹Jadi nanaumo i Petrus hau ri tambena bo nangulika tona tatalu haitu, “Yakumo hii tona nielomiu. Nuapa paralumiu nte yaku?”

²²Niulira, “Kami hii nitudu Kapitee Kornelius tumai. Nau ia ledo toYahudi, ia tona nanao bo ia natundu nte Alatala bo pura-pura toYahudi nombabila ia. Naria malaeka nu Alatala nantudu ia mompokio komiu hau ri banuana ala raepena anu raulimiu ka ia.”

²³Naupu haitu i Petrus nombaunaka ira matura ri banua niponturona sambongi. Jadipa naturumo ira. Naeo mpadondo, haumo i Petrus nosangganingani ante ira, bo bara sako-ndua topomparasaya lako ri ngata Yope nantuntuni ira.

²⁴Sambongi ira naturu ri dala pade nakava ri ngata Kaisarea. Ri sia ira nipopeapea i Kornelius sambanua. Naria muni sampesuvu-sampesuvuna bo vega-vega rapana nipasiromuna ri banuana.

²⁵Tempo nakava i Petrus, haumo i Kornelius nantomunaka ia, bo nantaputu ri ngayo i Petrus mombasomba ia.

²⁶Tapi i Petrus nanggungisi palena mompopeangga ia bo niulikana, “Peanggamo. Yaku hii aga manusia biasa muni, nasimbayu mpo komiu!”

²⁷Da ranja mpotesa nte i Kornelius, nesuamo i Petrus hau rabanua. Nikitana nadeamo tona nasiromu,

²⁸bo niulikana ira, “Sampesuvu-sampesuvu, nisanimiu mboto, nantuntuni Atura agama Yahudi, kami toYahudi nitagi mosimporoa atau mompanjayo tona ledo toYahudi. Tapi Alatala nompakalanto ka yaku riaru anu nipopakitaNa ka yaku, ledo mamala kuuli sanu manusia naruto atau ledo mamala kuporoo, ‘sabana Alatala nantarima pura-pura manusia.’”

²⁹Haitumo sabana ledo nakaja raraku nakava tumai tempo yaku niulikamiau tumai. Jadi, uli kaku, nuapa patujumiu nompokio yaku tumai?”

³⁰Nesanamo i Kornelius, “Talu-mbongi naliu, nitasere jaa hitu muni, tinti tatalu ede eo, yaku nosambaya ri banuaku. Sampesanika naria saito malaeka nikitaku neangga ri ngayoku. Pakeana nenggila-nggila.

³¹Ia nanguli ka yaku ivei: ‘Kornelius! Posambayamu nitarima nu Alatalamo, bo nitorana kabela raramu nantulungi tona napakasi.

³²Jadi tudumo tona hau ri ngata Yope mangulika tona nosanga i Simon Petrus tumai. Ia nesai ri banua ntopokarajaa kulimba anu nosanga i Simon, anu nonturo ri talinti.’

³³Haitumo sampe nitudukumo nasalisa tona hau mangulika komiu tumai. Nabelo mpuu raramiu nakava tumai. Hitupa kami nasiromu puramo ri panggita nu Alatala, ala raepe kami pura-pura anu niuliNa ratesamiau ka kami.”

³⁴Naupu haitu i Petrus nanguli ka ira, “Sampesuvu-sampesuvu, hitupa nisanikumo Alatala ledo nompelenje nanggita manusia.

³⁵Isema-sema natundu nte Alatala bo novia anu nanao, tona haitumo nitarima nu Alatala. Alatala ledo nompelisi tona lako ri umbu.

³⁶Sampesuvu-sampesuvu, nisanimiu mbotomo isi kareba nipasimbayu nu Alatala ka kami toIsrael. Kareba haitu nanguli i Yesus Kristus anu nompoposinggabelo manusia ante Alatala. I Yesusmo Tuputa pura-pura, ledo aga Tupu ntoYahudi.

³⁷Nisanimiu anu najadi ri njumangu tana ntoYahudi. Nompamula ri bagia Galilea, tempo i Yohanes nombadiu tona anu najea lako ri dosa-dosara.

³⁸Nisanimiu muni Alatala nompelisi i Yesus toNazaret bo nidekeiNa Nosa Gasa bo kuasa. Nisanimiu muni i Yesus hau ri umba-umba novia anu nabelo, bo nipakabeloNa pura-pura tona nipandasa Magau nu Seta sabana Alatala naria nte Ia.

³⁹Kamimo hii sabi pura-pura anu nipoviaNa ri tana ntoYahudi sampe ri ngata Yerusalem. Kaupuna i Yesus haitu nipatesi ntoYahudi, nipaku ri kayu salib.

⁴⁰Tapi ri eo katataluna, Alatala nompakatuvu Ia mpanjili, pade nipopakitaNa ka manusia.

⁴¹Tapi ledo pura-pura tona nanggita Ia, aga kami nipelisi nu Alatala nokolu majadi sabi-sabiNa. Naliu i Yesus natuvu mpanjili, kami nangande bo nanginu nosangani-nggani nte Ia.

⁴²Bo nituduNa kami mompatolele Kareba Belo haitu ka pura-pura tona, bo manguli ka tona Iamo nianggataka nu Alatala majadi Topotangara pura-pura manusia da natuvu bo anu namatemo.

⁴³Pura-pura nabi nggaulu notesa i Yesus. Niulira isema-sema momparasaya i Yesus, dosana raampungi ante kuasa i Yesus.”

⁴⁴Da notesa i Petrus, nanaumo Nosa Gasa nu Alatala bo nombakuasai pura-pura topangepe tesa haitu.

⁴⁵ToYahudi anu nomparasaya i Yesus, anu nantuntuni i Petrus lako ri Yope, ira pura-pura nokumaa sabana Nosa Gasa nipopanau muni ka tona ledo toYahudi.

⁴⁶Nisanira tona haitu nikuasai Nosa Gasa sabana niepera ira notesa ante basa-basa nidekei nu Nosa Gasa ka ira bo nantoiya kaoge nu Alatala. Jadi i Petrus nanguli ka roana,

⁴⁷“Peintamo! Tona hitu nantarima Nosa Gasa nu Alatala munimo nasimbayu mpo kita toYahudi. Jadi isema mombatagi ira? Ira muni kana radiu nte uve, tandana ira nangoseaka i Yesus!”

⁴⁸Jadi i Petrus nantudu gi Kornelius sambanua radiu nte uve, tandana ira nomparasaya i Yesus Kristus. Naupu nidiu, niperapira i Petrus mesai ante ira bara sako-mbongi.

Suro-Suro 11

¹Suro-suro i Pue Yesus bo topomparasaya ri njumangu bagia Yudea nangepe tona ledo noagama Yahudi nomparasaya tesa nu Alatala munimo.

²Tempo i Petrus hau ri ngata Yerusalem, toYahudi anu nomparasaya i Yesus nompakasala ia.

³Niulira, “Nakuya komiu hau ri banua ntona ledo toYahudi? Bo nakuya komiu nangande mpasangani-nggani nte ira?”

⁴Nangepe tesa haitu, i Petrus notesa ka ira pura-pura anu najadi lako ri pantepuuna. Niulina,

⁵“Tempo yaku nosambaya ri ngata Yope, naria anu nipopakita ka yaku. Nikitaku eva sabala kae tarapaa nabini niuluraka lako ri langi niloe ri sokina pata-njoki bo nituu ri ngayoku.

⁶Riara nu kae tarapaa haitu nikitaku mpengaya-ngaya binata nokada pata-nggada, bo binata-binata navura, binata-binata nenjoyo, bo tonji-tonji navura.

⁷Niepeku suara nanguli ka yaku, ‘Anumo, peanggamo, Petrus! Sambalemo binata tutu bo kandemo!’

⁸Tapi nesana yaku, ‘Ledaku, Pue. Dopa sanggani nikandeku anu nipopali bo naruto mpo binata moitu!’

⁹Tapi naria vaimo suara haitu lako ri langi, ‘Anu niuliKu nabelo rakande, nee muuli nipopali!’

¹⁰Talu-nggani nikitaku anu haitu, pade nioretaka mpanjili kae tarapaa haitu hau ri langi.

¹¹Eva nisuka tempo haitu muni, tatalu tona lako ri ngata Kaisarea nakava ri banua ponturoku. Ira nitudu i Kornelius hau mangala yaku.

¹²Bo Nosa Gasa nu Alatala nantudu yaku hau nosangani-nggani ante ira bo nee makaja raraku. Jadi haumo yaku. Aono sampesuvu sampomparasaya lako ri ngata Yope nantuntuni yaku hau ri ngata Kaisarea, bo kami pura-pura nesua rabanua i Kornelius.

¹³Naupu haitu i Kornelius notesa ka kami nikitana malaeka neangga riara banuana bo nanguli, ‘Tudumo tona hau ri ngata Yope mangala langgai nosanga i Simon Petrus.

¹⁴Raulina ka iko berimba komiu sambanua mamala rapakasalama.’ “

¹⁵I Petrus nompapola tesana, “Tempo yaku da notesa ka ira, nanaumo Nosa Gasa nte ira nasimbayu mpo panauNa ante kita ri pamulana.

¹⁶Pade nitoraku tesa i Pue Yesus bara ipia ivei: ‘I Yohanes nombadiu tona ante uve, tapi komiu radiu ante Nosa Gasa nu Alatala!’

¹⁷Sampesuvu-sampesuvuku, nalantomo Alatala nombadekei Nosa GasaNa ka tona ledo noagama Yahudi nasimbayu mpo nidekeiNa ka kita tempo kita nomparasaya i Pue Yesus Kristus. Jadi isema yaku sampe mamala kutagi Alatala ane Ia mboto madota mombadekei Nosa Gasa ka tona ledo noagama Yahudi?”

¹⁸Tempo tona nasiromu ri sia nangepe tesa i Petrus, domo ira nebali. Ira nosangani-ngganimo nantoiya Alatala. Niulira, “Ane ivesia tano, todea ledo toYahudi muni nipaloga nu Alatala majea lako ri dosa-dosara bo mantarima katuvua nabelo sampe ri kasae-saena!”

¹⁹Namatepa i Stefanus nirempe vatu, nadeamo topomparasaya i Yesus nipandasa sampe nadea nalai nosimpogaa-gaa hau ri umba-umba ngata. Naria sanu nalai sampe ri propinsi Fenisia, bo naria muni nalai hau ri levuto Siprus bo ngata Antiokhia. Nipatolelera kareba lako nte Alatala ri ngata-ngata nikalaura, tapi aga ka toYahudi.

²⁰Tapi naria muni roara lako ri levuto Siprus bo propinsi Kirene hau ri ngata Antiokhia bo nompatolele Kareba Belo i Yesus ka tona ledo noagama Yahudi.

- ²¹Kuasa nTupu naria nte ira sampe nadea toAntiokhia nomparasaya bo nombadekei katuvura ka i Pue Yesus.
- ²²Todea topomparasaya ri ngata Yerusalem nangepe kajadia haitu muni. Jadi nitudura i Barnabas hau ri ngata Antiokhia.
- ²³Nakavapa i Barnabas ri Antiokhia, nadamba mpuu rarana nanggita kabelo nu Alatala nte ira. Jadi nipakarosona rarara ala ira bate-batena mangoseaka i Pue Yesus ante mpuu-mpuu rarara.
- ²⁴I Barnabas haitu tona nabelo rarana, bo nikeniaaka nu Nosa Gasa nu Alatala. Naroso mpuu pomparasayana. Bo nadea tona ri Antiokhia nikenina nomparasaya i Pue Yesus.
- ²⁵Naupu haitu i Barnabas hau ri ngata Tarsus mangelo i Saulus.
- ²⁶Nosinggavapa ia ante i Saulus, haumo ira randua ri ngata Antiokhia. I Barnabas bo i Saulus nonturo sumai sampae kasaena. Ira nasaro nasiromu nosanggani-nggani nte todea topomparasaya bo nadea mpuu tona nipatudukira. Ri ngata Antiokhia haitumo topangoseaka i Yesus pamulamulana niuli ntona toKristen.
- ²⁷Ri tempo haitu muni naria bara sako-ndua topomparasaya lako ri Yerusalem hau ri ngata Antiokhia. Topomparasaya haitu nabi ʻapa naria pompakule nidekei nu Alatala ka ira mombasovadaka tesaNa.ʼ
- ²⁸Saito ira nosanga i Agabus. Ia neangga ri tatangara bo ante pekeniaaka Nosa Gasa nu Alatala, niulina kana majadi ara mpai ri njumangu dunia. (Ara mpai haitu mpuu-mpuu najadi tempo i Klaudius najadi Magau Mbaso).
- ²⁹Nangepe haitu, pura-pura topangoseaka i Yesus ri Antiokhia, nasintuvu mompakatu petulungi ka sampesuvura sampomparasaya anu nonturo ri bagia Yudea. Ira nombadekei nantuntuni pompakulera saito-saito.
- ³⁰Sintuvura haitu nipoviara mpuumo, bo nitudura i Barnabas bo i Saulus manggeni pedekeira haitu ka pakeni-pakeni ntopangoseaka i Yesus ri ngata Yerusalem.

Suro-Suro 12

¹Tempo haitu muni, Magau Herodes Agripa nompamula nompandasa bara sako-ndua topomparasaya.

²Nituduna tona mompatesi i Yakobus, sampesuvu i Yohanes, ante guma.

³Nisani i Herodes poviana haitu nompakadamba rara ntoYahudi, jadi nipoviana vaimo mpo pangane. Niparentanamo tona mombasaka i Petrus muni. Haitu najadi tempo Posusa Roti Ledo Noragi.

⁴Naupu i Petrus nisaka, nisuarakara riaru ntarunggu, bo Magau Herodes nantudu ampa lunu tantara mombajagai ia, ampa tantara salunu. Patuju i Herodes ala i Petrus ratangara ri ngayo ntodea maliutaka Eo Mbaso Paskah.

⁵Jadi i Petrus nitaha riaru ntarunggu. Tapi todea topomparasaya i Yesus nosambaya njuu ka i Petrus ante mpuu-mpuu rarara.

⁶Bongina dopame Magau Herodes mombatangara i Petrus ri ngayo ntodea, i Petrus naturu ri tarunggu ri olo ntantara randua, nipou nu rante rompenga. Naria muni randua tantara ntanina nojaga ri vamba.

⁷Sampesanika neongamo malaeka nTupu neangga ri sia, bo reme nevanta riaru ntombi nu tarunggu haitu. Malaeka haitu nombagoya-goya karo i Petrus bo nilikena. Nanguli malaeka, “Pembangumo masalisa!” Kaliu-liu nakabasaka mbotomo rante ase lako ri pale i Petrus.

⁸Naupu sia malaeka nanguli, “Pasuamo bajumu bo sapatumu.” Jadi, nipasuana mpuumo bajuna bo sapatuna. Pade niuli nu malaeka vai, “Pasuamo baju ndoemu bo tuntunimo yaku!”

⁹Pade nituntuninamo malaeka haitu nesuvu lako ri tarunggu, tapi dopa nisanina anu nipovia malaeka haitu mpuu-mpuu najadi. Nisarumakana aga pangipi.

¹⁰Ira nolipa nombaliunaka ponturo ntopojaga vamba pamulana, bo vamba karanduana, sampe nakava ri bobaa ase hau riaru nu ngata. Bobaa ase haitu nateungge mbotomo. Nesuvumo ira nantuntuni dala sampenga, bo sampesanika nalipomo malaeka haitu nompalaisi i Petrus.

¹¹Ri sia nanotomo rara i Petrus bo niulina, “Hitupa nisanikumo ledo aga pangipi! Tupu mpuu nombatudu malaekaNa mombakabasaka yaku lako ri kuasa Magau Herodes bo lako ri pura-pura anu rapovia ntoYahudi ka yaku.”

¹²Naupu nompekirika kajadia haitu, haumo ia ri banua i Maria, tina Yohanes-Markus. Ri banua haitu nadea tona nasiromu nosambaya.

¹³I Petrus nantanede vamba ri savalikuna bo saito batua mombine nosanga i Rode, nakava mombaungge vamba.

¹⁴Niepena suara i Petrus, nadamba mpuumo ia. Bo kaliu-liu ia nesua mpanjili riara nu banua, ledo nitorana nombaungge vamba ri savalikuna, bo niulikana ka todea ri sia i Petrus ria ri savalikuna.

¹⁵Tapi niulira ka ngana mombine haitu, “Nabaya iko!” Tapi i Rode ledo naupu-upu nanguli ka ira i Petrus mpuu. Bo ira aga nesana, “Bara aga malaekana.”

¹⁶Da notesa-tesa ira, i Petrus ledo nenonto-nonto nantanede vamba ri savalikuna. Kaupuna hau niunggera vamba. Nipeintara i Petrus mpuumo, jadi nokumaa puramo ira. Jadipa nesuamo i Petrus hau riara banua,

¹⁷bo nanganggataka palena ala malino pura ira, pade nitesakana ira malaekana nTupu anu nanggeni ia nesuvu lako riara ntarunggu. Bo niulina muni, “Uli kajadia hitu ka i Yakobus bo ka sampesuvuta ntanina.” Naupu sia nalaimo i Petrus hau ri ponturo santanina.

¹⁸Naeo mpadondo nasesa mpuumo tantara-tantara anu nojaga tarunggu haitu. Ira naingu bo naeka mpuu nompekirika anu najadi nte i Petrus.

¹⁹Magau Herodes nantudu tona mangelo i Petrus, tapi ledo nikavara ia. Haitu sampe Magau Herodes nompamenta ala tantara sapulu aono topombajagai i Petrus, raparesa bo rapatesi. Naupu haitu notuamo Magau Herodes lako ri bagia Yudea hau ri ngata Kaisarea, bo nonturo hamai bara sakuya kasaena.

²⁰Magau Herodes narau mpuu ka tupu ngata Tirus bo Sidon. Jadi tupu nu ngata randua haitu nasintuvu nantudu tona hau merapi mosinggabelo ante i Herodes, sabana ngatara haitu nanjarumaka kandeia lako ri bagia popamenta i Herodes. Pamulana ira nombatarasi saito topotulungi nosanga i Blastus, anu

nombaurusi banua Magau Herodes, sampe ia mosabingga ka ira. Naupu haitu hau ira nantingayo Magau Herodes merapi mosinggabelo.

²¹Nanggava eo niovora, nipasua Magau Herodesmo pakea kamagauana bo hau nonturo ri gadera kamagauana bo notesa ka todea.

²²Todea haitu nongare-ngare nantoiya i Herodes. Niulira, “Hitu suara nu viata, ledo suara nu manusia!”

²³Ri tempo haitumo malaeka nTupu nompakadua Magau Herodes, sabana ia ledo nompakaoge Alatala, ledo nitagina todea nanguli tesa haitu. Jadi da natuvu ia, nikande ndoromo sampe namate.

²⁴Namatepa ia, kasae-sae nantambai-mbaimo kadea ntona nangepe Tesa nu Alatala, bo nomparasaya i Pue Yesus.

²⁵Naupu i Barnabas bo i Saulus nanggeni pedekei ntoAntiokhia ka pakeni-pakeni ntopomparasaya ri ngata Yerusalem, nanjilimo ira hau ri ngata Antiokhia. Nikenira i Yohanes-Markus mosanggani-nggani nte ira.

Suro-Suro 13

¹Ri todea topomparasaya ri ngata Antiokhia naria bara sako-ndua guru bo nabi anu nompasimbayu Tesa nu Alatala, haitumo, i Barnabas, i Simeon anu nidae i Vuri, bo i Lukius toKirene, i Menahem anu nipakambaso nosanggani-nggani ante Magau Herodes Antipas, bo i Saulus.

²Naria saeo, todea topomparasaya pura-pura nosambaya bo nombatoiya Alatala bo nopuasa. Nosa Gasa nu Alatala nanguli ka ira, “Pelisi bo patani ka Yakumo i Barnabas bo i Saulus mantui pokarajaa nipakatantuKu ka ira.”

³Jadi naliu ira nopuasa bo nosambaya, nidikara palera ri balengga i Barnabas bo i Saulus, bo nianggatakara majadi suro mompatolele Kareba Belo.

⁴Jadi naupu i Barnabas bo i Saulus nitudu nu Nosa Gasa, hau ira ri pesampo Seleukia bo nesavi kapala hau ri levuto Siprus.

⁵Nakava ri ngata Salamis ri levuto Siprus, nipatoleleramo tesa nu Alatala ri banua petupu ntoYahudi. I Yohanes-Markus muni nantuntuni nantulungi ira ri polipara.

⁶⁻⁸Naupu ira noliu njumangu levuto Siprus, nakavamo ira ri ngata Pafos. Ri sia ira nosinggava nte toYahudi nosanga Bar-Yesus. I Bar-Yesus nosanga muni i Elimas riara basa Yunani. I Elimas haitu toposibalimata bo niulina ia nabi nu Alatala, tano ledo nakana. Gubernur ri levuto haitu nosanga i Sergius-Paulus bo ia novega nte toposibalimata haitu. Gubernur haitu tona natau bo nanoto pekirina. Ia nompokio i Barnabas bo i Saulus, apa ia madota mangepe tesa nu Alatala. Tapi i Elimas, toposibalimata haitu, nangeva i Barnabas bo i Saulus sabana ledo nipokonona gubernur momparasaya i Yesus.

⁹Tapi i Saulus, anu nidae muni i Paulus, nikeniaaka nu Nosa Gasa nu Alatala. Nikanotosina toposibalimata haitu,

¹⁰bo niulikana, “He, topebagiu nggaraka, ana nu Magau Seta! Ikomo nangeva pura-pura anu nabelo! Nakuya iko ledo nenonto nombatenggosi tesa nu Alatala nanoa?

¹¹Hitupa Tupu mombahuku iko! Iko majadi maburo bo ledo mukita mata nu eo bara sako-eo kasaena!” Nangepe haitu kaliu-liu naburomo mata i Elimas, nirasaina eva kulimu vuri nombabungu matana, damo nigayo-gayona luona nangelo tona mombanini ia.

¹²Nanggita kajadia haitu, niparasaya nu gubernurmo i Yesus. Nokumaa mpuu ia nangepe tesa i Pue Yesus, anu nipepatudukika i Paulus bo Barnabas.

¹³Lako ri ngata Pafos ri levuto Siprus, i Paulus nte roana nesavi kapala ntasi hau ri ngata Perga ri propinsi Pamfilia. Nakava sumai i Yohanes-Markus nompalaisi ira bo nanjili hau ri ngata Yerusalem.

¹⁴Lako ri ngata Perga, i Paulus bo i Barnabas nompapola polipara hau ri ngata Antiokhia ri propinsi Pisidia. Ri eo penonto, hau ira nesua nonturo riara banua petupu ntoYahudi.

¹⁵Naupu nibaca sanggoto lako ri Buku Atura Agama bo Buku Nabi-nabi, pakeni-pakeni ri banua petupu haitu nantudu tona hau mompekutana nte i Paulus nte roana, “Sampesuvu-sampesuvu, ane maria tesamiu mompakaroso pomparasaya ntodea gahitu, radekei kami loga ka komiu motesa ka kami.”

¹⁶Jadi neanggamo i Paulus, bo nilaerakana palena, bo nanguli, “Sampesuvu-sampesuvuku toIsrael, bo pura-pura sampesuvuku ntanina ri sii, anu natundu nte Alatala. Epemo tesaku!

¹⁷Alatala anu nisombata ntoIsrael nompelisi totua-totuata nggaulu majadi todeana. Tempo ira da nonturo ri tana Mesir, nipakadeana mulira. Naupu sia, nikenina ira mesuvu lako ri tana Mesir, ante kabarakanambaso.

¹⁸Patapulu-mpae kasaena Alatala nosabara nte pokainggura ri karava bai.

¹⁹Niropusina papitu magau ante todeatodeara ri tana Kanaan, tana haitu nibagi-bagina ka toIsrael majadi tanara.

²⁰Lako ri tempo ira hau ri tana Mesir sampe nesua ri tana Kanaan pataatu limapulu mpae kasaena. Naupu tana Kanaan nibagi-bagina ka toIsrael, Alatala nompelisi ka ira topotangara-topotangara manggeniaka ira. Topotangara kaupuna haitumo Nabi Samuel.

²¹Naupu sia, ira nerapi rapelisi ka ira magau anu manggeniaka ira. Jadi Alatala nompelisi ka ira i Saul, ana i Kish lako ri muli i Benyamin. Bo i Saul nanggeniaka ira patapulu mpae kasaena.

²²Tapi kaupuna i Saul nileso nu Alatala, bo Alatala nompelisi i Daud majadi magaura. Hitumo anu niuli nu Alatala nombatesa Magau Daud: ‘NikitaKu i Daud ana Isai. Ia nompakadamba raraKu bo nipoviana pura-pura dotaKu.’

²³Lako ri muli i Daud, Alatala nompelisi ka toIsrael saito Magau Topepakasalama nangoseaka pojanjina nggaulu, haitumo i Yesus.

²⁴Dopame i Yesus nompamula pokarajaan, i Yohanes Topediu nangulika toIsrael ira kana majea lako ri dosara bo radiu nte uve, tandana ira mpuu-mpuu najea.

²⁵Napara pokarajaana maupu, i Yohanes nanguli ka todea, ‘Nantuntuni panggavamiu, isema yaku? Yaku hii ledo Magau nipopeamiu! Tapi pariaramo! Magau haitu makava maupu pokarajaaku hitu. Ia nelabi kaogeNa pade yaku, sampe nau aga mombavole lui sapatuNa, ledo masipato yaku!’ “

²⁶I Paulus nompapola tesana ivei: “Sampesuvu-sampesuvu muli i Abraham bo sampesuvu-sampesuvu ntanina anu natundu nte Alatala. Alatala nompakatu ka kita kareba anu mompakalanto berimba Alatala mompakasalama kita.

²⁷Tona nonturo ri ngata Yerusalem bo pakeni-pakenira ledo nisanira i Yesus Magau Topepakasalama. Ledo muni nisanira batuana pepatuduki nu nabi-nabi anu nibaca ka ira ri eo-eo penonto. Haitumo sampe nihukura mate i Yesus. Bo poviara haitu nompakadupa anu niboto nu nabi-nabi pangane!

²⁸Naupa ledo nikavara nau sangayaa salaNa anu masipato rahuku mate ka Ia, niperapira nte Gubernur Pilatus ala i Yesus rapatesi.

²⁹Naupu nipandasara i Yesus, evamo nitulisi ri Buku Gasa, karobataNa nitoraka lako ri kayu salib bo niboli riaru nu dayo.

³⁰Tapi Alatala nompakatuva Ia mpanjili lako ri kamateNa.

³¹Bara sakuya eo kasaena, nadea ngganina i Yesus nompopakita karoNa ka tona anu nantuntuni Ia lako ri bagia Galilea hau ri ngata Yerusalem. Ira haitumo anu sii-sii najadi sabi-sabiNa ka todea toIsrael.

³²Jadi sampesuvu-sampesuvu, sii-sii kami nakava mompatolele Kareba Belo hitu ka komiu. Anu nijanji nu Alatala ka totua-totuata nggaulu,

³³haitu nipakadupaNamo ka kita tempo i Yesus nipakatuvaNa mpanjili. Naria nitulisi riaru Mazmur karanduana ivei: ‘Ikomo AnaKu, eo hitu Yaku najadi TuamaMu.’ (Mazmur 2:7)

³⁴Alatala nompakatuva i Yesus mpanjili lako ri kamateNa. Bo domo Ia mamate atau mapopo riaru nu dayo, sabana Alatala nanguli: ‘Anu nijanjiKu ka i Daud nggaulu nagasa bo natantu kadupana, Anu nijanjiKu haitu Kupakadupa ka Iko!’ (Yesaya 55:3)

³⁵Ivesia muni batuana posambaya i Daud ri Buku Mazmur nanguli, ‘Ledo rapalambaMiu Batua nipelisiMiu mapopo riara nu dayo.’ (Mazmur 16:10)

³⁶Tesa hitu ledo nambela i Daud, sabana naupu ia novia anu nitudu nu Alatala ka ia, namatemo ia. Bo ia nitana ri sinjori dayo ntotwana nggaulu, bo karobatana napopomo.

³⁷Tapi i Yesus nipakatuvu nu Alatala mpanjili lako ri kamateNa, i Yesus ledo napopo.

³⁸Jadi sampesuvu-sampesuvu, kami nompopaisani ka komiu dosamiu namala raampungu nu Alatala sabana anu najadi nte i Yesus.

³⁹Kita ledo namala rakabasaka lako ri dosata ane aga nangoseaka Atura-atura nipapola Nabi Musa. Tapi isema-sema nomparasaya i Yesus, rakabasaka lako ri pura-pura dosana bo majadi nanao ri panggita nu Alatala.

⁴⁰Haitu sabana komiu kana mainga ala nee majadi nte komiu anu nitulisi nu nabi-nabi ivei:

⁴¹Alatala nanguli, ‘Heh komiu anu ledo nomparasaya bo aga nongei-ngei, pariaramo tesaKu! Komiu mahera manggita anu Kupovia tapi komiu aga maropu sanggani, sabana tempo komiu da natuvu, Yaku movia anu ledo ntoto raparasayamiu, nau damo maria tona motesa pakalanto ka komiu.’ ” (Habakuk 1:5)

⁴²Naupu sia, nesuvumo i Paulus bo i Barnabas lako ri banua petupu bo niperapi ntodea ala manjili vai ira ri eo penonto meonga mompapola anu nitesara pangane.

⁴³Naupu puramo tona nesuvu lako ri banua petupu pangane, nadea toYahudi bo tona ntanina anu nesua agama Yahudi, nomporea i Paulus bo i Barnabas. Suro-suro haitu nompakaroso rarara ala ira bate-batena manjarumaka kabelo nu Alatala.

⁴⁴Eo penonto sunjuna haitu, pura-pura tona riara ngata haitu nasiromu mangepe tesa nu Alatala.

⁴⁵Nanggita todea haitu, nasiriati mpuumo rara nu pakeni ntoYahudi. Nisalaira i Paulus, bo nievara pura-pura anu niulina.

⁴⁶Tapi i Paulus bo i Barnabas aga nantambai kabiara notesa ka ira ivei: “Masipato Tesa nu Alatala rapasimbayu ntani ruru ka komiu toYahudi. Tapi nipoaramiu tesa haitu. Nipakalantomiu mboto komiu ledο masipato manggava katuvu nabelo sampe ri kasae-saena. Sabana haitu, kami domo mompatolele tesa haitu ka komiu toYahudi! Hitupa kami hau nte tona ledο toYahudi,

⁴⁷Apa Tupu nomparenta ka kami ivei: ‘NipelisiKu iko majadi reme mombavanta tona ledο toYahudi, ala rasani ntona ri umba-umba ri dunia, Alatala mompakasalama manusia.’ ” (Yesaya 49:6; 42:6)

⁴⁸Tempo tona ledο toYahudi ri sia nangepe tesa haitu, nadamba mpuu rarara bo niulira, “Nabelo mpuu Tesa nu Alatala!” Isema-sema nipelisi nu Alatala manggava katuvua mabelo sampe ri kasae-saena, iramo nomparasaya i Yesus.

⁴⁹Bo Tesa nu Alatala natolele ri umba-umba ri bagia haitu.

⁵⁰Tapi tomaoge-tomaoge bo mombine-mombine anu naria nturona bo natundu nte Alatala, nipakapane ntoYahudi sampe i Paulus bo i Barnabas nipandasa bo nipopalai lako ri ngata haitu.

⁵¹Jadi i Paulus bo i Barnabas nombasapulai sovu lako ri kadara, tandana tona haitu nipoara nu Alatala. Bo nalaimo ira hau ri ngata Ikonium.

⁵²Topangoseaka i Yesus ri ngata Antiokhia nadamba mpuu rarara, bo ira nikenika nu Nosa Gasa nu Alatala.

Suro-Suro 14

¹Anu najadi ri ngata Antiokhia najadi munimo ri ngata Ikonium. I Paulus bo i Barnabas hau ri banua petupu ntoYahudi, bo ri sia nitesa-tesara ka tona sampe nadea toYahudi bo tona ledο toYahudi nomparasaya i Yesus.

²Tapi toYahudi anu ledο nadota nomparasaya, aga nompakapane rara ntona ntanina ledο toYahudi sampe navuu matara nanggita topangoseaka i Yesus.

³I Paulus bo Barnabas nasae nonturo ri sia. Ledo naeka ira notesa i Pue Yesus ka tona. Nitesara pepotoveNa bo kabelo raraNa bo i Pue nombadekei kuasa ka ira movia kabaraka-kabaraka bo tanda-tanda nipokumaaka ala rasani ntodea tesa nu suro-suro haitu mpuu-mpuu nakana.

⁴Tapi tona ri ngata haitu ledo nasintuvu. Naria nosabingga ka toYahudi, bo naria muni nosabingga ka suro-suro.

⁵ToYahudi bo pakeni ntoYahudi nosanggani-nggani ante tona ntanina ledo toYahudi, nasintuvu mompandasa bo mombarempe i Paulus bo i Barnabas ante watu.

⁶Tapi nisani i Paulus bo Barnabas nia ntona haitu, jadi nalaimo ira hau ri bagia Likaonia, haitumo ri ngata Listra, ngata Derbe bo ri ngata-ngata ntanina ri bagia haitu.

⁷Nipatolelera muni Kareba Belo i Yesus ri sia.

⁸Ri ngata Listra naria saito langgai napunggu lako ri pompoanakame. Ia ledo sanggani nolipa sabana kadana ledo naroso.

⁹Topunggu haitu nonturo nangepe tesa i Paulus. I Paulus nanggita tona haitu bo nisanina tona haitu mamala rapakabelo sabana niparasayana mpuu. Jadi i Paulus nompeintaka ia,

¹⁰bo nanguli ante suara namangga, “Peangga pakanoa!” Jadi, neanggamo topunggu nasalisa bo kaliu-liu nolipamo.

¹¹Nanggita anu nipovia i Paulus, nongaremo todea ante basara mboto, haitumo basa Likaonia. Niulira, “Nanau ri duniamo viata-viata mpo karo manusia!”

¹²I Barnabas niulira viata nosanga i Zeus, bo i Paulus niulira viata nosanga i Hermes, apa iamo topotesa.

¹³Ri savaliku ngata haitu, naria banua petupu ka viata Zeus. Topojaga banua haitu nanggeni japi-japi pomava ante bunga-bunga hau ri bobaa nu ngata, sabana ia nosanggani-nggani nte todea madota mosambale japi haitu mombasomba i Paulus bo i Barnabas.

¹⁴Niepepa i Paulus bo i Barnabas nia ntodea haitu, nibiteramo pakeara mboto, tandana nasusa mpuu rarara sabana todea haitu madota mombasomba ira. Nangovamo ira hau ri tatanga ntodea bo nongare nombatagi todea ivei:

¹⁵“Nemo! Nee mpuu rasombamiu kami! Kami hii manusia biasa nasimbayu mpo komiu! Kami nakava ri sii mompatolele Kareba Belo ka komiu ala komiu mompalaisi kabiasamiu anu ledo naria gunana, evamo mombasomba viata-viata. Komiu kana metupu nte Alatala anu natuvu sampe ri kasae-saena. Iamo nompajadi langi bo tana bo tasi bo pura-pura isina.

¹⁶Tempo nggaulu, Alatala nompalamba manusia natuvu nangoseaka dotara mboto.

¹⁷Tapi nau ivesia, ledo nalinga raraNa nombadekei tanda-tanda ka kita ala rasanita Iamo Alatala. Ia nabelo mpuu nte kita, nidekeiNa ka kita uda lako ri langi, bo asele panggaviata ri tempona. NidekeiNa kande ka kita bo nipakadambaNa rarata.”

¹⁸Nau suro-suro notesa ivehaitu, sakidepa ledo nipakulera mombataamaka todea manggeni pesomba ka ira.

¹⁹Naupu haitu, bara sako-ndua toYahudi lako ri ngata Antiokhia ri propinsi Pisidia bo muni lako ri ngata Ikonium nakava ri ngata Listra. ToYahudi haitu nantanara todea ri ngata Listra ala ira muni mangeva i Paulus sampe ira nombarempe i Paulus ante vatu bo niumbunjaira hau ri savaliku ngata. Niulira namatemo ia.

²⁰Tapi tempo topomparasaya ri sia neangga nompatiku ia, nembangu mpanjili ia bo nesua riara nu ngata. Naeo mpadondo hau ia ri ngata Derbe nosangganingani ante i Barnabas.

²¹Ri ngata Derbe, i Paulus bo i Barnabas nompatolele Kareba Belo bo nadea tona nomparasaya i Yesus. Naupu haitu nanjilimo ira randua hau ri ngata Listra. Lako ri ngata Listra hau ri ngata Ikonium pade napola hau ri ngata Antiokhia ri propinsi Pisidia.

²²Ri ngata-ngata haitu ira nompakaroso rara ntopangoseaka i Yesus bo nompopatora ira nee molengga-lengga momparasaya. Niulira, “Kita kana mombarasai kasusa bo kapari ruru pade mamala kita mombarasai kasana ri Poparenta nu Alatala.”

²³Ri ngata-ngata haitu i Paulus bo i Barnabas nanganggataka pakeni ntodea topangoseaka i Yesus. Ira nopuasa bo nosambaya, nerapi i Pue mombajagai pakeni haitu, apa Iamo panjarumakara.

²⁴Naupu haitu i Paulus bo i Barnabas nompapola polipara noliu ri bagia Pisidia sampe nakava ri propinsi Pamfilia.

²⁵Naupu ira nompatolele tesa nu Alatala ri ngata Perga, notuamo ira hau ri ngata Atalia ri bivi ntasi.

²⁶Ri sia ira nesavi kapala mbaso bo nanjili hau ri ngata Antiokhia ri propinsi Siria. Ri ngata Antiokhia haitumo nipanganggataka ira bara ipia bo niposambayaka ntopangoseaka i Yesus. Niposambayaka ala Alatala mompoasi bo mombajagai ira riaro pokarajaara anu dako nipakaupura sii-sii.

²⁷Tempo nakava ri ngata Antiokhia, nipasiromura topomparasaya i Yesus bo nitesakara pura-pura anu nipovia nu Alatala ri polipara. Nitesara muni Alatala nombadekei loga ka tona ledo toYahudi momparasaya i Yesus.

²⁸Nasae i Paulus bo i Barnabas nesai ri ngata Antiokhia nosanggani-nggani ante topangoseaka i Yesus ri sia.

Suro-Suro 15

¹Naria bara sako-ndua toYahudi nakava ri Antiokhia lako ri bagia Yudea anu nomparasaya i Yesus. Ira nompatuduki topangoseaka i Yesus ri sia ivei: “Ane komiu ledo rasuna nantuntuni Atura-atura nipapola Nabi Musa, komiu ledo mamala rapakasalama.”

²Tapi i Paulus bo i Barnabas mpuu-mpuu nosinjanai nte ira bo nangeva pepatudukira. Jadi kaupuna, todea topomparasaya nompakatantu i Paulus bo i Barnabas ante bara sako-ndua topomparasaya ntanina lako ri sia, kana hau ri

ngata Yerusalem ala molibu ante suro-suro bo pakeni ntopomparasaya ntanina hamai bo motesaki pepatuduki haitu.

³Todea topomparasaya ri ngata Antiokhia nanggeni gi Paulus sampe nakava ri savaliku ngata. Lako ri ngata haitu ira noliu ri propinsi Fenisia bo bagia Samaria. Bo nitesara munimo ka topomparasaya ri sia nadea tona ledotoYahudi nombakabasaka pomparasayara nggaulu ala mangoseaka Alatala. Kareba haitu mpuu-mpuu nompakadamba rara ntopomparasaya ri sia.

⁴Nakavapa ri ngata Yerusalem, i Paulus ante roana nikadambanaka nu suro-suro, pakeni-pakeni, bo todea topomparasaya ntanina. I Paulus nombatesa ka ira pura-pura anu nipovia nu Alatala ri polipara bara ipia nanggeni Kareba Belo ka tona ledotoYahudi.

⁵Tapi bara sako-ndua toFarisi anu nomparasaya i Yesus neangga bo nanguli, “Ane tona ledotoYahudi nomparasaya i Yesus, ira kana rasuna bo rapatuduki mangoseaka Atura-atura nidekei Nabi Musa ka kita.”

⁶Jadi suro-suro bo pakeni-pakeni ntanina nolibu motesaki panggava ntoFarisi pangane.

⁷Nasae mpuu ira nosinjula pekiri. Kaupuna neanggamo i Petrus bo nanguli, “Sampesuvu-sampesuvu! Nisanimiu mboto bara sakuya kasaena naliu, Alatala nompelisi yaku lako nte komiu mompatolele Kareba Belo ka tona ledotoYahudi ala ira muni mangepe bo momparasaya.

⁸Bo Alatala anu nangisani isi rara ntai manusia, nantarima tona ledotoYahudi. Nisanita, sabana nidekeiNa Nosa Gasana ka ira, nasimbayu mpo nidekeiNa ka kita muni.

⁹Alatala ledotoYahudi nompoposisala kita toYahudi ante ira ledotoYahudi. Ia nompakagasa rarara, sabana ira nomparasaya.

¹⁰Jadi nakuya komiu ledotoYahudi nadota nantarima anu nipovia nu Alatala sii-sii? Nakuya komiu aga madota mompasuu ira mantuntuni atura-atura anu nakaja mpuu raoseaka? Totuata nggaulu bo kita mboto ledotoYahudi nompakule nangoseaka atura-atura haitu.

¹¹Tapi kita nomparasaya bo kita nipakasalama sabana kabelo rara i Pue Yesus. Bo ivesia muni ira!”

¹²Naupu i Petrus notesa ivesia, pura-pura tona nasiromu ri sia nalinomo bo nompetalingai i Barnabas bo i Paulus nombasili tesa kabaraka-kabaraka bo tanda-tanda anu nipokumaaka nipoviara nte kuasa nu Alatala tempo ira naria ri ngata ntona ledo toYahudi.

¹³Naupu ira notesa, nangulimo i Yakobus, “Sampesuvu-sampesuvu. Epemo tesaku!

¹⁴I Simon Petrus dako notentei ka kita tove nu Alatala ka tona ledo toYahudi. Lako ri pamulana, Alatala nompekirika ira. PatujuNa, rapelisiNa lako nte ira tona majadi todeaNa.

¹⁵Haitu nasimbayu mpo anu niuli nu nabi-nabi nggaulu, apa naria nitulisi ivei:

¹⁶⁻¹⁷Alatala nanguli: ‘Maupu haitu, Yaku makava mpanjili ka muli ntoIsrael anu niparenta i Daud bara ipia. Kupoasi ira bo Kubangu mpanjili kamagaua i Daud bo Kubaruki anu nagero. Kupovia haitu ala pura-pura manusia ntanina mangelo Yaku, bo pura-pura tona ledo toYahudi anu nipelisiKu majadi todeaKu.’ Ivesiamo tesa nu Alatala

¹⁸anu nompopaisani patujuNa lako nggauluname.” (Amos 9:11-12)

¹⁹I Yakobus nompapola tesana, “Jadi sampesuvu-sampesuvu, ivei panggavaku: nee rapakasusata katuvu ntona ledo toYahudi anu natundu nte Alatala.

²⁰Tapi kita kana motulisi sura manguli ka ira nee mangande kandea anu naruto sabana nipesomba ka tupu-tupu ntanina, bo nee mangande bau nu binata nikoje, anu ledo nisuvuraka raana, bo nee mangande raana. Bo muni ala ira nee mosampaturu ante tona ledo bereira mboto.

²¹Aga atura-atura haitu raperapita raoseakara ala mombajagai kasintuvura nte toYahudi, sabana nompamula lako ri nggauluname, Atura-atura i Musa haitu nipatolelemo ri pura-pura ngata, bo nibaca ri eo-eo penonto ri banua-banua petupu ntoYahudi.”

²²Nangepe tesa i Yakobus, nasitujumo suro-suro bo pakeni ntanina bo pura-pura topomparasaya mompelisi bara sako-ndua tona lako nte ira mboto ratudu hau ri ngata Antiokhia mosanggani-nggani nte i Paulus bo i Barnabas mompasimbayu asele nu polibu ka topomparasaya hamai. Nipelisiramo i Silas bo i Yudas anu nidae muni i Barsabas. Tona randua haitu nibila ntodea topangoseaka i Yesus ri Yerusalem.

²³Jadi nitulisira santau sura rakeni ntona randua pangane. Sura haitu nanguli ivei: “Sampesuvu-sampesuvu sampomparasaya anu ledo toYahudi, anu nonturo ri ngata Antiokhia bo ri propinsi Siria bo Kilikia: Nadea tabe lako nte kami, suro-suro bo pakeni-pakeni ntodea topomparasaya.

²⁴Niepe kami naria bara sako-ndua tona lako nte kami tou nte komiu nompakasusa bo nompakaingu komiu ante pepatudukira. Tapi kakanana ledo nitudu kami ira movia ivesia.

²⁵Haitumo sabana kami nolibu ri sii bo kami pura-pura nasintuvu nompelisi bara sako-ndua tona, bo nombatudu ira tou nte komiu mompasimbayu asele polibu kami. Ira tou singgani-nggani ante sampesuvuta i Barnabas bo i Paulus anu nipotove kami.

²⁶I Paulus bo i Barnabas mai, ledo natove rarara nte katuvura mboto, nau rapatesi ntona, ira bate-batena mokarajaa ka Tuputa Yesus Kristus.

²⁷Kami nantudu i Yudas bo i Silas tou nte komiu nosanggani-nggani ante i Paulus bo i Barnabas. Ira mompakapola isi nu sura hitu ka komiu ante tesara mboto.

²⁸Sampesuvu-sampesuvu, hitumo asele polibu kami anu nipokono nu Nosa Gasa nu Alatala bo nipokono kami muni, ala komiu ledo mandasa mantuntuni atura-atura nakaja. Aga atura-atura hitu paraluu raoseakamiu:

²⁹Nee rakandemiu kande nipesomba ka tupu-tupu ntanina. Nee rakandemiu raa, bo nee rakandemiu bau lako ri binata nikoje, haitumo anu ledo nisuvuraka raana. Bo nee mosampaturu ante tona ledo bereimiu mboto. Ane raoseakamiu atura-atura haitu, nabelomo. Sampe ri siimo ruru isi sura kami.”

³⁰Naupupa ira ampa nopalakana, notuamo ira hau ri ngata Antiokhia. Nakava sumai, nipasiromura puramo topomparasaya bo nidekeira sura haitu ka ira.

³¹Nadamba mpuu rara ntodea topomparasaya nobaca sura haitu, apa isi sura haitu nompakavoe rarara.

³²Naliu haitu, i Yudas bo i Silas nasae notesa nte topomparasaya ri Antiokhia ala mompakadidi rarara bo mompakaroso pomparasayara, apa ira randua nabi anu nompakule mompasimbayu tesa nidekei nu Alatala ka ira.

³³Naupu i Yudas bo i Silas nonturo sumai bara sakuya kasaena, nidekei ntoAntiokhiamo ira manjili hau ri ngata Yerusalem. Topomparasaya ri Antiokhia nanguli ka ira, “Pakabelo ri dala. Pakavote tabe kami ka tona nantudu komiu.”

³⁴[Tapi kaupuna ledo hau i Silas. Niulina monturo ri ngata Antiokhia ruru.]

³⁵I Paulus bo i Barnabas muni nonturo bara sakuya kasaena ri ngata Antiokhia. Ri sia ira nompatuduki bo nompatolele tesa i Pue Yesus, nosangani-nggani ante roa deara ntanina.

³⁶Ledo nasae kaliuna haitu, i Paulus nanguli ka i Barnabas, “Hau kita manjili ri ngata-ngata nikalauta bara ipia nompatolele tesa nu Alatala. Kita kana hau manggita sampesuvu-sampesuvu anu nomparasaya i Yesus hamai, ala rakitata berimbamo katuvura.”

³⁷Nangepe haitu nasitujumo i Barnabas. Ia madota manggeni i Yohanes-Markus muni,

³⁸tapi i Paulus nanguli, “Ledo nabelo manggeni i Markus, apa nipalaisina kita bara ipia ri propinsi Pamfilia, bo ia ledo nokarajaa sampe naupu.”

³⁹Jadipa i Paulus bo i Barnabas nosinggarau mpuumo bo kaupuna ira nosimpogaamo. I Barnabas nangala i Markus bo ira nesavi kapala hau ri levuto Siprus.

⁴⁰I Paulus nompelisi i Silas momporoa ia. Bo topomparasaya ri ngata Antiokhia nosambaya ala Alatala mompoasi bo mombajagai ira randua riaru polipara. Naupu haitu nalaimo ira.

⁴¹Ira nombalintiku pura-pura propinsi Siria bo Kilikia. Nipakarosora pomparasaya ntopangoseaka i Yesus hamai.

Suro-Suro 16

¹I Paulus bo i Silas nompapola polipara hau ri ngata Derbe, pade napola hau ri ngata Listra. Ri sia naria saito topangoseaka i Yesus nosanga i Timotius. Tinana toYahudi anu nomparasaya i Yesus munimo. Tapi tuamana toYunani.

²I Timotius nitoiya ntopomparasaya ri ngata Listra bo Ikonium pura-pura.

³I Paulus madota i Timotius momporoa ia, tapi nantuntuni ada ntoYahudi ledo namala toYahudi mosinggani ante tona ledo nisuna. Nisani ntoodea tuama i Timotius toYunani, anu ledo nombasuna anara. Jadi nisunana i Timotius ala i Timotius ratarima ntoYahudi ri ngata rakalaura.

⁴Naupu i Timotius nisuna, nalaimo ira. Ri pura-pura ngata nikalaura nipasimbayura ka topangoseaka i Yesus kabotu polibu nu suro bo pakeni ntopomparasaya ri ngata Yerusalem. Bo nipatudukira tona hamai ala raoseakara atura-atura nipakatantu ri polibu haitu.

⁵Jadi ivesiamo pomparasaya ntopangoseaka i Yesus nipakaroso, bo eo-eo nantambai kadea ntopomparasaya.

⁶Nosa Gasa nu Alatala ledo nombadekei gi Paulus mompatolele tesa nu Alatala ri propinsi Asia. Jadi nipapolara polipara hau ri bagia Frigia bo Galatia.

⁷Tempo ira nakava ri pobingga bagia Misia, ira madota mapola mesua ri propinsi Bitinia. Tapi Nosa Gasa i Yesus nombatagi ira mapola.

⁸Jadi nolipamo ira noliu ri bagia Misia sampe nakava ri ngata Troas ri bivi ntasi.

⁹Bongina haitu ri ngata Troas, naria anu nipopakita nu Alatala ka i Paulus. Nikitana saito tona lako ri propinsi Makedonia neangga ri ngayona. Tona haitu

nerapi mpuu-mpuu nte i Paulus, “Kaimo tumai mantulungi kami ri Makedonia!”

¹⁰Jadi naupu nikita i Paulus haitu, kaliu-liu nanggalivomo kami hau ri propinsi Makedonia, sabana nipekiri kami, Alatala mpuu-mpuu nantudu kami mompatolele Kareba Belo ka tona hamai.

¹¹Kami nompalaisi ngata Troas bo nesavi kapala mbaso hau ri levuto Samotrake. Kamailena napolamo kami sampe nakava ri ngata Neapolis ri propinsi Makedonia.

¹²Lako ri sia kami nantende hau ri ngata Filipi, haitumo ngata mbaso ri propinsi Makedonia. Ngata Filipi haitu ngata ponturo ntodea nu Magau Mbaso. Kami nonturo ri sia bara sako-mbongi kasaena.

¹³Ri eo penonto ntoYahudi, kami hau ri tinggi binangga ri savaliku bobaa nu ngata, sabana nisarumaka kami hamai rakasiromu ntoYahudi mosambaya. Jadi kami nonturo notesa-tesa ante mombine-mombine nasiromu ri sia.

¹⁴Naria saito mombine ri sia lako ri ngata Tiatira nosanga i Lidia. Ia topobalu kae nosura sese mpalola, anu nasuli mpuu alina. Ia mai nombasomba Alatala. Tempo niepena tesa i Paulus, Alatala nompakanoto rarana sampe nitarimana pepatuduki haitu.

¹⁵Naupu haitu i Lidia sambanua nidiu, tandana ira topangoseaka i Yesus. Naupu ira nidiu, i Lidia nombagaga kami hau ri banuana. Niulina, “Nikitamiu yaku hii mpuu-mpuu nomparasaya i Pue Yesus. Jadi kamaimo monturo ri banua kami.” Nipasimbukuna kami hau ri banuana.

¹⁶Naria sanggani, tempo kami hau ri posiromu posambaya pangane, kami nosinggavaka saito batua mombine. Mombine haitu nipesua nu seta anu natau nombaboto anu majadi ri tempo makava. Ia nombaboto rasi ntona, jadi nadea saru nikavana ka tona nompobatua ia.

¹⁷Mombine haitu nongare-ngare ri puri nantuntuni kami gi Paulus. Ia nongare ivei: “Tona hitu batua nu Alatala toNeliu KaogeNa! Ira nakava nompatolele ka komiu berimba komiu mamala rapakasalama!”

¹⁸Bara sako-eo kasaena mombine haitu ledo naupu-upu nongare ivesia. Kaupuna domo nosabara i Paulus nangepe mombine haitu, jadi neili ntaliku ia bo nanguli ka seta anu nombakuasai mombine haitu, “Ante kuasa i Yesus Kristus, kutudu iko palaimo lako ri mombine tutu!” Naupu sia, seta haitu nalai mpuumo lako ri mombine haitu.

¹⁹Tempo nisani ntopobatua mombine haitu domo namala ira manggava doi, nisakaramo i Paulus bo i Silas, bo niumbunjaira hau ri potomu mantingayo topoparenta ngata haitu.

²⁰Nikenira i Paulus bo i Silas hau mantingayo topoparenta nu Magau Mbaso Roma, bo tona nompobatua mombine nanguli ivei: “Tona hitu toYahudi anu nompakagado ngata hitu.

²¹Nipatudukira tona movia anu nitagi nu atura-atura ri ngatata hitu! Ledo mamala kita todea Magau Mbaso mantarima atau mangoseaka ada nipatudukira!”

²²Todea nu ngata nantuntuni nangeva i Paulus bo i Silas. Topoparenta nombaseri-seri pakeara randua bo nombatudu tona mombacambu ira.

²³Naupu ira nicambu pakadua, nisuaraka ra ntarunggumo. Topojaga tarunggu nitudu mombajagai ira pakabelo-belo.

²⁴Jadi nisuarakana ira ri tombi ntarunggu ri tatangana ntoto bo kadara nibalangu ante kayu.

²⁵Nitasere natanga bongina, i Paulus bo i Silas nosambaya bo nodade nantoiya Alatala. Tona ntanina nitarunggu ri sia nompetingai ira nodade.

²⁶Sampesani naria lingu narimboso mpuu sampe pandasi banua ntarunggu nogoya muni. Pura-pura vamba natebuka bo rante pobalangu tona nitarunggu navole sanggani.

²⁷Natekaja bo nembangumo topojaga tarunggu haitu. Nikitana pura-pura vamba nateunggemo, nibituna gumana mompatesi karon mboto, apa nisarumakana tona nitarunggu nalai puramo.

²⁸Tapi i Paulus nongare ante suara namangga, “Nee mupatesi karomu! Da naria pura kami ri sii!”

²⁹Topojaga tarunggu nerapi poindo bo nangova hau ri tarunggu. Nolete-letemo ia nantaputu ri ngayo i Paulus bo i Silas.

³⁰Naupu sia, nikenina ira hau ri savalikuna bo nanguli, “Pua, nuapa kupovia ala yaku rapakasalama?”

³¹Nesana i Paulus bo i Silas, “Parasayamo i Pue Yesus Kristus, bo komiu sambanua rapakasalama.”

³²Pade i Paulus bo i Silas nompasimbayu tesa i Pue Yesus ka topojaga tarunggu haitu, bo ka pura-pura tona riara banuana.

³³Ri tanga bongi haitu muni topojaga tarunggu nanggeni ira hau ri uve bo nompegasa bakara. Naupu haitu, kaliu-liu ira sambanua nidiu, tandana ira nomparasaya i Yesus.

³⁴Naupu haitu, nikeninamo i Paulus bo i Silas hau ri banuana, bo nipakandena ira. Ira sambanua nadamba mpuu rarara sabana ira nomparasaya Alatalamo. Naupu sia, i Paulus bo i Silas nikeni mpanjili hau ri tarunggu.

³⁵Naeo mpadondo topoparenta-topoparenta ri ngata Filipi nantudu polisi hau ri tarunggu, mompapola parenta ka topojaga tarunggu ivei: “Kabasakamo tona randua nitarunggu riavi!”

³⁶Nangepe haitu topojaga tarunggu nanguli ka i Paulus, “Topoparenta ri ngata noparenta yaku mombakabasaka komiu. Jadi hitupa komiu mamala manjili. Pakabelo-belo ri dala.”

³⁷Tapi i Paulus nanguli ka polisi nakava ri sia, “Kami hii todea nu Magau Mbaso Roma! Naupa ivesia, ledo nitangara kami, aga nicambu ri ngayo ntodea, bo nisuaraka riara ntarunggu! Bo hitupa topoparenta-topoparenta mombatudu kami manjili nggalino-lino! Ledo madota kami! Kana ira mboto makava mompopesuvu kami!”

³⁸Polisi-polisi nompapola kareba haitu ka topoparenta ngata. Nieperapa i Paulus bo i Silas haitu todea nu Magau Mbaso Roma, naekamo ira.

³⁹Jadi ira mboto hau nerapi ampu nte i Paulus bo i Silas. Naupu sia, nikenira randua suro haitu hau ri savalikuna, bo niperapira ala gi Paulus mompalaisi ngata haitu

⁴⁰Jadi i Paulus bo i Silas nompalaisi tarunggu bo hau ri banua i Lidia. Ri sia ira nasiromu ante topangoseaka i Yesus bo nompakaroso rarara. Naupu haitu nalaimo ira lako ri ngata Filipi.

Suro-Suro 17

¹I Paulus bo i Silas nompapola polipara noliu ri ngata Amfipolis bo ngata Apolonia sampe nakava ri ngata Tesalonika. Ri sia naria banua petupu ntoYahudi.

²Jadi i Paulus hau ri banua petupu haitu nangoseaka kabiasana bo nosinjula pekiri ante tona nasiromu ri sia. Talu-minggu nosunju-sunju ri eo penonto, ia notesa isi Buku Gasa ka ira.

³Lako ri Buku Gasa, nipopakitana ka ira bo nitenteina ka ira Magau Topepakasalama anu nijanji nu Alatala kana rapandasa bo rapatesi, bo matuvu mpanjili lako ri kamateNa. Niulina, “I Yesus nipatoleleku ka komiu, Iamo Magau Topepakasalama nijanji nu Alatala.”

⁴Nangepe tesa i Paulus, bara sako-ndua toYahudi nomparasaya tesa haitu bo nantuntuni i Paulus bo i Silas. Ivesia muni toYunani, nadea natundu nte Alatala, bo mombine-mombine naria nturona ri ngata haitu, nadea muni nomparasaya.

⁵Tapi toYahudi anu ledo nomparasaya i Yesus, nasiriati nanggita i Paulus bo i Silas, sabana nadea mpuu tona nomparasaya tesa i Paulus. Jadi nipasiromura tona aga notondodo-ndodo ri potomu, anu ledo naria pokarajaana. Nadeapa ira nasiromu, hau nipakagadoramo ngata haitu. Nakava ri banua i Yason anu niponturo i Paulus bo i Silas, nisuakira banua haitu rapangala i Paulus bo i Silas. Patujura ala gi Paulus mesuvu mantingayo todea.

⁶Tapi ledo nikavara i Paulus bo i Silas ri sia. Jadi niumbunjairamo i Yason bo bara sako-ndua topomparasaya ntanina ri sia hau ri ngayo ntopoparenta-topoparenta ngata bo nongare, “I Paulus bo i Silas haitu nompakagado tona ri umba-umba dunia! Sii-sii ira nakava nompakagado ngatata hitu muni!

⁷I Yason hitu nantarima ira ri banuana. Pura-pura ira topomparasaya nombaliunaka atura-atura nipakatantu Magau Mbaso Roma, apa niulira da nariapa magau ntanina nosanga i Yesus.”

⁸Nangepe tesara haitu, todea bo topoparenta ngata, nagado.

⁹Kaupuna i Yason nte roa-roana topomparasaya haitu nipopovaya pade nikabasakaramo.

¹⁰Bongina haitu topomparasaya ri ngata Tesalonika nantudu i Paulus bo i Silas hau ri ngata Berea. Nakava sumai, hau ira nesua ri banua petupu ntoYahudi.

¹¹Tona ri ngata Berea nabelo rarara, ledo mpo tona ri ngata Tesalonika. Nadamba rarara nangepe kareba i Yesus bo eo-eo niparesara Buku Gasa ala rasanira bara makana tesa i Paulus bara ledo.

¹²Nadea ira toYahudi nomparasaya i Yesus, bo nadea muni toYunani anu naria nturona, nomparasaya muni, mombine bo langgai.

¹³ToYahudi ri ngata Tesalonika nangepe i Paulus naria ri ngata Berea nompatolele Tesa nu Alatala. Jadi hau muni ira ri ngata Berea bo nipoviara kagado bo nipakapanera rara ntodea.

¹⁴Jadi topomparasaya ri ngata Berea nasalisa nanggeni i Paulus nesuvu lako ri ngata Berea hau ri bivi ntalinti. Tapi i Silas bo i Timotius da naboli ri ngata Berea.

¹⁵Tona nanggeni i Paulus, nomporoa ia sampe nakava ri ngata Atena. Naupu sia nanjilimo ira hau ri ngata Berea bo nanggeni petevai i Paulus ka i Silas bo i Timotius ala ira masalisa mombatuntuni ia hau ri ngata Atena.

¹⁶I Paulus da nompopea i Silas bo i Timotius ri ngata Atena, nasusa mpuu rarana nanggita kadea nu pinoito-pinoito nisomba ntoAtena.

¹⁷Jadi, ri banua petupu, ia nosinjula tesa ante toYahudi bo tona ntanina anu nombasomba Alatala. Ivesia muni ri potomu, eo-eo ia nosinjula tesa ante isema-sema naria ri sia.

¹⁸Nosinjula tesa muni ia nte guru-guru anu nangoseaka pepatuduki i Epikuros bo guru-guru nangoseaka pepatuduki anu niuli Stoa. Bara sako-ndua guru-guru haitu nosisanai ante i Paulus. Naupu sia, naria sanu nanguli, “Nuapa nisani ntona moitu? Pangisanina aga sakide, tapi tesana nadea!” Bo naria tona ntanina nanguli, “Ia bara madota mompopaisani viata-viata nisomba ntosangatana ka kita!” Niulikara ivesia apa i Paulus notesa i Yesus, bo nitesana muni tona natuvu mpanjili lako ri kamatena.

¹⁹Jadi nikenira i Paulus hau ri polibu ri Bulu Areopagus. Nakava sumai niulikara ia, “Kami hii madota mangepe pepatuduki nabaru anu nipatolelemiu

²⁰apa komiu nompatolele pepatuduki ntanina lako ri ntanina anu niepe kami. Jadi kami madota mangisani batuana.”

²¹(Niulira ivesia apa pura-pura toAtena bo tosangatana anu nonturo ri Atena, nadamba mpuu nonturo-nturo nangepe bo nombajaritai tesa nabaru sampe nabiasa ledo ria tempona nombatui anu santanina.)

²²Jadi i Paulus neangga ri ngayo ntopolibu ri Bulu Areopagus haitu bo nanguli, “Heh komiu toAtena! Nikitaku riara mpengaya-ngaya pokainggumiu, komiu mpuu-mpuu noagama.

²³Apa tempo yaku nanjayo-njayo riara ngatamiu nikitaku nadea pompakande viata. Bo nikavaku sangu pompakande anu naria nitulisi, ‘Pompakande ka Tupu Ledo Nisani SangaNa.’ Tupu haitu nisombamiu, nau ledo nisanimiu sangaNa. Tupu haitumo kupopaisani ka komiu ri sii.

²⁴Alatala nompajadi dunia bo pura-pura isina. Iamo Tupu nu langi bo tana. Bo Ia ledo nonturo ri banua pesomba nipovia nu manusia.

²⁵Ia ledo muni paraluu petulungi nu manusia, sabana Iamo nombadekei katuvuta bo nosata bo pura-pura niparaluuta.

²⁶Lako ri saito manusia nipopomuliNa pura-pura todea ri dunia bo nituduNa ira hau monturo ri njumangu dunia. Lako ri pantepuuna nipakatantuNa ngata mbana raponturora, bo nipakatantuNa kasaena ira matuvu ri ngata haitu.

²⁷Alatala novia ivesia ala kita manusia madota mosisani nte Ia. Bo ane raelo-elota Ia, raposinggavakata Ia. Apa kakanana, Ia napara nte kita pura-pura.

²⁸Evamo niuli ntona, ‘Kita natuvu bo nolipa bo nonturo ri dunia hitu sabana kuasaNa.’ Haitu nasimbayu muni ante anu niuli ntopovia dade ri ngatamiu ivei: ‘Kita pura-pura hii, ana-anaNa.’

²⁹Jadi sampesuvu-sampesuvu, kita hii ana-ana nu Alatala. Sabana haitu, ledo mamala kita mompakasimbayu Alatala ante lenje nipovia lako ri bulava bara salaka bara vatu, nantuntuni kapande nu manusia.

³⁰Tempo nggaulu ane manusia nombasomba tupu-tupu ntanina, Alatala ledo nombahuku ira. NibotusiNa ledo rarekeNa kadoyora haitu. Tapi sii-sii, nituduNa pura-pura manusia ri umba-umba ri dunia majea lako ri dosara.

³¹Apa nipakatantuNamo tempona bara maipia pura-pura manusia ri dunia ratangara ri kanoana. Pokarajaa motangara haitu nidekeiNa ka saito tona nipelisiNa lako ri nggaulunama. Alatala nompakatuvu mpanjili tona haitu lako ri kamateNa ala malanto ka pura-pura tona Ia mpuu-mpuu nipelisi nu Alatala majadi Topotangara pura-pura manusia.”

³²Tempo todea nangepe tesa tomate natuvu mpanjili lako ri kamatena, naria sanu ira nompongirika i Paulus, sabana ledo niparasayara tomate mamala matuvu mpanjili. Tapi naria muni sanu nanguli, “Kami da madota mangepe hanupa tesamu tutu!”

³³Naupu sia, i Paulus nompalaisi polibu haitu.

³⁴Tapi naria tona lako ri sia nosabingga ka i Paulus bo nomparasaya i Yesus. Saito anu nomparasaya pangane nosanga i Dionisius, ia topolibu ri Bulu Areopagus. Naria muni saito mombine nosanga i Damaris, bo naria muni bara sako-ndua tona ntanina.

Suro-Suro 18

- ¹Naupu haitu i Paulus nompalaisi ngata Atena bo hau ri ngata Korintus.
- ²Nakava sumai, ia nosintomu ante toYahudi nosanga i Akwila anu nipoanaka ri propinsi Pontus. I Akwila ante bereina mombine i Priskila dako nakava ri ngata Korintus lako ri propinsi Italia. Ira nolinja hau ri Korintus sabana i Klaudius, Magau Mbaso, nompamenta pura-pura toYahudi kana mompalaisi ngata Roma ri propinsi Italia. I Paulus hau nantunggai ira randua,
- ³bo nonturo nte ira sabana popaelo i Paulus nasimbayu ante popaelora, haitumo novia tenda. Ira tatalu nokarajaa nosinggani-nggani.
- ⁴Ri eo-eo penonto i Paulus hau ri banua petupu ntoYahudi notesa nosinjula pekiri ante tona nasiromu ri sia, toYahudi bo toYunani. Ia nompasimbuku nanggeni ira momparasaya i Yesus.
- ⁵Nakavapa i Silas bo i Timotius lako ri propinsi Makedonia, nikabasaka i Paulusmo pokarajaana novia tenda, bo eo-eo nipatolelena Kareba Belo lako nte Alatala ka toYahudi. Nipakalantona ka ira i Yesusmo Magau Topompakasalama manusia anu nijanji nu Alatala.
- ⁶Tapi aga nievara bo nisalaira i Paulus. Jadi i Paulus nombavurenggenaka pakeana, tandana ia mompalaisi ira sabana nipoarara tesana. Niulina, “Ane komiu rahuku nu Alatala, salamiu mboto, ledo salaku! Mompamula sii-sii yaku hau mompatolele Tesa nu Alatala ka tona ledo toYahudi!”
- ⁷Naupu sia, i Paulus nompalaisi ira bo hau nonturo ri banua ri sinjori nu banua petupu. Tupu nu banua haitu nosanga i Titius Yustus. Ia ledo toYahudi tapi ia nombasomba Alatala.
- ⁸Pakeni ri banua petupu haitu nosanga i Krispus. Ira sambanua nomparasaya i Yesus muni. Nadea toKorintus ntanina nangepe kareba niken i Paulus, bo nomparasaya i Yesus bo nidiu, tandana ira topangoseaka i Yesus.
- ⁹Naria sambongi, Tupu neonga nte i Paulus riara pangipina, bo nanguli “Nee maeka ka tona! Nee menonto mompatolele TesaKu,
- ¹⁰sabana Yaku nomporoa komiu. Nee maeka, ledo ria saitoa tona mamala movia anu nadaa ka komiu, apa ri ngata hitu nadea todeaKu.”

- ¹¹Sabana haitu, i Paulus nonturo ri ngata Korintus sampae santanga kasaena bo nompatuduki Tesa nu Alatala ka tona ri sia.
- ¹²Tempo i Galio najadi gubernur ri propinsi Akhaya, toYahudi ri ngata Korintus nasintuvu nangeva i Paulus. Ia nisakara bo nikenira ratangara ri ngayo Gubernur Galio
- ¹³Nipangadura ia ivei: “Tona hitu nanggeni todea metupu nte Alatala ante pepatuduki nosisala ante Atura-atura nidekei Nabi Musa ka kami!”
- ¹⁴I Paulus madota mesana, tapi Gubernur Galio kaliu-liu nanguli, “He, komiu toYahudi! Ane rapana nipangadukamiu tona nombaliunaka atura pomarenta, bara tona novia anu nadaa, masipato yaku mosabara mangepe pangaduamiu haitu.
- ¹⁵Tapi haitu aga posisala panggava ka tesa-tesa bo sanga-sanga bo atura-atura agamamiu mboto! Kana rapasiayumiu mboto. Yaku hii ledo mombatangara parakara ivehitu!”
- ¹⁶Naupu haitu Gubernur Galio nompopalai ira lako ri banua potangara haitu.
- ¹⁷Nesuvupa ira, nisakaramo pakeni ri banua petupu ntoYahudi anu nosanga i Sostenes, bo nibobara ia ri ngayo banua potangara. Tapi Gubernur Galio ledo ntoto nipeilina.
- ¹⁸Naliu haitu, da nadeapa mbongina i Paulus nonturo ri ngata Korintus, pade nopalakana nte topomparasaya hamai bo nesavi kapala ri pesampo Kengkrea hau ri propinsi Siria nosanggani-nggani ante i Priskila bo i Akwila. Dopame ira nesavi kapala, i Paulus nombagausi buluana anu nipalambana mandoe nantuntuni ada ntoYahudi, sabana naria anu nijanjina ka Alatala.
- ¹⁹Ri polipara haitu, ira nesai ri ngata Efesus. I Paulus nesua ri banua petupu bo nosinjula pekiri ante toYahudi ri sia.
- ²⁰Niperapira i Paulus masae sakide monturo ante ira, tapi ledo nadota ia.

²¹Ia nopalakana nte ira bo nanguli, “Ane rapodota nu Alatala, tumai vai yaku.” I Priskila ante i Akwila naboli ri Efesus tapi i Paulus nesavi kapala ntasi bo napola sampe ri ngata Kaisarea.

²²Nesampo ri ngata Kaisareapa, nantendemo ia hau ri ngata Yerusalem ala mombadekei tabe ka topomparasaya hamai. Naupu sia, napolamo ia hau ri ngata Antiokhia.

²³Bara sakuya kasaena ia nonturo ri Antiokhia, pade hau vaimo ia ri bagia Galatia bo Frigia ala mompakaroso pomparasaya ntopangoseaka i Yesus.

²⁴Tempo haitu, naria saito toYahudi nosangana i Apolos. Ia lako ri ngata Aleksandria ri tana Mesir bo nakava ri ngata Efesus. I Apolos mai natau mpuu notesa, bo nisanina mpuu isi Buku Gasa.

²⁵Ia nipatuduki ntona sampe nisanina tesa i Pue Yesus. Jadi tempo ia nakava ri ngata Efesus, nitesana kareba i Yesus ante mpuu-mpuu rarana bo nambela mpuu tesana, nau dopa nisanina pura-pura pepatuduki i Yesus. Aga pombadiu i Yohanes Topediu nisanina.

²⁶Ledo naeka rara i Apolos notesa ri banua petupu ntoYahudi. Tempo i Priskila bo i Akwila nangepe ia, nikeniramo ia hau ri banuara. Bo ri sia nitesakara pakalanto nia nu Alatala mompakasalama manusia sabana anu nipovia i Yesus.

²⁷Naliu haitu, i Apolos nonia hau ri propinsi Akhaya. Jadi topangoseaka i Yesus ri ngata Efesus nantulungi ia bo nompakatu sura ka topomparasaya ri propinsi Akhaya ala ira madota mantarima i Apolos sumai. Nadea tona ri propinsi Akhaya najadi topangoseaka i Yesus sabana kabelo nu Alatala, bo pepatuduki i Apolos mpuu-mpuu nantulungi ira.

²⁸Nakuasa mpuu tesa i Apolos sampe nidagina pesanai ntoYahudi ri ngayo ntodea. Lako ri Buku Gasa nipakalantona ka ira i Yesusmo Magau Topompakasalama manusia anu nijanji nu Alatala.

Suro-Suro 19

¹Tempo i Apolos da naria ri ngata Korintus, i Paulus nompesayo ngata-ngata ri buluna ri bagia Galatia bo Frigia, sampe nakava ri ngata Efesus. Ri sia ia nosinggava ante bara sako-ndua topomparasaya i Yesus.

²Nipekutanana ira, “Nitarimamiu Nosa Gasa nu Alatala tempo komiu nomparasaya i Yesus?” Nesana ira, “Dopa. Dopa niepe kami naria Nosa Gasa!”

³Nekutana vaimo i Paulus, “Ane ivesia, berimba komiu nidiu?” Nesana ira, “Kami nidiu nangoseaka pepatuduki i Yohanes Topediu.”

⁴Nanguli i Paulus, “I Yohanes nombadiu tona, tandana najeamo ira lako ri dosara. Bo ia muni nompatuduki ka todea ira kana momparasaya saito tona makava maliu ia, haitumo i Yesus.”

⁵Naliu nangepe tesa i Paulus haitu, toEfesus nekidiu mpanjili, tandana niparasayaramo i Yesus.

⁶I Paulus nombadika palena ri balenggara bo kaliu-liu Nosa Gasa nu Alatala nombakuasai ira. Pade ira notesa ante basa-basa nidekei nu Nosa Gasa ka ira bo nipasimbayura tesa lako nte Alatala.

⁷Kadea ntona haitu, nitasere sapulu randua.

⁸Talu-mbula kasaena i Paulus hau njuu ri banua petupu ntoYahudi ri ngata haitu. Ledo nakaja rarana nombatesa Poparenta nu Alatala bo nosinjula pekiri nte ira. Dotana ala ira momparasaya i Yesus.

⁹Tapi bara sako-ndua ira nakaa bagara bo ledo nadota nomparasaya. Ira nanjalai nia nu Alatala ri ngayo ntodea, haitumo niaNa mompakasalama manusia sabana anu nipovia i Yesus. Haitumo sabana i Paulus nompalaisi ira, bo nikenina topangoseaka i Yesus hau ri sikola i Tiranus. Eo-eo ia nosinjula pekiri ante tona ri sia.

¹⁰Aga ivesiamo nipovia i Paulus rompae kasaena, sampe pura-pura tona nonturo ri propinsi Asia, toYahudi bo tona ledo toYahudi, nangepe Tesa nTupu.

¹¹Alatala nombadekei kuasa ka i Paulus novia kabaraka-kabaraka anu ledo ria kasimbayuna.

¹²Ane pasapu bara buya nariumo nipake i Paulus bo rakeni ka tona nadua, nabelomo ira, bo seta-seta nalai munimo.

¹³Ri tempo haitu naria bara sako-ndua sando ntoYahudi hau ri umba-umba nompopalai seta lako ri karo ntona. Sando haitu nompesoba nompake sanga i Yesus munimo mompopalai seta-seta. Niulira, “Ante kuasa i Yesus anu nipatolele i Paulus, kami mompopalai iko!”

¹⁴Naria balengga ntopanggeni pesomba Yahudi nosanga i Skewa. Papitu anana, langgai bayangi. Ira papitu haitu madota muni mompesoba mompopalai seta ante nompake kuasa i Yesus. Jadi naria saeo nipesobara nompopalai seta lako ri karo ntona.

¹⁵Tapi nesanamo seta haitu, “Ane i Yesus, nisaniku Ia, bo i Paulus nisaniku munimo. Tapi komiu tu, isema?”

¹⁶Tona nipesua nu seta haitu nekavantu bo nombabaga ira sampe pura-pura ira papitu namala nidagina. Nangova ira nalai lako ri banuana nabaka-baka, bo ira novuloamo sabana pakeara nisemparakasinamo.

¹⁷Pura-pura toYahudi bo tona ledo toYahudi, anu nonturo ri ngata Efesus nangepe kajadia haitu. Nokumaa puramo ira bo niulira i Pue Yesus nakuasa mpuu.

¹⁸Nadea topomparasaya i Yesus najea bo nangaku ri ngayo ntodea poviara nadaa.

¹⁹Nadea muni ira anu nompake doa-doa, pakuli, bo pangisani nadaa, nompasiromu buku-buku pangisani nadaa, bo nipalabura ri ngayo ntodea. Ali nu buku-buku haitu, nitasere limapulu njobu doi salaka kadeana.

²⁰Jadi, lako ri kajadia-kajadia nabaraka evamo haitu, kadea-dea tona nangepe Tesa nTupu, bo kadea-dea tona nomparasaya.

²¹Naliutaka kajadia-kajadia haitu, i Paulus nonia hau ri propinsi Makedonia bo Akhaya, pade mapola hau ri ngata Yerusalem. Niulina ka roana, “Maupu yaku hau ri ngata Yerusalem, pade hau ri ngata Roma.”

²²Jadi nituduna randua topotulungi ia mokolu ka ia hau ri propinsi Makedonia. Sangara randua haitu, i Timotius bo i Erastus. Tapi i Paulus mboto da nonturo bara sakuyapa kasaena ri propinsi Asia.

²³Ri tempo haitu, neumbamo kagado mbaso ri ngata Efesus sabana ledo nipokonora pepatuduki i Pue Yesus.

²⁴Naria saito pande nu salaka nosanga i Demetrius ri ngata haitu. Pokarajaana novia banua-banua kodi lako ri salaka. Banua-banua haitu nolenje mpo banua petupu ka viata Artemis. Nadea mpuu doi nikava i Demetrius bo topokarajaa ka ia lako ri pokarajaara haitu.

²⁵Ia nompasiromu pura-pura ira sampokarajaa bo pande-pande salaka ntanina, bo nanguli, “Sampesuvu-sampesuvu! Nisanimiu mboto nadea panggavata lako ri pokarajaata hitu

²⁶Sii-sii nikitamiu bo niepemi mbotomo anu nipovia i Paulus! Ia nanguli ka todea, pinoito-pinoito nu viata nipovia mpale manusia, ledo viata mpuu. Bo nadeamo tona nomparasaya pepatudukina haitu, ledo aga ri ngata Efesus hitu, tapi ri pura-pura propinsi Asia muni!

²⁷Jadi, sampesuvu-sampesuvu, nee sampe pokarajaata hitu rapakadaa ntona. Ledo aga haitu, nee sampe banua petupu viata Artemis rapandaente ntona bo nee sampe i Artemis mboto domo rabila, tano i Artemis nisomba ntodea pura-pura ri Asia bo ri njumangu dunia!”

²⁸Nangepe tesa i Demetrius, tona nasiromu haitu nobilisi mpuumo rarara, sampe ira nongare-ngare, “Matuvu Artemis, viata nisombata ntoEfesus!”

²⁹Kagado haitu natolele sampe ri njumangu ngata Efesus. Todea nombasaka i Gayus bo i Aristarkhus, haitumo randua roa i Paulus sampolipa lako ri propinsi Makedonia. Ira niumbunjai ntodea hau nesua ri tana lapa rangata haitu.

³⁰I Paulus madota mesua mantingayo todea ri sia tapi nitagi ntopangoseaka i Yesus.

³¹Ivesia muni bara sako-ndua tomaoge topoparenta ri propinsi Asia haitu, anu novega ante i Paulus. Nitudura tona hau mangulika i Paulus, “Nee mpuu mesua nte todea riara nu kasiromu haitu!”

³²Todea nasiromu ri tana lapa sia nagado mpuumo. Naria sanu nongare ivei, naria muni sanu nongare iveitu, apa deanapa ira ledo nisanira nuapa patujura nasiromu ri sia.

³³Naria saito toYahudi nosanga i Aleksander nipopokolu ntoYahudi ri ngayo ntodea. Bara sako-ndua tona lako ri todea haitu nombatentei ka ia nuapa najadi. I Aleksander nanganggataka palena, tandana ia madota motesa manjaliku karonu ri ngayo ntodea.

³⁴Tapi nisani ntodeapa ia toYahudi, nongaremo ira mpasanggani-nggani, “Nambaso kaoge i Artemis, viata nisombata ntoEfesus!” Aga haitu nisili-silira rojaa kasaena.

³⁵Kaupuna, jurutulisi ngata namalamo nompakalino todea. Nanguli ia ka ira, “Sampesuvu-sampesuvu toEfesus! Nisani ntona pura-pura, kita toEfesus hitumo tona nompiara banua petupu nu viata Artemis anu nelabi kaogena bo watu nabaraka anu nanau lako ri langi!

³⁶Ledo ria saitoa tona nombasapu haitu! Sabana haitu, kuperapi nte komiu, kalino puramo! Nepa ruru movia nuapa-nuapa ane dopa rapekiri pakabelo-belo ntani ruru!

³⁷Tona nikenimiu ri sii, ledo nangangga nuapa-nuapa lako ri banua petupu viata Artemis anu nisombata, bo ledo muni nompakadaa sanga i Artemis.

³⁸Ane i Demetrius ante roana sampokarajaa maria pangaduara nte tona, aginapa parakara haitu rakenira ri ngayo ntopotangara. Naria mami jaa nipakatantu ka potangara bo naria topotangara nasadia mombatimba parakara.

³⁹Ane da mariapa anu ntanina rapekutanamiu, haitu kana ratesa ri polibu ngata anu nipakatantu nu pomarenta.

⁴⁰Apa anu najadi eo hitu mamala mompakadaa kita pura-pura! Pomarenta Magau Mbaso mamala mombarai kita topeeva, sabana ledo ria nuapa-nuapa mamala raulita mompakakana kagado hitu!”

⁴¹Naupu jurutulisi ngata notesa, nitudunamo todea manjili.

Suro-Suro 20

¹Nalinopa kagado ri ngata Efesus, i Paulus nompasiromu topomparasaya ri sia bo notesa nompakaroso rarara. Naupu sia, ia nopalakanamo pade nipapolana polipana hau ri propinsi Makedonia.

²Riara mpolipana, ia nompesayo ngata-ngata ri Makedonia bo nompakaroso rara ntopomparasaya hamai ante mpengaya-ngaya pepangajari. Naupu haitu, napolamo ia hau ri propinsi Akhaya, tana ntoYunani.

³Talu-mbula kasaena ia nonturo ri sia. Naupu sia, ia nonia mesavi kapala ntasi hau ri propinsi Siria. Tapi dopame ia nalai, niepena kareba naria toYahudi ri sia nasintuvu mompatesi ia ri dala. Jadi nipakatantuna manjili mantuntuni dala kabatana moliu ri propinsi Makedonia.

⁴Naria bara sako-ndua tona nomporoa i Paulus, haitumo, i Sopater ana i Pirus lako ri ngata Berea, i Aristarkhus bo i Sekundus toTesalonika, bo i Gayus lako ri ngata Derbe. Naria muni i Timotius, i Tikhikus bo i Trofimus, lako ri propinsi Asia pura.

⁵Ira papitu nokolu ka kami bo i Paulus, bo nipopeara ri ngata Troas kami.

⁶Naupu haitu pade nituntuni kami dala kabatana sampe ri ngata Filipi. Naliutaka eo mbaso ntoYahudi niuli Posusa Roti Ledo Noragi, kami nesavi kapala lako ri ngata Filipi. Lima-mbongi kami ri dala pade nosintomu ante roa-roa kami ri ngata Troas. Jadi kami nonturo ri sia saminggu kasaena.

⁷Bongi Aka, kami nasiromu nangande nosanggani-nggani ante topomparasaya ri ngata Troas. I Paulus notesa sampe tanga bongi, apa patujuna maile mpadondona mompapola polipana.

⁸Tombi nikasiromu kami haitu, ri tombi katatalu-unjuna. Nadea poindo nitunju ri sia.

⁹Naria saito kabilasa nosanga i Eutikhus nonturo ri pelaba. Naroyo mpuu matana apa i Paulus ledo naupu-upu notesa. Nasae-sae kabilasa haitu namonjomo sampe nanavu lako ri pelaba ntombi katatalu-unjuna haitu hau ri tana. Tona nanau nanganggataka ia, nikavara namatemo.

¹⁰Tapi i Paulus nanau hau ri tambena bo nekadungga ntuobo ri bavo kabilasa haitu, bo nikapuina. Nanguli i Paulus ka todea nombatagui tomate haitu, “Nee masusa raramiu, da matuvu ia!”

¹¹Naliu haitu, nompene vai i Paulus hau ri tombi nikasiromura haitu, bo nitubi-tubina roti bo ira nangande nosanggani-nggani. Naupu nangande, notesa vaimo ia sampe naeo. Naupu haitu nalaimo ia.

¹²Kabilasa namate nanavu haitu, natuvumo bo niken i nu roana manjili ri banuana, bo nadamba mpuumo rarara pura-pura.

¹³Kami nesavi kapala mbaso bo nokolu hau ri ngata Asos mosinggavaka i Paulus sumai. Nipakatantu i Paulus ivesia, apa ia madota modala ri kabatana.

¹⁴Nosinggavapa kami ante i Paulus ri ngata Asos, nesavi kapala sangganimo kami pura-pura hau ri ngata Metilene.

¹⁵Lako ri sia nokapala vaimo kami, bo kamailena nakavamo ri tana nosinjambote nte levuto Khios. Bo kamailena vai nakavamo kami ri levuto Samos. Naliu sia, sambongipa nakavamo kami ri ngata Miletus, pesampo nu ngata Efesus.

¹⁶Lako ri pamula polipa kami, i Paulus nompakatantu domo ia mesai ri ngata Efesus, ala nee masae gaga ri propinsi Asia. Apa nasara rarana hau mantuntuni eo mbaso Pentakosta ri ngata Yerusalem.

¹⁷Nakavapa ri ngata Miletus, i Paulus nompakatu kareba hau ri ngata Efesus nompokio pakeni ntopomparasaya sumai, makava mosinggava ante ia ri ngata Miletus.

¹⁸Nakavapa ira, nangulimo i Paulus, “Sampesuvu-sampesuvuku! Nisanimiu berimba katuvuku nte komiu, lako ri kakavaku pamulana ri propinsi Asia hitu sampe sii-sii.

¹⁹Yaku nokarajaa ri sii ka i Pue Yesus ante ede raraku bo nadea uve mataku. Nadea susa bo pari nirasaiku, sabana toYahudi nonia mompatesi yaku.

²⁰Nisanimiu ledo nakaja raraku nompasimbayu anu noguna ka komiu. Yaku batena nompatuduki komiu ri kasiromu ntodea, bo ri banua-banuamiu.

²¹Yaku nasaro nompainga komiu pura-pura, toYahudi bo tona ledo toYahudi, ala komiu majea lako ri dosamiu bo matundu nte Alatala bo momparasaya Tuputa Yesus.

²²Hitupa yaku hau ri ngata Yerusalem nangoseaka parenta Nosa Gasa nu Alatala ka yaku. Dopa nisaniku nuapa pura majadi nte yaku hamai.

²³Aga nisaniku ri umba-umba ngata nikalauku, Nosa Gasa nompopaisani ka yaku, yaku rasuaraka riarar ntarunggu bo mombarasai kasusa bo kapari ri ngata Yerusalem.

²⁴Tapi ledo kupotove katuvuku hitu. Nau yaku mpuu-mpuu rapatesi, ledo makuya, asaa kupakaupu pokarajaa nidekei i Pue Yesus ka yaku mompatolele Kareba Belo anu nombatesa kabelo nu Alatala nte kita.

²⁵Sampesuvu-sampesuvuku. Nitunggaikumo komiu bo nipatudukikumo Poparenta nu Alatala ka komiu pura-pura. Bo sii-sii nisaniku domo rakitamiu hanupa lenjeku.

²⁶Jadi eo hitu kuuli ka komiu ante raraku mpuu-mpuu, ane rapana maria komiu rapopogaa lako nte Alatala sampe ri kasae-saena, salamiu mboto.

²⁷Apa, ledo nasau raraku nompatuduki ka komiu, pura-pura nia nu Alatala ka kita.

²⁸Komiu kana mombajagai karomiu mboto. Jagai muni todea topomparasaya, anu niparasayaka Nosa Gasa ka komiu. Komiu kana mompiara todea nu

Alatala, nasimbayu mpo topoevu nompiara bimbana. Apa Tuputa Yesus namate bo raaNa natiti mombasompo dosata ala kita majadi todeaNa.

²⁹Nisaniku malai yaku lako ri sii, kana makava tona nadaa anu mompakasusa todea anu nipiaramiu, nasimbayu mpo asulaku makava mombabaga bimba.

³⁰Lako nte komiu mboto meumba tona mompatuduki anu ledo nakana. Rapoviara ivesia ala topangoseaka i Yesus domo mangoseaka dala nakana, tapi mangoseaka iramo.

³¹Jadi komiu kana mainga! Toramo, sampesuvu-sampesuvuku. Talu-mpae kasaena, eo bongi yaku ledo nenonto nompatuduki bo nompaiinga komiu saito-saito, bo nadea uve mataku natiti.

³²Jadi sampesuvu-sampesuvuku, hitupa yaku nekakai nte Alatala nerapi Iamo mombajagai komiu. Bo kuuli ka komiu, oseakamo tesa nu Alatala anu nompopaisani kabelo nu Alatala ka kita. Aga Iamo nakuasa mompakaroso pomparasayamiu bo mombadekei belo ka komiu, haitumo belo nipakasadiaNa ka tona nipelisiNa majadi todeaNa.

³³Ledo ria sanggania nario mataku ka doi bara ka pakea ntona.

³⁴Nisanimiu mboto yaku nokarajaa ante paleku mboto ala kualii mboto anu niparaluuku bo anu niparaluu roa-roaku.

³⁵Riara mpengaya-ngaya, katuvuaku najadi jonjo ka komiu, haitumo, kita kana mokarajaa ala rapakuleta mombatulungi tona ledo nompakule nokarajaa. Kita kana mompariara tesa i Pue Yesus anu nanguli: ‘Nadambapa tona nombadekei pade tona nantarima.’ “

³⁶Naupupa i Paulus notesa, nantaputumo ia nosanggani-nggani ante pura-pura ira lako ri ngata Efesus bo nosambaya.

³⁷Notumangi puramo ira. Nikapuiara i Paulus bo niekira, mpo tona nosampesuvu mogaa.

³⁸Nabuku mpuu rarara, sabana i Paulus nanguli ka ira, “Domo rakitamiu hanupa lenjeku!” Naliutaka sia, nikenira kami sampe ri kapala.

Suro-Suro 21

¹Ri sia kami nopalakana nte pakeni ntopomparasaya lako ri ngata Efesus, bo nipalaisi kamimo ira. Kami nesavi kapala bo kaliu-liu hau ri levuto Kos, bo kamailena nakavamo kami ri levuto Rodos. Lako ri sia kami napola hau ri pesampo kapala ri ngata Patara.

²Ri Patara kami nolinja ri kapala hau ri bagia Fenisia.

³Kapala haitu nolipa sampe nikita kami levuto Siprus ri sabingga njidi kami. Tapi kapala nolipa njuu sampe ri propinsi Siria. Kami nesampo ri ngata Tirus sabana ri sia rapotauraka pangulaya kapala nipesavi kami.

⁴Ri ngata Tirus haitu, kami hau nanggita topangoseaka i Yesus bo nonturo nte ira saminggu kasaena. Ante pekeniaka Nosa Gasa ira nompainga i Paulus, nee mantende hau ri ngata Yerusalem.

⁵Tapi nagana saminggu kami nonturo ri sia, nipalaisi kamimo ira, bo nipapola kamimo polipa kami. Ira pura-pura nosangani-nggani ante anara bo bereira nanggeni kami hau ri savaliku ngata. Nakava ri talinti, nantaputu puramo kami bo nosambaya.

⁶Naupu nopalakana, nesavi kapalamo kami. Bo ira topekeni pangane nanjili hau ri banuara.

⁷Lako ri ngata Tirus haitu, kami nokapala sampe nakava ri ngata Ptolemis. Ri sia kami hau mosisani nte topangoseaka i Yesus bo mompapola tabe. Bo kami naturu nte ira sambongi.

⁸Naeo mpadondo napolamo kami sampe nakava ri ngata Kaisarea. Ri sia, kami hau nonturo ri banua i Filipus, saito topompatolele Kareba Belo. Ia muni saito lako ri ira papitu anu nipelisi ri ngata Yerusalem bara ipia mantulungi suro-suro.

⁹Naria ana i Filipus ampa randaa. Ira ampa mai nidekeika nu Alatala pompakule mompasimbayu tesa nitarimara lako nte Alatala.

¹⁰Naliu bara sako-mbongi kami nonturo ri sia, nakavamo saito langgai nosanga i Agabus, lako ri bagia Yudea. Ia muni nidekeika nu Alatala pompakule nompasimbayu tesa nitarimana lako nte Alatala.

¹¹I Agabus nakava nte kami ri banua i Filipus. Nialana sulepe i Paulus, bo nipouna ka kadana bo palena mboto pade niulina, “Iveimo anu niuli Nosa Gasa: ToYahudi ri ngata Yerusalem mombasaka tupu nu sulepe hitu, bo rapoura ivehitu, bo radekeira ka tona ledo toYahudi mombatangarana.”

¹²Nangepe haitu, kami bo pura-pura topomparasaya nonturo ri ngata Kaisarea, nerapi nte i Paulus, “Nee mpuu mapola hau ri ngata Yerusalem!”

¹³Tapi nesana i Paulus, “Nakuya komiu notumangi nompakabuku raraku? Yaku hii nasadio hau ri ngata Yerusalem nau yaku rasaka, nau sampe rapatesi sabana pangoseakaku i Pue Yesus!”

¹⁴Ledo nadota i Paulus nangepe tesa kami. Jadi nenontomo kami nombatagi ia. Niuli kami, “Damo dota nTupu majadi.”

¹⁵Naliu bara sako-mbongi kasaena kami nonturo ri sia, nanggalivomo kami bo nantende hau ri ngata Yerusalem.

¹⁶Naria muni bara sako-ndua topomparasaya lako ri ngata Kaisarea nomporoa kami. Ira nanggeni kami hau ri banua i Manason ri Yerusalem, apa ri banuana haitu rapesai bo rapaturu kami. I Manason haitu tona lako ri levuto Siprus, bo ia nasaemo najadi topangoseaka i Yesus.

¹⁷Nakava kami ri ngata Yerusalem, topomparasaya ri sia nantarima kami ante damba rara.

¹⁸Kamailena, i Paulus nosangani-nggani ante kami hau mosinggava nte i Yakobus. Pura-pura pakeni ntopomparasaya ntanina naria ri sia muni.

¹⁹Naupu i Paulus netabe, nitesana ka iramo pura-pura anu nipovia nu Alatala ri tatanga ntona ledo toYahudi tempo ia nompatolele Kareba Belo.

²⁰Naupu nangepe tesa i Paulus, i Yakobus ante pakeni-pakeni ntanina, nantoiya Alatala. Niulira ka i Paulus, “Sampesuvu, kana rasanimiu nonjobu-njobumo

toYahudi nomparasaya i Yesus, tapi ira pura-pura da batena nangoseaka Atura-atura agama anu nipapola Nabi Musa.

²¹Niepera kareba anu nompakasala komiu. Niepera komiu nompatuduki pura-pura toYahudi anu nonturo ri ngata ntona ledo toYahudi, ala rakabasakara Atura-atura agama haitu. Niepera muni komiu nompatuduki domo paraluu ira mombasuna anara bo domo paraluu mantuntuni ada ntoYahudi.

²²Sii-sii kana raepe ntoYahudi anu nomparasaya i Yesus, komiu nakava ri sii. Jadi, berimbamo?

²³Aginamo raoseakamiu tesa kami hitu: Naria ampa tona nte kami ri sii novia pojanji nte Tupu bo domo masae rapoviara ada pompakagasa karo nangoseaka adata.

²⁴Agina komiu hau movia ada pompakagasa karo mosanggani-nggani nte ira, bo komiu mombabayari pura-pura anu rapesombara. Naupu sia, ira mamala ragau, tandana nipakaduparamo pojanjira. Ivesiamo, rasani ntodea ledo nakana kareba niepera nombatesa komiu, apa komiu mboto nantuntuni Atura-atura agama anu nipapola Nabi Musa.

²⁵Tapi tona ledo toYahudi anu nomparasaya i Yesus, nipakatu kamimo sura ka ira nompakatantu atura-atura anu paraluu raoseakara. Haitumo, ira ledo mamala mangande kande nipesomba ka tupu-tupu ntanina, ledo mamala mangande raa bara mangande bau nu binata nikoje, bo ledo mamala mosampaturu ante tona ledo bereira mboto.”

²⁶Nangepe haitu, nasitujumo i Paulus ante tesa i Yakobus bo pakeni ntanina haitu. Jadi naeo mpadondona hau mpuu ia nosanggani-nggani ante tona ampa bo nipoviara ada pompakagasa karora. Naupu haitu, nesuamo ira riara Banua nu Alatala bo nanguli ka topanggeni pesomba ri sia sako-mbongipa pede maupu ada pompakagasa karora bo pesombara rakeni rapesomba ka Alatala.

²⁷Napara kaupuna pitu-eo nipakatantu ka ada pompakagasa karo, bara sako-ndua toYahudi lako ri propinsi Asia nanggita i Paulus riara Banua nu Alatala. Nipakagadora todea ri sia bo nisakara i Paulus,

²⁸bo nongare-ngare, “ToYahudi! Tulungimo kami! Hitumo tona hau ri umba-umba nompatuduki todea mangeva kita toYahudi. Nipatudukina tona mombabaliki Atura-atura agama anu nipapola Nabi Musa, bo nisalaina Banua nu Alatala hitu! Sii-sii nikenina tona ledo toYahudi nesua riaru Banua nu Alatala nompakaruto ponturo nagasa hitu!”

²⁹(Niulira ivesia, sabana nikitaramo i Trofimus, tona ledo toYahudi lako ri ngata Efesus. I Trofimus nomporea i Paulus riaru ngata. Nisarumakara i Paulus nanggeni ia nesua ri Banua nu Alatala, tano ledo.)

³⁰Nangepe haitu, pura-pura tona ri ngata Yerusalem nagado mpuumo, bo ira mpasangani-nggani nangova hau ri Banua nu Alatala nombasaka i Paulus. Niumbunjaira i Paulus hau ri savalikuna bo niupira vamba Banua nu Alatala ala ledo magado riarana.

³¹Tempo topegado haitu nompasimbuku mompatesi i Paulus, naria tona hau nopakiluka tadulako Magau Mbaso ivei: “Nagadomo njumangu ngata Yerusalem!”

³²Nangepe pakilu haitu, tadulako haitu kaliu-liu nangala tantara-tantarana bo hau nasalisa ri kagado haitu. Nanggitapa tantara-tantara nakava, nenontomo todea nombaboba i Paulus.

³³Jadi tadulako haitu nombasaka i Paulus, bo nituduna tona nombarante ia ante rompenga rante. Naupu sia nipekutanana ka todea, “Isema tona hitu? Nuapa nipoviana?”

³⁴Naria sanu nongare ivei, bo naria muni sanu nongare iveitu. Ivesia kagadona sampe ledo nisani nu tadulako nuapa kakanana najadi. Haitumo sabana niparentana ala i Paulus rakeni ri asrama nu tantara.

³⁵Tempo tantara nanggeni i Paulus nakava ri tangga asrama haitu, topegado-topegado narau mpuu sampe i Paulus damo nikova ntantara nesua hau riaru asrama.

³⁶Topegado haitu netuntuni ri puri bo nongare-ngare, “Patesimo ia!”

³⁷Ira da mesua riara asrama nu tantara, i Paulus nanguli ka tadulako, “Pua, mamala yaku motesa sampalai nte komiu?” Tadulako nesana, “Nisanimu tano nobasa Yunani!

³⁸Ane ivesia, ledo iko tano toMesir nangeva pomarenta bo nanggeni pata-njobu topepatesi nalai hau ri karava bai bara ipia?”

³⁹Nesanamo i Paulus, “Ledo. Yaku hii toYahudi, lako ri Tarsus ngata mbaso ri propinsi Kilikia. Kuperapi, dekei kaku loga motesa ka todea hitu.”

⁴⁰Tadulako haitu nompaloga i Paulus motesa. Jadi i Paulus neangga ri tangga nu asrama bo nombalaeraka palena, ala ira malino mangepe tesana. Nalinomo ira sakide, bo nompamulamo i Paulus notesa ka ira ante basa Ibrani, basa ntoYahudi.

Suro-Suro 22

¹“Sampesuvu-sampesuvu pura-pura. Epemo tesaku manjaliku karoku hitu!”

²Tempo todea nangepe i Paulus notesa ante basa Ibrani, nalino ntoto ira, bo i Paulus nompapola tesana.

³“Yaku hii toYahudi nipoanaka ri ngata Tarsus ri propinsi Kilikia. Tapi yaku nipakambaso ri sii ri ngata Yerusalem, bo neguru nte Guru Mbaso nosanga i Gamaliel. Yaku nipatudukina pakabelo-belo nantuntuni Atura-atura nipapola Nabi Musa ka totuata nggaulu. Yaku muni mpuu-mpuu nangoseaka parenta nu Alatala nasimbayu mpo komiu ri sii.

⁴Haitu sampe nipandasaku topangoseaka pepatuduki i Yesus. Naria sanu nipatesiku, naria sanu nisakaku bo nisuarakaku riara ntarunggu, langgai bo mombine.

⁵Pakeni nTopanggeni Pesomba mboto bo pura-pura toPolibu Mbaso Agama Yahudi mamala mombasabiki tesaku hitu nakana. Apa ira mbotomo nombadekei ka yaku sura rakeni ka toYahudi ri ngata Damsyik. Sura haitu nombadekei kuasa ka yaku ala yaku mamala mombasaka topomparasaya pepatuduki i Yesus sumai bo manggeni ira tumai ri ngata Yerusalem bo rahuku.”

⁶“Yaku da riara mpolipaku, naparamo kami ri ngata Damsyik, nitasere tanga eo, sampesanika naria reme lako ri langi nareme mpuu nombavanta yaku.

⁷Nadunggamo yaku bo niepeku suara nanguli, ‘Saulus, Saulus! Nakuya iko nompandasa Yaku?’

⁸Yaku nekutana, ‘Isema komiu, pua?’ Nesana suara haitu, ‘Yakumo hii i Yesus toNazaret nipandasamu!’

⁹Pura-pura tona nomporoa yaku nanggita reme haitu, tapi ledo niepera suara notesa ka yaku.

¹⁰Jadi nekutana vai yaku, ‘Nuapa masipato kupovia, Pue?’ Nesanamo i Pue, ‘Peanggamo! Koimo pesua ri ngata Damsyik. Hamai pade rauli ka iko pura-pura anu nipakatantu nu Alatala kana mupovia.’

¹¹Tempo haitu naburomo matakuku sabana nivanta reme haitu. Jadi yaku damo ninini nu roaku nolipa hau nesua riara ngata Damsyik.

¹²Ri Damsyik naria tona nosanga i Ananias. Ia tona nanao bo natutu nangoseaka Atura-atura agama anu nipapola Nabi Musa. Pura-pura toYahudi nonturo ri ngata Damsyik mpuu-mpuu nombabila ia.

¹³Ia nakava neangga ri sinjoriku bo nanguli, ‘Sampesuvuku, Saulus. Bulamo matamu. Iko mekita mpanjili.’ Kaliu-liu nabelomo matakuku bo nikitaku i Ananias.

¹⁴Naupu haitu, niulikana yaku, ‘Alatala anu nipetupu ntotuata nggaulu, nompelisi iko ala musani anu nipodotaNa. NipelisiNa iko ala mukita i Yesus, Batua nu Alatala anu nangoseaka dotaNa, bo ala muepe mboto suara i Yesus.

¹⁵Iko majadi sabiNa ka pura-pura tona bo mupatolele anu nikitamu bo anu niepemu.

¹⁶Jadi, nuapa vai nipopeamu? Peanggamo, dekeimo karomu radiu, tandana iko nangoseaka i Yesus. Pekakaimo nte i Yesus ala raampungina dosamu.’ “

¹⁷“Sampesuvu-sampesuvu, naupu haitu, nanjilimo yaku hau ri ngata Yerusalem, bo tempo yaku nosambaya ri Banua nu Alatala, yaku nikuasai Nosa Gasa.

¹⁸Nikitaku i Yesus bo niulikaNa yaku, ‘Palaisimo ngata Yerusalem masalisa, apa ledo ratarimara posabimu nombatesaki Yaku.’

¹⁹Tapi nesana yaku, ‘Pue, kana ratarimara tesaku, apa nisanira poviaku bara ipia. Nisanira yaku nesua ri banua-banua petupu nesaka, neboba, bo nombasuaraka topomparasaya Komiu riarar ntarunggu.

²⁰Ivesia muni tempo sabiMiu i Stefanus nipatesira. Nisanira yaku mboto naria ri sia bo yaku nasituju ia rapatesi. Bo yakumo nombajagai pakea ntona nompatesi ia. Jadi kana raparasayara tesaku.’

²¹Tapi nanguli vaimo i Pue ka yaku, ‘Koimo. Yaku nantudu iko hau ri ngatana ngata nakavao, nte tona ledo toYahudi.’ “

²²Todea haitu nalino nangepe tesa i Paulus. Tapi nieperapa ia hau nte ntona ledo toYahudi, domo nipokonora mangepe anu ratesana. Nongaremo ira ante suara namangga mpuu, “Patesimo tona tutu! Ia domo masipato matuvu!”

²³Sii nongare-ngare, sii nomporetaka-taka bajura bo nikamburakara sovu ri laerava sabana nagigi mpuumo rarara.

²⁴Haitu sampe tadulako Magau Mbaso nompamenta ala i Paulus rakeni riarar asrama tantara. Patujuna, i Paulus racambu bo raparesa ri sia ala rasani nuapa sabana toYahudi nongare-ngare ivesia ka ia.

²⁵Tapi tempo i Paulus nipou racambu, niulikana balengga ntantara anu neangga ri sia, “Berimba? Masipato todea nu Magau Mbaso Roma racambu dopame ratangara?”

²⁶Nangepe tesa i Paulus, balengga ntantara haitu hau ri ngayo nu tadulako bo nanguli, “Pua, agina rapekirimiu ntani ruru anu rapoviamiu ka tona haitu, sabana ia todea nu Magau Mbaso Roma!”

²⁷Nangepe haitu hau tadulako nte i Paulus, bo nompekutana, “Ulimo ka yaku! Nakana iko todea nu Magau Mbaso Roma?” Nesana i Paulus, “Iyo, nakana.”

²⁸Nanguli tadulako haitu, “Yaku hii najadi todea nu Magau Mbaso Roma sabana nadea mpuu nibayariku!” Nesana i Paulus, “Tapi yaku hii todea nu Magau Mbaso Roma lako ri pompoanaka yaku.”

²⁹Nangepe haitu, kaliu-liu noura tantara-tantara anu nasadia mombacambu i Paulus. Tadulakora muni naeka, sabana nipoura i Paulus, tano i Paulus haitu todea nu Magau Mbaso.

³⁰Tadulako Magau Mbaso haitu mpuu-mpuu madota mangisani nuapa sabana toYahudi nompakasala i Paulus. Jadi kamailenapa nitudunamo balengga-balengga ntopanggeni pesomba ante pura-pura toPolibu Mbaso Agama masiromu. Bo nipekivolendam rante i Paulus pade nikenina hau mantingayo polibu haitu.

Suro-Suro 23

¹Nakava sumai, nikanoto i Paulusmo toPolibu Mbaso Agama bo niulina, “Sampesuvu-sampesuvuku. Sampe ri eo hitu, yaku natuvu nanao, nagasa ri panggita nu Alatala.”

²Nangepe tesa i Paulus, naraumo i Ananias, Pakeni nTopanggeni Pesomba. Bo nituduna tona ri sinjori i Paulus mombasapa sumba i Paulus.

³Nanguli i Paulus ka i Ananias, “Komiu mboto kana rasapa nu Alatala! Komiu aga nabelo ri sumba. Komiu nonturo ri situ mombatangara yaku nantuntuni Atura-atura agama anu nipapola Nabi Musa, tano komiu mboto nombaliunaka Atura-atura haitu apa nitudumi tona mombasapa yaku.”

⁴Tona ri sinjori i Paulus nanguli ka ia, “Iko nombasalai Pakeni nTopanggeni Pesomba anu nipelisi nu Alatala!”

⁵Nesana Paulus, “O, sampesuvu pura-pura, ledo nisaniku iamo Pakeni nTopanggeni Pesomba. Ane nisaniku, ledo kuuli tesa pangane, sabana riaru Buku Gasa nitulisi ivei: ‘Nee mombasalai pakeni ntodeamu!’ “

⁶Nipeinta i Paulus naria toSaduki, bo toFarisi riaru Polibu Mbaso Agama haitu. Jadi, niulinamo ka ira pura-pura, “Sampesuvu-sampesuvu! Yaku hii toFarisi muni bo muli ntoFarisi! Yaku nitangara ri sii sabana yaku nomparasaya tona namate mpuu-mpuu matuvu mpanjili!”

⁷Nangepe haitu, toFarisi bo toSaduki ri sia nosinggarau mbotomo, sampe Polibu haitu natebagi randua libu.

⁸Haitu najadi sabana nantuntuni panggava ntoSaduki, tona namate ledo matuvu mpanjili. Pangulira muni ledo naria malaeka nTupu, bo ledo muni naria nyawa nu manusia. Tapi toFarisi niparasayara pura.

⁹Jadi nadaa mpuumo kagado. Neangga bara sako-ndua toFarisi anu najadi guru agama bo ira mpuu-mpuu nombabali tesa ntoSaduki. Niulira, “Ane panggava kami, i Paulus hitu ledo ntoto naria salana, nau aga sakide. Bara naria anitu bara malaeka nTupu notesa ka ia.”

¹⁰Posinggarau haitu mpuu-mpuu nakanano, sampe tadulako naeka mbelaka raposibitesi ntodea i Paulus. Sia sampe nituduna tantarana mangala i Paulus lako ri tatanga ntodea haitu bo nanggeni ia hau ri asrama tantara.

¹¹Kamaile bongina, i Pue Yesus neangga ri sinjori i Paulus bo nanguli, “Pakaroo raramu. Nipatolelemumo tesaKu ri ngata Yerusalem, ivesia muni tesaKu kana mupatolele ri ngata Roma!”

¹²⁻¹³Naeo mpadondo, nelabi patapulu toYahudi nonia mompatesi i Paulus. Ira pura-pura nosumpa ane dopame rapatesira i Paulus, dopa mangande, dopa manginu.

¹⁴Hau ira ri ngayo balengga-balengga ntopanggeni pesomba bo totua-totua ntoYahudi bo nanguli, “Kami hii nosumpa puramo, kami dopa mangande dopa manginu, ane dopa rapatesi kami i Paulus!”

¹⁵Jadi, kami merapi komiu bo toPolibu ntanina mompakatu sura ka tadulako Magau Mbaso, merapi ala i Paulus rakeni mpanjili mantingayo Polibu Mbaso Agama Yahudi. Ulika ia da nariapa bara sako-ngaya rapekutanamiu nte i Paulus. Bo kami masadia mompatesi ia ri dala, dopame ia makava ri sii.”

¹⁶Tapi naria saito kabilasa, pinoana i Paulus, nangepe niara haitu. Hau ia ri asrama tantara bo nitesana nia ntona haitu ka i Paulus.

¹⁷Naupu nangepe tesa nu pinoanana, i Paulus nompokio saito balengga ntantara bo nanguli ka ia, “Keni kabilasa hitu hau ri ngayo nu tadulako. Naria anu ratesana ka ia.”

¹⁸Balengga ntantara haitu nanggeni kabilasa hau ri ngayo nu tadulako bo nanguli, “I Paulus anu nitarunggu, nerapi yaku manggeni ngana hitu ri ngayomiu, apa naria anu ratesana ka komiu.”

¹⁹Tadulako haitu nombanini kabilasa haitu hau motesa ri santanina ala ledo raepe ntona. Nipekutanana, “Nuapa mutesa ka yaku?”

²⁰Nesanamo kabilasa haitu, “ToYahudi nasintuvu merapi komiu manggeni i Paulus mantingayo Polibu Mbaso Agama maile. Raulira da nariapa bara sako-ngaya rapekutanara nte i Paulus.

²¹Tapi kuperapi nte komiu, nee mpuu rapoiyomiu perapira haitu. Apa nelabi patapulu ira nasadiamo mombalava i Paulus ri dala. Ira pura-pura nosumpa ledo mangande bo ledo manginu ane dopa rapatesira i Paulus. Nasadiamo ira. Ira damo nompopea pesanamiu.”

²²Nangepe haitu, tadulako nanguli, “Nee muuli ka isema-sema nipopaisanimumo nia haitu ka yaku.” Bo nituduna kabilasa haitu manjili.

²³Naupu haitu, tadulako nompokio randua tantarana, bo nanguli ka ira, “Pakasadiamo roatu tantara biasa bo pitupulu tantara mesavi jara, bo roatu tantara motavala. Bongina hitu tinti sasio, komiu kana malai lako ri sii hau ri ngata Kaisarea.

²⁴Pakasadia muni jara rapesavi i Paulus. Kenimo ia bo jagaimo ia pakabelo-belo sampe makava ri ngayo Gubernur Feliks.”

²⁵Naupu sia, tadulako notulisi sura ka i Feliks ivei:

²⁶“Gubernur Feliks nibilaku. Tabe lako nte yaku i Klaudius Lisias.

²⁷I Paulus hitu nisaka ntoYahudi bo sakidepa nipatesiramo. Niepeku ia todea Magau Mbaso Roma, jadi nikeniku salunu tantara nompakasalama ia.

²⁸Naupu haitu nikeniku ia hau ri Polibu Mbaso Agamara, sabana yaku madota mangisani nuapa ntoto salana nipangadukara.

²⁹Ri sia, niepeku pangaduara aga nosinggambela ante atura-atura agamara mboto. Ledo ria salana anu masipato ratarunggu atau rahuku mate ka ia.

³⁰Naupu haitu, niepeku naria nia ntoYahudi mompatesi ia. Jadi kaliu-liu nituduku ia rakeni tou ri ngayomiu. Nituduku muni pura-pura topompangadu ia, kana tou manggeni pangaduara ri ngayomiu.”

³¹Naupu tadulako notulisi sura haitu, tantara-tantarana nangoseaka anu niparentana ka ira. Nialara i Paulus bo nikenira ia nalai bongina haitu sampe nakava ri ngata Antipatris.

³²Naeo mpadondo, pataatu tantara nolipa nggadamo nanjili, bo tantara nojara napolamo nanggeni i Paulus hau ri ngata Kaisarea.

³³Nakavapa hamai, tantara nojara haitu nombadekei sura nu tadulakora ka gubernur, bo nidekeira munimo i Paulus ka ia.

³⁴Naupu Gubernur Feliks nombaca sura haitu, nipekutanana i Paulus, “Ri umba ngatamu?” Nesana i Paulus, “Yaku toKilikia.” Nisani gubernurpa i Paulus lako ri propinsi Kilikia, anu nambela bagia niparentana,

³⁵niulinamo, “Nabelomo. Kuparesa parakaramu, ane makava topangadu ri sii.” Jadi nituduna tantara mombajagai i Paulus ri banua mbaso nipovia i Herodes bara ipia.

Suro-Suro 24

¹Lima-mbongi kaliuna, Pakeni nTopanggeni Pesomba nosanga i Ananias ante bara sako-ndua pakeni-pakeni ntoYahudi, notua hau ri ngata Kaisarea. Nikenira muni saito tona napande notesa nosanga i Tertulus. Ira nantingayo Gubernur Feliks, bo nipangaduramo sala i Paulus.

²I Paulus nipokio mantingayo Gubernur Feliks, bo i Tertulus nompangadu i Paulus ivei: “Gubernur nibilaku. Kami todea riara pomparentamiu natuvu nasana. Lako ri kanotomiu nomparenta, nadeamo nipakabelo ri ngata kami.

³Pura-pura panggaviamiu anu nompakabelo ngata kami hitu, nitarima kami nte damba rara. Ledo nabasa-basa kami manguli tarima kasi.

⁴Pua, kami ledo madota masae gaga. Tapi nisani ntonamo kabelo raramiu, sampe kami merapi nte komiu ala raepemiu sampalai pangadua kami hitu.

⁵Nikita kami i Paulus tuu topegado nadaa ntoto. Nipakagadona toYahudi ri umba-umba ngata. Ia muni pakeni ntona nangoseaka pepatuduki i Yesus toNazaret.

⁶Ledo aga haitu, tapi ia madota mompakaruto Banua nu Alatala. Haitumo sampe nisaka kamimo. [Patuju kami mombatangara ia mantuntuni atura-atura agama kami mboto.

⁷Tapi Tadulako Lisias nangago ia lako nte kami,

⁸bo niparentana ala pura-pura topangadu kana mantingayo komiu.] Jadi, Gubernur nibilaku, ane raparesamiu tona tutu, tantu rasanimiu lako ri tesana mbotomo, pangadua kami hitu nakana.”

⁹ToYahudi ntanina ri sia nompangadu i Paulus muni, bo niulira tesa i Tertulus nakana mpuu.

¹⁰Naupu haitu, gubernur haitu nombalaeraka palena ka i Paulus ala ia mesana. Jadi i Paulus nanguli, “Gubernur nibilaku. Pua, nadamba raraku mombasaliku karoku ri sii ri ngayomiu, apa nisaniku komiu nompae-mpaemo najadi topotangara ri ngata hitu.

¹¹Mamala rapekutanamiu mboto nte tona, aga sapulu rombongan kaliuna yaku nantende hau ri ngata Yerusalem hau metupu ri Banua nu Alatala.

¹²Ledo sanggania toYahudi gahaitu nanggava yaku nosinjanai, bara nompakagado todea ri Banua nu Alatala, bara ri banua-banua petupu, bara ri ngata.

- ¹³Ledo muni namala ira mompopakita ka komiu pangaduara haitu nakana.
- ¹⁴Tapi yaku kana mompangaku ri ngayomiu, yaku netupu nte Alatala nantuntuni pepatuduki i Yesus. Panguli ntoYahudi gahitu, pepatuduki haitu nasala. Tapi yaku bate-batena netupu nte Alatala anu nisomba ntotua kami nggaulu, bo nomparasaya pura-pura anu nitulisi riara Buku Atura Agama bo Buku Nabi-nabi.
- ¹⁵Yaku nasimbayu ante toYahudi gahitu, yaku muni nanjarumaka Alatala mompakatuvu pura-pura tona lako ri kamatera, tona nanao bo muni tona nadaa.
- ¹⁶Haitumo sabana yaku nasaro nompasimbuku mokainggu nabelo ala ledo maria nuapa-nuapa nipoviaku masala ri panggita nu Alatala bara ri panggita nu manusia.
- ¹⁷Nasaemo yaku nompalaisi ngata Yerusalem. Tapi dopa nasae hitu, yaku nanjili hau ri ngata Yerusalem nanggeni doi petulungi ka tona napakasi ri sia, bo muni yaku madota mombadekei pesombaku ka Alatala.
- ¹⁸Tempo yaku da naria ri Banua nu Alatala nanggeni pesombaku nompakaupu ada pompakagasa karoku, naria bara sako-ndua toYahudi lako ri propinsi Asia nanggava yaku. Ledo naria todea nosanggani-nggani ante yaku, bo ledo muni naria kagado tempo haitu.
- ¹⁹Kakanana ira lako ri Asia kana maria muni ri sii mompangadu yaku ri ngayomiu ane maria mpuu pangaduara ka yaku.
- ²⁰Tapi ira ledo ria ri sii, jadi aginamo tona ri sii anu nompangadu yaku, manguli pakalanto sala nuapa nikavara tempo yaku naria ri ngayo Polibu Mbaso Agama Yahudi.
- ²¹Ledo naria sala nikavara, aga sambela tesa niuliku ri ngayora anu ledo nipokonora, ivei: ‘Yaku nitangara eo hitu, sabana yaku nomparasaya tona namate kana matuvu mpanjili.’ “

²²Jadi Gubernur Feliks nompopenonto polibu haitu apa nisanina mami pepatuduki i Yesus. Niulina, “Kupakaupu parakara hitu ane mariamo Tadulako Lisias ri sii.”

²³Naupu haitu niparentana balengga ntantara ala i Paulus batena rajagai. Tapi nau nijagai, ledo nitarunggu ntoto apa nidekeira ia nolipa-lipa sakide bo ledo nitagi roana nakava mantulungi ia.

²⁴Bara sako-mbongi kaliuna, nanjilimo Gubernur Feliks nosangani-nggani ante bereina nosanga i Drusila. I Drusila mai, toYahudi. I Feliks nantudu tona hau mangala i Paulus rakeni ri ngayona ala raepena i Paulus nombatentei pomparasayana i Yesus Kristus.

²⁵I Paulus nanguli pokaingguta kana manoa, bo kita ledo mamala mangoseaka dota rarata nadaa, apa makava Eo Potangara ngena tempo Alatala mombatangara pura-pura manusia. Nangepe tesa i Paulus, naeka mpuumo i Feliks. Nanguli ia, “Ivesiamo ruru. Ane maria loga damo kupokio pade motesa vai kita.”

²⁶Kakanana nisarumaka i Feliksmo i Paulus mombadekei doi ka ia ala ia rakabasaka. Haitu sabana i Paulus nasaro nipokio i Feliks motesa-tesa ante ia.

²⁷Rompae kaliuna, i Feliks nisambe, bo i Perkius Festus najadi gubernur ri bagia haitu. Tempo nolinja i Feliks, ia madota mangala rara ntoYahudi, jadi nipalambanamo i Paulus riara ntarunggu.

Suro-Suro 25

¹Naliu katalu-mbongina i Festus nakava ri bagia haitu, nantendemo ia lako ri ngata Kaisarea hau ri ngata Yerusalem.

²Nakava sumai, balengga-balengga ntopanggeni pesomba bo pakeni-pakeni ntoYahudi nakava nte ia mombatesa parakara i Paulus ka ia. Ira mpuu-mpuu nerapi nte i Festus,

³ala lako ri kabelo rarana, ratuduna ala i Paulus rakeni tumai ri ngata Yerusalem. Tano mai, patujura mombalava i Paulus ri dala bo mompatesi ia.

⁴Tapi i Festus nesana, “I Paulus da nijagai ri ngata Kaisarea, bo yaku mboto domo masae manjili hau.

⁵Jadi, aginamo bara sako-ndua komiu anu naria nturomiu, motua mosangganingani ante yaku hau ri ngata Kaisarea. Ane maria mpuu sala i Paulus, hamai pade kuepe pangaduamiu.”

⁶Dopa nasae i Festus nakava ri ngata Yerusalem, nitasere valu-mbongi bara sapulu-mbongi kasaena, nanjilimo ia hau ri ngata Kaisarea. Nakava sumai, kmailena nesuamo ia ri banua potangara bo nituduna tona manggeni i Paulus mantingayo ia.

⁷Nakavapa i Paulus, toYahudi anu notua lako ri ngata Yerusalem pangane, neangga nombatiku ia bo nompangadu ia ka i Festus. Mpengaya-ngaya kasala bo kadaa nipangadukara. Tapi aga nikara-karara nggoo, ledo ria katantuna nuapa sala i Paulus.

⁸Naupu ira nompangadu ia ivesia, i Paulus nanjaliku karon. Niulina, “Yaku hii ledo novia anu nadaa. Yaku ledo nombaliunaka Atura-atura agama Yahudi, bo ledo muni nompakaruto Banua nu Alatala. Ledo muni niliunakaku parenta Magau Mbaso.”

⁹Tapi i Festus madota mangala rara ntoYahudi, jadi nipekutanana nte i Paulus, “Madota iko hau ri ngata Yerusalem ala anu nipangadukara iko hitu ratangara ri ngayoku hamai?”

¹⁰Nesana i Paulus, “Pua, ledo madota yaku, sabana hitu-hitu yaku neangga ri ngayomiu, apa komiu topotangara anu nipakatantu Magau Mbaso Roma mboto, bo ri siimo yaku masipato ratangara. Pua, nisanimiu mbotomo ledo naria salaku nte toYahudi.

¹¹Ane rapana mpuu-mpuu niliunakaku atura-atura bara nipoviaku anu masipato rahuku mate ka yaku, nasadiamo yaku mamate! Tapi pangaduara hitu ledo nakana, jadi ledo naria saitoa mamala mombadekei yaku ka ira. Yaku mekitangara ri ngayo Magau Mbaso!”

¹²Jadi naupu i Festus nosimpotesa ante roa-roana anu nangisani atura-atura negara, niulina ka i Paulus, “Iko nekitangara ri ngayo Magau Mbaso ri ngata Roma. Jadi iko kana hau mantingayo Magau Mbaso!”

¹³Ledo nasae kaliuna haitu, nakavamo Magau Agripa ante i Bernike ri ngata Kaisarea mosisani nte i Festus sabana ia dako nilanti najadi gubernur.

¹⁴Naliu bara sako-mbongi ira ri sia, i Festus nombatesa parakara i Paulus ka Magau Agripa. Nanguli i Festus, “Ri sii naria saito tona nosanga i Paulus. Ia nipalamba i Feliks riara ntarunggu.

¹⁵Tempo yaku naria ri ngata Yerusalem, balengga ntopanggeni pesomba ante pakeni-pakeni ntoYahudi nompangadu tona haitu. Niperapira yaku mombabotusi pehuku ka ia.

¹⁶Tapi yaku nesana ka ira, ‘Nantuntuni atura kami todea Magau Mbaso, ane tona nipangaduka, ia kana mosintingayo ante tona nompangadu ia, bo radekeika loga manjaliku karon. Ane dopa rapovia ivesia, dopa mamala ia rahuku.’

¹⁷Jadi tempo tona nompangadu i Paulus nakava ri sii, ledo nipopeaku pakasae. Kamailena haitu nipasiromukumo polibu potangara bo niparentaku i Paulus rakeni rapoposintingayo nte tona nompangadu ia.

¹⁸Tempo tona nompangadu ia neangga notesa, nisarumakaku i Paulus mai novia anu nadaa mpuu. Tano, ledo ria kasalana.

¹⁹Ira aga nosisala panggava ka agamara mboto, bo muni ka saito tona nosanga i Yesus. Tona haitu namatemo, tapi i Paulus nanguli Ia natuvu mpanjili.

²⁰Yaku da naingu nompekirika bara berimba yaku mamala mombabotusi parakara haitu, jadi nipekutanaku i Paulus bara madota ia hau ri ngata Yerusalem ala parakarana ratangara hamai.

²¹Tapi i Paulus nekitangara ri ngayo Magau Mbaso. Niperapina ala ia rajagai nu tantara sampe parakarana rabotusi ri ngayo Magau Mbaso. Haitu sabana niparentaku rajagai njuu ia sampe maria logaku mombatudu ia rakeni hau ri ngayo Magau Mbaso.”

²²Nangepe haitu, nangulimo i Agripa ka i Festus, “Yaku muni madota mangepe tona haitu motesa.” Nesana i Festus, “Maile mamala komiu mangepe ia.”

²³Kamailena, nakavamo Magau Agripa bo i Bernike. Ira nitarima ante ada pebila ka magau. Ira nesua riaru banua polibu nosanggani-nggani ante tadulako-tadulako bo tona naria nturona ri ngata haitu. I Festus nompamenta tantarana manggeni i Paulus mesuamo.

²⁴Nakavapa i Paulus, nangulimo i Festus, “Magau Agripa, bo pura-pura tona naria ri sii. Peintamo tona hitu! Pura-pura toYahudi nompangadu ia ri ngayoku, tona lako ri ngata Yerusalem, bo tona naria ri sii ri Kaisarea. Ira nongare-ngare nanguli ia masipato rahuku mate.

²⁵Tapi niparesakumo ia, ledo naria sangayaa salana nikavaku sampe masipato rahuku mate ka ia. Kaupuna, ia mboto nekitangara ri ngayo Magau Mbaso ri ngata Roma. Sabana haitu, nipakatantukumo ia kana rakeni hau ri ngayo Magau Mbaso.

²⁶Aga dopa nisaniku nuapa kutulisi ka Magau Mbaso, apa dopa ria katantuna kasalana. Haitumo sabana yaku nompopositingayo ia nte komiu pura-pura, nelabipa komiu, Magau Agripa nibilaku. Patujuku, ane maupu ia raparesata ri sii, kana mariamo anu mamala kutulisi ka Magau Mbaso.

²⁷Nantuntuni panggavaku, ledo masipato tona rakeni ri ngayo Magau ane ledo natantu salana nipangaduka ntona.”

Suro-Suro 26

¹Magau Agripa nanguli ka i Paulus, “Iko radekei loga motesa manjaliku karomu.” Jadi i Paulus nolaeraka palena, bo notesa nombasaliku karonu ivei:

²“Magau Agripa nibilaku. Nirasaiku nauntu mpuu yaku namala manjaliku karoku ri ngayomiu manguli pura-pura pangadu ntoYahudi ka yaku.

³Nelabipa sabana komiu mpuu-mpuu nangisani pura-pura ada bo pepatuduki nipoposisala kami toYahudi. Sabana haitu, yaku merapi mpuu-mpuu nte komiu, mosabara mangepe tesaku hitu.

⁴Nisani ntoYahudi pura-pura dala nggatuvuku lako ri pantepuuna. Lako ri kakodiku yaku nonturo ri tatangara ri ngata Yerusalem.

⁵Nasaemo nisanira yaku. Ane rapodotara, ira mboto mamala majadi sabi katuvuku hitu. Nompamula lako ri pantepuuna, nioseakaku pepatuduki ntoFarisi, anu mpuu-mpuu natutu nangoseaka pura-pura atura agama kami ntoYahudi.

⁶Sii-sii yaku neangga ri ngayomiu ri sii ratangara, sabana yaku nanjarumaka Alatala mompakadupa pojanjiNa ka totua kami nggaulu.

⁷Kami toYahudi, muli lako ri sapulu randua ana i Israel, nanjarumaka pojanji haitu rapakadupa nu Alatala. Haitumo sampe kami ledo nabasa-basa eo bongi netupu nte Alatala. O Magau nibilaku! Yaku nipangadu ntoYahudi sabana yaku nomparasaya pojanji haitu, nasimbayu nte ira!

⁸Nakuya sampesuvuku toYahudi ledo nompakule nomparasaya Alatala mompakatuvu mpanjili tona namate?

⁹Ivesia muni yaku bara ipia. Nisarumakaku kana kupasimbuku mangeva tona nomparasaya i Yesus toNazaret.

¹⁰Bo nipoviaku mami ivesia ri ngata Yerusalem. Balengga-balengga ntopanggeni pesomba nombadekei sura kuasa ka yaku bo nadea todea nu Alatala nisuarakaku riarar ntarunggu. Ledo aga haitu, ane ira nihuku mate, nadamba raraku.

¹¹Nadea ngganimo yaku nompandasa ira riarar banua petupu. Nipasimbukuku nobarusu ira ala domo raoseakara i Yesus. Nagigi mpuu raraku nompekirika ira sampe yaku hau nangelo ira ri ngata-ngata nakavao.”

¹²“Ivesia muni patujuku hau ri ngata Damsyik ante sura kuasa lako ri balengga-balengga ntopanggeni pesomba.

¹³Magau nibilaku! Tempo yaku da ri dala, nitasere tanga eo, nikitaku reme lako ri langi naremepa pade pevanta nu eo. Reme haitu nombavanta yaku ante roa-roaku sampolipa.

¹⁴Kami pura-pura nadungga ri tana, bo niepeku suara nanguli ante basa Ibrani ivei: ‘Saulus, Saulus! Nakuya iko nompandasa Yaku? Iko aga mompakasusa karomu mboto ane batena mueva pekeniaka nTupumu!’

¹⁵Nesana yaku, ‘Isema komiu, Pua?’ Nanguli vaimo suara haitu, ‘Yakumo hii i Yesus, tona nipandasamu!’

¹⁶Peanggamo! Yaku neonga manganggataka iko majadi batuaKu bo sabiKu. Iko kana mompatolele ka tona ntanina anu nikitamu eo hitu bo anu Kupopakita ka iko ri tempo makava.

¹⁷Ane toYahudi bara tona ledo toYahudi mompakasusa iko, Kukabasaka iko lako ri kuasara. Kutudu iko manggeni TesaKu ka tona ledo toYahudi.

¹⁸Kutudu iko hau mombabuka matara, ala ira domo matuvu ri kalandana tapi matuvu riaru reme nu Alatala, ala ira rakabasaka lako ri kuasa Magau nu Seta bo matundu nte Alatala. Bo dosa-dosara raampungu bo ira majadi todea nu Alatala anu nipelisiNa, sabana pomparasayara Yaku.’ “

¹⁹“Magau Agripa, haitu sabana yaku hii batena nangoseaka anu nipopakita nu Alatala ka yaku.

²⁰Yaku nompatolele ka pura-pura tona, kita kana majea lako ri dosa-dosata bo mombadekei katuvuta ka Alatala. Ane kita mpuu-mpuu majea lako ri dosa-dosata haitu, kana rapopakitamo ante pokainggu mabelo. Pamula-mulana nipatoleleku kareba haitu ka toYahudi ri ngata Damsyik, pade hau ri ngata Yerusalem bo njumangu bagia Yudea. Bo nitesaku muni ka tona ledo toYahudi.

²¹Haitumo sabana toYahudi nombasaka yaku riaru Banua nu Alatala bo nompasimbuku mompatesi yaku.

²²Tapi sampe sii-sii yaku da nisaliku nu Alatala sampe da namalapa yaku neangga nosabi ka pura-pura tona, tona nalanga panggana bo todea biasa. Anu nitesaku hitu ledo nosisala ante anu niboto i Musa bo nabi-nabi ntanina nggaulu,

²³haitumo, Magau Topepakasalama anu nijanji nu Alatala, kana mombarasai susa bo mamate. Ia kana majadi tona paratama anu namate bo natuvu mpanjili

ala rakeniNa reme ka pura-pura manusia, ka toYahudi bo tona ledo toYahudi, ala rasanira berimbana Alatala mompakasalama manusia.”

²⁴Da notesa i Paulus nanjaliku karon, nongaremo Gubernur Festus, “Nabayamo iko, Paulus! Pangisanimu nadea tutu nompakabaya iko!”

²⁵Tapi nesanamo i Paulus, “Yaku hii ledo nabaya. Tesa-tesa niuliku hitu nakana bo nesuvu lako ri pekiriku nanoto.

²⁶Nisani Magau Agripa mboto anu nitesaku pangane. Haitu sampe yaku ledo naeka notesa ivesia ri ngayona. Nisaniku ledo ria nuapa-nuapa dopa nisanina apa kajadia haitu ledo nitabuniaka.”

²⁷Pade niuli i Paulus ka magau, “Magau Agripa nibilaku, ledo niparasayamiu anu niuli nabi-nabi nggaulu? Nisaniku niparasayamiu muni!”

²⁸Nanguli Magau Agripa ka i Paulus, “Nisarumakamu yaku hii mamala kaliu-liu mupajadi toKristen?”

²⁹Nesanamo i Paulus, “Bara masae bara ledo, kuperapi nte Alatala ala komiu bo gubernur, bo pura-pura tona nangepe tesaku eo hitu, majadi toKristen nasimbayu mpo yaku. Aga ledo nirante mpo yaku.”

³⁰Kaupuna neanggamo Magau Agripa bo gubernur bo i Bernike bo pura-pura tona ntanina nomporea ira, bo nesuvumo lako ri polibu haitu.

³¹Dopame nesuvu, nosiulikamo ira, “Ledo ria nuapa-nuapa nipovia ntona haitu anu masipato rahuku mateka atau ratarunggu ka ia.”

³²Nanguli Magau Agripa ka Gubernur Festus, “Ane rapana tona haitu ledo nekitangara ri ngayo nu Magau Mbaso, mamala rakabasakata.”

Suro-Suro 27

¹Naupu haitu Gubernur Festus nompakatantu i Paulus bo kami anu nomporea ia, kana mesavi kapala ntasi hau ri ngata Roma ri propinsi Italia. Jadi i Paulus ante bara sako-ndua tona ntanina anu nitavani, niparasayaka i Yulius, saito balengga ntantara lako ri tantara-tantara Magau Mbaso.

²Kami nesavi kapala mbaso anu nakava lako ri ngata Adramitium. Kami nesavi lako ri ngata Kaisarea ante patuju mesai ri pesampo-pesampo ri talinti propinsi Asia. Naria muni saitopa tona nomporea kami, haitumo i Aristarkhus lako ri ngata Tesalonika ri propinsi Makedonia.

³Kamailena haitu, kapala kami nesampo ri ngata Sidon. I Yulius nabelo mpuu nte i Paulus, sampe nidekeina i Paulus hau nanggita roa-roana ri ngata Sidon ala mamala radekeira ka ia bara nuapa raparaluuna.

⁴Lako ri sia kami nompapola polipa kami. Tapi kapala kami nosintomuka poiri, jadi kami nomparinjoso ri bivi ntalinti levuto Siprus anu natelendu sakide lako ri poiri haitu.

⁵Kami nokapala ri tasi luo anu napara propinsi Kilikia bo Pamfilia, sampe nakava ri ngata Mira ri propinsi Likia.

⁶Ri ngata Mira, i Yulius nanggava kapala mbaso anu nakava lako ri ngata Aleksandria hau ri propinsi Italia. Jadi nituduna kami molinja ri kapala haitu.

⁷Bara sako-mbongipa kasaena, kapala haitu aga nompante nolipa. Nandasa mpuu kami. Nasae pade nakava ri pesampo Knidus. Lako ri sia, domo nipakule kami nompapola polipa kami nantuntuni nia pamulana, sabana peburu mpoiri dopa nabelo. Jadi kapala kami nombaliunaka Uju Salmone hau nomparinjoso ri bivi ntalinti levuto Kreta ri bagia puluna, ala ledo mambela poiri narimboso gaga.

⁸Nasusa mpuu kami nomparinjoso ri bivi ntalinti ri sabingga puluna lako ri levuto Kreta. Kaupuna nakavamo kami ri pesampo kodi nosanga Pesampo Nagaya, napara ngata Lasea.

⁹Naulia mpuu kapala kami, sampe naliumo eo mbaso puasa ntoYahudi nikava kami. Tempona haitu domo mamala rapolipaka mokapala sabana tempo mpoiri. Jadi i Paulus nompopatora ira riara kapala,

¹⁰“Sampesuvu-sampesuvu, nantuntuni panggavaku, ane kita mompapola polipata hitu, kana mandasa mpuu kita ngena. Kana marugi kita, ledo aga pangulaya kapala hitu, tapi kita muni mamate!”

¹¹Tapi i Yulius ledo nipangalana tesa i Paulus, nipangalanapa tesa ntopompajala kapala bo tupu nu kapala pade tesa i Paulus.

¹²Pesampo Nagaya haitu ledo mami nabelo rapesampo masae ri tempo mpoi. Sabana haitu, deanapa topesavi kapala kami nanguli, “Agina malai kita lako ri pesampo hitu bo rapasimbukuta mapola hau ri pesampo Feniks bo mesampo hamai sampe maupu tempo mpoi.” Ngata Feniks haitu pesampo ri levuto Kreta anu natelendu lako ri poiri ri tempo mpoi, sabana notingayo bagia tasi mpanau.

¹³Tempona haitu, nompamula naole-olemo poiri neburu lako ri puluna. Haitu sampe nisarumaka nu anabua kapala da mamala kami mapola hau ri pesampo Feniks. Jadi nianggatakaramo talonto kapala, bo kapala nolipa nomparinjoso ri talinti levuto Kreta.

¹⁴Tapi ledo nasae lako rahaitu, nakavamo poiri narimboso lako ri levuto Kreta, anu niuli ntona “Poiri Mbaso lako ri tasi mpandake”.

¹⁵Kapala kami nirumpa mpoi rimbosu bo domo nompakule nantingayosi poiri. Jadi nipalamba kamimo kapala naave niken mpoi.

¹⁶Tempo kami naave niken mpoi, nalendumo sakide poiri tempo kami noliu sabingga puluna lako ri sangu levuto kodi nosanga Kauda. Tempo haitu nandasa mpuu kami nompasimbuku nombataja mangore sakaya kodi riara nu kapala mbaso. Sakaya kodi haitu biasa nitaja ri puri nu kapala.

¹⁷Namalapa sakaya kodi nianggataka bo niboli riara nu kapala mbaso, ana-anabua kapala nompou ntiku karo nu kapala mbaso ante kaloro ala maroso. Naupu haitu nipopanauramo somba nu kapala, ala ledo magasi ntoto polipana, sabana ira naeka kapala mombarumpa bone anu nasore napara talinti tana Libia. Jadi ivesiamo kapala kami nipalambara niken mpoi.

¹⁸Ledo nenonto poiri narimboso haitu nombaburu kapala kami, sampe naeo mpadondo saggaa pangulaya kapala nitedeakara rantasi ala mangaa sakide kapala ala ledo malodo.

¹⁹Kamailenapa nitedeakaramo pareva-pareva nu kapala rara ntasi.

²⁰Bara sako-mbongi kasaena, ledo nikita kami eo bara betue, bo poiri muni ledo naole-ole neburu. Kaupuna domo ria panjarumaka kami matuvu!

²¹Bara sako-mbongi kasaena, tona riaru kapala haitu ledo nangande. Jadi neangamo i Paulus ri tatangara bo nanguli, “Sampesuvu-sampesuvu! Ane nioseakamiu tesaku bara ipia nanguli nee rapalaikata levuto Kreta, ledo mandasa kita bo ledo marugi ivehitu!

²²Tapi sii-sii kuperapi nte komiu pakaroso raramiu! Ledo ria saitoa kita mamate ngena, tapi kapala hitu tantu marugi.

²³Nisaniku haitu sabana ibongi Alatala anu nisombaku bo anu nombajagai yaku, nantudu malaekaNa tumai nte yaku. Malaeka haitu nanguli,

²⁴‘Nee maeka, Paulus! Iko kana mapola mantingayo Magau Mbaso. Lako ri kabelo nu Alatala nte iko, pura-pura tona nosanggani-nggani ante iko ri kapala hitu masalama pura.’

²⁵Jadi sampesuvu-sampesuvu, pakaroso raramiu, sabana yaku nomparasaya Alatala, anu niuliNa ka yaku natantumo majadi!

²⁶Tapi kapalata hitu magero ngena mombarumpa levuto.”

²⁷Nagana kasapulu pata-mbongina kapala kami niburu mpoiri hau tumai ri Tasi Adria, nitasere natanga bongina, anabua kapala nombarasai kapala domo nakavao lako ri kabatana.

²⁸Sabana haitu, niukurura kandala nu tasi ante vatu nipantoesi, ropulu ndapa kandala nu uve. Ira noenju hauna sakidepa, bo niukurura vaimo, sapulu alima ndapapa kandala nu tasi.

²⁹Naupu haitu niulurakara ampa talonto lako ri bagia puri nu kapala ala mompopetaa kapala, apa ira naeka kapala kami mombarumpa vatu oti. Ira nosambaya, nerapi masalisa maeo.

³⁰Tapi bara sako-ndua anabua nu kapala haitu nompasimbuku malai nggalino. Niulira raulurakara talonto lako ri kolu nu kapala, tano sakaya kodi niulurakara hau rara ntasi rapesavira malai.

³¹Nanggita poviara haitu, i Paulus nanguli ka i Yulius bo tantara-tantarana, “Ane malai ana-anabua kapala hitu, ledo maria tona matau mompajala kapala, bo ledo ntoto maria kita masalama!”

³²Nangepe tesa i Paulus, tantara-tantara nopudusi kaloro sakaya kodi bo nipalambara sakaya kodi haitu maave, ala anabua kapala domo mamala malai lako ri kapala mbaso.

³³Napara naeo, nitudu i Paulusmo pura-pura tona mangande. Niulina, “Sapulu pata-mbongimo kasaena komiu aga nompopoa-pea, ledo nangande nuapa-nuapa!”

³⁴Sabana haitu, kuuli ka komiu, kana mangande nau aga sakide, ala maroso mpanjili komiu bo mamala masalama lako ri kasusa hitu. Kita pura-pura masalama ngena, ledo makuya kita. Ledo ria buluata maronto, nau aga sambesa, ledo pura.”

³⁵Naupu notesa ivesia, nialanamo roti bo niulina tarima kasi ka Alatala ri ngayora pura-pura. Nitubi-tubina roti haitu, bo nangandemo ia.

³⁶Jadi naroso mpanjili rarara, bo nangande munimo ira.

³⁷Kadea kami pura-pura riaru kapala haitu, roatu pitupulu bo aono.

³⁸Naupu nangande sampe nabosu puramo, gando niken kapala haitu nitedakara rara ntasimo ala mangaa sakide kapala.

³⁹Naeopa, topompajala kapala haitu nanggita kabatana tapi ledo nisanira kabatana mbana haitu. Nikitara sangu sidu nu tasi ante talintina. Patujura ala kapala haitu rapopesampora ri talinti haitu.

⁴⁰Naupu sia, nipudusira kaloro-kaloro nu talonto bo talonto haitu nipalambaramo naboli nalonju rantasi. Nivolera kaloro-kaloro pompou guli ala kapala mamala raguli. Niorera somba ri kolu nu kapala ala piori mombaburu kapala hau ri talinti.

⁴¹Tapi dopame nakava ri talinti, norumpa bone nobunti riaru ntasimo kapala kami. Bagia kolu nu kapala nesua riaru bone sampe kapala domo namala molipa, bo bagia ri puri nu kapala narupusaka nirumpa nu balumba mbaso.

⁴²Netaapa kapala haitu, tantara-tantara madota mompatesi pura-pura tona nitavani ala ledo ria saitoa morabu hau ri kabatana bo malai.

⁴³Tapi i Yulius nantagi ira, sabana ia madota mompakasalama i Paulus. Nituduna pura-pura tona natau norabu mokolu motingganavu rara ntasi morabu hau ri kabatana.

⁴⁴Tona ntanina metuntuni mombasaka dopi bo kayu bingga-bingga nu kapala. Ivesiamo kami pura-pura nasalama nesore ri kabatana.

Suro-Suro 28

¹Nasalama puramo kami nesore ri kabatana, pade nisani kami levuto haitu nosanga Malta.

²Tona nonturo ri levuto haitu najole mpuu nte kami. Nikadambanakara kami pura-pura ante belo bo nipanakira apu rapanderu kami, sabana naranindi bo nompamulamo nauda.

³I Paulus hau nompasiromu tinggu-tinggu kayu bo nidikana ri apu. Da nompadumpu apu, nesuvumo sanggayu ule mpolari lako ri kayu sabana kapane nu apu, bo ule haitu nanteo pale i Paulus.

⁴Nikita ntupu ngata ule haitu noloe ri pale i Paulus, nisarumakara i Paulus mamate. Nosimpotesamo ira, “Natantumono tona moitu topepatesi, apa nau ia nasalamamo lako ri tasi, Viata Topotangara ledo mompalamba ia matuvu.”

⁵Tapi i Paulus aga novebataka ule haitu hau ri mata nu apu, bo ledo ntoto nirasaina duana.

⁶Nisarumaka ntupu ngata haitu bara mebangga pale i Paulus, bara sampesanika ia madungga bo mamate. Tapi nasaemo nipopeara, ledo nakuya-kuya i Paulus. Nanggita haitu pekirira nabali, bo nisarumakara i Paulus haitu viatamo.

⁷Ledo nakavao lako ri sia, naria tana i Publius. Ia gubernur levuto Malta. Nitarimana ante damba rara kami bo talu-mbongi kasaena kami nonturo ri banuana.

⁸Tempo haitu, tuama i Publius kambale-mbale naturu apa nakokora bo nabunjoro. Jadi i Paulus hau nesua nte ia, nombadika palena ri karo ntotua bo nosambaya. Naliu haitu nabelomo totua.

⁹Nangepepa kajadia haitu, pura-pura tona nadua ri levuto haitu nakava nte i Paulus, bo nipakabelona muni ira.

¹⁰Nadea hadia nidekeira ka kami, tandana pobilara kami. Bo bara sakuya kasaena naliutaka haitu tempo kami manggalivo malaimo, pura-pura anu niparaluu riara polipa kami, nikenira hau ri kapala nipesavi kami.

¹¹Talu-mbula kasaena kami nonturo ri levuto Malta, pade nesavi kapala mompapola polipa kami hau ri ngata Roma. Kapala nipesavi kami nakava lako ri ngata Aleksandria bo nesampo ri levuto Malta nompoepa maupu tempo mpoiri. Kapala haitu nosanga “Viata Narapi”.

¹²Nolipamo kapala kami sampe nakava ri ngata Sirakusa, bo naturu ri sia talu-mbongi kasaena.

¹³Lako ri sia kapala kami nomparinjoso ri talinti sampe nakava ri ngata Regium. Kmailena nompamulamo poiri neburu lako ri puluna, bo eo karanduana nakavamo kami ri pesampo Putioli ri propinsi Italia, bo nanaumo kami.

¹⁴Ri sia kami nosintomu ante bara sako-ndua sampesuvu sampomparasaya, bo nikenira kami hau monturo ante ira pitu-mbongi kasaena. Naupu haitu, napolamo kami hau ri ngata Roma.

¹⁵Sampesuvu-sampesuvu sampomparasaya ri ngata Roma nangepe kareba naparamo kami, nakavamo ira mombatomunaka kami ri ngata Potomu Apius bo ri ngata Banua Tatalu. Nosinggavapa kami ante ira, i Paulus nanguli tarima kasi ka Alatala, bo narosomo rarana.

¹⁶Nakavapa kami ri ngata Roma, nidekeimo loga ka i Paulus monturo ri banua mboto ante tantara saito anu mombajagai ia ri sia.

¹⁷Nagana talu-mbongi ri sia, i Paulus nompokio toYahudi anu naria nturona ri sia. Nasiromupa ira, nangulimo i Paulus, “Sampesuvu-sampesuvuku! Yaku ledo novia sala nuapa-nuapa ka sampesuvuta toYahudi bo ledo muni niliunakaku ada nitarimata lako ri totuata nggaulu. Tapi nau ivesia, yaku nisaka ri ngata Yerusalem bo nidekei ka pomarenta Magau Mbaso Roma.

¹⁸Naupu parakaraku niparesara, ira madota mombakabasaka yaku, sabana natantumo ledo ria salaku masipato rahuku mate ka yaku.

¹⁹Tapi naria sanu toYahudi kana nangeva yaku, ledo nipokonora rakabasaka yaku. Ledo ria dala ntanina, jadi yaku nekitangara ri ngayo Magau Mbaso ri ngata Roma. Naupa ivesia, ledo ria pangaduaku nuapa-nuapa ka sampesuvuku toYahudi.

²⁰Jadi haitu sampe yaku nerapi mosintomu ante komiu. Yaku madota mombatesa ka komiu parakaraku hitu. Kakanana yaku hii nibalanggu sabana yaku nomparasaya Magau Topepakasalama anu nitongorakata ntoIsrael pura-pura.”

²¹Nangepe tesa i Paulus, nesanamo toYahudi, “Ledo ria nitarima kami sura lako ri bagia Yudea nombatesa iko. Bo dopa muni naria tona lako rumai nakava nanggeni kareba bara nanguli naria anu nadaa nipoviamu.

²²Tapi kami madota mangepe komiu motesa anu niparasayamiu, sabana nisani kami, ri umba-umba nislai ntona pepatuduki nioseakamiu tutu.”

²³Jadi nipakatantura eo rakasiromura ante i Paulus. Nanggavapa eo niovora, nadea tona nakava nasiromu ri banua i Paulus. Lako ri mpadondona sampe nggoviana i Paulus nombatesa Poparenta nu Alatala ka ira bo nombatentei pepatuduki i Yesus. Nibacana lako ri Buku Atura Agama nitulisi Nabi Musa bo Buku Nabi-nabi ntanina, ala rasanira tesana nakana bo raparasayara i Yesus mpuu-mpuu Magau Topepakasalama.

²⁴Naria tona nomparasaya anu niuli i Paulus, tapi naria muni ledo nomparasaya.

²⁵Kaupuna, nipalaisiramo ponturo haitu apa da nosisalapa panggavara ante pepatuduki i Paulus. Tapi dopame ira nalai, i Paulus nanguli ka ira, “Nakana ntoto Tesa Nosa Gasa nu Alatala anu nipasimbayu Nabi Yesaya ka totuata nggaulu ivei:

²⁶Alatala nanguli, ‘Koi uli ka todea toYahudi ivei: Komiu masaro mangepe, tapi ledo rasanimiu batuana. Komiu masaro manggita, tapi ledo rasanimiu anu najadi.

²⁷Haitu majadi sabana tona gahaitu naka bagara, bo ira netibongomo, bo matara nipiriramo. Ane ledo nipoviara ivehaitu, rakita nu matara anu najadi, bo raepe ntalingara bo rasanira batuana, bo rapahara anu nakana bo manjili nte Yaku ala Kupakabelo ira.’ ” (Yesaya 6:9-10)

²⁸Kaupuna i Paulus nanguli, “Sampesuvu-sampesuvuku. Kareba Belo nanguli berimba Alatala mompakasalama manusia. Jadi [nau ledo ratarimamiu], kana rasanimiu, Kareba Belo haitu nipatolelemo ka tona ledo toYahudi bo iramo mangoseakana.”

²⁹[Naupu i Paulus nanguli tesa-tesa haitu, toYahudi nompalaisi banua haitu nosinjanai-naimo.]

³⁰Rompae kasaena i Paulus nonturo ri ngata Roma ri banua nisioana mboto. Nadea tona nakava nosinggava nte ia bo nadamba rarana nantarima ira pura-pura.

³¹Ledo nakaja rarana nompopaisani ka ira kareba Poparenta nu Alatala bo nipatudukina muni ka ira kareba i Pue Yesus Kristus. Pura-pura anu nipoviana haitu ledo naria nitagi ntona.

Roma

Roma 1

¹Sampesuvu-sampesuvu ri ngata mbaso Roma: Sura hitu lako nte yaku i Paulus, batua i Yesus Kristus. Alatala nompelisi bo nombasuro yaku mompatolele Kareba Belo lako nte Ia.

²Kareba haitu nijanjiNa nggaulu bo nipopaisaniNa ka nabi-nabiNa. Pura-pura haitu nitulisi riaru Buku Gasa.

³⁻⁴Kareba Belo haitu notesaki Ana nu Alatala, haitumo Tuputa Yesus Kristus. I Yesus najadi manusia apa Ia nipoanaka lako ri muli Magau Daud. KagasaNa nasimbayu nte kagasa nu Alatala sabana Ia Ana nu Alatala mami. Nisanita Ia mpuu-mpuu Ana nu Alatala sabana Alatala nompakatuvu Ia mpanjili lako ri kamateNa ante kuasa nipokumaaka.

⁵Alatala nabelo raraNa nte yaku bo yaku nipajadiNa suroNa sabana i Yesus. Yaku niposuroNa mompatolele Kareba Belo ka tona ri umba-umba ri dunia bo manggeniaka ira momparasaya bo matundu nte i Yesus, ala Ia rabila bo rapakaoge

⁶Komiu ri ngata Roma muni nireke todea anu nipokio nu Alatala mangoseaka i Yesus Kristus.

⁷Jadi siamo sampe nitulisiku sura hitu ka komiu pura-pura ri ngata Roma, komiu anu nipotove nu Alatala bo nipokioNa majadi todeaNa. Kuperapi Tuamata Alatala bo i Pue Yesus Kristus mombadekei belo ka komiu bo mompakatinonto raramiu.

⁸I Yesus Kristus mosinggava nte yaku nosukuru nte Tupuku Alatala. Pamulamulana yaku nosukuru sabana lele pomparasayamiu i Yesus niepe ntonamo ri umba-umba ri dunia.

⁹Nisani nu Alatala yaku nasaro nosambaya ka komiu. Yaku batena ante rara mpuu-mpuu nombatui pokarajaa nidekei nu Alatala ka yaku, haitumo mompatolele Kareba nu AnaNa.

- ¹⁰Kuperapi mpuu-mpuu nte Alatala, ane rapodotaNa, rapalogaNa yaku tou mosinggava nte komiu.
- ¹¹Apa naoge mpuu raraku mosinggava nte komiu ala yaku mamala mombabagi pedekei nu Alatala ka komiu, haitumo Nosa Gasa anu mompakaroso pomparasayamiu.
- ¹²Patujuku ala yaku muni rapakaroso sabana pomparasayamiu, jadi kita mpasangani-nggani mosipakaroso rara.
- ¹³Sampesuvu-sampesuvu, kana rasaniamiu nadea ngganimo yaku nonia tou mosinggava nte komiu tapi nasaro natelava sampe sii-sii. Patujuku mosinggava nte komiu ala madea komiu mangoseaka i Pue Yesus nasimbayu mpo anu najadi nte tona ledo toYahudi ri ngata ntanina.
- ¹⁴Yaku madota mosinggava nte komiu sabana kana kupatolele Kareba Belo ka pura-pura tona ri dunia, ledo nipelisiku bara tona ri kota, bara tona ri bulu, bara toposikola bara ledo.
- ¹⁵Haitumo sampe naoge raraku mompatolele Kareba Belo ka komiu toponturo ri ngata Roma muni.
- ¹⁶Ledo naeya matakunompatolele Kareba Belo. Apa Kareba Belo haitu pareva nu Alatala mompakasalama pura-pura tona anu nomparasaya i Yesus, pamulamulana toYahudi, bo muni tona ledo toYahudi.
- ¹⁷Kareba Belo nompopaisani dala ka kita majadi manoa ri panggita nu Alatala, haitumo momparasaya i Yesus. Ledo ria dala ntanina, aga momparasaya lako ri pantepuuna sampe ri kaupuna. Apa nitulisi ri Buku Gasa ivei: “Tona nanao ri panggita nu Alatala matuvu mabelo sabana pomparasayana.”
- ¹⁸Lako ri suruga Alatala nombahuku manusia anu ledo natundu nte Ia bo nokainggu nadaa. Pokainggura nadaa haitu nombalava tona mangisani pepatuduki nakana.
- ¹⁹Nisani nu manusia inggu nu Alatala, sabana Alatala mboto nompopaisanina ka ira.

²⁰Lako ri tempo dunia nipajadi nu Alatala sampe sii-sii, nisani nu manusia kuasaNa ledο naupu-upu bo Ia mpuu-mpuu Alatala. Nau ledο nikitata lenjeNa, nisanita Ia Alatala apa nisanita ingguNa lako ri pura-pura anu nipajadiNa ri dunia. Jadi ledο ria tona mamala manguli “Ledo nisani kami!”

²¹Nisanira Alatala naria bo nisanira Ia masipato rabila, tapi ledο nibilara, bo ledο muni niulira tarima kasi nte Ia. Ira aga nompekirika anu ledο ria gunana. Pekirira nadoyo bo ledο nipahara anu nakana.

²²Pangulira iramo tonoto pekiri, tano aga todoyo!

²³Ira ledο nadota netupu nte Alatala anu batena natuvu bo ledο mamate. Ira aga netupu nte anu nipoviara mboto nolenje mpo manusia, mpo tonji, mpo ule, bo mpo binata ntanina, anu kana mamate.

²⁴Manusia ledο nadota netupu nte Alatala, jadi Alatala nompalamba ira nangoseaka dota rarara mboto bo nokainggu nadaa, sampe posipogaura mpuu-mpuu nepakaeya.

²⁵Ira nombasapuaka pepatuduki nakana anu notesaki inggu nu Alatala. Ira aga nangoseaka pepatuduki nasala. Ira ledο nadota nombasomba bo nangoseaka Alatala Topepajadi, ira aga nombasomba bo nangoseaka anu nipajadiNa. Kakanana aga Alatala Topepajadi masipato ratoiyata sampe ri kasae-saena. Amin.

²⁶Ira ledο nadota netupu nte Alatala, jadi Alatala nompalamba ira mangoseaka dota rarara nabuga anu nepakaeya. Mombine-mombine domo nompokono langgai mpo biasana najadi nte manusia, tapi noberei simbo mombinemo.

²⁷Ivesia muni langgai, domo mombine nipokonora tapi damo ira simbo langgai nosipogau. Pokainggura nepakaeya, langgai simbo langgai sampe kaupuna ira nantarima pobalasi anu masipato ka pokainggura nadaa.

²⁸Tona gahaitu ledο nadota mosisani ante Alatala. Jadi Alatala nompalamba ira rakeniaka mpekirira nadaa sampe ira novia anu ledο masipato rapoviara.

²⁹Mpengaya-ngaya pekiri nadaa bo natenggo rarara. Ledo naosa rarara ante anu naria nte ira, navau rarara, nasiriati, nepatesi, nebagiu, bo nosinggarau. Ira nomboli rau rara, nantunturaka tona

³⁰bo nompakadaa sanga ntona ntanina. Navuu matara nte Alatala, ira najampa, nalanga rara bo nangoe. Ira natau nangelo akala movia anu nadaa bo ledo natundu nte totuara.

³¹Ira nadoyo, ledo namala raparasaya, ledo ria tovera bo ledo ria asi matara nanggita singgamanusiara.

³²Nisanira mami parenta nu Alatala anu nanguli tona nokainggu ivesia masipato rahuku mate. Tapi nau nisanira pokainggura haitu nadaa, kana nipoviara. Bo ane maria tona ntanina mantuntuni pokainggura nadaa, nadamba rarara.

Roma 2

¹Jadi sampesuvu-sampesuvu, ane komiu nompakasala tona ntanina, ledo mamala raulimiu “Yaku ledo nasala.” Apa pokainggumiu mboto nasimbayu nte pokainggura. Jadi ane komiu nompakasala tona ntanina, batuana komiu nompakasala karomiu mboto.

²Nisanita ane Alatala mombahuku tona nokainggu ivehaitu, tantu botu potangaraNa mpuu-mpuu nanao.

³Tapi berimba komiu? Pokainggumiu nasimbayu nte pokainggura! Jadi nee rasarumakamiu Alatala mombahuku tona ntanina, tapi komiu ledo rahukuNa!

⁴Alatala mpuu-mpuu nabelo raraNa, Ia nosabara, bo ledo nasalisa nombahuku dosa-dosamiu. Tapi nipandaentemiu kabelo raraNa. Ledo nisanimiu? Alatala nabelo nte komiu sabana Ia madota komiu majea lako ri dosamiu.

⁵Tapi nau nisanimiu tona nokainggu nadaa kana rahuku, da nakaa bagamiu, bo komiu ledo nadota najea. Sabana haitu, komiu mbotomo nantambai kantamo nu pehuku rapambela ka komiu ri Eo Potangara. Ri Eo Potangara Alatala mombatangara pura-pura manusia ante nanao bo Ia mombahuku pura-pura tona novia nadaa.

⁶Apa Alatala mombabalasi pokainggu ntona pura-pura.

⁷Sanu tona ledo nasau rarara nokainggu nabelo sabana ira madota ratoiya bo rabila nu Alatala, bo madota manggava katuvu nabelo anu ledo maupu-upu. Bo Alatala mombadekei katuvu nabelo sampe ri kasae-saena ka tona gahaitu.

⁸Tapi ane tona aga nompekirika karora mboto, bo ledo nadota nangoseaka dota nu Alatala, tapi aga nangoseaka dota nu rarara nadaa, tona gahaitumo rapokarau nu Alatala bo rapambela pehuku.

⁹Isema-sema nokainggu nadaa kana mandasa bo mombarasai kasusa, pamula-mulana toYahudi bo muni tona ledo toYahudi.

¹⁰Tapi pura-pura tona nokainggu nabelo kana ratoiya bo rabila bo manggava katuvu nabelo lako nte Alatala, pamula-mulana toYahudi bo muni tona ntanina,

¹¹sabana Alatala ledo nompelenje.

¹²Tona ledo toYahudi ledo nangisani Atura-atura agama Yahudi anu nipapola Nabi Musa. Tapi ane ira novia dosa, ira kana rahuku nau ledo nisanira Atura agama Yahudi. Tapi ane toYahudi anu nangisani Atura agama bo nipoviara dosa, ira kana rahuku nantuntuni Atura agamara haitu.

¹³Apa ledo topangepe Atura agama nanao ri panggita nu Alatala, tapi topangoseaka Atura haitu nireke nu Alatala nanao.

¹⁴Tona ledo toYahudi ledo nisanira Atura agama Yahudi. Tapi biasa pekiri rara ntaira mboto nanggeni ira nokainggu nabelo, nasimbayu mpo pokainggu niuli riara Atura agama. Nau ledo nisanira Atura agama Yahudi, pekiri rara ntaira mboto najadi Atura agama ka ira.

¹⁵Lako ri pokainggura nisanita naria parenta lako ri Atura agama nitulisi riara ntaira. Lako ri pekiri rara ntaira muni nisanita naria parenta riara ntaira, apa neumba lako riara ntaira mboto: “pokaingguku hitu nasala,” atau: “pokaingguku hitu nabelo.”

¹⁶Jadi, ivesiamo majadi ri Eo Potangara. Nangoseaka Kareba Belo anu nipatoleleku, ri Eo Potangara Alatala mombatudu i Yesus Kristus mombatangara pura-pura anu nitabuniaka riaru nta nu manusia.

¹⁷Tapi berimbamo komiu? Komiu nompangaku karomiu toYahudi. Komiu nanjarumaka Atura-atura agama Yahudi. Komiu nangoeki posisanimiu nte Alatala.

¹⁸Nisanimiu dota nu Alatala bo nisanimiu nompelisi anu nabelo sabana komiu nipatuduki ante Atura-atura agama.

¹⁹Niulimiu komiumo natau nanggeni tona anu dopa nisanira pepatuduki nakana. Niulimiu komiumo natau nanggeni tona natuvu riaru kalandana anu dopa nosisani nte Alatala.

²⁰Niulimiu komiumo natau nompatuduki tona nadoyo bo nompaguru tona dopa nanoto, sabana nisanimiumo Atura agama bo riaru Atura agama naria mpengaya-ngaya pangisani bo pepatuduki nakana.

²¹Jadi komiu nompatuduki tona ntanina, tapi nakuya ledo nipatudukimiu karomiu mboto? Komiu nompatuduki ka tona ntanina, “Nee mangangga”, tapi komiu mboto nangangga!

²²Komiu nompatuduki ka tona, “Nee mobualo,” tapi komiu mboto nobualo! Komiu narau nanggita topompakande viata, tapi komiu mboto nangala anu naria riaru banua petupu viata haitu!

²³Komiu nangoe sabana naria Atura agama nte komiu. Tapi nipandaentemiu Alatala apa ledo nioseakamiu AturaNa!

²⁴Riaru Buku Gasa nitulisi ivei: “Alatala nipakadaa ntona ledo toYahudi sabana pokainggumiu ntoYahudi.”

²⁵[_Kita toYahudi nisuna, tandana kita todea nu Alatala._] Ada posuna haitu naria gunana ane mpuu-mpuu nioseakata Atura agama. Tapi ane niliunakata Atura haitu, ada posuna ledo ria batuana, apa kita nasimbayu ante tona ledo toYahudi anu ledo nisuna.

²⁶Tona ledo toYahudi ledo nisuna, tapi ane raoseakara parenta riara Atura agama, rareke nu Alatala nasimbayu nte todeaNa nisuna.

²⁷Ane ivesia, pokainggu ntona ledo toYahudi nompopakita kasala ntoYahudi. Sabana, kita toYahudi naria Atura agama nitulisi, bo kita muni nisuna tandana kita todea nu Alatala, tano mai kita ledo nangoseaka parentaNa. Ira ledo nisuna tapi iramo anu nangoseaka parenta-parenta riara Atura agama.

²⁸Jadi toYahudi anu mpuu-mpuu todea nu Alatala, ledo aga toYahudi ri sumba. Bo tona mpuu-mpuu nisuna, ledo aga nisuna ri karora.

²⁹Tapi toYahudi anu mpuu-mpuu todea nu Alatala, haitumo tona mpuu-mpuu rarana nangoseaka Alatala. Bo tona mpuu-mpuu nisuna, nisuna riara ntaira. Batuana, ira najadi todea nu Alatala sabana pokarajaa Nosa Gasa nu Alatala riara ntaira, ledo sabana pangoseakara atura-atura nitulisi. Tona ivehaitu ratoiya nu Alatala, nau ledo nitoiya nu manusia.

Roma 3

¹「ToYahudi bo tona ledo toYahudi nasimbayu, pura-pura nasala ri panggita nu Alatala.」 Jadi, ane ivesia, nuapa pelabina toYahudi? Nuapa gunana mangoseaka ada posuna?

²Tantu nadea pelabina, naria mami gunana. Pamula-mulana, Alatala nombadekei tesaNa ka toYahudi nggaulu.

³Sanu toYahudi ledo naroo nomparasaya pojanji nu Alatala. Tapi nau ivesia, nee rasarumakamiu Alatala ledo mompakadupa pojanjiNa.

⁴Natantu rapakadupaNa, sabana nau pura-pura tona nodava, Alatala batena nanao. Apa nitulisi riara Buku Gasa ivei: “Ane Komiu motesa, tantu rasani ntodea tesaMiu nakana. Bo ane Komiu rarai ntona, natantu Komiu majadi padagi.” (Mazmur 51:6)

⁵Bara naria tona nanguli Alatala ledo nanao ane Ia rahukuNa kadaata, sabana kadaata haitu aga nompakalanto kanoa nu Alatala.

⁶Tapi panggava haitu ledo nakana! Ane rapana Alatala ledo nanao, tantu Ia ledo mamala mombatangara pura-pura manusia.

⁷Bara naria tona nanguli ivei: “Ane pokaingguta natenggo nompakalanto kanoa nu Alatala sampe Ia rapakaoge ntona, nakuya Ia nombahuku kita topovia dosa?”

⁸Ane ivesia, tantu rauli ntona: “Aginapa kita mokainggu madaa ala malantopa anu nabelo!” Naria mamimo tona nombasalai yaku, nanguli yaku mboto nompatuduki ivesia! Tapi ledo ntoto nakana! Tona nanguli yaku nepatuduki ivesia, iamo masipato rapambela pehuku nu Alatala!

⁹Jadi, ri panggita nu Alatala, ledo nabelopa kita toYahudi pade tona ntanina. Apa, evamo niuliku pangane, pura-pura manusia nikuasai nu dota rara novia dosa, toYahudi bo tona ledo toYahudi.

¹⁰Evamo nitulisi riara Buku Gasa ivei: “Ledo ria saitoa tona nanao, nau saitoa ledo ntoto ria.

¹¹Ledo ria saitoa tona nombapaha pepaduduki nu Alatala, bo ledo muni naria saitoa anu nangelo posisani nte Alatala.

¹²Pura-pura tona nasalandala lako ri dala nakana, katuvura domo ria gunana. Ledo ria tona nokainggu nabelo, nau saitoa ledo ntoto ria. (Mazmur 14:1-3, 53:1-3)

¹³Tesa-tesara nadaa mpuu, nasimbayu mpo soa dayo ntomate nateungge. Tesa pebagiu nesuvu lako ri sumbara. Tesara nombagerosi tona ntanina nasimbayu mpo peteo nu ule nobisa. (Mazmur 5:10, 140:4)

¹⁴Ira nepindasi bo nombasalai tona ntanina. (Mazmur 10:7)

¹⁵Ira nasadia nosibaga bo nompatesi tona ntanina.

¹⁶Ri umba-umba nikalaura, nipakadaara bo nipakususara tona ntanina.

¹⁷Ledo nisanira matuvu mosinggabelo. (Yesaya 59:7-8)

¹⁸Bo ledo ntoto nibilara Alatala.” (Mazmur 36:2)

¹⁹Jadi lako ri tesa ri Buku Gasa, nisanita ledo ria manusia nanao. Nisanitamo pura-pura anu nitulisi riaru Atura agama nambela ka toYahudi anu natundu ri Atura haitu. Jadi ledo ria saitoa tona namala manguli karonu mboto nanao. Pura-pura manusia masipato rapambela pehuku nu Alatala.

²⁰Ledo ria saitoa tona majadi manoa ri panggita nu Alatala sabana nangoseaka Atura-atura agama. Apa Atura haitu aga nompopaisani ka kita pura-pura manusia nadosa.

²¹Tapi sii-sii, Alatala nompopaisani berimba manusia mamala majadi manoa ri panggitaNa. Kita ledo majadi manoa ante mangoseaka atura-atura agama. Cara manusia majadi manoa niboto riaru Buku Atura Agama bo riaru Buku Nabi-nabi.

²²Haitumo, Alatala mombareke kita nanao ane kita nomparasaya i Yesus Kristus. Isema-sema nomparasaya i Kristus, tantu rareke nu Alatala nanao, sabana Alatala ledo nompelenje.

²³Pura-pura manusia nadosa bo ledo masipato manggava bagia ri kaoge nu Alatala.

²⁴Tapi Alatala nombareke kita nanao ri panggitaNa sabana kamate i Yesus Kristus anu nombakabasaka kita lako ri pehuku nu dosa. Haitu nipovia nu Alatala ka kita lako ri kabelo raraNa, ledo nibayarita.

²⁵Alatala nombadekei i Yesus Kristus rapatesi bo raaNa natiti. Ia nihuku raposompo dosa manusia. Jadi lako ri raaNa natiti, dosata namala raampungi ane kita nomparasaya i Yesus. Tempo nggaulu, Alatala nompalamba dosa manusia. Ledo nihukuNa sabana posabaraNa. Tapi ane ledo rahukuNa dosata, tantu Ia ledo nanao. Jadi ante kamate i Yesus, Alatala nompopakita kanoaNa.

²⁶PatujuNa, ala sii-sii rasani ntona Ia nanao, apa nihukuNamo dosata ante kamate i Yesus. Jadi nisanita Ia nanao bo nisanita muni Ia nompakule nompakanoa topomparasaya i Yesus.

²⁷Jadi domo mamala kita malanga rarata. Apa Alatala nantarima kita sabana pomparasayata, ledo sabana kita nangoseaka atura-atura.

²⁸Apa poko nu tesa ivei: kita najadi nanao ri panggita nu Alatala sabana pomparasayata, ledo sabana pokaingguta nangoseaka Atura agama.

²⁹Tantumo Alatala ledo aga Alatala ntoYahudi, tapi Alatala ntona ledo toYahudi muni.

³⁰Alatala aga saito, bo Iamo nompakanoa toYahudi ane ira momparasaya i Yesus, bo Ia muni mompakanoa tona ledo toYahudi ane ira momparasaya i Yesus.

³¹Jadi, kita nireke nanao sabana pomparasayata i Yesus. Tapi nee rapekirimiu Atura agama ledo noguna. Ledo ntoto nakana! Kakanana, lako ri pomparasayata haitu kita nompakaoge Atura agama.

Roma 4

¹Jadi pekirimo i Abraham, totua ntoYahudi nggaulu. Berimba sampe ia najadi nanao ri panggita nu Alatala?

²Ane rapana i Abraham nireke nanao sabana pokainguna nabelo, mamalamo ia mantoiya karonu mboto. Tapi ledo namala ia mantoiya karonu ivesia ri ngayo nu Alatala,

³apa nitulisi riara Buku Gasa ivei: “I Abraham nomparasaya Alatala, bo lako ri pomparasayana haitu ia nireke nu Alatala nanao.” (Kajadia 15:6)

⁴Rapana, ane tona nokarajaa nangande gaji, gajina ledo nireke pedekei, tapi anu masipato ratarimana aga sambei nu lengena.

⁵Tapi ledo ivesia kita ante Alatala. Alatala nombareke kita nanao, ledo sabana kita nokarajaa nompasimbuku nokainggu nabelo. Tapi kita nireke nanao sabana kita nomparasaya Alatala anu nompakule nombareke tona nadosa eva tona ledo nasala. Jadi kita nireke nanao lako ri pomparasayata.

⁶Pepatuduki haitu nasimbayu nte tesa Magau Daud nggaulu. Apa i Daud notesaki kasana ntona anu nireke nu Alatala nanao, ledo lako ri pokainguna.

⁷Ivei tesa i Daud: “Nasana mpuu tona salana niampungimo, bo dosana nilalisimo.

⁸Nasana mpuumo tona dosana domo nireke nu Alatala.” (Mazmur 32:1-2)

⁹Kasana nitesa Magau Daud haitu ledo aga nambela nte toYahudi anu nangoseaka ada posuna, tapi nambela muni nte tona ledo toYahudi anu ledo nangoseaka ada posuna. Evamo niuliku pangane, i Abraham nireke nu Alatala nanao lako ri pomparasayana.

¹⁰Ipia i Abraham najadi nanao ri panggita nu Alatala? Naupu ia nisuna? Atau dopame ia nisuna? Natantu ia nireke nanao dopame ia nisuna.

¹¹Damo nggapurina pade nisuna ia, bo posuna haitu najadi tandana ia nanao ri panggita nu Alatala. Nalantomo i Abraham najadi nanao ri panggita nu Alatala sabana pomparasayana dopame ia nisuna. Jadi haitumo sampe namala raulita i Abraham rapotuama ntona pura-pura anu nomparasaya Alatala. Apa nau ira ledo nangoseaka ada posuna, ira muni nireke nu Alatala nanao sabana pomparasayara, nasimbayu mpo i Abraham.

¹²Bo i Abraham muni rapotuama ntoYahudi, haitumo ira anu ledo aga nangoseaka ada posuna tapi nangoseaka jonjo pomparasaya i Abraham dopame ia nisuna.

¹³Tempo nggaulu Alatala nojanji ka i Abraham bo muli-mulina, dunia majadi bagiara. Alatala nojanji ivesia ledo sabana i Abraham nangoseaka Atura-atura agama, tapi sabana niparasayana Alatala bo Alatala nombareke ia nanao ri panggitaNa.

¹⁴Ane aga topangoseaka Atura agama mantarima anu nijanji nu Alatala, batwana ledo ntoto maria gunana momparasaya Alatala, bo ledo madupa pojanji nu Alatala „apa ledo nipakuleta mpuu-mpuu nangoseaka Atura agama.”

¹⁵Ane kita aga mompasimbuku mangoseaka Atura agama, kita aga mambela pehuku nu Alatala sabana kita nasaro nombaliunaka AturaNa. Ane rapana ledo maria Atura agama, tantu ledo maria nuapa-nuapa raliunakata bo kita ledo masala.

¹⁶Jadi kita mantarima anu nijanji nu Alatala sabana pomparasayata nggoo, ala malanto anu nidekeiNa haitu nidekeiNa bayangi lako ri kabelo nu raraNa. Jadi,

anu nijanji nu Alatala nambela ka pura-pura muli i Abraham, ledo aga ka toYahudi anu nompasimbuku nangoseaka Atura agama, tapi isema-sema nanjarumaka Alatala nasimbayu mpo i Abraham nanjarumaka Alatala. Apa i Abraham rapotuamata mpasinggani, haitumo, ia najadi jonjo pomparasaya ka kita pura-pura.»

¹⁷Riara Buku Gasa tesa nu Alatala ka i Abraham nitulisi ivei: “Yaku nanganggataka iko majadi tuama ngata mbaso dea.” Bo i Abraham nomparasaya tesaNa. Alatalamo nakuasa nompakatuvu tomate, bo nipakuleNa nombasovadaka tesaNa nanggasangai anu dopa naria, najadi naria.

¹⁸Nau domo ria panjarumaka i Abraham momuli, ia batena nomparasaya bo nanjarumaka Alatala. Niparasayana ia majadi tuama ngata mbaso dea, nantuntuni tesa nu Alatala ka ia ivei: “Kadea nu mulimu bara maipia masimbayu mpo betue ri langi.”

¹⁹Tempo i Abraham nangepe pojanji haitu, domo masae magana saatu-mpae umuruna bo karonu mpo karo ntomate sabana natuamo, bo domo rapakulena momuli. Tapi nau nisanina karonu natuamo bo bereina i Sara naliumo umuru poana, ia bate-batena nomparasaya.

²⁰Ia ledo nolengga-lengga nomparasaya anu nijanji nu Alatala ka ia, bo pomparasayana nompakaroso rarana. Ia nantoiya bo nombabila Alatala sabana

²¹niparasayana mpuu Alatala nompakule mompakadupa pojanjiNa.

²²Jadi i Abraham nireke nu Alatala nanao sabana pomparasayana haitu.

²³Nitulisi ri Buku Gasa ivei: “ia nireke nu Alatala nanao.” Tesa haitu ledo aga nipambela ka i Abraham,

²⁴tapi nipambela ka kita muni. Kita muni rareke nu Alatala manoa ane raparasayata Alatala, anu nompakatuvu mpanjili Tuputa i Yesus lako ri kamateNa.

²⁵I Yesus nidekei nu Alatala rapatesi mombasompo dosata bo naupu haitu Ia nipatuvu mpanjili ala kita mamala majadi manoa ri panggita nu Alatala.

Roma 5

¹Kita najadi nanao ri panggita nu Alatala sabana kita nomparasaya i Yesus. Jadi sii-sii kita natuvu nosinggabelo ante Alatala sabana anu nipovia nTuputa Yesus Kristus ka kita.

²Kita nomparasaya i Yesus, jadi nidekeiNa ka kita loga mombarasai kabelo rara nu Alatala bo sii-sii nirasaitamo riaru nggatuvuta. Nadamba mpuu rarata sabana naroso panjarumakata rakavata bagia ri kaoge nu Alatala.

³Bo ledo aga haitu, kita nadamba sabana nirasaita kasesa bo kapari, apa nisanita lako ri kasesa bo kapari haitu rarata majadi maroso.

⁴Ane maroso rarata, rapakuleta mombatidamaka tempo rapesori bo pokaingguta haitu rapokono nu Alatala. Bo ane rasanita pokaingguta nipokonoa nu Alatala, panjarumakata nte Ia mantambai maroso.

⁵Ane kita manjarumaka Alatala, ledo masoa bukuta. Nisanita Ia mpuu-mpuu mompakadupa pura-pura pojanjiNa, sabana nirasaita tove nu Alatala riaru ntaita lako ri pokarajaa nu Nosa Gasa anu nidekei nu Alatala ka kita.

⁶Iveimo tove nu Alatala ka kita: ri tempo nipakatantu nu Alatala, tempo kita ledo nompakule mangoseaka dotaNa, i Kristus namate manjambei kita anu ledo natundu nte Alatala.

⁷Nakura nikavata tona nasadia mamate manjambei roa anu ledo nasala pokaingguna. Ane roana tona nabelo mpuu, bara maria nte saito masadia mamate manjambei ia.

⁸Tapi ledo ivesia tove nu Alatala. Alatala nompopakita kambaso nu toveNa ka kita tempo kita da nadosa. Apa tempo kita da nadosa, i Kristus namate manjambei kita.

⁹Kita najadi nanao ri panggita nu Alatala sabana raa i Yesus anu namate mombasompo dosata. Jadi, natantumo i Yesus mombakabasaka kita lako ri pehuku nu Alatala anu makava ngena.

¹⁰Bara ipia, tempo kita da nangeva Alatala, nidekeiNa AnaNa mamate mombasambei kita, ala kita rapoposinggabelo mpanjili ante Ia. Sii-sii kita

nosingabelomo ante Alatala, jadi natantumo kita rapakasalama lako ri pehuku bara maipia, sabana i Kristus bate-batena natuvu.

¹¹Bo ledo aga haitu. Nadamba rarata sabana posangu rarata nte Alatala, anu nirasaita sabana anu nipovia nTuputa Yesus Kristus. Apa lako nte i Yesus Kristus kita niposingabelo nte Alatala.

¹²Dosa neumba ri dunia sabana saito manusia nombaliunaka parenta nu Alatala, haitumo i Adam. Bo lako ri dosa i Adam haitu sampe naria kamatea ri dunia. Ivesiamo pura-pura manusia kana mamate apa pura-pura manusia novia dosa.

¹³Dopame naria Atura agama nipapola Nabi Musa, manusia novia dosa mamimo. Tapi dosa-dosa haitu ledo nireke nu Alatala, sabana dopa ria Atura agama raliunakara.

¹⁴Tapi naupa ivesia, nompamula lako ri tempo i Adam sampe ri tempo i Musa pura-pura manusia kana mamate, nau dosara ledo nasimbayu nte dosa i Adam anu nombaliunaka anu niparenta nu Alatala ka ia. I Adam namala rapasimbayu ante tona neonga nggapurina, haitumo i Yesus. Kasimbayuna, asele anu nipoviara nambela pura-pura manusia.

¹⁵Tapi asele anu nipovia i Adam bo asele anu nipovia i Yesus nosisala muni. Pedekei bayangi nidekei nu Alatala ka kita naogepa pade peliunaka i Adam. Lako ri peliunaka i Adam, pura-pura manusia mamate. Tapi naogepa pepotove nu Alatala bo pedekeiNa ka manusia. Pedekei nu Alatala, haitumo, Ia nompakasalama manusia sabana anu nipovia i Yesus Kristus lako ri kabelo raraNa.

¹⁶Asele pedekei nu Alatala ledo nasimbayu ante asele dosa i Adam. I Adam nombaliunaka parenta nu Alatala sanggani. Aselena, ia nireke nasala ri panggita nu Alatala bo masipato rahuku. Tapi lako ri pedekei nu Alatala bayangi, dosata nadea nipakalaliNa bo kita nipajadiNa nanao ri panggitaNa.

¹⁷Nompamula lako ri peliunaka ntona saito, pura-pura manusia mamate. Tapi naogepa aselena lako ri anu nipovia ntosaitona, i Yesus Kristus! Alatala mpuu-

mpuu nabelo nte kita bo nidekeiNa ka kita pedekei bayangi, haitumo, kita nipajadiNa nanao ri panggitaNa sabana anu nipovia i Yesus. Isema-sema nantarima pedekeiNa haitu manggava kuasa bo katuvu nabelo sampe ri kasae-saena.

¹⁸Jadi, lako ri dosa i Adam sampe pura-pura manusia masipato rahuku sabana dosara. Tapi i Yesus nangoseaka dota nu Alatala bo lako ri anu nipoviaNa, pura-pura manusia mamala majadi manoa ri panggita nu Alatala bo manggava katuvua mabelo.

¹⁹I Adam ledo natundu nte Alatala. Aselena, pura-pura manusia najadi nadosa. Tapi i Yesus natundu nte Alatala. Aselena, pura-pura manusia mamala majadi manoa ri panggita nu Alatala.

²⁰Atura agama nidekei nu Alatala ala mantambai kadea dosa nipovia nu manusia. Tapi nau dosa manusia nantambai kadeana, pepotove nu Alatala naogepa.

²¹Bara ipia dosa nakuasa riara nggatuvu manusia sampe pura-pura manusia kana mamate bo rapopogaa lako nte Alatala. Tapi sii-sii, pepotove nu Alatala nakuasa riara nggatuvuta. Apa lako ri pepotoveNa haitu, Alatala nombareke kita nanao ri panggitaNa bo nidekeiNa ka kita katuvua nabelo sampe ri kasae-saena. Haitu pura nipoviaNa sabana Tuputa i Yesus Kristus.

Roma 6

¹«Nau dosa manusia nantambai kadeana, naogepa pepotove nu Alatala.» Jadi, berimbamo? Mabelo ane kita batena movia dosa ala mantambai pepotove nu Alatala ka kita?

²Tantu ledo! Ledo masipato kita bate-batena movia dosa, sabana namala raulita kita namate nosanggani ante i Kristus ala kita domo rakuasai nu dosa.

³Tantu nisanimumo tempo kita nidiu, kita nipakasangu ante i Kristus. Batuana, kita muni namate nosanggani-nggani ante Ia.

⁴Jadi tempo kita nidiu, mamala raulita kitamo anu namate bo nitana nosanggani-nggani ante i Kristus. Haitu najadi ala kita matuvu ante pokainggu

nabaru, nasimbayu mpo i Kristus nipakatuvu mpanjili lako ri kamateNa ante kuasa nTuamata Alatala anu naoge.

⁵Jadi, ane kita nireke namate nosangani-nggani nte i Yesus tempo kita nidiu, natantumo kita muni rapakatuvu mpanjili nasimbayu mpo Ia.

⁶Nisanita katuvuta nokolu nireke namate nosangani-nggani ante i Kristus ri kayu salib, ala kuasa nu dosa riaru nggatuvuta rapakaropu, bo kita domo rakuasai nu dosa.

⁷Apa ane tona namatemo, nikabasakamo lako ri kuasa nu dosa.

⁸Jadi ane kita mpuu-mpuu nireke namate nosangani-nggani ante i Kristus, niparasayata kita matuvu mosangani-nggani ante Ia.

⁹Apa nisanita i Kristus nipakatuvu mpanjili lako ri kamateNa bo Ia domo mamate. Kamatea domo mamala mombakuasai Ia.

¹⁰Ia namate aga sanggani, ala mombadagi kuasa nu dosa sampe ri kasae-saena. Bo sii-sii, Ia bate-batena natuvu nompakadamba rara nu Alatala.

¹¹Ivesia muni kita, kita kana rareketa namatemo nosangani-nggani nte i Kristus bo nikabasakamo lako ri kuasa nu dosa. Jadi sii-sii kita kana matuvu bo mompakadamba rara nu Alatala, sabana kita nosangu rara ante i Yesus Kristus.

¹²Jadi nee rapalamba dosa mombakuasai katuvumiu ri dunia hitu, ala komiu ledo mangoseaka dota raramiu anu nadaa.

¹³Bo nee rapalamba karomiu movia nadaa. Tapi dekeimo katuvumiu ka Alatala apa kita nikabasakamo lako ri kamatea bo nitarimatamo katuvu nabaru. Dekeimo katuvumiu ka Alatala ala karomiu rapake movia anu nanao.

¹⁴Nee radekei karomiu rakuasai nu dosa, apa kita domo nipou Atura agama. Tapi kita nanjarumaka pepotove nu Alatala.

¹⁵Jadi, ane kita domo nipou Atura agama, tapi nanjarumaka pepotove nu Alatala, berimbamo? Mamala kita batena movia dosa? Ledo ntoto mamala!

¹⁶Nisanimiu mboto ane kita matundu nte tona bo mangoseaka parentana, kita majadi batuana. Ivesia muni ante dosa. Ane kita batena mangoseaka dota rarata anu nadaa, kita majadi batua nu dosa bo kaupuna kita mamate bo rapopogaa lako nte Alatala. Tapi ane kita matundu nte Alatala, kita majadi batuaNa bo kita rapakanoa ri panggitaNa.

¹⁷Bara ipia, dopame niparasayamiu i Yesus, komiu najadi batua nu dosa. Tapi nosukuru mpuu nte Alatala! Sii-sii komiu mpuu-mpuu nangoseaka pepatuduki nakana anu nipatolele ka komiu.

¹⁸Komiu nikabasakamo lako ri kuasa nu dosa bo sii-sii komiu najadi batua nu Alatala anu nangoseaka dotaNa.

¹⁹Yaku nompake porapa batua ala ledo makaja rapahamiu pepatudukiku, apa kita manusia da nakura pompahata. Bara ipia komiu nipobatua nu dosa sabana komiu nompalamba karomiu nangoseaka dota raramiu nadaa sampe pokainggumiu nantambai kadaana. Jadi hitupa, dekeimo katuvumiu ka Alatala ala komiu majadi batuaNa anu nanoa bo mpuu-mpuu majadi todeaNa.

²⁰Bara ipia, tempo komiu da nipobatua nu dosa, ledo nipeilimiu dota nu Alatala.

²¹Belo nuapa nitarimamiu lako ri katuvumiu nokolu? Tantu ledo ria. Komiu aga naeya matamiu nantora pokainggumiu bara ipia! Asele pokainggu ivehaitu aga nanggeni kamate anu nompopogaa kita lako nte Alatala.

²²Tapi sii-sii komiu nikabasakamo lako ri kuasa nu dosa bo najadi batua nu Alatala. Haitu mpuu-mpuu nanggeni belo ka komiu, sabana komiu nompakule natuvu mpo todea nu Alatala bo kaupuna komiu matuvu mabelo sampe ri kasae-saena.

²³Isema-sema novia dosa manggava tambo, bo tambo haitu kamatea anu mompopogaa ia lako nte Alatala. Tapi pedekei bayangi lako nte Alatala ka kita, haitumo kita matuvu mabelo sampe ri kasae-saena. Kita nanggava pedekei bayangi sabana kita nosangu rara ante Tuputa i Yesus Kristus.

Roma 7

¹Sampesuvu-sampesuvu, nisanimumo atura-atura pomarenta. Jadi, natantu rasanimi u anu kuuli hitu. Kita manusia natuvu ri tambe kuasa atura nu pomarenta, tapi ane namatemo kita, atura-atura haitu domo mambela nte kita.

²Jonjona, saito mombine nipoberei. Ane bereina langgai da natuvu, mombine haitu da nipou nu atura-atura poberei. Tapi ane namatemo langgai, mombine haitu nakabasakamo lako ri atura-atura poberei anu nompakaroso pobereira njamboko.

³Jadi, ane rapana mombine haitu mangala langgai ntanina tempo bereina da natuvu, haitu niuli nobualo. Tapi ane namatemo bereina langgai, ia domo nipou atura-atura poberei. Jadi ane ia rapoberei langgai ntanina vai, ia ledo rareke nobualo.

⁴Sampesuvu-sampesuvu, ivesia muni ante kita. Bara ipia kita nipou nu Atura agama. Tapi kita namatemo nosanggani-nggani ante karo i Kristus, jadi kita domo nipou nu Atura-atura agama. Kuasa Atura-atura haitu domo nambela kita. Bo sii-sii kita najadi todea ntosaitoNamo, haitumo i Kristus anu natuvu mpanjili lako ri kamateNa ala katuvuta moguna ka Alatala.

⁵Bara ipia, dopame kita nomparasaya i Yesus, kita natuvu nangoseaka dota rarata anu nadaa. Anu nitagi nu Atura agama, aga haitumo nipodotata rapovia. Jadi, nipaketa karota novia dosa sampe kita masipato rahuku mate bo rapopogaa lako nte Alatala.

⁶Tapi sii-sii, kita nikabasakamo lako ri kuasa Atura agama anu nompou kita bara ipia, sabana kita namate nosanggani-nggani ante i Kristus. Jadi kita domo nangoseaka dala nokolu, haitumo kita domo nangoseaka atura-atura nitulisi. Sii-sii kita nangoseaka dala nabaru, haitumo kita nangoseaka dota nu Alatala ante petulungi Nosa Gasa.

⁷Niuliku pangane i Kristus nombakabasaka kita lako ri Atura agama. Jadi ane ivesia, nuapa raulita? Nadaa Atura agama? Tantu ledo! Atura-atura agama nabelo, sabana lako ri Atura haitu nisanita nuapa niuli dosa. Ane rapana ledo ria parenta nanguli “Nee maino ka mbara-mbara ntona,” ledo kusani kadaa nu dota anu naria riaru ntaiku.

⁸Tapi niepekupa Atura agama anu nanguli “Nee maino,” dosa nanggava loga nokarajaa riara ntaiku sampe aga nantambai dota raraku maino ka anu ntona. Ane rapana ledo ria Atura agama nombatuduaka dosaku, dosa ledo mombakuasai katuvuku.

⁹Bara ipia, dopame nisaniku Atura agama, yaku natuvu nasana. Tapi nisanikupa Atura agama, dosa anu naria mami riara ntaiku nompamula naroso,

¹⁰bo nanotomo raraku yaku masipato rahuku mate bo rapopogaa lako nte Alatala. Kakanana, patuju nu Atura agama ala yaku manggava katuvua nabelo. Tano, nisanikupa Atura haitu, [yaku aga nombaliunakana sampe] yaku masipato rahuku mate bo rapopogaa lako nte Alatala.

¹¹Nisanikupa Atura agama, dosa nanggava loga mombabagiu yaku. Namala raulita: lako ri Atura agama, dosa nompakanavu yaku sampe yaku masipato rahuku mate bo rapopogaa lako nte Alatala.

¹²Jadi, Atura agama nagasa bo parenta-parenta nu Alatala nagasa, nanao bo nabelo.

¹³Ane ivesia, nuapa batuana? Anu nabelo nompakadaa yaku? Tantu ledo! Dosamo mai anu nompakadaa yaku! Atura agama nabelo nipake nu dosa nompakanavu yaku sampe yaku masipato rahuku mate bo rapopogaa lako nte Alatala. Atura agama nabelo haitu, nompakalanto naria dosa riara ntaiku, bo nompakalanto nadaa mpuu dosa.

¹⁴Sampesuvu-sampesuvu, nisanita Atura agama mpuu-mpuu nabelo sabana Atura haitu lako nte Nosa Gasa nu Alatala. Tapi yaku hii aga manusia nalente, yaku nipobatua nu dosa.

¹⁵Ledo ntoto nipahaku pokaingguku mboto. Pokainggu nabelo anu nipokonoku kupovia, ledo sia nipoviaku. Pokainggu anu nipovuu matak, haitumo nipoviaku!

¹⁶Tapi ane kupovia pokainggu anu ledo nipokonoku, batuana yaku nangaku Atura agama nabelo.

¹⁷Jadi, ledo yaku anu novia pokainggu nadaa, tapi dosa anu naria mamimo riara ntaiku noviana.

¹⁸Nisaniku ledo ria anu nabelo riara ntaiku, apa yaku manusia nadosa. Yaku madota mokainggu mabelo, tapi ledo nipakuleku.

¹⁹Pokainggu nabelo anu nipokonoku, ledo nipoviaku. Pokainggu nadaa anu ledo nipokonoku, haitumo nipoviaku.

²⁰Tapi ane kupovia pokainggu anu ledo nipokonoku, batuana ledo yaku noviana. Dosa anu naria riara ntaiku noviana.

²¹Jadi anu najadi riara nggatuvuku ivei: yaku madota mokainggu nabelo, tano aga pokainggu nadaa nipoviaku.

²²Pekiri riara ntaiku, nipokonoku atura nu Alatala.

²³Tapi ledo nioseakaku atura nu Alatala sabana naria kuasa ntanina nombadagi yaku. Riara ntaiku, yaku madota mangoseaka atura nu Alatala, tapi kuasa nu dosa riara nggatuvuku nosibali ante pekiri riara ntaiku, sampe yaku nipobatua kuasa nu dosa haitu.

²⁴Nasilaka mpuumo yaku! Isemamo mamala mombakabasaka yaku lako ri karo anu nanggeni kamate hitu?

²⁵Yaku nosukuru nte Alatala! Apa Tuputa Yesus Kristus mombakabasaka yaku! Jadi iveimo katuvuku: riara ntaiku yaku madota mangoseaka atura nu Alatala, tapi yaku da nikuasai nu dosa sabana dota nu raraku nadaa.

Roma 8

¹Jadi sii-sii domo ria pehuku rapambela ka tona nosangu rara ante i Yesus Kristus.

²Apa Nosa Gasa anu nanggeni kita natuvu nosangu rara nte i Yesus Kristus, nombakabasaka kita lako ri kuasa dosa bo kamatea.

³Atura agama ledo namala mombakabasaka kita lako ri kuasa dosa sabana kita manusia ledo nompakule mangoseaka Atura haitu. Tapi anu ledo namala nipovia nu Atura agama, namala nipovia nu Alatala. NituduNa AnaNa mboto

tumai ri dunia, bo AnaNa najadi manusia ante karo nasimbayu mpo karo nu manusia nadosa ala Ia mombarasai pehuku nu Alatala ri karoNa sabana dosata. Bo ante pohuku karo i Yesus, Alatala nombadagi kuasa nu dosa riara ntaita.

⁴Alatala novia haitu ala kita mpuu-mpuu mompakule mokainggu manoa, mangoseaka parenta ri Atura agama. Apa kita domo natuvu nangoseaka dota rarata anu nadaa. Sii-sii kita nangoseaka dota Nosa Gasa nu Alatala.

⁵Isema-sema natuvu nangoseaka dota rarana nadaa aga nompekirika anu nipodota rarana nadaa haitu. Tapi isema-sema natuvu nangoseaka dota Nosa Gasa nu Alatala, aga dota nu Nosa Gasa nipekirikara.

⁶Ane pekirira nikuasai dota rara nadaa, ira mamate bo rapopogaa lako nte Alatala. Tapi ane pekirira nikuasai nu Nosa Gasa nu Alatala, ira matuvu mabelo bo mosinggabelo ante Alatala.

⁷Ane pekiri ntona nikuasai nu dota rara nadaa, ira nangeva Alatala. Ledo nioseakara parentaNa sabana ledo nipakulera.

⁸Jadi, tona nangoseaka dota rarara nadaa ledo nipakulera mompakadamba rara nu Alatala.

⁹Tapi komiu domo nangoseaka dota raramiu nadaa. Komiu nangoseaka dota Nosa Gasa nu Alatala ane Nosa Gasa mpuu-mpuu nonturo riara ntaimiu. Isema-sema ledo ria Nosa Gasa i Kristus riara ntaina, ia ledo todea i Kristus.

¹⁰Tapi ane i Kristus mpuu-mpuu nonturo riara ntaita, nau karota mamate sabana dosa, Nosa Gasa nombadekei katuvua mabelo sampe ri kasae-saena sabana kita najadi nanao ri panggita nu Alatala.

¹¹Alatala nompakatuvu mpanjili i Yesus ante kuasa Nosa Gasa, bo Nosa Gasa muni nonturo riara ntaita. Jadi nau karota mamate, Alatala mompakatuvu mpanjili karota ante kuasa Nosa Gasa anu nonturo riara ntaita.

¹²Jadi, sampesuvu-sampesuvu, kita masipato matuvu mangoseaka dota nu Alatala. Ledo masipato kita mangoseaka dotata mboto nadaa.

¹³Sabana, ane kita matuvu mangoseaka dotata mboto nadaa, kita mamate bo rapopogaa lako nte Alatala. Tapi ane rakabasakata pokaingguta nadaa ante kuasa lako nte Nosa Gasa nu Alatala, kita matuvu mabelo sampe ri kasae-saena.

¹⁴Isema-sema nikenika Nosa Gasa nu Alatala, iramo ana-ana nu Alatala.

¹⁵Nosa Gasa anu nidekei nu Alatala ka kita, ledo manggeni kita majadi batua sampe kita matuvu ante eka rara. Tapi Nosa Gasa haitu nanganggataka kita majadi ana-ana nu Alatala. Ante pekeniaka Nosa Gasa kita mamala mekakai nte Alatala, “O, Tata, Komiumo Tuama kami!”

¹⁶Nosa Gasa nosangani-nggani nte rarata mboto nanguli ka kita, kitamo ana-ana nu Alatala.

¹⁷Bo ane kita mpuu-mpuu ana-ana nu Alatala, natantumo kita mantarima belo nipakadia nu Alatala ka ana-anaNa. Kita muni mantarima pura-pura anu nipakadia nu Alatala ka i Kristus, sabana ane kita nombarasai kasusa bo kapari mpo anu nirasaiNa, kita muni rapakaoge nasimbayu mpo Ia.

¹⁸Niparasayaku kasusa bo kapari nirasaita sii-sii damo njongona ane rapoposisala ante kabelo rarasaita bara maipia.

¹⁹Sii-sii pura-pura isi nu dunia ante lentora rarara nantongoraka tempona Alatala mompopakita kaoge nu ana-anaNa.

²⁰Apa nggaulu dunia bo isina nipindasi sampe katuvura ledo nasiayu bo domo ria gunana. Haitu najadi ledo lako ri dotara mboto, tapi lako ri dota nu Alatala. Tapi nau ivesia, naria muni panjarumaka.

²¹Haitumo, pura-pura isi nu dunia nanjarumaka makava tempona bara maipia, dunia rakabasaka lako ri kuasa manggeni kamatea, bo dunia mpuu-mpuu makabasaka bo mombarasai kaoge anu radekei ka ana-ana nu Alatala nosangani-nggani nte ira.

²²Apa nisanita pura-pura isi nu dunia nandasa sampe sii-sii [nantongoraka tempona Alatala mompakabelo puramo.] Kandasana nasimbayu mpo kandasana mombine tempo noana.

²³Ledo aga dunia nandasa, tapi kita topomparasaya muni nandasa nirasaita, nantongoraka tempona Alatala mombakabasaka karota lako ri kuasa kamatea, bo mombadekei belo ka kita ana-anaNa. Nisanita tempo haitu kana makava, sabana nitarimatamo Nosa Gasa nu Alatala, tandana Alatala mpuu-mpuu mompakadupa pojanjiNa ka kita.

²⁴Sii-sii kita nikabasakamo lako ri pehuku nu dosata sabana kita nanjarumaka Alatala. Kita nanjarumaka Ia mombadekei ka kita pura-pura anu nijanjiNa ka kita. Bo ane raulita kita nanjarumaka, batuana dopa nitarima anu nisarumakata. Apa ledo ria tona manjarumaka anu nariumo nte ia.

²⁵Jadi ane kita nanjarumaka ratarimata anu dopa nitarimata, kita mosabara mantongoraka.

²⁶Nosa Gasa nu Alatala muni nantulungi kita riara kalenteta. Ledo nisanita mpuu nuapa masipato raulita ri posambayata. Tapi Nosa Gasa mboto nomperapi lako nte Alatala ka kita ante pekakai anu neliu lako ri pompakule basa manusia.

²⁷Bo nisani nu Alatala isi rara ntai manusia, bo nisaniNa patuju nu Nosa Gasa haitu, sabana Nosa Gasa nosambaya ka todea nu Alatala, nangoseaka dota nu Alatala mboto.

²⁸Bara nuapa-nuapa majadi, nisanita Alatala nompasiayuna ala manggeni belo ka kita topompotove Ia, haitumo kita anu nipokioNa majadi todeaNa nangoseaka niaNa mboto.

²⁹Apa lako ri lamba pamulana, kita nipelisiNa bo nipakatantuNa majadi nasimbayu mpo AnaNa i Yesus. PatujuNa ala i Yesus majadi Ana Lumbua bo kita todea majadi tueiNa.

³⁰Bo kita anu nipakatantuNa lako ri lamba pamulana haitu, nipokioNa majadi todeaNa. Bo kita anu nipokioNa majadi todeaNa, nirekeNa nanao ri panggitaNa. Bo kita anu nirekeNa nanao, radekeiNa bagia ri kakuasaNa bo kaogeNa mboto.

³¹Jadi sampesuvu-sampesuvu. Ane rapekirita pura-pura anu nipovia nu Alatala ka kita, maroso rarata. Apa ane Alatala mosabingga ka kita, isema mompakule mangeva kita?

³²Ledo natove raraNa nte AnaNa mboto, nidekeiNa rapatesi mantolo dosata. Sabana haitu, nisanita kana radekeiNa muni ka kita mpengaya-ngaya anu niparaluuta ante joi raraNa.

³³Isema mabia mompangadu kita anu nipelisi nu Alatala? Ledo ntoto ria! Apa Alatala mboto nanguli kita ledo nasala.

³⁴Isema mabia mompakasala kita? Ledo ntoto ria, sabana i Kristus namate mantolosi dosata. Bo ledo aga haitu, Ia nipakatuvu mpanjili bo nonturo ri panggana nu Alatala ri suruga, bo Iamo nanjaliku kita ri ngayo nu Alatala.

³⁵Jadi, nuapa mamala mompopogaa kita lako ri tove i Kristus? Natantu ledo ria! Nau kita masusa atau mapari atau rapandasa ntona, nau kita maara mpai atau ledo ntoto ria pakea, nau kita rakava nu susa bara rapatesi, i Kristus bate-batena mompotove kita.

³⁶Riara Buku Gasa nitulisi ivei: “O, Pue, eo bongi naria tona madota mompatesi kami sabana kami nomparasaya Komiu. Kami nireke mpo bimba aga nipatuvu rasambale.” (Mazmur 44:23)

³⁷Tapi nau bara nuapa-nuapa majadi nte kita, kita mpuu-mpuu padagi ante petulungi i Kristus anu nompotove kita!

³⁸Apa niparasayaku, nau sangaya ledo ria nompakule mompopogaa kita lako ri toveNa. Nau mamate nau matuvu, Ia bate-batena mompotove kita. Ledo ria malaeka atau seta atau kuasa ntanina, ledo ria nuapa-nuapa najadi sii-sii atau nuapa-nuapa majadi bara maipia,

³⁹ledo ria kuasa-kuasa ri laerava atau kuasa-kuasa ri tana, atau nuapa-nuapa ntanina anu nipajadi nu Alatala, nau sangaya ledo ria nompakule mompopogaa kita lako ri tove nu Alatala. ToveNa haitu nipopakitaNa ante anu nipovia nTuputa i Yesus Kristus ka kita.

Roma 9

¹Yaku nosangu rara ante i Kristus, jadi yaku ledo nodava. Pekiri rara ntaiku nikenika Nosa Gasa, bo pekiri rara ntaiku muni nanguli yaku ledo nodava. Anu kuuli hitu mpuu-mpuu nakana, ledo aga davaku:

²nabuku mpuu raraku bo ledo naupu kasusa raraku nompekirika sampesuvuku toYahudi apa ledo nadea ira nomparasaya i Yesus.

³Ane rapana mamala, aginapa yaku rapindasi nu Alatala bo rapopogaa lako nte i Kristus, asaa sampesuvuku toYahudi momparasaya.

⁴Iramo toIsrael, todea nu Alatala, anu nantarima mpengaya belo lako nte Ia. NianggatakaNa ira najadi ana-anaNa mboto bo nipopakitakaNa ka ira kuasaNa bo kaogeNa. NipoviaNa pojanji nte ira, bo nidekeikaNa Atura-atura agama ka ira. NipatudukikaNa ka ira ada-ada metupu nte Ia. Nadea mpuu janji nu Alatala ka toIsrael.

⁵Ira muli i Abraham, i Ishak bo i Yakub, totua toIsrael nggaulu anu nipelisi nu Alatala. Bo tempo i Kristus najadi manusia, Ia nipoanaka lako ri muli ntoIsrael. Iamo nombakuasai pura-pura. Iamo Alatala anu masipato ratoiya sampe ri kasae-saena. Amin!

⁶Nau nadea toYahudi ledo nomparasaya i Yesus, ledo mamala raulita Alatala ledo nompakadupa pojanjiNa nte toYahudi! Apa ledo pura-pura muli i Israel nipelisi nu Alatala majadi todeaNa.

⁷Bo ledo muni pura-pura muli i Abraham nireke mulina mpuu, anu masipato mantarima belo nijanji nu Alatala. Apa Alatala nanguli ka i Abraham ivei: “Aga mulimu lako nte i Ishak rareke mulimu.”

⁸Batuana, ledo sambara tona nipomulika lako ri karo i Abraham najadi ana-ana nu Alatala. Aga tona nipoanaka nangoseaka pojanji nu Alatala najadi ana-ana nu Alatala mpuu.

⁹Apa iveimo pojanji nu Alatala nte i Abraham: “Sampaepa, tumai vai Yaku, bo dopame makava Yaku, bereimu i Sara moanaka saito ngana langgai.”

10Bo ledo aga haitu, lako ri tesa i Esau bo i Yakub, nisanita Alatala nompelisi tona nangoseaka dotaNa mboto. I Esau bo i Yakub narapi bo ira nipoanaka i Ribka. Ira nosangu tuama, haitumo i Ishak, totuata nggaulu.

11-12Dopame i Ribka noana, Alatala nanguli ka ia ivei: “Ngana lumbua matundu nte tueina.” Tempo haitu, ngana randua pangane dopa nipoanaka bo dopa novia nuapa-nuapa nabelo atau nadaa. Tapi Alatala nompakatantu mamimo ngana mbana nipelisiNa mantarima belo lako nte Ia. PatujuNa ala malanto ka kita, ane Alatala nompelisi tona manggava belo lako nte Ia, ledo nipelisiNa nangoseaka pokainggura, tapi nipelisiNa nangoseaka dotaNa mboto.

13Haitumo batuana tesa nu Alatala ri Buku Gasa anu nanguli ivei: “I Yakub nipelisiKu, tapi i Esau nipoaraKu.”

14Jadi ane Alatala nompelisi saito bo nompoara tosaitona, nee rasarumakata Ia ledo nanao! Ledo ntoto nakana!

15Apa niuliNa ka Nabi Musa nggaulu ivei: “Yaku mboto mompakatantu isema Kupoasi bo isema Kupotove.”

16Jadi haitumo sampe nisanita Alatala nompelisi tona ledo sabana dota ntona haitu atau pokainggu ntona haitu, tapi sabana kabelo rara nu Alatala.

17Riara Buku Gasa nitulisi tesa nu Alatala ka Firaun, Magau ri tana Mesir nggaulu, ivei: “Yaku nanganggataka iko majadi magau. PatujuKu ala lako ri anu Kupovia riara nggatuvumu, Kupopakita kuasaKu bo sangaKu raepe ntona ri njumangu dunia.”

18Jadi, Alatala nompoasi isema-sema nipodotaNa rapoasiNa bo Ia nompakakaa бага isema-sema nipodotaNa rapakakaaNa.

19Jadi natantumo maria tona mompekutana ivei: “Ane Alatala nompakatantu isema rapoasiNa bo isema rapakakaaNa, nakuya tano da nipakasalaNa manusia? Rapakuleta tano mangeva dotaNa?”

20Tapi sampesuvu-sampesuvu, ledo masipato kita mombasanai Alatala! Ledo masipato kura manguli ka topomandu, “Nakuya nimandukamu yaku ivei?”

²¹Natantu topomandu kura nakuasa momandu tana lei nangoseaka dotana mboto. Lako ri salemo tana lei, mamala ramanduna rongaya kura, sangu kura nagaya bo sangu kura biasa.

²²Ivesia muni ante Alatala. Ia nakuasa movia nuapa-nuapa nipodotaNa nte kita manusia. Ia nasadia mombahuku tona nadaa bo mompopakita kuasaNa. Tapi Ia nosabara nte tona anu nompakarau Ia bo masipato rahuku sampe ri kasae-saena.

²³Ia nosabara nte ira ala mompopakita kambaso nu kaogeNa ka kita anu nipoasiNa bo nipasadiaNa mami lako ri nggauluname manggava bagia ri kaogeNa.

²⁴Bo kitamo hii anu nipasadiaNa manggava belo haitu. Sanu kita nipokioNa lako nte toYahudi bo sanu nipokioNa lako nte tona ledο toYahudi.

²⁵Riara buku Nabi Hosea, Alatala nanguli ivei: “Tona ledο todeaKu, Kuuli todeaKu. Tona ledο nipopakitaKuka toveKu, Kupopakitaka toveKu. (Hosea 2:22)

²⁶Bo ri umba nipanguli nu Alatala ka ira, 'Komiū ledο todeaKu', ri situ munimo, ira rauli ana-ana nu Alatala anu Natuvu.” (Hosea 1:10)

²⁷Tapi nalonto mpuu tesa Nabi Yesaya nanguli toYahudi ivei: “Muli i Israel nadea mpuu, nasimbayu kadeana mpo bone ri bivi ntalinti. Tapi naupa ivesia, aga sabagia kodi ira rapakasalama.

²⁸Apa Tupu kaliu-liu mombatangara pura-pura manusia ri dunia ante nanao. bo pehukuNa haitu ledο mamala ratavari.” (Yesaya 10:22-23)

²⁹Naria tesa Nabi Yesaya ntanina nanguli ivei: “Ane rapana Alatala anu Nelabi KakuasaNa ledο nomboli muli ka kita, tantu kita mpuu-mpuu maropu, nasimbayu nte tupu ngata Sodom bo Gomora nggaulu.” (Yesaya 1:9)

³⁰Jadi kambukuna ivei: Tona ledο toYahudi ledο nompasimbuku majadi manoa ri panggita nu Alatala. Tapi Alatala noreke ira nanao sabana niparasayara Ia.

³¹Tapi toIsrael nasaemo nompasimbuku mangoseaka atura-atura ala ira rareke manoa ri panggita nu Alatala. Tapi ira ledο najadi nanao.

³²Nuapa sabana? Sabana ira aga nanjarumaka pompasimbukura mboto nangoseaka atura agama, ledo nanjarumaka pomparasayara Alatala. Ira mpo tona natepasunu ri vatu pasunu, batuana: ira ledo nadota nomparasaya Magau Topepakasalama.

³³Haitu niboto riaru Buku Gasa ivei: “Pariaramo! Ri Bulu Sion ri Yerusalem, Yaku nomboli saito Magau anu nirapaka vatu mbaso. Nadea tona matepasunu ri vatu haitu bo madungga. Tapi isema-sema momparasaya Magau haitu ledo manjoso rara.” (Yesaya 28:16)

Roma 10

¹Sampesuvuku sampomparasaya! Naoge mpuu raraku ala sampesuvuku toIsrael mamala rapakasalama. Yaku nasaro nosambaya ka ira.

²Yaku nosabiki, ira mpuu-mpuu madota mompakadamba rara nu Alatala. Tapi ledo nisanira mpuu dala nakana mompakadamba raraNa.

³Apa ledo nipokonora nantarima cara nu Alatala mompakanoa manusia. Jadi ira ledo nadota nomparasaya i Kristus ala majadi manoa ri panggita nu Alatala. Ira aga nadota nangoseaka carara mboto, haitumo, ira nompasimbuku mangoseaka atura agama apa nisarumakara haitumo mompakanoa ira ri panggita nu Alatala.

⁴Tapi Atura-atura agama domo niparaluu, sabana nariamo i Kristus. Jadi isema-sema nomparasaya i Kristus, majadi nanao ri panggita nu Alatala

⁵Nabi Musa notesa tona najadi nanao ri panggita nu Alatala sabana nioseakara Atura agama. Niulina ivei: “Isema-sema nangoseaka pura-pura parenta riaru Atura agama, ia manggava katuvu nabelo.” (Imamat 18:5)

⁶Tapi tona najadi nanao ri panggita nu Alatala sabana pomparasayana, ledo paraluu mompekutana ivei: “Isemamo mompakule mompene hau ri suruga manggeni i Kristus tumai mombatulungi kita?”

⁷Ledo muni paraluu rapekutanana: “Isemamo mamala manau ri dunia ntomate mangangataka i Kristus lako ri kamateNa?”

⁸Ledo paraluu mompekutana ivehaitu sabana, evamo niuli riaru Buku Gasa ivei: “Kareba nu Alatala naparamo ante komiu, nariumo ri sumbamiu bo riaru ntaimiu.” (Ulangan 30:12-14) Kareba haitumo nanggeni tona nomparasaya bo haitumo kareba nipatolele kami.

⁹Ane kita mompangaku ante sumbata, “I Yesusmo Tupu,” bo ane kita momparasaya riaru ntaita Alatala nompakatuvu mpanjili Ia lako ri kamateNa, kita rapakasalama.

¹⁰Apa kita nomparasaya i Yesus riaru ntaita sampe Alatala nombareke kita nanao ri panggitaNa. Bo kita mompangaku i Yesus ante sumbata sampe kita nipakasalama.

¹¹Riaru Buku Gasa nitulisi ivei: “Isema-sema momparasaya Ia, ledo manjoso rara.” (Yesaya 28:16)

¹²Tesa-tesa hitu nambela ka pura-pura tona sabana ledo ria posisalana toYahudi bo tona ledo toYahudi. Aga saito Alatala, bo Ia Tupu nu manusia pura-pura. Ia nabelo raraNa nte pura-pura tona anu nekakai nte Ia.

¹³Apa “isema-sema mekakai nte Tupu, rapakasalama.”

¹⁴Tapi berimbamo tona mekakai nte i Pue ane dopa niparasayara Ia? Bo berimbamo ira momparasaya Ia ane dopa niepera karebaNa? Bo berimbamo raepera karebaNa ane dopa ria tona nompatolele kareba haitu ka ira?

¹⁵Bo berimba munimo tona mompatolele Kareba Belo ane dopa ria tona mombasuro ira manggeni kareba haitu? Riaru Buku Gasa nitulisi ivei: “Nabelo mpuu tona nakava nanggeni kareba nabelo lako nte Alatala!” (Yesaya 52:7)

¹⁶Tapi ledo pura-pura tona nomparasaya Kareba Belo haitu. Naria tesa Nabi Yesaya nggaulu nanguli ivei: “Pue, ledo nadea tona nomparasaya tesa nikeni kami!” (Yesaya 53:1)

¹⁷Jadi, manusia nomparasaya i Kristus sabana niepera Kareba Belo. Bo niepera kareba sabana naria tona nompatolele tesa i Kristus ka ira.

¹⁸Tapi berimbamo? Dopa niepe ntoYahudi Kareba Belo? Natantu nieperamo apa nitulisi riara Buku Gasa ivei: “Kareba nantesaki Alatala nipatolele ri njumangu dunia, Bo napola sampe ri lapi-lapi nu bulu.” (Mazmur 19:5)

¹⁹Jadi berimbamo? Dopa nisani ntoYahudi batuana Kareba Belo? Natantu nisaniramo! Pamula-mulana naria tesa nu Alatala nipasimbayu Nabi Musa ivei: “Yaku mompakasiriati komiu manggita toveKu ka tona ledo todeaKu. Madua raramiu manggita asi mataKu nte tona ledo nosisani nte Yaku.” (Ulangan 32:21)

²⁰Naupu sia, Nabi Yesaya nabia nompasimbayu tesa nu Alatala ivei: “Tona ledo nangelo posisani nte Yaku, iramo mantarima Yaku. Bo Kupopaisani karoKu ka tona ledo nompasimbuku mangisani isema Yaku.” (Yesaya 65:1)

²¹Tapi ane toYahudi, ivei Alatala nanguli ira: “Njumaeo ntua Yaku nombaduduaka paleKu mantarima ira, tapi ira aga nesapuaka bo batena nakaa bagara.” (Yesaya 65:2)

Roma 11

¹Jadi, berimbamo? Alatala nompoara todeaNa toYahudi? Natantum ledo! Apa yaku mboto toYahudi, muli i Abraham, bo lako ri valaa i Benyamin.

²Alatala ledo nompoara todeaNa anu nipelisiNa lako bara ipiame. Toramo tesa Nabi Elia nitulisi ri Buku Gasa. Tempo ia nompangadu toIsrael ri ngayo nu Alatala niulina ivei:

³“Pue, nabi-nabiMiu nipatesira, bo Lanta PesombaMiu nigerosiramo. Damo saitoku hii nabi naboli, bo ira nompasimbuku mompatesi yaku muni.” (1 Raja 19:10, 14)

⁴Toramo pesana nTupu ivei: “Ledo aga saitomu. Da nariapa pitu-njobu topangoseaka Yaku. Ira niboliKu majadi bagiaKu mboto. Ira ledo sanggani nombasomba viata Baal.”

⁵Ivesia muni sii-sii. Nau damo deanapa toYahudi ledo nomparasaya i Yesus, naria muni sanu nomparasaya sabana iramo nipelisi nu Alatala lako ri nggauluname majadi bagiaNa. Ira nipelisiNa sabana kabelo nu raraNa

⁶ledo sabana pokainggura. Apa ane rapana Alatala mompelisi tona sabana pokainggura nabelo, batuana, ledo lako ri kabelo nu raraNa mpuu nompelisiNa.

⁷Jadi, kambukuna, todea toYahudi ᵒnadota najadi nanao ri panggita nu Alatala, tapi, ledo nikavara anu nielora. Topanggavana aga sakide, haitumo tona nipelisi nu Alatala. ToYahudi ntanina aga nakaa bagara.

⁸Evamo nitulisi riara Buku Gasa ivei: “Alatala nompakakumba pekirira. Ia nompakaburo matara sampe ledo nipakulera nanggita dala nakana, bo Ia nompakabongo talingara sampe ledo nipakulera mangepe pepatuduki nakana sampe sii-sii.” (Ulangan 29:4, Yesaya 29:10)

⁹Bo Magau Daud muni nantesaki toYahudi anu ledo nomparasaya ivei: “Pue, kuperapi pura-pura anu niporasa ntona hitu majadi tolia ka ira, sampe ira rapambela silaka bo pehuku, pobalasi pokainggura nadaa!

¹⁰Pakaburo pekirira sampe ledo mamala rakitara dala nakana. Bo pakandasamo ira sampe ira bate-batena mabundu nte kasusara!” (Mazmur 69:23-24)

¹¹ᵒJadi, deanapa toYahudi nanavu sabana ira ledo nomparasaya. Tapi nee rapekirimiu ira nanavu sampe ri kasae-saena! Ledo ivesia patuju nu Alatala! Lako ri pesapuaka ntoYahudi haitu, tona ledo toYahudi nanggava loga ᵒmomparasaya bo, rapakasalama. Kaupuna, toYahudi masiriati manggita ira ᵒapa ira muni madota rapakasalama.

¹²Deanapa toYahudi nesapuaka bo nompoara i Kristus. Sabana haitu, nadea tona ledo toYahudi nanggava belo lako nte Alatala. Jadi, ane tona ntanina nanggava belo sabana pesapuaka ntoYahudi, nemopa ane toYahudi majea bo momparasaya! Natantu melabi kadea belo rakavara.

¹³Sii-sii kupambela tesaku hitu ka komiu, tona ledo toYahudi. Yakumo hii suro i Yesus anu nisuroNa manggeni Kareba Belo ka komiu tona ledo toYahudi. Bo pokarajaaku haitu nirekeku nabelo mpuu.

¹⁴Apa nisarumakaku maria sanu sampesuvuku toYahudi masiriati manggita komiu, sampe ira muni mamala kukeni momparasaya i Yesus bo rapakasalama.

¹⁵Apa tempo Alatala nompoara toYahudi, dala nibuka ka pura-pura tona ntanina ri dunia rapoposingabelo mpanjili ante Alatala. Jadi nelabipa kabelona ane toYahudi ratarima nu Alatala mpanjili! Apa kajadia haitu masimbayu mpo tona namate matuvu mpanjili!

¹⁶Ane santubi roti niala ntani ruru bo nidekei ka Alatala, nasimbayu mpo pura-pura roti haitu nidekei ka Alatala. Bo ane kale nu kayu nireke Alatala tupuna, batuana tinggu-tingguna muni Ia tupuna. 〔ToIsrael nggaulu nireke Alatala tupura, ivesia muni, muli ntoIsrael nireke Alatala tupura.〕

¹⁷ToYahudi namala nirapaka kayu zaitun nipiara nu Alatala. Bo sanu tingguna nikotosi nu Alatala. Komiu tona ledo toYahudi anu nomparasaya i Yesus, nirapaka tinggu-tinggu lako ri kayu zaitun anu ledo nipiara. Tinggu-tinggu haitu niala nu Alatala bo nipatakaNa ri bela ntinggu nikotoNa pangane ala tinggu-tinggu nabaru haitu matuvu bo movua lako ri kayu nipiaraNa. 〔Ivesiamo komiu nantarima belo lako nte Alatala, nasimbayu mpo belo nitarima ntoYahudi nggaulu.〕

¹⁸Jadi, sampesuvu-sampesuvu, nee malanga raramiu manggita toYahudi anu nipoara mpo tinggu nikoto pangane. Toramo! Komiu mboto nasimbayu mpo tinggu. Ledo tinggu nompakatuvu kalena tapi kalena nompakatuvu tingguna.

¹⁹Bara raulimiu ivei: “Tinggu-tinggu pangane nikoto ala kami mamala rapataka ri belana.”

²⁰Haitu nakana mami, tapi toramo, ira nipoara sabana ira ledo nomparasaya, bo komiu nitarima sabana komiu nomparasaya. Jadi nee malanga raramiu, agina komiu maeka!

²¹Apa ane Alatala nompoara toYahudi anu nirapaka tinggu nu kayu mami, nee rasarumakamiu Ia ledo mompoara komiu ane ledo raparasayamiu!

²²Jadi lako rahaitu nisanita kabelo rara nu Alatala, bo nisanita Ia nasadia mombahuku. Ia nombahuku topesapuaka, tapi nabelo raraNa nte komiu anu

nomparasaya, asaa komiu maroo manjarumaka kabeloNa haitu. Ane ledo, komiu muni rapoaraNa!

²³Ane ira toYahudi domo mombasapuaka Alatala tapi majea bo momparasaya, ira ratarima nu Alatala mpanjili. Bo Ia nakuasa mantarima ira mpanjili.

²⁴Komiu tona ledo toYahudi nasimbayu mpo tinggu kayu anu ledo nipiara. Naupa ivesia, komiu nipataka ri kayu nipiara. Jadi ane tinggu kayu ledo nipiara namala rapataka ri kayu nipiara, natantu tinggu kayu nipiara mamala rapataka mpanjili ri batana mboto.

²⁵Sampesuvu-sampesuvu sampomparasaya! Ledo mabelo malanga gaga raramiu. Jadi yaku madota ala rasanimiu nia nu Alatala anu dopa nisani nu manusia nggaulu, haitumo, anu majadi nte toYahudi. Sii-sii nadea toIsrael nakaa bagara bo ledo nomparasaya. Tapi kakaa bagara haitu aga sampalai, sampe magana kadea ntona ledo toYahudi anu momparasaya i Yesus.

²⁶Jadi maupu sia pade rapakasalama pura-pura toIsrael. Kajadia haitu nitulisi ri Buku Gasa ivei: “Makava tempona Magau anu Mompakasalama manusia makava lako ri Bulu Sion, bo rapakalipoNa pura-pura kadaana lako ri muli i Yakub. (Yesaya 59:20-21)

²⁷Bo haitumo pojanjiKu nte ira tempo Yaku mombaampungi dosa-dosara.” (Yeremia 31:33-34)

²⁸Sii-sii toYahudi nireke bali nu Alatala sabana ira ledo nadota nomparasaya Kareba Belo. Bo haitumo anu nanggeni belo ka komiu tona ledo toYahudi. Tapi naupa ivesia, toYahudi da nipotove nu Alatala, sabana Ia nompelisi ira nggaulu majadi todeaNa, bo kana nitorana pojanjiNa nte totuara nggaulu.

²⁹Apa ane Alatala nompelisi bo nombadekei belo ka tona, ledo rabalikiNa anu nipoviaNa haitu.

³⁰Bara ipia komiu tona ledo toYahudi ledo natundu nte Alatala. Tapi sii-sii komiu nipoasiNa bo niampungiNa sabana pesapuaka ntoYahudi.

³¹Ivesia muni toYahudi. Sii-sii ira ledo natundu nte Alatala ala komiu rapoasiNa bo raampungina. Tapi makava tempona bara maipia, ira muni rapoasi nu Alatala nasimbayu mpo komiu.

³²Alatala nompakalanto pura-pura manusia nesapuaka „bo masipato rahuku„, ala Ia mamala mompoasi bo mombaampungina pura-pura manusia.

³³Nambaso mpuu kabelo nu Alatala! NotoNa bo pangisaniNa ledo ria pantaana! Ledo ria saitoa nompakule mombapaha pobotusiNa, atau mompakalanto anu nipoviaNa.

³⁴Riara Buku Gasa nitulisi ivei: “Isema nangisani pekiri nu Alatala? Isema mompakule mompatuduki Ia? (Yesaya 40:13)

³⁵Isema nombadekei sangaya ka Ia sampe Ia masipato mompopanjili ka ira balasina? Natantu ledo ntoto ria!” (Ayub 41:2)

³⁶Apa pura-pura anu naria, nopuna lako nte Alatala bo natuvu lako ri kuasaNa bo Iamo Tupuna. Iamo masipato ratoiyata bo rabilata sampe ri kasae-saena! Amin!

Roma 12

¹Sampesuvu-sampesuvu, Alatala mpuu-mpuu nabelo nte kita! Sabana haitu, kuperapi ante mpuu-mpuu, dekeimo karomiu ka Alatala mpo pesomba natuvu, anu nipatani ka Alatala, anu mompakadamba raraNa. Haitumo ada pesombamiu nakana.

^{2c} rapasialamiu kabiasa ntona ledo nosisani nte Alatala. Dekeimo Alatala mompakabaru pekirimiu ala inggumiu mabali. Ane ivesia, rasanimiu mpuu-mpuu dota nu Alatala, haitumo, rasanimiu anu nabelo, anu nipokono nu Alatala, bo anu ledo nasala ri panggitaNa.

³Lako ri kabelo rara nu Alatala, yaku nianggatakaNa majadi suroNa. Jadi sia sampe kuuli ka komiu pura-pura, Nee rapekirita karota mboto naoge ane ledo ivesia kakanana. Kita kana manoa bo manoto mompekirika karota mboto, nangoseaka suka pomparasaya nibagi nu Alatala ka kita saito-saito.

⁴Ri karota nadea sipa, bo sipa haitu simbo ntanina gununa.

⁵Ivesia muni kita topomparasaya i Kristus. Nau kita nadea, kita najadi sangu riara i Kristus. Bo kita nosidai mpo sipa-sipa nu karo.

⁶Kita simbo nidekeika pompakule-pompakule ledo nasimbayu, nangoseaka anu nidekei nu Alatala ka simbo saito lako ri kabelo raraNa. ʘJadi sabana haitu, kita kana mpuu-mpuu mompake pompakuleta haitu.ʘ Isema-sema nidekeika pompakule mompatolele tesa lako nte Alatala, kana rapoviana mangoseaka pomparasaya naria nte ia.

⁷Isema-sema nidekeika pompakule mantulungi tona ntanina, kana ratulungina mpuu ira. Isema-sema nidekeika pompakule mompaguru, kana mompaguru mpuu-mpuu.

⁸Isema-sema nidekeika pompakule mompakaroso rara ntona ntanina, kana rapakarosona mpuu-mpuu. Isema-sema nidekeika pompakule mombadekei anu naria nte ia ka tona ntanina, kana radekeina ante joi rarana. Isema-sema nidekeika pompakule manggeniaka todea, kana rakeniakana ira ante rarana mpuu-mpuu. Isema-sema nidekeika pompakule mompoasi tona nandasa, kana rapoasina ante damba rarana.

⁹Kita kana mpuu-mpuu mopotove roata. Nee aga mosimpotove ri sumba. Kabasakamo anu nadaa, bo oseakamo anu nabelo

¹⁰Posimpotovemo mpo posimpotove ntali sampesuvu. Bila ntanimo roamiu pade karomiu mboto.

¹¹Kana matutu mokerajaa, nee masanda! Kana madidi raramiu mokerajaa ka Tupu.

¹²Kana madamba raramiu sabana komiu nanjarumaka anu rapovia nTupu ka komiu. Kana mosabara tempo masusa. Nee masau raramiu mosambaya.

¹³Tulungimo roa sampomparasaya anu napepa, bo tarimamo torata riara banuamiu.

¹⁴Ane maria tona mompandasa komiu, nee ratundamiu ia tapi perapi Alatala mombadekei belo ka ia.

¹⁵Ane roamiu madamba, komiu kana madamba mosanggani-nggani ante ia, bo ane roamu motumangi nabuku rarana, komiu kana motumangi mosanggani-nggani ante ia.

¹⁶Komiu kana matuvu mosintuvu nte roa. Nee malanga raramiu tapi komiu kana masadia mosimporoa ante tona naede katuvuna. Nee rapekiri karomiu napandepa pade kakanana.

¹⁷Ane maria tona mompakadaa komiu, nee rabalasi ante daa! Poviamo anu nireke ntodea nabelo.

¹⁸Pasimbukumo matuvu mosinggabelo ante pura-pura tona, sampe ri pompakulemiu.

¹⁹Sampesuvu-sampesuvuku. Nee rabalasi tona novia daa nte komiu, tapi palambamo Alatala mombabalasi ira. Sabana riaru Buku Gasa nitulisi ivei: “Yakumo mombabalasi, Yakumo mombahuku ira.” Ivesia tesa nTupu. (Ulangan 32:35)

²⁰Jadi, oseakamo pepatuduki ri Buku Gasa anu nanguli ivei: “Ane maara tai nu balimiu, pakande ia. Ane mabai tambolona, painu ia. Sabana, ane ivesia rapoviamiu ka ia, kaupuna maeya mboto matana.” (Amsal 25:21-22)

²¹Nee rabalasi pokainggu ntona nadaa ante pokainggu nadaa. Ane ivesia, nidagimo kita, nidagi nu daa. Aginamo pokainggu nadaa rabalasi ante pokainggu nabelo, ala belota mombadagi anu nadaa.

Roma 13

¹Pura-pura kita kana matundu nte pomarenta sabana ledo ria pomarenta anu ledo nanggava kuasana lako nte Alatala. Pura-pura pomarenta anu naria nipakakuasa nu Alatala.

²Jadi isema-sema mangeva pomarenta, nangeva anu nipakatantu nu Alatala mboto. Bo isema-sema mangeva pomarenta natantumo rahuku.

³Apa tona nokainggu nabelo ledo paraluu maeka ka pomarenta. Aga tona nokainggu nadaa masipato maeka ka pomarenta. Jadi ane ledo madota kita matuvu maeka nte pomarenta, kita kana movia anu nabelo, bo kita ratoiya ntopeparenta.

⁴Apa pomarenta nantulungi Alatala apa ira nokarajaa manggeni belo ka kita. Tapi ane madaa poviata, masipato kita maeka nte pomarenta sabana pomarenta mpuu-mpuu nakuasa mombahuku tona nadaa. Apa ira topotulungi Alatala bo ane rahukura tona novia nadaa, ira novia dota nu Alatala.

⁵Haitu sabana kita masipato mangoseaka parenta nu pomarenta. Kita matundu ala ledo rapambela pehuku. Tapi ledo aga haitu, kita muni matundu sabana pekiri rara ntaita mboto nanguli kita masipato matundu nte pomarenta.

⁶Ivesia muni sampe kita masipato mombayari balasitee, apa topeparenta nantulungi Alatala tempo ira nompapola bagora.

⁷Dekei ka pura-pura tona anu masipato radekei ka ira. Bayarimo balasitee ka tona nipakatantu mantarima balasitee. Bo bayarimo bea ka tona nipakatantu mantarima bea. Pekoumo nte tona anu masipato rapekou, bo bilamo tona masipato rabila.

⁸Nee kita moinda nte tona ntanina, tapi kita kana batena mosimpotove. Aga haitu inda masipato ka kita. Apa isema-sema nompotove singgamanusiana, nireke nioseakanamo pura-pura Atura agama.

⁹Riara Atura haitu naria parenta-parenta ivei: “Nee mobualo, nee mepatesi, nee mangangga, nee mario mata manggita anu ntona.” Pura-pura parenta haitu bo parenta-parenta ntanina namala nipakambuku majadi sangu parenta, haitumo: “Potovemo singgamanusiamu nasimbayu mpo pompotovemu karomu mboto.”

¹⁰Isema-sema mompotove singgamanusiana, natantum ledo rapoviana anu nadaa ka ira. Jadi ane nipotoveta singgamanusiata, nireke nioseakata puramo Atura agama.

¹¹Poviamo pura-pura haitu, apa nisanimiu sii-sii temponamo kita membangu lako ri paturuta bo mainga. Kita kana mainga sabana kakava i Kristus

mompakasalama kita naparapa sii-sii pade tempo kita pamulana nomparasaya Ia.

¹²Nasaemo bongina, naparamo maeo. Jadi sia sampe kita kana mombakabasaka pokainggu nadaa nipovia ntona natuvu ri kalandana, bo mompake pareva posieva anu masipato ka tona natuvu riara karemena.

¹³Kita kana matuvu ante pokainggu masipato ka tona natuvu riara karemena. Nee masiromu mangande mompebasa bo manginu sampe malangu. Nee mosipogau ante tona ledo bereimiu mboto bo nee mangoseaka dota raramiu nadaa. Nee mosingarau atau masiriati.

¹⁴Tapi kita kana mompasiala pokainggu i Pue Yesus Kristus. Haitumo pareva posieva rapasuata. Bo nee rapaloga karomiu mangoseaka dota raramiu nadaa.

Roma 14

¹Naria topomparasaya dopa naroso pomparasayara, sampe da naingu rarara pokainggu mbana raoseakara. Tona ivehaitu kana ratarimata ante nabelo, bo nee rapakasala panggavara.

²Rapana, naria tona nomparasaya ia namala mangande mpengaya-ngaya kande. Tapi tona ntanina anu dopa naroso pomparasayana, nanguli ledo nipokono nu Alatala kita mangande bau, aga uta-uta mamala rakandeta.

³Tona nangande mpengaya-ngaya kande ledo masipato momparitambe tona ledo nangande bau. Bo tona ledo nangande bau, ledo muni masipato manjalai tona nangande mpengaya-ngaya kande. Sabana topangande mpengaya-ngaya haitu muni nitarima nu Alatalamo majadi todeana.

⁴Roata haitu batua nu Alatala, ledo batuata. Ledo masipato kita manjalai batua ntona ntanina. Bara makana bara masala batua haitu, haitu urusa nu puana mboto, ledo urusata. Bo tona nangande mpengaya-ngaya kande haitu tantu rareke nakana sabana Tupu nakuasa nombatulungi ia novia anu nakana.

⁵Naria muni topomparasaya nanguli naria eo nopokopa pade eo-eo ntanina. Tapi topomparasaya ntanina nanguli pura-pura eo nasimbayu. Ledo nakuya,

asaa pura-pura tona mpuu-mpuu nomparasaya riaru ntaira Alatala nompokono anu nipoviara.

⁶Tona nompakaoge eo nipakatantu, sabana ira madota mompakadamba Tupu. Bo ivesia muni tona anu nangande mpengaya-ngaya kande. Nikandera mpengaya-ngaya kande sabana ira madota mompakadamba Tupu, bo niulira tarima kasi ka Alatala. Tona ledo nangande bau haitu, ledo nikandera sabana ira madota mompakadamba Tupu, bo ira muni nanguli tarima kasi ka Alatala.

⁷Kita topomparasaya natuvu ledo aga nompakadamba karota mboto. Bo kita namate ledo aga nangoseaka dotata mboto.

⁸Ane kita da natuvu, kita natuvu mompakadamba Tupu, bo ane kita mamatemo, kita mamate mangoseaka dota nTupu. Nau da natuvu nau namatemo, kita batena todea nTupu.

⁹Haitumo sabana i Yesus Kristus namate bo natuvu mpanjili lako ri kamateNa, ala Ia mamala majadi Tupu nu pura-pura manusia, nau tona da natuvu nau tona namatemo.

¹⁰Jadi, nee rapakasala roa-roamiu sampomparasaya. Bo nee raparitambemiu ira. Apa kita pura-pura kana mantingayo Alatala bara maipia bo Ia mombatangara kita pura-pura.

¹¹Nisanita haitu sabana nitulisi riaru Buku Gasa ivei: "Alatala nanguli, 'TesaKu hitu mpuu-mpuu nakana: pura-pura tona kana mantaputu ri ngayoKu. Pura-pura tona kana mompangaku Yakumo Tupura!' " (Yesaya 45:23)

¹²Jadi, sampesuvu-sampesuvu, kita simbo mantingayo Alatala bo mesana tempo Ia mompekutana anu nipoviata.

¹³Jadi, nemo raposipakasalata. Agina kita mompasimbuku nemo rapoviata nuapa-nuapa anu mompakeni roata sampomparasaya manavu riaru dosa.

¹⁴Yaku nosangu rara ante i Pue Yesus, jadi nisaniku mpuu ledo ria kande nuapa-nuapa nipopali ri panggita nu Alatala. Tapi ane maria tona nomparasaya sangaya kande nipopali, ia mpuu-mpuu masala ane rakandena.

¹⁵Ane rapana yaku mompakadua rara roaku sampomparasaya sabana nikandeku anu nirekena nipopali, yaku muni madosa apa yaku natuvu ledo nompotove roa. Jadi nee sampe pomparasaya nu roa rapakagero sabana kandeana nikandeta. Apa ira muni sampesuvuta sampomparasaya, anu nitoloki i Kristus ante kamateNa.

¹⁶Jadi, ane maria anu nireketa nabelo, tapi anu haitu nombabato pomparasaya nu roata, agina nee rapoviata, ala pokaingguta ledo rasalai ntona.

¹⁷Apa anu nopoko riara Poparenta nu Alatala, ledo anu nikandeta atau niinuta. Anu nopoko, kita manoa rarata, bo matuvu mosinggabelo ante roata, bo madamba rarata sabana Nosa Gasa nu Alatala naria riara ntaita.

¹⁸Ane ivesia pangoseakata i Kristus, kita mompakadamba rara nu Alatala, bo roata muni mombabila kita.

¹⁹Haitu sampe kita kana mompasimbuku matuvu mosinggabelo ante roata, bo mosipakaroso rara.

²⁰Nee rapakagerota anu nabelo nipovia nu Alatala riara nggatuvu roata, sabana nikandeta anu nireke nu roa nipopali. Kakanana pura-pura kandeana namala rakande, ledo ria nipopali. Tapi kita nasala ane anu nikandeta mompakeni roata manavu riara dosa.

²¹Agina domo mangande bau atau manginu panginu anu nepakalangu atau movia nuapa-nuapa anu mompakeni roata manavu riara dosa.

²²Ane niparasayata pokaingguta haitu ledo nasala, aginamo rabolita pomparasayata haitu riara ntaita ri ngayo nu Alatala. Nasana mpuu kita ane nipoviata anu niparasayata riara ntaita nabelo, bo ane pekiri rara ntaita mboto ledo nanjalai kita.

²³Tapi ane nonggai rarata nangande, nasala kita ane rakandeta kandeana haitu, apa ledo nioseakata anu niparasayata. Bo nuapa-nuapa nipoviata anu ledo nangoseaka pomparasayata, pokainggu haitu dosa.

Roma 15

¹Kita anu naroso pomparasayata masipato mosabara nte roata anu da nonggai rarana sabana dopa naroso pomparasayana. Nee aga mompekirika kasana nu rarata mboto.

²Kita masipato movia anu manggeni belo ka roata bo mompakasana rarana, ala mompakaroso pomparasayana.

³Apa i Kristus muni ledo aga nangelo kasana nu raraNa mboto, „tapi Ia nompasimbuku nompakasana rara nu Alatala nau nislai ntona. Riara Buku Gasa naria tesa „nombaboto anu rauli i Yesus,“ ivei: “Pura-pura tesara nombasalai Alatala nambela Yaku.”

⁴Pura-pura anu nitulisi riara Buku Gasa nggaulu nitulisi mompatuduki kita. Lako ri pepatuduki nikavata ri Buku Gasa kita majadi mosabara riara kasusa bo rarata rapakaroso ala kita maroo manjarumaka Alatala.

⁵Alatala anu nompakaroso rarata bo nompakatetida rarata tempo kita nombarasai kasusa. Sia sampe kuperapi Alatala mombatulungi komiu matuvu mosinggabelo nte roa riara pangoseakamui i Yesus Kristus,

⁶ala komiu mosangu rara bo mosangu suara mompakaoge Alatala, Tuama nTuputa i Yesus Kristus.

⁷Jadi sampesuvu-sampesuvu, kita kana mositarima belo, nasimbayu mpo i Kristus nantarima kita. Ane mositarima belo kita, Alatala rabila bo ratoiya ntona.

⁸Toramo, i Kristus nakava ri dunia mombatulungi toYahudi, ala pojanji nu Alatala ka totuara nggaulu madupa bo rasani ntona pura-pura, tesa nu Alatala namala raparasaya.

⁹Bo muni i Kristus nakava ala tona ledo toYahudi mantoiya Alatala, sabana kabelo raraNa nte ira. Riara Buku Gasa naria tesa „nombaboto tempona tona ledo toYahudi mantoiya Alatala mosanggani-nggani nte toYahudi,“ ivei: “O Pue, yaku mombabila Komiu ri ngayo ntona ledo toYahudi. Yaku modade mombatoiya Komiu.” (2 Samuel 22:50; Mazmur 18:50)

¹⁰Bo naria tesa ntanina riara Buku Gasa nanguli ivei: “Komiu tona ledo toYahudi kana madamba mosanggani-nggani ante todea nu Alatala anu nipelisiNa nggaulu.” (Ulangan 32:43)

¹¹Bo naria vai ntanina tesa nu Alatala nanguli ivei: “Komiu tona ledo toYahudi kana ratoiyamiu Alatala. Pura-pura manusia kana mombatoiya Ia.” (Mazmur 117:1)

¹²Bo naria muni tesa nitulisi Nabi Yesaya ivei: “Lako ri muli i Isai meumba saito mulina anu momparenta tona ledo toYahudi. Bo ira manjarumaka Ia.” (Yesaya 11:10)

¹³Alatala mpuu-mpuu puna panjarumakata! Kuperapi Ia mompakadamba mpuu raramiu bo mombadekei ka komiu katuvua mabelo sabana komiu nomparasaya Ia. Kuperapi panjarumakamiu nte Ia mantambai maroso ante kuasa lako ri Nosa Gasana.

¹⁴Sampesuvu-sampesuvuku, nisaniku mboto komiu batena nokainggu nabelo nte tona ntanina, bo nisanimumo pura-pura anu masipato rapoviamiu, bo nipakulemiu mosipakaroso rara.

¹⁵Tapi naupa ivesia, nabia yaku notulisi bara sako-ngaya ka komiu pangane. Patujuku mompopatora komiu, sabana haitumo pokarajaa nidekei nu Alatala ka yaku lako ri kabelo raraNa.

¹⁶Ia nanganggataka yaku nokarajaa ka i Yesus Kristus nanggeni karebaNa ka tona ledo toYahudi. Bo pokarajaaku haitu namala rarapaka pokarajaa ntopanggeni pesomba, sabana yaku nompatolele Kareba Belo lako nte Alatala ka tona ledo toYahudi, bo ira anu nomparasaya i Kristus nirekeku pesomba nipesombaku ka Alatala. Bo pesombaku haitu tantu nitarima nu Alatala sabana Nosa Gasa nompakagasa ira bo nompatani ira majadi bagia nu Alatala.

¹⁷Jadi yaku nadamba nompekirika pokarajaa nituiku ka Alatala, sabana yaku nosangu rara ante i Yesus Kristus.

¹⁸Ledo mabia yaku motesaki anu nipoviaku mboto. Aga anu nipoviaku ante kuasa i Kristus riara nggatuvuku kutesaki. Nadea tona ledo toYahudi nangoseaka i Kristus sabana pepatudukiku bo pokarajaaku,

¹⁹bo sabana kabaraka-kabaraka bo tanda-tanda nipokumaaka nipoviaku ante kuasa Nosa Gasa. Lako ri ngata Yerusalem sampe ri tana Ilirikum, nipatoleleku pura-pura Kareba Belo i Yesus Kristus ka tona.

²⁰Riara pokarajaaku haitu yaku bate-batena nompasimbuku nompatolele Kareba Belo ka tona anu dopa niepera sanga i Kristus. Yaku ledo madota mombangu banua ri bavo pandasi nipovia ntona ntanina.

²¹Tapi yaku madota mompakadupa anu nitulisi riara Buku Gasa ivei: “Tona dopa nipatoleleka kareba, rasanira isema Ia. Tona dopa nangepe karebaNa, mangepe bo mombapaha.” (Yesaya 52:15)

²²Sampesuvu-sampesuvu, yaku nasaro nilava tou nte komiu sabana pokarajaaku haitu.

²³Tapi sii-sii, naupumo pokarajaaku ri sii. Nompae-mpaemo yaku madota tou mosinggava nte komiu.

²⁴Jadi yaku nonia ane hau ri tana Spanyol ngena, mesai sampalai nte komiu ala kita madamba mpasangani-nggani sampalai. Bo kusarumaka komiu mamala mombatulungi yaku mompapola polipaku hau ri tana Spanyol.

²⁵⁻²⁶Tapi yaku hau ri ngata Yerusalem ntani ruru. Apa topomparasaya i Yesus ri propinsi Makedonia bo Akhaya nompakatantu mompakatu doi petulungi ka topomparasaya napakasi ri ngata Yerusalem. Jadi, yaku manggeni petulungira haitu hau ri Yerusalem.

²⁷Niara haitu nipoviara lako ri dotara mboto, ledo nipasuu. Tapi kakanana, masipato muni ira mantulungi roara toYahudi sampomparasaya. Apa lako ri toYahudi sampe tesa nu Alatala nikeni ka tona ledo toYahudi. Jadi masipato mpuu tona ledo toYahudi mantulungi toYahudi ante mbara-mbara lako ri dunia hitu.

²⁸Jadi yaku hau ri ngata Yerusalem ntani ruru manggeni doi petulungi anu nipasiromu ka topomparasaya hamai. Maupu kudekei doi haitu ka ira ri Yerusalem, pade mesai ri ngatamiu kupoliu hau ri tana Spanyol.

²⁹Bo nisaniku ane yaku makava nte komiu, natantumo madea belo lako nte i Kristus kukeni ka komiu.

³⁰Sampesuvu-sampesuvu, kita nosangu rara ante Tuputa Yesus Kristus bo kita nosimpotove sabana pokarajaa Nosa Gasa riara ntaita. Sabana haitu, kuperapi nte komiu, pekakaimo mpuu-mpuu nte Alatala mosanggani-nggani ante yaku, mosambaya ka yaku.

³¹Posambayamo ala yaku ledo rapakadaa ntoYahudi ri bagia Yudea anu ledo nomparasaya i Yesus. Bo posambayaka munimo ala topomparasaya ri Yerusalem mantarima mabelo doi petulungi kukeni hitu.

³²Kuperapi muni, ane rapodota nTupu, yaku mamala tou mesai nte komiu ante damba nu raraku, bo kita mamala mosipakavoe rarata.

³³Kuperapi Alatala, anu nombadekei katuvua nabelo, mombatulungi komiu pura-pura. Amin.

Roma 16

¹Ante suraku hitu, kupopaisani ka komiu i Febe, sampesuvuta sampomparasaya. Ia sampesuvuta mombine anu nantulungi pakeni ntodea topomparasaya ri ngata Kengkrea.

²Kuperapi komiu mantarima ia sabana pomparasayana i Pue Yesus, apa ivesia mamimo kita todea nu Alatala masipato mantarima roata sampomparasaya. Ane maria anu niparaluuna, tulungimo ia, sabana ia mboto nadea tona nitulungina, yakumo hii saito.

³Pakavote tabeku ka i Priskila bo i Akwila. Ira njamboko roaku sampokarajaa nanggeni Kareba Belo i Yesus Kristus.

⁴Ira sakidepa namate nantulungi yaku. Yaku nosukuru nte ira, bo ledo aga yaku, tapi pura-pura todea topomparasaya anu ledo toYahudi.

⁵Pakavote muni tabeku ka todea topomparasaya anu nodade ri banuara. Pakavote tabeku ka i Epenetus nipotoveku. Iamo tona paratama nomparasaya i Yesus Kristus ri propinsi Asia.

- ⁶Bo pakavote muni tabeku ka i Maria. Ia nokarajaa ntamo ka komiu.
- ⁷Pakavote tabeku ka i Andronikus bo i Yunias, sampesuvuku toYahudi. Ira muni nitarunggu nosanggani-nggani ante yaku bara ipia. Pura-pura suro i Yesus nombabila ira. Dopame yaku nomparasaya i Yesus, lave nomparasayamo ira.
- ⁸Pakavote tabeku ka i Ampliatus anu nipotoveku, apa kami randua nosangu rara nte Tupu.
- ⁹Pakavote tabeku ka i Urbanus, roata sampokarajaa nompatolele Kareba i Kristus. Bo pakavote tabeku ka i Stakhis nipotoveku.
- ¹⁰Pakavote tabeku ka i Apeles. Nadea kasusa nirasaina, tapi ia bate-batena nangoseaka i Kristus. Bo pakavote tabeku ka gi Aristobulus sambanua.
- ¹¹Pakavote tabeku ka i Herodion, roaku toYahudi, bo muni ka sampesuvuku sampomparasaya ri banua i Narkisus.
- ¹²Pakavote muni tabeku ka i Trifena bo i Trifosa. Randua mombine haitu nokarajaa ntamo ka Tupu. Bo pakavote tabeku ka i Persis anu nipotoveta. Ia muni mombine anu nokarajaa ntamo ka Tupu.
- ¹³Pakavote tabeku ka i Rufus anu nipelisi nTupu, bo nitoiya ntona. Bo pakavote muni tabeku ka tinana anu nirekeku tinaku muni.
- ¹⁴Pakavote tabeku ka i Asinkritus, i Flegon, i Hermes, i Patrobas, i Hermas bo pura-pura sampesuvu sampomparasaya anu nosanggani-nggani nte ira.
- ¹⁵Pakavote tabeku ka i Filologus bo i Yulia, i Nereus bo sampesuvuna mombine, bo ka i Olimpasi bo ka pura-pura topomparasaya nosanggani-nggani nte ira.
- ¹⁶Posipakavotemo tabe ante mpuu-mpuu rara, mpo sampesuvu sampomparasaya i Kristus. Pura-pura topomparasaya i Kristus ri sii nompakavote tabera ka komiu muni.
- ¹⁷Sampesuvu-sampesuvuku, kuperapi ante mpuu-mpuu ala komiu mainga nte tona anu nomposibali todea topomparasaya bo madota mompakanavu

komiu ante pepatuduki anu nangeva pepatuduki nakana nipatuduki ka komiu. Tumo mosimporoa ante tona ivehaitu!

¹⁸Sabana, tona nokainggu ivehaitu ledo nokarajaa ka Tuputa i Kristus, tapi aga nangoseaka dotara mboto. Tona dopa nisanina belo pepatuduki nakana, nibagiura ante tesa-tesara napande bo namomi.

¹⁹Komiu, nisani ntona ri umba-umba komiu naroo nangoseaka pepatuduki lako nte Alatala. Haitumo sampe yaku nadamba nompekirika komiu. Tapi yaku madota ala komiu mapande mangisani anu nabelo, tapi nee mpuu mapande mangisani anu nadaa.

²⁰Kuperapi Alatala, anu nombadekei katuvua nabelo, masalisa mompakaropu kuasa Magau nu Seta bo radekeiNa ka komiu kuasa mombadagina. Kuperapi kabelo rara nTuputa Yesus Kristus bate-batena maria nte komiu.

²¹I Timotius, roaku sampokarajaa nompakavote tabe ka komiu. Ivesia muni i Lukius, i Yason bo i Sosipater, roa-roaku toYahudi.

²²Yaku, i Tertius, nipopale i Paulus notulisi sura hitu. Yaku sampesuvumiu sampomparasaya bo yaku muni nompakavote tabeku ka komiu pura-pura.

²³Tarima muni tabe lako nte i Gayus. Yaku i Paulus, nipalogana nonturo ri banuana, bo topomparasaya ri sii muni biasa nasiromu nodade ri banuana. Tarimamo tabe lako nte i Erastus, topompasiayu doi ri ngata hitu. Bo tarima muni tabe lako nte sampesuvuta i Kwartus.

²⁴[Kuperapi Tuputa Yesus Kristus bate-batena mabelo nte komiu pura-pura. Amin.]

²⁵Ratoyata Alatala! Ia nakuasa mompakaroso pomparasayamiu mpo niuli ri Kareba Belo nipatoleleku, haitumo kareba i Yesus Kristus. Kareba i Kristus haitumo nia nu Alatala anu nitabuniakaNa lako ri lamba pamulana.

²⁶Tapi ri tempo sii-sii, nia haitu nipopaisani ka kita riaru buku nitulisi nu nabi-nabi nggaulu. Bo Alatala anu natuvu sampe ri kasae-saena, nantudu ala niaNa haitu rapopaisani ka tona ri umba-umba ala pura-pura manusia mamala momparasaya bo matundu nte i Kristus.

²⁷Iamo Alatala anu nangisani pura-pura! Ledo ria simbayuNa! Ia masipato ratoiyata sampe ri kasae-saena ante petulungi i Yesus Kristus. Amin.

1 Korintus

1 Korintus 1

¹⁻²Sampesuvu-sampesuvu, todea nu Alatala ri ngata Korintus: Komiu nipelisi nu Alatala majadi todeaNa mboto sabana komiu nosangu rara ante i Yesus Kristus. Komiu nipokio majadi todea nu Alatala mosangani-nggani ante pura-pura tona ri umba-umba dunia anu nekakai nte i Yesus Kristus, Tupura bo Tuputa muni. Sura hitu lako nte kami, i Paulus bo sampesuvuta sampomparasaya i Sostenes. Yaku nipelisi nu Alatala majadi suro i Yesus Kristus nangoseaka dota nu Alatala mboto.

³Kuperapi Tuamata Alatala bo Tuputa Yesus Kristus mombadekei belo ka komiu bo mompakatinonto raramiu.

⁴Yaku ledo nenonto nanguli tarima kasi nte Alatala, sabana kabelo raraNa nte komiu anu nosangu rara ante i Yesus Kristus.

⁵Katuvumiu nipakasugiNa riaru mpengaya-ngaya sabana komiu nosangu rara ante i Yesus Kristus. NidekeiNa ka komiu kapande notesa bo mpengaya-ngaya pangisani nabelo.

⁶Haitu nompakalanto Kareba i Kristus anu nipatolele kami ka komiu, mpuu-mpuu nalonto riaru ntaimiu.

⁷Jadi, ledo ntoto nakura pompakule nidekei nu Nosa Gasa ka komiu sii-sii, komiu ranja nantongoraka peonga nTuputa i Yesus Kristus mpanjili ri dunia.

⁸Alatala mompakaroso komiu sampe ri kaupuna ala tempo Tuputa Yesus Kristus makava mpanjili ri dunia, ledo maria salamiu rakavaNa.

⁹Alatala namala raparasaya mompakadupa pojanjiNa ka kita. Bo Iamo nompokio komiu majadi nosangu rara ante AnaNa Yesus Kristus, Tuputa.

¹⁰Sampesuvu-sampesuvu, ante kuasa nidekei nTuputa Yesus Kristus ka yaku, kuperapi nte komiu ala komiu mosangu rara. Nemo sampe magero sintuvumiu. Komiu kana masintuvu mosangu rara bo mosangu patuju.

¹¹Niuliku ivesia sabana naria ira lako ri banua i Kloe nanguli ka yaku sanu komiu nosipobali.

¹²Batuana, sanu komiu nanguli, “Yaku hii topangoseaka i Paulus.” Naria sanu nanguli, “Yaku hii topangoseaka i Apolos.” Naria ntanina nanguli, “Yaku hii topangoseaka i Petrus.” Naria muni ntanina nanguli, “Yaku hii topangoseaka i Kristus.”

¹³Natebagi-bagi tano i Kristus? Ledo yaku nipaku ri kayu salib mombasambei komiu! Tempo komiu nidiu, ledo tandana komiu najadi topangoseaka yaku!

¹⁴Yaku nosukuru sabana ledo ria komiu ntanina nidiuku, aga i Krispus bo i Gayus,

¹⁵mbelaka maria tona manguli ia nidiu tandana ia najadi topangoseaka yaku!

¹⁶ (Bo nitoraku muni, gi Stefanus sambanua nidiuku. Tapi ntanina lako nte ira gahaitu, ledo nitoraku bara da nariapa ntanina nidiuku. Domo nitoraku.)

¹⁷Yaku ledo nitudu i Kristus mombadiu tona, tapi mompatolele Kareba Belo. Bo ane nompatolele Kareba haitu, yaku ledo notesa nangoseaka kapande nu manusia, mbelaka maria tona aga momparasaya sabana kapandeku motesa bo ledo rasanira mpuu kuasa i Kristus mompakasalama ira ante kamateNa ri kayu salib.

¹⁸Kami nompatolele kareba kamate i Kristus ri kayu salib nombasompo dosa manusia. Ane tona damo kapesuana ri narakaa nangepe kareba haitu, niulira tesa ntodoyo, ledo ria batuana. Tapi kita anu nipakasalama, nisanita kamate i Kristus nompopakita kuasa nu Alatala mboto!

¹⁹Apa ri Buku Gasa Alatala notesa ivei: “Kulava nia ntona napande bo Kupakaingu pekiri ntona natau.” (Yesaya 29:14)

²⁰Jadi nuapa gunana tona napande? Nuapa gunana tona natau? Nuapa gunana tona napande notesa ri dunia hitu? Alatala nompakalanto pura-pura kapande nu manusia ledo ria gunana.

²¹Alatala napande mpuu, bo nipakatantuNa manusia ledo mamala mosisani ante Ia ane aga manjarumaka kapandera mboto. Tapi nibotusiNa mompakasalama isema-sema momparasaya Kareba Belo nipatolele kami. Tano mai tona ri dunia nanguli Kareba haitu aga tesa ntodoyo.

²²ToYahudi ledo nadota momparasaya ane ledo rakitara tanda nipokumaaka. Bo toYunani ledo nadota momparasaya ane ledo ratesa ka ira ante kapande nu manusia.

²³Tapi kami aga nompatolele Kareba kamate i Kristus ri kayu salib. KamateNa haitu mompakadua rara ntoYahudi, bo nireke ntoYunani aga tesa ledo ria gunana.

²⁴Tapi ane tona nipokio nu Alatala majadi todeaNa, nau toYahudi, nau toYunani, nisanira kamate i Kristus haitu nompopakita kuasa bo kapande nu Alatala ka ira.

²⁵Apa kareba kamate i Kristus, anu nireke manusia ledo ria gunana, haitumo nompopakita kapande nu Alatala. Bo kapande nu Alatala neliupa pade kapande nu manusia. Panguli nu manusia, kamate i Kristus aga nompopakita kalente nu Alatala, tano mai anu niuli kalente nu Alatala haitu, nakuasapa pade pura-pura kuasa nu manusia.

²⁶Sampesuvu-sampesuvu, toramo katuvumiu bara ipia tempo Alatala nompokio komiu majadi todeaNa. Ledo nadea komiu napande ri panggita ntona ri dunia. Ledo nadea komiu nakuasa bo ledo nadea naria nturona.

²⁷Tapi Alatala nompelisi tona nireke nadoyo ri panggita ntona ri dunia, ala tona natau maeya matara. NipelisiNa tona ledo nakuasa ri panggita ntona ri dunia, ala tona nakuasa maeya matara.

²⁸NipelisiNa tona ledo ria nturona, tona nislai bo tona nireke ledo ntoto ria gunana ri panggita ntona ri dunia, ala malanto anu nitoiya nu manusia ri dunia hitu ledo ria gunana.

²⁹Patuju nu Alatala ala nee maria manusia mangoe ri ngayo nu Alatala, manguli kapandena mboto sampe ia nipelisi nu Alatala.

³⁰Lako nte Alatala sampe kita najadi nosangu rara ante i Yesus Kristus. Bo lako nte i Kristus sampe nisanita kapande nu Alatala. Ia nompoposingabelo kita ante Alatala sampe kita najadi todea nagasa nipatani ka Alatala. Bo Iamo nombakabasaka kita lako ri pura-pura anu nadaa.

³¹Jadi evamo nitulisi riara Buku Gasa, “Isema-sema madota mantoiya bara nuapa, aginapa ia mantoiya anu nipovia nTupu!” (Yeremia 9:24)

1 Korintus 2

¹Sampesuvu-sampesuvu, tempo yaku nakava nte komiu nanggeni Kareba Belo lako nte Alatala, yaku ledo notesa ante tesa-tesa nagaya bo napande.

²Apa nipakatantukumo yaku aga motesa i Yesus Kristus bo kamateNa ri kayu salib.

³Jadi tempo yaku naria nte komiu, yaku nalente bo nolete naeka.

⁴Tesa nipatoleleku ledo niuliku ante tesa-tesa mpeopa anu nopuna lako ri kapande nu manusia. Tapi tempo yaku nompatolele kareba haitu, nikitamiumo kuasa lako ri Nosa Gasa nu Alatala.

⁵Nipoviaku ivesia ala pomparasayamiu ledo mopuna lako ri kapande nu manusia tapi mopuna lako ri kuasa nu Alatala.

⁶Naupa ivesia, ane kami notesa ka topomparasaya anu naroso pomparasayana, naria muni kapande nipasimbayu kami ka ira. Tapi kapande haitu ledo nasimbayu ante kapande lako ri dunia nadaa hitu atau kapande ntopomparenta ri dunia nadaa hitu, apa kuasara nalipo-lipomo.

⁷Kapande nipatolele kami, iamo kapande lako nte Alatala. Kapande haitu ledo nisani ntona ri dunia. Tapi dopame dunia nipajadi, Alatala nonia mamimo mompopaisani kapandeNa haitu ka kita sii-sii. Haitu nipoviaNa ala manggeni belo ka kita.

⁸Ledo ria saitoa topoparenta ri dunia nadaa hitu nangisani patuju nu Alatala haitu. Apa ane rapana nisanira patujuNa haitu, natantum ledo rapakura ri kayu salib i Pue anu nakuasa.

⁹ᵐNau ledo nisani ntopoparenta ri dunia, Alatala nompopaisanina ka kita,ᵐ evamo nitulisi riarā Buku Gasa, “Dopa nikita nu manusia, dopa niepe ntalingara, bo dopa muni nesua ri pekirira pura-pura belo nipakasadia nu Alatala ka tona nompotove Ia.” (Yesaya 64:4)

¹⁰Tapi belo nipakasadia nu Alatala haitu, nipopaisaniNa ka kita lako ri Nosa Gasana. Apa Nosa Gasa nu Alatala nangisani mpengaya-ngaya, sampe nau patuju nu Alatala anu dopa nisani nu manusia, nisaniNa pura.

¹¹Anu nangisani pekiri manusia saito, aga tona haitu mboto. Ivesia muni anu nangisani pekiri nu Alatala aga Nosa Gasana mboto.

¹²Ledo kapande lako ri dunia hitu nitarimata, tapi Nosa Gasa nu Alatala nitarimata ala rasanita pura-pura anu nidekei nu Alatala ka kita lako ri kabelo raraNa.

¹³Jadi ane kami nompatuduki nombatesa Alatala, kami ledo notesa ante tesa-tesa napande nipatuduki ka kami nangoseaka kapande nu manusia, tapi ante tesa-tesa nipatuduki nu Nosa Gasa ka kami. Kami nombatentei pepatuduki lako nte Nosa Gasa ka tona naria Nosa Gasa haitu.

¹⁴Tona nangoseaka dotana mboto bo ledo naria Nosa Gasa nu Alatala nte ia, ledo nitarimana pepatuduki lako nte Nosa Gasa sabana nirekena pepatuduki haitu aga tesa ntodoyo. Ledo nipakulena mombapaha batuana sabana pepatuduki haitu aga namala rapaha ntona ante pekeniaka Nosa Gasa.

¹⁵Tona naria Nosa Gasa nu Alatala nte ia, nompakule nomparesa bo nompaha mpengaya-ngaya. Tapi tona ledo naria Nosa Gasa nte ia, ledo nompakule mombapaha pekiri ntona naria Nosa Gasa.

¹⁶Evamo nitulisi riarā Buku Gasa ivei: “Isema rapakulena mangisani pekiri nTupu sampe rapakulena mompatuduki Ia?” (Yesaya 40:13) Tapi kita topomparasaya, pekirita nasimbayu ante pekiri i Kristus!

1 Korintus 3

¹Sampesuvu-sampesuvu, tempo yaku naria nte komiu, ledo nitesaku ka komiu nasimbayu mpo nitesaku ka tona nikuasai Nosa Gasa nu Alatala. Tapi nitesaku

ka komiu nasimbayu mpo nitesaku ka tona anu da nangoseaka dota rarara nadaa bo ledo naria Nosa Gasa, apa pomparasayamiu i Kristus dopa naroso. Komiu da mpo ngana kodi.

²Ledo nipakule ngana kodi nangande kandeana ntotua. Ivesia muni komiu. Tempo haitu, nipatudukiku ka komiu pepaduduki masipato ka tona dopa naroso pomparasayara, sabana dopa nipakulemiu mantarima pepaduduki nakaja. Bo sampe sii-sii dopa muni nipakulemiu mantarimana

³apa komiu da nangoseaka dota raramiu nadaa. Komiu da nasiriati bo nosipobali. Pokainggu ivehaitu nompopakita komiu da nangoseaka dota raramiu nadaa nasimbayu mpo tona ledo nosisani ante Alatala.

⁴Saito nanguli, “Yaku hii topangoseaka i Paulus,” bo saito vai nanguli, “Yaku hii topangoseaka i Apolos.” Pokainggumi haitu nompakalanto komiu da mpo tona ledo nosisani ante Alatala.

⁵Pekirimo! Isema yaku? Bo isema i Apolos? Kami aga batua-batua nu Alatala nanggeni komiu nomparasaya i Yesus. Kami aga batua anu simbo nokarajaa pokarajaa nidekei nu Alatala ka kami.

⁶Yaku hii nirapaka topotuda bo i Apolos nirapaka topodundusi. Tapi Alatalamo anu nompakatuvu tuda-tuda.

⁷Topotuda bo topodundusi ledo masipato raparibavo. Anu nopoko, iamo Alatala, apa iamo topompakatuvu tuda-tuda.

⁸Topotuda bo topodundusi nasimbayu, bo ira simbo mantarima tambo nangoseaka kantamo pokarajaara mboto.

⁹Apa kami bo i Apolos nosampokarajaa ante Alatala, bo komiumo nirapaka talua nu Alatala. Komiu muni nirapaka banua nu Alatala.

¹⁰Yaku hii mpo topande novia banua. Lako ri kabelo rara nu Alatala, nianggatakaNa bo nipopompakuleNa yaku novia pandasi banua, bo tona ntanina nombabangu banua ri bavo nu pandasi haitu. Tapi simbo rabanguna pakabelo-belo.

¹¹Apa pandasi anu nipovia mamimo, haitumo i Yesus Kristus. Ledo ria pandasi ntanina.

¹²Ane topokarajaa ka Alatala nabelo pokarajaana, ia namala rarapaka topovia banua anu nombabangu ante bulava, salaka, bo watu nasuli ri bavo nu pandasi haitu. Ane topokarajaa ka Alatala ledo nabelo pokarajaana, ia namala rarapaka topovia banua anu nombabangu ante kayu bara jono bara kada mpae.

¹³„Rapana ane mapapu banua, tantu pareva nabelo nipake novia banua haitu maboli, tapi pareva ledo nabelo mapapu puramo. Ivesia muni ante pokarajaa ntopokarajaa ka Alatala.„ Kabelo nu pokarajaara saito-saito kana rapakalanto bara maipia tempo i Yesus makava mpanjili ri dunia. Pokarajaara haitu rauji nu Alatala ala malanto pokarajaara haitu bara mabelo bara ledo.

¹⁴Ane nabelo pokarajaara rakita nu Alatala, topokarajaa haitu manggava tambo lako nte Alatala.

¹⁵Tapi ane ledo nabelo pokarajaana rakita nu Alatala, ledo maria tambo radekei ka ia. Malipo tambona tapi karna masalama. Ia masimbayu mpo tona napapu banuana bo damo karna nggoo ledo nikande nu apu.

¹⁶Sampesuvu-sampesuvu, ledo nisanimiu komiu nasimbayu mpo banua niponturo nu Alatala? Bo Nosa GasaNa nonturo ri tatangamiu.

¹⁷Isema-sema mombagero banua niponturo nu Alatala haitu, ia kana rahuku nu Alatala, sabana banua haitu nagasa. Toramo! Komiumo banua haitu!

¹⁸Nee mombabagiu karomiu mboto! Ane maria nte komiu tona nompekiri karna mboto napande ri panggita nu manusia, agina ia majadi madoyo ri panggita nu manusia ala ia mpuu-mpuu majadi mapande.

¹⁹Apa anu nireke napande ri panggita nu manusia nadoyo ri panggita nu Alatala. Evamo nitulisi riaru Buku Gasa ivei: “Alatala nompakanavu tona natau ante akalara mboto.” (Ayub 5:13)

²⁰Bo naria tesa ntanina nanguli ivei: “Nisani nTupu ledo ria gunana pekiri ntona natau ri dunia.” (Mazmur 94:11)

²¹Jadi ane ivesia, tumo mangoe ka pakeni-pakenimiu ri dunia hitu. Kakanana pura-pura nidekei nu Alatala ka komiu majadi anumi.

²²I Apolos, i Petrus, bo yaku nidekei nu Alatala ka komiu majadi topotulungi komiu. NidekeiNa muni katuvu nabaru ka komiu bo nikabasakaNa komiu lako ri kamate. Nuapa-nuapa naria riaru dunia hitu, nuapa-nuapa najadi sii-sii bo nuapa-nuapa majadi bara maipia nipakatantu nu Alatala manggeni belo ka komiu. Pura-pura haitu bagiamiu,

²³bo komiu bagia i Kristus, bo i Kristus bagia nu Alatala.

1 Korintus 4

¹Jadi kami pakenimiu kana rarekemiu batua i Kristus. Kami hii niparasayaka nu Alatala mompatolele tesaNa anu dopa nisani ntodea ri dunia.

²Bo anu nopoko ka batua, ira kana matutu mangoseaka parenta nu madikara.

³Jadi bara maria nte komiu tona madota momparesa pokarajaa kami bo mompakatantu bara mabelo bara ledo. Tapi yaku hii, ledo kupeili bara komiu bara tona ntanina mombatangara yaku. Ledo muni kutangara karoku mboto.

⁴Nabula raraku. Pangisaniku mboto, ledo naria anu masipato rapakasala riaru nggatuvuku. Tapi ledo kabula raraku hitu mompakatantu yaku manoa ri panggita nu Alatala. Aga i Pue Yesus mamala mombabotusi bara nasala yaku bara ledo.

⁵Jadi nee komiu masalisa mompakatantu sala ntona ane dopa nakava tempona. Popea sampe i Pue Yesus makava mpanjili ri dunia. Iamo mompakalanto pura-pura anu nitabuniaka ri kalandana sii-sii. Iamo mompakalanto mpengaya-ngaya patuju nitabuniaka riaru ntai manusia. Ri tempo haitu, Alatala mombatoiya isema-sema masipato ratoiyaNa.

⁶Sampesuvu-sampesuvuku, porapa nitesaku ri bavona nipambela ka kami bo i Apolos ala mantulungi komiu. Nialaku jonjo kami randua ala komiu mamala meguru nee meliu lako ri anu nitulisi riaru Buku Gasa. Patujuku ala ledo malanga raramiu bo ledo mantoiya saito batua i Kristus bo manjalai batua ntanina.

⁷Isema nanguli komiu nelabipa pade tona ntanina? Nuapa naria nte komiu anu ledo nidekei nTupu ka komiu? Jadi nakuya komiu nangoe-ngoe? Nisarumakamiu anu naria nte komiu asele mpoviamiu mboto?

⁸Natantu nisarumakamiu nagana puramo nte komiu, nakalumanamo komiu riara mpengaya-ngaya. Nisarumakamiu komiu nompamenta mpo magaumo bo kami ledo. Mabelo mpuu ane makana komiu najadi magau, ala kami muni mamala mompamenta mosanggani-nggani nte komiu!

⁹Tapi kami dopa najadi magau ri dunia. Nangoseaka panggavaku, kami suro-suro i Yesus nipajadi nu Alatala tona nelabi napakasi ri dunia. Kami nasimbayu mpo tona nikeni rahuku mate ri ngayo ntodea, apa kami nikanoto nu isi dunia pura-pura, nau manusia nau malaeka-malaeka nTupu.

¹⁰Kami nireke ntona todayo sabana kami nangoseaka i Kristus. Tapi nangoseaka pekirimiu, komiumo topomparasaya nanoto! Kami nireke ntona nalente tapi nangoseaka pekirimiu, komiumo naroso! Kami nislai ntona tapi komiu nitoiya ntona!

¹¹Sampe sii-sii kami nasaro naara tai bo nabai tambolo. Kami nopakea nte sanjia-njia, kami niboba ntona bo ledo ria ponturo nikaroo kami.

¹²Kami nokarajaa ntamo ante pale kami mboto nangelo katuvua. Ane nipindasi ntona kami, kami nerapi Alatala mombadekei belo ka tona haitu. Ane nipandasa ntona kami, kami bate-batena nosabara.

¹³Ane nislai ntona kami, kami nesana ante tesa nalusu. Kami nipeinta mpo rumpu ri dunia hitu. Sampe sii-sii kami nipeinta mpo tai.

¹⁴Sampesuvu-sampesuvuku, patujuku notulisi hitu ka komiu ledo mompakaeya komiu, tapi mompatuduki komiu mpo ana-anaku anu nipotoveku.

¹⁵Apa nau nonjobu-njobu guru nompatuduki komiu mangoseaka i Kristus, ledo naria najadi tuamamiu. Aga yakumo najadi mpo tuamamiu sabana yaku anu paratama nanggeni Kareba Belo ka komiu bara ipia.

¹⁶Yaku nompotove komiu mpo anaku mboto. Jadi haitu sampe yaku mpuu-mpuu merapi nte komiu, pasialamo pokaingguku.

¹⁷Kutudu i Timotius tou nte komiu ʻmombatulungi komiu mompasiale pokaingguku. Ia topomparasaya i Pue, bo ia mpo anaku mboto anu nipotoveku, bo ia namala raparasaya. Ia mompopatora ka komiu pokaingguku nangoseaka i Yesus Kristus, nasimbayu mpo nipatudukiku ka pura-pura topomparasaya i Yesus ri umba-umba ngata.

¹⁸Naria bara sako-ndua komiu nalanga rara, sabana niulimiu yaku domo tou nte komiu.

¹⁹Tapi ane rapodota nTupu, masalisa yaku tou nte komiu. Bo ane makava yaku, kupeinta mboto nuapa rapovia ntona nalanga rarana haitu. Kupeinta ira bara mpuu-mpuu nakuasa atau aga notesa nggoo.

²⁰Apa ane tona najadi todea riara Poparenta nu Alatala, kuasa nu Alatala rakita riara nggatuvuna, ledo aga tesa-tesa nggoo.

²¹Jadi ane yaku tou nte komiu ri situ, umbana rapokonomiu? Paraluu yaku makava mompokarau komiu apa pokainggumiu dopa nabali? Atau yaku makava ante lusu rara bo asi mata apa nibalikimiumo pokainggumiu?

1 Korintus 5

¹Niepeku lelana naria saito komiu nokainggu nabuga ntoto. Ia nompogau berei ntuanama mboto. Iyapa tona ledo nomparasaya Alatala, ledo nokainggu nadaa ivehaitu!

²Kakanana masipato mabuku raramiu bo maeya matamiu, bo masipato komiu mompopalai topogau haitu lako ri tatangamiu, domo radekei ia masiromu nte komiu mombasomba Alatala. Tapi ledo ivesia komiu. Komiu da nalanga raramiu, nau pokainggu roamiu ivesia!

³⁻⁴Sii-sii yaku nakavao nte komiu, tapi pekiriku naria ri situ nte komiu. Nau karoku ledo ria ri situ nte komiu, yaku da nakuasa moparenta komiu. Jadi, ante kuasa nidekei nTuputa i Yesus ka yaku suroNa, nipakatantukumo pehuku anu masipato rapambela ka tona nokainggu nadaa ivehaitu. Jadi komiu kana masiromu mosanggani-nggani, bo pekiriku maria ri situ nte komiu. Ante kuasa nidekei nTuputa i Yesus ka kita,

⁵kutudu komiu mombadekei tona haitu riaru kuasa Magau nu Seta. Povia ivesia ala karona rahuku bo kaupuna nyawana rapakasalama tempo i Yesus makava mpanjili ri dunia.

⁶Ledo masipato malanga raramiu bo mangoe ka pokainggu ivehaitu. Ledo nisanimiu tona nokainggu nadaa namala manggeni tona ntanina movia nadaa? Tona nokainggu nadaa nasimbayu mpo ragi sakide anu namala mompopenggamba pura-pura gando.

⁷Jadi tedeakamo ragi njaena, „haitumo suvurakamo tona nokainggu nadaa,„ ala komiu majadi todea magasa nasimbayu mpo gando nabaru dopa nambela ragi. Bo komiu nagasa mami, apa i Kristus nipatesi mombasompo dosata nasimbayu mpo ana bimba nipatesi ri Posusa Paskah ntoYahudi.

⁸Sabana haitu, kita muni mosusa madamba. Kita kana mombatedaka ragi njae bo mangande roti ledo noragi. Batuana, kita kana menonto mokainggu nadosa bo matuvu ante pokainggu nabelo bo nanao.

⁹Riaru suraku bara ipia nitulisiku nemo mosimporoa nte tona nokainggu nabuga.

¹⁰⁻¹¹Anu nipatujuku, nemo mosimporoa ante tona nangaku nomparasaya i Yesus, tano mai pokaingguna nabuga, nadoko, nompakande tupu-tupu ntanina, nanjalai tona ntanina, topanginu, atau topangangga. Nemo mosimporoa ante tona ivehaitu. Nau aga mangande mosanggani-nggani nemo! Patujuku ledo mombatagi komiu mosimporoa ante tona anu ledo nosisani ante Alatala bo nokainggu nabuga, anu ledo ria kabasa-basana manggava untu ka karona mboto, topebagiu, bo topompakande tupu-tupu ntanina. Ledo ira nipatujuku. Apa ane komiu ledo moroa nte tona nadosa ri dunia, natantu komiu kana molinja lako ri dunia hitu!

¹²⁻¹³Ledo urusaku mombatangara tona ledo topomparasaya. Alatala mombatangara ira. Tapi kita kana mombatangara todea topomparasaya. Jadi evamo nitulisi riaru Buku Gasa, “Popalaimo tona nadaa lako ri tatangamiu!”

1 Korintus 6

¹Berimba sampe sanu komiu nabia nompangadu sampesuvumiu sampomparasaya ri ngayo ntopotangara anu ledo nomparasaya i Yesus? Ane naria posinggarau, nakuya ledo nikenimiu parakaramiu ratangara ntodea nu Alatala?

²Ledo nisanimiu kita todea nu Alatala mombatangara pura-pura tona ri dunia bara maipia? Jadi ane pura-pura tona ri dunia ratangaramiu, natantu rapakulemiumo mombatangara parakara-parakara nangaa ri tatangamiu mboto!

³Ledo nisanimiu kita topomparasaya mombatangara malaeka-malaeka nTupu bara maipia? Jadi ane rapakulemiu mombatangara malaeka, natantu rapakulemiu mompakaupu parakara biasa ri katuvumiu eo-eo.

⁴Jadi ane maria parakara ivehaitu, rapokuya rakenimiu ratangara ntona anu ledo masipato mangurusi todea topomparasaya?

⁵Niuliku ivesia ala maeya matamiu. Kakanana suga mariamo nte saito komiu nanoto anu nompakule mombatangara parakaramiu simbo topomparasaya.

⁶Tapi ledo ivesia nipoviamiu. Komiu aga nosipangadu ntali sampesuvu sampomparasaya bo nanggeni parakara haitu ratangara ntona ledo topomparasaya i Yesus!

⁷Parakara-parakara haitu, nemopa posipangadu, tandana komiu ledo nokainggu mpo topangoseaka i Yesus. Ane maria tona mombabagiu komiu atau mompakarugi komiu, dekeikamo! Aginapa komiu rabagiu atau rapakarugi ntona pade mompangadu sampesuvumiu sampomparasaya!

⁸Tapi ledo ivesia nipoviamiu! Komiu mbotomo nombabagiu bo nompakarugi tona bo nipoviamiu muni ka sampesuvumiu sampomparasaya!

⁹Jadi, ledo nisanimiu tona ledo nangoseaka dota nu Alatala ledo ntoto manggava bagia riaru Poparenta nu Alatala? Nee sampe komiu rabagiu! Tona nokainggu nabuga, tona nompakande tupu-tupu ntanina, tona nobualo, bo tona nompogau simbo langgai atau simbo mombine, ira pura-pura ledo ntoto manggava bagia riaru Poparenta nu Alatala.

¹⁰Ivesia muni ante topangangga, tona ledo ria kabasa-basana manggava untu ka karon mboto, tona nanginu sampe nalangu, tona nanjalai-lai roa, bo topeago. Ira muni ledo ntoto manggava bagia riara Poparenta nu Alatala.

¹¹Bara ipia bara sako-ndua komiu nokainggu ivesia muni. Tapi katuvumiu nipakagasa nu Alatala. Komiu najadi todeaNa nipatani ka Ia, bo komiu nipakanoa ri panggitaNa. Haitu pura-pura najadi ante kuasa Nosa Gasa nu Alatala sabana komiu nomparasaya i Pue Yesus Kristus.

¹²Sanu komiu nanguli kita mamala movia nuapa-nuapa nipodotata. Tapi panguliku ledo pura-pura pokainggu nanggeni belo ka kita. Nakana kita mamala movia nuapa-nuapa nipodotata, tapi ledo kupalamba karoku rakuasai nuapa-nuapa.

¹³Sanu muni nanguli kande nipasadia rakande, bo tailiko nipovia rapangisi kande. Bo kande bo tailiko rapakaropu nu Alatala pura bara maipia. „Jadi, nisarumakamiu ledo makuya nuapa-nuapa rapoviata ante karota. Kakanana ledo ivesia.„ Karota ledo nipovia mompogau tona ledo bereita mboto. Tapi karota nipovia ala rapaketa movia dota i Pue. Iamo Tupu nu karota.

¹⁴„Bo karota ledo ratedaka nu Alatala.„ Ante kuasaNa mboto Alatala nompakatuvu mpanjili i Pue Yesus lako ri kamateNa, bo ivesia muni kita rapakatuvuNa mpanjili lako ri kamateta.

¹⁵Ledo nisanimiu karota nasimbayu ante sipa nu karo i Kristus? Jadi ledo ntoto masipato kita mompake karota, anu nasimbayu ante sipa nu karo i Kristus, bo mompogau bajinga.

¹⁶Ledo nisanimiu tona mompogau bajinga najadi saito ante ia? Nisanita apa nitulisi riara Buku Gasa ivei: „„Ane tona moberei,„ ira randua majadi saito.„ (Kajadia 2:24)

¹⁷Tapi isema-sema nomparasaya i Pue Yesus, najadi nosangu rara nte Ia.

¹⁸Nemo mpuu rapogaumiu tona ledo bereimiu mboto! Apa dosa haitu ledo ria kasimbayuna. Isema-sema mompogau tona ledo bereina mboto, mpuu-mpuu nompakagero posangu rarana ante i Pue.

¹⁹Ledo nisanimiu karomiu nasimbayu mpo banua petupu anu niponturo Nosa Gasa nu Alatala? Ia natetida riara ntaimiu. Alatala mboto nombadekei Nosa Gasa ka komiu. Iamo Tupu nu karomiu, ledo komiu mboto tupuna.

²⁰Komiu nitolosi nu Alatala bo nibayariNa pakaupumo. Haitumo sabana komiu masipato matuvu ante pokainggu nabelo ala Alatala rabila.

1 Korintus 7

¹Hitupa yaku madota mesanaka pompekutanamiu anu nitulisimiu riara sura. Ane langgai ledo moberei, nabelo.

²Tapi nabelopa ane langgai simbo maria bereina mboto, bo mombine simbo maria bereina mboto ala ledo rapesori mogau sala.

³Berei langgai kana mangoseaka dota bereina mombine mosampaturu, bo ivesia muni bereina mombine.

⁴Sabana ledo aga berei mombine nakuasa mompakatantu nuapa rapovia ri karonu mboto, tapi bereina langgai muni. Bo ivesia muni ledo aga berei langgai nakuasa mompakatantu nuapa rapovia ri karonu mboto, tapi bereina mombine muni.

⁵Nee mogaa mosampaturu ane ledo ria posimpoiomyu njamboko. Ane rapana komiu mangelo loga mosambaya, ledo makuya komiu mogaa mosampaturu bara sakuya kasaena ane raposimpoiomyu njamboko. Tapi ane maupumo tempo nipakatantu haitu, komiu kana manjili mosampaturu ala nee komiu rapesori Magau nu Seta mogau sala sabana komiu ledo mamala mantaamaka dota raramiu.

⁶Tesaku hitu ledo parenta, tapi ane tona njamboko nosimpoiyo ledo mosampaturu bara sakuya kasaena, namala, ledo nakuya.

⁷Kakanana nipokonokupa ane pura-pura tona maloa mpo yaku. Tapi pura-pura tona nidekeika pompakulena mboto lako nte Alatala. Naria tona nompakule matuvu maloa sampe mamate, tapi naria ntanina ledo nidekeika pompakule haitu.

⁸Kapolana, ane tona dopa noberei bo timbala-timbala, nabelopa ane ira matuvu maloa masimbayu mpo yaku.

⁹Tapi ane ledo rapakulera mantaamaka dotara, agina moberei. Apa nabelopa moberei pade mandasa mantamaaka dota moberei.

¹⁰Ivei parentaku ka komiu topoberei. Papatuduki hitu ledo lako nte yaku mboto, tapi tesa i Pue Yesus. Berei mombine ledo mamala mogaa ante bereina langgai.

¹¹Tapi ane rapana ia mogaa, domo mamala ia moberei. Ia kana maroo matuvu maloa atau manjili mpanjili nte bereina langgai. Bo berei langgai ledo mamala mogaa nte bereina mombine.

¹²Bo iveimo papatudukiku ka tona ntanina [haitumo, tona noberei nte tona ledo topomparasaya i Kristus]. Papatuduki hitu lako nte yaku mboto, ledo ria parenta niuli i Pue Yesus bara ipia ri dunia. Ane naria langgai topomparasaya bo bereina mombine ledo nomparasaya i Kristus, tapi mombine haitu madota maroo matuvu mosangani-nggani nte ia, langgai haitu ledo mamala mogaa nte bereina.

¹³Bo ane naria mombine topomparasaya bo bereina langgai ledo nomparasaya i Kristus, tapi langgai haitu madota maroo matuvu mosangani-nggani ante ia, mombine haitu ledo mamala mogaa ante bereina haitu.

¹⁴Apa ana-anara nireke bagia nu Alatala sabana saito totuara nomparasaya i Kristus. Bereina anu ledo nomparasaya i Kristus nireke bagia nu Alatala sabana bereina topomparasaya. Ane ledo ivesia, ana-anara masimbayu mpo ana-ana ntona ledo nomparasaya.

¹⁵Tapi ane berei langgai atau berei mombine anu ledo nomparasaya i Kristus madota mogaa ante bereina topomparasaya, nee ratagi ira mogaa. Ane ivesia, berei langgai atau mombine topomparasaya domo nipou ada poberei, apa Alatala madota ala komiu matuvu mosinggabelo.

¹⁶Tapi dopa nisanimiu anu majadi. Bara berei mombine topomparasaya mamala manggeni bereina langgai momparasaya i Kristus bo rapakasalama.

Bara berei langgai topomparasaya mamala manggeni bereina mombine momparasaya bo rapakasalama.

¹⁷Pura-pura tona kana matuvu nangoseaka pantuu i Pue Yesus ka ia. Pura-pura kana matuvu batena mpo tempo ia nipokio nu Alatala momparasaya i Kristus. Haitumo atura nipatudukiku ka pura-pura topomparasaya.

¹⁸Jonjona, ane toYahudi anu nisuna tempo ia nipokio nu Alatala majadi topomparasaya i Kristus, nee ia mompasimbuku mompakalipo tanda posuna haitu. Ivesia muni ane tona dopa nisuna tempo ia nipokio nu Alatala majadi topomparasaya i Kristus, nee ia merapi rasuna.

¹⁹Apa ledo ria gunana ane kita mangoseaka ada posuna bo ledo muni naria gunana ane kita ledo mangoseaka ada haitu. Anu noguna ntoto, haitumo, mangoseaka parenta-parenta nu Alatala.

²⁰Pura-pura tona kana matuvu batena mpo tempo ia nipokio nu Alatala majadi topomparasaya i Kristus.

²¹Ane komiu najadi batua tempo komiu nipokio nu Alatala, nee masusa raramiu mompekirika haitu, ledo nakuya komiu najadi batua. Tapi ane rakavamiu loga makabasaka lako ri pepobatua, aginamo komiu makabasaka.

²²Toramo! Tona anu najadi batua tempo ia nipokio majadi topomparasaya i Yesus, naupa ia batua tapi nikabasaka i Pue Yesusmo ia lako ri dosana. Bo tona ledo nipobatua tempo ia nipokio nu Alatala, ia najadi mpo batua sabana ia nekou nte i Kristus.

²³Toramo! Komiu nitolosi nu Alatala bo nibayariNa pakaupu. Sabana haitu, nee sampe komiu majadi batua nu manusia.

²⁴Jadi sampesuvu-sampesuvu, nau bara berimba pantuu ka komiu tempo komiu nipokio majadi topomparasaya i Kristus, komiu kana batena matuvu mosangani-nggani ante Alatala riaru nggatuva nituu ka komiu.

²⁵Ane pompekutanamiu ka tona dopa noberei, ledo ria parenta lako nte i Pue Yesus. Tapi kutesa ka komiu panggavaku mboto. Bo tesaku hitu masipato

raparasayamiu sabana pompakule nidekei nTupu ka yaku lako ri pompotoveNa.

²⁶Jadi ivei panggavaku: nantora mpengaya-ngaya pepandasa nirasai ntopomparasaya sii-sii, nabelopa ane katuvumi ledo rabalikimiu.

²⁷Rapana, ane komiu nobereimo, nemo raelomiu dala mogaa ante bereimiu. Ane komiu dopa noberei, domo mangelo poberei.

²⁸Tapi ane rapana komiu moberei, haitu ledo madosa. Bo ane randaa moberei ledo rapodosana. Tapi toramo, topoberei tantu mantingayo mpengaya-ngaya kasusa riarra nggatuvura. Bo anu kupodota ala komiu ledo rapambela kasusa haitu.

²⁹Sampesuvu-sampesuvuku, patujuku ivei: kita topomparasaya kana mantora tempota domo masae. Jadi nompamula sii-sii tona nobereimo nee aga mompekirika bereina.

³⁰Bo tona notumangi ante susa rara, nee aga mompekirika kasusa rarana. Tona nadamba nemo aga mompekirika kadamba nu rarana. Tona nopagoli nemo aga mompekirika balu-baluna.

³¹Bo tona nompasimbuku mbara-mbara dunia hitu nemo aga mompekirika mbara-mbarana. Apa dunia nisanita sii-sii, domo masae malipo.

³²Anu nipodotaku ala komiu matuvu ledo masesa rara. Tona dopa noberei namala mompakasangu pekirina ka pokarajaa i Pue. Nipekirikana berimba ia mamala mompakadamba rara i Pue.

³³Tapi tona nobereimo kana mompekirika mpengaya-ngaya ri dunia hitu. Ia kana mompekirika berimba ia mompakadamba rara bereina mombine

³⁴sampe pekirina matebagi-bagi. Mombine-mombine domo noberei bo randaa-randaa namala mompakasangu pekirira ka i Pue. Nipekirikara berimba katuvura bo pekirira rara ntaira mamala magasa ri panggita nu Alatala. Tapi mombine-mombine nobereimo kana mompekirika mpengaya-ngaya ri dunia hitu. Kana rapekirikara berimba mompakadamba rara bereina langgai.

³⁵Yaku notesa ivesia ka komiu ala mantulungi komiu, ledo ala mompandasa komiu ante mpengaya-ngaya atura. Tapi patujuku ala komiu movia anu nakana bo masipato ri panggita nu Alatala, bo ala komiu maroo mangoseaka i Pue ante pekiri ledo matebagi-bagi.

³⁶Ane maria langgai nompekirika pokainguna domo masipato nte tengena, bo tengena haitu nantambaimo umuruna sampe nirasaina ira kana moberei, agina ia movia anu nipodotana haitu. Agina ira moberei, haitu ledo rapodosana.

³⁷Tapi ane maria langgai nompekiri nabelopa ia ledo mompoberei tengena, bo ane katantuna haitu nipoviana mboto bo ledo nipasuu ntona, bo ane ia mamala mombakuasai dotana, nabelopa ia ledo moberei.

³⁸Jadi langgai anu mompoberei tengena novia anu nabelo, tapi langgai ledo mompobereina novia anu nelabipa kabelona.

³⁹Mombine anu nobereimo nikingisi nu ada poberei ane bereina langgai da natuvu. Tapi ane bereina langgai namatemo ia mamala rapoberei nu langgai ntanina anu nipokonona. Tapi ia kana moberei ante langgai anu nomparasaya i Pue Yesus.

⁴⁰Nangoseaka panggavaku, masanapa ia ane ledo moberei mpanjili. Nau panggavaku mboto, niparasayaku Nosa Gasa nanggeniaka yaku.

1 Korintus 8

¹Kapolana, nipekutanamiu kande nipakande ka tupu-tupu ntanina. Nakana mami niulimiu kita pura-pura napande. 「Nisanita ledo ria tupu ntanina aga Alatala.」 Tapi kuuli ka komiu, kapande nompakalanga rarata. Aginapa mompotove roa sabana pepotove nompakaroso rara ntona.

²Isema-sema nompekiri nadeamo nisanina, kakanana dopa nisanina mpuu anu masipato rasanina.

³Tapi isema-sema mpuu-mpuu nompotove Alatala, ia niposisani nu Alatala.

⁴Jadi ane motesa kandeana nipakande ka tupu-tupu ntanina, nisanitamo pinoito nogambara anu ledona nakana. Bo nisanita muni Alatala aga saito, ledona ria ntanina.

⁵Naria mamimo mpengaya-ngaya anu nisomba nu manusia, anu niuli tupu bo karampua nau ri langi nau ri tana.

⁶Tapi ane kita topomparasaya, nisanita aga saito Alatala nakana. Iamo Tuamata anu nompajadi pura-pura anu naria ri dunia. Iamo nombadekei katuvu ka kita ala kita mombasomba Ia. Bo aga saito Tuputa, i Yesus Kristus anu nipopale nu Alatala nompajadi pura-pura anu naria, bo lako nte Ia sampe natuvu kita.

⁷Tapi naupa ivesia, ledona pura-pura topomparasaya nangisani anu haitu. Dopame ira nomparasaya i Kristus, sanu topomparasaya nabiasa nompakande tupu-tupu ntanina. Jadi sampe sii-sii ane rakandera kandeana anu nipakande ka tupu-tupu ntanina, kandeana haitu nirekera mpuu-mpuu kandeana nu tupu-tupu haitu. Ane mangande kandeana haitu, nirasaira nadosa, apa dopa naroso pomparasayara.

⁸Kandeana ledona ntoto mantambai posinggabelota nte Alatala bo ledona muni mogaaraka kita lako nte Alatala. Ane rakandeta, ledona mauntu kita. Bo ane ledona rakandeta, ledona muni marugi.

⁹Tapi sampesuvu-sampesuvu, pakabelo-belo! Nau nisanimiu ledona makuya mangande kandeana haitu, nee sampe tona anu dopa naroso pomparasayana rapakenimiu mangande kandeana haitu, sampe ia manavu riara dosa.

¹⁰Patujuku ivei: Nisanimiu ledona nakuya mangande kandeana haitu. Tapi rapana, komiu hau mangande ri banua pesomba ka viata, bo rakita ntona anu dopa naroso pomparasayana. Natantumo ia muni mabia mangande kandeana nipesomba ka viata atau tupu-tupu ntanina haitu.

¹¹Kaupuna, anu nisanimiu haitu nompakagero pomparasayana [apa nituntunina komiu novia anu nirasaina nadosa.] Tano mai ia sampesuvumiu sampomparasaya anu nitolo ante raa i Kristus.

¹²Pokainggumiu ante sampesuvumiu haitu nasala sabana pokainggumiu nanggeni ia novia anu nirasaina nadosa sabana pomparasayana dopa naroso. Bo pokainggumiu haitu nadosa ri panggita i Kristus.

¹³Jadi, sampesuvu-sampesuvu, ane kandeana anu nikandeku mompakagero pomparasaya nu sampesuvuku, domo kukande kandeana haitu ala nee yaku mompakagero pomparasayana.

1 Korintus 9

¹Yaku hii nakuasa novia nuapa-nuapa nipodotaku. Yaku hii suro i Yesus. Yaku mboto nanggita Tuputa i Yesus. Bo komiu mbotomo asele pokarajaa nipoviaku ka i Pue.

²Nau ri panggita ntona ntanina yaku ledo nireke suro i Pue Yesus, natantu kana rarekemiumo yaku suroNa mami! Pomparasayamiu i Pue Yesusmo nompakalanto yaku hii mpuu-mpuu suroNa.

³Ane maria tona mompakasala yaku sabana pokaingguku mpo suro i Pue, ivei pesanaku:

⁴Kami suro i Yesus natantumomo masipato mantarima kandeana bo panginu lako nte todea topomparasaya.

⁵Natantumomo kami muni masipato moberei nte topomparasaya bo manggeni berei kami mosangani-nggani riarapolipa kami, nasimbayu mpo anu nipovia nu suro-suro ntanina bo sampesuvu-sampesuvu i Pue Yesus mboto bo i Petrus.

⁶Atau nisarumakamiu aga yaku bo i Barnabas kana mokarajaa ante pale kami mboto mompaelo? Ledo masipato kami muni ratande ntodea topomparasaya?

⁷Natantu ledo ria saitoa tantara nombatanggu katuvuna mboto tempo posieva. Katuvuna kana ratanggu pakenina. Topokarajaa talua anggur masipato mangande asele ntaluana. Bo topoevu tovau atau bimba masipato manginu susu lako ri binatangana.

⁸Porapa haitu lako ri katuvuta eo-eo. Tapi naria muni pepatuduki nasimbayu riarap Atura-atura agama Yahudi.

⁹Riara Buku Atura Agama nitulisi Nabi Musa, nitulisi ivei: “Nee mombaramu sumba nu japi tempo mantulungi tupuna moini pae. Palambakamo rakandena sakide pae!” Jadi berimba nitaseremiu, aga japi nipariara nu Alatala?

¹⁰Natantu kitamo nipatujuNa ante tesa haitu! Tesa haitu nitulisi rarapaka katuvuta manusia. Topopajeko bo topomporo kana mokarajaa ante manjarumaka mantarima sabagia lako ri asele ntana nikarajaara haitu.

¹¹Kami suro-suro i Yesus nombasavu Tesa nu Alatala riara ntaimiu. Jadi, ledo masipato kami manjarumaka petanggumiu sakide?

¹²Iyapa guru-guru ntanina masipato manjarumaka petanggumiu, nemopa kami! Tapi kami ledo sanggania nerapi petulungi haitu. Kami aga nombatidamaka riara mpengaya-ngaya kasusa ala ledo mompakantamo tona mombatanggu katuvua kami sampe mombalava ira mantarima Kareba Belo i Kristus.

¹³Natantu nisanimumo topokarajaa ri Banua nu Alatala nanggava kandeara lako ri pesomba nipesomba ka Tupu ri Banua nu Alatala haitu. Bo tona nombatulungi todea nanggeni pesombara ri lanta pesomba nanggava sabagia lako ri anu nipesomba haitu.

¹⁴Ivesia muni i Pue Yesus nompakatantu ala topanggeni Kareba Belo matuvu lako ri petulungi ntona anu nantarima Kareba Belo haitu.

¹⁵Tapi nau naria nturoku merapi ivesia, ledo sanggania niperapiku ratanggumiu. Bo ledo muni nitulisiku sura hitu ala komiu mompamula mombatanggu katuvuku! Nadamba raraku sabana dopa niperapiku nte komiu bo aginapa yaku mamate pade kadambaku haitu rapakalipo ntona!

¹⁶Apa ane yaku mompatolele Kareba Belo, ledo masipato yaku mangoe bo mompakalanga rara, sabana yaku nisuro nu Alatala mompatolelena. Mandasa yaku ane ledo kupatolele Kareba Belo!

¹⁷Ane rapana dotaku mboto mompatolele Kareba haitu, tantu masipato yaku manggava tambo. Tapi ledo ivesia yaku. Yaku mompatolele Kareba Belo, ledo

lako ri dotaku mboto. Bara kupodota bara ledο, kana kupatolele Kareba Belo apa haitumo pokarajaa niparasaya nu Alatala ka yaku.

¹⁸Jadi nuapa tamboku? Nadamba raraku nompatolele Kareba Belo ledο nerapi gaji bo ledο muni nerapi petulungi anu masipato kutarima lako ri pokarajaaku nompatolele Kareba Belo. Kadambaku haitumo nirekeku tamboku.

¹⁹Yaku hii ledο batua ntona, namala natuvu nangoseaka dotaku mboto. Tapi nitunggaiku natuvu mpo batua ka pura-pura tona. Nipoviaku ivesia ala madea mpuu tona kukeni momparasaya i Yesus.

²⁰Jonjona, ane yaku nosanggani-nggani nte toYahudi, yaku nokainggu mpo toYahudi. Ane yaku nosanggani-nggani nte tona anu nangoseaka Atura-atura agama Yahudi, yaku nangoseaka Atura-atura haitu naupa yaku mboto domo nipou nu Atura-atura haitu. Patujuku ala mamala kukeni ira momparasaya i Yesus.

²¹Ivesia muni ane yaku nosanggani-nggani nte tona ledο nisanina Atura-atura agama Yahudi, yaku nokainggu mpo tona ledο nangisani Atura-atura haitu. Patujuku ala mamala kukeni ira momparasaya i Yesus. Tapi nee rauli yaku ledο nangoseaka parenta-parenta nu Alatala, apa yaku hii mpuu-mpuu nangoseaka parenta-parenta i Kristus!

²²Ane yaku nosanggani-nggani nte tona ledο naroso pomparasayana, yaku najadi nasimbayu mpo ira ala yaku mamala mantulungi mompakaroso pomparasayara. Yaku nangoseaka mpengaya-ngaya pokainggu bo kabiasa ntona ala yaku mamala manggeni sanu ira momparasaya.

²³Haitu pura-pura nipoviaku ala madea mpuu tona momparasaya Kareba Belo bo ala yaku mboto manggava belo nijanji ri Kareba Belo haitu.

²⁴Natantu nisanimiumo ri posilumba, pura-pura topangova mangova, tapi aga saito nanggava hadia padagi. Jadi komiu muni kana mokainggu mpo topangova: pasimbukumo ante mpuu-mpuu rara ala rakavamiu hadia.

²⁵Tona nantuntuni posilumba kana meguru mombakuasai karonu mboto riaru mpengaya-ngaya. Rapoviana ivesia ala manggava hadia padagi anu ledο

mainti, haitumo sangaya talidangga bunga anu aga sampalai malelemo. Tapi kita hitu neguru nombakuasai karota ala rakavata hadia mainti sampe ri kasae-saena.

²⁶Jadi haitumo sabana yaku ledo nangova sambara. Yaku ledo nojaguru mpo tona aga nombajaguru luona.

²⁷Tapi yaku neguru nombakuasai karoku mboto ala ledo mangoseaka dota raraku nadaa, mbelaka maupu kupatolele Kareba Belo ka tona ntanina, yaku mboto ledo manggava hadia.

1 Korintus 10

¹Sampesuvu-sampesuvuku, toramo anu najadi ante totuata nggaulu tempo ira nangoseaka Nabi Musa. Ira pura-pura nilenduti nu tinja kulimu tandana Alatala nosangani-nggani nte ira, bo pura-pura ira nasalama nombavote Tasi Lei.

²Ira pura-pura nilenduti nu kulimu bo noliu rantasi, nangoseaka i Musa. Ivesia muni kita nidiu tandana kita topangoseaka i Yesus.

³⁻⁴Ira pura-pura nangande kandeana nasimbayu, anu nidekei nu Alatala ante kuasaNa. Bo ira pura-pura nanginu uve nasimbayu, anu nipopoili nu Alatala lako ri vatu. Bo vatu haitu nirapaka i Kristus mboto anu naria nosangani-nggani nte ira.

⁵Tapi naupa nadea belo nidekei nTupu ka ira, nadea ira ledo nipodamba nu Alatala sampe ira nipakamate nggalako dala ri karava bai.

⁶Haitu pura-pura najadi jonjo mompopatora ka kita ala kita nee maino ka anu nadaa mpo anu nipovia ntotuata haitu.

⁷Jadi nee kita metupu nte tupu-tupu ntanina mpo anu nipovia roara ntanina. Riaru Buku Gasa naria nitulisi pokainggura [tempo nombasomba japi bulava] haitu ivei: “Todea haitu nonturo nangande nompebasa, nanginu, nosusa-susa sampe nadea poviara ledo masipato.” (Pesuvu 32:6)

⁸Nee kita mosimpogau ante tona ledo bereita mboto mpo anu nipovia roara ntanina. Toramo! Riara saeo, ropulu bo talu-njobu ira namate singgani-nggani sabana poviara haitu.

⁹Nee kita mangopa rau nTupu mpo anu nipovia roara ntanina sampe ira namate niteo nu ule!

¹⁰Bo nee kita mongau mpo pongau roara ntanina. Topongau haitu nipatesi nu malaeka kamatea.

¹¹Haitu pura-pura najadi nte ira ala mompopatora ka tona ntanina. Bo kajadia-kajadia haitu nitulisi riara Buku Gasa ala majadi pepatora ka kita anu natuvu sii-sii ri tempo napara kaupu nu dunia.

¹²Jadi isema-sema nompekiri narosomo pomparasayana bo ledo mamala rapesori, pakabelo-belo! Nee sampe ia muni manavu riara dosa!

¹³Pura-pura pesori anu nambela komiu nasimbayu ante pesori-pesori anu nipambela ka pura-pura manusia. Tapi Alatala namala raparasaya mantulungi komiu. Ledo rapalambaNa komiu rapesori ante pesori anu melabi lako ri pompakulemiu. Tempo komiu rapesori, Ia mompopaisani dala ka komiu ala komiu maroso bo maroo raramiu mombatidamaka riara pesori haitu.

¹⁴Jadi sampesuvu-sampesuvu nipotoveku, haitumo sabana kuuli ka komiu, nee mpuu metupu nte tupu-tupu ntanina.

¹⁵Komiu tona napande, jadi coba taseremi mboto tesaku hitu bara nakana bara ledo.

¹⁶Tempo kita nanginu uve anggur nantora raa i Kristus natiti ri kayu salib, niulita tarima kasi ka Alatala bo nanginu sanggani-nggani. Haitu tandana kita todea i Kristus anu nitolosiNa ante raaNa. Bo tempo kita notubi-tubi roti bo nangande nosanggani-nggani nantora kamate i Kristus, haitu tandana kita bagia nu karo i Kristus.

¹⁷Nau kita nadea, kita pura-pura najadi sangu karo sabana roti sangu haitu nikandeta nosanggani-nggani.

¹⁸Pekiri munimo kabiasa ntoYahudi. Ira nasiromu nangande sabagia kande nipesomba ka Alatala ri lanta pesomba. Isema-sema nangande kande haitu, nireke ia muni nombasomba Alatala nosangani-nggani nte topesomba. „Ane ivesia, tantu isema-sema nangande kande nipesomba ka tupu ntanina, nireke ia muni nombasomba tupu ntanina haitu.”¹⁹Jadi nuapa patuju ntesaku hitu? Panguliku nakana tupu-tupu ntanina haitu? Naria gunana kande nipakandeka tupu-tupu ntanina? Natantu ledo!

²⁰Tapi patujuku ivei: Kande nipakande ntona ka tupu-tupu ntanina kakanana nipakande ka seta-seta, ledo nipakande ka Alatala. Bo patujuku ala komiu ledo mosangani-nggani mantuntuni tona nombasomba seta-seta.

²¹Ledo ntoto masipato komiu manginu uve anggur mantora kamate i Pue Yesus bo rainumiu muni panginu ri posusa mombabila seta-seta. Ledo ntoto masipato komiu monturo mangande roti mantora kamate i Pue Yesus, bo rakandemiu muni kande ri posusa pombabila seta-seta.

²²Kita aga mombaopa rau rara nTupu ane ratuntunita toposomba seta-seta! Atau nisarumakamiu kita nakuasapa pade Tupu?

²³Yaku namala novia nuapa-nuapa nipodotaku, tapi ledo pura-pura nanggeni belo ka yaku. Yaku namala novia nuapa-nuapa nipodotaku, tapi ledo pura-pura mompakaroso rara ntodea topomparasaya.

²⁴Nee aga mompekirika kabelo karomiu mboto, tapi pekirika muni kabelo ntona ntanina.

²⁵Komiu mamala mangande mpengaya-ngaya bau nipobalu ri potomu. Ledo paraluu rapekutanamiu bau haitu bara nipesomba ka tupu-tupu ntanina. Ledo paraluu monggai-nggai raramiu nompekirika bara nasala mangande bara ledo.

²⁶Apa riaru Buku Gasa nitulisi ivei: “Njumangu dunia bo pura-pura isina anu nTupu.” (Mazmur 24:1)

²⁷Ane komiu ragaga ntona ledo topomparasaya mangande ri banuana, bo komiu madota mangande ante ia, kandemo nuapa-nuapa ratibo ka komiu. Ledo

paraluu rapekutana kande haitu bara nipakande ka tupu-tupu ntanina. Ledo paraluu monggai-nggai raramiu mompekirika bara nasala bara ledo.

²⁸Tapi ane maria tona manguli ka komiu, “Kande hitu nipakande ka tupu-tupu ntanina,” nee rakandemiu kande haitu ala ledo monggai rara nu roa mompekirika bara nasala bara ledo.

²⁹Patujuku, ledo ponggai raramiu nipekiriku tapi ponggai rara nu roa. Tapi bara maria tona manguli, “Nakuya dotaku mamala ralava ntona ntanina?”

³⁰Ane kuuli tarima kasi ka Alatala dopame kukande kande haitu, nakuya rapakasala ntona yaku?”

³¹Jadi sampesuvu-sampesuvu, nuapa-nuapa rapoviamiu, nau mangande nau manginu, nau povia ntanina, povia puramo ala Alatala rabila bo ratoiya.

³²Nee sampe pokainggumiu manggeni tona ntanina manavu riara dosa, nau toYahudi nau tona ledo toYahudi, nau todea topomparasaya Alatala.

³³Yaku mboto nompasimbuku matuvu mompakadamba pura-pura rara ntona riara mpengaya-ngaya pokaingguku. Yaku ledo aga nompekirika kabelo karoku mboto tapi yaku nompekirika kabelo ntona pura-pura, ala ira pura-pura mamala rapakasalama.

1 Korintus 11

¹Jadi pasialamo pokaingguku nasimbayu mpo yaku mboto nompasiala pokainggu i Kristus.

²Sampesuvu-sampesuvu, yaku nantoiya komiu sabana komiu batena nantora yaku riara mpengaya-ngaya, bo komiu naroo nangoseaka pepatuduki nipatudukiku ka komiu.

³Tapi hitu paraluu rasanimiu: langgai pakeni nu bereina mombine, i Kristus pakeni nu langgai, bo Alatala pakeni i Kristus.

⁴Jadi ane riara kasiromumiu naria langgai nosambaya atau nompasimbayu tesa nitarimana lako nte Alatala bo nibonggona balenggana, ia ledo nombabila i Kristus, pakenina.

⁵Bo ane riara kasiromumiu naria mombine nosambaya atau nompasimbayu tesa nitarimana lako nte Alatala bo ledo nibonggona balenggana, ledo nabelo. Apa [nangoseaka kabiasata,] mombine ledo nombabonggo balenggana ledo nombabila bereina langgai pakenina. Ledo ria posisalana mombine haitu ante mombine nigau buluana tandana ledo ria eya nu matana.

⁶Ane mombine ledo madota mombabonggo balenggana, aginamo ragausi buluana. Tapi ane maeya matana buluana ragau, agina rabonggona balenggana.

⁷Ledo masipato langgai mombabonggo balenggana tempo nosambaya atau nompasimbayu tesa nu Alatala, sabana ia nipajadi mpo polenje nu Alatala mboto ala kaoge nu Alatala rakita. Tapi mombine nipajadi ala kaoge nu langgai rakita.

⁸Apa ri pamulana langgai ledo nipajadi lako ri mombine, tapi mombine nipajadi lako ri langgai.

⁹Bo ivesia muni mombine nipajadi nu Alatala ala maria roa nu langgai, ledo langgai nipajadi ala maria roa nu mombine.

¹⁰Haitu sampe mombine masipato mombabonggo balenggana tandana ia nekou nte bereina langgai, bo muni sabana pokaingguna haitu rakita nu malaeka-malaeka nTupu.

¹¹Tapi toramo! Riara nggatuvuta topomparasaya i Pue Yesus, langgai bo mombine nosiparaluu.

¹²Naupa ri pamulana mombine nipajadi lako ri karo langgai, hitupa pura-pura langgai nipoanaka nu mombine. Bo pura-pura langgai bo mombine nopuna lako nte Alatala.

¹³Pekirimi mbotomo. Masipato mombine mosambaya ka Alatala riara kasiromumiu ante balengga ledo nibonggo? Natantu ledo.

¹⁴Nangoseaka kabiasa naria nte kita mboto, nisanita ane langgai nandoe buluana, haitu nepakaeya.

¹⁵Tapi ane mombine nandoe buluana, haitu nompakagaya ia. Apa mombine nipopobulua rapotutui balenggana.

¹⁶Ane maria tona madota mosinjanaika pepatuduki hitu, aga sangaya kuuli ka ira: Ledo ria kabiasa ntanina nioseaka kami bo pura-pura todea topomparasaya Alatala.

¹⁷Kapolana, naria bara sako-ngaya kuuli ka komiu. Tapi ledo mpuu kutoiya pokainggumiu. Sabana, ane komiu nasiromu nosanggani-nggani mombasomba Alatala, kasiromumiu haitu ledo nanggeni belo ka komiu, tapi aga nanggeni daa.

¹⁸Paratama, niepeku ane komiu nasiromu, komiu natebagi-bagi bo nosinjanai. Bo tantu nakana sanu kareba haitu.

¹⁹Komiu kana matebagi-bagi mami ala rasani isema komiu mpuu-mpuu nangoseaka i Yesus!

²⁰Tempo komiu nasiromu mosanggani-nggani, pokainggumiu ledo masipato ka tona masiromu mangande roti bo manginu uve anggur mantora kamate i Pue Yesus.

²¹Apa ane komiu nangande, komiu aga nompago mangala kandeamiu bo panginumiu mboto bo ledo nompopea roa sampe naria tona ledo nanggava kande nuapa-nuapa, bo naria ntanina aga nanginu sampe nalangu.

²²Nakuya ivesia? Ledo ria banuamiu mboto rapangandemiu bo rapanginumiu? Nakuya komiu nompandaente kasiromu ntodea topomparasaya Alatala? Nakuya komiu nompakaeya tona ledo nompakule manggeni kande ri kasiromu haitu? Nuapa masipato kuuli ka komiu? Masipato kutoiya pokainggumiu haitu? Natantu ledo! Ledo ntoto masipato kutoiya pokainggumiu tutu!

²³Nipatudukikumo ka komiu bara ipia batuana nangande bo nanginu nosanggani-nggani mantora kamate i Yesus. Pepatuduki haitu nitarimaku lako nte i Pue Yesus mboto. Bongi i Pue Yesus nipobalu ka baliNa, nialaNa roti,

²⁴bo niuliNa tarima kasi ka Alatala. Naupu haitu nitubi-tubiNa roti haitu bo niuliNa, “Roti hitu karoKu Kudekei mombatolosi komiu. Kandemo roti hitu mantora Yaku.”

²⁵Bo ivesia muni naupu ira nangande, nialaNa saboda uve anggur bo niuliNa, “Panginu hitu tandana Pojanji nu Alatala nabaru rapakaasa ante raaKu. Nggani-nggani komiu manginu panginu ada hitu, inumo rapombatora Yaku.”

²⁶Apa nggani-nggani komiu mangande roti bo manginu uve anggur hitu, komiu mompatolele kareba kamate i Pue Yesus sampe Ia makava mpanjili ri dunia hitu.

²⁷Jadi, isema-sema nangande roti atau nanginu uve anggur i Pue Yesus ante pekiri ledo masipato, ia nadosamo ri ngayo i Pue Yesus sabana nipandaentena karoNa bo raaNa.

²⁸Jadi pura-pura tona kana raparesana ntani ruru rara ntaina mboto. Bo maupu haitu pade mamala ia mangande roti bo manginu uve anggur haitu.

²⁹Apa tona anu mangande roti bo manginu uve anggur haitu bo ledo nipekirina posidaina ada haitu ante karo i Kristus, natantumo rahuku nu Alatala, sabana ia aga nompongeika kamate i Pue Yesus.

³⁰Haitu sampe nadeamo komiu ri situ nalente bo nadua, bo bara sako-nduamo komiu namate.

³¹Tapi ane raparesata ntani ruru rara ntaita dopame mangande roti bo manginu uve anggur haitu, kita ledo rapambela pehuku.

³²Tapi ane rapana kita rapambela pehuku nu Alatala sii-sii, patujuNa kita rapatuduki ala nee sampe kita rapakaropu mosanggani-nggani ante tona ri dunia anu ledo natundu nte Alatala.

³³Jadi sampesuvu-sampesuvuku, ane komiu masiromu mangande roti bo manginu uve anggur mantora kamate i Pue Yesus, komiu kana mosipopea pura bo mangande mosanggani-nggani.

³⁴Ane maria tona naara taina, agina ia mangande ntani ruru lako ri banuana mboto. Nee sampe masiromu mosangani-nggani bo aga rapambela pehuku nu Alatala. Bo ane yaku tou nte komiu ngena, damo kupakasiayu parakara-parakara ntanina.

1 Korintus 12

¹Kapolana, sampesuvu-sampesuvu. Kutesaki pompakule nidekei nu Nosa Gasa nu Alatala ala rasanimiu mpuu-mpuu anu nakana.

²Nisanimiu mbotomo tempo komiu dopa nomparasaya i Yesus, komiu nasaro nasalandala nikenika ntupu-tupu ntanina anu ledo nosuara.

³Haitu sampe kuuli ka komiu, „komiu kana mompoposisala anu nadaa bo anu nabelo.” Ane tona nikenika Nosa Gasa nu Alatala, ledo raulina, “Nasurukavumo i Yesus.” Bo ivesia muni ledo rapakule ntona mompangaku, “I Yesus, Iamo Tupu” ane tona haitu ledo nikenika Nosa Gasa nu Alatala.

⁴Naria mpengaya-ngaya pompakule lako nte Nosa Gasa, tapi pura-pura pompakule haitu nopuna lako ri sangu Nosa Gasa.

⁵Naria mpengaya-ngaya pokarajaa nipoviata ka i Yesus, tapi aga saito Tupu rapokarajaakata.

⁶Bo naria mpengaya-ngaya cara Alatala nompopakita kuasaNa riaranggatuvuta bo aga saito Alatala nokarajaa riarantaita pura-pura bo nombatulungi kita riarampengaya-ngaya.

⁷Kita pura-pura simbo nidekeika pompakule lako ri Nosa Gasa nu Alatala ala manggeni belo ka tona ntanina.

⁸Saito tona nidekeika nu Nosa Gasa pompakule mapande motesa. Tona ntanina nidekeika nu Nosa Gasa haitu muni pompakule mombatentei anu nipopaisani nTupu ka ia.

⁹Tona ntanina nidekeika nu Nosa Gasa pompakule momparasaya i Yesus nelabi pade biasa. Bo tona ntanina nidekeika nu Nosa Gasa kuasa mompakabelo dua-dua ntona. Bo haitu pura-pura lako nte Nosa Gasa pangane.

¹⁰Bo tona ntanina nidekeika pompakule movia kabaraka. Tona ntanina nidekeika pompakule mompasimbayu tesa nitarimana lako nte Alatala, bo tona ntanina nidekeika pompakule mompoposisala anu nopuna lako ri Nosa Gasa bo anu nopuna lako ri kuasa-kuasa ntanina. Bo tona ntanina nidekeika pompakule notesa basa-basa anu nopuna lako ri Nosa Gasa. Bo sanupa vai nidekeika pompakule mombabatuasi tesa-tesa lako ri basa-basa haitu.

¹¹Pura-pura haitu nipovia nu Nosa Gasa sangu haitu. Ia nobagi pompakule-pompakule simbo ntanina, nangoseaka dota nu Nosa Gasa mboto.

¹²Karota sangu nau mpengaya-ngaya sipana. Bo nau mpengaya-ngaya sipa, batena sangu karo. Ivesia muni kita topomparasaya i Kristus. Kita namala nirapaka sangu karo. Nau nadea ngayana kita, kita pura-pura aga sangu karo i Kristus.

¹³Sanu kita toYahudi, sanu ledo. Sanu kita batua, sanu ledo. Tapi kita pura-pura nidekeika nu Alatala Nosa Gasa sangu haitu ala kita majadi sangu karo. Bo Nosa Gasa sangu haitu nonturo riaro ntaita pura-pura.

¹⁴Karota ledo aga sangu sipana tapi nadea.

¹⁵Ane rapana kadata manguli, “Yaku ledo sipa nu karo sabana yaku ledo pale,” natantumo haitu ledo nakana. Kada haitu sipa nu karota mami.

¹⁶Bo ane rapana talingata manguli, “Yaku ledo sipa nu karo sabana yaku ledo mata,” natantumo haitu ledo muni nakana. Talinga haitu batena sipa nu karota muni.

¹⁷Ane rapana pura-pura karota majadi mata, berimba kita meepe? Bo ane rapana pura-pura karota majadi talinga, berimbamo kita meenga?

¹⁸Alatala nompakatantu pura-pura sipa nu karo nipataka ri kasipatona nangoseaka dota nu Alatala mboto.

¹⁹Ane rapana aga sangu sipa nu karo, natantumo ledo ntoto ria karota.

²⁰Nadea mami sipa nu karota, tapi karo aga sangu.

²¹Jadi mata ledo mamala manguli ka pale, “Yaku ledo nomparaluu iko!” Bo ivesia muni balengga ledo mamala manguli ka kada, “Yaku ledo nomparaluu iko!”

²²Tapi sipa-sipa nu karo anu nireke nalente bo ledo ria gunana, kita ledo mamala matuvu ane ledo ria sipa haitu.

²³Bo sipa anu nireke ledo nagaya, sipa-sipa haitumo nipiara pakabelo-belo. Bo sipa-sipa anu ledo nabelo nikita ntona, sipa-sipa haitumo nitampunisita nte baju.

²⁴Tapi sipa-sipa nagaya ledo paraluu rapiara ivesia. Alatala mboto nombasunju karota ala sipa-sipa anu nireke ledo nagaya, haitumo rapiara mpuu.

²⁵Ivesiamo karota matuvu masiayu bo pura-pura sipa mosioseaka.

²⁶Ane nadua sangu sipa, pura-pura sipa nu karo haitu nombarasaina muni. Ane sangu sipa nibila, pura-pura sipa nu karo muni nadamba.

²⁷Komiu pura-pura nirapaka karo i Kristus bo komiu saito-saito simbo nirapaka sipa nu karoNa.

²⁸Ri tatangamiu sampomparasaya, Alatala nanganggataka tona mantui mpengaya-ngaya bago. Pamulana naria tona nianggatakaNa majadi suroNa. Bo karanduana, naria tona nianggatakaNa majadi nabi mompasimbayu tesa nitarimana lako nte Alatala. Katataluna, naria anu nianggatakaNa majadi guru. Bo naria muni nidekeikaNa pompakule movia kabaraka. Naria nidekeikaNa pompakule mompakabelo dua-dua ntona. Naria nidekeikaNa pompakule mantulungi tona ntanina, naria nidekeikaNa pompakule manggeniaka todea, bo naria nidekeikaNa pompakule motesa basa-basa anu nopuna lako ri Nosa Gasa.

²⁹Natantumo ledo pura-pura tona nianggataka majadi suro! Ledo pura-pura tona majadi nabi anu mompasimbayu tesa nitarimana lako nte Alatala. Ledo muni pura-pura tona nianggataka majadi guru. Ledo pura-pura tona nidekeika pompakule movia kabaraka.

³⁰Ledo pura-pura tona nidekeika pompakule mompakabelo tona nadua, atau motesa basa-basa anu nopuna lako ri Nosa Gasa, atau mombabatuasi tesa lako ri basa-basa haitu.

³¹Jadi pasimbukumo ante mpuu-mpuu raramiu manggava pompakule-pompakule lako nte Nosa Gasa anu noguna mpuu. Bo sii-sii kupopakita ka komiu sangaya anu nelabi kabelona.

1 Korintus 13

¹Ane rapana kupakule motesa mpengaya-ngaya basa manusia bo basa-basa malaeka, tapi ane ledo kupotove tona ntanina, tesa-tesaku haitu ledo ntoto ria gunana. Tesaku haitu nasimbayu mpo goo naoni atau gimba nitinti pakamangga, ledo ria isina.

²Bo ane kupakule mompasimbayu tesa-tesa nitarimaku lako nte Alatala, bo ane kusani mpengaya-ngaya anu nitabuniaka bo kusani muni mpengaya-ngaya pangisani ntanina, bo pomparasayaku maroso mpuu sampe yaku mamala mantudu bulu molinja, tapi ane ledo kupotove tona ntanina, katuvuku ledo ntoto ria gunana.

³Bo ane kudekei pura-pura mbara-mbaraku ka tona napakasi, bo kudekei karoku mboto rapatesi rapalabu ntona „sabana pomparasayaku i Yesus,“, tapi ane ledo kupotove tona ntanina, pura-pura anu nidekeiku ledo ntoto naria gunana.

⁴Tona nompotove roana nandoe posabarana bo nabelo rarana. Ia ledo nasiriati, ledo nangoe, bo ledo nalanga rarana.

⁵Ia ledo nasodo nte roa bo ledo aga nangelo kabelo nu karonu mboto. Ia ledo nasalisa narau bo ledo nompariara kasala nipovia ntona ka ia.

⁶Tona nompotove roa ledo nadamba nanggita pokainggu nadaa tapi nadamba nanggita pokainggu nanao.

⁷Ia nombatidamaka riara mpengaya-ngaya anu najadi. Ia ledo nenonto nomparasaya, batena nanjarumaka Alatala, bo nosabara nau bara nuapa-nuapa najadi.

⁸Pepotove ledo maupu-upu. Ane pompakule mompasimbayu tesa nitarima lako nte Alatala, makava tempona pompakule haitu menonto. Bo ane pompakule motesa ante basa-basa nopuna lako nte Nosa Gasa, makava tempona pompakule haitu malipo. Bo ane anu nipopaisani nTupu ka kita, makava tempona pangisanita domo raparaluu.

⁹Apa pangisanita da nakura, bo pompakuleta mompasimbayu tesa lako nte Alatala dopa nagana.

¹⁰Tapi tempo Alatala mompakabelo mpengaya-ngaya bara maipia, domo raparaluuta pompakule-pompakule anu da nakura haitu.

¹¹Jonjona, tempo yaku da nangana yaku notesa mpo ngana, raraku mpo rara nu ngana, yaku nompekiri mpo ngana. Tapi nambasopa yaku, inggu-inggu ngana haitu nikabasakaku puramo.

¹²Anu nikitata sii-sii nasimbayu mpo vayo nu lenje navuyo-vuyo riar pompevayo. Tapi ri tempo makava malanto rakitata mpo tona mosinggita lenje. Sii-sii pangisaniku da nakura, tapi tempo bara maipia malanto kusani pura-pura nuapa, nasimbayu mpo Alatala nangisani pura-pura karoku hitu.

¹³Jadi pura-pura pompakule maupu tapi naria talu-ngaya anu ledo maupu-upu, haitumo pomparasaya, panjarumaka bo pepotove. Bo lako ri talu-ngaya haitu, nopokopa pepotove.

1 Korintus 14

¹Jadi sampesuvu-sampesuvu, pasimbukumo momparibavo mompotove tona ntanina. Bo pasimbuku munimo manggava pompakule-pompakule lako nte Nosa Gasa. Bo pompakule nogunapa haitumo pompakule mompasimbayu tesa nitarima lako nte Alatala.

²Ane tona notesa basa-basa nopuna lako nte Nosa Gasa, ia notesa ka Alatala, ledo notesa ka roa. Apa ledo nisani nu roa batua ntesana. Ia notesa ante pekeniaka Nosa Gasa, bo nitesana anu dopa nisani nu manusia.

³Tapi ane tona nompasimbayu tesa nu Alatala, ia notesa ka manusia bo tesana haitu nompakaroso rara roa ntanina bo nompakadidi rarara, bo nompakavoe rarara.

⁴Tona nompake basa nopuna lako ri Nosa Gasa nompakaroso pomparasayana mboto. Tapi tona nompasimbayu tesa nu Alatala, nompakaroso pomparasaya ntodea topomparasaya.

⁵Dotaku ala komiu pura-pura mompake basa-basa nopuna lako ri Nosa Gasa. Tapi mabelopa ane komiu mompasimbayu tesa nu Alatala. Apa nompasimbayu tesa nu Alatala nogunapa pade nompake basa-basa nopuna lako ri Nosa Gasa. Tapi ane maria tona mompakule mombabatuasi tesa-tesa nopuna lako nte Nosa Gasa haitu, naria gunana apa todea topomparasaya mamala mangisani batuana bo pomparasayara rapakaroso.

⁶Sampesuvu-sampesuvu, ane rapana yaku makava nte komiu bo mompake basa-basa nopuna lako nte Nosa Gasa, nuapa gunana haitu ka komiu? Natantu ledo ntoto ria gunana. Tapi kana mariapa gunana ka komiu ane kupakalanto pepatuduki nitarimaku lako nte Alatala, atau kutentei ka komiu pangisaniku Alatala, atau kupasimbayu tesa nitarimaku lako nte Alatala, atau kupatuduki komiu.

⁷Pekirimo pareva-pareva musi anu ledo noinosa, evamo suli bara koronjo. Ane pareva musi haitu ledo rapopomoni pakalanto, berimba rasani ntona dade mbana nipodadeka?

⁸Bo ane tabue ledo rapopomoni pakalanto mompokio tantara hau mangeva balira, natantu ledo maria tantara mompakasadia karonna hau mosieva ante balira.

⁹Ivesia muni ante pompakule mompake basa-basa anu nopuna lako ri Nosa Gasa. Ane komiu motesa basa-basa anu ledo nisani nu roa-roamiu, berimba rasanira patuju ntesamiu? Tesa-tesamiu ledo ria gunana. Komiu aga nasimbayu mpo tona notesa ka luona.

¹⁰Ri dunia hitu nadea ngayana basa, ledo nisaniku sakuya kadeana. Bo pura-pura basa haitu simbo naria batuana.

¹¹Tapi ane ledo nisanita batua nu basa nipake ntona, tantu rareketa tosangatana ia, bo ivesia muni kita rareke ntona haitu tosangatana ane raepena basa nipaketa.

¹²Jadi ivesia muni komiu. Ane komiu mompake basa nopuna lako nte Nosa Gasa, tantu ledo rasani nu roa batuana. Komiu mpuu-mpuu madota manggava pompakule lako nte Nosa Gasa nu Alatala. Tapi aginapa komiu merapi Tupu mombadekei ka komiu pompakule mantulungi topomparasaya bo mompakaroso pomparasayara.

¹³Haitumo sampe niuliku ka komiu: isema-sema nompake basa-basa nopuna lako nte Nosa Gasa kana mosambaya bo merapi ala ia radekeika pompakule mombabatuasi tesa-tesa haitu ala rasani nu roa batua ntesana.

¹⁴Apa ane kita mosambaya mompake basa anu nopuna lako nte Nosa Gasa, rara ntaita nosambaya, tapi pekirita ledo najala.

¹⁵Jadi nuapa masipato rapoviata? Ivei: kita kana mosambaya ante rara ntaita mompake basa nopuna lako nte Nosa Gasa, tapi kita kana mosambaya ante pekirita muni. Kita kana modade ante rara ntaita mompake basa nopuna lako ri Nosa Gasa, tapi kita kana modade ante pekirita muni.

¹⁶Rapana kita manguli tarima kasi ka Alatala ante mompake basa nopuna lako ri Nosa Gasa. Ane maria tona ntanina mangepena, berimbamo ia manguli “Amin! Nakana tu!” ane ledo nisanina batuana tesata?

¹⁷Nau posambayata haitu mabelo mpuu, tapi ledo ria gunana ka tona ntanina, sabana pomparasayana ledo nipakaroso nangepe posambayata.

¹⁸Yaku nosukuru nte Alatala sabana yaku nidekeika pompakule mompake basa-basa anu nopuna lako ri Nosa Gasa nelabipa pade komiu pura-pura.

¹⁹Tapi nau ivesia, ane masiromu todea topomparasaya, aginapa kupake lima-mbela tesa anu nisani ntodea ala mombatulungi ira. Haitu nelabipa kabelona

pade mompake sapulu njobu-mbela tesa riaru basa anu ledu nisanu ntona batuana.

²⁰Sampesuvu-sampesuvuku, tumo mompekiri mpo ngana-ngana. Komiu kana manoto mpo tona nambasomo. Tapi ane anu daa, komiu kana masimbayu mpo ngana kodi anu dopa nisanina novia nadaa.

²¹Riaru Buku Gasa nitulisi ivei: Alatala nanguli: “Kutesa ka todeaKu ante sumba ntosangatana anu nobasa ntanina. Tapi nau ivesia, ledu rapetalingaira tesaKu.” (Yesaya 28:11-12)

²²Jadi ane nipaketa basa-basa anu nopuna lako nte Nosa Gasa, tesata haitu tandana kuasa nu Alatala ka tona ledu nomparasaya, ledu ka topomparasaya. Tapi ane nipasimbayuta tesa nu Alatala, tesata haitu tandana kuasa nu Alatala ka topomparasaya, ledu ka tona ledu nomparasaya.

²³Rapana komiu topomparasaya masiromu sanggani bo pura-pura komiu mompake basa-basa nopuna lako nte Nosa Gasa. Ane maria tona dopa nisanina Tesa nu Alatala atau tona ledu nomparasaya mesua ri sia, nuapa majadi? Natantumo rapekirira komiu togila.

²⁴Tapi ane komiu pura-pura mompasimbayu tesa nitarimamiu lako nte Alatala bo tona ledu nomparasaya atau tona dopa nisanina Tesa nu Alatala mangepe tesamiu haitu, masilonto riaru ntaina ia nadosa. Pura-pura pokainguna rapakalanto lako ri tesa-tesa haitu.

²⁵Pura-pura pekirina anu nitabuniakana riaru ntaina rapakalanto sampe ia kana mantaputu mombasomba Alatala bo manguli, “Mpuu-mpuu Alatala naria ri tatangamiu ri sii.”

²⁶Jadi sampesuvu-sampesuvuku, nuapa rapoviata? Ivei: ane kita masiromu mombasomba Alatala, saito-saito simbo maria bagiana. Sanu tona modade, sanu mompatuduki, sanu mompakalanto tesa nitarimana lako nte Alatala. Sanu tona motesa riaru basa-basa nopuna lako nte Nosa Gasa, bo tona ntanina mombabatuasi tesa-tesa haitu ala rasani ntona batuana. Pura-pura anu nipoviamiu haitu kana rapovia ala mompakaroso pomparasaya ntona.

²⁷Ane maria tona motesa mompake basa-basa anu nopuna lako nte Nosa Gasa, nee meliu lako ri randua atau tatalu topotesa, bo saito-saito ira kana mosimpaleliu motesa. Bo kana maria tona mompakule mombabatuasi tesara haitu.

²⁸Ane ledo ria tona mompakule mombabatuasi tesara haitu, agina topotesa basa haitu malino riara kasiromu haitu. Agina basa haitu rapakera riara ntaira mboto ka Alatala.

²⁹Ane tona mompasimbayu tesa nitarimana lako nte Alatala, nabelo ane randua atau tatalu motesa. Tona ntanina kana mompetalingai pakabelo-belo ala rataserera anu nitesa haitu bara lako nte Alatala bara ledo.

³⁰Tapi ane maria tona ntanina nonturo ri sia, bo sampesanika naria tesa lako nte Alatala netuu riara ntaina, topotesa pamulana kana menonto ala tona karanduana haitu mamala mompasimbayu tesa nu Alatala anu dako netuu riarana.

³¹Ane ivesia, komiu pura-pura mamala mompasimbayu tesa nu Alatala mosimpaleliu saito-saito ala pura-pura topomparasaya mamala rapatuduki bo rapakaroso.

³²Toramo! Tona nompakule mompasimbayu tesa nitarimana lako nte Alatala, nompakule nombakuasai karna mboto, haitumo ia namala notesa atau menonto notesa nantuntuni dotana mboto.

³³Apa Alatala nompokono anu natinonto. Ledo nipokonoNa nagado. Poviamo anu nabiasa nipovia ri pura-pura kasiromu ntodea topomparasaya.

³⁴Mombine-mombine kana malino tempo todea topomparasaya masiromu. Ira ledo nipaloga motesa-tesa. Ira kana mekou mangoseaka anu nitulisi riara Atura-atura agama.

³⁵Ane ira madota mangisani bara nuapa, aginamo rapekutanara nte bereira tempo manjili ri banuara mboto. Sabana, ledo masipato mombine motesa-tesa mompakagado kasiromu ntopomparasaya.

³⁶Berimba? Nasituju komiu ante atura-atura haitu? Toramo, Tesa nu Alatala ledo nopuna lako nte komiu! Bo ledo aga komiu nipatoleleka tesa haitu!

³⁷Ane maria tona mompekiri ia nabi anu nidekeika pompakule mompasimbayu tesa nitarimana lako nte Alatala, atau maria pompakule ntanina lako nte Nosa Gasa, tantu rasanina tesa-tesa nitulisiku hitu parenta lako nte i Pue Yesus.

³⁸Tapi ane ia ledo madota mantarima tesaku hitu, nee rapariaramiu tesana.

³⁹Jadi sampesuvu-sampesuvuku, pasimbukumo ante mpuu-mpuu raramiu manggava pompakule mompasimbayu tesa nitarimamiu lako nte Alatala. Bo nee ratagi tona mompake basa-basa nopuna lako nte Nosa Gasa.

⁴⁰Tapi pura-pura anu rapoviamiu kana masipato bo masiayu.

1 Korintus 15

¹Kapolana sampesuvu-sampesuvu. Yaku madota mompopatora ka komiu Kareba Belo anu nipatoleleku ka komiu. Nitarimamiumo Kareba haitu bo naroso pomparasayamiu i Kristus sampe sii-sii.

²Kareba Belo haitu namala manggeni komiu rapakasalama ane komiu batebatena momparasaya tesa nipatoleleku ka komiu. Ane ledo, pomparasayamiu tutu ledo nakana.

³Nitarimaku kareba nelabi nopoko bo haitumo nipasimbayuku ka komiu. Haitumo, i Kristus namate sabana dosata bo haitu najadi nangoseaka anu nitulisi riaru Buku Gasa.

⁴Ia nitana ri dayo, bo ri eo katataluna nipakatuvu mpanjili bo haitu muni najadi nangoseaka anu nitulisi riaru Buku Gasa.

⁵Naupu haitu nipopakitaNa karoNa ka i Petrus bo ka ana-anaguruNa sapulu randua.

⁶Bo naupu haitu nipopakitaNa karoNa ka salunu topangoseaka Ia nelabi lima-atu tona kadeana. Nau bara sako-ndua ira namatemo, deanapa ira da natuvu sampe sii-sii.

⁷Naupu haitu nipopakitaNa karoNa ka i Yakobus, bo ka pura-pura tona najadi suroNa.

⁸Bo kaupuna nipopakitaNa munimo karoNa ka yaku, nau yaku nasimbayu mpo ngana nesuvu dopa nagana mbulana.

⁹Yaku hii suro i Yesus natueipa pade suro-suro ntanina. Kakanana yaku hii ledο masipato rauli suro i Yesus sabana yaku nompandasa todea topomparasaya Ia bara ipia.

¹⁰Tapi lako ri pepotove nu Alatala, yaku najadi suro i Pue Yesus. Bo pepotoveNa haitu naria aselena riarā nggatuvuku. Yaku nokarajaa nelabipa kantamona pade suro-suro i Yesus ntanina. Tapi kakanana ledο yaku anu nokarajaa ntamo ivesia. Alatala anu nompotove yaku, Iamo nokarajaa nosangani-nggani ante yaku.

¹¹Jadi nau yaku nau suro-suro ntanina nompatolele Kareba Belo ka komiu, ledο nakuya. Anu nopoko, kami nompatolele Kareba Belo bo komiu nomparasayana.

¹²Kami nompatolele ka komiu tesa nanguli i Kristus nipakatuvu mpanjili. Jadi nakuya naria sanu komiu nanguli tona namatemo ledο rapakatuvu mpanjili?

¹³Ane rapana makana tona namatemo ledο rapakatuvu mpanjili, batuana i Kristus muni ledο nipakatuvu mpanjili.

¹⁴Bo ane i Kristus ledο nipakatuvu mpanjili, ledο ntoto ria gunana kami nompatolele Kareba Belo, bo ledο muni naria gunana pomparasayamiu.

¹⁵Bo ledο aga haitu. Ane rapana tesara makana, batuana kami nodava, sabana kami nanguli Alatala nompakatuvu i Kristus mpanjili lako ri kamateNa. Tapi ane rapana makana tona namate ledο rapakatuvu mpanjili, batuana Alatala ledο nompakatuvu mpanjili i Kristus.

¹⁶Apa ane tona namate ledο rapakatuvu mpanjili, natantumo i Kristus muni ledο nipakatuvu mpanjili.

- ¹⁷Bo ane i Kristus ledo nipakatuvu mpanjili, pomparasayamiu ledo ntoto ria gunana, komiu bate-batena nadosa.
- ¹⁸Bo topomparasaya Ia anu namatemo domo ria panjarumakara, naropumo ira!
- ¹⁹Ane panjarumakata i Kristus aga noguna tempo kita natuvu ri dunia hitu, kitamo tona nelabi napakasi ri dunia.
- ²⁰Tapi i Kristus mpuu-mpuu nipakatuvu mpanjili. Bo katuvuNa mpanjili haitu najadi panggingisi nompakatantu pura-pura topangoseaka Ia anu namatemo, rapakatuvu mpanjili muni.
- ²¹Lako ri pokainggu ntona saito, pura-pura manusia kana mamate. Ivesia muni lako ri povia ntosaitoNa, manusia mamala rapakatuvu mpanjili.
- ²²Pura-pura manusia nireke nosangu ante i Adam apa kita pura-pura mulina. I Adam namatemo, jadi pura-pura manusia kana mamate munimo. Tapi i Kristus nipakatuvu mpanjili. Jadi isema-sema nosangu rara nte i Kristus, ia muni rapakatuvu mpanjili.
- ²³Tona namatemo kana rapakatuvu mpanjili nangoseaka sunjuna nipakatantu. I Kristus tona pamulana nipakatuvu mpanjili. Bo maliu haitu tona nosangu rara nte Ia rapakatuvuNa mpanjili tempo Ia makava mpanjili ri dunia.
- ²⁴Maliu haitu pade makava kaupuna nu dunia. Tempo haitu i Kristus mombadagi pura-pura tupu ntanina bo anu nakuasa, bo Ia moparenta mpo Magau. Maliu haitu, radekeiNa PoparentaNa ka TuamaNa Alatala.
- ²⁵Apa i Kristus kana moparenta mpo Magau sampe pura-pura baliNa rapopekou nu Alatala nte Ia.
- ²⁶Pade Ia mompakaupu baliNa kaupuna, haitumo kamatea.
- ²⁷Nitulisi riaru Buku Gasa ivei: “Alatala mompopekou pura-pura anu naria ri ngayoNa.” (Mazmur 8:7) Jadi nisanita pura-pura mekou nte i Kristus. Aga Alatala mboto ledo mekou nte i Yesus, sabana Iamo anu nompopekou pura-pura anu naria nte i Kristus.

²⁸Tempo pura-pura anu naria mekou nte i Kristus, Ia mboto mekou nte TuamaNa, apa evamo niuliku pangane Alatalamo anu nompopekou pura-pura nte Ia. Kaupuna Alatala moparenta mpengaya-ngaya anu naria.

²⁹Ane tona namate ledo rapakatuvu mpanjili, rapokuya naria tona nidiu manjambei tona namatemo? Nuapa gunana movia ada haitu ane tona namate ledo ntoto rapakatuvu mpanjili?

³⁰Bo ane tona namate ledo rapakatuvu mpanjili, rapokuya kami mantingayo kasusa bo kapari eo-eo?

³¹Sampesuvu-sampesuvu, eo-eo nisarumakaku yaku rapatesi sabana pokarajaaku nompatolele Kareba Belo. Nisani nu Alatala nadamba mpuu raraku sabana komiu nosangu rara nte Tuputa i Yesus Kristus. Ivesia muni nisaniNa tesaku hitu nakana mpuu, yaku ledo nodava!

³²Yaku nosieva ante tona nadaa ri ngata Efesus anu nasimbayu mpo binata-binata nasoa. Nuapa gunana yaku matuvu mantingayo kasusa ivehaitu ane ledo ria panjarumakaku yaku rapakatuvu mpanjili? Ane tona namate ledo rapakatuvu mpanjili, agina kita matuvu mpo panguli ntona ivei: “Kamaimo kita mangande bo manginu bo madamba-damba eo hitu, sabana maile bara mamatemo kita, bo katuvuta maupumo.”

³³Tapi nee sampe komiu rabagiu ntona anu nanguli tomate ledo rapakatuvu mpanjili. Toramo! Ane kita movega ante tona nadaa, tantu rapasialata pokainggura.

³⁴Jadi pakanoto mpanjili pekirimiu bo tumo rapovia dosa! Da nariapa sanu komiu dopa nosisani belo nte Alatala. Niuliku ivesia ala maeya matamiu.

³⁵Tantu maria tona ntanina mompekutana, “Berimbamo tomate rapakatuvu mpanjili? Berimba karora ane rapakatuvu mpanjili?”

³⁶Nadoyo mpuu komiu mompekutana ivesia! Nau bara nuapa ratuda ri talua, ledo matuvu ane anguna ledo ralovu ri tana ntani!

³⁷Bo anu nitudamiu haitu aga batuna nggoo, nau angu gando bara angu tuda-tuda ntanina. Ledo nituda njumanggayu, aga anguna nituda.

³⁸Tapi Alatala nompakatuvu angu-angu nituda haitu nangoseaka dotaNa sampe pura-pura ngaya anguna najadi tuda-tuda nangoseaka ngayana mboto.

³⁹Ane rapekiritu pura-pura anu natuvu ri dunia hitu, ledo nasimbayu lenjena. Manusia sangaya lenjena. Tonji ntanina lenjena. Bau ntasi ntanina muni lenjena. Mpengaya-ngaya binata simbo ntanina lenjena.

⁴⁰Bo ivesia muni anu ri langi evamo mata nu eo, bula, bo betue-betue, ledo nasimbayu ante anu ri tana. Anu ri langi sangayana kagayana bo anu ri tana sangayana kagayana.

⁴¹Kagaya nu mata eo sangayana, bo kagaya nu bula sangayana muni. Bo kagaya nu betue sangayana muni, bo betue mboto simbo nosisala kagayana.

⁴²Ivesia muni ante karobata ntomate anu rapakatuvu mpanjili. Karobata anu nitana mapopo. Tapi ane karobata rapakatuvu mpanjili domo mamate domo mapopo.

⁴³Karobata anu nitana ledo namala novia nuapa-nuapa bo nadaa nikita. Tapi ane rapakatuvu mpanjili, maroso bo magaya rakita.

⁴⁴Karobata anu nitana, karo manusia biasa lako ri dunia hitu. Tapi ane rapakatuvu mpanjili, karo haitu majadi karo masipato matuvu ri suruga. Naria karo manusia biasa, bo naria muni karo masipato matuvu ri suruga.

⁴⁵Riara Buku Gasa naria nitulisi ivei: “Manusia paratama, i Adam, nipakatuvu nu Alatala.” (Kajadia 2:7) Tapi i Adam kaupuna, haitumo i Kristus, nombadekei katuvu nabelo sampe ri kasae-saena.

⁴⁶Anu najadi nokolu ledo karo anu masipato monturo ri suruga, tapi karo manusia biasa. Karo anu masipato monturo ri suruga najadi ri puri.

⁴⁷Manusia paratama haitu nipajadi lako ri tana bo nonturo ri dunia hitu. Tapi i Kristus, anu nireke i Adam karanduana, nopuna lako ri suruga.

⁴⁸Manusia ri dunia hitu natuvu nasimbayu mpo i Adam anu nipajadi lako ri tana. Tapi tona anu nosangu rara ante i Kristus manggava katuvua lako ri suruga, nasimbayu mpo katuvua i Kristus.

⁴⁹Sii-sii karota nanjava karo i Adam anu nipajadi lako ri tana. Tapi bara maipia kita anu nosangu rara nte i Kristus, karota manjava karo i Kristus anu nopuna lako ri suruga.

⁵⁰Sampesuvu-sampesuvu, iveimo patujuku: karota ri dunia hitu nipovia lako ri isi bo raa. Kita ledo mamala monturo ri Poparenta nu Alatala ri suruga ante karota anu mamate bo mapopo, sabana ri suruga ledo ria kamatea.

⁵¹Pariaramo! Kupopaisani ka komiu anu nitabuniaka nu Alatala lako ri lamba pamulana! Ledo pura-pura kita mamate, tapi kita pura-pura kana rabaliki nau kita da natuvu atau namatemo.

⁵²Riara sampida mata tempo tabue i Pue rapopomoni ri kaupu nu dunia, tona anu namatemo rapakatuvu mpanjili ante karo anu domo mapopo, bo kita pura-pura anu da natuvu rabaliki muni.

⁵³⁻⁵⁴Apa karota anu mamate bo mapopo kana rabaliki majadi karo anu domo mamate domo mapopo. Bo tempo karota mpuu-mpuu nibaliki, madupamo tesa nitulisi riara Buku Gasa ivei: “Alatala nompakaupu kamatea, manusia domo mamate!” (Yesaya 25:8)

⁵⁵“Heh, kamatea! Nidagimo iko! Domo ria kuasamu mompandasa manusia!” (Hosea 13:14)

⁵⁶Manusia naeka ka kamatea sabana nisanira ane mamate ira kana rahuku sabana dosara. Bo manusia nadosa sabana niliunakara Atura agama.

⁵⁷Tapi kita nosukuru nte Alatala! Iamo nombakabasaka kita lako ri kuasa nu dosa bo Atura agama sampe kita majadi padagi sabana anu nipovia nTuputa Yesus Kristus!

⁵⁸Jadi sampesuvu-sampesuvu nipotoveku, pakaroso pomparasayamiu bo nee molengga-lengga. Pasimbuku ante mpuu-mpuu raramiu mantui pokarajaa nidekei i Pue Yesus ka komiu, apa nisanimiu ledo ria nuapa-nuapa anu ledo ria gunana rapoviamiu ka Ia. Natantu kana maria aselena.

1 Korintus 16

¹Kapolana, sampesuvu-sampesuvu, kutesa doi rapasiromumiu mombatulungi sampesuvuta sampomparasaya napakasi ri ngata Yerusalem. Kana rapoviamiu mpo niparentaku ka todea topomparasaya ri ngata Galatia.

²Haitumo, ri eo-eo Aka saito-saito komiu simbo kana mompatani sabagia lako ri doi panggavamiu nangoseaka kadea nu asele nikavamiu. Bo doi haitu kana rabolimiu sampe yaku tou nte komiu. Nee damo makava yaku ri situ pade rapasiromumiu doi haitu.

³Ane makava yaku, kudekei sura popaisani ka tona anu rapelisimiu, bo ira kutudu manggeni doi petulungi lako nte komiu hau ri ngata Yerusalem.

⁴Ane rapekirimiu mabelo muni yaku hau, raporoara yaku bo mosangganingani kami hau.

⁵Maupu kupelioda ira ri propinsi Makedonia pade tou mompeinta komiu, apa yaku nonia moliu ri Makedonia mami.

⁶Dotaku masae sakide monturo ante komiu, bara sampe maupu tempo ranindi, ala komiu mamala mantulungi yaku riara polipaku hau ri ponturo ntanina.

⁷Yaku ledo madota aga mesai sampalai nte komiu sii-sii. Ane rapodota nTupu, yaku madota masae sakide monturo nte komiu.

⁸Tapi hitupa yaku maroo ri ngata Efesus sampe Eo Mbaso Pentakosta,

⁹apa nadea loga ka yaku ri sii mokaarajaa anu mamala manggeni belo ka todea, naupa nadea muni topangeva yaku ri sii.

¹⁰Ane makava ri situ i Timotius, tarimamiu mabelo ia ala matinda rarana monturo nte komiu, apa ia muni nantui pokarajaa i Pue Yesus nasimbayu mpo yaku.

¹¹Jadi nee sampe maria tona manjauru ia. Tapi tulungimo ia mompapola polipana mabelo ala ia mamala manjili nte yaku, apa yaku nompoepa kakavana ri sii nosangganingani ante sampesuvu-sampesuvu sampomparasaya ntanina.

¹²Ane sampesuvuta i Apolos, nadea ngganimo nituduku tou mompelioda komiu mosanggani-nggani ante topomparasaya-topomparasaya ntanina. Tapi hitu-hitu ia dopa nadota tou. Ane maria loga nabelo ntanina ngena, pade tou ia.

¹³Komiu kana mainga bo nee menonto momparasaya i Kristus. Komiu kana maroso bo nee maeka ka nuapa-nuapa.

¹⁴Nuapa-nuapa rapoviamiu, poviama ante pepotove.

¹⁵Sampesuvu-sampesuvu, natantu nisanimumo i Stefanus sambanua. Ira tona pamulana nomparasaya i Yesus ri propinsi Akhaya, bo ira nompasimbuku ante mpuu-mpuu rarara mantulungi todea nu Alatala. Jadi sampesuvu-sampesuvu, kuperapi nte komiu ante mpuu-mpuu raraku,

¹⁶pekoumo nte tona ivehaitu bo nte pura-pura tona nokarajaa ntamo nosanggani-nggani nte ira nantulungi todea topomparasaya.

¹⁷Nadamba mpuu raraku tempo i Stefanus, i Fortunatus bo i Akhaikus tumai nte yaku ri sii, sabana ira nanjambei komiu nantulungi yaku ri sii.

¹⁸Ira nompakasana raraku nasimbayu mpo raramiu nipakasanara muni. Haitu sampe kuperapi nte komiu, bilamo tona ivehaitu!

¹⁹Nadea tabe lako nte todea topomparasaya ri propinsi Asia. Bo tarima muni nadea tabe lako nte i Akwila bo i Priskila nosanggani-nggani ante todea topomparasaya anu nasiromu ri banuara, apa komiu pura-pura nosampesuvu sabana pomparasayamiu i Pue Yesus.

²⁰Nadea muni tabe lako nte pura-pura topomparasaya ri sii. Posipakavotekamo tabe saito-saito ante pepotove.

²¹Paleku mboto notulisi hitu ivei: nadea tabe lako nte yaku, i Paulus.

²²Isema-sema ledo nompotove i Pue Yesus, masurukavumo ia! Maranata! Tupu kami, kakavamo!

²³Kuperapi i Pue Yesus mombadekei belo ka komiu.

²⁴Yaku nompotove komiu pura-pura anu nosangu rara ante i Yesus Kristus. Tabe lako nte yaku, I Paulus

2 Korintus

2 Korintus 1

¹Sampesuvu-sampesuvu todea nu Alatala ri ngata Korintus bo pura-pura topomparasaya ri njumangu propinsi Akhaya: Sura hitu lako nte yaku, i Paulus, bo i Timotius sampesuvuta sampomparasaya. Yaku nipelisi nu Alatala najadi suro i Yesus Kristus nangoseaka dotaNa.

²Kuperapi Tuamata Alatala bo Tuputa Yesus Kristus mombadekei belo ka komiu bo mompakatinonto raramiu.

³Ratoyamo Alatala, Tuama nTuputa Yesus Kristus. Ia Tuamata anu naasi mataNa nanggita kita bo Iamo Alatala nompakaroso rarata riarra mpengaya-ngaya.

⁴Ia nompakaroso rara kami riarra mpengaya-ngaya kasusa bo kapari nirasai kami, ala karoso rara nitarima kami lako nte Alatala, rapake kami mompakaroso rara ntona ntanina anu nombarasai kasusa bo kapari.

⁵Nadea kasusa bo kapari nirasai i Kristus, nambela munimo nte kami. Bo ivesia muni Alatala mpuu-mpuu nompakaroso rara kami sabana kami nosangu rara nte i Kristus.

⁶Kami nombarasai kasusa bo kapari ala rapakule kami mompakaroso raramiu, bo ala komiu rapakasalama. Ane rara kami rapakaroso nu Alatala riarra kasusa bo kapari, tantu raramiu muni rapakarosoNa sampe komiu mosabara mombatidamaka kasusa bo kapari nasimbayu mpo kasusa nirasai kami.

⁷Haitu sampe ledo nonggai rara kami nompekirika komiu, nisani kamimo komiu mpuu-mpuu nombatidamaka riarra kasusa bo kapari. Apa nisani kami ane komiu nombarasai kasusa bo kapari nasimbayu mpo kami, tantu raramiu muni rapakaroso nu Alatala, nasimbayu mpo kami.

⁸Sampesuvu-sampesuvu, kami madota ala rasaniamiu kasusa bo kapari nirasai kami ri propinsi Asia nadaa mpuu. Pepandasa nirasai kami neliu gagamo sampe naupu rara kami, domo nisarumaka kami matuvu.

⁹Nirasai kami eva nihuku mate. Tapi haitu najadi ala kami ledo manjarumaka karoso kami mboto tapi manjarumaka Alatala anu nakuasa mompakatuvu mpanjili tona namate.

¹⁰Jadi sampesuvu-sampesuvu, Alatala nompakasalama kami lako ri pepandasa anu nompakaviora rara haitu, sampe kami ledo namate. Bo Iamo bate-batena mompakasalama kami. Iamo nisarumaka kami bate-batena mompakasalama kami nggani-nggani kami mombarasai kasusa bo kapari.

¹¹Nisani kami ane komiu muni mantulungi mosambayaka kami, Alatala bate-batena mompakasalama kami riara kasusa. RadekeiNa belo ka kami sabana madea tona mosambaya ka kami. Bo madea tona manguli tarima kasi ka Ia ane rakitara nipoiyona pomperapira ka kami.

¹²Nadamba mpuu rara kami apa nisani kami nabula rara kami. Kami nasaro nokainggu nanao nte tona pura-pura, nelabipa nte komiu. Pura-pura anu nipovia kami, ledo ria nuapa-nuapa nitabuniaka kami. Patuju kami nanao, nangoseaka dota nu Alatala. Pokainggu kami ledo nangoseaka kapande nu manusia, tapi nangoseaka pompakule nidekei nu Alatala.

¹³⁻¹⁴Apa anu nitulisi riara sura kami aga anu nalanto rabacamiu bo rapahamiu, ledo ria patuju ntanina nitabuniaka riarana. Sii-sii dopa nipahamiu ntoto patuju kami. Tapi nisarumakaku makava tempona rasaniamiu mpuu-mpuu patuju kami, ala tempo i Pue Yesus makava bara maipia komiu madamba mompekirika kami nasimbayu mpo kadamba kami nompekirika komiu.

¹⁵⁻¹⁶Nisaniku komiu mpuu-mpuu nadamba nompekirika yaku. Haitu sampe yaku nonia ronggani mesai nte komiu, ala komiu mamala mantarima belo ronggani kadeana lako nte yaku. Patujuku mesai mompelioda komiu ntani ruru pade mapola hau ri propinsi Makedonia. Bo tempo manjili lako ri Makedonia pade mesai vai mompelioda komiu ala komiu mamala mantulungi yaku mompapola polipaku hau ri bagia Yudea.

¹⁷Tapi niaku haitu nabali. Bara raulimiu yaku aga nebalingoya. Atau raulimiu yaku nompakatantu niaku nangoseaka dotaku mboto, sanggani nanguli “Iyo,” sanggani nanguli “Ledo.”

¹⁸Tapi ledo ivesia, sampesuvu-sampesuvu. Alatala namala raparasaya bo nisaniNa tesa kami ka komiu namala muni raparasaya. Ledo nebalingoya kami, ledo sanggani “Iyo” bo sanggani, “Ledo.”

¹⁹Apa i Yesus Kristus ledo nabali-bali. Iamo Ana nu Alatala anu nipatolele kami i Silas bo i Timotius ka komiu. Ia ledo nebalingoya, ledo sanggani nanguli, “Iyo”, bo sanggani nanguli, “Ledo.” TesaNa bate-batena namala raparasaya.

²⁰Apa pura-pura pojanji nu Alatala nipakadupa riaru nggatuvu i Kristus. Haitu sampe kita anu nosangu rara ante i Kristus namala nanguli, “Amin! Nakana mpuu pojanji-pojanji nu Alatala!” Bo haitu najadi ala Alatala rabila bo ratoiya.

²¹Alatala mboto mompakaroso kita pura-pura ala kita mosangu rara ante i Kristus. NipelisiNa kita majadi todeaNa

²²bo nidekeiNa Nosa Gasana riaru ntaita, tandana kita todeaNa. Nosa Gasana haitu pangangisita ala rasanita janji nu Alatala ka kita mpuu-mpuu rapakadupaNa.

²³Sampesuvu-sampesuvu, yaku ledo nodava. Alatala sabiku. NisaniNa isi rara ntaiku bo nisaniNa yaku ledo nanjili ri ngata Korintus mompelioda komiu sabana ledo nipokonoku makasara mangonteaka komiu bo mompakasusa raramiu.

²⁴Kami ledo topeparenta anu aga nadamba nangulika komiu nuapa raparasayamiu bo nuapa rapoviamiu. Kakanana pomparasayamiu i Kristus naroso mamimo. Tapi kami aga madota mokarajaa mosanggani-nggani ante komiu ala komiu mpuu-mpuu madamba.

2 Korintus 2

¹Jadi, nibotusikumo agina yaku domo tou ruru, apa ledo nipokonoku mompakasusa raramiu mpo anu najadi saeo.

²Apa, ane kupakasusa raramiu, isemapa vai mompakavoe raraku ane ledo komiu?

³Bo haitumo patujuku notulisi sura ka komiu bara ipia. Apa ledaku tou ane aga masusa raraku manggita pokainggumiu. Kakanana komiu masipato mompakadamba raraku. Bo ane madamba yaku, tantu komiu muni madamba.

⁴Tempo nitulisiku sura haitu ka komiu nasusa mpuu raraku, nantamo nirasaiku bo naoge uve mataku nesuvu. Patujuku notulisi sura haitu ledo mompakasusa raramiu, tapi ala rasanimiu kambaso toveku ka komiu pura-pura.

⁵Ane tona anu novia dosa bara ipia, ia ledo nompakasusa raraku, tapi nompakasusa raramiu. Tapi ala tesaku ledo maliu gaga, aginapa kuuli ledo pura-pura komiu nipakususana.

⁶Deanapa komiu ri Korintus nombahuku ia. Jadi hitupa kuuli ka komiu naganamo pehuku nipambelamiu ka ia.

⁷Hitupa komiu kana mombaampungu ia bo mompakavoe rarana. Nee sampe ia masusa gaga bo maupu rarana.

⁸Jadi kuperapi nte komiu, popakitamo tovekiu ka ia.

⁹Ri suraku bara ipia nituduku komiu mombahuku ia. Patujuku notulisi sura haitu ala kusani bara raoseakamiu pura-pura parentaku bara ledo.

¹⁰Jadi hitupa naganamo. Isema-sema niampungimiumo, niampungiku munimo. Ane rapana tona haitu paraluu kuampungu, niampungikumo ri panggita i Kristus ala manggeni belo ka komiu pura-pura.

¹¹Tona haitu niampungikumo ala nee sampe Magau nu Seta manggava loga mombadagi kita, sabana nisanita mamimo akalana.

¹²Kapolana, tempo yaku nakava ri ngata Troas mompatolele Kareba Belo i Kristus, i Pue nombadekei ka yaku loga nabelo mokerajaa hamai.

¹³Tapi ledo natinda raraku sabana ledo niposinggavakuka sampesuvuta i Titus hamai, anu manggeni kareba lako nte komiu. Haitumo sabana yaku nopalakanamo nte toTroas, bo napola hau ri propinsi Makedonia.

¹⁴Yaku nosukuru nte Alatala! Ia batena nanggeniaka kami nosanggani-nggani nte Ia bo nitulungiNa kami najadi padagi sabana kami nosangu rara ante i

Kristus. NitulungiNa kami nompatolele Kareba Belo i Kristus ri umba-umba ala pura-pura tona mangepena bo mosisani nte Alatala. Bo Kareba haitu nasimbayu mpo soa navangi nasilele nienga ri umba-umba.

¹⁵Ri panggita nu Alatala, kami nompakadamba raraNa nasimbayu mpo dupa vangi nitunju ka Ia. Apa kami nompatolele Kareba Belo i Kristus ka tona rapakasalama bo muni ka tona rapakaropu.

¹⁶Ane tona rapakasalama, kami nienga mpo soa navangi mpuu, apa Kareba haitu nanggeni katuvua nabelo ka ira. Ane tona rapakaropu sabana nisapuakara Kareba haitu, kami mpo soa ntomate, apa Kareba haitu nompakatantu ira mamate bo rapopogaa lako nte Alatala. Isema mompakule mantui pokarajaa ivehaitu? Natantu nangoseaka pompakuleta mboto ledο ria saitoa.

¹⁷Nadea tona nompatolele Tesa nu Alatala ala mangelo untu ka karora mboto. Tapi ledο ivesia kami. Patuju kami nagasa bo tesa kami nakana, apa kami nisuro nu Alatala mompatolele TesaNa. Jadi kami notesa ante kuasa i Kristus bo Alatala nanggita povia kami haitu.

2 Korintus 3

¹Nee rapekirimiu kami nompamula vaimo mombatoiya karo kami mboto! Kami ledο nasimbayu mpo sanu tona nakava nte komiu nanggeni sura popaisani ala ratarimamiu ira, atau niperapira sura popaisani lako nte komiu rakeni ka tona ntanina. Kami ledο paraluu sura ivehaitu

²sabana katuvumiu mbotomo sura popaisani kami. Katuvumiu namala nirapaka sura nitulisi riara ntai kami anu namala rabaca bo rasani ntona pura-pura.

³Haitumo, katuvumiu nompopakita ka pura-pura tona, komiu mpuu-mpuu nomparasaya bo pomparasayamiu haitu asele pokarajaa kami nanggeni tesa i Kristus ka komiu. Katuvumiu namala nirapaka sura popaisani kami anu nitulisi i Kristus mboto. Sura haitu ledο nitulisi ante popena bo tinta, bo ledο muni

niuki ri sampeka watu. Tapi sura haitu nipovia Nosa Gasa nu Alatala anu natuvu riara ntaimiu.

⁴Kami nabia nanguli ivesia sabana kami nanjarumaka Alatala. Bo kami nanjarumaka Alatala sabana posangu rara kami nte i Kristus.

⁵Tapi ledo nipakule kami mantui pokarajaa hitu ante kuasa kami mboto. Alatalamo anu nompopompakule kami.

⁶Iamo nombadekei ka kami pompakule nompatuduki pojanjiNa nabaru ka tona. Pojanji nabaru haitu ledo atura-atura nitulisi, tapi nopuna lako ri Nosa Gasa nu Alatala. Atura-atura anu nitulisi nanggeni kamatea sabana ledo nipakule manusia mangoseakana, tapi Nosa Gasa nu Alatala nombadekei katuvua nabelo sampe ri kasae-saena.

⁷Atura-atura anu nanggeni kamatea niuki nu Alatala ri sampeka watu bo nidekei ka Nabi Musa. Tempo haitu reme lako ri kaoge nu Alatala nikita bo nompopenggila lenje i Musa sampe toIsrael ledo nompakule nangganotona naupa reme haitu nompamulamo nalipo. Jadi ane ivehaitu kaoge nu Alatala nikita tempo Atura-atura anu nanggeni kamatea nidekei ka Nabi Musa,

⁸natantumo nelabipa kaogeNa rakita riara pokarajaa Nosa Gasa!

⁹Atura-atura nokolu nompakalanto manusia kana rahuku. Jadi nau damo naoge Atura-atura haitu, kana naogepa pojanji nabaru anu nompakanoa kita ri panggita nu Alatala.

¹⁰Atura-atura nokolu naoge mpuu. Tapi ane kaoge haitu rapoposisala ante kaoge nu pojanji nabaru, namala raulita pojanji nokolu haitu domo ria kaogena.

¹¹Ane Atura-atura anu ledo nainti ivesia nireke naoge, natantumo nelabipa kaogena pojanji anu bate-batena sampe ri kasae-saena.

¹²Kami nanjarumaka pojanji nu Alatala anu nabaru, anu ledo mabali-bali. Haitumo sampe kami nabia mpuu nompatolele Kareba Belo.

¹³Kami ledo nombatabuniaka nuapa-nuapa. Kami ledo nasimbayu mpo i Musa nggaulu anu nombasalibumbuni lenjena ante kae ala ledo rakita ntoIsrael reme nTupu malipo lako ri lenjena.

¹⁴Pekiri ntoIsrael haitu natetutui muni, ledo nisanira batuana anu najadi nte i Musa. Sampe sii-sii ane Atura-atura nokolu haitu rabaca ka ira, ledo nisanira mpuu batuana. Namala raulita da naria anu nombasalibumbuni pekirira. Pekiri manusia nisalibumbuni ivesia aga namala rabuka ane tona haitu mosangu rara ante i Kristus.

¹⁵Sampe sii-sii nggani-nggani Buku i Musa nibaca ka ira, pekirira da natesalibumbuni.

¹⁶Tapi ane majea ira bo mangoseaka Tupu, posalibumbuti haitu kana matebuka.

¹⁷Anu niuli “Tupu” ri sii, haitumo Nosa Gasa nu Alatala. Bo ane Nosa Gasa nu Alatala maria nte kita, kita mpuu-mpuu makabasaka lako ri pura-pura anu mompopogaa kita lako nte Alatala.

¹⁸Sii-sii lenjeta ledo nisalibumbu mpo lenje i Musa nggaulu, apa kita nompopakita kaoge i Pue Yesus riaru nggatuvuta. Bo kaoge haitu nakava lako nte Tupu, haitumo Nosa Gasa anu natuvu riaru ntaita. Nosa Gasa sakide-sakide nombabaliki kita majadi nasimbayu mpo i Pue Yesus, ala sakide-sakide mantambaipa kaogeNa rakita riaru nggatuvuta.

2 Korintus 4

¹Jadi ledo naupu rara kami nompatolele Kareba Belo sabana pokarajaa hitu niparasaya nu Alatala ka kami lako ri kabelo raraNa.

²Tapi ane kami, kami domo nangoseaka pokainggu nadaa anu nepakaeya. Kami ledo nebagiu bo ledo nantenggoaka Tesa nu Alatala. Alatala sabi kami bo nikitaNa kami aga nompatolele anu nakana ala rasani ntodea kami namala raparasaya.

³Ane da nariapa tona dopa nompaha Kareba Belo nipatolele kami, aga tona anu maropu bara maipia ledo nompahana, haitumo tona ledo nomparasaya.

⁴Ira ledo nomparasaya sabana Magau nu Seta anu nombakuasai dunia hitu nompakaburo pekirira ala ledo rakitara reme nu Kareba Belo. Kareba Belo haitu nompakalanto kaoge i Kristus anu nasimbayu ntoto ante Alatala.

⁵Kareba nipatolele kami haitu ledo kareba karo kami mboto. Tapi kareba haitu nompakalanto i Yesus Kristusmo Tuputa pura-pura, bo kami hitu najadi batua nisuro i Yesus mombatulungi komiu.

⁶Tempo Alatala nompajadi dunia niuliNa, “Lako ri kalandana meumbamo reme!” Ivesia muni nipakaremeNa pekirita ala pekirita majadi manoto bo rasanita kaogeNa. ToIsrael nggaulu nanggita kaoge nu Alatala nenggila ri lenje i Musa. Ivesia muni rasanita kaoge nu Alatala ane raposisanita i Kristus.

⁷Kami manusia nalente niparasayaka pokarajaa nabelo mpuu, jadi kami nasimbayu mpo kura tana biasa, tapi isina noali mpuu. Alatala novia ivehaitu ala rasani ntona karoso nipokumaaka mombatui pokarajaa hitu, ledo nopuna lako nte kami mboto, tapi nopuna lako nte Ia.

⁸Ntiku-ntiku topangeva kami, tapi kami ledo nidagi. Nasaro naingu rara kami tapi ledo naupu rara kami.

⁹Kami nipandasa ntona tapi kami ledo nipalaisi nu Alatala. Naupa kami nasaro niboba sampe nadungga tapi kami ledo namate.

¹⁰Kami nasaro nombarasai kasusa bo kapari nasimbayu mpo anu nirasai i Yesus tempo Ia nipatesi. Haitu najadi ala malanto i Yesus natuvu mpanjili, apa kuasaNa nikita riaru nggatuvu kami.

¹¹Ane da matuvupa kami, da mariapa tona madota mompatesi kami sabana kami nangoseaka i Yesus. Haitu najadi ala malanto i Yesus natuvu mpanjili, apa kuasaNa rakita riaru nggatuvu kami anu mamate.

¹²Jadi kami bate-batena nantingayo kamate ala manggeni komiu manggava katuvua nabelo sampe ri kasae-saena.

¹³Riaru Buku Gasa nitulisi ivei: “Yaku nomparasaya, bo haitu sampe nabia yaku notesa.” Ivesia muni kami. Kami nomparasaya Alatala sampe kami nabia notesa ka tona.

¹⁴Alatala nompakatuvu mpanjili i Pue Yesus lako ri kamateNa, bo nisani kami, kami muni rapakatuvuNa mpanjili nasimbayu mpo Ia. Bo niparasaya kami Ia manggeni kami ri ngayo i Pue Yesus mosangani-nggani ante komiu.

¹⁵Pura-pura kasusa nirasai kami haitu, nanggeni belo ka komiu. Apa ane mantambai kadea ntona mombarasai pepotove nu Alatala, mantambai kadea ntona mosukuru nte Ia, sampe Ia mpuu-mpuu ratoiya bo rabila.

¹⁶Jadi haitu sampe ledo naupu rara kami. Nau karo kami nantambai kalentena, tapi eo-eo rara kami nantambai karosona.

¹⁷Kasusa nirasai kami ri dunia hitu nangaa bo aga sampalai. Bo kami mantarima belo sampe ri kasae-saena sabana nitidamaka kami riaras kasusa haitu. Kasusa nirasai kami sii-sii aga sakide kodi ane rapoposisala ante belo ratarimata bara maipia.

¹⁸Jadi kami ledo nompariara kasusa bo kapari anu nikita ri dunia hitu, tapi kami nompariara belo anu dopa nikita anu nasadia ka kami. Apa, anu nikita ri dunia hitu aga sampalai, tapi belo anu dopa nikita haitu, bate-batena sampe ri kasae-saena.

2 Korintus 5

¹Karota ri dunia hitu nirapaka tenda niponturota sampalai. Bo nisanita ane mageromo tenda hitu, Alatala mombadekei ka kita banua ri suruga anu ledo nipovia manusia bo bate-batena sampe ri kasae-saena, haitumo karo nabaru.

²Tapi tempo kita da natuvu ri dunia hitu nasumu rarata, naoge rarata manggava karo nabaru lako ri suruga.

³Apa ane rakavata karo nabaru haitu, nirapaka kita nompasua baju ala domo movuloo.

⁴Tempo kita da natuvu ri dunia hitu nasumu rarata apa nirasaita nandasa katuvuta. Kita ledo madota mamate bo mogaa lako ri karota, tapi kita madota radekeika karo nabaru lako ri suruga ala karo anu mamate rasambeii ante karo anu matuvu sampe ri kasae-saena.

⁵Alatala mbotomo nompakasadia kita mantarima karo nabaru, bo nidekeiNa ka kita Nosa Gasana anu najadi panggangisita ala rasanita anu nijanjiNa haitu mpuu-mpuu majadi.

⁶Jadi haitu sampe rara kami bate-batena naroso. Nisanita ane kita da natuvu nte karota ri dunia hitu, kita dopa nosangani-nggani ante i Pue Yesus ri suruga.

⁷Apa kita natuvu ri dunia hitu lako ri pomparasayata ledo lako ri anu nikitata.

⁸Jadi evamo niuliku ri bavona, narosomo rara kami. Kami madambapa mompalaisi karo kami hitu bo hau monturo mosangani-nggani nte i Pue.

⁹Jadi kami nompasimbuku mompakadamba raraNa, nau kami da natuvu ri dunia, nau kami mompalaisi dunia hitu.

¹⁰Apa kita pura-pura kana mantingayo i Kristus bara maipia ala ratangaraNa. Maupu ratangaraNa, simbo rakavata anu nipakatantu nangoseaka anu nipoviata tempo kita natuvu ri dunia hitu, bara povia nabelo bara povia nadaa.

¹¹Jadi naeka rara kami movia anu ledo rapokono nTupu, apa nisani kami Ia mombatangara kita pura-pura. Jadi haitumo sabana kami nompasimbuku manggeni tona momparasaya i Yesus. Nisani nu Alatalamo isi rara ntai kami. Bo nisarumakaku rasanimiu muni isi rara ntai kami bo domo monggai raramiu mompekirika kami.

¹²Nee rapekirimiu kami nantoiya karo kami vaimo! Ledo ivesia. Patujuku ala komiu madamba mompekirika kami, bo ala rasanimiu mesanaka tona anu nompoara kami. Apa tona haitu aga nadamba ka nturora ri dunia tapi ledo nipeilira rara ntaira.

¹³Niuli ntona kami nabaya. Kami nipeinta nabaya, sabana kadidi rara kami novia pokarajaa nidekei nu Alatala ka kami. Bo ane niulimiu kami nanoto, nisanimiu kami nokarajaa ivesia ala manggeni belo ka komiu.

¹⁴Tove i Kristus nombakuasai kami sampe kami nokainggu ivesia. Apa niparasaya kami, saito tona namate nanjambei kita pura-pura, jadi nasimbayu mpo kita pura-pura namate.

¹⁵Bo i Kristus mpuu-mpuu namate nanjambei kita pura-pura. Patuju nu kamateNa haitu ala kita anu da natuvu ri dunia hitu domo matuvu mangoseaka dotata mboto, tapi dota i Kristus anu namate bo natuvu mpanjili ala manggeni belo ka kita.

¹⁶Jadi haitumo sabana kami domo nombareke tona bara nabelo bara nadaa nangoseaka pekiri manusia. Bara ipia ivesia mami kami nombareke i Kristus, tapi hitupa domo.

¹⁷Ane tona nosangu rara ante i Kristus, ia najadi manusia nabaru. Katuvuna nggaulu naliumo bo katuvuna nabaru mpuu-mpuu nariumo.

¹⁸Alatalamo anu nompakajadi pura-pura haitu. NipoposingabeloNa kita nte Ia ante kamate i Kristus. Bo niparasayaNa ka kami pokarajaa mompatolele kareba posinggabelo ka tona ntanina ala ira muni mamala mosinggabelo nte Ia.

¹⁹Jadi siimo kareba nipatolele kami: Alatala nompoposingabelo mpanjili manusia nte Ia sabana anu nipovia i Kristus. Domo nirekeNa dosa-dosata. Bo niparasayaNa ka kami pokarajaa mompatolele TesaNa ka tona ntanina ala ira muni mamala mosinggabelo nte Ia.

²⁰Jadi kami hii niposumba i Kristus. Ante potesa kami, Alatala mboto nompasimbayu tesaNa ka komiu. Jadi ante kuasa i Kristus kami merapi mpuu-mpuu nte komiu, posinggabelomo nte Alatala!

²¹I Kristus ledo ntoto nadosa. Tapi Alatala nompoposimbuaka ka Ia dosata bo nipoviaNa Ia mpo tona nadosa ala manjambei kita. Alatala novia haitu ala kita anu nosangu rara nte i Kristus majadi manoa ri panggitaNa.

2 Korintus 6

¹Jadi kami hii nokarajaa nosanggani-nggani ante Alatala nompatolele TesaNa ka manusia. Haitumo sabana kami merapi nte komiu ante mpuu-mpuu rara, nee sampe kabelo rara nu Alatala nte komiu haitu ledo maria aselena riaranggatuvumiu.

²Ri Buku Gasa, Alatala nanguli ivei: “Ri tempo nipakatantuKu niepeKumo pekakaimu, bo ri eo nipakatantu mompakasalama iko, nitulungiKumo iko.” (Yesaya 49:8) Pariaramo pakabelo-belo! Hitumo tempona nipakatantu nu Alatala! Eo hitumo tempona Alatala mompakasalama komiu!

³Kami nompasimbuku matuvu ante pokainggu nabelo ala ledo maria tona manjalai pokarajaa kami nompatolele Tesa nu Alatala.

⁴Nau bara nuapa-nuapa najadi, kami batena nokainggu nabelo ala malanto kami mpuu-mpuu batua nu Alatala. Kami batena nosabara naupa kami nombarasai mpengaya pepandasa bo kasusa.

⁵Kami niboba bo nisuaraka riara ntarunggu. Todea nonasu nangeva kami, kami nokarajaa ntamo, biasa kami ledo namonjo, biasa ledo nangande.

⁶Riara mpengaya haitu, nalantomo kami mpuu-mpuu batua nu Alatala, apa pokainggu kami nagasa, nisani kami Tesa nu Alatala, kami nosabara bo nabelo rara nte tona. Nosa Gasa nokarajaa riara nggatuva kami bo kami nompotove tona ntanina ante rara mpuu-mpuu.

⁷Nalantomo kami batua nu Alatala sabana kami nompatolele pepatuduki nakana, bo kuasa nu Alatala nikita riara nggatuva kami. Kami batena nokainggu nanao. Bo pokainggu nanao haitumo najadi pareva posieva kami, apa ane nanao pokainggu kami, kami mamala mangeva bali kami bo kami mamala manjaliku karo kami lako ri peeva nu bali.

⁸Sanu tona nombabila kami, tapi sanu nanjalai kami. Sanu tona nantoiya kami tapi sanu nantunturaka kami. Nau kami nanao, niuli ntona topebagiu.

⁹Sanu tona noreke kami hii ledo ria gunana, tapi sanu nombatesa kabelo pokarajaa kami bo kareba haitu natolelemo. Nadea nggani kami sakidepa mamate, tapi peintamo, kami da natuvu! Kami nasaro nipandasa ntona tapi kami ledo namate.

¹⁰Nau kami nasaro nipakasusa, tapi kami batena nadamba. Kami napakasi, tapi kamimo anu nanggeni belo ka tona nadea. Nikita eva ledo ria nuapa-nuapa nte kami, tapi kakanana mpengaya-ngaya naria nte kami.

¹¹Sampesuvu-sampesuvu ri Korintus, nitesa kami isi rara kami ka komiu. Ledo nitabuniaka kami pepotove kami ka komiu. Kami mpuu-mpuu nompotove komiu.

¹²Pepotove kami ledo nakura, tapi nikitaku pepotovemi ka kami nakuramo.

¹³Yaku notesa ka komiu mpo ka ana-anaku mboto: potovemo kami nasimbayu mpo pompotove kami komiu!

¹⁴Nemo mosangu rara nte tona ledo topangoseaka i Kristus. Ledo ntoto masipato. Berimbamo? Masipato tona nangoseaka dota nu Alatala masintuvu ante toposapuaka Alatala? Mamala reme ragalo ante landa?

¹⁵Masipato i Kristus mosimporoa ante i Belial, Magau nu Seta? Masipato topomparasaya i Kristus mosimpovega nte tona ledo nomparasaya?

¹⁶Masipato kita metupu nte Alatala ri BanuaNa bo metupu muni nte tupu-tupu ntanina? Natantu pura-pura haitu ledo ntoto masipato! Toramo! Kitamo anu najadi Banua nu Alatala, haitumo Alatala anu Natuvu sampe ri kasae-saena. Alatala mboto nanguli ivei: “Yaku matetida ri tatangara bo monturo mosanggani-nggani ante ira. Yaku majadi Tupura bo ira majadi todeaKu.” (Imamat 26:12; Yehezkiel 37:27)

¹⁷“Jadi, palaisimo tona anu ledo nosisani nte Yaku, bo kavaosimumo ira! Ane ledo ratuimiu anu naruto ri panggitaKu, Kutarima komiu.” (Yesaya 52:11)

¹⁸Niuli muni ri Buku Gasa ivei: “Yaku majadi Tuamamiu bo komiu majadi ana-anaKu. Ivesiamo panguli nTupu anu Neliu KakuasaNa.” (2 Samuel 7:14, 1 Tawarikh 17:13, Yesaya 43:6, Yeremia 31:9)

2 Korintus 7

¹Sampesuvu-sampesuvu nipotoveku. Pura-pura janji nu Alatala haitu nipambela ka kita. Jadi kita kana mombakabasaka pura-pura pokainggu bo pekiri nadaa. Kita kana mangoseaka Alatala ante rarata mpuu-mpuu, bo kana maeka movia anu ledo rapokonoNa.

²Sampesuvu-sampesuvu, kami madota ala komiu mompotove kami bo mantarima kami! Ledo ria sanggania kami novia nadaa ka komiu, ledo ria

saitoa nipakarugi kami. Ledo muni naria saitoa nibagiui kami ala mompakauntu karo kami mboto.

³Patujuku ledo mompakasala komiu, apa kami mpuu-mpuu nompotove komiu evamo niuliku ri bavona. Matuvu atau mamate kami batena mompotove komiu!

⁴Ledo nakaja raraku notesa pakalanto ka komiu. Nadamba mpuumo raraku nantora komiu. Nau nadeamo susa bo pari nambela kami, hitupa narosomo raraku bo nelabi kadamba raraku nantora komiu.

⁵Tempo kami nakava ri propinsi Makedonia, ledo najadi kami nangosanaka. Apa ri panggai panggana tona mompakasusa kami. Naria tona nangeva kami, bo riaru ntai kami mboto kami nombarasai naeka. Mpuu-mpuu eva maupu rara kami!

⁶Tapi Alatala mompakaroso rara ntona naupu rarana, bo nipakarosoNa rara kami muni ante kakava i Titus.

⁷Ledo aga kakava i Titus nggoo mompakaroso rara kami, tapi karebamiu nitesana mpuu-mpuu mompakadamba rara kami. Nitesana komiu mompakaroso rarana tempo ia nonturo ante komiu. Bo nitesana muni nalentoramo raramiu manggita yaku, bo nasusa raramiu nantora pokainggumiui bara ipia. Bo niulina komiu mpuu-mpuu madota manjaliku yaku ri ngayo ntopangeva yaku. Kadamba nu raraku mpuu-mpuu nelabi!

⁸Naupa isi suraku bara ipia mompakasusa raramiu, ledo nanjoso raraku nantulisi sura haitu. Kakanana nanjosomo raraku bara ipia apa nikitaku suraku haitu mompakasusa raramiu. Tapi kasusa raramiu haitu aga sampalai.

⁹Hitupa nadambamo raraku, ledo sabana raramiu nipakasusa, tapi sabana kasusa raramiu haitu nanggeni komiu majea lako ri pokainggumiui nasala. Kasusa nu raramiu haitu nangoseaka dota nu Alatala, apa nipakeNa kasusa raramiu haitu ala manggeni komiu majea. Jadi sura kami haitu ledo mompakarugi komiu.

¹⁰Sabana, kasusa rara nangoseaka dota nu Alatala, nanggeni kita najea lako ri dosata sampe kita rapakasalama. Bo ledo ria saitoa tona manjoso rarana ane rapakasalama. Tapi kasusa rara biasana anu nirasai ntona ledo nosisani nte Alatala, ledo nanggeni kita majea aga nanggeni kita mamate bo rapopogaa lako nte Alatala.

¹¹Kasusa raramiu nombaca suraku bara ipia mpuu-mpuu kasusa rara nangoseaka dota nu Alatala. Peintamo anu najadi! Lako ri kasusa rara nirasaimiu haitu, komiu mpuu-mpuu nadota movia anu nanoa. Niulimiu komiu ledo nosabingga ka tona nompoara kami. Naraumo komiu nompekirika dosa nipovia nu roamiu haitu, bo naekamo raramiu mangoseaka pokaingguna. Nalentoramo raramiu manggita yaku. Nioseakamiumo anu niuliku ka komiu. Nasadiamo komiu nombahuku tona nasala haitu. Riara mpengaya-ngaya nipopakitamiumo komiu ledo nasala riara parakara bara ipia.

¹²Jadi patujuku notulisi sura haitu bara ipia, ledo aga mompakasala tona novia sala atau manjaliku tona nipakadaana. Alatalamo sabiku! Patujuku notulisi sura haitu, ala malanto ka komiu mboto tovemiu nte kami nambaso mpuu.

¹³Jadi, narosomo rara kami nangepe anu nipoviamiu naupu nibacamiu sura kami. Rara kami nipakaroso mpuu, bo nelabipa vai kadamba rara kami nanggita kadamba rara i Titus. Apa tempo nipeliiodana komiu ri Korintus, rarana mpuu-mpuu naleva nanggita pokainggumiu.

¹⁴Dopame ia tou mompeliioda komiu, nitoiyaku mamimo komiu nte ia. Bo pokainggumiu nikita i Titus ledo nompakaeya yaku. Pura-pura tesa kami ka komiu nakana, ivesia muni pura-pura potoiyaku komiu nitesaku ka i Titus nakana muni.

¹⁵Tove i Titus ka komiu nantambai kambasona tempo nitorana komiu mpuu-mpuu nangoseaka anu niulina. Nitarimamiumo ia bo nibilamiu ia bo nekou nte ia.

¹⁶Nadamba mpuu raraku sabana komiu namala niparasaya riara mpengaya-ngaya.

2 Korintus 8

¹Kapolana, sampesuvu-sampesuvu. Kami mompopaisani ka komiu anu najadi ri sii ri propinsi Makedonia. Alatala nabelo mpuu ka todea topomparasaya ri sii „sampe ledo natove rarara nombatulungi tona ntanina„.

²Nandasa mpuu kasusa bo kapari nirasaira, bo ira mboto napakasi mpai. Tapi naupa ivesia, nelabi kadambara sampe ledo mpuu natove rarara nombadekei ka tona ntanina.

³Nikitaku mboto ira nodekei, ledo aga nangoseaka pompakulera, tapi nelabi lako ri pompakulera.

⁴Dotara mboto, ira nerapi nte kami ante rarara mpuu-mpuu ala ira muni radekeika loga nombatulungi topomparasaya napakasi ri bagia Yudea.

⁵Anu nidekeira nelabi mpuu lako ri anu nisarumaka kami. Ledo aga doi nidekeira. Tapi nidekeira ntani ruru katuvura ka i Pue. Ira natundu nte Ia bo natundu muni nte kami, sabana haitumo dota nu Alatala.

⁶Jadi kami nerapi nte i Titus ala ia manjili tou nte komiu. Iamo anu nompamula bago nompasiromu doi petulungi haitu nte komiu bara ipia. Jadi haitumo sabana ia nitudu kami mompapola pokarajaa nabelo haitu.

⁷Sampesuvu-sampesuvu, nabelo pura anu nipoviamiu. Pomparasayamiu mpuu-mpuu naroso. Napande mpuu komiu notesa. Nisanimiu pepatuduki nakana, naoge raramiu nombatulungi tona ntanina, bo naoge mpuu pompotovemiu kami. Jadi ivesia muni mabelo rapasimbukumiu nombatulungi tona napakasi.

⁸Ledo niparentaku komiu kana nombadekei maoge. Yaku aga mompopaisani ka komiu kambaso pepotove ntoMakedonia nantulungi tona ntanina. Patujuku ala kusani ane komiu muni mpuu-mpuu nompotove tona ntanina.

⁹Ledo paraluu kuparenta komiu apa nisanimiu mboto kambaso pepotove nTuputa i Yesus Kristus ka kita. Naupa Ia mpuu-mpuu nakalumana, nikabasakaNa pura-pura kakalumanaNa haitu ala mantulungi kita. Ia najadi manusia napakasi ala kita mamala majadi nakalumana ri panggita nTupu.

¹⁰Ivei panggavaku pompasiromu doi petulungi haitu. Nabelopa komiu mompakaupu bago nipamulamiu mpae naliu. Komiu tona pamulana nompekirika pompasiromu doi petulungi haitu bo komiu muni tona pamulana nompamula nompasiromu doi haitu.

¹¹Jadi hitupa papolamo bago haitu sampe maupu. Mabelo ane kadotamiu mompapola bago haitu sampe maupu, masimbayu ante kaoge nu raramiu nompamula bago haitu bara ipia. Dekeimo nangoseaka pompakulemiu.

¹²Apa ane rarata mpuu-mpuu mombadekei, pedekeita haitu ratarima nu Alatala nangoseaka anu naria nte kita, ledo nangoseaka anu ledo ria nte kita.

¹³Patujuku ala katuvumiui masimbayu. Patujuku ledo mompakantamo komiu sampe komiu mapepa bo tona ntanina mangaa.

¹⁴Sii-sii komiu nelabi nagana bo nipakulemiu mantulungi ira. Bo tempo bara maipia ane komiu makura bo ira melabi, ira muni mamala mombatulungi komiu. Ivesiamo katuvumiui masimbayu.

¹⁵Nisanita haitu nakana apa nitulisi riaru Buku Gasa ivei: “Tona nompasiromu nadea, ledo nelabi, bo tona nompasiromu sakide ledo muni nakura.” (Pesuvu 16:18)

¹⁶Kami nosukuru nte Alatala sabana Ia nompakaoge rara i Titus mompekirika kabelomiui nasimbayu mpo kami mboto.

¹⁷Naoge rara i Titus mombatulungi komiu sampe ia nompoyo pomperapi kami mompapola pompasiromu doi petulungi haitu. Bo ledo aga haitu, ia mboto nompakatantu kana tou nte komiu.

¹⁸Bo nitudu kami muni saito sampesuvuta ntanina momporoa i Titus riaru polipana tou nte komiu. Sampesuvuta haitu mpuu-mpuu nibila ntopomparasaya sabana pokarajaana nompatolele Kareba Belo.

¹⁹Ledo aga haitu, tapi ia muni nipelisi ntodea topomparasaya momporoa kami riaru polipa kami hau ri bagia Yudea manggeni doi petulungi haitu. Patuju nu polipa kami haitu ala Alatala rabila bo ratoiya ntona, bo ala rasani ntona kaoge nu rara kami mantulungi sampesuvuta napakasi.

²⁰Patuju kami nantudu sampesuvuta haitu nosangani-nggani nte i Titus ala nee maria tona manguli kami ledo nanao nompasiayu pedekei nadea haitu.

²¹Apa kami madota movia anu nanao ri panggita nu Alatala, bo muni ri panggita nu manusia.

²²Nitudu kami munimo saitopa sampesuvu ntanina mosangganika gi Titus. Nadea ngganimo nipopakitana kaoge nu rarana mantulungi tona ntanina. Bo sii-sii naoge mpuu rarana mantulungi komiu mompasiayu pompasiromu doi petulungi haitu, sabana ia mpuu-mpuu nanjarumaka komiu muni madota mombatulungi tona napakasi.

²³I Titus hii roaku sampokarajaa mantulungi komiu. Bo randua sampesuvuta ntanina anu momporoa ia, nisuro ntodea topomparasaya, bo nadea mpuu tona nombabila bo nombatoiya i Kristus sabana katuvu nu sampesuvuta randua haitu.

²⁴Jadi kuperapi nte komiu popakitamo tovemiu ka ira tatalu ala rakita ntodea topomparasaya pepotovemiu, bo rasanira muni tesa-tesa kami nombatoiya komiu ri ngayora bara ipia, mpuu-mpuu nakana.

2 Korintus 9

¹Kakanana ledo paraluu ntoto kutulisi ka komiu doi petulungi ka topomparasaya napakasi ri Yudea.

²Nisanikumo kaoge raramiu mombatulungi ira. Nitoyaku komiu ri ngayo ntoMakedonia. Niulikuka ira, lako ri mpae naliu komiu toAkhaya nasadio mompakatu pedekeimiu. Kadidi raramiu nombadekei, mpuu-mpuu nompakadidi rarara sampe ira muni nadea nadota nombadekei doi petulungi.

³Tapi „nau nisaniku komiu nasadia nombadekei,„ nipekiriku nabelopa kutudu gi Titus mokolu tou nte komiu, ala ratulungira komiu mompakasadia doi petulungimiu. Jadi, tempo yaku makava ngena, masadio petulungimiu nangoseaka anu nitesaku ka toMakedonia. Nee-nee tesaku nombatoiya komiu haitu aga tesa nggoo!

⁴Apa ane maria toMakedonia momporoa yaku ngena tou, bo ane rapana doi pedekeimiu dopa nipasiromumiu, natantu maeya mpuu matakū, nemopa komiu, apa niuliku ka ira komiu mpuu-mpuu nasadia metulungi!

⁵Jadi haitu sampe nipekiriku paraluu kutudu sampesuvu tatalu haitu mokolu tou nte komiu, ala ira mompasiayu pedekei anu nijanjimiu bara ipia. Nipoviaku ivesia ala masadiamo rakava kami. Bo malantomo petulungimiu haitu nidekei ante momi rara bo ledō aga nipasuu.

⁶Pariaramo tesaku hitu: tona nosavu sakide, sakide muni rasombena. Bo tona nosavu nadea kana madea muni rasombena.

⁷Pura-pura tona kana simbo mombadekei nangoseaka anu nipakatantu riarā ntaina mboto. Nee monggai rara mombadekei bo nee muni mombadekei sabana nirasai aga nipasuu. Sabana, Alatala nompotove tona mombadekei ante rara nadamba.

⁸Alatala nakuasa mombadekei belo ka komiu sampe komiu bate-batena ledō makura nuapa-nuapa. Bo belo haitu melabipa kaganana sampe komiu mamala movia mpengaya-ngaya anu nabelo mombatulungi tona ntanina.

⁹Nitulisi riarā Buku Gasa ivei: “Alatala nombabagi belo ka tona napakasi bo ledō natove raraNa. Kabelo nu raraNa batena sampe ri kasae-saena.” (Mazmur 112:9)

¹⁰Alatala mombadekei savua ka toposavu, bo nidekeiNa asele poviata rakandeta. Bo ivesia muni radekeiNa ka kita anu rapaketa mombatulungi tona ntanina, bo ratambaikiNa ala madeapa mpuu asele lako ri kabelo rarata.

¹¹Alatala mombadekei mpengaya-ngaya belo ka komiu ala komiu batena mompakule mombadekei ka tona ntanina. Bo tempo kami manggeni pedekeimiu haitu ka tona napakasi ri bagia Yudea, madea tona manguli tarima kasi ka Alatala.

¹²Jadi petulungi nidekeimiu haitu ledō aga mombatulungi todea topomparasaya anu napepa, tapi manggeni madea tona manguli tarima kasi ka Alatala.

¹³Apa ane rakitara pedekei petulungimiu haitu, ira mantoiya bo mombabila Alatala, sabana rakitara komiu mpuu-mpuu nomparasaya Kareba Belo i Kristus bo natundu nte parentaNa. Bo ratoiyara Alatala sabana komiu ledo mpuu natove raramiu nobagi ka ira bo ka tona ntanina anu naria nte komiu.

¹⁴Bo ira mosambayani komiu ante tovera apa pepotove nu Alatala anu nikita riara nggatuvumiu mpuu-mpuu naoge.

¹⁵Masipato mpuu kita motarima kasi nte Alatala, sabana pedekeiNa nelabi mpuu kabelona. Ledo rapakuleta mombasovadaka kabelo nu pedekeiNa haitu ka kita!

2 Korintus 10

¹Hitupa yaku, Paulus, naria anu kuperapi nte komiu. Sanu tona ri situ nanguli yaku nabia notesa ri suraku, tapi ane nantingayo komiu, pangulira yaku aga naeka bo ledo nabia nanguli ri mata. Jadi ante raraku naede bo nalusu, nasimbayu mpo rara i Kristus,

²yaku mpuu-mpuu merapi: nee sampe da maria komiu manjauru kuasaku najadi suro i Yesus, ala ledo paraluu yaku marau tempo yaku makava ri situ nte komiu. Apa nasadia mami yaku mangonteaka tona nanguli kami nokainggu mpo tona ledo nosisani nte Alatala.

³Kami aga manusia biasa, tapi ane kami nangeva pepatuduki anu ledo nakana, kami ledo nangeva mpo manusia biasa anu ledo nosisani nte Alatala.

⁴Kami ledo nangeva ante pompakule nu manusia biasa. Tapi kami nangeva ante pompakule nidekei nu Alatala. Pompakule haitu nabaraka, jadi kami nompakule nombadagi nuapa-nuapa nangeva pepatuduki nakana. Kami namala nirapaka tantara anu nompakaropu kuasa nu balira nau bara berimba karosona.

⁵Ante kuasa nu Alatala kami nompakule nombadagi pekiri ntopangeva pepatuduki nakana, pekiri ntona nasombo, bo pekiri ntona anu nombalava tona ntanina mosisani nte Alatala. Ante kuasa lako nte Alatala kami nanggeni ira nombabali pekirira sampe ira natundu nte i Kristus.

⁶Jadi ane rakita kami komiu pura-pura mpuu-mpuu natundu nte i Kristus, masadiamo kami mombahuku tona ntanina anu ledo natundu.

⁷Sampesuvu-sampesuvu, pekirikamo anu nikitamiu! Ane maria tona nanguli ia mpuu-mpuu bagia i Kristus, kana ratorana kami muni bagia i Kristus, nasimbayu mpo ia.

⁸Nau yaku madamba gaga mombatesa kuasa nidekei i Kristus ka kami, ledo maeya matak. Sabana kuasa haitu nidekei i Pue ka kami, ledo mompakagero pomparasayamiu, tapi mompakaroso pomparasayamiu.

⁹Patujuku ledo momparangga komiu ante suraku.

¹⁰Nisaniku naria tona nanguli ivei: “Riara sura-sura i Paulus tesana nalonto bo nasodo, tapi ane ia mboto naria nte kita, ingguna damo nanonto, bo tesana ledo ria gunana.”

¹¹Jadi tona nanguli ivesia kana rasanira, anu nitesa kami riara sura-sura, haitumo mpuu-mpuu rapovia kami ane tou nte komiu ngena.

¹²Natantu ledo mabia kami manguli karo kami nasimbayu ante ira anu nombatoiya karora mboto! Ledo mabia kami mompakasimbayu karo kami ante ira! Ira nantoiya karora nangoseaka panggitara mboto. Nadoyo mpuu tona ivehaitu!

¹³Tapi kami ledo ntoto nasimbayu ante ira! Ane kami mangoe karo kami mboto, kami ledo mombaliunaka anu masipato, haitumo kami aga mangoe pokarajaa niparasaya nu Alatala ka kami. Bo komiu pura-pura ri Korintus nambela bagia pokarajaa kami, apa Alatala nantudu kami manggeni Kareba Belo ri ngatamiu.

¹⁴Kami ledo nombaliunaka anu masipato raoe kami ane kami mangoe pokarajaa kami nte komiu. Ane rapana kami ledo nakava ri ngatamiu bara ipia nanggeni Kareba Belo, natantu ledo maria kuasa kami mangoe pokarajaa kami ri bagiamiu. Tapi naria kuasa kami mangoe pokarajaa kami nte komiu, apa kamimo paratama nakava ri ngatamiu nanggeni Kareba Belo i Kristus.

¹⁵Naria sanu tona nalanga rarana nangoe kabelo asele pokarajaara, tano mai aga asele pokarajaa ntona ntanina. Tapi ledo ivesia kami. Kami ledo nangoe karo kami mboto notesa pokarajaa anu ledo pokarajaa nidekei nu Alatala ka kami. Kami nanjarumaka ane pomparasayamiu mantambai karosona, mantambaipa muni kadeana asele pokarajaa kami nte komiu.

¹⁶Maliu haitu, mamala kami hau mompatolele Kareba Belo sampe ri ngata-ngata ntanina anu makavao lako nte komiu. Kami ledo madota mangoe pokarajaa nipovia kami ri bagia mpokarajaa ntona ntanina.

¹⁷Riara Buku Gasa nitulisi ivei: “Isema-sema madota mantoiya bara nuapa, aginapa ia mantoiya anu nipovia nTupu.” (Yeremia 9:24)

¹⁸Sabana, tona nipokono nu Alatala ledo topantoiya karon mboto tapi tona nitoiya nu Alatala.

2 Korintus 11

¹Sampesuvu-sampesuvu, kuperapi komiu mosabara ruru mangepe yaku motesa mpo todayo. Komiu nosabara mami nte yaku.

²Yaku mpuu-mpuu nompariarantaika komiu, nasimbayu mpo Alatala nompariarantaika komiu! Komiu nirapaka randaa nagasa pokainguna anu nipopotengeakuka saito langgai, haitumo i Kristus. 〔Batua porapa hitu, yakumo anu paratama nompatuduki komiu momparasaya i Yesus. Dotaku ala komiu ledo molinja ntanina tapi bate-batena momparasaya Ia.〕

³Tapi nakini mpuumo raraku, nee-nee raakalani ntona komiu sampe komiu domo ante raramiu mpuu-mpuu mompotove i Kristus. Apa ivesia najadi nte i Hawa anu niakalani nu ule tempo nggaulu.

⁴Nitesa kamimo i Yesus ka komiu bara ipia, bo nitarimamiumo Nosa Gasa bo niparasayamiumo Kareba Belo. Tapi hitupa nikitaku komiu nadamba nantarima tona ntanina anu nombatesa Yesus ntanina. Bo nasadia muni komiu nantarima kuasa ntanina bo nomparasaya kareba ntanina.

⁵Niepemiumo tesa ntona anu nantoiya karo mboto, haitumo suro-suro anu ledo ria kasimbayuna. Jadi kana raepemiu muni tesaku hitu, apa yaku hii ledo ntoto natuei pade ira.

⁶Naupa nakana yaku ledo napande notesa ri ngayo ntodea, ledo ivesia pangisaniku, apa nisaniku mpuu pepatuduki nakana. Haitu bate-batena nipopakita kami ka komiu riara mpengaya-ngaya pepatuduki bo pokainggu kami bara ipia.

⁷Tempo yaku nompatolele Kareba Belo ka komiu, yaku ledo ntoto nerapi gaji lako nte komiu. Yaku nompakaede raraku nokarajaa ante paleku mboto nompaelo ala manggeni belo ka komiu pura-pura. Jadi, berimba nirasaimiu? Nasala poviaku ivesia?

⁸Tempo yaku nakava nombatulungi komiu yaku nitanggu ntodea topomparasaya lako ri ngata ntanina. Namala rauli yaku nompakarugi ira ala mamala mantulungi komiu.

⁹Bo tempo yaku nonturo nte komiu, ane naria paraluuku, ledo nipakasesaku komiu. Apa nuapa-nuapa niparaluuku haitu nipakagana nu sampesuvu-sampesuvu sampomparasaya nakava lako ri propinsi Makedonia. Yaku bate-batena nompasimbuku ala ledo mompakasesa komiu mompekirika katuvuku. Bo batena kupasimbuku ivesia, ledo kuperapi nte komiu.

¹⁰Ledo ria saitoa ri propinsi Akhaya mamala nombatagi yaku mantoiya pokaingguku haitu! Pepatuduki i Kristus anu naria riara ntaiku nakana. Ivesia muni tesaku hitu nakana!

¹¹Nuapa sabana yaku ledo nadota nompakantamo komiu? Bara raulimiu ledo nipotoveku komiu. Ledo nakana! Nisani nu Alatalamo nipotoveku komiu!

¹²Tapi yaku bate-batena ledo merapi gaji lako nte komiu, ala suro-suro anu ledo ria kasimbayuna ri situ ledo maria loga mangoe manguli ira nokarajaa nasimbayu mpo kami.

¹³Suro-suro anu ledo ria kasimbayuna haitu aga suro-suro mpodava! Topokarajaa natenggo. Niulira iramo suro-suro i Kristus, tano mai ledo!

¹⁴Tapi kita ledo mahera manggita pokainggura haitu, sabana Magau nu Seta mboto nombabali karon a rasarumaka ntona ia malaeka nanggeni reme.

¹⁵Bo kita ledo muni mahera ane batua nu Magau Seta mantabuniaka pokainggura nadaa bo nokainggu mpo topokarajaa anu nangoseaka dota nu Alatala. Tapi kaupuna ira rabalasi ante pehuku nangoseaka anu nipoviara.

¹⁶Evamo niuliku pangane, nau yaku notesa mpo todayo, dekeimo loga ka yaku mangoe karoku mboto sakide. Nee rapekirimiu yaku hii mpuu-mpuu todayo, tapi nau maria sanu manguli yaku todayo, dekeimo yaku muni mangoe karoku mboto.

¹⁷Natantu ane kutoiya karoku mboto ri sii, yaku ledo notesa ante kuasa nTupu, tapi yaku notesa mpo todayo.

¹⁸Nadea tona ntanina nangoe karora mboto bo anu nipoviara ante karosora mboto. Jadi ivesia muni yaku mangoe karoku.

¹⁹Nikitaku komiu nadamba nosabara ante tona nadoyo, apa niulimiu komiu napande mpuu!

²⁰Nosabara mpuu komiu ante pakeni anu nomparenta komiu mpo potudua, atau nompakaupu anumiu, atau nombaakalani komiu, atau nokainggu nasombo nte komiu, atau nosapa lenjemiu!

²¹Ledo naeya mata kami nanguli kami ledo mabia mokainggu ivesia nte komiu! Tapi ane maria tona mabia mangoe karora mboto, yaku muni mabia mangoe karoku mboto! Yaku notesa mpo todayo!

²²Berimbamo? ToIbrani ira? Yaku muni toIbrani. ToIsrael ira? Yaku muni toIsrael! Muli i Abraham ira? Yaku muni muli i Abraham!

²³Batua i Kristus ira? Tesaku hitu eva tesa ntogila! Yaku batua i Kristus anu nelabi nabelopa pade ira! Nantamopa pokarajaaku pade pokarajaara! Nasaropa yaku nisuaraka riar ntarunggu pade ira! Yaku nicambu pakandasapa pade ira, bo nadea ngganimo yaku sakidepa namate!

²⁴Lima-ngganimo yaku nicambu ntoYahudi, talu-pulu sio-mbela sanggani.

²⁵Talu-ngganimo yaku niboba ntoRoma ante kayu. Sanggani yaku nirempe ntona ante vatu apa ira madota mompatesi yaku. Talu-ngganimo kapala-kapala nipesaviku natala rantasi, bo naria sanggani yaku nonanggo rara ntasi saeo sambongi.

²⁶Nadea ngganimo nirasaiku kasusa riarra mpolipaku. Naria uve lono. Naria muni topeago. Yaku nipandasa ntoYahudi bo muni tona ledo toYahudi. Yaku nombarasai susa riarra ngata bo ri kataolosana bo rara ntasi. Bo yaku nombarasai susa lako nte tona nanguli ira sampesuvu sampomparasaya, tano mai ledo.

²⁷Nabundumo yaku nokarajaa ntamo. Nadea ngganimo yaku ledo nakapo namonjo, ledo nangande, ledo nanginu. Nadea ngganimo yaku nombatidamaka ara ntai bo nindi bo ledo nagana pakea.

²⁸Bo ntanina lako rahaitu, eo-eo nasesa raraku nompekirika pura-pura todea topomparasaya.

²⁹Apa ane naria sampesuvu sampomparasaya nalente, yaku muni nombarasai kalentena haitu. Ane naria sanu nanavu riarra dosa, yaku muni nasusa raraku nompekirika ira.

³⁰Suro mpodava nangoe karora mboto, jadi yaku muni mangoe karoku mboto. Tapi ane yaku kana mantoiya karoku mboto, aginamo kalenteku kutoiya.

³¹Alatala, Tuama nTuputa i Yesus, Iamo masipato ratoiya sampe ri kasae-saena! Bo nisaniNa anu nitesaku hitu nakana, yaku ledo nodava!

³²Tempo yaku ri ngata Damsyik, gubernur anu nipakakuasa Magau Aretas, nantudu tantarana mombajaga bobaa mbaso ngata haitu mombasaka yaku.

³³Tapi roaku nantulungi yaku malai. Niulurakara yaku riarra karanji lako ri bolo ri tembo ngata hau ri savalikuna. Bo ivesiamo yaku nakabasaka lako ri kuasa nu gubernur haitu.

2 Korintus 12

¹Yaku kana mangoe karoku mboto, nau ledo ria gunana. Jadi kutesa ruru anu nipopakita bo anu nipopaisani i Pue Yesus ka yaku.

²Sapulu pata-mpae naliu, naria saito topangoseaka i Kristus niposisaniku anu niore hau ri ponturo nu Alatala ri suruga. Ledo nisaniku ane karonu mpuu-mpuu neore atau aga anu nipopakita ka ia. Aga Alatala nangisanina.

³⁻⁴Kusili sangganipa: ia niore sampe nesua ri ponturo nelabi kabelona nosanga Firdaus. Ledo nisaniku bara karonu mpuu-mpuu nioretaka atau aga anu nipopakita ka ia. Aga Alatala nangisanina. Bo hamai niepena tesa-tesa anu ledo nipakule mombasovadaka, tesa nabelo mpuu anu ledo masipato ratesa nu manusia.

⁵Masipato yaku mangoe karo ntona ivehaitu sabana anu nikitana, tapi ledo kuoe karoku mboto. Yaku aga madota mangoe anu nompakalanto kalenteku.

⁶Nau yaku madota mangoe karoku mboto, ledo aga tesa ntodoyo, ledo davaku, apa naria mpuu anu masipato kuoe. Tapi yaku ledo madota mangoe karoku mboto ala nee-nee yaku rabila ntona sabana anu nipopakita ka yaku. Aginamo ira mombabila yaku sabana anu nikitara riara nggatuvuku atau anu niepera lako ri tesaku.

⁷Tapi ledo mabelo ane malanga gaga raraku nantora pura-pura anu nipokumaaka nipopakita i Yesus ka yaku. Haitumo sabana nidekeiNa dua mompandasa yaku. Dua haitu nirapaka suro lako ri Magau nu Seta nompandasa yaku ala yaku ledo majadi masombo.

⁸Talu-ngganimo niperapiku mpuu-mpuu nte i Pue Yesus ala suro lako ri Magau nu Seta haitu rapopalai lako nte yaku.

⁹Tapi niuliNa ka yaku, “Nemo. Nipotoveku iko, bo haitu naganamo ka iko. Apa ane nalente iko, kuasaKu malanto mpuumo riara nggatuvumu.” Jadi, haitumo sampe yaku nadamba nangoe anu nompopakita kalenteku, apa ane yaku nalente, kuasa i Kristus nokarajaa riara ntaiku.

¹⁰Jadi ane nalente yaku, nadamba yaku. Ane yaku rasalai, atau mapepa atau rapandasa, atau rapakasusa sabana yaku nangoseaka i Kristus, nadamba yaku. Apa ane nalente yaku, kuasa i Kristus mpuu-mpuu nompakaroso yaku.

¹¹Sampesuvu-sampesuvu, yaku hii notesa mpo todoyo, tapi komiu nompasuu yaku notesa ivesia! Kakanana komiumo masipato mombatoiya yaku, sabana naupa yaku hii ledo naria nturoku, yaku ledo ntoto nakura ane rapoposisala ante tona nirekemi suro-suro anu ledo ria kasimbayuna!

¹²Tempo yaku naria ri situ nte komiu, nipoviaku tanda-tanda anu nompakalanto yaku mpuu-mpuu suro i Yesus. Yaku nosabara nokarajaa nau nadea kasusa nirasaiku, bo nipoviaku tanda-tanda nipokumaaka bo kabaraka-kabaraka ante kuasa lako nte Alatala.

¹³Ledo nipoposisalaku komiu ante todea topomparasaya ntanina. Aga sangaya ledo nipoviaku nte komiu, haitumo yaku ledo nekitanggu nte komiu. Nipekirimi nasala yaku novia ivesia? Ledo ntoto!

¹⁴Pariaramo tesaku hitu. Sii-sii nasadiamo yaku tou mompelioda komiu katalungganina, bo yaku batena ledo mekitanggu nte komiu. Sabana, ledo kakalumanamiu nieloku tapi pepotovemi! Apa ledo ngana anu masipato mompasiromu kakalumana ka totuana tapi totua masipato mompasiromu kakalumana ka ngana.

¹⁵Jadi yaku nasadia mombadekei ka komiu pura-pura anu naria nte yaku, nau karoku mboto. Ane ivesia kambaso pepotoveku ka komiu, nakuya pepotovemi ka yaku aga sakide?

¹⁶Nisanimi mbotomo yaku ledo sangani nompakasusa komiu mompekirika katuvuku. Tapi da nariapa tona nanguli yaku noakala. Pangulira yaku nombabagiu komiu ala manggava untu ka karoku mboto.

¹⁷Berimbamo? Nariamo komiu niakalani ntona nituduku tou nte komiu, sampe yaku nanggava untu ka karoku mboto? Natantu ledo!

¹⁸Nituduku i Titus tou nte komiu bara ipia nosangani-nggani ante sampesuvuta ntanina. Nariato i Titus nombaakalani komiu? Natantu ledo! Nisanimiu mbotomo kami randua nosangu rara bo pokainggu kami nasimbayu.

¹⁹Nipekirimiu tesa kami hitu bara aga manjaliku karo kami ri ngayomiu? Sampesuvu-sampesuvu nipotoveku, ledo ntoto nakana! Pura-pura hitu nitesa kami sabana kami nosangu rara nte i Kristus bo Alatala mboto nanggita kami. Pura-pura anu nipovia kami, nipovia ala mompakaroso pomparasayamiu.

²⁰Apa nakini raraku, nee-nee ane yaku tou nte komiu kukava komiu ledo mpo anu nisarumakaku, bo pokaingguku nte komiu ledo mpo anu nisarumakamiu. Nee-nee kukava komiu mosinggarau, bara masiriati, bara marau, bara aga mompekirika karo mboto. Nee-nee kukava komiu mosisalai bara mositunturaka bara malanga rara bara mompakagado todea topomparasaya.

²¹Nakini raraku ane tou nte komiu vai yaku, Alatala mompakaeya yaku ri ngayomiu, bo yaku motumangi ri ngayomiu sabana madea komiu anu nadosa bara ipia dopa najea lako ri pokainggura nadaa bo nabuga. Bara maria da nompogau tona ledo bereina mboto, bara movia anu ledo ntoto masipato mpo anu nabiasa nipoviara bara ipia.

2 Korintus 13

¹⁻²Katalu-ngganikana hitu yaku makava nte komiu. Tempo yaku ri situ nte komiu karongganina bara ipia, nipopatoraku ka ira topovia dosa bo ka pura-pura tona ntanina, tumo rapovia dosa. Jadi hitupa nau yaku ledo ri situ nte komiu, kupopatora mpanjili ka komiu: tumo mpuu movia dosa! Riaru Buku Gasa niuli ane maria tona nirai, kana maria randua atau tatalu sabi ala rasani kakanana, bara nasala ia bara ledo. Maupu sia pade mamala rahuku. Ane makava ri situ yaku bo komiu dopa nenonto novia nadaa, domo maasi matakunanggita komiu tapi kuhuku mpuu!

³Niperapimiu tandana yaku mpuu-mpuu niposuro i Kristus. Jadi ane kuhuku tona novia dosa rasanimumo yaku mpuu-mpuu niposumba i Kristus! Sabana ane Ia mangonteaka komiu Ia ledo malente, tapi Ia mpuu-mpuu makuasa.

⁴I Kristus nalente mami tempo Ia nipaku ri kayu salib sampe namate. Tapi Ia natuvu mpanjili sabana kuasa lako nte Alatala. Kami anu nosangu rara ante i Kristus, nalente muni nasimbayu mpo Ia bara ipia. Tapi kami natuvu ante kuasa nu Alatala, nasimbayu mpo i Kristus, bo ane mantingayo komiu ngena kami, rakitamiu kuasa nidekei nu Alatala ka kami.

⁵Sampesuvu-sampesuvu, paresa mbotomo karomiu ala rasanimiu bara mpuu-mpuu komiu nangoseaka i Kristus. Peinta mbotomo raramiu. Natantu rasanimumo i Yesus Kristus naria riara ntaimiu! Ane i Kristus ledo naria riara ntaimiu, batuana komiu ledo mpuu-mpuu topangoseaka Ia.

⁶Nisarumakaku nisanimumo kami hii mpuu-mpuu suro i Kristus.

⁷Kami nosambaya nerapi nte Alatala ala komiu nee movia dosa. Patuju kami nosambaya ivesia, ledo mompopakita kami hitu mpuu-mpuu suro i Kristus. Tapi patuju kami ala komiu batena movia anu nabelo. Jadi nau sanu tona ri situ da nombareke kami ledo suro i Kristus, ledo makuya, asaa komiu movia anu nabelo!

⁸Ane komiu mangoseaka anu nakana, ledo rapakule kami mangeva komiu. Kami aga madota mantulungi komiu mangoseaka anu nakana.

⁹Nadamba mpuu rara kami ane kami nalente, asaa komiu maroso momparasaya. Jadi kami bate-batena mosambaya ala pokainggumiu majadi mabelo pura.

¹⁰Haitu sampe nitulisiku sura hitu ka komiu dopame yaku tou, ala ane makava ri situ nte komiu yaku, ledo paraluu makasara yaku mompakabelo pokainggumiu ante kuasa nidekei nTupu ka yaku. Apa kuasa haitu nidekeiNa ka yaku ala mompakaroso komiu, ledo ala mompakagero komiu.

¹¹Jadi sampesuvu-sampesuvuku, pakadambamo raramiu. Pasimbukumo mompakabelo pokainggumiu mpanjili. Tarimamo pepatudukiku hitu! Komiu kana matuvu mosangu pekiri bo mosangu rara, bo mosinggabelo. Bo Alatala, puna pepotove bo katinonto, mosangani-nggani ante komiu.

¹²Posipakavotemo tabe saito bo saito ante tove. Bo tarimamo tabe lako ri pura-pura topomparasaya ri sii.

¹³Kuperapi Tuputa Yesus Kristus mombadekei belo ka komiu, bo Alatala mompotove komiu, bo Nosa Gasa nu Alatala mompakasangu komiu bo momporoa komiu pura-pura. Tabe lako nte yaku, Paulus

Galatia

Galatia 1

¹⁻²Sampesuvu-sampesuvu sampomparasaya i Yesus anu nasiromu ri umba-umba ri propinsi Galatia: Sura hitu lako nte yaku i Paulus, suro i Yesus Kristus. Yaku ledo nisuro nu manusia bo ledo muni nianggataka nu manusia majadi suro. Tapi yaku nianggataka i Yesus Kristus mboto bo Tuamata Alatala anu nompakativu Ia mpanjili lako ri kamateNa. Nadea tabe lako nte yaku, i Paulus, bo lako nte pura-pura sampesuvuta sampomparasaya anu nosanggani-nggani ante yaku ri sii.

³Kuperapi Tuamata Alatala bo i Pue Yesus Kristus batena mabelo nte komiu bo mompakatinonto raramiu.

⁴I Yesus nombadekei karoNa rapatesi mombasompo dosata nangoseaka dota nTuamata Alatala. PatujuNa ala Ia mamala mombakabasaka kita lako ri kuasa nu dunia nadaa.

⁵Alatala masipato rabila bo ratoiya sampe ri kasae-saena. Amin.

⁶Nokumaa ntoto yaku nangepe komiu! Dopa nasae niparasayamiu Kareba Belo, nitubengosimumo Alatala! NipokioNa komiu majadi todeana sabana kabelo rara i Kristus nte komiu. Tano komiu aga nangoseaka pepatuduki ntanina anu niuli tona “kareba belo”.

⁷Kakanana ledo ria “kareba belo” ntanina, aga Kareba Belo nipatolele kami ka komiu. Tapi naria tona nompakagado pekirimiu ante pepatudukira nasala. Patujura aga mombabaliki Kareba Belo anu nantesaki i Kristus.

⁸Tapi kuuli ka komiu, nau kami mboto atau malaeka lako ri suruga, isema-sema mompatolele kareba belo anu nosisala ante Kareba Belo nipatolele kami ka komiu bara ipia, tona haitu rapopogaa lako nte Alatala sampe ri kasae-saena.

⁹Tempo kami da naria nte komiu bara ipia, niuli kami mami ivesia, bo sii-sii kuuli vai sangganipa, ane maria tona mompatolele pepatuduki anu nosisala

ante Kareba Belo nitarimamiumo, tona haitu rapopogaa lako nte Alatala sampe ri kasae-saena.

¹⁰Jadi, berimbamo, sampesuvu-sampesuvu? Yaku nanguli ivesia mbeki ratoiya ntona? Ledo ntoto nakana! Yaku aga madota ratoiya nu Alatala. Bara nipekirimiu yaku aga madota mompakadamba rara nu manusia. Tapi haitu ledo muni nakana, apa ane rapana yaku da nompasimbuku mompakadamba rara nu manusia, ledo masipato yaku majadi batua i Yesus Kristus!

¹¹Sampesuvu-sampesuvu, kana rasanimiu Kareba Belo nipatoleleku ledo nopuna lako ri manusia.

¹²Kareba Belo ledo nitarimaku lako nte manusia, bo ledo muni manusia nompatuduki yaku. Tapi i Yesus Kristus mbotomo nompopaisani Kareba Belo haitu ka yaku.

¹³Tantu niepemiumo tesa katuvuku bara ipia, tempo yaku da nantuntuni agama Yahudi. Yaku nompandasa todea topomparasaya i Yesus bo ledo naasi mataku. Yaku batena nompasimbuku mompakaropu ira.

¹⁴Natutupa yaku nangoseaka agama Yahudi pade pura-pura roaku toYahudi anu sanggatuvu nte yaku. Nadidi mpuu raraku nangoseaka pepatuduki bo ada-ada ntotua kami nggaulu.

¹⁵Tapi dopame yaku nipoanaka, Alatala nompelisi yaku bo nompokio yaku majadi suroNa lako ri kabelo nu raraNa.

¹⁶Ia nompopaisani AnaNa i Yesus ka yaku ala yaku mamala mompatolele Kareba Belo anu notesaki AnaNa haitu ka tona ledo toYahudi. Tempo yaku nipokio nu Alatala, yaku ledo kaliu-liu hau nte manusia merapi rapatuduki, «apa i Yesus mbotomo nompopaisani Kareba haitu ka yaku.»

¹⁷Yaku ledo muni kaliu-liu hau ri ngata Yerusalem manggita ira anu najadi suro i Yesus nokolupa pade yaku. Tapi yaku hau ri tana Arab, bo lako ri tana Arab nanjili vai hau ri ngata Damsyik.

¹⁸Naliu talu-mpae pade hau ri ngata Yerusalem mosinggava nte i Petrus. Yaku nonturo nte ia aga sapulu lima-mbongi kasaena.

- ¹⁹Tapi yaku ledo nanggita suro-suro ntanina, aga i Yakobus tuei i Pue Yesus.
- ²⁰Tesa nitulisiku hitu nakana! Nisani nu Alatala mboto yaku ledo nodava!
- ²¹Naupu haitu pade hau yaku ri bagia Siria bo Kilikia.
- ²²Sampe ri tempo haitu, todea topomparasaya i Kristus ri bagia Yudea dopa nisanira lenjeku.
- ²³Ira aga nangepe tesa ntona nanguli, “Topompandasa kita topomparasaya bara ipia, anu madota mompakaropu kita, hitupa nompatolele Kareba Belomo!”
- ²⁴Bo nitoiyara Alatala sabana anu najadi ante yaku.

Galatia 2

- ¹Naliu sapulu pata-mpae, sangganipa vai yaku hau ri ngata Yerusalem nosangani ante i Barnabas. Bo nikeniku muni i Titus.
- ²Yaku hau ri Yerusalem sabana naria tesa nu Alatala nombatudu yaku hau. Nakavapa hamai, yaku aga nasiromu ante pakeni-pakeni ntodea topomparasaya, bo nipopaisaniku ka ira isi Kareba Belo anu nipatoleleku ka tona ledo toYahudi. Nakini raraku mbelaka rasalaira pepatudukiku sampe domo maria gunana pokarajaaku mompatolele Kareba Belo, nau anu nipoviaku bara ipia, atau anu da nipoviaku sii-sii.
- ³Tano ira nasituju nte pepatudukiku. Haitu nisaniku sabana, i Titus, toYunani anu nosangani ante yaku hamai, ledo nipasuura rasuna.
- ⁴Tapi naria tona ntanina madota mompasuu i Titus rasuna, nangoseaka atura agama Yahudi. Panguli ntona haitu, ira topomparasaya i Kristus, tano aga davara. Ira nesua nggalino-lino ri kasiromu kami bo nomata-matai kami. Patujura ala pura-pura topomparasaya matundu nte atura-atura agama Yahudi. Tapi kita ledo paraluu matundu nte atura-atura haitu ala majadi manoa ri panggita nu Alatala. Kita nikabasaka lako ri atura haitu sabana kita nosangu rara ante i Yesus Kristus.

⁵Kami ledo ntoto natundu nte pepatudukira, nau aga sampalai. Nitidamaka kami ala Kareba Belo ledo ragalo nte pepatudukira nasala, bo ala Kareba Belo nitarimamiu mpuu-mpuu nakana.

⁶Jadi pakeni-pakeni ntodea topomparasaya anu nireke nalanga nturora nasituju ante Kareba Belo nipatoleleku. (Nau nalanga panggana nau ledo, nasimbayu ri panggitaku, sabana Alatala ledo nompelenje.) Ledo ria nuapa-nuapa nitambaira ka Kareba haitu.

⁷Tapi nisaniramo yaku niparasaya nu Alatala manggeni Kareba Belo ka tona ledo toYahudi, nasimbayu mpo i Petrus niparasaya nu Alatala manggeni Kareba Belo ka toYahudi.

⁸Alatala nombadekei pompakule ka i Petrus majadi suro ka toYahudi, bo Ia muni nombadekei pompakule ka yaku majadi suro ka tona ledo toYahudi.

⁹I Yakobus, i Petrus bo i Yohanes, nireke pakeni ntodea topomparasaya i Yesus ri Yerusalem. Nikitara Alatala nombadekei pokarajaa nabelo ka yaku, haitumo majadi suroNa. Jadi ira nosijoko pale ante kami bo i Barnabas. Haitumo tandana kami pura-pura roa sampobago nanggeni Kareba Belo. Kami pura-pura nasituju ala kami bo i Barnabas manggeni Kareba Belo ka tona ledo toYahudi bo ira manggeni Kareba Belo ka toYahudi.

¹⁰Aga sangaya niperapira, haitumo ala kami ledo menonto mantulungi tona napakasi. Bo haitumo bago nipooge raraku bo nipoviaku mpuu-mpuu.

¹¹Tempo i Petrus nakava ri ngata Antiokhia bara ipia, nionteakaku nggamata-mata ia sabana pokaingguna hamai mpuu-mpuu nasala.

¹²Bara ipia ia ledo nompoposisala toYahudi ante tona ledo toYahudi. Ia nangande nosangani-nggani ante sampesuvuta sampomparasaya ledo toYahudi. Naupu sia, nakavamo bara sako-ndua roa i Yakobus lako ri Yerusalem. [Iramo toYahudi anu nomparasaya i Yesus. Pangulira topomparasaya i Yesus kana rasuna nangoseaka atura agama Yahudi.] Nakavapa ira, domo nipeili i Petrus topomparasaya anu ledo toYahudi. Domo

nabia ia nangande nosangani-nggani nte ira, apa naeka ia rasalai ntopomparasaya toYahudi dako nakava haitu.

¹³Bo topomparasaya ntoYahudi ntanina nompasiala pokainggu i Petrus muni nau nisanira ledο masipato. Sampe nau i Barnabas mboto natekeni nangoseaka pokainggura haitu.

¹⁴Tapi nikitaku pokainggura haitu ledο nosinggambela ante pepatuduki nakana lako ri Kareba Belo. Haitu sampe nionteakaku i Petrus ri ngayora pura-pura ivei: “Komiu toYahudi, tapi komiu mboto nabiasa natuvu mpo tona ledο toYahudi, komiu domo paraluu mangoseaka ada ntoYahudi. Jadi rapokuya rapasuukamiu tona ledο toYahudi mangoseaka ada ntoYahudi?”

¹⁵Sampesuvu-sampesuvu, kami toYahudi mami lako ri pompoanaka kami, kami ledο mpo tona ledο toYahudi anu niuli nadosa ʘsabana ledο nioseakara atura agama.ʘ

¹⁶Tapi nau ivesia, nisani kami manusia nireke nanao ri panggita nu Alatala ledο sabana nangoseaka Atura-atura agama, tapi sabana pomparasayara i Yesus Kristus. Jadi kami mboto nomparasaya i Yesus Kristus ala majadi manoa ri panggita nu Alatala. Kami najadi nanao sabana pomparasaya kami i Kristus, ledο sabana nangoseaka Atura-atura agama! Apa ledο ria saitoa majadi manoa ri panggita nu Alatala sabana pangoseakana Atura-atura agama.

¹⁷Jadi, ane kami toYahudi manjarumaka majadi manoa ri panggita nu Alatala lako ri posangu rara kami ante i Yesus Kristus, ʘbatuana kami domo nanjarumaka Atura agama. Bo ane kami domo nanjarumaka Atura agama, batuanaʘ kami najadi nasimbayu mpo tona ledο toYahudi anu niuli nadosa ʘsabana ledο nioseakara Atura agamaʘ. Jadi berimbamo? Mamala raulita i Kristus nanggeni kami majadi nadosa? Natantu ledο!

¹⁸Ane rapana yaku manjili manjarumaka Atura agama anu nikabasakakumo, tantu yaku nombaliunaka Atura haitu!

¹⁹Apa lako ri Atura agama ʘsampe nisaniku ledο kupakule majadi manoa ri panggita nu Alatala ante nangoseaka Atura haitu. Jadi sabana haitu, sii-siiʘ

yaku nenontomo nanjarumaka Atura agama ala yaku mamala mpuu-mpuu matuvu nangoseaka dota nu Alatala. Tempo i Kristus namate ri kayu salib, yaku muni nireke namate nosanggani-nggani ante Ia.

²⁰Jadi namala rauli ivei: nau yaku natuvu, domo aga yaku saitoku natuvu, tapi i Kristus natuvu riaru nggaturvuku. Bo ri katuvuku ri dunia hitu, yaku natuvu mpuu-mpuu nomparasaya Ana nu Alatala anu nompotove yaku bo nombadekei karoNa rapatesi manjambei yaku.

²¹Yaku ledo nompoara kabelo rara nu Alatala haitu. Apa ane rapana kita mamala majadi manoa ri panggita nu Alatala ante nangoseaka Atura agama, tantumo kamate i Yesus Kristus ledo maria gunana!

Galatia 3

¹Nadoyo mpuu komiu toGalatia! Isema nanjalipuyo komiu sampe komiu domo nadota nangoseaka pepatuduki nakana? Nipakalantoku mpuu nanguli ka komiu bara ipia patuju kamate i Yesus Kristus ri kayu salib.

²Aga sangaya madota kusani lako nte komiu. Komiu nantarima Nosa Gasa nu Alatala sabana nangoseaka Atura agama? Atau nangepe bo nomparasaya Kareba Belo i Kristus? Tantu nitarimamiu Nosa Gasa apa niepemi bo niparasayamiu Kareba Belo.

³Jadi nakuya komiu nadoyo gaga? Lako ri pamulana komiu nomparasaya i Kristus, nitarimamiu katuvu nabaru lako ri kuasa Nosa Gasa. Rapakulemiu mompapola katuvu nabaru ante pompakulemiu mboto? Tantu ledo!

⁴Berimba? Ledo ria gunana pura-pura anu nirasaimiu bara ipia? Tantu naria pura gunana!

⁵Alatala najoi raraNa nompopanau Nosa GasaNa ka komiu bo nipoviaNa kabaraka-kabaraka ri tatangamiu. Jadi berimba? NipoviaNa pura-pura haitu sabana komiu nangoseaka Atura agama? Tantu ledo! NipoviaNa pura-pura haitu sabana komiu nangepe bo nomparasaya Kareba Belo i Kristus!

⁶Pekirimo pomparasaya i Abraham. Nitulisi riaru Buku Gasa ivei: “I Abraham nomparasaya Alatala, bo lako ri pomparasayana haitu ia nireke nu Alatala tona nanao.”

⁷Jadi, kana rasanimiu, tona natuvu nomparasaya Alatala, iamo nireke muli i Abraham mpuu, sabana pomparasayana nasimbayu nte pomparasaya i Abraham.

⁸Lako ri lamba pamulana Alatala nonia ala tona ledo toYahudi majadi manoa ri panggitaNa sabana pomparasayara. Jadi kareba nabelo haitu nipopaisaniNa nokolu ka i Abraham, evamo nitulisi ri Buku Gasa ivei: “Pura-pura manusia ri dunia manggava belo lako nte Yaku sabana komiu.”

⁹I Abraham nomparasaya bo Alatala nombadekei belo ka ia. Jadi ivesia muni pura-pura tona natuvu nomparasaya Alatala, radekeika belo muni nasimbayu ante belo nidekeiNa ka i Abraham.

¹⁰Isema-sema nanjarumaka majadi manoa ri panggita nu Alatala sabana nioseakana Atura agama, iamo rahuku nu Alatala. Nisanita haitu sabana riaru Buku Gasa nitulisi ivei: “Isema-sema ledo natutu nangoseaka pura-pura parenta nitulisi riaru Buku Atura Agama, iamo rahuku nu Alatala.”

¹¹Nalanto mpuu ledo ria tona nireke nu Alatala nanao lako ri pangoseakana Atura agama, apa naria tesa ntanina ri Buku Gasa nanguli ivei: “Tona najadi nanao ri panggita nu Alatala sabana pomparasayana, iamo matuvu mabelo.”

¹²Tapi ane tona natundu nte Atura agama, haitu ledo ntoto nasimbayu ante tona nomparasaya Alatala, sabana tona natundu nte Atura agama nanjarumaka pompasimbukuna mboto, ledo nanjarumaka Alatala. Evamo niuli riaru Atura agama ivei: “Isema-sema natutu nangoseaka pura-pura Atura agama, iamo matuvu mabelo.”

¹³Kita manusia masipato rahuku nu Alatala, sabana kita pura-pura nombaliunaka AturaNa. Tapi i Kristus nombakabasaka kita lako ri pehuku haitu, sabana tempo Ia namate ri kayu salib, Iamo nihuku manjambei kita.

Nisanita i Kristus nihuku nu Alatala sabana naria tesa riara Buku Gasa nanguli ivei: “Isema-sema namate niloe ri kayu, haitu tandana ia nihuku nu Alatala.”

¹⁴Patuju i Kristus nombadekei karoNa rapatesi ivesia, ala tona ledo toYahudi mamala muni manggava belo nasimbayu ante belo nijanji nu Alatala ka i Abraham nggaulu. Belo haitu ratarimara sabana ira nosangu rara nte i Yesus Kristus. Ivesia muni kita anu nomparasaya i Kristus manggava Nosa Gasa anu nijanji nu Alatala nggaulu.

¹⁵Sampesuvu-sampesuvuku, kualala jonjo lako ri katuvuta eo-eo. Ane kita movia sura pojanji bo sura haitu nipakaasa nangoseaka ada nu pomarenta, isi nu sura haitu domo namala rapakalipo ntona atau ratambaiki isina.

¹⁶Ivesia muni ante pojanji nu Alatala. Ia nombadekei pojanjiNa ka i Abraham bo mulina. Riara Buku Gasa ledo nitulisi belo haitu radekei “ka muli-mulimu”, batuana, ka muli dea i Abraham. Anu nitulisi, belo haitu radekei “ka mulimu”, batuana ka saito muli i Abraham, haitumo i Yesus Kristus.

¹⁷Patujuku ivei: Pojanji nu Alatala ante i Abraham nipakaasa nu Alatala mboto. Pata-atu talupulu mpae kaliuna haitu, Alatala nombadekei Atura agama anu nipapola Nabi Musa. Atura-atura agama haitu ledo namala mombabaliki pojanji nokolu sampe pojanji haitu domo madupa. Pojanji nu Alatala kana madupa pura.

¹⁸Ane rapana tona mantarima belo sabana nioseakana Atura agama, batuana, belo haitu ledo nikavana lako ri pojanji nu Alatala, tapi aga lako ri pompasimbukuna mboto! Tapi, Alatala nombadekei belo ka i Abraham sabana pojanjiNa. Belo haitu pedekei bayangi lako ri kabelo rara nu Alatala.

¹⁹Jadi ane ivesia, nuapa tano patuju nu Atura agama? Alatala nombadekei Atura-atura agama naliutaka pojanjiNa ka i Abraham, ala malanto ka kita, manusia nadosa nombaliunaka dotaNa. PatujuNa ala Atura haitu rapake sampe kakava nu Muli i Abraham anu niboto riara pojanijiNa nte i Abraham nggaulu, [haitumo i Yesus Kristus.] Alatala nombatudu malaeka-malaekaNa manggeni Atura agama ka i Musa anu najadi topotariolo nompapola Atura haitu ka manusia.

²⁰Topotariolo aga niparaluu ane maria randua tona nosijanji. Tapi tempo Alatala novia pojanjiNa ante i Abraham, ledo ria malaeka atau tona ntanina ri olona. Aga Alatala mbotomo nojanji.

²¹Jadi nuapa batuana? Atura agama nositaliku ante pojanji nu Alatala? Tantu ledo. Ane rapana rapakuleta mangoseaka Atura agama sampe rakavata katuvua nabelo, tantu haitumo majadi dalata mompakanoa karota mboto ri panggita nu Alatala.

²²Tapi niuli ri Buku Gasa, pura-pura manusia nikuasai nu dosa. Jadi, ledo ria dala ntanina mompakanoa kita ri panggitaNa, aga momparasaya i Yesus Kristus. Katuvua mabelo nijanji nu Alatala radekeiNa ka isema-sema nomparasaya.

²³Bara ipia, dopame kita nomparasaya i Yesus, kita da natundu nte Atura agama. Kita nirapaka tona nitarunggu apa kita nipou Atura agama sampe makava tempona Alatala mompopaisani i Kristus ka kita, bo raparasayata Ia.

²⁴Jadi Atura agama haitu nirapaka topopaa ngana anu nombajagai kita sampe makava i Yesus Kristus, ala kita majadi manoa ri panggita nu Alatala sabana pomparasayata i Kristus.

²⁵Sii-sii nakavamo i Yesus bo manusia namala nomparasaya Ia ala majadi manoa ri panggita nu Alatala. Jadi kita domo paraluu matundu nte Atura agama.

²⁶Jadi, komiu pura-pura nosangu rara nte i Yesus Kristus, komiu najadi ana-ana nu Alatala sabana komiu nomparasaya i Kristus.

²⁷Komiu pura-pura nidiu, tandana komiu topangoseaka i Kristus, bo nipasialamiumo inggu-inggu i Kristus.

²⁸Ri panggita nu Alatala domo ria posisalana toYahudi bo tona ledo toYahudi, batua bo tona ledo batua, langgai bo mombine. Komiu pura-pura nasimbayu ri panggitaNa sabana komiu nosangu rara ante i Yesus Kristus.

²⁹Jadi ane komiu todea i Yesus Kristus, komiu muni muli-muli i Abraham. Bo komiu muni masipato mantarima anu nijanji nu Alatala ka i Abraham.

Galatia 4

¹⁻²Anu nipatujuku ivei: rapana maria saito ana ntona nakalumana. Ia nijagai ntona nipakatantu ntuamana, bo kakalumanana niurusi ntona nipakakuasaka sampe makava tempona nipakatantu ntuamana. Nau ia masipato mantarima pura-pura kakalumana ntuamana bara maipia, tempo ia da nangana, katuvuna nasimbayu ante katuvu nu batua, [haitumo, katuvuna niurusi ntona ntanina.]

³Ivesia muni kita. Dopame nisanita pepatuduki nakana, kita nipobatua anu daa, anu nombakuasai dunia hitu.

⁴Tapi nakavapa tempo nipakatantu nu Alatala, nisuroNa AnaNa makava ri dunia. AnaNa haitu nipoanaka nu mombine, bo Ia natundu nte Atura-atura agama Yahudi.

⁵Ia nisuro nu Alatala mombakabasaka kita nipou nu Atura agama, ala kita mamala raanggataka majadi ana-ana nu Alatala.

⁶Alatala nompopanau Nosa Gasa nu AnaNa riaru ntaita sabana kita najadi ana-anaNa. Bo lako ri pekeniaka Nosa Gasa riaru ntaita, kita nekakai nte Alatala nanguli, “Tata, Tuama nipotove kami!”

⁷Jadi, komiu domo batua tapi ana. Komiu najadi ana-ana nu Alatala bo natantum komiu muni radekeikaNa pura-pura anu nipakasadiaNa mami ka ana-anaNa.

⁸Bara ipia, dopame nisanimiu Alatala, komiu nipobatua nu tupu-tupu ntanina anu nisarumakamiu nakuasa, tano mai, ledo Alatala.

⁹Tapi sii-sii nisanimiumo Alatala—atau nabelopa rauli, nisani nu Alatala komiu. Jadi nakuya komiu madota matundu mpanjili nte anu ledo nompakule mantulungi komiu majadi manoa ri panggita nu Alatala? Nakuya komiu madota rapobatuara mpanjili?

¹⁰Komiu natutu nompakaoge eo-eo mbaso, bula-bula natantu, atau mpae-mpae natantu, apa da nisarumakamiu maria gunana mompakanoa komiu ri panggita nu Alatala.

- ¹¹Nakini mpuu raraku, nee-nee ledo maria gunana katiti nu iniku nompatuduki Kareba Belo ka komiu bara ipia!
- ¹²Sampesuvu-sampesuvuku, kuperapi ante mpuu-mpuu raraku ala rapasialamiu pokaingguku. Sabana ʼnaupa toYahudi yaku, domo nioseakaku ada-ada ntoYahudi, ala, majadi masimbayu nte komiu tona ledo toYahudi. Komiu nabelo mpuu nte yaku bara ipia.
- ¹³Nisanimiu mbotomo pamulana yaku nipaloga nompatolele Kareba Belo ka komiu sabana yaku nadua.
- ¹⁴Bo nau duaku haitu nompakasusa komiu, ledo ntoto narunggu raramiu bo ledo nipoaramiu yaku. Nitarimamiumo yaku, nitarimamiu mpo malaeka nu Alatala, atau mpo i Yesus Kristus mboto!
- ¹⁵Tempo haitu nasana mpuu raramiu nte yaku. Tapi nakuya sii-sii domo nasana raramiu nte yaku? Bara ipia nisaniku komiu mpuu-mpuu nasadia mantulungi yaku. Ane rapana mamala, nau matamiu mboto radekeimiu rasui ka yaku.
- ¹⁶Jadi, hitupa yaku nirekemiu balimiu sabana anu nakana nitesaku ka komiu?
- ¹⁷Tona ntanina ri situ nompasimbuku mpuu-mpuu mangala raramiu, tapi patujura ledo nabelo. Ira aga madota mompopogaa kita ala komiu mangoseaka ira ante raramiu mpuu-mpuu.
- ¹⁸Kakanana nabelo mompasimbuku ante mpuu-mpuu rara movia anu nabelo, asaa masaro ivesia, ledo aga tempo yaku nosanggani ante komiu!
- ¹⁹Yaku mpuu-mpuu nompotove komiu! Komiu mpo anaku mboto! Yaku nandasa nompekirika komiu, nasimbayu mpo mombine nandasa mpuu tempo noana. Bo yaku batena masusa ivesia sampe inggu-inggu i Kristus mpuu-mpuu malanto rakita riara nggatuvumiu.
- ²⁰Nalentora mpuu raraku mosanggani-nggani nte komiu sii-sii, ala raepemiu tesaku bo rasanimiu pombarasaiku, sabana nasudumo raraku nompekirika komiu!

²¹Hee komiu anu madota matundu nte Atura agama ḷala majadi manoa ri panggita nu Alatala.ḷ! Mai kuuli ka komiu anu nitulisi riaru Buku Atura Agama!

²²Nitulisi ivei: i Abraham randua anana, saito nipoanaka i Hagar, mombine anu najadi batua, bo saitopa nipoanaka i Sara, berei i Abraham anu ledo najadi batua.

²³Ana nu batua haitu nipoanaka nangoseaka dota nu manusia. Tapi ana nu mombine anu ledo najadi batua nipoanaka nangoseaka pojanji nu Alatala ka i Abraham.

²⁴Tesa hitu najadi gambara ka kita. Randua mombine haitu nirapaka rongaya pojanji nu Alatala. I Hagar nirapaka pojanji nipovia nu Alatala nte todeaNa ri Bulu Sinai, haitumo Atura agama. Pura-pura tona anu nompasimbuku nangoseaka Atura agama natuvu mpo batua.

²⁵I Hagar nirapaka Bulu Sinai ri tana Arab, bo nirapaka muni ka ngata Yerusalem ri dunia hitu, sabana tupu ngata Yerusalem nipobatua nu Atura agama.

²⁶Tapi i Sara nirapaka Yerusalem ri suruga. I Sara nireke tinata, sabana ia ledo najadi batua, ḷbo kita ledo nipobatua nu Atura agama.ḷ

²⁷Ia nitesaki riaru Buku Gasa ivei: “Hee mombine nagampa, anu dopa sanggani noana! Komiu kana madamba, Komiu anu dopa sanggani nombarasai dua poana, komiu kana mongare ante damba raramiu, sabana mombine nipalaisi bereina manggava madeapa anana pade mombine anu naria bereina.” (Yesaya 54:1)

²⁸Sampesuvu-sampesuvu, komiu najadi ana-ana nu Alatala nangoseaka pojanjiNa, nasimbayu nte i Ishak anu nipoanaka nangoseaka pojanji nu Alatala.

²⁹Tapi tempo nggaulu ana nipoanaka nangoseaka dota nu manusia, nompandasa tueina anu nipoanaka nangoseaka dota nu Nosa Gasa nu Alatala. Ivesia muni kita sii-sii.

³⁰Tapi berimba niuli riaru Buku Gasa? “Popalaimo mombine anu najadi batua ante anana, sabana anana haitu ledo mamala manggava bagia lako ri

kakalumana ntuamana mosangani-nggani ante ana nipoanaka mombine anu ledo najadi batua.”

³¹Jadi, sampesuvu-sampesuvu, kita ledo nasimbayu nte ana nu mombine anu najadi batua. Kita nasimbayu nte ana nu mombine anu ledo najadi batua, sabana kita ledo nipobatua nu Atura agama, tapi kita nomparasaya pojanji nu Alatala.»

Galatia 5

¹I Kristus nombakabasaka kita lako ri Atura agama ala kita mpuu-mpuu makabasaka. Jadi pakaroomo raramiu ala komiu batena makabasaka. Nee rapalamba karomiu rapobatua mpanjili.

²Pariaramo! Yaku, i Paulus, nanguli ka komiu, ane komiu mompasimbuku rasuna nangoseaka Atura agama Yahudi, ala majadi manoa ri panggita nu Alatala, batuana i Kristus ledo ntoto ria gunana ka komiu!

³Sangganipa vai kuuli ka komiu, isema-sema madota rasuna, ia masipato mangoseaka pura-pura Atura agama ntanina muni.

⁴Ane komiu mompasimbuku majadi manoa ri panggita nu Alatala ante mangoseaka Atura agama, komiu nopudusi posangu raramiu nte i Kristus. Komiu notubengosi kabelo rara nu Alatala.

⁵Tapi sampesuvu-sampesuvu, ante petulungi Nosa Gasa nu Alatala, kami nanjarumaka majadi manoa ri panggita nu Alatala sabana pomparasaya kami i Kristus. Bo haitumo anu nipopeata ante mpuu-mpuu rarata!

⁶Ane nosangu rara ante i Yesus Kristus kita, ledo ria gunana kita nisuna atau ledo nisuna. Aga nomparasaya i Kristus noguna. Bo ane kita mpuu-mpuu nomparasaya, rapotoveta roata.

⁷Bara ipia nioseakamiu nabelo Kareba Belo. Jadi nakuya hitupa komiu domo nadota nangoseaka pepatuduki nakana? Isema nombalava komiu?

⁸Natantu ledo Alatala, anu nompokio komiu majadi todeaNa.

⁹Pepatuduki nasala nipatuduki ntona haitu nasimbayu mpo ragi, sabana nau aga sakide ragi rapake, pura-pura gando rapovia roti menggamba.

¹⁰Tapi kita nosangu rara ante i Pue. Jadi niparasayaku komiu ledo mangoseaka pepatuduki nasala. Bo niparasayaku tona nompakagado pekirimiu ri situ kana rapambela pehuku nu Alatala, nau damo isema ia.

¹¹Sampesuvu-sampesuvu, niuli ntona yaku mboto da nompatuduki tona kana rasuna ane madota majadi manoa ri panggita nu Alatala. Tapi ledo ntoto nakana! Ane rapana da nipatudukiku ivesia ka tona, nakuya bo da nipandasa ntoYahudi yaku? Ane rapana da nipatudukiku ivesia, natantu pepatudukiku ledo mompakadua rara ntoYahudi! Nadua rarara nangepe kamate i Kristus ri kayu salib.

¹²Aginamo topompakagado pomparasayamiu haitu ledo aga nombasuna karora mboto, aginamo ira mombatindi karora mboto!

¹³Sampesuvu-sampesuvu, komiu nipokio nu Alatala ala rakabasaka lako ri Atura agama. Aga nee sampe haitu majadi loga mangoseaka mpengaya-ngaya dota rara nadaa! Komiu kana mosimpotove bo mositulungi.

¹⁴Naria parenta nanguli ivei: “Potovemo singgamanusiamiu nasimbayu mpo pompotovemiu karomiu mboto.” Ane raoseakamiu parenta sangu hitu, nasimbayu mpo niouseakamiu pura-pura Atura agama.

¹⁵Tapi ane komiu batena nosinggarau bo nosipodua rara, pakabelo-belo! Magero singgani-ngganimo komiu ngena!

¹⁶Patujuku ivei: komiu kana matuvu mangoseaka dota Nosa Gasa nu Alatala ala komiu ledo matuvu mangoseaka dota raramiu nadaa.

¹⁷Apa dota rara nadaa nosieva nte dota nu Nosa Gasa. Rongaya haitu nosieva sampe kita ledo nasaro novia anu nipodotata mboto.

¹⁸Tapi ane komiu nikenika Nosa Gasa nu Alatala, komiu ledo paraluu matundu nte Atura agama.

¹⁹Nalanto mpuu pokainggu ntona anu nangoseaka dota rara nadaa. Jonjona ivei: ira nosipogau nte tona ledo bereira mboto. Pokainggura nabuga bo ledo nasipato.

²⁰Ira netupu nte tupu-tupu ntanina bo nombadoti tona ntanina. Ira nosipobali, nosibaga, nasiriati, nasalisa narau bo aga nangelo untu ka karora mboto. Ira nompopeumba posinggarau sampe nosinjabingga.

²¹Nario matara nte mbara-mbara ntona, ira nanginu sampe nalangu bo nasiromu nangande bo nanginu sampe nabasa, bo nadea muni pokainggu ntanina ivehaitu. Jadi evamo niuliku ka komiu bara ipia, kupopatora ka komiu sangganipa: tona nokainggu ivegahaitu ledo ntoto manggava bagia ri Poparenta nu Alatala.

²²Tapi ane tona nikeniaaka Nosa Gasa nu Alatala, iveimo inggura: ira nosimpotove, ira nadamba bo natinonto rarara. Ira nosabara, nalusu bo nabelo rarara nte tona ntanina. Ira namala raparasaya,

²³naede rarara, bo nombakuasai dota nu karora mboto. Ledo ria atura agama anu nombatagi pokainggu ivehaitu.

²⁴Isema-sema nosangu rara ante i Yesus Kristus, nireke dota rarara nadaa namate nosangani-nggani nte i Kristus tempo Ia nipaku ri kayu salib. Batuana, ira domo nikuasai dota rarara nadaa.

²⁵Nosa Gasa nu Alatala nombadekei katuvu nabaru ka kita, jadi masipato kita matuvu mangoseaka dota Nosa Gasa haitu.

²⁶Nee kita mompakalanga rarata, nee mosipodua rara bo nee masiriati.

Galatia 6

¹Sampesuvu-sampesuvu, ane rakavamiu roamiu sampomparasaya novia dosa, komiu anu natuvu nangoseaka Nosa Gasa nu Alatala kana manggeni ia manjili ri dala nakana. Tapi tesamiu ledo mamala makasara, kana malusu raramiu motesa ka ia. Bo pakabelo-belo! Nee sampe komiu mboto manavu riara dosa!

- ²Ane roamiu sampomparasaya nombarasai susa bo pari, tulungimo ia. Apa ane komiu mositulungi, komiu mangoseaka parenta i Kristus.
- ³Ane tona nompekiri karon nabelopa pade karo roa, tano ledo, ia aga nombabagiu karon mboto.
- ⁴Aginapa simbo raparesana pokaingguna mboto ala rasanina bara nabelo pokaingguna bara ledo. Ane nabelo pokaingguna, mamala ia madamba mompekirika pokaingguna haitu. Ledo paraluu ia mompoposisala atau mompakasimbayu pokaingguna ante pokainggu ntona ntanina,
- ⁵sabana saito-saito kana mombatanggu pokaingguna mboto.
- ⁶Tona nipatudukika Tesa nu Alatala masipato mantulungi topompatuduki ia, bo mombabagi ka ia nuapa-nuapa nabelo naria nte ia.
- ⁷Sampesuvu-sampesuvu, pakabelo! Ane rasarumakata kita mamala mombabagiu Alatala, kita aga nombabagiu karota mboto. Alatala ledo namala rapongei-ngeika! Nuapa nituda, haitumo rakato.
- ⁸Batuana, ane tona batena natuvu nangoseaka dota rarana nadaa, aselena, ia mamate bo rapopogaa lako nte Alatala. Tapi ane tona natuvu nangoseaka dota Nosa Gasa nu Alatala, rakavana katuvua nabelo sampe ri kasae-saena anu radekei nu Nosa Gasa.
- ⁹Sabana haitu, nee mabasa rarata movia anu nabelo, sabana ane ledo maupu rarata movia anu nabelo, makava tempona ratarimata aselena.
- ¹⁰Jadi tempo da naria loga kita kana movia anu nabelo ka pura-pura tona, nelabipa ka sampesuvuta sampomparasaya.
- ¹¹Sampesuvu-sampesuvu, peintamo! Yaku mboto notulisi bagia sura hitu ante paleku mboto! Peinta kambaso nu hurupu nipakeku!
- ¹²Tona nanggeni pepatuduki nasala haitu aga madota mompopakita pangoseakara Atura agama ala ratoiya nu roara toYahudi. Haitumo sabana ira madota mompasuu komiu rasuna. Patujura ala ira ledo rapandasa ntoYahudi.

Apa ane rasarumakara i Kristus anu namate ri kayu salib bo domo raoseakara Atura agama, rapandasa ntoYahudimo ira.

¹³Tapi kakanana tona nangoseaka ada posuna, ira mboto ledo natutu nangoseaka pura-pura Atura agama. Ira aga madota komiu rasuna ala ira mamala mangoe sabana komiu nangoseaka parentara haitu.

¹⁴Tapi yaku ledo ntoto madota mangoe ka nuapa-nuapa; yaku aga mangoeka anu nipovia nTuputa i Yesus Kristus ri kayu salib. Lako ri kamateNa haitu, nalantomo ka yaku ledo ria nuapa-nuapa riara dunia anu namala mompakanoa yaku ri panggita nu Alatala. Jadi nikabasakakumo pura-pura anu ri dunia anu nisarumakaku bara ipia, bo yaku aga nanjarumaka i Kristus.

¹⁵Ledo ria gunana nisuna atau ledo nisuna. Anu nopoko, Alatala nompajadi kita manusia nabaru.

¹⁶Kuperapi Alatala mombadekei belo bo katinonto ka tona natuvu nangoseaka pepatuduki hitu, bo muni ka pura-pura todea nu Alatala, nau toYahudi, nau tona ledo toYahudi.

¹⁷Jadi kaupuna, tumo mompakasusa yaku, sabana bela-bela ri karoku najadi tanda yaku mpuu-mpuu batua i Yesus Kristus.

¹⁸Sampesuvu-sampesuvuku, kuperapi Tuputa Yesus Kristus bate-batena mabelo nte komiu. Amin. Tabe lako nte yaku, Paulus

Efesus

Efesus 1

¹Sampesuvu-sampesuvu anu najadi todea nu Alatala bo naroo nomparasaya i Yesus Kristus ri ngata Efesus: Sura hitu lako nte yaku i Paulus, anu nianggataka najadi suro i Yesus Kristus nangoseaka dota nu Alatala.

²Kuperapi Tuamata Alatala bo i Yesus Kristus bate-batena mabelo nte komiu bo mompakatinonto raramiu.

³Ratoiyata Alatala, Tuama nTuputa Yesus Kristus! NidekeiNa ka kita mpengaya-ngaya belo lako ri suruga sabana kita nosangu rara ante i Yesus Kristus.

⁴Dopame dunia nipajadi, Alatala nompelisi kita majadi todeaNa anu nosangu rara nte i Kristus. Kita nipelisiNa majadi todea anu matuvu magasa bo ledo maria salata ri panggitaNa.

⁵Lako ri lamba pamulana Ia nompakatantu manganggataka kita majadi ana-anaNa sabana Ia nompotove kita. Kita najadi ana-anaNa lako ri kamate i Yesus Kristus, sabana haitumo nia bo dota nu Alatala mami lako ri pamulana.

⁶Alatala novia pura-pura haitu ala ratoiyata Ia. Nelabi mpuu kaoge nu toveNa ka kita! Lako ri kabelo nu raraNa, Ia nompapelabi bayangi toveNa ka kita anu nosangu rara ante AnaNa nipotoveNa.

⁷Kita nikabasaka lako ri pehuku nu dosa sabana raa kamate i Kristus bo posangu rarata nte Ia. Dosata niampungi nu Alatala sabana toveNa anu nelabi kaogena.

⁸ToveNa haitu nipopelabiNa ka kita bo Ia muni mpuu-mpuu nompakanoto rarata bo nompopaisani patujuNa ka kita.

⁹Alatala nompopaisani ka kita niaNa anu dopa nisani nu manusia bara ipia. Nangoseaka dotaNa mboto, Alatala nompakatantu lako ri nggaulunama ala niaNa haitu rapakadupa i Kristus

¹⁰ri tempo nipakatantuNa. Iveimo niaNa haitu: pura-pura anu naria ri suruga bo ri dunia rapoposingabeloNa lako ri posangu rarara nte i Kristus, bo i Kristus mombabalenggai pura-pura.

¹¹Alatala novia mpengaya-ngaya nangoseaka patujuNa bo pobotusiNa mboto. Jadi, nangoseaka pobotusiNa lako ri lamba pamulana, Alatala nompelisi kita, apa patujuNa kita majadi todeana lako ri posangu rarata nte i Kristus.

¹²Haitu sampe kami toYahudi anu nokolu nanjarumaka i Kristus masipato mantoiya Alatala sabana kaogeNa anu nipokumaaka!

¹³Bo ivesia muni komiu. Komiu najadi todea nu Alatala tempo niepemi bo niparasayamiu pepatuduki nakana, haitumo Kareba Belo anu nompopaisani ka komiu, komiu mamala rapakasalama. Komiu nomparasaya i Yesus, jadi Alatala nombadekei Nosa Gasana ka komiu anu nijanjiNa nggaulu. Nosa Gasa haitu tandana komiu mpuu-mpuu todea nu Alatala.

¹⁴Nosa Gasa haitu panggangisita, ala rasanita Alatala mpuu-mpuu nombadekei ka kita pura-pura anu nijanjiNa ka todeana. Jadi, nisanita Alatala mpuu-mpuu mombakabasaka kita lako ri dunia nadaa hitu sabana kita todeana. Haitumo sampe masipato kita mantoiya kaoge nu Alatala anu nipokumaaka!

¹⁵Jadi ane yaku nompekirika pura-pura belo nitarimamiu, yaku mpuu-mpuu nosukuru nte Alatala! Nompamula lako ri tempo niepeku komiu nomparasaya i Yesus bo nompotove pura-pura todea nu Alatala,

¹⁶yaku nasaro nosukuru nte Alatala sabana katuvumi nabelo haitu, bo yaku bate-batena nosambaya ka komiu.

¹⁷Yaku nekakai nte Tuamata Alatala anu nakuasa bo naoge, anu nisomba nTuputa Yesus Kristus. Yaku nerapi ala la mombadekei Nosa Gasana ka komiu. Bo Nosa Gasa mompakanoto raramiu bo mompopaisani Alatala ka komiu sampe komiu mpuu-mpuu mosisani belo ante Alatala.

¹⁸Kuperapi ala la mompakareme pekirimi ala mpuu-mpuu rasanimi kabelo anu nisarumakata lako nte Alatala anu nompokio kita majadi todeana.

Kuperapi ala rasanimiu kabelo bo kaoge nu belo nipakasadia nu Alatala radekei ka todeaNa bara maipia.

¹⁹Yaku nerapi ala rasanimiu kaoge nu kuasaNa anu nipokumaaka, anu nombatulungi kita topomparasaya Ia.

²⁰Kuasa haitumo kuasa nabaraka nipakeNa tempo nipakatuvuNa mpanjili i Kristus lako ri kamateNa bo nidekeiNa kuasa ka Ia bo ponturo nibila ri pangganaNa ri suruga.

²¹Kuasa nidekeiNa ka i Kristus naogepa pade pura-pura kuasa ntanina, nau kuasa pomarenta-pomarenta, nau kuasa ntomaoge, nau kuasa anu nisomba manusia, nau kuasa-kuasa nipokaeka manusia. I Kristus nakuasapa pade pura-pura anu nalanga panggana, nau anu naria sii-sii, nau anu maria ri tempo makava.

²²Pura-pura anu naria nipopekou nu Alatala nte i Kristus. Bo nianggatakaNa i Kristus majadi Pakeni pura-pura anu naria, bo i Kristus nomparenta todea topomparasaya Ia. I Kristus nirapaka Balengga ntodea topomparasaya,

²³bo kita todea topomparasaya nirapaka karoNa. Todea topomparasaya nipakagana i Kristus anu nompakagana pura-pura nuapa naria, ri umba-umba ri dunia bo ri suruga.

Efesus 2

¹Sampesuvu-sampesuvu, dopame komiu nomparasaya i Kristus, komiu nireke namate sabana komiu batena nadosa bo nombaliunaka parenta-parenta nu Alatala.

²Komiu natuvu nangoseaka kabiasa-kabiasa nu manusia ri dunia hitu, haitumo komiu nangoseaka dota nu Magau Seta, pakeni nu kuasa-kuasa nadaa ri laerava. Iamo nombakuasai rara ntai ntona anu ledo natundu nte Alatala.

³Bara ipia kita pura-pura nokainggu nasimbayu mpo tona haitu; kita muni natuvu nangoseaka mpengaya-ngaya dota rarata nadaa. Kita aga novia anu nompakasana karota bo pekiri rara ntaita nadaa. Kakanana kita masipato

rapambela pehuku nu Alatala sabana pokaingguta haitu. Kita nasimbayu mpo tona ntanina nadaa.

⁴Tapi Alatala naasi mpuu mataNa nanggita kita. Naoge mpuu toveNa anu nipopelabiNa ka kita.

⁵Tempo kita da nireke namate sabana ledo natundu nte Ia, Ia nompakatuvu mpanjili kita nosanggani-nggani ante i Kristus. Toramo! Komiu nipakasalama sabana kabelo rara nu Alatala!

⁶Bo kita nianggatakaNa ala kita muni momparenta mosanggani-nggani ante i Yesus Kristus ri suruga sabana kita nosangu rara ante Ia.

⁷Alatala novia ivesia ala ri tempo makava bo sampe ri kasae-saena, manusia manggita kaoge nu toveNa bo kabelo nu raraNa anu ledo ria kasimbayuna. ToveNa bo kabelo raraNa haitu nipopakitaNa ka kita ante anu nipovia i Yesus Kristus.

⁸Lako ri pomparasayamiu i Kristus, komiu nipakasalama sabana kabelo rara nu Alatala. Haitu ledo asele pompasimbukumi mboto tapi pedekei nu Alatala bayangi.

⁹Kita nipakasalama ledo sabana pompasimbukuta mboto ala ledo maria tona mangoe manguli, “Yaku hii nipakasalama sabana pompasimbukuku mboto!”

¹⁰Kita hii nipajadi nu Alatala manusia nabaru anu nosangu rara nte i Yesus Kristus. Patuju nu Alatala novia ivehaitu ala kita mompakule mokainggu mabelo, mpo nipakatantuNa mami ka kita lako ri nggauluname.

¹¹Jadi, sampesuvu-sampesuvuku, toramo katuvumi bara ipia. Nangoseaka pompoanaka komiu, komiu ledo toYahudi. Panguli ntoYahudi komiu “tona nasomu”, haitumo tona ledo todea nu Alatala. Ira toYahudi nanguli aga iramo todea nu Alatala sabana ira nisuna nangoseaka ada agamara. Tapi kakanana ada posuna haitu aga tanda nipovia nu manusia ri karora.

¹²Bara ipia, dopa nisanimi i Kristus. Komiu mpo tosangatana apa komiu ledo nosamporoa nte toYahudi anu nipelisi nu Alatala majadi todeaNa. Komiu ledo nanggava bagia riara pojanji nu Alatala ka todeaNa. Komiu aga natuvu bayangi

riara dunia hitu bo ledo nisanimiu Alatala, bo ledo ria panjarumakamiu nuapanuapa.

¹³Tapi sii-sii domo mpo bara ipia, sabana komiu nosangu raramo ante i Yesus Kristus. Bara ipia komiu nakavao lako nte Alatala, tapi sii-sii komiu nipakapara ante Ia sabana raa lako ri kamate i Kristus.

¹⁴⁻¹⁵I Kristus mbotomo nompoposinggabelo kita. Ia nompopakasangu toYahudi bo tona ledo toYahudi. Ia nombadekei karoNa mboto rapatesi manjambei kita, bo ante kamateNa haitu nikabasakaNa kita lako ri Atura-atura agama Yahudi ante pura-pura parenta bo pepatudukina. Haitu nipoviaNa ala mompakaupu posieva anu nirapaka tembo anu nompopogaa toYahudi bo tona ledo toYahudi. Jadi kami toYahudi bo komiu tona ledo toYahudi nipoposinggabeloNa ala kita majadi manusia nabaru anu nosangu rara ante Ia. Ivesiamo Ia nompoposinggabelo kita.

¹⁶Lako ri kamateNa ri kayu salib, i Kristus nompopakasangu toYahudi bo tona ledo toYahudi, bo nompoposinggabelo pura-pura kita nte Alatala bo nompakaupu pura-pura posievata.

¹⁷Haitumo sabana i Kristus nakava nompatolele kareba posinggabelo ka kita pura-pura, haitumo, ka komiu tona ledo toYahudi anu nakavao lako nte Alatala bara ipia, bo muni ka kami toYahudi anu napara nte Alatala.

¹⁸Jadi, kita pura-pura, toYahudi bo tona ledo toYahudi, namala mosinggava nte Tuamata Alatala riara posambayata sabana anu nipovia i Kristus. Kita mamala mosinggava nte Ia ante petulungi Nosa Gasana sangu.

¹⁹Jadi, sampesuvu-sampesuvu ledo toYahudi, bara ipia komiu aga nireke ntona tosangatana, bo ledo todea nu Alatala. Tapi sii-sii domo ivesia. Sii-sii komiu nosamporoa nte todea nu Alatala. Komiu najadi nosambanua ante pura-pura ana-ana nu Alatala.

²⁰Kita topomparasaya i Kristus nirapaka gana-gana nu banua nibangu nu Alatala. Suro-suro i Kristus bo nabi-nabi nirapaka pandasi nu banua haitu. I Yesus Kristus nirapaka vatu nu pandasi anu nelabi nopoko.

²¹Iamo nombasunju pakabelo-belo bo nompakaroso banua haitu sampe najadi banua petupu anu nagasa, anu masipato raponturo nu Alatala.

²²Bo komiu muni [anu ledο toYahudi] nosangu rara nte i Kristus, jadi komiu muni nosangani-nggani ante topomparasaya i Kristus ntanina najadi ponturo Nosa Gasa nu Alatala.

Efesus 3

¹Jadi, haitu pura-pura sabana yaku, Paulus, nosambaya ka Alatala. Yaku nitarunggu sabana nompatolele Kareba Belo i Yesus Kristus ka komiu tona ledο toYahudi.

²Natantu niepemiumo Alatala nombadekei ka yaku pokarajaa mompatolele Kareba Belo ka komiu [tona ledο toYahudi]. Pokarajaa haitu nidekeiNa ka yaku lako ri kabelo nu raraNa.

³Ia mboto nompopaisani patujuNa ka yaku anu dopa nisani nu manusia bara ipia. (Nitulisiku sakide ri bavona,

⁴bo ane rabacamiu, rasanimiu muni anu nipopaisani ka yaku, haitumo, patuju nu Alatala anu nipakadupa riarā nggatuvu i Kristus.)

⁵Ri tempo nggaulu nia haitu dopa nipopaisani ka manusia. Tapi sii-sii Nosa Gasa nu Alatala nompopaisani nia nu Alatala haitu ka kami suro-suroNa bo nabi-nabiNa.

⁶Iveimo nia nipopaisaniNa: tona ledο toYahudi mantarima belo lako nte Alatala mosangani-nggani ante toYahudi. Bo tona ledο toYahudi mosangani-nggani nte toYahudi majadi sipa-sipa ri sangu karo, haitumo karo i Kristus. Bo ratarimara munimo pura-pura anu nijanji nu Alatala ka tona nosangu rara nte i Yesus Kristus. Pura-pura haitu ratarimara sabana niparasayara Kareba Belo.

⁷Lako ri kabelo nu raraNa, Alatala nombadekei ka yaku pokarajaa mompatolele Kareba Belo. Bo lako ri kuasaNa anu nokarajaa riarā ntaiku, nipopompakuleNa yaku mompapola pokarajaa haitu.

⁸Yaku natueipa pade pura-pura todea nu Alatala ntanina. Tapi naupa ivesia, Alatala nabelo mpuu nte yaku bo nidekeiNa ka yaku pokarajaa mompatolele Kareba Belo ka komiu tona ledο toYahudi. Kareba haitu notesaki kabelo i Kristus anu naoge mpuu, ledο rapakuleta mombarekena.

⁹Yaku nidekeika pokarajaa muni mompopaisani ka pura-pura tona berimba Alatala nompakadupa niaNa, haitumo, niaNa mompopakasangu toYahudi bo tona ledο toYahudi lako ri posangu rarara nte i Kristus. Lako ri lamba pamulana, Alatala Topompajadi dunia hitu dopa mompopaisani niaNa haitu.

¹⁰PatujuNa ala sii-sii pura-pura malaeka bo anu nakuasa ri langi mangisani notoNa nompasiayu mpengaya-ngaya, sabana rakitara niaNa haitu rapakadupa ante todea topomparasaya i Kristus.

¹¹Alatala novia pura-pura haitu nangoseaka patujuNa anu nipakatantuNa mami lako ri lamba pamulana. Bo patujuNa haitu nipakadupaNa ante kakava nTuputa Yesus Kristus.

¹²Kita nomparasaya i Kristus bo kita nosangu rara ante Ia, jadi domo makaja rarata mosinggava nte Alatala riara posambayata, bo nisanita ratarimaNa.

¹³Jadi, sampesuvu-sampesuvu, kuperapi nte komiu, nee maupu raramiu nangepe yaku nitarunggu, sabana pura-pura kasusa nirasaiku sii-sii manggeni belo ka komiu.

¹⁴Jadi, ane yaku nantora kanoto nu Alatala bo niaNa lako ri lamba pamulana, yaku nantaputu nosambaya ri ngayo nTuamata Alatala.

¹⁵Iamo Tuama nu pura-pura anu naria, nau kita ri dunia, nau isi suruga.

¹⁶Naoge mpuu kuasa bo kabelo nu Alatala! Jadi kuperapi ala Ia mpuu-mpuu mompakaroso rara ntaimiu ante Nosa Gasana

¹⁷sampe i Kristus bate-batena monturo riara ntaimiu sabana komiu nomparasaya Ia. Bo kuperapi ala katuvumiu rakuasai nu tove i Kristus bo toveNa haitu mokale riara ntaimiu.

18-19 Kuperapi nte Alatala ala komiu mosangani-nggani ante pura-pura todeaNa ntanina, mamala mangisani bo mombarasai kaoge nu tove i Kristus ka kita. Ledo rapakule nu manusia ntoto mombapaha tove i Kristus haitu bo ledo rapakuleta mombasuka kambasona. Kuperapi nte Alatala ala komiu batebatena mombarasai tove i Kristus haitu riaru katuvumiu, ala mamala rapasialamiu pura-pura inggu nu Alatala.

20 Alatala masipato rabilata! Nabaraka mpuu kuasaNa anu nombatulungi kita riaru katuvuta. Ante kuasaNa haitu, Alatala nompakule novia nelabipa pade pura-pura raperapita atau rapekirita.

21 Alatala masipato ratoiya ntodea topomparasaya. Ia masipato ratoiya sii-sii bo sampe ri kasae-saena sabana anu nipovia i Yesus Kristus. Amin!

Efesus 4

1 Jadi sampesuvu-sampesuvu, sabana haitu pura-pura, siimo petevai lako nte yaku anu nitarunggu ri sii sabana pomparasayaku i Pue Yesus. Yaku mpuu-mpuu nerapi ala komiu matuvu ante pokainggu masipato ka todea nu Alatala, apa komiu nipokioNa majadi todeaNa.

2 Komiu kana matuvu ante ede rara. Komiu kana malusu raramiu, bo kana mandoe posabaramiu. Nee makodi raramiu nte roa, tapi positulungimo sabana tovemiu.

3 Pasimbukumo ante mpuu-mpuu raramiu matuvu mosinggabelo. Nosa Gasa nu Alatala nompopakasangu kita pura-pura, jadi kita kana mombajagai kasintuvuta haitu.

4 Pura-pura kita topomparasaya i Kristus najadi sangu karo i Kristus. Bo sangu Nosa Gasa nu Alatala anu naria riaru ntaita pura-pura. Ivesia muni panjarumakata aga sangu, haitumo kita pura-pura nipokio nu Alatala matuvu mosangani-nggani nte Ia sampe ri kasae-saena.

5 Aga i Yesus saitoNa Tuputa, bo aga sangu pomparasayata. Ivesia muni aga sangu patujuta niduu, haitumo, rapopakitata kita topangoseaka i Kristus.

⁶Aga saito Alatala, Tuamata pura-pura. Iamo nomparenta pura-pura, bo Iamo nompake kita pura-pura, bo Iamo nonturo riara ntaita pura-pura.

⁷Tapi ʻnau nadea kasimbayuta, pompakule nidekei nu Alatala ka kita ledo nasimbayu, sabana ʻ kita saito-saito nidekeika pompakule mokarajaa ka i Kristus nangoseaka anu nipakatantuNa ka kita.

⁸Naria nitulisi riara Buku Gasa ʻanu nombaboto pompakule haitu ʻivei: “Tempo Ia neore hau ri ponturo ri kalangana, Nadea tona nitavani nikenina. Bo Ia nompalele pedekei-pedekei ka manusia.” (Mazmur 68:19)

⁹Nuapa batuana tesa-tesa haitu? Ane Ia neore hau ri ponturo ri kalangana, natantu dopame Ia neore, Ia nanau ri ponturo ri tambena ntotomo, haitumo, ri dunia hitu.

¹⁰Bo i Kristus anu nanau haitu, Ia muni neore hau ri ponturo anu nalangapa pade pura-pura anu ntanina ri langi, ala Ia mamala maria ri umba-umba.

¹¹Iamo nompalele pedekei-pedekei ka kita. Sanu nidekeikaNa pompakule majadi suro, sanu nidekeikaNa pompakule majadi nabi anu mompasimbayu tesa nitarimana lako nte Alatala. Sanu muni nidekeikaNa pompakule majadi topompatolele Kareba Belo, bo ntanina nidekeikaNa pompakule manggeniaka bo mompatuduki todea topomparasaya.

¹²NipaleleNa pedekei haitu ala kita todea nu Alatala rapakagana ala rapakuleta mantui pokarajaa nu Alatala. PatujuNa muni ala kita anu najadi karo i Kristus mantambai karosota,

¹³sampe kaupuna kita pura-pura mpuu-mpuu mosangu rara sabana kita nomparasaya Ana nu Alatala bo mpuu-mpuu nosisani nte Ia. Bo kita pura-pura mantambai manoto, bo pomparasayata mantambai maroso sampe domo makura nuapa-nuapa. Bo kita majadi nasimbayu mpo i Kristus mboto, nanoto bo naroso.

¹⁴Ane ivesia kita, kita domo mpo ngana anu ledo nakaja rabagiu, atau sakaya kodi nitompesaka nu balumba bo nikenina nu poiri hau tumai. Kita domo aga rataja hau tumai mangoseaka mpengaya-ngaya pepatuduki anu ledo nakana,

bo domo kaliu-liu momparasaya tesa-tesa ntopebagiu anu natau gaga nodava, dava nipoviara mboto. Patujura, mompakasalandala kita.

¹⁵Tapi kita kana mpuu-mpuu matuvu mangoseaka pepatuduki nakana bo kita kana mosimpotove. Ivesiamo mantambai karoso pomparasayata bo mantambai kanotota sampe kita majadi nasimbayu nte i Kristus. I Kristus haitu, nirapaka Balenggata

¹⁶bo kita todea topomparasaya nirapaka sipa nu karoNa. Ri karo manusia sipa nu karo nikuasai nu balengga. Sipa-sipa haitu niposidumpa pakabelo-belo bo niposiumpu ante uva ala majadi sangu karo. Bo ane pura-pura sipa haitu mokarajaa mangoseaka pompakule nidekei ka ia, njumangu karo haitu matuvu mabelo bo mantambai maroso. Ivesia muni kita topomparasaya. Kita pura-pura nosangu rara nte i Kristus bo Ia nompopakasangu kita. Jadi ane kita mosimpotove bo mositulungi, mantambai kabelona kasintuvuta bo karoso pangoseakata i Pue.

¹⁷Jadi sampesuvu-sampesuvu, ante kuasa nidekei nTupu ka yaku, kuuli ka komiu, tumo matuvu mpo tona ledο nosisani ante Alatala! Ira aga nompekirika anu ledο ria gunana,

¹⁸bo ledο nipahara nuapa-nuapa. Katuvu nabaru lako nte Alatala ledο naria nte ira sabana ledο ntoto nisanira pepatuduki nakana anu notesaki Alatala. Ledο nisanira sabana nakaa bagara.

¹⁹Domo nisanira naeya sampe ira aga natuvu nangoseaka mpengaya-ngaya dota rarara nadaa. Nipodambara novia anu ledο masipato rapovia bo ledο ria rekerā.

²⁰Tapi ledο pokainggu ivehaitu nipatuduki i Kristus ka komiu.

²¹Niepemiumo karebaNa, bo komiu nosangu rara nte Ia, jadi natantu komiu nipatudukika pepatuduki nakana anu notesaki i Yesus.

²²Haitumo, komiu nipatuduki mombakabasaka katuvu njaemiu ante pokainggu nituntunimiu tempo komiu dopa nomparasaya i Yesus. Dota rara nadaa nituntunimiu tempo haitu nombabagiu komiu bo nompakagero katuvumiu.

²³Kana rakabasakamiu pokainggu njae haitu ala pekirimiu bo rara ntaimiu rapakabaru.

²⁴Komiu kana matuvu mpo manusia nabaru anu nipajadi nu Alatala nangoseaka ingguNa mboto anu nanao bo mpuu-mpuu nagasa.

²⁵Sampesuvu pura-pura, kita nipatuduki mokainggu manoa bo magasa, jadi tumo modava! Kita kana motesa makana ka sampesuvuta sampomparasaya apa kita pura-pura sipa nu karo i Kristus.

²⁶Ane marau komiu, nee sampe rau raramiu mompakanavu komiu riaru dosa. Nee mombaboli rau rara sampe masolo eo,

²⁷ala ledo maria loga nu Magau Seta mesua riaru nggatuvumiu.

²⁸Topangangga kana menonto mangangga. Ira kana mokarajaa ante palera mboto mompaelo katuvura ala mamala ira mantulungi tona ntanina napepa.

²⁹Sampesuvu-sampesuvu, ane komiu motesa, nee rasovadakamiu tesa nadaa tapi sovadakamo tesa-tesa masipato, anu mombatulungi bo mompakaroso rara ntona ntanina. Tesa-tesa ivehaitu manggeni belo ka topangepena.

³⁰Jadi, nee rapoviamiu anu mompakabuku rara Nosa Gasa nu Alatala. Toramo! Alatala nombadekei Nosa Gasa ka kita, tandana kita najadi todeana. Bo Nosa Gasana haitu muni najadi panggingisita ala rasanita kita mpuu-mpuu rakabasaka lako ri dunia nadaa hitu ngena.

³¹Pakalipomo pura-pura dua rara. Nee magigi rara bo nee momboli rau rara. Nee mosipongare-ngare mosipakadaaka tesa bo nee mositunturaka. Nee mavuu matamiu nte roa.

³²Tapi kana mabelo raramiu nte roa bo mosipoasi mata. Komiu kana mosiampungi, nasimbayu mpo Alatala nombampungi komiu sabana komiu nosangu rara nte i Kristus.

Efesus 5

¹Alatala nompotove komiu bo komiu najadi ana-anaNa, jadi komiu kana mompasiala pokainggu nu Alatala.

²Bo komiu kana matuvu mompotove roa, nasimbayu mpo i Kristus nompotove kita. Lako ri toveNa haitu, nidekeiNa karoNa nipatesi ala mombatolosi kita. PoviaNa haitu nompakadamba rara nu Alatala nasimbayu mpo pesomba navangi nisomba ka Ia.

³Komiu todea nu Alatala. Jadi ledo ntoto masipato komiu mosipogau ante tona ledo bereimiu mboto, atau mokainggu nabuga, atau mario mata bo ledo ria kabasa-basana. Nee sampe maria sabana raraika ntona komiu nokainggu ivehaitu.

⁴Ledo muni masipato komiu mosovadaka tesa-tesa nasuloka bara tesa-tesa ledo ria gunana bara kuvava-kuvava anu ledo masipato. Aginapa sumbamiu rapakemiu manguli tarima kasi ka Alatala.

⁵Toramo pakabelo-belo! Tona nosipogau nte tona ledo bereina mboto bo tona nokainggu nabuga ledo ntoto manggava bagia riaro Poparenta nu Alatala bo i Kristus. Ivesia muni ante tona nario matana bo ledo ria kabasa-basana, sabana anu niporiona haitu najadi anu nisombana bo haitu nasimbayu kadaana nte topompakande tupu-tupu ntanina.

⁶Jadi, nee komiu rabagiu ntona ante tesa-tesara anu ledo ria gunana, anu nanguli pokainggu ivehaitu ledo nasala. Toramo! Pokainggu ivehaitumo nompopeumba rau rara nu Alatala ka tona ledo natundu nte Ia.

⁷Sabana haitu, nee mosimporoa ante tona nokainggu ivehaitu.

⁸Komiu mboto natuvu ri kalandana bara ipia, tapi sii-sii komiu natuvu ri karemena sabana komiu nosangu rara ante i Pue. Jadi komiu kana matuvu ante pokainggu masipato ka tona anu natuvu ri karemena.

⁹Apa inggu ntona anu natuvu ri karemena nabelo bo nanao bo ia namala raparasaya.

¹⁰Pasimbukumo ala rasanimiu pokainggu nipokono nu Alatala.

¹¹Nee rapasialamiu pokainggu ntona anu da natuvu ri kalandana, apa pokainggura haitu ledo ntoto naria gunana. Tapi komiu kana batena

mokainggu mabelo ala katuvumiu majadi reme ka ira bo rasanira pokainggura nadaa.

¹²Apa pokainggu nipoviara nggalino haitu mpuu-mpuu nepakaeya, nau aga ratesa-tesa, naeya pura mata.

¹³Pura-pura anu nalanda, ane ravanta nu reme, malanto rakita.

¹⁴Bo pura-pura anu rapakalanto ivesia, mabali majadi mareme. Haitumo batuana tesa niuli ivei: “Pembangumo komiu anu namonjo. Pembangumo lako ri tatanga ntomate, Bo reme i Kristus mombavanta komiu.”

¹⁵Sabana haitu, pekiri pakabelo katuvumiu; nee matuvu mpo tona nadoyo, tapi komiu kana matuvu mpo tona nanoto.

¹⁶Pakemo loga naria nte komiu movia anu nabelo, sabana tempo sii-sii pokainggu manusia nadaa mpuu.

¹⁷Jadi nee madoyo, tapi pasimbukumo mangisani bo movia anu nipodota i Pue rapoviamiu.

¹⁸Nee malangu, apa haitu aga mompopeumba dota rara nadaa anu mompakagero katuvumiu. Tapi komiu kana rakuasai Nosa Gasa nu Alatala.

¹⁹Posipakaroso raramiu, pakemo tesa-tesa lako ri Mazmur, bo dade-dade nipake nantoiya Alatala bo dade-dade nidekei nu Nosa Gasa ka komiu. Komiu kana madamba modade mombatoiya i Pue ante mpuu-mpuu raramiu.

²⁰Komiu kana masaro motarima kasi nte Tuamata Alatala ka pura-pura anu najadi. Ulimo tarima kasi ka Ia sabana komiu nosangu rara nte Tuputa Yesus Kristus.

²¹Pekoumo nte roamiu ntanina sampomparasaya sabana komiu nombabila i Kristus.

²²Mombine, pekoumo nte bereimiu langgai, nasimbayu nte pekoumiu nte i Pue

²³sabana langgai nombabalenggai bereina mombine nasimbayu mpo i Kristus nombabalenggai todea topomparasaya. I Kristus mboto nompakasalama todea topomparasaya anu nirapaka sipa nu karoNa.

²⁴Jadi kita todea topomparasaya nekou nte i Kristus, ivesia muni mombine kana mekou nte bereina riara mpengaya-ngaya.

²⁵Langgai, potovemo bereimiu mombine nasimbayu mpo i Kristus nompotove todea topomparasaya bo nombadekei karoNa rapatesi ala mompakasalama kita todea topomparasaya.

²⁶PatujuNa ala kita majadi todea nu Alatala. NipegasaNa kita nadosa sabana kita nomparasaya tesaNa bo kita nidiu nte uve tandana kita topangoseaka Ia.

²⁷I Kristus novia ivesia ala kita todeaNa majadi masipato mantingayo Ia, nasimbayu mpo boti mombine anu nagaya mpuu ri panggita nu bereina, nagasa bo nabelo ntoto, anu ledo nakura nuapa-nuapa, bo ledo ria nuapa-nuapa rasalai.

²⁸I Kristus nompotove todeaNa, ivesia muni langgai kana mompotove bereina nasimbayu mpo pompotovena karon mboto. Isema-sema nompotove bereina, batuana ia nompotove karon mboto.

²⁹Ledo ria tona navuu matana ka karon mboto. Ia nompiara bo nombajagai karon pakabelo-belo nasimbayu mpo i Kristus muni nompiara bo nombajagai todeaNa.

³⁰Haitu nipovia i Kristus sabana kita todea topomparasaya nireke sipa nu karoNa mboto.

³¹Ri Buku Gasa nitulisi ivei: “Langgai kana mompalaisi tina tuamana bo matuvu mosangani ante bereina, bo ira randua kana majadi saito.”

³²Tesa hitu nakumba batuana, tapi anu nipatujuku ante tesa hitu iamo posinggapara i Kristus ante todeaNa.

³³Tapi tesa hitu nosinggambela muni ante komiu topoberei. Pura-pura langgai kana mompotove bereina nasimbayu mpo pompotovena karon mboto, bo pura-pura mombine kana mompasimbuku mombabila bereina langgai.

Efesus 6

¹Ngana-ngana, komiu kana matundu nte tina tuamamiu sabana haitumo pokainggu masipato ka topomparasaya i Pue.

²⁻³Bilamo tina tuamamiu ala komiu matuvu mabelo bo mandoe umurumiu ri dunia. Lako ri Sapulu Parenta nu Alatala, haitumo parenta pamulana anu nitambai ante pojanji nabelo.

⁴Komiu anu najadi tuama-tuama nu ngana, nee rapoviamiu anu mompakadua rara anamiu. Tapi piaramo ira. Patuduki bo popatora ira ante pepatuduki lako nte i Pue.

⁵Sampesuvu-sampesuvu anu najadi batua, turusimo parenta nu puamiu anu naria ri dunia hitu. Bilamo ira bo pekoumo nte ira ante mpuu-mpuu raramiu, nasimbayu mpo komiu nekou nte i Kristus mboto.

⁶Nee aga mokaarajaa mabelo tempo komiu rakita nu puamiu ala komiu ratoiya nu manusia. Tapi pokarajaamo ante mpuu-mpuu raramiu najadi batua i Kristus anu nangoseaka dota nu Alatala.

⁷Pokarajaamo ante damba nu rara. Rekemo komiu nokarajaa ka i Pue, ledo aga ka manusia.

⁸Pariaramo! Isema-sema novia nabelo, nau ia batua atau ledo batua, kana rakavana balasina nabelo lako nte i Pue.

⁹Bo komiu anu najadi pua atau madika, komiu muni kana mokainggu mabelo nte batuamiu. Nee momparangga ira, sabana nisanimiu mboto Tupumiu bo Tupura aga saito. Iamo naria ri suruga bo Ia ledo nompelenje.

¹⁰Kaupuna, komiu kana maroso ante kuasa nitarimamiu lako ri kuasa nTupu anu nabaraka, apa komiu nosangu rara ante Ia.

¹¹Pakemo pura-pura pareva posieva nidekei nu Alatala ka komiu, ala komiu mompakule mombatidamaka mpengaya-ngaya peeva noakala lako ri Magau nu Seta.

¹²Apa kita ledo nangeva manusia. Kita nangeva kuasa-kuasa bo pomarenta-pomarenta nadaa anu ledo nikita. Kita nangeva malaeka-malaeka nadaa anu

nakuasa ri dunia hitu. Kita nangeva mpengaya-ngaya seta bo anu daa ri laerava.

¹³Sabana haitu, pakemo pura-pura pareva posieva nidekei nu Alatala ala rapakulemiu mombatidamaka peeva nu balimiu ri tempo posieva ntamo, sampe komiu da bate-batena meangga maroso maupu posieva haitu.

¹⁴Jadi, komiu kana masadia mombatidamaka peeva balimiu! Komiu kana matutu mangoseaka pepatuduki nakana. Haitumo sulepemiu. Komiu kana mokainggu manoa. Haitumo baju asemiu anu nombalenduti karomiu.

¹⁵Komiu kana masadia manggeni Kareba Belo anu nompoposinggabelo manusia ante Alatala. Haitumo sapatumiu anu nompakaroso peanggamiu.

¹⁶Komiu kana maroo momparasaya Alatala riaru mpengaya-ngaya. Haitumo kaliavomiu ratipalemieu ala rapakulemiu mantenggu bo mompepaya mpengaya-ngaya mata pana apu lako nte Magau Seta. Ane maroo pomparasayamiu, rapakulemiu mombadagi pesori.

¹⁷Komiu kana maroo manjarumaka Alatala mompakasalama komiu. Haitumo songgo bajamiu anu mombalenduti balenggamiu. Bo komiu kana mompake Tesa nu Alatala. Haitumo guma nidekei Nosa Gasana ka komiu.

¹⁸Komiu kana masaro mosambaya bo merapi tulungi nte Alatala. Nuapa-nuapa rapoviamiu, posambayamo, nangoseaka pekeniaka Nosa Gasa nu Alatala. Komiu kana mainga bo nee maupu raramiu mosambaya. Nggani-nggani mosambaya, sambayani pura-pura todea nu Alatala.

¹⁹Bo posambayaka muni yaku ala tempo yaku motesa, Alatala mombadekei ka yaku tesa-tesa masipato, bo nau bara nuapa majadi, yaku mabia mompatolele Kareba Belo anu ledo nisani ntona nggaulu.

²⁰Yaku niposumba i Yesus Kristus mompatolele Kareba Belo. Bo sii-sii yaku nitarunggu sabana mompatolele Kareba haitu. Jadi, posambayakamo yaku ala mabia yaku mompatolele Kareba Belo, sabana haitumo pokarajaa nidekei nu Alatala ka yaku.

²¹Dotaku ala rasanimiu berimba katuvuku ri sii. Jadi haitu sampe nituduku i Tikhikus tou nte komiu. Ia sampesuvuta nipotoveku anu natutu nantulungi pokarajaa nTupu.

²²Ia nituduku tou nte komiu bo manguli anu najadi nte kami ri sii, ala raramiu rapakavoe.

²³Kuperapi Tuamata Alatala bo i Pue Yesus Kristus mompakatinonto raramiu, bo mompakaroso pepotove bo pomparasayamiu pura-pura.

²⁴Kuperapi Alatala bate-batena nabelo nte pura-pura tona anu ledo naupu-upu nompotove Tuputa Yesus Kristus. Amin. Tabe lako nte yaku Paulus

Filipi

Filipi 1

¹Sampesuvu-sampesuvu sampomparasaya anu nonturo ri ngata Filipi: Sura hitu lako nte yaku i Paulus, bo i Timotius, batua-batua i Yesus Kristus. Kami notulisi ka komiu pura-pura anu nosangu rara ante i Yesus Kristus, bo muni ka pakeni ntodea topomparasaya bo topotulungi pakeni ntopomparasaya.

²Kami nerapi Tuamata Alatala bo Tuputa Yesus Kristus mombadekei belo ka komiu bo mompakatinonto raramiu.

³Sampesuvu pura-pura, nggani-nggani yaku nantora komiu, niuliku tarima kasi ka Tupuku Alatala.

⁴Bo nggani-nggani yaku nosambaya ka komiu pura-pura, yaku nosambaya ante damba raraku.

⁵Yaku nosukuru sabana lako ri pamulana sampe sii-sii, komiu nasaro nantulungi yaku nompatolele Kareba Belo lako nte Alatala.

⁶Alatala mbotomo nompamula novia anu nabelo riaru ntaimiu. Bo niparasayaku poviaNa haitu rapakapolaNa sampe maupu, ri tempo kakava i Yesus Kristus mpanjili.

⁷Masipato yaku mantora komiu pura-pura ivesia, apa komiu mpuu-mpuu nipotoveku bo komiu pura-pura nantulungi yaku novia pokarajaa nidekei nu Alatala ka yaku. Komiu nasaro nantulungi yaku, tempo yaku nitarunggu sii-sii, bo muni tempo yaku nanjaliku Kareba Belo bara ipia bo nompakalanto ka tona Kareba Belo mpuu-mpuu nakana.

⁸Nalentora mpuu raraku nte komiu, apa pompotoveku komiu nasimbayu mpo pepotove i Yesus Kristus mboto. Nisani nu Alatala tesaku hitu nakana.

⁹Jadi, iveimo pomperapiku nte Alatala, ala pepotovemiu mantambai, bo mantambai rasanimiu anu nakana, bo mantambai kanoto mpekirimiu.

¹⁰Ane ivesia komiu, rasanimiu mompelisi anu nabelopa rapoviamiu, bo katuvumiu majadi magasa bo ledo maria salamiu sampe i Kristus makava mpanjili.

¹¹Bo pokainggumiu mpuu-mpuu majadi mabelo bo manoa sabana pokarajaa i Yesus Kristus riara nggatuvumiu, sampe madea mpuu tona mombabila bo mompakaoge Alatala.

¹²Sampesuvu-sampesuvu, kana rasanimiu, nau yaku nitarunggu ri sii, potarunggu yaku aga nompakantambai kadea ntona nangepe bo nomparasaya Kareba Belo.

¹³Pura-pura tantara anu nombajagai banua nu Magau Mbaso bo pura-pura tona ntanina ri sii, nisanira yaku hii nitarunggu sabana yaku nokarajaa ka i Kristus.

¹⁴Bo deanapa sampesuvu sampomparasaya ri sii nantambai karoso pomparasayara i Pue Yesus, sabana nikitara Tupu nantulungi, yaku ri tarunggu sampe domo naeka ira, tapi nantambaimo kabiara nompatolele Tesa nu Alatala.

¹⁵Naria bara sako-ndua tona nompatolele Kareba i Yesus Kristus sabana nasiriati nanggita yaku bo ira madota majadi padagi. Tapi naria muni tona ntanina nompatolele Kareba haitu ante patuju nabelo.

¹⁶Ira haitumo nompatolele Kareba Belo sabana nipotovera yaku, apa nisanira yaku nianggataka nu Alatala ala kupopaisani ka tona Kareba Belo mpuu-mpuu nakana.

¹⁷Tapi tona nasiriati pangane, ledo nagasa rarara nompatolele Kareba i Kristus sabana ira aga madota mompakaoge karora mboto. Nisarumakara poviara haitu mantambai kasusaku riara ntarunggu.

¹⁸Tapi ledo makuya! Sabana nau bara berimba, nau nipovia ante patuju nabelo atau patuju nasala, asaa kareba i Kristus nipatolele. Haitumo nompakadamba raraku.

¹⁹Bo yaku batena nadamba apa nisaniku, yaku rakabasaka sabana posambayamiu bo petulungi Nosa i Yesus Kristus.

²⁰Yaku mpuu-mpuu nanjarumaka yaku ledo rapakaeya nokarajaa nompatolele Kareba i Kristus. Nisarumakaku yaku bate-batena mabia mosabi, nemopa sii-sii, ala nau mamate atau matuvu yaku, rakita ntona kaoge i Kristus riara nggatuvuku.

²¹Apa, ane yaku matuvu, patujuku mompakaoge i Kristus, bo ane yaku mamate, nelabi belona ka yaku!

²²Tapi ane yaku da matuvu ri dunia hitu, yaku da mamala mokaarajaa anu noguna. Jadi domo nisaniku umbana kupelisi, matuvu atau mamate!

²³Yaku nitaja mpekiri rongaya. Yaku mpuu-mpuu madota mompalaisi dunia hitu hau monturo mosanggani-nggani ante i Kristus, sabana haitumo nabelopa.

²⁴Tapi nogunapa ka komiu ane yaku maboli ri dunia hitu ala mombatulungi komiu.

²⁵Nisaniku nogunapa ka komiu, jadi sabana haitu, nisaniku yaku da matuvu bo mosinggava vai nte komiu pura-pura ala komiu mantambai maroso bo madamba momparasaya i Yesus.

²⁶Jadi, ane yaku manjili tou nte komiu, komiu mpuu-mpuu madamba mantoiya Yesus Kristus sabana yaku.

²⁷Jadi, nau bara nuapa majadi nte yaku, komiu kana matuvu ante pokainggu masipato ka topangoseaka Kareba Belo i Kristus. Komiu kana matuvu ivesia ala nau kita mosinggava atau ledo, kuepe karebana komiu naroo nosangu rara bo nosangu pekiri bo singgani-nggani nompasimbuku nokarajaa ala madea tona momparasaya Alatala nangoseaka anu niuli riara Kareba Belo.

²⁸Bo nee rapokaeka tona mangeva komiu. Apa kabiamiu haitu nompakalanto ka ira iramo rahuku nu Alatala bara maipia, tapi komiu rapakasalamaNa, sabana Alatalamo nombatulungi komiu.

²⁹Apa Alatala nompaloga komiu nokarajaa nombatulungi i Kristus, haitumo, komiu ledo aga nipalogaNa momparasaya i Kristus, tapi nipalogaNa muni komiu mombarasai susa bo pari sabana komiu topomparasaya Ia.

³⁰Apa komiu muni raeva ntona tempo komiu mompasimbuku mompatolele Kareba Belo, nasimbayu mpo anu nikitamiu najadi nte yaku bara ipia bo hitupa niepemi da najadi nte yaku sii-sii.

Filipi 2

¹Jadi sampesuvu-sampesuvu, nisaniku narosomo pomparasayamiu sabana komiu nosangu rara ante i Kristus. Raramiu nipakavoe sabana komiu nipotoveNa. Komiu nasintuvu ante Nosa Gasa nu Alatala bo komiu muni nosimpotove bo nosipoasi mata.

²Sabana haitu, kuperapi komiu mpuu-mpuu mompakadamba raraku ivei: matuvu mosimpotove, mosangu rara, mosangu pekiri bo mosangu patuju.

³Nuapa-nuapa rapoviamiu, nee aga mangelo kauntu mboto atau mantoiya karo mboto, tapi aginamo rapakaedemi raramiu bo manguli roamiu naogepa pade komiu mboto.

⁴Nee aga mompeili katuvumi mboto, tapi peili muni katuvu roa ntanina.

⁵Pekirimi bo inggumi kana masimbayu nte pekiri bo inggu i Yesus Kristus.

⁶Nau Ia nasimbayu nte Alatala, ledo nirasaiNa Ia kana mantaamaka kakuasaNa bo nturoNa nalanga haitu.

⁷Tapi lako ri dotaNa mboto nikabasakaNa pura-pura haitu bo najadi mpo batua. Ia najadi nasimbayu nte manusia bo nikita ntona Ia natuvu mpo manusia.

⁸Bo tempo Ia natuvu mpo manusia, Ia nompakaede raraNa bo natundu nte Alatala sampe namate, nau sampe nipatesi nipaku ri kayu salib mpo tona nadaa.

⁹Haitumo sabana Alatala nanganggataka Ia ri ponturo naogepa ri suruga bo nombadekei kuasa ka Ia anu naogepa pade pura-pura kuasa ntanina.

¹⁰Haitu nipovia nu Alatala ala pura-pura anu natuvu mombabila i Yesus. Nau isi suruga, nau isi dunia, nau ira ri ponturo ntomate, pura-pura kana mantaputu mombasomba Ia,

¹¹bo pura-pura ira mompangaku i Yesus Kristusmo Tupura. Ivesiamo, ira mombabila bo mombatoiya Tuamata Alatala.

¹²Jadi sampesuvu-sampesuvu nipotoveku, komiu nasaro nangoseaka pepatudukiku tempo yaku da nosanggani-nggani ante komiu. Jadi kuperapi komiu batena mangoseaka pepatudukiku, nemopa sii-sii kita nosinggavao. Alatala nompakasalama komiu bo nidekeiNa katuvu nabelo ka komiu. Jadi pasimbuku njuumo matuvu manoa, maeka mokainggu nadaa, sampe kaupuna katuvumiu nabelo haitu ledo makura nuapa-nuapa.

¹³Apa Alatala mbotomo nokarajaa riarra ntaimiu nombadekei ka komiu dota rara bo pompakule mangoseaka dotaNa.

¹⁴Nau bara nuapa rapoviamiu, nee mongau atau mosinggarau,

¹⁵ala malanto ka pura-pura tona komiu ana-ana nu Alatala nabelo, anu ledo rasalai ntona. Komiu natuvu nanao ri tatanga manusia natenggo bo nadaa nasimbayu mpo betue-betue nombavanta kalandana.

¹⁶Apa komiu nompatolele ka ira Kareba Belo anu namala manggeni ira matuvu mabelo sampe ri kasae-saena. Ane komiu matuvu ivesia, madamba mpuu raraku tempo i Kristus makava mpanjili, sabana katuvumiu haitu tandana naria mpuu asele pokarajaaku, bo ledo aga nalenge bayangi yaku nokarajaa ntamo ri tatangamiu bara ipia.

¹⁷Pangoseakamiu i Kristus nirapaka pesombamiu ka Alatala anu mompakadamba raraNa. Tempo bara ipia, ane tona nombadekei pesomba ka Alatala, kana nombatoli uve anggur ala mompakagana pesombana. Ane rapana yaku rapatesi sabana pokarajaaku nompatolele Kareba Belo, raaku rarapaka uve anggur nitoli haitu, apa yaku nasadia mamate ane rapodota nTupu. Jadi, nau yaku rapatesi, ledo nakuya! Yaku batena manguli tarima kasi nte Alatala bo yaku muni madamba mpasanggani-nggani nte komiu.

¹⁸Ivesia muni komiu kana mosukuru bo madamba mpasanggani-nggani ante yaku.

- ¹⁹Ane rapodota i Pue Yesus, yaku nonia masalisa mombatudu i Timotius tou nte komiu, ala tempo ia manjili tumai, raraku rapakavoe mangepe karebamiu.
- ²⁰Kutudu ia sabana ledo ria roaku ntanina ri sii nosangu pekiri nte yaku bo mpuu-mpuu nompekirika kabelomiu.
- ²¹Pura-pura roaku ntanina aga nasesa nompekirika bagora mboto, ledo nompekirika dota i Yesus Kristus.
- ²²Nisanimiu mbotomo i Timotius namala raparasaya. Ia nokarajaa ntamo nosanggani-nggani ante yaku nompatolele Kareba Belo nasimbayu mpo ngana nantulungi tuamana.
- ²³Jadi ane kusani nuapa majadi nte parakaraku ri sii, kutudu ia masalisa tou nte komiu.
- ²⁴Bo ante petulungi nTupu, niparasayaku domo masae yaku mboto mamala tou nte komiu.
- ²⁵Ane sampesuvuta i Epafroditus, anu nitudumiu bara ipia tumai mombatulungi yaku, nipekiriku kana kutudu manjili tou nte komiu vai ia. Ia roaku sampokarajaa anu nosanggani-nggani ante yaku nompatolele Kareba Belo i Kristus nau nieva ntona.
- ²⁶Nalentoramo rarana nte komiu pura-pura, bo nasusa rarana sabana niepemiua ia nadua.
- ²⁷Nakana mpuu ia nadua, sakidepa namate. Tapi nabelomo ia sabana Alatala naasi mataNa nanggita ia. Ledo aga ia nipoasi mata nu Alatala, yaku muni, apa ane i Epafroditus mamate mpuu, mantambai kasusa raraku.
- ²⁸Haitu sampe yaku nasalisa nombatudu ia manjili tou nte komiu ala tempo komiu mosinggava ante ia, madamba raramiu bo domo masusa gaga pekiriku.
- ²⁹Jadi tarimamo ia ante madamba apa ia sampesuvuta sampomparasaya. Bo bilamo pura-pura tona nokarajaa mpo ia
- ³⁰apa sakidepa namate ia nompapola pokarajaa i Kristus. Ledo ntoto nipekirina katuvuna mboto sabana ia madota manjambei komiu mantulungi yaku ri sii.

Filipi 3

¹Sampesuvu-sampesuvu, kapolana, komiu kana madamba sabana komiu nosangu rara ante i Pue Yesus. Ledo nalenge yaku nombasili anu nitulisiku ka komiu bara ipia, sabana yaku madota mompainga komiu ala komiu ledo rabagiu ntona anu nanggeni pepatuduki nasala.

²Komiu kana mainga nte tona manggeni pepatuduki nadaa, anu noinggu mpo asu nasoa. Ira madota mompasuu komiu rasuna nangoseaka atura i Musa. ³«Pangulira kita kana rasuna ala mpuu-mpuu manoa ri panggita nu Alatala. Nee raparasayamiu!»³Kakanana, kitamo anu nanao ri panggita nu Alatala, ledo ira, apa kita nombasomba Alatala ante pekeniaka Nosa GasaNa. Kita nadamba sabana kita nosangu rara nte i Yesus Kristus, bo ledo nisarumakata pompasimbukuta mboto atau tonuapa kita, ala majadi manoa ri panggita nu Alatala.

⁴Ane rapana kita mamala majadi manoa ri panggita nu Alatala sabana pompasimbukuta mboto atau tonuapa kita, yakumo hii mamalapa mangoe. Ane maria tona nompekiri ia mamala mangoe ka pompasimbukuna mboto atau tonuapa ia, nelabipa yaku!

⁵Yaku nisuna tempo da noumuru valu-mbongi. Yaku nipoanaka ntoIsrael lako ri muli i Benyamin. Yaku toIbrani mpuu, bo yaku toFarisi anu mpuu-mpuu natutu nangoseaka pura-pura Atura nipapola Nabi Musa.

⁶Nadidi mpuu raraku nangoseaka Atura agama Yahudi, sampe yaku nompandasa topomparasaya i Yesus. Pura-pura Atura haitu nioseakaku, ledo ria sangaya niliunakaku.

⁷Bara ipia, pura-pura haitu nirekeku noguna. Tapi sii-siipa nirekeku ledo ria gunana, sabana yaku nanjarumaka i Yesus Kristusmo.

⁸Ledo aga haitu, tapi pura-pura nirekeku ledo ria gunana ane raposisala ante anu nelabi kabelona, haitumo nosisani ante Tupuku i Yesus Kristus. Jadi nikabasakakumo pura-pura bo nirekeku mpo rumpu ala yaku mamala mosisani ante i Yesus Kristus

⁹bo mpuu-mpuu mosangu rara ante Ia! Alatala nombareke yaku nanao ri panggitaNa, ledo sabana pangoseakaku Atura-atura agama, tapi sabana pomparasayaku i Kristus. Yaku najadi nanao ri panggita nu Alatala ledo lako ri pokaingguku, tapi lako nte Alatala mboto. Bo Alatala nompakanoa yaku lako ri pomparasayaku.

¹⁰Naoge mpuu raraku mosisani ante i Kristus bo mombarasai kuasa anu nompakatuvu mpanjili Ia lako ri kamateNa. Bo yaku madota muni mombarasai susa bo pari nasimbayu mpo susa bo pari nirasaiNa, sampe bara yaku muni mamate masimbayu mpo Ia

¹¹ala yaku muni mamala rapakatuvu mpanjili lako ri kamateku.

¹²Ledo niuliku nikavaku puramo haitu bo ledo muni niuliku naganamo pangoseakaku i Kristus. Tapi yaku nompasimbuku ala yaku mpuu-mpuu mosisani nte i Yesus Kristus bo majadi nasimbayu mpo Ia, apa haitumo patujuNa nompokio yaku mangoseaka Ia.

¹³Sampesuvu-sampesuvu, nisaniku yaku dopa nasimbayu ntoto nte i Kristus. Tapi naria anu nipoviaku: yaku nombalingasi pura-pura anu najadi bara ipia bo nompasimbuku manggava anu naria ri ngayoku.

¹⁴Yaku mpo topangova anu ledo neili nompeinta anu ri puri tapi nangova nompetoto anu raalana. Yaku nompasimbuku njuu mangoseaka i Kristus, ala kukava hadia padagi radekei nu Alatala ka yaku ri suruga, haitumo, nipokiokaNa kita matuvu mosangu rara nte i Yesus Kristus ri suruga sampe ri kasae-saena.

¹⁵Jadi, kita toroso nomparasaya kana mosangu pekiri mompasimbuku mangoseaka i Kristus evamo niuliku pangane. Tapi ane maria pekirimiu da nosisala nte pekiriku, damo Alatala mboto mompakanoto raramiu.

¹⁶Tapi anu nisanitamo kana batena raoseakata.

¹⁷Sampesuvu pura-pura, pasialamo pokaingguku, bo pariarantai munimo pokainggu ntona ntanina anu natuvu nangoseaka jonjo kami.

¹⁸Apa nadea ngganimo niuliku ka komiu bara ipia bo sii-sii kuuli vai ante tangi, nadeamo tona natuvu ante pokainggu nadaa. Niulira ira topomparasaya tapi pokainggura nadaa nompakalanto pesapuakara. Ledo niparasayara i Kristus namate ri kayu salib mombakabasaka kita lako ri kuasa nu dosa.

¹⁹Tona ivehaitu ranavusaka ri narakaa, sabana aga dotara mboto anu nadaa nisombara. Anu nipoeya, haitumo nioera sabana aga anu ri dunia hitu nipekirikara.

²⁰Tapi ledo ivesia pokaingguta, sabana kita todea nu suruga. Bo lako ri suruga muni makava Tuputa i Yesus Kristus, Topepakasalama anu nipopeata ante lentora nu rarata.

²¹Tempo Ia makava, rabalikiNa karota nalente bo mamate, ala majadi masimbayu nte karoNa mboto anu nelabi kaogena bo ledo mamate. Namala rapoviaNa ivesia sabana kuasaNa naogepa pade pura-pura kuasa ntanina bo Iamo nombakuasai pura-pura anu naria.

Filipi 4

¹Jadi, sampesuvu-sampesuvu nipotoveku bo nipolentoraku. Komiu mpuu-mpuu nompakadamba raraku, bo nasana mpuu raraku sabana pomparasayamiu asele pokarajaaku nompatolele Kareba Belo. Nantora anu niuliku pangane, nee molengga-lengga momparasaya bo mangoseaka i Pue Yesus.

²Sampesuvuku i Euodia bo sampesuvuku i Sintike, yaku mpuu-mpuu merapi ala komiu mosangu rara anu masipato ka topomparasaya i Pue Yesus.

³Bo kuperapi muni nte vega rapaku i Sunsugos, tulungimo mombine randua pangane ala ira mosangu rara mpanjili. Ira nokarajaa ntamo ante yaku nompatolele Kareba Belo nasimbayu mpo i Klemens bo roa-roaku ntanina sampokarajaa. Sangara nitulisi riaru Buku Katuvua, anu nompakatantu isema masipato matuvu mabelo sampe ri kasae-saena.

⁴Sampesuvu pura-pura, kadambamo raramiu sabana komiu nosangu rara ante i Pue Yesus. Sangganipa kuuli ka komiu, kadambamo raramiu!

⁵Kusarumaka pura-pura tona manggita kabelo raramiu. Toramo! Domo masae makava i Pue Yesus.

⁶Nee makini raramiu riaru nuapa-nuapa, tapi kenimo pura-pura riaru posambayamiu. Perapimo anu niparaluumiu lako nte Alatala bo masaro manguli tarima kasi.

⁷Bo ane radekeimiu kakini raramiu ka Alatala, radekeiNa katinonto ka komiu anu ledo rapakule nu manusia mompahana. Ia mompakatinonto raramiu bo pekirimiu sabana komiu nosangu rara ante i Yesus Kristus.

⁸Kaupuna, sampesuvu-sampesuvu, tanondoakamo anu nakana, anu nanao, bo anu masipato rapakaoge. Pekirikamo anu nagasa, anu nagaya, bo anu nabelo raepe ntona. Tanondoakamo anu mpuu-mpuu nabelo, bo anu masipato ratoiya.

⁹Anu nipegurumiu bo nitarimamiu lako nte yaku, nau tesaku, nau jonjo nikitamiu riaru nggatuvuku, haitumo kana rapoviamiu. Bo ane haitu rapoviamiu, Alatala momporoa komiu bo mompakatinonto raramiu.

¹⁰Nadamba mpuu raraku nosangu rara nte i Pue Yesus sabana nau nasaemo kita nosinggavaoni, sii-sii nitulungimiu vaimo yaku. Ledo niuliku komiu ledo nantora yaku bara ipia. Nisaniku dopa ria logamiu mompakatu pedekeimiu ka yaku.

¹¹Niuliku ivesia ledo sabana yaku napepa, apa naosamo raraku nau damo berimba katuvuku.

¹²Nisanikumo natuvu napepa bo nisaniku munimo natuvu nelabi. Nau bara nuapa najadi nte yaku, nisaniku nompakaosa raraku, nau tempo nabosu, nau tempo naara, nau yaku nelabi, nau yaku napepa.

¹³Nipakuleku nantingayo nuapa-nuapa ante petulungi i Yesus Kristus anu nompakaroso yaku.

¹⁴Naupa ivesia, nitulungimiu yaku riaru kasusaku ri sii bo anu nipoviamiu haitu nabelo.

¹⁵Sampesuvu-sampesuvu toFilipi, nisanimiu mbotomo tempo yaku paratama nompatolele Kareba Belo ka komiu bara ipia, bo nipalaisiku propinsi Makedonia, ledo ria topomparasaya ntanina nompakatu doi petulungi ka yaku. Aga komiu nombatande yaku bo nantulungi yaku nompapola pokarajaaku haitu.

¹⁶Ledo aga haitu, tempo yaku da ri Makedonia ri ngata Tesalonika bo naria paraluuku, ledo aga sanggani komiu nompakatu pedekei ka yaku.

¹⁷Yaku ledo aga madota mantarima pedekeimiu. Tapi yaku madota ala belo ratambai ka komiu lako ri poviamiu nabelo haitu.

¹⁸Jadi, ala rasanimiu, nitarimaku puramo pedekei nipakatumiu, bo nelabi-labi! Pura-pura pedekei nipakatumiu nitarimakumo lako nte i Epafroditus. Sii-sii nagana puramo anu niparaluuku. Pedekeimiu haitu nasimbayu mpo pesomba navangi, anu nitarima nu Alatala bo nipodamba raraNa.

¹⁹Alatala nisombaku mompakagana ka komiu pura-pura anu niparaluumiu lako ri kakalumanaNa anu naoge mpuu, sabana anu nipovia i Yesus Kristus.

²⁰Jadi ratoiyata Tuamata Alatala sampe ri kasae-saena. Amin!

²¹Pakavote tabeku ka pura-pura topomparasaya i Yesus Kristus ri situ. Bo tarima tabe lako nte sampesuvuta sampomparasaya anu naria nosangganingani ante yaku ri sii.

²²Tarima muni tabe lako nte pura-pura todea nu Alatala ri ngata hitu, nelabipa ira lako ri banua Magau Mbaso Kaisar.

²³Kuperapi Tuputa Yesus Kristus bate-batena mabelo nte komiu. Amin. Tabe lako nte kami, Paulus bo Timotius

Kolose

Kolose 1

¹⁻²Sampesuvu-sampesuvu sampomparasaya ri ngata Kolose, todea nu Alatala anu naroo nosangu rara nte i Kristus: Sura hitu lako nte yaku, i Paulus, anu nipelisi majadi suro i Yesus Kristus nangoseaka dota nu Alatala; bo lako nte i Timotius, sampesuvuta sampomparasaya. Nadea tabe kami. Kami merapi Tuamata Alatala mombadekei belo ka komiu bo mompakatinonto raramiu.

³Nggani-nggani kami nosambaya ka komiu, kami nasaro nanguli tarima kasi nte Alatala, Tuama nTuputa Yesus Kristus,

⁴sabana niepe kamimo komiu nomparasaya i Yesus Kristus bo nompotove pura-pura todea nu Alatala.

⁵Komiu nomparasaya bo nepotove sabana komiu bate-batena nanjarumaka Alatala bo nantongoraka anu nipakasadiaNa ka komiu ri suruga. Anu nisarumakamiu haitu niepemiumo tempo Kareba Belo nipatolele ka komiu bara ipia. Kareba Belo haitu mpuu-mpuu nakana

⁶bo natolele ri umba-umba ri dunia sampe da kapantambai-mbaina kadea ntona nomparasaya i Yesus bo katuvura nipakabaru. Ivesia muni najadi ante komiu, nompamula lako ri tempo niepemiu Kareba Belo bo mpuu-mpuu nirasaimiu kabelo nu Alatala.

⁷Kabelo nu Alatala niepemiu lako nte i Epafras, roa kami sampokarajaa nipotove kami. Ia batua i Kristus anu natutu nokarajaa nantulungi komiu.

⁸Iamo nanguli ka kami, komiu nosimpotove sabana pekeniaka Nosa Gasa.

⁹Jadi nompamula lako ri tempo niepe kami karebamiu, kami nasaro nosambaya ka komiu. Kami nerapi nte Alatala ala Nosa GasaNa mombadekei noto bo pangisani ka komiu ala rasanimiu pura-pura dota nu Alatala ka komiu.

¹⁰„Ane rasanimiu dota nu Alatala ka komiu,„ mamala komiu matuvu ante pokainggu masipato ka topomparasaya i Pue, bo pura-pura inggumiu mompakadamba raraNa. Komiu mompakule movia mpengaya-ngaya anu nabelo, bo posisanimiu ante Alatala mantambai munimo.

¹¹Kami nerapi ala Alatala mompakaroso raramiu ante pura-pura kuasaNa, nangoseaka barakaNa anu naoge mpuu, ala rapakulemiu mosabara nau bara nuapa majadi bo ledο molengga-lengga raramiu.

¹²Kami nerapi ala raramiu batena madamba manguli tarima kasi ka Tuamata Alatala, apa Iamo nompakasipato komiu manggava bagia lako ri anu nipakasadiaNa ka pura-pura todeaNa riara PoparentaNa nareme.

¹³Iamo nombakabasaka kita lako ri kuasa nalanda bo nompajadi kita todeaNa ri Poparenta nu AnaNa nipotoveNa.

¹⁴AnaNa haitu nantolosi kita, sampe dosata niampungι.

¹⁵Alatala ledο nikita. Tapi ane nisanita inggu bo kuasa nu AnaNa, nisanita muni inggu bo kuasa nu Alatala. Namala raulita AnaNa haitu Lumbua, haitumo kuasaNa nelabipa pade pura-pura anu nipajadi nu Alatala.

¹⁶Apa Iamo nipopale nu Alatala nompajadi pura-pura anu naria ri suruga bo ri dunia, anu nikita, bo anu ledο nikita. Pura-pura malaeka nu Alatala bo seta-seta, pura-pura anu nakuasa bo anu nipakakuasa, nipajadi i Kristus ante kuasa nu Alatala, ala pura-pura haitu mombabila bo mompakaoge Ia.

¹⁷Dopame naria dunia, naria mamimo i Kristus. Bo pura-pura anu naria, nikeniakana bo nipasiayuNa ante kuasaNa.

¹⁸Kita anu nomparasaya i Kristus namala rarapaka karoNa, bo i Kristus balenggata. Balenggata nompakasiayu karota, ivesia muni Ia nompakasiayu todea topomparasaya Ia. Bo Iamo nombadekei katuvu nabaru ka kita. Iamo Lumbua; batuana, Iamo anu paratama natuvu mpanjili lako ri kamatena. Sabana haitu pura-pura, Iamo naogepa pade pura-pura anu naria.

¹⁹Dota nu Alatala mboto sampe pura-pura ingguNa bo kuasaNa naria muni nte AnaNa, bo ledο ria nakura.

²⁰Bo dotaNa muni, AnaNa mompoposinggabelo pura-pura anu nipajadiNa nte Ia. Pura-pura anu nipajadi nu Alatala, nau ri dunia, nau ri suruga, pura-pura nosinggabelo mpanjili ante Ia sabana raa nu AnaNa anu natiti tempo Ia nipatesi ri kayu salib.

²¹Bara ipia komiu muni natuvu nantubengosi Alatala. Komiu nangeva Alatala sabana pekirimiu bo pokainggumiu nadaa.

²²Tapi, sii-sii Alatala nompoposinggabelo mpanjili komiu ante Ia sabana kamate i Kristus. I Kristus nombadekei karoNa rapatesi ala komiu majadi magasa, bo komiu ledo masala atau makura ri panggitaNa.

²³Jadi komiu kana batena momparasaya bo nee molengga-lengga. Nee radekei tona mombabagiu komiu. Nee menonto manjarumaka anu nijanji nu Alatala ka komiu riara Kareba Belo. Kareba Belo haitu niepemiumo bo nipatolele sampe ri njumangu dunia. Bo yaku muni, i Paulus, nianggataka najadi topompatolele Kareba haitu.

²⁴Sampesuvu-sampesuvu, sii-sii nadamba raraku nombarasai susa bo pari nikavaku sabana yaku nokarajaa nantulungi komiu. Apa yaku nombadupai ri karoku susa bo pari nipakatantu i Kristus kana kurasai. Bo susa bo pari nirasaiku nanggeni belo ka todea topomparasaya. Pura-pura kita topomparasaya nirapaka karo i Kristus.

²⁵Yaku nianggataka nu Alatala mantulungi todea topomparasaya; niparasayakaNa yaku pokarajaa haitu ala kupasimbayu pura-pura karebaNa ka komiu tona ledo toYahudi.

²⁶Kareba haitu nompakalanto nia nu Alatala anu dopa nipopaisani ka manusia lako ri nggaulunama, lako ri muli nu mulina, tapi sii-sii nipopaisaniNamo ka todeaNa, haitumo, tona nomparasaya Ia.

²⁷Apa dota nu Alatala ala rasani ntodeaNa kabelo bo kaoge niaNa ka pura-pura manusia. NiaNa haitumo: i Kristus natuvu riara ntaita, jadi nisanita kita mpuu-mpuu matuvu mabelo nte Alatala sampe ri kasae-saena.

²⁸Jadi Kareba i Kristusmo nipatolele kami ka pura-pura tona. Nipake kami pura-pura noto anu naria riara ntai kami nompopatora ira [anu ledo mabelo rapoviara] bo nompatuduki ira [movia anu nabelo]. Patuju kami ala pura-pura ira mamala rakeni mantingayo Alatala bo pomparasayara ledo makura nuapa-nuapa ri panggitaNa sabana posangu rarara ante i Kristus.

²⁹Haitumo sampe yaku nokarajaa ntamo, yaku mpuu-mpuu nompasimbuku nokarajaa ante kuasa nidekei i Kristus, apa kuasaNa riar nggatuvuku mpuu-mpuu naroso.

Kolose 2

¹Jadi, kana rasanimiu yaku nompasimbuku mpuu nantulungi komiu bo tona ri ngata Laodikia, bo pura-pura tona anu dopa nosisani ante yaku.

²Yaku nompasimbuku ala raramiu pura-pura rapakaroso bo komiu mosangu rara bo mosimpotove. Apa ane ivesia, pomparasayamiu mpuu-mpuu maroso bo komiu ledo molengga-lengga sabana nisanimumo anu nakana. Jadi komiu mosisani belo nte i Kristus, Iamo poko nia nu Alatala, nia anu nitabuniaka lako ri nggauluname.

³I Kristusmo topompopaisani pura-pura noto bo pangisani nu Alatala anu dopa nisani ntona.

⁴Patuju ntesaku hitu ala komiu ledo rabagiu ntona ante tesa-tesara anu mompakaluu raramiu.

⁵Sabana nau yaku nakavao lako nte komiu, riar ntaiku yaku naria ri situ nte komiu. Bo nadamba mpuu raraku nangepe komiu nosangu rara bo ledo nolengga-lengga nomparasaya i Kristus.

⁶Sampesuvu-sampesuvu, nitarimamiumo i Yesus Kristus najadi Tupumiu. Jadi komiu kana batena matuvu mosangu rara ante Ia.

⁷Katuvumiu nosangu rara nte Ia kana masimbayu mpo kayu nandate kalena, bo banua da kapombangu-banguna ri bavo pandasi naroso. Komiu kana mantambai karoso pomparasayamiu, evamo nipatuduki ka komiu. Bo komiu kana masaro mosukuru nte Alatala.

⁸Komiu kana mainga, nee sampe komiu rabagiu ntona ante pepatuduki ledo nakana bo ledo ntoto noguna. Apa pepatuduki haitu aga nangoseaka pekiri nu manusia, bo nopuna lako ri malaeka-malaeka nadaa anu nombakuasai dunia. Pepatuduki haitu ledo nopuna lako nte i Kristus.

⁹Apa nau i Kristus najadi manusia, pura-pura inggu bo kuasa nu Alatala naria riara karoNa bo ledo nakura nuapa-nuapa.

¹⁰Bo komiu natuvu mpuu bo ledo nakura nuapa-nuapa sabana komiu nosangu rara ante i Kristus. I Kristus nalangapa nturoNa pade pura-pura anu nakuasa bo anu nompamenta ri suruga bo dunia.

¹¹Kita nosangu rara ante i Kristus jadi kita nireke nisuna. Tapi posunata haitu ledo anu nipovia nu manusia ri karota tapi anu nipovia i Kristus riara ntaita. Batuana, kita nikabasaka lako ri kuasa nu dosa.

¹²Tempo kita nidiu tandana kita topangoseaka i Kristus, nireke kita namate bo nitana nosanggani-nggani ante i Kristus. Bo nireke muni kita nipakatuvu mpanjili nosanggani-nggani ante i Kristus, sabana kita nomparasaya kuasa nu Alatala anu nompakatuvu mpanjili i Kristus lako ri kamateNa.

¹³Bara ipia „dopame komiu nomparasaya i Kristus,„ komiu nireke namate sabana komiu nadosa bo ledo nangoseaka atura-atura nu Alatala. Tapi sii-sii, Alatala nompakatuvu komiu nosanggani-nggani nte i Kristus, bo pura-pura dosamiu niampungiNamo.

¹⁴Bara ipia kita masipato rahuku nu Alatala bo rapopogaa lako nte Ia sabana kita nombaliunaka parentaNa. Tapi tempo i Yesus nipaku ri kayu salib, domo nireke nu Alatala pombaliunakata bo nikabasakaNa kita lako ri atura-atura niliunakata haitu. Sabana haitu, domo paraluu kita rahuku.

¹⁵Bo tempo i Yesus nipatesi nipaku ri kayu salib, nidagiNa pura-pura seta bo malaeka nadaa anu nakuasa. NilelakasiNamo kuasara nompamenta bo nipopakitaNa ka pura-pura isi dunia Iamo padagi bo ira nidagiNamo.

¹⁶Jadi sampesuvu-sampesuvu, nee rapariara tesa ntona madota mompasuu komiu mangoseaka ada nu agamara. Nipakasalara komiu sabana komiu nangande bara nanginu anu nipopali nangoseaka ada-adara, atau komiu ledo nangoseaka ada eo-eo mbaso agamara, eo mbaso kagero bula, bara eo-eo penonto. Nee rapariara tesara haitu

¹⁷sabana atura-atura bo ada-ada ivehaitu aga nojalili anu belo makava nggapurina. Tapi anu nakava bo anu nijalili haitu, iamo i Kristus.

¹⁸Jadi, „ane maria tona nompakasala komiu sabana ledo nioseakamiu pepatudukira,„ nee rapariaramiu tesara, mbelaka komiu masalandala bo ledo manggava belo nijanji nu Alatala ka komiu. Tona haitu aga madota mompasuu komiu metiede rara bo mombasomba malaeka-malaeka. Ira nangoeka pangisanira sabana naria anu nikitara riar pangipi. Nalanga bayangi rarara, bo pepatudukira aga nopuna lako ri pekirira mboto anu nangoseaka dunia hitu.

¹⁹Tona haitu domo nanjarumaka i Kristus. Tano mai, i Kristusmo nirapaka Balengga ntopomparasaya, bo kita anu nomparasaya nirapaka karoNa. I Kristusmo nompiara karoNa bo nompopakasangu todeaNa nasimbayu mpo uva bo oyu nipasiumpu bo nompoposidumpa buku-buku majadi sangu karo. Jadi Iamo nanggeniaka karoNa, haitumo todeaNa, nantambai naroso, nangoseaka dota nu Alatala.

²⁰Namala raulita kita topomparasaya i Kristus namate nosanggani-nggani nte Ia, bo nikabasaka lako ri kuasa malaeka-malaeka nadaa anu nombakuasai dunia. Jadi nakuya komiu da nangoseaka atura-atura ri dunia hitu nasimbayu mpo tona dopa nosisani nte i Kristus?

²¹Nakuya komiu da nangoseaka atura-atura evamo: Nee manggingisi hitu! Nee rapetami kande haitu! Nee mantui anu nipopali!

²²„Atura-atura ivehaitu ledo ria gunana ka kita sabana,„ atura haitu aga notesa kande bo anu nipake sampalai bo nalipo. Kakanana atura-atura haitu aga nopuna lako ri parenta-parenta bo pepatuduki manusia.

²³Atura-atura haitu nabelo mpuu ri panggita nu manusia, sabana topangoseaka atura-atura haitu nikita mpo tona natutu mpuu noagama; nipakaedera rarara bo nioseakara atura-atura anu nompandasa karora mboto. Tapi kakanana atura-atura haitu ledo ria gunana, sabana ledo nantulungi kita menonto novia anu nipodota rarata nadaa.

Kolose 3

¹Namala raulita kita topomparasaya i Kristus nipakatuvu mpanjili nosangani nte Ia, „sabana Alatala nombadekei katuvu nabaru ka kita“. Jadi, pasimbukumo manggava anu nipasadia nu Alatala ka kita ri suruga, apa hamai i Kristus nonturo ri panggana nu Alatala.

²Pekirikamo katuvumiu nabaru nosangani ante i Kristus ri suruga. Nee aga mompekirika katuvumiu ri dunia hitu.

³Apa katuvumiu nadosa nireke namatemo. Bo katuvumiu nabaru dopa nikita ntoto, nasimbayu mpo kaoge i Kristus dopa muni nikita ntoto, apa Alatala dopa nompopakitana.

⁴I Kristusmo nombadekei katuvu nabaru ka komiu. Tempo Ia meonga mpanjili ri dunia, kuasaNa bo kaogeNa rakita mpuu, bo kaoge katuvumiu nabaru rakita muni sabana komiu mosangani-nggani nte Ia.

⁵Sabana haitu, kabasakamo pokainggu-pokainggu anu nopuna lako ri dunia nadaa hitu. Nee mosipogau ante tona ledo bereimiu mboto, nee movia pokainggu anu ledo masipato, nee mangoseaka dota raramiu nabuga bo dota-dota ntanina anu nadaa. Bo nee muni maoge rara manggava melabipa pede tona ntanina, sabana anu nipoooge rarata haitumo najadi anu nisombata, bo haitu nasimbayu nte metupu nte tupu ntanina.

⁶Pokainggu ivehaitumo nompopeumba rau rara nu Alatala [ka tona ledo natundu nte Ia.]

⁷Bara ipia komiu muni da nokainggu ivehaitu, tempo komiu da nikuasai dota raramiu nadaa.

⁸Tapi sii-sii kabasakamo pura-pura pokainggu nadaa. Nee marau, nee monasu, nee mompakadaa roa, nee metunturaka, bo nee sampe maria tesa-tesa nasuloka mesuvu lako ri sumbamiu.

⁹Nee mosidavai. Kita kana mombakabasaka pokainggu ivehaitu sabana kita nikabasakamo lako ri katuvu njaeta bo lako ri pokainggu nadaa nioseakata tempo haitu,

¹⁰bo nitarimatamo katuvu nabaru. Kita nipajadi nu Alatala manusia nabaru bo Ia bate-batena nombabaliki ingguta majadi masimbayu nte ingguNa mboto. PatujuNa ala kita mpuu-mpuu mosisani belo ante Ia.

¹¹Kita najadi manusia nabaru, jadi domo ria posisalana toYahudi bo tona ledo toYahudi. Tona nisuna nangoseaka ada agama Yahudi bo tona ledo nisuna, nasimbayu ri panggita nu Alatala. Alatala ledo nompelenje bara toangatana bara toribulu bara batua bara tona ledo nipobatua. I Kristusmo nopoko, bo Iamo nonturo riara ntaita pura-pura.

¹²Sampesuvu-sampesuvu, kita nipotove nu Alatala bo nipelisiNa majadi todeana nagasa. Haitu sampe kita kana maasi matata manggita roa. Kita kana mabelo rara, maede rara, malusu rara, bo mosabara nte roa.

¹³Nee raboli riara tesa nu roa. Ane maria kodi raramiu, posiampungimo. Ampungimo tona movia sala nte komiu ante mpuu-mpuu raramiu, nasimbayu mpo i Pue nombaampungi dosamiu.

¹⁴Tapi nelabipa pade pura-pura pangane, kita kana mosimpotove. Sabana, ane kita todea topomparasaya nosimpotove, kita mpuu-mpuu nosangu rara.

¹⁵I Kristus nompoppingabelo kita. Jadi nee rapoviata anu mombagerosi posinggabelo haitu, sabana kita nipokio nu Alatala ala kita pura-pura matuvu mosinggabelo mpo sipa-sipa nu karo sangu. Bo nee menonto motarima kasi nte Alatala.

¹⁶Kareba anu notesaki i Kristus kana rapariarata bo ratanondoakata sampe mamala mosipatuduki bo mosipopatora, nangoseaka noto anu naria riara ntaita. Podadekamo dade Mazmur lako ri Buku Gasa, bo dade-dade pantoiya Alatala bo dade-dade nidekei nu Nosa Gasa. Kita kana modade ante mpuu-mpuu rarata, manguli tarima kasi ka Alatala.

¹⁷Bo nuapa-nuapa rapoviata bara raulita, rapoviata bo raulita muni anu masipato ka topomparasaya i Pue Yesus. Bo raulita munimo tarima kasi ka Tuamata Alatala sabana anu nipovia i Yesus ka kita.

¹⁸Sampesuvu-sampesuvu mombine, pekoumo nte bereimiu langgai. Haitumo masipato ka mombine anu nomparasaya i Pue Yesus.

¹⁹Bo sampesuvu-sampesuvu langgai, potovemo bereimiu mombine, nee mokainggu makasara nte ia.

²⁰Ngana-ngana, oseakamo pura-pura parenta tina tuamamiu sabana pokainggu haitumo nompakadamba rara nu Alatala.

²¹Bo sampesuvu-sampesuvu anu najadi tuama nu ngana, nee rapakaduamiu rara nu ana-anamiu ala nee maupu rarara.

²²Sampesuvu-sampesuvu anu najadi batua, oseakamo pura-pura parenta nu puamiu ri dunia hitu. Nee aga mangoseaka parentara tempo nikitara komiu ala komiu ratoiyara. Tapi oseakamo parentara ante rara mpuu-mpuu sabana komiu nombabila i Pue Yesus.

²³Nuapa-nuapa raparentara ka komiu, poviama ante mpuu-mpuu raramiu. Rekemo komiu ledo aga nokarajaa nantulungi manusia, tapi komiu nantulungi i Pue.

²⁴Nisanimiumo i Pue mboto mombadekei tambo ka komiu anu nijanjiNa ka pura-pura topomparasaya Ia. Kakanana i Kristusmo pua anu nitulungimiu, bo komiu batuaNa.

²⁵Tapi isema-sema movia anu nadaa rabalasi ante pehuku masipato ka daa nipoviana, sabana Tupu ledo nompelenje.

Kolose 4

¹Sampesuvu-sampesuvu anu najadi pua. Komiu kana mokainggu masipato bo manoa nte batua-batuamiu. Toramo, komiu muni naria Tupumiu ri suruga!

²Nee masau raramiu mosambaya. Pekiri pakabelo anu raulimiu ka Tupu, bo masaro manguli tarima kasi nte Ia.

³Posambayaka muni kami ala Alatala mombadekei loga nabelo ka kami mompatolele karebaNa anu notesaki niaNa anu nipakadupa i Kristus. NiaNa

haitu da nitabuniaka bara ipia, tapi sii-sii nipatolelekumo kareba i Kristus haitu. Bo sii-sii yaku nitarunggu sabana pokarajaaku nompatolele kareba haitu.

⁴Jadi posambayamo ala mamala kupopaisani kareba i Kristus sampe rapaha ntona, sabana bago haitu kana kupovia.

⁵Komiu kana mokainggu manoto ante tona dopa nomparasaya i Kristus. Pakemo pura-pura loga naria [mompopaisani i Kristus ka ira.]

⁶Ane komiu motesa nte ira, tesa-tesamiu kana malusu bo marasa raepe. Kana rasanimiu munimo cara masipato mesanaka pompekutanara.

⁷Sampesuvu-sampesuvu, ane makava i Tikhikus nte komiu, ratesana ka komiu pura-pura anu najadi nte yaku ri sii. Ia sampesuvuta sampomparasaya nipotoveta. Ia muni natutu nokarajaa ka Tupu bo ia roaku sampokarajaa nantulungi todea topomparasaya.

⁸Kutudu ia tou nte komiu ala rasanimiu kareba kami ri sii, bo ala rapakarosona raramiu.

⁹Ia tou mosanggani ante i Onesimus, sampesuvuta anu nipotoveta bo ia namala raparasaya. Ia lako ri ngatamiu mboto. Ira randua manguli ka komiu nuapa pura najadi ri sii.

¹⁰Taba lako nte i Aristarkhus anu nosanggani ante yaku nitarunggu ri sii. Bo taba lako nte i Markus sampesuvu i Barnabas. Toramo anu nitevaiku ka komiu bara ipia: ane ia tou nte komiu ri situ, tarimamo ia ante mabelo.

¹¹Taba muni lako nte i Yesus anu nidae i Yustus. Lako ri pura-pura toYahudi anu nomparasaya i Kristus, aga ira tatalu nokajaraa nte yaku sii-sii nangelo tona majadi todea ri Poparenta nu Alatala. Ira mpuu-mpuu nantulungi yaku.

¹²Bo taba muni lako nte i Epafra, batua i Yesus Kristus lako ri ngatamiu mboto. Ia bate-batena nekakai nte Alatala ante mpuu-mpuu rarana ala ledo molengga-lengga pomparasayamiu, bo ala komiu majadi topomparasaya anu ledo makura nuapa-nuapa ri panggita nu Alatala, bo ala komiu maroo mangoseaka pura-pura dota nu Alatala.

¹³Yaku mboto nanggita ia nokarajaa ante mpuu-mpuu rarana nantulungi komiu anu nonturo ri ngata Kolose bo tona nonturo ri ngata Laodikia bo ngata Hierapolis muni.

¹⁴Taba muni lako nte Dokutoro Lukas anu nipotoveta, bo lako nte i Demas.

¹⁵Pakavote taba kami ka topomparasaya ri ngata Laodikia, bo ka i Nimfa bo todea topomparasaya anu nasiromu nosambaya ri banuana.

¹⁶Maupu sura hitu rabaca ka komiu pura-pura, kuperapi rapakatumiui vai hau ri ngata Laodikia ala mamala rabaca ntodea topomparasaya hamai muni. Ivesia muni komiu kana mombabaca suraku anu rapapolara lako ri ngata Laodikia ka komiu.

¹⁷Bo ulika i Arkhipus ivei: “Pakaupumo pokarajaa nidekei nu Alatala ka iko!”

¹⁸Taba lako nte yaku, i Paulus. Bagia hitu nitulisi ante paleku mboto. Toramo, yaku da nitarunggu. Kuperapi Alatala bate-batena mabelo nte komiu pura-pura. Taba lako nte yaku, Paulus

1 Tesalonika

1 Tesalonika 1

¹Sampesuvu-sampesuvu sampomparasaya ri ngata Tesalonika, todea nTuamata Alatala bo Tuputa i Yesus Kristus: Sura hitu lako nte kami tatalu, i Paulus, i Silas, bo i Timotius. Kami nerapi Alatala bate-batena mabelo nte komiu bo mompakatinonto raramiu.

²⁻³Kami ledo nenonto notarima kasi nte Tuamata Alatala sabana komiu pura-pura, bo kami nasaro nosambaya ka komiu. Ane kami nosambaya, kami batena nantora pokarajaamiu ka Tupu, anu nipoviamiu sabana pomparasayamiu. Nitara kami muni pompasimbukumi nantulungi tona ntanina sabana pompotovemi, bo nitara kami muni karoo raramiu nanjarumaka kakava nTuputa Yesus Kristus.

⁴Sampesuvu-sampesuvu nipotove nu Alatala, nisani kami Alatala nompelisi komiu majadi todeaNa.

⁵Apa tempo kami nompatolele Kareba Belo ka komiu, kami ledo aga notesa bayangi. Kami nompatolele kareba haitu ante kuasa bo petulungi Nosa Gasa nu Alatala, bo kami mboto nompomparasaya riara ntai kami tesa haitu mpuu-mpuu nakana. Nipeintamiumo katuvu kami tempo kami nonturo nte komiu. Pura-pura nipovia kami ala manggeni belo ka komiu.

⁶Bo tempo komiu nangepe Kareba Belo, nipasialamiu pokainggu kami bo pokainggu i Pue Yesus muni. Nau nipakasusa mpuu komiu, komiu nadamba nantarima Kareba Belo apa Nosa Gasa nu Alatala nompakadamba raramiu.

⁷Jadi katuvumi najadi jonjo nipasiala ntopomparasaya i Yesus pura-pura ri propinsi Makedonia bo propinsi Akhaya.

⁸Nompamula nte komiu, kareba i Yesus natolelemo sampe ri propinsi Makedonia bo Akhaya. Bo ledo aga haitu. Ri umbu-umbu ngata niepe ntonamo tesa pomparasayamiu Alatala. Jadi, ledo paralu kami motesaki pomparasayamiu, sabana ri umbu-umbu nikalau kami, tesa haitu nisani ntonamo.

⁹Ira mboto notesa ka kami berimba komiu to Tesalonika nantarima kami tempo kami nakava nte komiu bara ipia. Bo nitesara muni berimba komiu nenonto netupu nte viata-viata bo nompamula netupu nte Alatala anu natuvu bo nakana.

¹⁰Nitesara muni berimba komiu nanjarumaka kakava i Yesus, Ana nu Alatala lako ri suruga. Ia nipakativu nu Alatala mpanjili lako ri kamateNa. Bo Iamo nombakabasaka kita lako ri pehuku nu Alatala anu rapambela ka tona nadosa bara maipia.

1 Tesalonika 2

¹Sampesuvu-sampesuvu, nisanimiu mbotomo tempo kami nakava nte komiu bara ipia, kami ledo aga nalenge bayangi, tapi nariumo aselena.

²Dopame kami nakava ri ngatamiu, kami mpuu-mpuu nipandasa bo nipakadaa ntona ri ngata Filipi. Nisanimumo tesana. Nau nadea tona nangeva kami, tapi Tuputa nompakaroso rara kami ala kami ledo maeka mompatolele Kareba BeloNa ka komiu ri ngata Tesalonika.

³Kami ledo nombaunaka komiu mangoseaka pepatuduki nasala. Ledo muni naria patuju nadaa riaro ntai kami bo ledo muni kami nopatuju mombabagiu tona.

⁴Kami ledo notesa aga mompakadamba rara manusia. Kami notesa mompakadamba rara nu Alatala, sabana Iamo nomparesa rara ntai kami, bo Iamo nombareke kami masipato mompatolele Kareba Belo.

⁵Nisanimiu mbotomo, ledo sanggania kami nompatende komiu, bo ledo muni kami nombaalani komiu ala mombatabuniaka patuju mompakauntu karo kami mboto. Nisani nu Alatalamo tesaku hitu nakana!

⁶Kami ledo muni mbeki ratoiya ntona, bara komiu bara tona ntanina. Kakanana masipato kami merapi nte komiu, sabana kami mpuu-mpuu suro i Kristus.

⁷Tapi ledo ivesia patuju kami. Tempo kami naria ri situ nte komiu bara ipia, pokainggu kami nalusu, nasimbayu nte mombine nombajagai ngana kodina.

⁸Nambaso mpuu tove kami nte komiu, sampe kami nadamba nompatolele Kareba Belo ka komiu. Bo kami muni nasadia mantulungi komiu nau kami mamate, sabana kami mpuu-mpuu nompotove komiu!

⁹Sampesuvu-sampesuvu, natantu da nitoramiu pompasimbuku kami bo kasusa kami bara ipia. Eo bongi kami nompasimbuku nokarajaa nompaelo mboto ala komiu ledo masesa mompekirika katuvu kami tempo nompatolele Kareba Belo nu Alatala ka komiu.

¹⁰Nisanimiu mboto kagasa katuvu kami nte komiu topomparasaya i Kristus. Pokainggu kami nagasa bo nanoa, bo ledo ria nuapa-nuapa masipato rasalai. Nisanimiu bo nisani nu Alatala muni tesaku hitu nakana.

¹¹⁻¹²Nisanimiu mbotomo, kami nasaro nompatuduki komiu mpo totua langgai nompatuduki anana mboto. Kami nompakaroso raramiu bo nasaro nompopatora komiu matuvu mompakadamba rara nu Alatala. Apa Iamo nompokio komiu majadi todeaNu ri PoparentaNu bo mombarasai kaogeNu.

¹³Naria sangayapa ntanina sampe kami nasaro notarima kasi nte Alatala. Sabana, tempo komiu nantarima Tesa nu Alatala nipatolele kami ka komiu, ledo nirekemiu aga tesa nu manusia. Tesa haitu nitarimamiu mpo tesa lako nte Alatala mboto. Bo tesa haitu mpuu-mpuu tesa nu Alatala anu nokarajaa riaru nggatuviu topomparasaya i Kristus.

¹⁴Sampesuvu-sampesuvu, «nisani kami Alatala nokarajaa riaru nggatuviu apa» pepandasa nirasai ntodea nu Alatala anu nomparasaya i Yesus Kristus ri bagia Yudea, nirasaimiu munimo. Komiu nipandasa roamiu sangata, nasimbayu mpo pepandasa roara simbo toYahudi anu ledo nomparasaya i Yesus.

¹⁵ToYahudi anu ledo nomparasaya haitumo nompatesi i Pue Yesus bo nabi-nabi nu Alatala bo ira muni nompandasa kami. Ira nangeva pura-pura manusia bo Alatala ledo ntoto nadamba nte ira.

¹⁶Niuliku ivesia sabana toYahudi haitu nasaro nombalava kami. Kami madota nompatolele Kareba Belo ka tona ledo toYahudi ala rasanira ira mamala

rapakasalama. Tapi toYahudi pangane nombalava kami bo ivesiamo aga nantambai dosara sampe nadea gagamo. Bo sii-sii ira mambela pehuku nu Alatala.

¹⁷Jadi, sampesuvu-sampesuvu, nompamula lako ri tempo kita nogaa bara ipia, nalentora mpuu rara kami manggita komiu. Nau nogaa ri mata, riara ntai ledo nalipo, bo kami batena nalentora nte komiu. Jadi kami nompasimbuku ante mpuu-mpuu rara mosinggava vai nte komiu.

¹⁸Kami nonia mami tou nte komiu bara ipia. Yaku mboto bara sako-ngganimo nompasimbuku mosinggava nte komiu, tapi Magau Seta nasaro nombalava kami sampe dopa najadi.

¹⁹Naoge rara kami mosinggava nte komiu, apa ane Tuputa Yesus Kristus meonga mpanjili bo kita mosinggava ri ngayoNa, komiumo majadi asele pokarajaa kami anu nisarumaka kami. Tempo haitu madamba mpuu rara kami sabana komiu, bo masana rara kami sabana pomparasayamiu.

²⁰Mpuu-mpuu komiumo sampe kami rabila bo komiumo sampe nadamba mpuu rara kami.

1 Tesalonika 3

¹Kaupuna domo nipakule kami nantaamaka kalentora rara kami. Jadi nipekiri kami agina kami bo i Silas maboli ri ngata Atena

²bo i Timotius sampesuvuta sampomparasaya nitudu kami tuou nte komiu. I Timotius roa kami nokarajaa ka Alatala. Ia nantulungi kami nompatolele Kareba Belo anu notesaki i Kristus. Ia nitudu kami tou mompakadidi raramiu bo mompakaroso pomparasayamiu

³ala ledo maria saitoa komiu moura momparasaya sabana nipandasa. Kakanana nisanimumo kita topomparasaya kana rapandasa, apa ivesia nipakatantu nu Alatala ka kita.

⁴Tempo kami da nosangani-nggani nte komiu bara ipia, niuli kami mamimo kana maria tona mompandasa kita sabana kita nomparasaya i Yesus. Bo nisanimiu ivesia mpuu najadi.

⁵Jadi sia sampe nituduku i Timotius tou nte komiu, ala kusani berimba pomparasayamiu, sabana domo nipakuleku mantaamaka kalentora raraku nompekirika komiu. Nakini raraku nee-nee komiu bara mamala radagi nu Magau Seta ante pesori-pesorina sampe domo ria asele lako ri katiti nu ini kami nanggeni Kareba Belo ka komiu.

⁶Tapi hitupa nanjilimo i Timotius lako ritu nte komiu, bo nitesana ka kami karebamiu anu nompakadamba rara kami, ivei: “ToTesalonika naroso pomparasayara, bo nosimpotove. Ira bate-batena nantora kita ante damba rara bo ira nalentora manggita kita nasimbayu mpo kita nalentora manggita ira.”

⁷Sampesuvu-sampesuvu nipotoveku. Nangepe kareba niken i Timotius haitu, navoemo rara kami. Nau nasusa rara kami bo nipandasa ntona, navoemo rara kami nangepe komiu batena naroso nomparasaya.

⁸Apa mpuu-mpuu maosa rara kami ane komiu batena maroo mosangu rara nte i Pue.

⁹Ane kami nosambaya ka Tuputa Alatala, nadamba mpuu rara kami nantora komiu! Kami nasaro notarima kasi nte Alatala sabana komiu, tapi eva ledo nagana rabalasi ka Ia kadamba rara nirasai kami.

¹⁰Eo bongi kami nerapi nte Alatala ante mpuu-mpuu rara kami ala kami mamala mosinggava nte komiu bo mompatuduki anu dopa nipatuduki ka komiu ala mpuu-mpuu maroso pomparasayamiu.

¹¹Kami merapi Tuamata Alatala bo Tuputa i Yesus mobuka dala ka kami ala mosinggava ante komiu!

¹²Kami merapi ala i Pue mantambai tovemiu sampe komiu mpuu-mpuu mosimpotove bo mompotove pura-pura tona, nasimbayu mpo kami mpuu-mpuu nompotove komiu.

¹³Kami merapi Alatala mompakaroso raramiu ala komiu magasa bo ledo makura nuapa-nuapa ri ngayo nTuamata Alatala tempo Tuputa i Yesus makava ante pura-pura todeaNa anu nagasa.

1 Tesalonika 4

¹Kaupuna, sampesuvu-sampesuvu: bara ipia kami nompatuduki ka komiu pokainggu masipato rapoviamiu ala madamba rara nu Alatala. Bo nisaniku nipoviamiumo anu nipatuduki kami. Tapi kami merapi nte mpuu-mpuu rara bo mompopatora komiu ante kuasa nidekei i Pue Yesus ka kami: pasimbukumo hanupa matuvu nte pokainggu mompakadamba Alatala!

²Nisanimiu pepatuduki nidekei kami ka komiu ante kuasa lako nte i Pue Yesus.

³Dota nu Alatala ala komiu majadi todeaNagasa, bo nee mosampaturu ante tona ledo bereimu mboto.

⁴Pura-pura langgai ri tatangamiu kana matau mokainggu mabelo nte bereina ri panggita nu Alatala bo manusia.

⁵Nee aga matuvu nte bereimiu mangoseaka dota nu rara mabuga, anu biasa najadi nte tona ledo nosisani nte Alatala.

⁶Nee movia dosa ka sampesuvumiu sampomparasaya bo nee rabagiu ia ante mangala bereina, sabana Alatala mombahuku pura-pura tona nokainggu ivehaitu. Haitu pura-pura nipatuduki bo nipopatora kami ka komiu bara ipia.

⁷Kita nipokio nu Alatala ledo matuvu mabuga, tapi nipokioNa matuvu magasa ante pokainggu anu mompakadamba raraNa.

⁸Jadi isema-sema nombasapuaka pepatuduki hitu, ledo manusia nisapuakana tapi Alatala anu nombadekei Nosa Gasana ka komiu nisapuakana.

⁹Sampesuvu-sampesuvu, ledo paraluu kutulisi ka komiu posimpotove sampesuvu sampomparasaya, sabana Alatala mbotomo nompatuduki komiu mosimpotove.

¹⁰Bo komiu nosimpotovemo nte pura-pura sampesuvu sampomparasaya ri njumangu propinsi Makedonia. Tapi kami mpuu-mpuu merapi nte komiu, tambaipa posimpotovemiu haitu!

¹¹Pasimbukumo matuvu mosinggabelo nte tona ntanina, pasiyumo bagomiu mboto! Nee mombagalo bago ntona ntanina. Karajaamo pompaelomiu mboto nangoseaka anu niparenta kami ka komiu bara ipia.

¹²Ane komiu matuvu ivesia, komiu rabila ntona anu ledo nomparasaya i Kristus, bo komiu ledo manjarumaka tona ntona.

¹³Sampesuvu-sampesuvu, patuju kami ala rasanimiu mpuu anu majadi ante topomparasaya anu namatemo, ala ledo masusa raramiu mpo tona ntona anu ledo nanjarumaka matuvu mpanjili nosangani-nggani nte Alatala.

¹⁴Niparasayata i Yesus namate bo natuvu mpanjili. Haitumo sabana niparasayata muni pura-pura tona nomparasaya i Yesus bo namatemo rapakatuvu nu Alatala mpanjili, bo Alatala mompoposangani ira nte i Yesus.

¹⁵Siimo pepatuduki lako nte i Pue Yesus mboto rapapola kami ka komiu ivei: tempo i Pue Yesus makava mpanjili, kita anu da natuvu ledo mokolu ka roa-roata anu namatemo.

¹⁶Tempo Alatala mombadekei parenta, tadulako malaeka mongare ante suara namangga bo tabue nu Alatala rapopomoni, tempo haitu i Pue Yesus mboto manau lako ri suruga. Bo topomparasaya i Kristus anu namatemo rapakatuvu mokolu.

¹⁷Naupu haitu, kita da natuvu tempo haitu, raoretaka mosangani-nggani ante ira riara kulimu mosinggava nte i Pue Yesus ri laerava, pade matuvu mosangani-nggani ante i Pue sampe ri kasae-saena.

¹⁸Sabana haitu, sampesuvu-sampesuvu, posipakavoemo raramiu ante pepatuduki hitu.

1 Tesalonika 5

¹Sampesuvu-sampesuvu, ledo paraluu kami motulisi ka komiu tempo bo tanggala kakava i Pue Yesus.

²Apa nisanimiu mboto kakava i Pue Yesus bara maipia masimbayu mpo kakava ntopangangga bongina tempo ledo nisani-sani ntona.

³Tempo tona ledo nomparasaya Alatala aga manguli, “Katuvuta ri dunia nabelo pura, ledo ria nuapa-nuapa rapokaekata.” Tapi ri tempo haitumo ledo rasani-

sanira, sampesanika maropumo ira, masimbayu mpo dua nu mombine tempona moana. Ledo ntoto maria dala mombaleva pehuku.

⁴Tapi komiu ledo natuvu ri kalandana [mpo tona ledo nisanina nuapa-nuapa]. Jadi komiu ledo rapakatikaja ane sampesanika i Yesus meonga mpo topangangga bongina.

⁵Komiu pura-pura natuvu ri karemena, komiu nokainggu nabelo mpo tona nolipa eona. Kita ledo natuvu ri kalandana, kita ledo mpo tona nokainggu nadaa bongina.

⁶Jadi kita kana mainga bo manoto rarata, nee mamonjo-monjo mpo tona da natuvu ri kalandana.

⁷Apa tona anu aga namonjo bo nanginu sampe nalangu, namonjo bo nalangu bongina.

⁸Tapi kita tona natuvu ri karemena. Jadi kita kana mompakanoto rarata. Kita kana bate-batena momparasaya Alatala bo mompotove tona ntanina ala kita maroso masimbayu mpo tantara nobaju ase. Kita kana maroo manjarumaka Alatala mompakasalama kita, ala kita maroso mpo tantara nosonggo baja.

⁹Kita nipelisi nu Alatala, ledo ala rahukuNa, tapi ala rapakasalamaNa sabana petolo nTuputa Yesus Kristus.

¹⁰Ia namate nombatolosi kita ala tempo Ia makava mpanjili, nau kita da natuvu atau namatemo, kita matuvu mosanggani-nggani ante Ia.

¹¹Sabana haitu, sampesuvu-sampesuvu, posipakadidimo raramiu, bo posipakarosomo pomparasayamiu mpo anu nipoviamiumo.

¹²Sampesuvu-sampesuvuku, kami merapi komiu mombabila pakeni-pakeni anu nokarajaa ntamo ri tatangamiu, haitumo ira anu nipelisi nu Alatala manggeniaka komiu bo mompatuduki komiu.

¹³Bilamo ira bo potovemo ira ante mpuu-mpuu raramiu, sabana ira mpuu-mpuu nokarajaa nantulungi komiu. Bo komiu kana matuvu mosinggabelo ante roamiu pura-pura.

- ¹⁴Kami merapi nte mpuu-mpuu rara, onteakamo tona namau nokarajaa. Pakarosomo rara ntona naeka. Tulungimo tona anu paraluu ratulungi. Posabaramo nte tona pura-pura.
- ¹⁵Jagaimo ala ledo maria komiu mombabalasi pokainggu nadaa ante anu nadaa. Komiu kana masaro mompasimbuku movia anu nabelo ka roa-roamiu bo ka tona ntanina muni.
- ¹⁶Komiu kana batena madamba.
- ¹⁷Nee masau rara mosambaya.
- ¹⁸Bo uli tarima kasi ka Alatala nau damo nuapa majadi, sabana haitumo dota nu Alatala ka komiu anu nosangu rara ante i Yesus Kristus.
- ¹⁹Nee ralava pokarajaa Nosa Gasa nu Alatala.
- ²⁰Nee mompandaente tesa ntona anu nompapola tesa nidekei nu Alatala ka ia.
- ²¹Pekirikamo pakabelo-belo tesa-tesa haitu, «ala rasanimiu bara lako nte Alatala mpuu bara ledo» bo oseakamo anu nabelo.
- ²²Petalilikamo pura-pura pokainggu nadaa.
- ²³Kuperapi nte Alatala, topombadekei katuvua nabelo ka kita, ala Ia mboto mompakagasa katuvumiu sampe komiu mpuu-mpuu matuvu mpo todeaNa nagasa. Kuperapi Alatala mombajagai karomiu, rara ntaimiu, bo pekirimiu sampe ledo ntoto maria nuapa-nuapa rasalai tempo Tuputa Yesus Kristus makava mpanjili.
- ²⁴Alatala nompokio komiu majadi todeaNa nagasa. Jadi, Ia mpuu-mpuu movia anu niperapita, sabana Ia namala raparasaya mompakadupa pojanjiNa.
- ²⁵Sampesuvu-sampesuvu, tulungi posambayaka kami.
- ²⁶Pakavote tabe bo tove kami ka pura-pura sampesuvuta sampomparasaya ri situ.
- ²⁷Ante kuasa nidekei i Pue Yesus ka yaku, kuperapi mpuu-mpuu ala sura hitu rabacamiu ka sampesuvuta pura-pura sampomparasaya ri situ.

²⁸Kuperapi Tuputa, Yesus Kristus bate-batena mabelo nte komiu pura-pura.
Taba lako nte yaku, Paulus

2 Tesalonika

2 Tesalonika 1

¹⁻²Sampesuvu-sampesuvu sampomparasaya ri ngata Tesalonika, todea nTuamata Alatala bo Tuputa i Yesus Kristus: Sura hitu lako nte kami tatalu, i Paulus, i Silas, bo i Timotius. Kami nerapi Tuamata Alatala bo Tuputa Yesus Kristus mombadekei belo bo katinonto ka komiu.

³Sampesuvu-sampesuvu, kami kana masaro motarima kasi nte Alatala sabana komiu. Kami masipato motarima kasi sabana pomparasayamiu nte i Yesus nantambai karosona, bo nantambai posimpotovemiu.

⁴Sia sampe ri ngata-ngata ntanina kami nantoiya pokainggumiu ri ngayo ntodea topomparasaya i Yesus. Ante damba rara, kami nanguli ka ira, “Nabelo mpuu toTesalonika! Ira ledo nenonto nomparasaya i Kristus nau nipandasa bo nipakasusa ntona.”

⁵Jadi, lako ri karoo nu pomparasayamiu haitu, nisanita Alatala mpuu-mpuu nanao nombatangara manusia. Komiu nombatidamaka riaras kasusa bo kapari anu nambela komiu sabana pangoseakamiu Alatala, bo ivesiamo Alatala nompopakita komiu mpuu-mpuu masipato majadi todea ri PoparentaNa.

⁶Alatala nanao, jadi rabalasiNa tona anu nompandasa komiu,

⁷bo rakabasakaNa komiu lako ri kasusa nirasaimiu sii-sii, bo ivesia muni kami. RakabasakaNa pura kita tempo i Pue Yesus manau lako ri suruga mosangganingani ante malaeka-malaekaNa nakuasa,

⁸bo ante apu navaya-vaya. Ia manau mombahuku tona ledo nadota nompeili Alatala bo ledo nadota nangoseaka Kareba Belo anu notesaki Tuputa Yesus.

⁹Tona haitu rahuku nu Alatala sampe ri kasae-saena. Ira rapopogaa lako nte i Pue Yesus bo ledo rarasaira kaoge nu kuasaNa.

¹⁰Pura-pura anu pangane majadi tempo i Pue Yesus makava mpanjili. Tempo haitu Ia rabila bo ratoiya ntodeaNa anu nagasa, pura-pura topomparasaya mokumaa bo madamba manggita Ia. Sampesuvu-sampesuvu, komiu muni

mombabila bo mombatoiya Ia tempo haitu, sabana niparasayamiumo kareba nipatolele kami ka komiu.

¹¹Haitu sampe kami nasaro nosambaya ka komiu. Kami merapi ala Alatala mombatulungi komiu ala pokainggumiu majadi masipato ka tona nipokio nu Alatala majadi todeaNa. Kami merapi Alatala mombatulungi komiu ante kuasaNa ala pura-pura niamiu movia anu nabelo majadi mpuu, bo pura-pura pokarajaa nipoviamiu sabana pomparasayamiu rapapolamiu sampe maupu.

¹²Patuju kami nerapi ivesia ala Tuputa Yesus rabila bo ratoiya sabana pokainggumiu nabelo. Bo ala komiu muni rabila bo ratoiya i Yesus. Haitu pura-pura majadi sabana kabelo rara nTuamata Alatala bo i Pue Yesus Kristus.

2 Tesalonika 2

¹Kapolana, sampesuvu-sampesuvu. Kami madota motesa sakide ka komiu anu majadi tempo Tuputa Yesus Kristus makava mpanjili bo kita rapasiromu mosanggani-nggani ante Ia. Kami mpuu-mpuu merapi,

²nee masalisa gaga maingu atau masesa raramiu ane raepemiu tona manguli nakava mpanjilimo i Pue Yesus. Nee maingu, nau rauli ntona kareba haitu lako ri Nosa Gasa, bara raulira kami mboto bara anu nitulisi kami riarasura.

³Nau bara berimba ntoto kareba haitu, nee sampe komiu rabagiu ntona, sabana dopame makava eo haitu, naria rongaya kana majadi ntani ruru. Pamulana, madea mpuu tona moura pomparasayara bo mombasapu Alatala. Bo karongayana, kana meumba Topesapuaka anu ranavusaka riaranarakaa bara maipia.

⁴Ia mangeva Alatala bo malanga rarana mangoe. Raulina iamo naogepa pade pura-pura anu nisomba nu manusia bo anu niuli nu manusia “tupu”. Ledo aga haitu, kaupuna ia mesua monturo riarabanua nu Alatala bo raulina iamo Alatala!

⁵Sampesuvu-sampesuvu, natantu da nitoramiu yaku nompatuduki ka komiu pura-pura hitu tempo yaku da naria nosanggani-nggani ante komiu baraipia.

⁶Sii-sii dopa neonga Topesapuaka haitu sabana naria anu nombalava ia. Bo nisanimumo anu nombalava peongana. Jadi ri tempo nipakatantu nu Alatala, meumbamo Topesapuaka haitu.

⁷Sii-sii kuasa anu nompakadaa ia nompamulamo nokarajaa nggalino ri dunia. Tapi ia mboto dopa neumba sabana ia da nilava. Jadi, ralelakapa topelava haitu,

⁸pade meumba Topesapuaka. Tapi tempo i Pue Yesus meonga ante kuasaNa nareme, kuasa nTopesapuaka malipo sanggani, bo i Pue Yesus mompatesi ia ante nosa lako ri sumbaNa.

⁹Topesapuaka meumba ante kuasa mbaso lako ri Magau nu Seta bo rapoviana mpengaya-ngaya kabaraka bo tanda-tanda nipokumaaka anu mombabagiu tona.

¹⁰Rapakena mpengaya akala nadaa mombabagiu tona anu masipato mami mamate bo rapopogaa lako nte Alatala. Ira mamate bo rapopogaa lako nte Alatala sampe ri kasae-saena sabana ira ledo nadota mantarima bo mompotove pepatuduki nakana lako ri Alatala, anu nompakule mompakasalama ira.

¹¹Haitu sampe Alatala mompakatu ka ira sangaya kuasa anu mombabagiu ira sampe raparasayara anu ledo nakana.

¹²Kaupuna pura-pura tona anu ledo nomparasaya pepatuduki nakana bo aga nadamba novia anu nadaa rahuku nu Alatala.

¹³Jadi, sampesuvu-sampesuvu nipotove i Pue, masipato kami masaro manguli tarima kasi ka Alatala sabana komiu. Sabana, Alatala nompelisi komiu lako ri ulu jadi ala komiu rapakasalamaNa. Komiu nipakasalama ante kuasa Nosa Gasa anu nombabaliki komiu majadi todea gasa nu Alatala, bo komiu nipakasalama sabana pomparasayamiu pepatuduki nakana.

¹⁴Alatala nompokio komiu majadi todeaNa lako ri Kareba Belo anu nipatolele kami ka komiu. PatujuNa ala komiu manggava bagia riara kuasa bo kaoge nTuputa Yesus Kristus.

¹⁵Jadi, sampesuvu-sampesuvu, sabana haitu pura-pura, pakaroso pomparasayamiu. Kangisi pakaroso pepatuduki nipatolele kami ka komiu, anu nitesa kami ante sumba, bo anu nitulisi kami riara sura.

¹⁶⁻¹⁷Alatala nompotove kita, bo lako ri kabelo nu raraNa, Ia ledo naupu-upu nompakavoe rarata, bo nidekeiNa ka kita panjarumaka nabelo. Jadi kuperapi Tuputa Yesus Kristus bo Tuamata Alatala mompakavoe bo mompakaroso raramiu ala tesamiu bo pokainggumi batena nabelo.

2 Tesalonika 3

¹Kapolana, sampesuvu-sampesuvu, posambayakamo kami. Perapi nte Alatala ala TesaNa masalisa matolele bo ratarima mabelo, mpo najadi nte komiu bara ipia.

²Posambayaka muni ala kami rakabasaka lako ri tolia ntona natenggo bo nadaa rarana, apa ledo pura-pura tona nomparasaya Tesa nu Alatala.

³Petulungi i Pue Yesus ledo maupu-upu! Ia bate-batena mompakaroso raramiu bo mombajagai komiu lako ri kuasa Magau Seta.

⁴I Pue Yesusmo nanggeniaka komiu, jadi nisani kamimo anu nipatuduki kami ka komiu, nioseakamiu sii-sii bo bate-batena raoseakamiu.

⁵Kuperapi i Pue Yesus manggeniaka komiu sampe komiu mpuu-mpuu mombarasai pepotove nu Alatala ka komiu, bo maroo raramiu riara kasusa nasimbayu mpo karoo rara i Kristus tempo Ia nipandasa.

⁶Sampesuvu-sampesuvu, ante kuasa nidekei i Pue Yesus Kristus ka kami, kami nomparenta komiu, nee ntoto mosimpovega ante sampesuvu sampomparasaya namau bo ledo nangoseaka pepatuduki nipatuduki kami ka komiu.

⁷Nisanimiu mbotomo pokainggu kami bara ipia tempo kami nonturo nte komiu, kami ledo namau nokarajaa. Pokainggu kami haitu kana rapasialamiu.

⁸Kami ledo nangande kande anu ledo nibayari kami. Tapi bara eona bara bongina, kami nokarajaa ntamo ala ledo mompakasesa komiu.

⁹Kakanana masipato kami merapi tulungi nte komiu. Tapi kami ledo nerapi tulungi sabana kami madota majadi jonjo anu mamala rapasialamiu.

¹⁰Tempo kami da naria nte komiu bara ipia, kami nomparenta komiu ivei: “Isema-sema ledo madota mokarajaa, ledo mamala mangande!”

¹¹Niuli kami ivesia sabana niepe kamimo naria bara sako-ndua komiu namau ri situ. Ira ledo nokarajaa nuapa-nuapa, aga nabago nombaurusi bago ntona ntanina.

¹²Jadi ante kuasa nidekei i Pue Yesus Kristus ka kami, kami momparenta bo mompopainga ira matinonto mokarajaa bo mompaelo katuvura mboto!

¹³Tapi komiu sampesuvu-sampesuvu, nee masau raramiu movia anu nabelo.

¹⁴Ane rapana maria tona ledo madota mangoseaka tesa nitulisi kami riara sura hitu, tandaimo ira. Nee mosimpovega nte ira ala kaupuna maeya matara.

¹⁵Tapi nee mavuu matamiu nte ira. Popaingamo ira, apa ira sampesuvumi sampomparasaya.

¹⁶Kuperapi i Pue Yesus bate-batena mompakatinonto raramiu riara mpengaya-ngaya, sabana Iamo puna katinonto. Kuperapi Ia momporoa komiu pura-pura.

¹⁷Tabo lako nte yaku, Paulus. Tabo hitu nitulisiku mboto. Ivesiamo tanda mpale nitulisiku ri pura-pura suraku ala rasaniamiu sura hitu mpuu-mpuu lako nte yaku.

¹⁸Kuperapi Tuputa Yesus Kristus bate-batena mabelo nte komiu pura-pura. Tabo lako nte yaku, Paulus

1 Timotius

1 Timotius 1

¹⁻²Timotius nipotoveku; iko mpuu-mpuu nirekeku anaku mboto sabana kita sampomparasaya: Sura hitu lako nte yaku Paulus, suro i Yesus Kristus. Yaku najadi suroNa nangoseaka parenta nu Alatala anu nompakasalama kita, bo nangoseaka parenta i Yesus Kristus anu nisarumakata. Kuperapi Tuamata Alatala bo Tuputa Yesus Kristus mompoasi iko bo mombadekei belo bo katinonto ka iko.

³Kuperapi iko maboli ri ngata Efesus, mpo niuliku ka iko bara ipia tempo yaku nalai hau ri propinsi Makedonia. Apa ri situ naria bara sako-ndua tona nompatolele pepatuduki nasala, bo iko kana mombatagi ira ala domo rapatolelera pepatuduki haitu.

⁴Ulika ira, tumo mompekirika tutura-tutura anu ledo nakana bo sunju-sunju muli ntotua nggaulu anu ledo ria kaupu-upuna. Pura-pura haitu aga nanggeni tona mosinjanai, bo ledo nanggeni tona mangoseaka nia nu Alatala mompakasalama manusia sabana pomparasayara Ia.

⁵Patuju parentaku hitu ala kita mosimpotove, ante tove neumba lako ri rara nagasa, pekiri rara ntai anu ledo nombasalai kita, bo pomparasayata i Kristus mpuu-mpuu nakana.

⁶Naria bara sako-ndua tona domo nangoseaka pepatuduki haitu. Ira nasalandala lako ri pepatuduki nakana bo aga nosinjanaika anu ledo ria gunana.

⁷Ira madota majadi guru Atura agama, tapi ira mboto ledo nisanira batua nu tesa-tesa nipakera. Nisarumakara ira napande nompakalanto batuana Atura agama, tano ledo nisanira patujuna.

⁸Nisanita Atura-atura agama nipapola Nabi Musa nabelo asaa rapaketa mosinggambela nte patujuna.

⁹Nisanita muni patuju nu Atura-atura haitu ledo mombatagi tona nanao. Tapi patuju Atura-atura haitu mombatagi tona nombaliunaka atura, tona nadaa,

topesapuaka, tona nadosa, tona ledo natundu nte Alatala, tona aga nompekiri kasana dunia bo ledo nompeili agama, tona nompatesi tina tuamana mboto, bo ka pura-pura topepatesi ntanina.

¹⁰Atura haitu nipovia ka tona nosipogau nte tona ledo bereina mboto, tona nosipogau simbo langgai atau simbo mombine, topangae, topodava, sabi-sabi mpodava, bo ka isema-sema novia anu ledo nosinggambela nte pepatuduki nakana.

¹¹Pepatuduki nakana haitu naria riaru Kareba Belo anu niparasaya ka yaku mompatolelena, haitumo Kareba Belo lako nte Alatala. Alatala naoge bo masipato ratoiya.

¹²Yaku notarima kasi nte Tuputa Yesus Kristus sabana nipekiriNa yaku namala raparasaya mompatolele Kareba Belo, bo nidekeiNa kuasa ka yaku ala kupakule mombatui pokarajaa haitu.

¹³Bara ipia yaku nanjalai i Yesus, yaku nompandasa bo nompakadaa topangoseaka Ia. Tapi naupa ivesia, nipoasiNa yaku, sabana tempo haitu dopa niparasayaku Ia, dopa nisaniku poviaku haitu nadaa.

¹⁴Naoge mpuu pepotove nTuputa nte yaku! Lako ri kabelo raraNa nipopompakuleNa yaku momparasaya Ia bo mompotove singgamanusiaku sabana yaku nosangu rara nte i Yesus Kristus.

¹⁵Naria tesa nanguli ivei: “I Yesus Kristus nakava ri dunia ala mompakasalama tona nadosa.” Tesa haitu nakana bo masipato ratarimata bo raparasayata mpuu. Bo yakumo nelabipa nadosa pade pura-pura tona ntanina.

¹⁶Tapi haitumo sabana Alatala nompoasi yaku. NipoasiNa yaku ala i Yesus Kristus mompopakita posabaraNa anu ledo naupu-upu riaru nggatuvuku. Jadi yaku, tona nadosapa pade pura-pura tona ntanina, najadi jonjo ka tona ntanina ngena, ala ira muni momparasaya Ia bo manggava katuvua nabelo sampe ri kasae-saena.

¹⁷Alatala masipato rabila bo ratoiyata sampe ri kasae-saena, apa Iamo Magau anu nompagenta sampe ri kasae-saena. Ia ledo mamate, ledo namala rakitata, aga Ia saito-itoNa Alatala nakana. Amin!

¹⁸Timotius, iko mpo anaku mboto! Oseakamo parenta-parenta kudekei ka iko, apa parenta hitu nosinggambela nte petevai nu Alatala anu nipasimbayu ntopanggeni agama ka iko bara ipia. Pariaramo petevai nu Alatala haitu ala maroso raramu mombatui pokarajaa nipakatantu ka iko. Pasimbukumo mombatui pokarajaa haitu masimbayu mpo tantara nabia neeva.

¹⁹Pakaroso pomparasayamu, bo iko kana bate-batena movia anu nisanimu nabelo ala iko ledo rasalai nu pekirimu. Naria bara sako-ndua tona domo nompeili anu nisanira nabelo rapoviara, sampe nageromo pomparasayara,

²⁰evamo i Himeneus bo i Aleksander. Nidekeikumo ira randua riara kuasa Magau nu Seta ala rahuku, ala domo rasalaira Alatala.

1 Timotius 2

¹Pamula-mulana kuuli ka pura-pura topangoseaka i Yesus, posambayaka pura-pura tona. Pekakai nte Alatala, perapi anu niparaluu ntona, bo motarima kasi nte Ia.

²Posambayaka muni magau-magau bo pura-pura tona anu nidekeika kuasa mompagenta, ala kita mamala matuvu masiayu bo matinonto, bo ala kita maloga metupu nte Alatala bo mokainggu mabelo, anu masipato rabila ntona.

³Nabelo ane kita mosambaya ivesia, bo nipokono nu Alatala Topompakasalama kita.

⁴Ia madota ala pura-pura tona rapakasalama bo mangisani pepatuduki nakana,

⁵haitumo, Alatala aga saito, bo aga saito muni topetariolo anu nompoposinggabelo Alatala bo manusia. Topetariolo, Iamo i Yesus Kristus.

⁶Ia manusia anu nombadekei karoNa mboto nipatesi mombatolosi pura-pura tona. Ia namate ri tempo nipakatantu nu Alatala ala malanto rakitata dota nu Alatala mompakasalama pura-pura manusia.

⁷Bo haitumo sabana yaku nianggataka nu Alatala majadi suroNa. NituduNa yaku hau mompatolele Kareba Belo ka tona ledo toYahudi. NituduNa yaku mompatuduki pepatuduki nakana ka ira ala raparasayara i Yesus. Anu nitesaku hitu nakana mpuu, yaku ledo nodava!

⁸Dotaku ala ri umba-umba topomparasaya nasiromu mombasomba Alatala, langgai mosambaya ante rara nagasa. Ledo masipato mosambaya ane narau rara atau nosinjanai.

⁹Ivesia muni mombine. Ira kana mobaju masipato bo moadi. Nee mompengaya-ngaya bulua. Nee mombavera karo ante ramba-ramba nasuli mpo bulava, mutiara bo baju nasuli-suli.

¹⁰Aginapa mombine mombavera karora ante pokainggu nabelo anu masipato ka mombine anu natundu nte Alatala.

¹¹Mombine kana mangepe pepatuduki ante malino bo ante ede rara.

¹²Ledo kupasipato mombine mompatuduki bara momparenta langgai. Mombine kana malino,

¹³sabana tona paratama nipajadi nu Alatala iamo i Adam, bo naupu haitu pade nipajadiNa i Hawa.

¹⁴Bo ledo i Adam nibagiu Magau nu Seta, tapi i Hawa nibagiu sampe niliunakana parenta nu Alatala. „Bo siamo sampe ia nandasa noana.”

¹⁵Tapi naupa ivesia, ane mombine maroo momparasaya i Yesus, mompotove tona ntanina, bo matuvu nte pokainggu nabelo bo masipato, ia rapakasalama tempo moana.

1 Timotius 3

¹Nakana mpuu tesa nanguli ivei: “Isema-sema madota majadi pakeni ntodea topomparasaya, nipokonona pokarajaa anu nabelo mpuu.”

²Tona masipato manggeniaka todea topomparasaya kana mabelo pokaingguna sampe ledo ria pokaingguna nuapa-nuapa rapakasala. Ia aga saito bereina bo nipakulena mombatidamaka dota rarana mboto. Nanoto pekirina bo naria

adana. Ia nadamba nantarima torata riara banuana bo nipakulena nompatuduki tona ntanina.

³Ia ledo tolongu, bo ledo toposibaga. Tapi ia kana nalusu rarana bo natuvu nosinggabelo. Ia ledo muni aga nadoko ka doi.

⁴Ia kana matau mompasiayu tona ri banuana mboto ante mabelo bo mompatuduki anana mboto matundu nte ia bo mombabila ia.

⁵Apa ane ledo rapakulena mompasiayu tona ri banuana mboto, berimbamo rapakulena mompasiayu todea topomparasaya Alatala?

⁶Ledo mamala tona dako nomparasaya i Kristus majadi pakeni ntopomparasaya, mbelaka malanga rarana bo rapambela pehuku nasimbayu mpo pehuku nipambela ka Magau nu Seta bara ipiame.

⁷Tona najadi pakeni kana rareke tona nabelo ri panggita ntodea ledo topomparasaya. Apa ane ledo ivesia, tantu ia rasalai ntona sampe Magau nu Seta mompakanavu ia.

⁸Ivesia muni tona anu raanggataka majadi topotulungi pakeni ntodea topomparasaya. Ia kana nabelo pokaingguna bo nanao rarana, ledo nadoko doi bo ledo muni nabiasa gaga nanginu anu nepakalangu.

⁹Ia kana maroo momparasaya pepatuduki nakana anu nipopaisani nu Alatala ka kita, bo kana mangoseaka pepatuduki haitu ante mpuu-mpuu rarana.

¹⁰Dopame ia raanggataka, ia kana raparesa ntani ruru. Bo ane nikita ledo ria pokaingguna nasala, pade mamala ia raanggataka majadi topotulungi pakeni ntopomparasaya.

¹¹Ivesia muni bereina kana mombine nabelo pokaingguna, ledo topetunturaka. Bo ia muni kana matau mantaamaka dota rarana mboto bo mokainggu nanao sampe namala raparasaya riara mpengaya-ngaya.

¹²Topotulungi pakeni ntopomparasaya kamba saito bereina. Kana rapakulena mompasiayu pakabelo anana bo tona ri banuana mboto.

¹³Ane mabelo pokarajaan mombatulungi pokarajaan nTupu, tantu ia rabila ntona bo ia mantambai mabia mosabiki pomparasayana i Yesus Kristus.

¹⁴Timotius, nisarumakaku masalisa yaku tou mosinggava nte iko. Tapi naupa ivesia, nitulisiku sura hitu ka iko

¹⁵mbelaka masae pade makava yaku, musanimo pokainggu masipato ka pura-pura tona nireke nu Alatala ana-anaNa. Apa kitamo todea anu nombasomba Alatala anu Natuvu sampe ri kasae-saena. Kitamo nangingisi bo nombajagai pepatuduki nakana lako nte Alatala ala ledo rabaliki ntona, nasimbayu mpo tinja bo pandasi nombatande pakaroso banua.

¹⁶Nabelo mpuu pepatuduki nakana niparasayata, anu dopa nisani ntona nggaulu tapi sii-sii nipopaisani nu Alatala ka kita ivei: Ia najadi manusia bo Nosa Gasa nosabiki Ia mpuu-mpuu tona nipelisi nu Alatala. Ia nikita nu malaeka nu Alatala bo karebaNa nipatolele ka tona dopa nosisani nte Alatala. Ia niparasaya ntona ri umba-umba ri dunia bo Ia nianggataka hau ri suruga.

1 Timotius 4

¹Nosa Gasa nu Alatala nanguli pakalanto ka kita anu majadi ri tempo hitu napara kaupu nu dunia. Maria tona moura momparasaya pepatuduki nakana. Ira aga mangoseaka anu daa anu nombabagiu tona, bo momparasaya pepatuduki lako ri seta-seta.

²Pepatuduki haitu rakeni ntona noagama ri sumba tapi kakanana aga topodava. Tona haitu nalanda rarara. Nantarimo pekirira, domo nisanira nompoposisala anu nabelo bo anu nadaa.

³Nipatudukira tona nee moberei bo nee mangande kandeana nipopali. Tano kandeana haitu nipajadi nu Alatala rakande. Kita topomparasaya i Kristus, nisanita pepatuduki nakana, bo kandeana haitu namala rakandeta ante manguli tarima kasi nte Alatala.

⁴Apa pura-pura nipajadi nu Alatala nabelo. Ledo ria nuapa-nuapa nipopali ane rakandeta ante manguli tarima kasi nte Alatala.

⁵Kandea haitu nagasa sabana Tesa nu Alatala nanguli nagasa bo sabana posambayata.

⁶Ane mupatuduki pura-pura haitu pangane ka sampesuvuta sampomparasaya, iko majadi topokarajaa nabelo ka i Yesus Kristus. Bo iko mompakaroso raramu mboto ante Tesa nu Alatala anu niparasayata, bo ante pepatuduki nakana anu nioseakamu sampe sii-sii.

⁷Tapi kavaonimo tesa-tesa ledo noguna bo ledo nosinggambela nte pepatuduki nakana lako nte Alatala. Iko kana bate-batena mompasimbuku matuvu natundu nte Alatala.

⁸Ane kita mompakaroso karota aga sakide gunana. Tapi ane kita mompakaroso rarata matuvu ante pokainggu nompakadamba Alatala, nadea mpuu gunana riara mpengaya-ngaya. Apa rakavata katuvu mabelo anu nijanji nu Alatala, nompamula sii-sii sampe ri kasae-saena.

⁹Tesa pangane mpuu-mpuu nakana bo masipato ratarimata bo raparasayata pura.

¹⁰Haitu sampe kita nompasimbuku mokerajaa ntamo mompatuduki pepatuduki nakana, sabana kita nanjarumaka Alatala anu Natuvu sampe ri kasae-saena. Iamo nompakule nompakasalama pura-pura manusia, nelabipa tona nomparasaya Ia.

¹¹Pura-pura anu niuliku ka iko, mupatudukika ka todea, bo tudumo ira mangoseakana.

¹²Nee mupalamba tona mompandaente iko sabana iko da namuda. Tapi iko kana majadi jonjo ka topomparasaya riara tesamu, pokainggumu, pepotovemu ka roa, pomparasayamu nte i Pue, bo kagasa katuvumu.

¹³Papolamo mombaca Buku Gasa ka todea topomparasaya bo nee menonto mompakaroso pomparasayara bo mompatuduki ira sampe makava yaku.

¹⁴Nee malinga mompake pompakule nidekei nu Nosa Gasa ka iko tempo tona nompasimbayu petevai lako nte Alatala ka iko bo pakeni ntopomparasaya nodika palera ri balenggamu.

¹⁵Poviamo pura-pura pokarajaa haitu ante mpuu-mpuu rara ala rasani ntodea iko batena nantambai pangoseakamiau dota nu Alatala ka iko.

¹⁶Jagaimo pokainggumu bo jagai muni pepatudukimu. Iko kana matutu movia pura-pura anu nipatudukiku ka iko. Apa ane mupovia ivesia, iko mboto rapakasalama bo topangepe pepatudukimu muni rapakasalama.

1 Timotius 5

¹Nee makasara mangonteaka langgai anu natuakapa pade iko, tapi popatoramo ia ante tesa nalusu nasimbayu mpo mupovia ka tuamamu mboto. Popatoramo langgai namuda nasimbayu mpo mupovia ka sampesuvumu mboto.

²Popatoramo mombine natuakapa pade iko nasimbayu mpo tinamu mboto. Popatoramo mombine namuda nasimbayu mpo pompatudukimu ka tueimu mboto, bo pakabelo ala pokainggumu bo pekirimu masipato.

³Bilamo bo tulungimo timbala-timbala anu mpuu-mpuu ledo ria tona nompeili ira.

⁴Tapi ane maria anana bara tupuna, ira haitumo masipato rapatuduki mokolu mantulungi totuara mboto bo mombabalasi kabelo ntotuara. Haitumo pokainggu nabelo anu nompakadamba rara nu Alatala.

⁵Timbala anu mpuu-mpuu natuvu saitona bo ledo mpuu naria isema-sema mompiarana, aga natuvu manjarumaka Alatala. Eo bongi ia nosambaya njuu nerapi tulungi nte Ia.

⁶Tapi timbala anu natuvu aga nompesana-sana, ia mpo tomate, nau karon da natuvu.

⁷Ulimo petevai-petevai hitu ka ira ala ira matuvu ante pokainggu anu ledo namala rasalai ntona.

⁸Tapi ane maria tona ledo nantulungi sampesuvu-sampesuvuna, nemopa ira sambanua, tona haitu nompoara pepatuduki nakana. Nadaapa ia pade tona ledo nomparasaya.

⁹Timbala anu masipato rasuaraka sangana riara buku timbala ratulungi ntopomparasaya, aga mombine umuruna nagana onopulu mpae, anu nipoberei aga sanggani.

¹⁰Bo nisani ntonamo pokainguna nabelo. Jonjona: nipakambasona pakabelo anana, nadamba rarana nantarima torata riara banuana, nijampangina topomparasaya, nitulungina tona nasusa, bo ia nabiasamo novia mpengaya-ngaya anu nabelo.

¹¹Tapi nee rasuaraka sanga ntimbala da namuda riara buku haitu. Sabana, ane dota rarara mompene sampe mombadagi dota rarana mangoseaka Kristus, ia madota rapoberei vai.

¹²Bo kaupuna ia mambela pehuku sabana ia nombaliunaka pojanjina „aga mokaarajaa ka i Kristus”.

¹³Ledo aga haitu, timbala namuda bara aga majadi tosanda bo aga manjayonjayo mompene ri sou ntona. Ia ledo aga majadi tosanda ia muni manggeni tesa bo mombagalo urusa ntona ntanina bo motesa mpengaya-ngaya anu nadaa anu ledo masipato ratesa.

¹⁴Haitu sampe niuliku timbala-timbala da namuda aginamo moberei vai bo moana bo mompakasiayu avura mboto ala nee radekei loga ka balita manjalai kita.

¹⁵Niuliku ivesia sabana naria mamimo timbala nasalandala bo domo nangoseaka dota i Kristus, tapi aga nangoseaka dota Magau nu Seta.

¹⁶Tapi ane mombine topomparasaya naria sampesuvuna natimbala, ia kana mombatulungi timbala haitu. Nee aga rapalambana todea sampomparasaya mantulungi timbala haitu. Ivesiamo, todea topomparasaya mompakule mantulungi timbala-timbala anu mpuu-mpuu ledo ria tona nompeili ira.

¹⁷Pakeni ntodea topomparasaya anu nabelo pekeniakara, masipato rabila ronggani kadeana pade tona ntanina, nelabipa ira anu nompasimbuku mpuu nompatuduki bo nompatolele Tesa nu Alatala.

¹⁸Masipato kita mombabila pakeni ntodea topomparasaya, sabana riara Buku Gasa niuli ivei: “Nee rapou sumba nu japi tempo ia noini pae.” Bo naria tesa ntanina nanguli, “Topokarajaa masipato mantarima gajina.”

¹⁹Ane maria pakeni ntodea topomparasaya nirai ntona, nee mutarima ane ledo maria randua bara tatalu sabi mompakakana perai haitu.

²⁰Tapi ane pakeni ntodea haitu mpuu-mpuu novia dosa, ia kana raonteaka ri ngayo ntodea ala topomparasaya ntanina maeka movia dosa.

²¹Timotius, ri ngayo Alatala bo i Yesus Kristus bo malaeka-malaekaNa anu nipelisiNa, kuuli ka iko: oseakamo parenta-parenta nitesaku pangane ante noa rara. Nee mompelenje bo nee manjairaka.

²²Nee masalisa gaga mombadika palemu ri karo ntona manganggataka ia majadi pakeni ntopomparasaya. Paresa ntani ruru ingguna, apa ane ia movia dosa ngena, ikomo rapakasala. Nee sampe karomu matekeni nte dosa ntona ntanina. Jagaimo pokainggumu mboto ala iko batena matuvu ante pokainggu nagasa.

²³Tumo aga uve nggoo muinu, tapi inu muni sakide uve anggur ala mompakulisi tailikomu, apa iko nasaro nadua.

²⁴Naria tona nalantomo dosana nau dopa nitangara. Tapi dosa ntona ntanina damo riara potangara pade nalanto. Jadi nee masara gaga manganggataka tona majadi pakeni ntopomparasaya.

²⁵Ivesia muni pokainggu nabelo, biasa nalanto nikita ntona. Tapi nau ledo nikita, kana rakita ngena, apa pokainggu nabelo ledo namala ratabuniaka.

1 Timotius 6

¹Topomparasaya i Yesus anu najadi batua ntona kana mombabila bo matundu nte puana ala Alatala ledo rasalai ntona bo pepatudukita nakana ledo rapakadaa ntona.

²Ane puana mboto topomparasaya i Yesus, nee radekei batua haitu mompandaente puana, sabana ira nosampesuvu sampomparasaya. Tapi ia kana

mantambai kabelo pokarajaana sabana pua nitulungina haitu muni topomparasaya i Pue anu nipotovera. Timotius, iko kana mompatuduki pura-pura pepatuduki hitu ka todea topomparasaya bo popatora ka ira ala raoseakara.

³Naria sanu tona nanggeni pepatuduki anu nosisala ante pepatudukita. Ledo nipokonora tesa-tesa nakana lako nte Tuputa Yesus Kristus bo ledo nipokonora pepatuduki anu nanggeni kita matuvu mangoseaka dota nu Alatala.

⁴Tona haitu nalanga rarana. Ia netitau tapi ledo nisanina nuapa-nuapa. Ia aga nagila nangelo saba bo nosinjanai ka batua nu tesa. Pepatudukira haitu aga nanggeni tona nasiriati, nosinggarau, nosiuli-uli, nosirai,

⁵bo ledo naupu-upu nosipakadua rara. Nadaamo pekirira bo domo nisanira anu nakana. Nisarumakara makalumana ira ane moagama.

⁶Nakana mami, ane noagama kita, naoge mpuu belo rakavata, asaa naosa rarata ante anu naria nte kita.

⁷Apa tempo kita nipoanaka ledo ria nuapa-nuapa nikenita riara dunia hitu, bo ane kita mamate ledo ria nuapa-nuapa mamala rakenita lako ri dunia hitu.

⁸Jadi ane maria kandeata bo pakeata, kana maosamo rarata.

⁹Tapi tona madota majadi makalumana mambela pesori. Ia ratoliani mpengaya-ngaya dota rara nadaa bo nadoyo, bo dota-dota haitu mompakagero katuvuana, mompakanavu ia, bo mompakaropu ia

¹⁰sabana pompotove doi puna mpengaya-ngaya kadaa. Sanu tona nompasimbuku nangelo doi sampe nasalandalamo bo domo nioseakara pepatuduki nakana, bo aga mpengaya-ngaya kasusa nikavara anu nompakabuku rarara.

¹¹Tapi iko batua nu Alatala. Nee mpuu mokainggu madaa ivehaitu! Pasimbukumo majadi tona nanao ri panggita nu Alatala. Pasimbukumo matuvu mangoseaka dotaNa. Kana mupakaroso pomparasayamu, potovemo singgamanusiamu, tidamaka tempo nasusa, bo moinggu malusu.

¹²Pasimbukumo mpuu-mpuu mangoseaka pepatuduki i Kristus. Kingisi pakarosomo katuvu nabelo sampe ri kasae-saena. Apa patuju nu Alatala nompokio iko majadi todeaNa ala mukava katuvu nabelo haitu tempo nipangakumu pomparasayamu i Kristus ri ngayo ntodea.

¹³Jadi, ri ngayo nu Alatala, anu nompakatuvu pura-pura anu naria, bo ri ngayo i Yesus Kristus anu nabia nompangaku tesa nakana ri ngayo i Pontius Pilatus, kuuli ka iko ivei:

¹⁴Oseaka puramo parenta hitu ante mpuu-mpuu raramu bo ante pokainggu anu ledo masipato rasalai ntona, sampe makava mpanjili Tuputa i Yesus Kristus.

¹⁵Ia makava ri tempo nipakatantu nu Alatala. Aga Alatalamo nakuasa, bo nambaso mpuu kaogeNa. Ia Magau nakuasapa pade pura-pura magau ntanina, bo Tupu anu nakuasapa pade pura-pura tupu ntanina.

¹⁶Aga Ia saito-itoNa ledo mamate. Ia natuvu riaru reme anu ledo namala rakaparai. Ledo ria saitoa manusia nanggita Ia, apa ledo nipakule nu manusia manggita Ia. Iamo masipato rabila bo Iamo masipato momparenta sampe ri kasae-saena. Amin!

¹⁷Timotius, ulika tona nakalumana ri dunia hitu ala nee majadi malanga rarara bo nee aga manjarumaka mbara-mbara ri dunia anu sakide-sakide malipo. Ira kana manjarumaka Alatala anu nompapelabi-labi ka kita mpengaya-ngaya anu niparaluuta rapodamba-dambata.

¹⁸Popatoramo tona nakalumana, mokainggu mabelo ala pokainggura nabelo haitu majadi kakalumanara. Ira kana majoi rara bo masadia mombatulungi tona ntanina.

¹⁹Ane ivesia pokainggura, namala raulita ira nompasiromu kakalumana ri suruga, anu mamala rasarumakara ri tempo makava, bo rakavara katuvu nabelo sampe ri kasae-saena.

²⁰Timotius, jagaimo pakabelo-belo pepatuduki nakana anu niparasaya nu Alatala ka iko ala ledo rabaliki ntona. Nee mompariara tesa ledo ria gunana bo

ledo nanggeni kita mangoseaka dota nu Alatala, bo tesa-tesa anu nosisala nte pepatuduki nakana. Tesa-tesa haitu niuli ntona “pangisani”, tano ledo nakana.

²¹Naria tona nangoseaka tesa haitu sampe nasalandalamo, bo domo nangoseaka pepatuduki nakana. Kuperapi Tupu mombadekei belo ka komiu pura-pura. Amin. Tabe lako ri nte yaku, Paulus

2 Timotius

2 Timotius 1

¹⁻²Timotius, iko nipotoveku mpo anaku mboto: Sura hitu lako nte yaku, i Paulus. Nangoseaka dota nu Alatala, yaku nianggatakaNa majadi suro i Yesus Kristus ala mompatolele kareba anu nantesa katuvu mabelo sampe ri kasae-saena anu nijanji nu Alatala. Kita nanggava katuvu nabelo haitu sabana kita nosangu rara nte i Yesus Kristus. Kuperapi Tuamata Alatala bo Tuputa Yesus Kristus mompoasi iko bo mombadekei belo bo katinonto ka iko.

³Yaku nosukuru nte Alatala anu nisombaku ante rara nagasa, nasimbayu mpo nipovia ntotuaku nggaulu. Yaku nasaro nanguli tarima kasi ka Alatala sabana iko, bo eo bongi yaku nantora iko riara posambayaku.

⁴Nitoraku kasusa raramu tempo kita nogaa bara ipia, bo nalentora mpuu raraku manggita iko ala yaku mpuu-mpuu madamba.

⁵Yaku nosukuru nte Alatala apa nitoraku iko nomparasaya i Yesus nte mpuu-mpuu raramu. Tupumu mombine i Lois, bo tinamu, i Eunike anu nokolu nomparasaya. Bo nisaniku pomparasayamu nasimbayu nte pomparasayara.

⁶Sabana haitu, kupopatora ka iko, iko kana mpuu-mpuu mompake pompakule nidekei nu Alatala ka iko tempo yaku nosambaya nombadika paleku ri karomu bara ipia.

⁷Apa Nosa Gasa nipopanau nu Alatala ka kita ledo nompakaeka kita, tapi nompakaroso rarata, bo nompopompakule kita mombatidamaka dota rarata mboto bo mompotove singgamanusiata.

⁸Jadi, nee maeya matamu motesaki Tuputa i Yesus, bo nee maeya matamu manggita yaku nitarunggu sabana pokarajaaku mompatolele Kareba i Yesus. Tapi iko kana masadia mantingayo kasusa nasimbayu mpo yaku sabana iko mompatolele Kareba Belo. Bo Alatala mombadekei kuasa ka iko mantingayo kasusa haitu.

⁹Alatala nompakasalama kita bo nompokio kita majadi todeaNa nagasa. Kita nipakasalama ledo sabana pompasimbukuta mboto, tapi sabana nia nu Alatala

bo pepotoveNa. Ri lamba pamulana dopame dunia nipajadi, Alatala nonia mamimo mompopakita pepotoveNa ante anu rapovia i Yesus Kristus.

¹⁰Bo sii-sii nakavamo i Yesus Kristus topompakasalama kita bo nikitata kambaso pepotove nu Alatala ka kita. Lako ri Kareba Belo nisanita i Kristus nombadagi kuasa kamate, bo nombadekei katuvua nabelo anu ledo maupu-upu.

¹¹Yaku nianggataka nu Alatala majadi suroNa ala mompatolele bo mompatuduki Kareba Belo haitu [ka tona ledo toYahudi.]

¹²Bo yaku nombarasai pura-pura kasusa riarar ntarunggu hitu sabana pokarajaaku nompatolele Kareba Belo. Tapi naupa ivesia, ledo naeya matak, sabana niposisanikumo i Yesus anu nisarumakaku, bo nisanikumo Ia nompakule nombajagai yaku sampe ri Eo Potangara ri kaupu nu dunia.

¹³Timotius, toramo pura-pura pepatuduki niepemu lako nte yaku. Pepatuduki haitu nakana mpuu bo kana majadi jonjo mupasiala bo mupatuduki ka tona ntanina. Pakaroso pomparasayamu bo potovemo singgamanusiamu sabana posangu raramu nte i Yesus Kristus.

¹⁴Pepatuduki haitumo kakalumana niparasaya nu Alatala ka kita. Jadi ante petulungi Nosa Gasa anu naria riarar ntaita, jagaimo pepatuduki haitu. Nee radekei rabaliki ntona.

¹⁵Nisanimu pura-pura topomparasaya lako ri propinsi Asia nompalaisi yaku. Nau i Figelus bo i Hermogenes, nalai munimo.

¹⁶Tapi kuperapi i Pue Yesus maasi mataNa nte gi Onesiforus sambanua, sabana nadea ngganimo ia nakava nompakadamba raraku. Nau yaku nitarunggu, ledo naeya matana nanggita yaku.

¹⁷Tempo ia nakava ri ngata Roma, nielo-elona yaku sampe nikavana.

¹⁸Nisanimu nadea mpuu petulungina ka yaku ri ngata Efesus. Kuperapi i Pue Yesus mompoasi i Onesiforus ri Eo Potangara ri kaupu nu dunia.

2 Timotius 2

- ¹Jadi Timotius, anaku, pakaroso raramu ante petulungi nidekei nu Alatala lako ri kabelo raraNa ka kita anu nosangu rara nte i Yesus Kristus.
- ²Niepemumo pepatudukiku bo nadea tona ntanina nangepe bo nosabikina muni. Jadi pepatuduki haitu kana mupatuduki ka tona anu namala raparasaya bo anu nompakule mompatuduki tona ntanina.
- ³Iko tantara i Yesus Kristus nabelo. Jadi iko kana masadia mombarasai kasusa nosangani-nggani nte yaku.
- ⁴Apa tantara nabelo ledo notingguka bago ntanina tempo ia nombatui bagona niparasayaka ia. Apa ia madota mompakadamba rara nu tadulakona.
- ⁵Topomore ledo mamala majadi padagi ane ia ledo matundu ri atura-atura nipakatantu.
- ⁶Topotalua anu nokarajaa ntamo, iamo paratama masipato mantarima asele ntaluana haitu.
- ⁷Tanondoakamo porapa pangane bo Tupu mompakanoto raramu ala mupaha pura-pura.
- ⁸„Ane murasai kasusa,„ toramo i Yesus Kristus, muli Magau Daud. Ia namate bo natuvu mpanjili evamo anu nitesa riaru Kareba Belo nipatoleleku.
- ⁹Yaku hii nipandasa sabana nompatolele Kareba Belo haitu. Yaku nipou rante nasimbayu mpo tona nadaa. Tapi Tesa nu Alatala ledo namala rarante, kana matolele ri umba-umba.
- ¹⁰Jadi yaku nombatidamaka mpengaya-ngaya kasusa ala mamala kutulungi tona nipelisi nu Alatala sampe ira muni mamala momparasaya i Yesus Kristus bo rapakasalama bo matuvu mabelo mosangani-nggani nte Alatala sampe ri kasae-saena.
- ¹¹„Yaku nombatidamaka kasusa sabana,„ nakana mpuu tesa nanguli ivei: “Ane kita namatemo nosangani-nggani ante Ia, Kita muni matuvu mosangani-nggani ante Ia.

¹²Ane kita nombatidamaka riara kasusata, Kita momparenta mosanggani-nggani ante Ia bara maipia. Ane kita mombasapu Ia Ia muni mombasapu kita.

¹³Nau kita ledo natutu nomparasaya Ia Ia bate-batena namala raparasaya, sabana anu niuliNa kana rapakadupaNa mpuu.”

¹⁴Popatoramo pura-pura tesaku hitu ka topomparasaya. Ri panggita nu Alatala anu nosabiki pura-pura, ulika ira nee mosinjanaika batua ntesa. Haitu ledo ntoto naria gunana bo aga mompakagero pomparasaya ntopangepe.

¹⁵Tapi iko kana mompasimbuku mpuu-mpuu mokarajaa mabelo ala madamba rara nu Alatala bo rarekeNa iko masipato mokarajaa ka Ia. Pasimbukumo ala ledo maeya matamu manggita pokarajaamu tapi mupatuduki tesa nakana lako nte Alatala ante kakana-kanana.

¹⁶Nee rapetalingai tesa-tesa anu ledo ria gunana bo ledo nombabila Alatala, sabana tesa-tesa ivehaitu ledo ntoto nanggeni tona mangoseaka dota nu Alatala.

¹⁷Tesa ntona haitu nendai mpo dua bo nompakadaa katuvu ntona. I Himeneus bo i Filetus notesa ivehaitu.

¹⁸Ira nasalandalamo lako ri pepatuduki nakana bo aga nompakagero pomparasaya ntona. Niulira naliumo pompakatuvu mpanjili tona namate. Pepatudukira haitu ledo ntoto nakana.

¹⁹Tapi naupa ivesia, Tesa nu Alatala batena nakana bo namala raparasaya. Tesa nu Alatala naroso mpo pandasi nau ragoya ledo mogoya. Tesa nu Alatala haitu nitulisi ivei: “Nisani nTupu isema todeaNa.” Bo naria tesa ntanina nanguli, “Isema-sema nanguli ia topangoseaka Tupu, kana menonto mokainggu nadaa.”

²⁰Riara banua mbaso naria mpengaya-ngaya pareva. Naria nipovia lako ri bulava bo salaka, tapi naria muni anu nipovia lako ri kayu bo tana lei. Pareva bulava bo salaka nipake mantande torata, tapi pareva ntanina nipake eo-eo.

²¹Jadi ane tona mombakabasaka pura-pura pokaingguna nadaa, ia majadi masimbayu mpo pareva bulava bo salaka rapake mombatande torata. Batuana,

ia majadi topokarajaa anu nagasa bo noguna ka Tupuna, bo ia masadia movia mpengaya-ngaya pokarajaa nabelo.

²²Jadi, nee mpuu mangoseaka dota-dota nu rara nadaa anu nipodamba ngana-ngana muda. Tapi pasimbukumo matuvu manoa ri panggita nu Alatala. Pakaroso pomparasayamu, potovemo singgamanusiamu, bo pasimbukumo matuvu mosinggabelo nte ira. Poviamo pura-pura haitu mosanggani-nggani nte pura-pura tona anu nekakai nte i Pue ante rara nagasa.

²³Nee mupesua potesa ntodoyo anu ledo nisanira pepatuduki nakana. Nisanimu mboto tesa ivehaitu aga mompopeumba posinjanai.

²⁴Tapi batua i Pue Yesus ledo masipato mosinjanai nte tona. Ia kana malusu nte tona pura-pura. Ia kana mompakule mompatuduki ante nabelo, bo ia muni kana mosabara.

²⁵Ia kana malusu rarana mompatuduki tona nangeva ia, mbelaka da mamala ira rakeni nu Alatala majea lako ri pokainggura nasala bo mangisani pepatuduki nakana.

²⁶Ivesiamo ira majadi manoto mpanjili bo rakabasaka lako ri kuasa Magau nu Seta anu nombabagiu ira bo nompasuu ira mangoseaka dotana.

2 Timotius 3

¹Timotius, kana musani, ri tempo maparamo kaupu nu dunia madea mpuu kasusa ri dunia hitu.

²Tempo haitu madea tona aga mompotove karora mboto. Ira madoko doi, mamango, malanga rara, mantunturaka roa, bo ledo matundu nte totuara. Ledo rasanira motarima kasi, bo ledo rapeilira agama.

³Ledo rasanira mepotove, ledo madota mosinggabelo, bo aga mompakadaa sanga ntona ntanina rapokonora. Ledo rapakulera mantaamaka dota nu rarara mboto. Ira mpuu-mpuu masoa bo mavuu matara manggita pura-pura anu nabelo.

- ⁴Ira aga mombaakalani roa, ledo ria rekeru, bo pangulira iramo tona nataupa. Ledo rapotovera Alatala, aga kasana karora mboto rapotovera.
- ⁵Pangoseakara ada-ada agama mpo tona natundu nte Alatala, tapi riaru ntaira nipoarara kuasa nu Alatala [anu nompakule mombabaliki rarara nadaa]. Timotius, nee mpuu mosimpovega nte tona nokainggu nadaa ivehaitu.
- ⁶Sanu ira nanggeni pepatuduki ledo nakana hau ri banua ntona, bo niopara mombine-mombine nadoyo anu nadea dosara bo nikuasai mpengaya dota rara nadaa.
- ⁷Mombine-mombine haitu nasaro nekipaguru tapi ledo nipakulera nombapaha mpuu pepatuduki nakana lako nte Alatala.
- ⁸Tona nanggeni pepatuduki anu ledo nakana haitu pekirira nadaamo bo pomparasayara ledo nakana. Ira mpuu-mpuu nangeva pepatuduki nakana, nasimbayu mpo i Yanes bo i Yambres nangeva Nabi Musa nggaulu ante pangisanira.
- ⁹Tapi ledo rapakulera mompapola pangevara pepatuduki nakana, sabana kadoyora haitu kana malanto rasani ntodea, nasimbayu nte anu najadi nte i Yanes bo Yambres nggaulu.
- ¹⁰Tapi, Timotius, nisanimumo yaku ledo nasimbayu nte tona pangane. Nipariaramumo pepatudukiku, nipasialamumo pokaingguku bo patuju katuvuku. Nisanimumo pomparasayaku, posabaraku, pepotoveku bo pantidamakaku riaru kasusa.
- ¹¹Nipeintamu mbotomo berimba yaku naroo tempo yaku nipandasa bo nipakasusa evamo najadi ri karoku ri ngata-ngata Antiokhia, Ikonium, bo Listra bara ipia. Yaku mpuu-mpuu nipandasa, tapi Tupu bate-batena nompakasalama yaku lako ri pura-pura kasusaku haitu.
- ¹²Pura-pura tona anu madota matuvu mangoseaka dota nu Alatala bo matuvu mosangu rara ante i Yesus Kristus, tantu rapandasa.
- ¹³Tona nadaa bo topebagiu aga mantambai kadaana. Ira mombabagiu tona ntanina bo ira muni rabagiu.

¹⁴Tapi iko, Timotius, kana bate-batena manggangisi pepatuduki nakana anu nipegurumu bo mpuu-mpuu niparasayamu. Nisanimu tona nompaguru haitu, nipaguruna nakana ka iko.

¹⁵Lako ri kakodimu nisanimu isi Buku Gasa, bo Buku Gasa haitumo nompakanoto raramu sampe iko namala nomparasaya i Yesus Kristus bo rapakasalama.

¹⁶Pura-pura tesa riaru Buku Gasa nopuna lako nte Alatala mboto bo noguna mompatuduki anu nakana, mangonteaka tona nasala, mombatulungi tona mompakabelo pokainggura nadaa, bo mompatuduki tona matuvu manoa ri panggita nu Alatala.

¹⁷Jadi Buku Gasa mompakagana pura-pura todea nu Alatala sampe rapakulera movia pura-pura pokainggu nabelo.

2 Timotius 4

¹Timotius, petevai hitu niuliku nte mpuu-mpuu raraku. Makava tempona i Yesus Kristus makava mpanjili momparenta ri dunia hitu, bo ratangaraNa pura-pura manusia, tona da natuvu bo tona namatemo. Jadi, kuuli ka iko ri ngayo nu Alatala bo i Yesus Kristus anu nanggita pura-pura poviata:

²Patolelemo Tesa nu Alatala. Iko kana mompasimbuku mompatolele Tesa haitu nau bara ratarima ntona bara ledo. Popaisani ka tona ane masala pokainggura, onteakamo tona novia dosa, bo pakadidimo rarara mokainggu mabelo. Nee masau raramu mompatuduki ira.

³Apa makava tempona bara maipia domo madota ira mangepe pepatuduki nakana. Raelora guru-guru anu mompatuduki pepatuduki anu marasa raepe. Patujura ala mamala raepera pepatuduki anu nosinggambela ante dota nu rarara mboto nadaa.

⁴Ira mombaramu talingara ala domo raepera pepatuduki nu Alatala anu nakana, bo ira aga mompataa talingara mangepe tesa-tesa ledo nakana anu nipovia nu manusia.

⁵Haitumo sampe niuliku ka iko, Timotius, iko kana mombakuasai karomu mboto nau bara nuapa majadi. Tidamakamo tempo nasusa. Pasimbukumo mompatolele Kareba Belo, bo povia puramo pokarajaa niparasaya nu Alatala ka iko.

⁶Yaku nanguli petevai pangane apa nisaniku naparamo janjiku. Bo tempo yaku rapatesi, kamateku rareke pesomba ka Alatala.

⁷Nituntuniku belomo dala nipakatantu i Pue ka yaku; nipakaupukumo pokarajaa nidekeiNa ka yaku. Yaku ledο nolengga-lengga nomparasaya i Kristus sampe ri kaupuna.

⁸Jadi hitupa nasadiamo hadia padagi ka yaku sabana katuvuku nompakadamba rara nu Alatala. I Pue Yesus Topotangara nanoa, bo ri Eo Potangara ngena radekeiNa hadia haitu ka yaku, bo ledο aga ka yaku tapi ka pura-pura tona nompotove Ia bo nompopea kakavaNa.

⁹Pasimbukumo masalisa tumai nte yaku,

¹⁰apa domo nadea tona nomporoa yaku. I Demas nompalaisi yaku sabana ia aga nompotove katuvuna ri dunia hitu. Nalai rou ri ngata Tesalonikamo ia. Bo i Kreskes rou ri propinsi Galatia, bo i Titus rou ri bagia Dalmatia.

¹¹Damo i Lukas naboli ri sii nte yaku. Ane tumai iko ngena, tuusaka muni i Markus, sabana ia mamala mombatulungi pokarajaaku ri sii.

¹²Bo nituduku i Tikhikus hau ri ngata Efesus.

¹³Ane tumai iko, keni baju ranindiku anu niboliku ri ngata Troas ri banua i Karpus. Bo keni tumai muni buku-bukuku, nelabipa buku-buku nipovia lako ri kulimba.

¹⁴I Aleksander, pande nu tambaga, nadea anu nadaa nipoviana ka yaku. Damo Tupu mombabalasi ia mosinggambela nte pokainguna haitu.

¹⁵Iko mboto kana mainga nte ia sabana nievana mpuu pepatudukita.

¹⁶Tempo parakaraku nitangara paratama, ledο ria saitoa nombatulungi yaku; nepalaika puramo roa. Kuperapi Tupu ledο mombareke salara haitu.

¹⁷Tapi i Pue Yesus nantulungi yaku, bo Ia nompakaroso yaku sampe nipakuleku nompatolele pura-pura Kareba Belo ka pura-pura tona anu ledo toYahudi ri sii. Kaupuna yaku nikabasaka lako ri kuasa ntona madota mompatesi yaku.

¹⁸Bo niparasayaku i Pue bate-batena mombakabasaka yaku lako ri pura-pura anu nadaa bo manggeni yaku ante masalama mesua ri PoparentaNa ri suruga. Ia masipato rabila bo ratoiya sampe ri kasae-saena! Amin.

¹⁹Pakavote tabeku ka i Priskila bo Akwila, bo ka gi Onesiforus sambanua.

²⁰I Erastus naboli ri ngata Korintus bo i Trofimus nipalaisiku ri ngata Miletus sabana ia nadua.

²¹Pasimbukumo tumai dopame tempo ranindi. Nadea tabe lako nte i Ebulus, i Pudes, i Linus bo i Klaudia, bo lako nte pura-pura sampesuvuta sampomparasaya ri sii.

²²Kuperapi i Pue Yesus momporoa iko, Timotius. Kuperapi Ia bate-batena mabelo nte komiu pura-pura. Tabe lako nte yaku, Paulus

Titus

Titus 1

¹Sampesuvuku i Titus: Sura hitu lako nte yaku Paulus, batua nu Alatala bo suro i Yesus Kristus. Yaku nianggatakaNa bo nisuroNa mompakaroso pomparasaya ntona nipelisi nu Alatala. NituduNa muni yaku mompatuduki ira ala rasanira pepatuduki nakana, anu manggeni ira matuvu nangoseaka dota nu Alatala.

²Haitu nipoviaku ala ira mamala manjarumaka matuvu nte Alatala sampe ri kasae-saena. Dopame dunia hitu nipajadi nu Alatala, nijanjiNa todeaNa matuvu sampe ri kasae-saena. Alatala ledo nodava bo pojanjiNa namala raparasayata.

³Sii-sii ri tempo nipakatantuNa mboto, nipopaisani nu Alatala mpuumo pojanjiNa haitu ka manusia riaru karebaNa anu nipatoleleku. Kareba Belo haitu niparasayaNa ka yaku bo nipatoleleku nangoseaka parenta nu Alatala, Topompakasalama kita.

⁴Titus, iko mpuu-mpuu mpo anaku mboto, apa kita sampomparasaya. Kuperapi Tuamata Alatala bo i Yesus Kristus, Topompakasalama kita, mombadekei belo bo katinonto ka iko.

⁵Patujuku nantudu iko maboli ri levuto Kreta ala mupasiayu anu dopa nasiayu ri situ, bo manggataka pakeni ntodea topomparasaya ri pura-pura ngata, evamo niuliku ka iko bara ipia.

⁶Tona masipato raanggataka majadi pakeni ntodea topomparasaya, haitumo tona ledo naria pokainguna namala rasalai ntona, bo aga saito bereina mombine. Ana-anana kana momparasaya i Kristus bo ledo niuli ntona ngana nesapuaka bara ngana ledo natumutoa.

⁷Pakeni ntopomparasaya haitu topompasiayu todea nu Alatala. Jadi ia ledo novia pokainggu rasalai ntona. Ia ledo tona nalanga pekirina bara nasalisa narau, ledo topanginu, ledo toposibaga, bo ledo muni tona nadoko doi.

⁸Tona raanggataka majadi pakeni ntopomparasaya kana majoi rarana mantarima torata riaru banuana, bo nompokono anu nabelo. Ia kana nanoto,

nanoa, bo nagasa katuvuna, bo kana rapakulena mombatidamaka dota nu rarana mboto.

⁹Ia kana maroo manggangisi pepatuduki nakana anu nipatudukita ka ia, apa pepatuduki haitu namala raparasaya. Ivesiamo rapakulena mompangajari topomparasaya mangoseaka pepatuduki nakana haitu, bo rapakulena muni mompopaisani sala ntona anu nombasapuaka pepatuduki haitu.

¹⁰Niuliku ivesia, sabana nadeamo tona nangeva pepatuduki nakana, nelabipa topanguli kita topomparasaya kana mangoseaka Atura-atura agama evamo ada suna. Ira nombabagiu tona ntanina ante tesara anu ledo ria batuana.

¹¹Tona ivehaitu kana ratagi, nee mpuu mudekei ira mompatuduki! Apa nadea pobanua ntona naingu nangepe pepatudukira anu ledo masipato. Patujura mompatuduki aga manggava doi ante akala ledo nabelo.

¹²Naria saito nabi lako nte toKreta mboto nanguli ivei: “ToKreta bate-batena topodava. Ira nasimbayu kadaana nte binata nasoa; ira nadoko bo namau.”

¹³Tesa nu nabi haitu nakana mami. Haitumo sampe iko kana mombasalaraka topomparasaya ri Kreta, ala ledo raoseakara pepatuduki nasala tapi pepatuduki nakana raoseakara.

¹⁴Ulika ira tumo raparasayara tutura-tutura ntoYahudi anu nikarara mboto, bo nee mangoseaka atura-atura nipovia manusia anu nombasapuaka pepatuduki nakana.

¹⁵Ane tona nagasa rarana, pura-pura poviana nagasa. Tapi ane tona nadaa pekirina bo ledo nomparasaya Alatala, ledo ria poviana nuapa-nuapa nagasa, sabana pekiri bo rara ntaira nadaa mami.

¹⁶Pangulira ira nosisani ante Alatala, tapi pokainggura ledo nosinggambela nte tesara. Pokainggura aga nompakarunggu rara nu Alatala, bo ira ledo nadota natundu nte Alatala. Ledo nipakulera nokainggu nabelo.

Titus 2

- ¹Iko, Titus, kana mompatuduki anu nosinggambela ante pepatuduki nakana ka tona.
- ²Ulimo ka totua-totua langgai ira kana mombakuasai karora mboto. Ira kana manoto bo matuvu nte pokainggu masipato ratoiya. Ira kana matutu mangoseaka pepatuduki nakana, ira kana mpuu-mpuu mompotove tona ntanina, bo mombatidamaka riarra kasusa.
- ³Ivesia muni ante totua-totua mombine. Patudukimo ira matuvu nte pokainggu nagasa anu masipato rapovia ntona natundu nte Alatala. Ulika ira nee mombatunturaka tona ntanina, nee sampe majadi batua ntule. Ira kana mompatuduki tona ntanina matuvu mabelo.
- ⁴Ivesiamo ira mamala mompatuduki ngana-ngana mombine mompotove bereira bo ana-anara,
- ⁵majadi manoto, bo ledo mogau sala, matutu mompasiayu avura mboto, majadi tobelo rara, bo mekou nte bereira mboto. Ane mombine namuda mokainggu ivesia, ledo maria tona manjalai Tesa nu Alatala.
- ⁶⁻⁷Ivesia muni mupatuduki ka ngana-ngana langgai. Ulika ira, ira kana mombakuasai karo mboto. Bo iko mboto kana mokainggu mabelo riarra mpengaya-ngaya ala iko majadi jonjo namala rapasiala ntona. Ane iko mompatuduki, patudukimo ante manoa bo ante mpuu-mpuu raramu.
- ⁸Pakemo tesa-tesa nakana bo masipato, anu ledo mamala rasalai ntona. Ane mupatuduki ivesia, tona nangeva kita maeya matara, apa pura-pura anu niulimu nabelo. Ledo maria nuapa-nuapa nadaa anu namala rasalaira ka kita.
- ⁹Patudukimo batua-batua ira kana matundu nte madikara. Ira kana mokainggu mompakadamba rara nu madikara bo ira ledo mamala mesanai.
- ¹⁰Ledo muni mamala ira mompelea mbara-mbara nu madikara, tapi ira kana manoa rarara ala rasani nu madikara ira mpuu-mpuu namala raparasaya. Ane batua anu najadi topomparasaya matuvu ivesia, todea manggita pokainggura nabelo bo mantoiya pepatuduki nakana anu notesaki Alatala, Topompakasalama kita.

¹¹Iko kana mompatuduki tona matuvu nte pokainggu nabelo, sabana lako ri kabelo rara nu Alatala, nibukaNa mo dala ala pura-pura manusia mamala rapakasalama.

¹²Lako ri kabelo raraNa, kita nipatudukiNa mombakabasaka pokaingguta ledo nipokonoNa bo dota nu rarata nadaa. Bo kita nipatudukiNa majadi manoto, manoa, bo matuvu mangoseaka dotaNa ri dunia sii-sii.

¹³Apa ane kita da nonturo ri dunia, kita nanjarumaka kakava i Yesus anu mpuu-mpuu mompakasana rarata. Tempo haitu, pura-pura tona manggita kaoge i Yesus Kristus, Iamo Alatala toNeliu KaogeNa bo Topompakasalama kita.

¹⁴I Kristus nombadekei karoNa nipatesi nanjambei kita ala mombasompo dosata. NikabasakaNa kita lako ri pura-pura pokaingguta nadaa, nipegasaNa kita bo nipataniNa kita majadi todeana mboto anu matutu nokainggu nabelo.

¹⁵Jadi, Titus, patudukikamo pura-pura haitu ka topomparasaya i Kristus. Ulika ira mangoseaka pepatuduki haitu, bo ane ledo raoseakara, onteakamo ira. Nee maeya matamu, apa naria mami kuasamu mompatuduki ira. Nee rapalamba tona mompandaente iko.

Titus 3

¹Popatoramo topomparasaya i Yesus ri situ, ira masipato matundu bo mangoseaka parenta nu pomarenta bo totua-totua ngata. Ira kana masadia mantui pura-pura pokarajaa nabelo.

²Ulika ira nee mositunturaka, bo nee mosinjanai. Ira kana moada bo malusu rara nte tona pura-pura.

³Toramo, kita muni bara ipia da nalanda rarata nasimbayu mpo tona ledo nomparasaya i Yesus. Ledo nisanita dala nakana mosisani nte Alatala bo ledo nioseakata parentaNa. Katuvuta bara ipia nikuasai dota nu rarata nadaa bo kasana nu dunia anu ledo nabelo. Kita natuvu narau rara nanggita roa, nasiriati, bo nosipovuu mata nte tona ntanina.

⁴Tapi nau kita nokainggu nadaa bara ipia, Alatala nompotove kita bo nipopakitaNa kabelo raraNa tempo nipakasalamaNa kita lako ri dosata.

⁵Kita nipakasalamaNa, ledo sabana pokaingguta nanao, tapi sabana kaasi mataNa nanggita kita. Alatala nompakasalama kita ante nompakagasa kita bo nombalelaka dosata. Haitu nipoviaNa ante kuasa Nosa Gasa anu nombadekei katuvu nabaru ka kita bo nombabaliki rarata majadi nabelo.

⁶Alatala nantudu i Yesus Kristus, Topompakasalama kita, mompopanau Nosa Gasa ka kita ante kajoi nu raraNa.

⁷PatujuNa, ala kita anu najadi nanao ri panggitaNa lako ri kabelo raraNa, mamala manjarumaka matuvu mabelo sampe ri kasae-saena.

⁸Tesa hitu mpuu-mpuu nakana. Jadi yaku madota ala iko mompakaoto pepatuduki haitu, ala topomparasaya Alatala mompasimbuku mokainggu nabelo. Pepatuduki pangane nabelo bo noguna ka manusia.

⁹Tapi naria muni tona aga nosibali-balika anu ledo ria gunana, bo notesaki sunju muli nu muli ntotua nggaulu anu nikarara mboto. Ira aga nosinjanai bo nosinggarau ka atura-atura agama. Petalilikamo potesa-tesa ivehaitu, apa ledo ntoto naria gunana bo ledo nanggeni belo.

¹⁰Ane maria tona nompoposibali todea topomparasaya, kana musalaraka ia sanggani, bara ronggani. Ane rongganimo ia nisalarakamu bo ledo nepangala, tumo mosimporoa nte ia.

¹¹Nisanimu tona ivehaitu nadaa pekirina bo nadosa. Dosana mboto nompakalanto ia masipato rahuku.

¹²Ane makava i Artemas bara i Tikhikus anu kutudu tou nte iko ri situ ri Kreta ngena, pasimbukumo mosinggava nte yaku ri ngata Nikopolis, apa niaku monturo ri ngata Nikopolis sampe maupu tempo ranindi.

¹³Pasimbukumo mantulungi i Zenas, guru agama, bo i Apolos, ala ira mamala mompapola polipara bo ledo makura nuapa-nuapa.

¹⁴Sampesuvuta sampomparasaya kana masaro movia anu nabelo, ala mamala mombatulungi tona napepa. Nee sampe katuvura ledo maria gunana.

¹⁵Nadea tabe lako nte pura-pura sampesuvuta anu naria nte yaku ri sii. Pakavote tabe kami ka sampesuvuta sampomparasaya ri situ anu nompotove kami. Kuperapi Alatala bate-batena mabelo nte komiu pura-pura. Tabe lako nte yaku, Paulus

Filemon

Filemon 1

¹Filemon, sampesuvu nipotove kami bo roa kami sampokarajaa: Sura hitu lako nte yaku, i Paulus, anu nitarunggu sabana nompatolele kareba i Yesus Kristus, bo lako nte i Timotius sampesuvuta sampomparasaya. Sura hitu nitulisi ka iko,

²bo ka todea topomparasaya anu nasiromu nosambaya ri banuamu, bo ka i Apfia sampesuvuta mombine sampomparasaya, bo i Arkhipus, anu nosangani-nggani nte kami nompasimbuku nokarajaa ka Tupu.

³Kuperapi Tuamata Alatala bo Tuputa Yesus Kristus mombadekei belo ka komiu bo mompakatinonto raramiu.

⁴Nggani-nggani yaku nosambaya ka iko, yaku nosukuru nte Tupuku Alatala

⁵sabana niepeku karoso pomparasayamu i Pue Yesus bo niepeku muni kaoge pepotovemu ka pura-pura todeaNa.

⁶Kita nosangu rara nte topomparasaya ntanina sabana pomparasayata i Yesus. Yaku nosambaya ala posangu raramu nte topomparasaya ntanina, manggeni iko mpuu-mpuu mombapaha mpengaya-ngaya belo naria nte kita anu nosangu rara nte i Kristus.

⁷Sampesuvuku, nadamba mpuu yaku, bo raraku nipakaroso nangepe pepotovemu ka todea nu Alatala. Bo petulungimu mpuu-mpuu nompakasana rarara!

⁸„Jadi, nanggita pepotovemu ka topomparasaya, naria anu kuperapi nte iko.„ Kakanana, namala kuparenta iko movia anu masipato mupovia sabana kuasa nidekei i Kristus ka yaku.

⁹Tapi nantora pepotovemu, aga kuperapi nte iko bo ledo kuparenta. Yaku hii natuamo bo nitarunggu sii-sii sabana nompatolele kareba i Yesus Kristus.

¹⁰Yaku, i Paulus, merapi ala mutarima mabelo i Onesimus, anu nipotoveku mpo anaku mboto. Ia nirekeku mpuu-mpuu anaku, sabana tempo yaku riar

ntarunggu ri sii, yakumo nompatuduki ia nomparasaya i Yesus, nasimbayu mpo totua langgai nompatuduki anana.

¹¹Bara ipia ia ledo noguna ka iko, tapi sii-sii ia mpuu-mpuu noguna, ledo aga ka iko tapi ka yaku muni.

¹²Yaku mpuu-mpuu nompotove i Onesimus, bo sii-sii nituduku ia manjili tou nte iko.

¹³Ane kuoseaka dotaku mboto, kutaamaka ia ri sii nte yaku ala ia manjambei karomu mantulungi yaku anu da nitarunggu ri sii sabana nompatolele Kareba Belo.

¹⁴Tapi ledo kupokono mantaamaka ia ane ledo mupodota. Nipokonokupa iko movia anu nabelo haitu lako ri kavoe raramu mboto, bo ledo aga nipasuu.

¹⁵Niuliku pogaamu nte i Onesimus sampariolo najadi ala ia maria nte iko sampe ri kasae-saena.

¹⁶Jadi sii-sii ia domo aga batuamu, tapi nelabipa pade batua, haitumo, ia sampesuvuta sampomparasaya anu nipotoveta. Iyapa yaku nompotove ia, nemopa iko! Iko nompotove ia sabana ia batuamu, bo muni sabana ia sampesuvumu sampomparasaya.

¹⁷Jadi, ane nirekemu yaku roamu sampomparasaya, kuperapi nte iko, tarima mpanjilimo i Onesimus nasimbayu mpo pantarimamu yaku.

¹⁸Bo ane ia nompakarugi iko bara noinda nte iko, damo yaku mombatangguna.

¹⁹Yaku i Paulus, notulisi tesa hitu ante paleku mboto. Yaku mombabayari indana pura-pura ka iko. Kakanana iko mboto noinda nte yaku sabana lako nte yaku sampe iko nanggava katuvua nabaru.

²⁰Sampesuvuku, kita nomparasaya i Kristus, jadi kuperapi ala iko movia anu noguna ka yaku, haitumo, tarima mpanjilimo i Onesimus ala madamba raraku sabana posampesuvuta sampomparasaya.

²¹Yaku notulisi sura hitu ka iko sabana nisaniku iko movia anu niperapiku hitu. Bo ledo aga haitu, nisaniku iko movia melabipa pade anu niperapiku.

²²Naria vai sangupa kuperapi nte iko, tulungi pakasadia ka yaku ponturo ri banuamu, sabana nisarumakaku posambayamiu pura-pura raepe nu Alatala bo yaku rakabasaka lako ri tarunggu bo mamala mosinggava vai nte iko.

²³Taba lako nte i Epafra, anu nosangani-nggani ante yaku riara ntarunggu sabana nompatolele kareba i Yesus Kristus.

²⁴Tarima muni taba lako nte roaku sampokarajaa, haitumo i Markus, i Aristarkhus, i Demas bo i Lukas.

²⁵Kuperapi komiu pura-pura mombarasai kabelo rara nTuputa Yesus Kristus. Taba lako nte yaku, Paulus

Ibrani

Ibrani 1

¹Tempo nggaulu, nadea ngganimo Alatala nompasimbayu tesaNa ante mpengaya-ngaya cara ka nabi-nabi anu nompapola tesaNa haitu ka totuata nggaulu.

²Tapi ri tempo nggapuri hitu AnaNa mbotomo nompasimbayu tesaNa ka kita. AnaNa haitu nipopale nu Alatala nompajadi dunia, bo Alatala nompakatantu AnaNa haitumo masipato majadi tupuna pura-pura anu naria.

³AnaNa haitu nompopakita kuasa bo kaoge nu Alatala, bo Ia nasimbayu nte Alatala. Iamo nombakuasai bo nompicara mpengaya-ngaya ri dunia ante tesaNa nakuasa. Naupu Ia nombakabasaka manusia lako ri dosa, Ia nonturo ri ponturo magau ri suruga ri panggana nu Alatala toNeliu KaogeNa.

⁴Jadi Ia nipakalanga ntotopa pade malaeka-malaeka nu Alatala, bo nturo nidekei nu Alatala ka Ia naogepa pade nturo nu malaeka-malaeka.

⁵Nalantomo kaoge i Yesus apa ledo ria sanggania Alatala notesa ka malaekaNa ivei: “Ikomo AnaKu, eo hitu Yaku najadi TuamaMu!” (Mazmur 2:7) Bo ledo ria sanggania Alatala nanguli ka malaekaNa ivei: “Yaku majadi TuamaMu, bo Iko majadi AnaKu.” (2 Samuel 7:14) Tapi niuliNa ivehaitu ka AnaNa mboto.

⁶Bo tempo Alatala nombatudu Ana lumbuaNa makava ri dunia hitu, niuliNa muni ivei: “Pura-pura malaeka kana mombasomba AnaKu.” (Mazmur 97:7)

⁷Alatala nombatesa malaeka-malaekaNa ivei: “Yaku nompajadi malaeka-malaekaKu nasimbayu mpo poiri. Ira nasimbayu mpo apu narega.” (Mazmur 104:4)

⁸Tapi niuliNa ka AnaNa ivei: “Ikomo Alatala, bo poparentaMu maroo sampe ri kasae-saena, Iko moparenta todeaMu ante rara nanao.

⁹Iko nompotove pokainggu nanao bo navuu mataMu nanggita pokainggu natenggo. Jadi haitu sampe Yaku, TupuMu Alatala nompelisi Iko, bo nibilaKu Iko bo nipakadambaKu raraMu nelabipa pade roa-roamu.” (Mazmur 45:7-8)

¹⁰Bo Alatala nanguli muni ka AnaNa ivei: “Pue, Iko nompajadi dunia ri ulu jadina, Bo langi muni asele mpaleMu.

¹¹Langi bo tana kana malipo, bo magero mpo baju naranta, Tapi Iko batebatena maria.

¹²Langi bo tana ratikaMu nasimbayu mpo buya. Bo rasambei ante baruna nasimbayu mpo baju narantamo nisambei ante baruna. Tapi Iko ledo ntoto mabali, KatuvuMu ledo ria kaupu-upuna.” (Mazmur 102:26-28)

¹³Bo ledo ria sanggania Alatala nanguli ka malaekana mpo niuliNa ka AnaNa ivei: “Ponturomo ri sabingga ngganaKu sampe Kupopekou pura-pura baliMu nte Iko.” (Mazmur 110:1)

¹⁴Jadi, isema kakanana malaeka-malaeka nTupu? Ira pura-pura topotulungi Alatala anu nisuroNa mantulungi bo manggeniaka tona rapakasalamaNa.

Ibrani 2

¹I Yesus naogepa pade malaeka. Sabana haitu, kita kana manggangisi pakabelobelo pepatuduki niepeta ala kita ledo masalandala lako ri dala nakana.

²Atura nTupu anu nipapola nu malaeka-malaeka ka totuata nggaulu, nakana bo kana raoseaka. Isema-sema nombaliunaka Atura haitu atau ledo nangoseaka Atura haitu, nikavana pehuku nangoseaka poviana.

³„Ane ivesia nte Atura nTupu, nemopa Kareba Belo anu nipatolele i Yesus! Kareba haitu nombatesaki carana kita mamala rapakasalama. Kareba haitu nelabipa kabelona pade Atura nipapola malaeka-malaekana nggaulu. Jadi ane ledo rapeilita kareba haitu, berimbamo kita makabasaka lako ri pehuku? Kareba haitu pamulana nipatolele i Pue Yesus mboto. Tona anu nangepe Ia nompakalanto ka kita, kareba haitu mpuu-mpuu nakana bo namala rasarumakata.

⁴Bo Alatala mboto nompakalanto kareba nipatolelera mpuu-mpuu nakana. Apa nipoviaNa mpengaya-ngaya kabaraka bo tanda nipokumaaka, bo nipaleleNa pompakule lako ri Nosa Gasana nangoseaka dotana mboto.

⁵Ledo malaeka-malaeka nanggava kuasa lako nte Alatala moparenta ri dunia nabaru bara maipia, haitumo dunia nitesata ri sii.

⁶Kuasa haitu nidekei nu Alatala ka manusia. Naria tesa ri Buku Gasa nompakalanto manusia rapakakuasa ivei: “O Pue Alatala, nuapa manusia sampe masipato ratoraMiu? Ira aga manusia, nuapa sabana nipariaraMiu?”

⁷Komiu nomparitambe manusia sampalai lako ri malaeka. Komiu nompakaoge manusia bo nombadekei nturo nibila ka ira.

⁸Bo Komiu nombadekei kuasa ka manusia ala rakuasaira pura-pura anu naria.” (Mazmur 8:5-7) Jadi ane niuli Alatala nombadekei kuasa ka manusia momparenta pura-pura anu naria, batuana, ledo ria sangayaa ledo nidekeiNa rakuasai nu manusia. Sii-sii dopa nikitata manusia nombakuasai pura-pura anu naria.

⁹Tapi nikitata i Yesus nakuasa! Ia niparitambe sampalai lako ri malaeka [nasimbayu mpo manusia] ala Ia rapatesi mombasambe i pura-pura manusia. Haitu nipoviaNa sabana Alatala nompotove kita. Bo sii-sii Alatala nompakaoge Ia bo nidekeiNa ka Ia nturo nibila sabana Ia nombarasai susa bo pari sampe namate.

¹⁰Alatalamo anu nompajadi mpengaya-ngaya bo mpengaya-ngaya haitu nipajadiNa nangoseaka dotaNa mboto. PatujuNa ala madea tona majadi anaNa bo manggava bagia ri kaogeNa. Haitumo sampe masipato nipalambaNa i Yesus nombarasai kasusa bo kapari ala i Yesus majadi Topepakasalama anu ledo nakura nuapa-nuapa, anu nobuka dala ala manusia namala rapakasalama.

¹¹I Yesus nompegasa katuvuta nadosa. Kita anu nipegasaNa bo Ia anu nompegasa kita nosangu Tuama. Haitu sampe i Yesus ledo naeya mataNa nanguli kita sampesuvuNa.

¹²Ia nanguli ka Alatala ivei: “Pue, kana Kupatolele karebaMiu ka sampesuvu-sampesuvuKu. Tempo ira nasiromu metupu, Kutoiya Komiu.” (Mazmur 22:23)

¹³Bo i Yesus nanguli muni ivei: “Yaku manjarumaka Alatala.” Bo sangganipa niuliNa ivei: “Siimo Yaku nosangani-nggani ante ana-ana nidekei nu Alatala ka Yaku.” (Yesaya 8:17-18)

¹⁴Kita anu niuli i Yesus ana-ana, aga manusia biasa anu mamate. Jadi haitu sampe i Yesus muni najadi manusia bo nombarasai pura-pura anu nirasaita. Ia najadi manusia ala Ia mamala mamate mompakaropu kuasa Magau nu Seta anu nombakuasai kamatea.

¹⁵Ante nompakaropu kuasa Magau nu Seta, nikabasakaNa tona anu natuvu mpo batua kasae nggatuvura ri dunia hitu sabana naeka ka kamate.

¹⁶Natantumo ledo malaeka nitulungiNa, aga kita muli i Abraham.

¹⁷Haitu sampe Ia kana najadi nasimbayu ntoto ante kita sampesuvu-sampesuvuNa. Ane Ia nasimbayu ntoto nte kita, Ia namala majadi Pakeni nTopanggeni Pesomba anu naasi mataNa nanggita todeaNa bo natutu nombatui pokarajaa nidekei nu Alatala ka Ia, sampe dosa manusia namala nisompo.

¹⁸I Yesus mboto nombarasai kasusa bo kapari tempo nipesori, jadi Ia nompakule nombatulungi tona nipesori.

Ibrani 3

¹Jadi, sampesuvu-sampesuvuku anu nipelisi nu Alatala bo nipokioNa matuvu mabelo ri suruga. Pekirimo pakabelo-belo i Yesus hitu. Ia nisuro nu Alatala najadi Pakeni nTopanggeni Pesomba ri agama nioseakata.

²Ia natutu novia anu nipakatantu nu Alatala ka Ia nasimbayu mpo Nabi Musa natutu nokarajaa nantulungi todea nu Alatala, anu nirapaka banua nu Alatala.

³Topombangu banua nireke naogepa pade banua nibanguna. Ivesia muni i Yesus masipato manggava pebila naogepa pade Nabi Musa.

⁴Pura-pura banua, naria topoviana. Tapi topovia mpengaya-ngaya Iamo Alatala.

⁵Ane Nabi Musa, ia natutu nokarajaa ka Alatala nantulungi todeaNa, nasimbayu mpo potudua nombatulungi riara banua nu puana. Pura-pura anu nipovia i Musa nogambara anu rapopaisani nu Alatala ri tempo makava.

⁶Tapi i Kristus ledo aga potudua, Ia Ana nu Alatala mami anu natutu nompasiayu pura-pura todea nTuamaNa. Bo kitamo nireke todea nu Alatala asaa kita naroo nomparasaya bo ledo nolengga-lengga nanjarumaka i Yesus ante damba rara sampe ri kaupuna.

⁷Jadi, epemo tesa lako ri Nosa Gasa nu Alatala nanguli ivei: “Ane raepemiu suara nu Alatala eo hitu,

⁸⁻⁹nee rapakakaamiu bagamiu mpo totuamiu nggaulu nesapuaka ri karava bai. Alatala nanguli: ‘Patapulu mpae kasaena nikitara kabaraka-kabaraka nipoviaKu. Tapi naupa ivesia, ira nasaro nompesori Yaku bo nombaopa rau raraKu.

¹⁰Haitu sampe narau mpuu raraKu nanggita ira bo niuliKu, ira nasaromo nasalandala, bo ledo nipokonora nangoseaka parentaKu.

¹¹Nagigi mpuu raraKu sampe Yaku nosumpa ivei: Ira ledo ntoto mamala mesua ri ngata Kudekeika ira bo ledo mamala ira menonto mosanggani-nggani ante Yaku.’ ” (Mazmur 95:7-11)

¹²Jadi sampesuvu-sampesuvuku, komiu kana mainga ala nee maria komiu majadi madaa bo ledo momparasaya sampe motubengosi Alatala anu natuvu sampe ri kasae-saena!

¹³Tapi eo-eo komiu kana mosipakaroso rara ala ledo maria komiu rabagiu nu dosa sampe bagamiu majadi makaa. Posipakaroso raramiu ane komiu da natuvu ri tempo niuli ri Buku Gasa “eo hitu”, batuana, kamba da naria loga.

¹⁴Apa kita manggava bagia lako ri pura-pura anu naria nte i Kristus asaa anu niparasayata lako ri pamulana bate-batena raparasayata sampe ri kaupuna bo ledo molengga-lengga.

¹⁵Hitumo patuju ntesa niuli ri bavona ivei: “Ane raepemiu suara nu Alatala eo hitu, nee rapakakaamiu bagamiu mpo totuamiu nggaulu anu nesapuaka.” (Mazmur 95:7-8)

¹⁶Jadi, isema nangepe suara nu Alatala bo nesapuaka? Tantu pura-pura ira anu nikeni Nabi Musa nesuvu lako ri tana Mesir.

¹⁷Bo isema niporau rara nu Alatala patapulu mpae kasaena? Natantumo ira haitu muni anu novia dosa ri karava bai sampe namate hamai.

¹⁸Alatala nojanji ivei: “Ira ledo ntoto mamala menonto mosanggani-nggani ante Yaku!” Isema nipatuju nu Alatala? Natantumo ira anu ledo natundu nte Ia.

¹⁹Jadi, nalantomo ka kita ira ledo namala nenonto nosanggani-nggani nte Alatala sabana ira ledo nomparasaya.

Ibrani 4

¹Sampesuvu-sampesuvu, da naria pojanji nu Alatala nombadekei loga ka kita menonto mosanggani-nggani ante Ia. Haitu sampe kita kana mainga ala nee maria saitoa kita maboli.

²Apa kita muni nangepe Kareba Belo nu Alatala nasimbayu mpo totuata nggaulu. Tapi kareba niepe ntotuata ledo ria gunana ka ira, sabana aga niepera bayangi, ledo niparasayara kareba haitu.

³Kita anu nomparasaya mamala menonto mosanggani-nggani ante Alatala, tapi ira ledo. Apa nikitata tesa nu Alatala ri bavona: “Nagigi mpuu raraKu sampe Yaku nosumpa ivei: Ledo ntoto Kudekei ira menonto mosanggani-nggani ante Yaku.” (Mazmur 95:11) Ira ledo mombarasai kabelo penonto nu Alatala naupa penonto haitu nasadio lako ri lamba pamulana tempo Alatala naupu nompajadi dunia bo pura-pura isina.

⁴Nalantomo penonto haitu nasadia lako ri pamulana, sabana naria tesa ri Buku Gasa nanguli eo kapapituna ivei: “Ri eo kapapituna Alatala nenontomo lako ri pura-pura bagoNa.” (Kajadia 2:2)

⁵Ri tesa nu Alatala niepeta pangane, “Ledo ntoto Kudekei ira mesua ri ngata haitu bo menonto mosanggani-nggani ante Yaku.”

⁶Jadi tona pamulana anu nangepe kareba nabelo haitu ledo nirasaira kabelo penonto nu Alatala, sabana ira ledo nomparasaya. Tapi patuju nu Alatala, kana maria tona menonto mosanggani-nggani ante Ia.

⁷Jadi haitu sampe Alatala nompakatantu loga ntanina anu niuliNa “eo hitu” ala manusia radekei loga menonto mosanggani-nggani ante Ia. Noatu-atu mpae naliu i Musa, pade Magau Daud notulisi tesa nu Alatala nitulisiku ri bavona ivei: “Ane raepemiu suara nu Alatala eo hitu, nee rapakakaamiu bagamiu.” (Mazmur 95:7-8)

⁸Tempo nokolu i Yosua nanggeni toIsrael nesua ri tana Kanaan anu nijanji nu Alatala ka ira. Tapi haitu ledo nireke “nenonto nosanggani-nggani ante Alatala”, sabana ri puri pade nitesa nu Alatala loga ntanina menonto mosanggani-nggani ante Ia.

⁹Jadi da nariapa loga ka kita todea nu Alatala menonto mosanggani-nggani ante Ia nasimbayu mpo penontoNa ri eo kapapituna.

¹⁰Nalantomo haitu, apa isema-sema menonto mosanggani-nggani ante Alatala menontomo lako ri pokarajaana nasimbayu mpo Alatala muni nenonto lako ri pura-pura pokarajaaNa bara ipia.

¹¹Sabana haitu, kita kana mompasimbuku ante rarata mpuu-mpuu ala kita mamala menonto mosanggani-nggani ante Alatala. Nee sampe maria tona ledo radekei mombarasai kabelo haitu sabana ledo nomparasaya, evamo najadi nte toIsrael nggaulu.

¹²Tesa nu Alatala tesa natuvu bo nakuasa. Tesa haitu natadapa pade guma nomata ntimali apa Tesa haitu namala mantosu sampe ri pantaa nyawa bo rara ntai manusia, nasimbayu mpo guma nantosu sampe ri posidumpa nu buku bo unto nu buku. Tesa haitu namala nombabuka bo nomparesa pekiri bo patuju rara ntai manusia.

¹³Nau aga sangaya anu nipajadi nu Alatala, ledo ria sangua ledo nikitaNa. Pura-pura nalanto nikitaNa. Bo kita kana mompangaku pura-pura pokaingguta ka la bara maipia.

¹⁴Jadi nariamo Pakeni nTopanggeni Pesomba anu naoge mpuu, Iamo i Yesus, Ana nu Alatala. Ia noliu ri langi bo nesua ri suruga ri ngayo nu Alatala ala mantulungi kita. Jadi kita kana maroo momparasaya bo nee menonto mangaku i Yesusmo Tuputa.

¹⁵Ia Pakeni nTopanggeni Pesomba anu nangisani kalenteta, sabana Ia mboto nombarasai mpengaya pesori nasimbayu mpo kita, tapi Ia ledo novia dosa.

¹⁶Sabana haitu, nee maeka. Kita kana mabia mosinggava nte Alatala riaru posambayata apa Alatala nabelo raraNa bo nipotoveNa kita. Ane kita mekitulungi nte Ia, kita rapoasiNa bo ratulungiNa ri tempo niparaluuta.

Ibrani 5

¹Pura-pura Pakeni nTopanggeni Pesomba nipelisi lako nte todea bo nianggataka manjambei todea mantingayo Alatala. Pokarajaara haitu, manggeni pedekei-pedekei ka Alatala bo pesomba-pesomba anu majadi posompo dosa.

²Pakeni-pakeni nTopanggeni Pesomba aga manusia muni bo nadea kalentera. Haitumo sabana nalusu rarara nantulungi tona nadoyo bo nasalandala.

³Jadi ane nikenira pesomba ka Alatala mombasompo dosa ntodea, kana rakenira muni posompo ka dosara mboto.

⁴Ledo ria saitoa tona nanganggataka karonu mboto majadi Pakeni nTopanggeni Pesomba, tapi ia nipelisi bo nianggataka nu Alatala, nasimbayu mpo i Harun nggaulu nipelisi bo nianggataka nu Alatala majadi Pakeni nTopanggeni Pesomba ka toYahudi.

⁵Ivesia muni i Kristus. Ledo nianggatakaNa mboto karoNa majadi Pakeni nTopanggeni Pesomba anu nibila. Tapi Ia nipelisi bo nianggataka nu Alatala. Alatala nanguli ivei: “Ikomo AnaKu, apa eo hitu Yaku najadi TuamaMu.” (Mazmur 2:7)

⁶Bo niuliNa muni ri bagia ntanina ivei: “Iko Topanggeni Pesomba sampe ri kasae-saena, nasimbayu mpo i Melkisedek.” (Mazmur 110:4)

⁷Tempo i Yesus da naria ri dunia Ia nosambaya ante buku rara bo nekakai nerapi tulungi nte Alatala anu nompakule mompakasalama Ia lako ri kamateNa. Bo posambayaNa niepe nu Alatala sabana Ia batena nekou nte Alatala bo ledo nangoseaka dotaNa mboto.

⁸Naupa i Yesus Ana nu Alatala, Ia kana nombarasai kasusa bo kapari ala rasaniNa mpuu-mpuu batuana matundu nte Alatala.

⁹Naganapa pura-pura haitu nirasaiNa, Ia najadi puna katuvua nabelo sampe ri kasae-saena ka pura-pura tona matundu nte Ia.

¹⁰Bo Ia nianggataka nu Alatala najadi Pakeni nTopanggeni Pesomba nasimbayu mpo i Melkisedek, Pakeni nTopanggeni Pesomba nggaulu.

¹¹Da nadeapa mbeki kuuli mombatesa i Yesus bo i Melkisedek ka komiu, tapi nakaja ratentei ka komiu sabana nakumba mpuu pompahamiau meguru pepatuduki nakana.

¹²Kakanana temponamo komiu majadi guru mompatuduki tona ntanina, sabana nasaemo komiu nomparasaya i Yesus. Tapi komiu da noparaluu guru mompatuduki ka komiu pepatuduki pamulana lako ri Tesa nu Alatala, komiu dopa nasadia nantarima pepatuduki kapolana. Komiu nasimbayu mpo ngana kodi da netomi, anu dopa nasadia mangande kande naka!

¹³Isema-sema da netomi, batuana da nangana. Dopa nisanina mompoposisala anu nakana bo anu nasala.

¹⁴Tapi kande naka aga nikande ntona nambasomo, haitumo tona nipakabiasamo karonna mompoposisala anu nabelo bo anu nadaa.

Ibrani 6

¹Jadi sampesuvu-sampesuvu, nee kita aga mompekirika pepatuduki agama Kristen pamulana. Tapi aginamo kita meguru pepatuduki kapolana. Nee aga

mombasili pepatuduki pamulana, evamo majea lako ri pokainggu nadaa anu ledo ria gunana, bo pepatuduki momparasaya Alatala.

²Nee aga mombasili pepatuduki ada pediu, atau ada mombadika pale ri balengga ntona merapi belo ka ira. Nee aga mombasili pepatuduki matuvu mpanjili lako ri kamatea bara maipia atau pepatuduki pehuku sampe ri kasae-saena. «Nee aga mombasili-sili pepatuduki pamulana haitu, kana ratambaipa!»

³Kamaimo, kita meguru pepatuduki kapolana. Bo ane i Pue mompaloga, haitumo rapoviata!

⁴Sampesuvu-sampesuvu, toramo! Ledo ria dala manggeni tona majea mpanjili ane ratunggaira mombakabasaka pomparasayara. Apa bara ipia ira natuvu riara reme nu Alatala. Nitarimaramo belo lako ri suruga, bo nitarimara munimo Nosa Gasa nu Alatala.

⁵Nirasairamo Tesa nu Alatala nabelo bo nirasairamo kuasa lako ri dunia baru nu Alatala.

⁶Tapi ane rakabasakara pomparasayara naupa pura-pura haitu nirasaira, ledo ria dala manggeni ira majea mpanjili lako ri dosara. Apa ane ivesia rapoviara, nasimbayu mpo nipakura mpanjili i Pue Yesus ri kayu salib, bo nanjalai Ia ri ngayo ntodea.

⁷Tana nadea nggani nambela uda bo nombadekei asele noguna ka topokarajaana, tana haitu rapoporasi nu Alatala.

⁸Tapi ane tana haitu aga mompakatuvu jono bo karui, ledo ntoto ria gunana. Tana haitu domo masae rapindasi nu Alatala. Bo kaupuna tana haitu rapalabu pakaupu.

⁹Sampesuvu-sampesuvu nipotoveku, naupa ivesia tesaku, niparasaya kamimo komiu ledo mpo tana rapindasi haitu. Niparasaya kami naria asele nabelopa nte komiu, haitumo pomparasayamiu bo pokainggumiu masipato ka tona nipakasalama.

¹⁰Alatala ledo natenggo raraNa, Ia ledo malinga raraNa ante poviamiu bo pepotovemiu. Nipopakitamiu tovemiu ka Ia tempo komiu nombatulungi

sampesuvumi sampomparasaya, nompamula lako ri nggauluname sampe sii-sii.

¹¹Dota kami, ala komiu pura-pura mompasimbuku mokainggu ivehaitu sampe ri kaupuna ala komiu mpuu-mpuu manggava pura-pura anu nisarumakamiu lako nte Alatala.

¹²Nee sampe komiu majadi masanda, tapi pasialamo jonjo ntona anu nomparasaya Alatala bo nosabara nompopea sampe nikavara anu nijanjiNa ka ira.

¹³Tempo Alatala nombadekei pojanji ka i Abraham, Ia nompakaroso pojanjiNa haitu bo nosumpa nte SangaNa mboto, sabana ledo ria tona ntanina nalangapa pade Ia.

¹⁴NiuliNa, “Yaku nojanji, mpuu-mpuu Kudekei belo ka iko, bo Kupakadea mulimu.”

¹⁵I Abraham nosabara nompopea, jadi nitarimanamo anu nijanji nu Alatala ka ia.

¹⁶Ane kita manusia nojanji, kita nosumpa nte sanga naogepa pade karota mboto, bo haitu nompakaroso tesata ala raparasaya ntona, bo domo maria posisanai.

¹⁷Ivesia muni ante Alatala. Ia nadota nompopakita pojanjiNa ledo ntoto mabali. Ia nadota nompopakitana ka tona masipato mantarima anu nijanjiNa. Jadi Ia nosumpa ala nompakaroso pojanjiNa.

¹⁸Pojanji bo posumpaNa haitu ledo mabali. Alatala ledo ntoto nodava. PatujuNa nojanji ivesia ala kita anu nekisaliku nte Ia maroso rarata sampe kita maroo manjarumaka anu nijanjiNa haitu.

¹⁹Ane mantamo talonto sakaya, natantumo sakaya haitu ledo maave. Ivesia muni kita: ane maroso panjarumakata ledo masalandala kita. Ledo mabali panjarumakata sabana anu nisarumakata haitumo i Pue Yesus. Ia naria ri Tombi Nelabi Kagasana ri suruga, bo

²⁰Ia nokolu nesua hamai mompakasadia dala ka kita. Ia nianggataka najadi Pakeni nTopanggeni Pesomba sampe ri kasae-saena, nasimbayu mpo i Melkisedek.

Ibrani 7

¹I Melkisedek haitu magau ngata Salem bo topanggeni pesomba ka Alatala anu Nelabi KaogeNa. Tempo i Abraham nanjili lako nombadagi magau-magau ri tana Kanaan, i Melkisedek hau nosinggava nte i Abraham bo nerapi Alatala mombadekei belo ka ia.

²Naupu haitu i Abraham nombabagi pura-pura mbara-mbara nialasina lako ri magau-magau, bo nidekeina sabagia lako ri sapulu bagia ka i Melkisedek. Sanga i Melkisedek haitu, batuana “Magau Nanao,” bo ia muni Magau ngata Salem anu naria batuana “Magau Topanggeni Posinggabelo.”

³I Melkisedek ledo notina, ledo notuama, ledo nisani totuana. Katuvuna ledo ria pamulana bo ledo muni naria kaupuna. Ia nasimbayu mpo Ana nu Alatala, bo ia bate-batena topanggeni pesomba sampe ri kasae-saena.

⁴Jadi pekirimo kaoge i Melkisedek hitu! I Abraham, tuama ntotuata nggaulu, nombadekei ka ia sabagia lako ri sapulu bagia pura-pura mbara-mbara tobelona nialasina lako ri magau-magau anu nidagina.

⁵Nangoseaka Atura-atura agama Yahudi, tona lako ri valaa i Lewi anu najadi topanggeni pesomba masipato radekeika sabagia lako ri sapulu bagia lako ri panggava ntodea toIsrael. Nangoseaka Atura-atura agama, aga topanggeni pesomba masipato mangala haitu lako nte sampesuvura toIsrael naupa ira pura-pura muli i Abraham.

⁶Tapi i Melkisedek, naupa ia ledo lako ri valaa i Lewi, nidekeika sabagia lako ri sapulu bagia lako ri pura-pura mbara-mbara niago i Abraham lako ri magau-magau haitu, bo ia nerapi Alatala mombadekei belo ka i Abraham anu nidekeika pojanji nu Alatala.

⁷Nisanita pura-pura tona niperapika belo naedepa pade tona anu nerapi belo ka ia. Jadi i Melkisedek naogepa pade i Abraham.

⁸Ivesia muni i Melkisedek naogepa pade topanggeni pesomba lako ri valaa i Lewi. Ane topanggeni-topanggeni pesomba haitu anu nibagika sabagia lako ri sapulu bagia, ira manusia biasa anu namate. Tapi nangoseaka Buku Gasa, i Melkisedek anu nibagika i Abraham sabagia lako ri sapulu bagia, ledo namate tapi batena natuvu.

⁹I Lewi totua nu pura-pura topanggeni pesomba anu masipato radekeika sabagia lako ri sapulu bagia lako ri todea toYahudi. Tapi naupa i Lewi dopa nipoanaka tempo i Abraham nombadekei sabagia lako ri sapulu bagia ka i Melkisedek, namala rauli i Lewi mboto nombadekei sabagia lako ri sapulu bagia tempo haitu.

¹⁰Sabana, ia nariumo riaro karo ntotuaana i Abraham tempo i Melkisedek nosinggava nte i Abraham.

¹¹Tempo Alatala nombadekei Atura-atura agama ka toIsrael, nianggatakaNa tona lako ri valaa i Lewi majadi topanggeni pesomba anu momparenta todea mangoseaka Atura haitu. Tapi pokarajaa ntopanggeni pesomba haitu ledo nompakule mompakanoa manusia ri panggita nu Alatala. Jadi haitumo sampe paraluu raanggataka tona ntanina majadi topanggeni pesomba. Topanggeni pesomba haitu nasimbayu mpo i Melkisedek, bo domo mpo i Harun muli i Lewi anu najadi topanggeni pesomba ntoIsrael pamulana.

¹²Jadi ane topanggeni pesomba lako ri valaa i Lewi rasambe, natantumo atura-atura nikeniakara kana rasambe muni.

¹³⁻¹⁴Topanggeni pesomba nitesa pangane Iamo Tuputa Yesus. Nisanita Ia lako ri valaa i Yehuda, ledo lako ri valaa i Lewi. Bo ledo ria muli i Yehuda anu najadi topanggeni pesomba. Ledo ria sanggania i Musa nanguli tona lako ri valaa i Yehuda majadi topanggeni pesomba.

¹⁵Nalantomo topanggeni pesomba lako ri valaa i Lewi bo Atura-atura agama nisambeimo, sabana sii-sii nariumo ntanina topanggeni pesomba anu nasimbayu mpo i Melkisedek.

¹⁶Ia najadi topanggeni pesomba ledo nangoseaka atura-atura nggaulu anu nompakatantu muli isema masipato majadi topanggeni pesomba. Tapi Ia najadi topanggeni pesomba sabana Ia nakuasa bo katuvuNa ledo ria kaupu-upuna.

¹⁷Apa riara Buku Gasa naria tesa nanguli ivei: “Iko topanggeni pesomba sampe ri kasae-saena nasimbayu mpo i Melkisedek.” (Mazmur 110:4)

¹⁸Jadi sii-sii Atura-atura agama nokolu nisambe nu Alatala sabana ledo ria kuasana bo ledo ria gunana.

¹⁹Batuana, Atura-atura agama ledo ntoto nompakule manggeni tona majadi manoa ri panggita nu Alatala. Tapi sii-sii naria sangaya dala nabelopa nipopaisani ka kita. Ane raoseakata dala hitu kita mamala mosisani belo nte Alatala.

²⁰Nisanita i Yesus naogepa pade topanggeni pesomba lako ri valaa i Lewi sabana Alatala mboto nosumpa tempo i Yesus najadi topanggeni pesomba. Alatala ledo nosumpa tempo muli i Lewi nianggataka najadi topanggeni pesomba.

²¹Tapi tempo i Yesus nianggatakaNa, Ia nosumpa. NiuliNa ka i Yesus ivei: “Yaku nosumpa bo ledo ntoto mabali pekiriKu, Iko topanggeni pesomba sampe ri kasae-saena.” (Mazmur 110:4)

²²Lako ri posumpa haitu, nalantomo pojanji nu Alatala nabaru nabelopa pade pojanji njae. Apa i Yesusmo namala nompakatantu pojanji haitu mpuu-mpuu madupa.

²³Bo naria sangayapa sabana i Yesus naogepa pade topanggeni pesomba lako ri valaa i Lewi. Tona lako ri valaa i Lewi anu najadi topanggeni pesomba kana madea, sabana ira kana mamate pura sampe ledo rapakulera mompapola pokarajaara.

²⁴Tapi i Yesus batena natuvu. Haitu sampe Ia batena nokarajaa mpo topanggeni pesomba. PokarajaanNa ledo nolinja nte tona ntanina.

²⁵Jadi haitumo sampe Ia nompakule nompakasalama sampe ri kasae-saena tona nikenina natundu nte Alatala. Apa i Yesus batena natuvu nombasaliku ira ri ngayo nu Alatala.

²⁶Jadi i Yesusmo Pakeni nTopanggeni Pesomba anu nompakule nombatulungi kita. Ia nagasa, ledo ntoto ria salaNa atau dosaNa. Ia nitaniaka lako ri tona nadosa, bo Ia nioretaka sampe ri ponturo nalangapa pade pura-pura anu naria ri langi, haitumo ri suruga.

²⁷Ia ledo nasimbayu ante Pakeni nTopanggeni Pesomba ntanina. Eo-eo nikenira ntani ruru pesomba posompo ka dosara mboto, pade namala nikenira pesomba posompo ka dosa ntodea. Tapi i Yesus nanggeni pesomba aga sanggani tempo nidekeiNa karoNa mboto rapatesi mantolo dosa manusia. Pesomba haitu ledo paraluu rasili sampe ri kasae-saena.

²⁸Nangoseaka Atura-atura agama Yahudi, tona nalente bo nadosa nianggataka najadi Pakeni nTopanggeni Pesomba, apa ira aga manusia biasa. Tapi naliu Atura-atura haitu, Alatala nojanji ante sumpa, bo nangoseaka pojanji haitu, nianggatakaNa AnaNa mboto majadi Pakeni nTopanggeni Pesomba. Bo AnaNa haitu nipajadi Topetolo anu ledo nakura nuapa-nuapa sampe ri kasae-saena.

Ibrani 8

¹Patuju ntesaku pangane ivei: Naria mamimo Pakeni nTopanggeni Pesomba ivehaitu nte kita. Ia nonturo ri suruga ri panggana nu Alatala anu Neliu KaogeNa.

²Ia nantui pokarajaa mpo Pakeni nTopanggeni Pesomba ri Tombi Nelabi Kagasana, haitumo ri Tenda nTupu mpuuna ri suruga, anu nipovia nu Alatala ledo povia nu manusia.

³Pura-pura Pakeni nTopanggeni Pesomba nianggataka ala manggeni pedekei bo pesomba ka Alatala. Jadi i Yesus muni paraluu maria pesomba rakeniNa ka Alatala.

⁴Ane rapana Ia ri dunia hitu, Ia ledo ntoto majadi topanggeni pesomba, sabana nariumo topanggeni pesomba anu nanggeni pesomba ka Alatala nangoseaka Atura-atura agama Yahudi.

⁵Pokarajaa nipoviara kakanana aga gambara bo vayo lako ri anu naria ri suruga. Haitu sampe tempo Nabi Musa nggaulu nasadia novia Tenda nTupu ri karava bai, Alatala nompopatora ka ia ivei: “Toramo! Pura-pura haitu kana mupovia mangoseaka jonjo nipopakitaKu ka iko ri bavo nu bulu.”

⁶Tapi i Yesus nanggava pokarajaa nanggeni pesomba anu nabelopa pade pokarajaa ntopanggeni pesomba ri dunia hitu anu nangoseaka Atura-atura agama nggaulu. Bo ivesia muni pojanji nabaru anu nipasiayuNa ri olo nu Alatala bo manusia nelabipa kabelona pade pojanji nokolu, sabana pojanji nabaru nipovia nangoseaka janji-janji tobelona.

⁷Ane rapana pojanji pamulana haitu ledo nakura, natantu ledo paraluu rasambei ante pojanji ntanina anu nabelopa.

⁸Alatala mboto nanggita kakura ntodea toYahudi sampe niuliNa ivei: “Pariaramo! Kana makava tempona bara maipia Yaku movia pojanji nabaru ante toIsrael bo valaa i Yehuda.

⁹Pojanji haitu ledo masimbayu mpo pojanji nipoviaKu nokolu ante totuara nggaulu tempo Yaku nanggeni ira nesuvu lako ri tana Mesir. Ira ledo naroo nangoseaka pojanji haitu. Jadi haitu sampe domo nipeiliKu ira.

¹⁰Tapi iveimo pojanji Kupovia ante toIsrael ri tempo makava: Kuboli atura-aturaKu riara pekirira, bo Kutulisi atura-atura haitu riara ntaira. Yaku majadi Alatala nisombara bo ira majadi todeaKu.

¹¹Bo ira domo paraluu mompatuduki roa-roa bo sampesuvu-sampesuvura mosisani ante Alatala, sabana ira pura-pura, nau totua, nau ngana, mosisani ante Yaku.

¹²Yaku mombaampungi salara, bo dosa-dosara domo Kutora.” (Yeremia 31:31-34)

¹³Ri tesaNa pangane, Alatala nombatesa pojanji nabaru, jadi nipakalantoNa pojanji nokolu natuamo bo domo rapake. Anu domo nipake bo natuamo natantu domo masae malipomo.

Ibrani 9

¹Riara pojanji nu Alatala nokolu haitu naria atura-atura anu nompakatantu cara metupu nte Alatala, bo naria muni tenda petupu nipovia nu manusia.

²Sangu tenda nipataka, riarana naria rontombi. Ri tombi koluna naria kada mpoindo bo meja ante roti nipesomba ka Alatala. Tombi haitu niuli Tombi Nagasa.

³Bo ri bengo kae povombo anu nipotombi, naria tombi niuli Tombi Nelabi Kagasana.

⁴Ri tombi haitu naria meja potunju dupa nipovia lako ri bulava bo naria muni Peti Pojanji anu nilapisi bulava. Riara Peti haitu naria kura bulava pomboli roti manna bo toko polipa i Harun anu nosepi bo natuvu bara ipia. Naria muni rompeka vatu noisi Sapulu Parenta nu Alatala.

⁵Bo ri bavo nu Peti Pojanji haitu naria randua anu nipovia nolenje mpo malaeka anu niuli Kerub. Kerub haitu tandana karia nu Alatala ri sia. Kapira nantaungo potutui nu Peti haitu anu niuli ponturo pantolo dosa. Tapi haitu pura-pura ledo paraluu ratentei pakalanto ri sii.

⁶Iveimo cara pompakasiayu tombi riara Tenda nTupu: eo-eo topanggeni pesomba nesua ri tombi koluna mantui bagora.

⁷Tapi aga Pakeni nTopanggeni Pesomba saitona nidekei mesua ri tombi karontombina anu niuli Tombi Nelabi Kagasana, bo haitu aga sanggani sampae. Tempo ia mesua kana rakenina raa rapesombana mombasompo dosana mboto bo dosa ntoidea anu ledo nitunggaira.

⁸Lako ri atura haitu Nosa Gasa nu Alatala nompopaisani ka kita ivei: ane da naria Tenda pamulana haitu, batuana dopa nibuka dala mesua sampe ri ngayo nu Alatala ri Tombi Nelabi Kagasana.

⁹Haitu muni naria batuana ka kita sii-sii, haitumo pedekei-pedekei bo pesomba-pesomba nipesomba ntona nangoseaka atura-atura pojanji nokolu, ledo nakuasa mompakagasa rara ntai ntopesomba ri panggita nu Alatala.

¹⁰Atura-atura haitu aga nosinggambela ante kande, panginu bo mpengaya ada pediu. Atura-atura haitu aga nosinggambela ante karota, ledo nosinggambela ante rara ntaita, bo atura-atura haitu aga nipake sampe makava tempona Alatala movia pojanji nabaru.

¹¹⁻¹²Tapi i Kristus nakava mpo Pakeni nTopanggeni Pesomba anu nanggeni kabelona nirasaita mamimo. Ia noliu riara Tenda nTupu anu nelabi kaogena bo nelabi kabelona pade Tenda nTupu ri dunia hitu, bo nesua ri Tombi Nelabi Kagasana ri suruga. Tenda nTupu ri suruga haitu ledo nipovia mpale manusia, batuana, ledo nopuna lako ri dunia hitu. Tempo i Kristus nesua ri Tenda haitu aga sanggani sampe ri kasae-saena. Ia ledo nanggeni raa ntovau lakina atau raa ana japi rapesombaNa, tapi raaNa mboto nikenina. Ivesiamo Ia nombakabasaka kita lako ri dosata sampe ri kasae-saena.

¹³Nangoseaka pojanji nokolu, raa lako ri tovau bo japi lakina bo avu lako ri ana japi anu nipalabu rapesomba ka Alatala nikamburoroi ka tona naruto ala ira majadi magasa. Jadi iyapa raa bo avu haitu mamala mompakagasa karo ntona naruto,

¹⁴nemopa raa i Kristus anu nelabipa kabisana! I Kristus nombadekei karoNa mboto ka Alatala najadi pesomba anu ledo ria kakurana. Haitu nipoviaNa ante petulungi Nosa Gasa, anu naria sampe ri kasae-saena. Raa i Kristus mompakagasa rara ntaita lako ri pokaingguta ledo ria gunana ala kita mamala metupu nte Alatala anu natuvu sampe ri kasae-saena.

¹⁵Haitu sampe i Kristus najadi topetariolo anu mompasiayu pojanji nu Alatala nabaru ala tona nipelisi nu Alatala mamala mantarima belo nijanjiNa sampe ri kasae-saena. Apa i Kristus namate nombatolosi dosa nipovia tempo pojanji nokolu da nipake.

¹⁶Ane maria sura pojanji pobagi kakalumana, natantumomo kakalumana dopa namala rabagi ane topovia sura dopa namate.

¹⁷Sabana isi sura haitu dopa mamala raoseaka ane da natuvu topovia sura. Ane namatemo topoviana, pade namalamo rapake.

¹⁸Ivesia muni pojanji nu Alatala pamulana: ane dopa nipatiti raa binata nisambale, dopa namala rapake.

¹⁹Pamulana, i Musa nompopaisani ka todea toYahudi pura-pura parenta anu naria riaru Atura-atura nu Alatala. Naupu haitu nialana raa ana japi bo tovau lakina nisambale bo nigalona ante uve. Naupu haitu nialana sepi-sepi nu kavoko hisop anu nipou ante lui bulu bimba nalei. Nitomena ri raa bo nivembasikana Buku Parenta-Parenta bo todea.

²⁰Niulikana ira, “Hitumo raa mompakaasa pojanji nipakatantu nu Alatala ka komiu.”

²¹Bo ivesia muni i Musa nombavembasi raa ri Tenda nTupu bo pura-pura gana rapake metupu nte Alatala ala majadi magasa.

²²Kakanana, nangoseaka Atura-atura agama Yahudi sakidepa pura-pura anu naria nipakagasa ante raa. Bo ane ledo ria katiti nu raa, dosa ledo namala raampungu.

²³Jadi Tenda nTupu bo pura-pura ganana anu nogambarai anu naria ri suruga, kana nipakagasa ivesia. Tapi anu naria ri suruga, paraluu rapakagasa ante pesomba anu nelabipa kabelona.

²⁴Sabana, i Kristus ledo nesua ri tenda petupu ri dunia anu nipovia mpale manusia, anu nogambarai Tenda nTupu mpuuna ri suruga. Tapi Ia nesua ri suruga bo hamai Ia batena mantingayo Alatala ala mantulungi kita.

²⁵Mpae-mpae Pakeni nTopanggeni Pesomba Yahudi nesua ri Tombi anu Nelabi Kagasana nanggeni raa lako ri sangu binata, ledo raana mboto. Tapi i Kristus aga sanggani nombadekei karoNa mboto najadi pesomba.

²⁶Apa ane rapana mpengganinggani Ia mesua, batuana mpengganinggani muni Ia kana mombarasai kasusa bo kapari nompamula lako ri lamba pamulana. Tapi kakanana, ri tempo sii-sii anu napara kaupu dunia Ia nakava aga sanggani nompakalali dosata ante nombadekei karoNa mboto nipatesi.

²⁷Alatala nompakatantu manusia mamate aga sanggani, bo maupu haitu ratangara.

²⁸Jadi ivesia muni i Kristus namate aga sanggani majadi pesomba pompakalali dosa ntodea. Naupu haitu Ia makava sangganipa, ledo mompakalali dosa, tapi mompakasalama tona nalentora nompoepa kakavaNa.

Ibrani 10

¹Atura-atura agama Yahudi aga gambara. Riara Atura-atura haitu dopa nisanita mpuu kabelo rakavata lako nte i Kristus. Aga vayona nikitata, ledo lenjena mpuu. Mpaep-mpaep tona nakava nanggeni pesomba nasimbayu rapesomba ka Alatala, nangoseaka Atura-atura haitu. Tapi pesomba-pesomba haitu ledo ntoto nompakule manggeni tona majadi nanao ri panggita nu Alatala.

²Ane rapana dosa ntona anu nanggeni pesomba haitu, mpuu-mpuu rapakalali, natantumo domo rakenira pesomba ka Alatala, sabana rasanira dosara niampungimo bo domo rarasaira nadosa.

³Tapi kakanana ledo ivesia. Pesomba nikeni ntona mpaep-mpaep aga nompopatora ka ira, ira nadosa.

⁴Sabana, raa lako ri japi lakina bo tovau lakina ledo ntoto nompakalali dosa.

⁵⁻⁶Haitu sampe tempo i Kristus nakava ri dunia hitu, Ia nanguli ka Alatala ivei: “O Pue Alatala, ledo nipodotaMiu pesomba bo pedekei, Ledo nipokonoMiu pesomba nipalabu bo pedekei-pedekei nidekei raposompo dosa. tapi naria karoKu mboto nipakasadiaMiu.

⁷Pade niuliKu, ‘Siimo Yaku, O Pue Alatala, nasadiamo Yaku movia dotaMiu nasimbayu mpo anu nitulisi riara Buku Gasa anu nombatesaki Yaku.’ ” (Mazmur 40:7-9)

⁸Ri bavona, i Kristus nanguli Alatala ledo nompokono pesomba bo pedekei, ledo muni nipokonoNa pesomba nipalabu bo pedekei-pedekei nidekei raposompo dosa. I Kristus notesa ivesia nau pesomba bo pedekei haitu nikeni ka Alatala nangoseaka Atura-atura agama Yahudi.

⁹Naupu niuliNa ivesia, nitambaiNa vai tesaNa ivei: “Siimo Yaku, O Pue Alatala. Nasadiamo Yaku movia dotaMiu.” Jadi, sabana haitu, nisanita pesomba-pesomba nangoseaka Atura agama Yahudi nilelaka nu Alatalamo bo nisambeina ante pesomba i Kristus.

¹⁰Bo i Kristus nangoseaka dota nu Alatala, haitumo nidekeina karoNa mboto majadi pesomba posompo dosa. Pesomba haitu aga sanggani, ledo paraluu rasili, apa naganamo sampe ri kasae-saena. Ivesiamo dosata pura-pura nipakalali.

¹¹Eo-eo topanggeni pesomba agama Yahudi neangga nantui pokarajaara. Nadea nggani nikenira pesomba-pesomba nasimbayu ka Alatala. Tapi pesomba haitu ledo ntoto nompakule mompakalali dosa.

¹²Tapi aga sangu pesomba niken i Kristus, haitumo karoNa mboto nidekeina rapatesi majadi pesomba posompo dosa. Bo pesombaNa haitu nompakule mompakalali dosa sampe ri kasae-saena. Naupu nanggeni pesomba haitu, Ia nonturo ri panggana nu Alatala.

¹³Bo sii-sii Ia nompopea sampe Alatala nompopekou pura-pura baliNa nte Ia.

¹⁴Jadi lako ri pesombaNa sangu, i Kristus nompakalali dosata, bo nompakanoa kita ri panggita nu Alatala sampe kita domo makura nuapa-nuapa sampe ri kasae-saena.

¹⁵Nosa Gasa nu Alatala muni nompopaisani pojanji nabaru ka kita. NipapolaNa tesa nu Alatala ivei:

¹⁶“Iveimo pojanji Kupovia ante ira ri tempo makava: Kuboli atura-aturaKu riara pekirira, bo Kutulisi riara ntaira.

¹⁷Dosa-dosa bo pokainggu nadaa domo Kutora.” (Yeremia 31:33-34)

¹⁸Jadi ane dosa-dosa bo pokainggu nadaa niampungimo, natantu domo paraluu pesomba posompo dosa.

¹⁹Jadi sampesuvu-sampesuvu, hitupa kita domo paraluu makaja rarata manggaparai Alatala riara posambayata bo metupu nte Ia. Namala rauli kita

namala mesua sampe ri Tombi Nelabi Kagasana sabana raa lako ri kamate i Yesus.

²⁰I Yesus nombabuka dala nabaru ka kita, dala anu nanggeni katuvua nabelo. «Ri Tenda nTupu bara ipia, dala hau riaru Tombi Nelabi Kagasana nilava kae povombo.» Tapi i Kristus nombabuka dala ka kita, domo ria nuapa-nuapa nombalava kita manggaparai Alatala riaru posambayata bo metupu nte Ia, apa i Yesus nombadekei karoNa mboto rapatesi mombasompo dosata.

²¹Bo Ia najadi Pakeni nTopanggeni Pesomba anu nanggeniaka todea nu Alatala.

²²Jadi kita kana metupu nte Alatala ante rarata naliangu bo pomparasayata ledo nolengga-lengga. Apa rara ntaita nipakagasamo ante raa i Kristus, jadi nisanita domo ria salata. Kita nidiu ante uve gasa, tandana kita nipakagasaNamo.

²³Kita kana bate-batena manjarumaka i Yesus, kita nangaku Iamo Tuputa. Nee molengga-lengga apa nisanita Alatala namala raparasaya mompakadupa pojanjiNa.

²⁴Bo kita kana mompekirika berimba kita mamala mosipakaroso rara sampe kita pura-pura mosimpotove bo mokainggu nabelo.

²⁵Nee menonto masiromu metupu mosanggani-nggani, mpo kabiasa ntona sanu. Tapi kita kana mosipakaroso rara, nelabipa sii-sii sabana nisanita naparamo kakava i Yesus.

²⁶Ane ratunggaita bate-batena movia dosa naliu nitarimata pepatuduki nakana, ledo ria pesomba mompakalali dosa haitu.

²⁷Ane ivesia pokaingguta, damo aga maviora rarata mompopea pehuku bo apu narega mpuu anu mompalabu tona nangeva Alatala.

²⁸Isema-sema nombasapuaka Atura-atura agama nipapola Nabi Musa nggaulu, ane naria randua bara tatalu sabi nanguli ia nasala, ia nihuku mate bo ledo ria ampu.

²⁹Ane ivesia pehuku ka tona nombasapuaka Atura agama, nemopa ka tona anu nompojejea Ana nu Alatala. Tona haitu nompandaente raa i Yesus, tano raa haitumo nompakaasa pojanji nu Alatala bo nompakalali dosana. Bo tona haitu muni nanjalai Nosa Gasa anu nompopaisani pepotove nu Alatala ka todeaNa.

³⁰Nisanitamo Alatala nanguli ivei: “Yakumo topombabalasi. Yaku mombahuku ira.” Bo niuliNa muni, “Tupu mombatangara todeaNa.”

³¹Natantumo maviora mpuu rara ntona anu mambela pehuku lako nte Alatala anu natuvu sampe ri kasae-saena!

³²Tapi sampesuvu-sampesuvu, toramo katuvumiu tempo bara ipia. Tempo komiu dako nantarima reme lako nte i Pue, nadea susa bo pari nirasaimiu. Tapi naupa ivesia, komiu batena nomparasaya.

³³Sanggani-sanggani komiu nislai bo nipakadaa ntona ri ngayo ntodea. Naria muni komiu nantulungi roa anu nipovia ntona ivehaitu, sampe komiu muni nombarasai kasusara.

³⁴Komiu muni naasi mata nomporea bo nantulungi tona nitarunggu. Bo tempo mbara-mbaramiu niago ntona komiu batena nadamba, sabana nisanimiu naria kakalumanamiu nelabipa kabelona ri suruga anu nainti sampe ri kasae-saena.

³⁵Jadi, sampesuvu-sampesuvu, nee menonto momparasaya, sabana ane maroo komiu momparasaya, mambaso mpuu tambomiu bara maipia.

³⁶Komiu kana mosabara ala maupu komiu movia dota nu Alatala, komiu mantarima anu nijanjiNa.

³⁷Sabana riaru Buku Gasa nitulisi ivei: “Domo ntoto masae, Ia anu makava haitu, makava mpuumo. Ia ledo mombasoro-soro kakavaNa haitu.

³⁸Bo todeaKu anu nanao ri panggitaKu, iramo matuvu mabelo sabana pomparasayara. Tapi ane moura ira, domo Kupodamba.” (Habakuk 2:3-4)

³⁹Sampesuvu-sampesuvuku, kita hitu ledo topoura sampe rapambela pehuku, tapi kita nomparasaya Alatala bo nanggava katuvua nabelo sampe ri kasae-saena.

Ibrani 11

¹Ane kita nomparasaya, batuana nisanitamo anu nisarumakata mpuu-mpuu rakavata. Nau dopa nikitata, nariumo katantuna riaro ntaita anu haitu mpuu-mpuu majadi.

²Lako ri pomparasaya ntona nggaulu, ira nipodamba nu Alatala.

³Lako ri pomparasayata, nisanita dunia nipajadi nu Alatala ante TesaNa. Jadi, anu nikita nipajadi lako ri anu ledo nikita.

⁴Lako ri pomparasaya i Habel, pesomba nikenina ka Alatala nabelopa pade pesomba nikenin tuakana i Kain. Lako ri pomparasayana haitu, i Habel nitarima nu Alatala mpo tona nanao apa nalantomo pesombana nipodamba nu Alatala. Bo nau namatemo ia, da nariapa tesana bo jonjo pomparasayana.

⁵Lako ri pomparasaya i Henokh, ia ledo namate tapi nioretaka nu Alatala lako ri dunia hitu. Ia nielo-elo tapi ledo ria nikava ntona sabana ia niore nu Alatala lako ri dunia hitu. Naria tesa ri Buku Gasa nompakalanto dopame i Henokh niore, katuvuna nipodamba nu Alatala.

⁶Ledo ria saitoa namala rapodamba nu Alatala ane ledo ria pomparasayana. Apa isema-sema madota metupu nte Alatala, kana raparasayana naria Alatala. Bo kana raparasayana muni Alatala mombadekei belo ka tona nangelo Ia ante rara mpuu-mpuu.

⁷Lako ri pomparasaya i Nuh, ia natundu nte Alatala. Alatala nompopaisani ka i Nuh maria uve oge ngena mompakagero dunia. Jadi, nau dopa nikitana kajadia haitu, niouseakana parenta nu Alatala bo nipoviana kapala mbaso ala ira sambanua masalama. Lako ri pomparasayana haitu, pura-pura manusia ntanina ri dunia nireke nu Alatala masipato rahuku sabana ira ledo nomparasaya. Tapi i Nuh nireke nu Alatala nanao sabana pomparasayana.

⁸Lako ri pomparasaya i Abraham, niouseakana parenta nu Alatala. Alatala nompokio ia bo nituduNa hau ri ngata nakavao. Alatala nojanji ngata haitu majadi bagia i Abraham. Jadi, nau dopa nisanina ri umba ngata rakalauna haitu, nipalaikanamo ngatana mboto nangoseaka parenta nu Alatala.

⁹Lako ri pomparasayana, ia nonturo mpo topesovo ri ngata nijanji nu Alatala ka ia. Hamai ia da nonturo ri tenda, bo ivesia muni mulina i Ishak bo i Yakub. Alatala nojanji ngata haitu majadi bagiara, nasimbayu mpo nijanjiNa ka i Abraham.

¹⁰I Abraham nosabara nonturo ri tenda mpo topesovo sabana ia da nantongoraka ponturo ri ngata anu maria sampe ri kasae-saena, ngata niponia bo nibangu nu Alatala.

¹¹Lako ri pomparasaya i Abraham bo i Sara, ira nanggava kuasa nomuli, naupa i Abraham natuamo bo i Sara nagampa. Haitu najadi sabana nisani i Abraham Alatala namala raparasaya mompakadupa pojanjiNa.

¹²Tempo haitu karo i Abraham domo nompakule momuli sabana ia natua ntotomo. Tapi naupa ivesia, nadea mulina, ledo rapakuleta mobila kadeana. Kadeana nasimbayu mpo kadea nu betue ri langi bo bone ri talinti.

¹³Ira pura-pura pangane batena nomparasaya sampe namate, nau ledo nitarimara mboto anu nijanji nu Alatala. Namala raulita nikitara nggavao kadupana. Nisanira kadupana da masaepa, tapi naupa ivesia nadamba rarara bo ledo nonggai rarara nantongoraka kadupana pojanji nu Alatala. Niulira dunia hitu ledo ponturora nakana, ira aga topesovo bo topanjayo ri dunia hitu.

¹⁴Tona notesa ivesia nompakalanto ira da nangelo ponturo majadi bagiara mboto.

¹⁵Ledo ngata nipalaisira bara ipia nipolentorara. Apa ane rapana ngata haitu nipolentorara, nariumo loga ka ira manjili ri ngatara haitu.

¹⁶Tapi ira nalentoraka ngata anu nabelopa, haitumo ngata ri suruga. Jadi Alatala ledo naeya mataNa ane Ia niuli Tupura apa naria mami ngata nipakasadiaNa ka ira.

¹⁷⁻¹⁸Lako ri pomparasaya i Abraham, ia nasadia nombadekei anana i Ishak majadi pesomba ka Alatala tempo pomparasayana niuji nu Alatala. Bara ipia Alatala nojanji ka i Abraham ivei: “Lako ri Ishakmo iko manggava muli

nijanjiKu ka iko.” Tapi naupa ivesia, i Abraham nasadia mombasambale i Ishak, anana saito-itona, majadi pesomba ka Alatala.

¹⁹Nipekirina Alatala nompakule mompakatuvu mpanjili tomate. Jadi namala rauli i Abraham nantarima anana mpanjili lako ri kamatena.

²⁰Lako ri pomparasaya i Ishak, niperapina Alatala mombadekei belo ka anana i Yakub bo i Esau, haitumo niperapina belo rakavara ri tempo makava.

²¹Bo lako ri pomparasaya i Yakub, tempo damo kamatena, niperapina Alatala mombadekei belo ka ana-ana i Yusuf. Bo ia netidanda ri tokona bo nombasomba Alatala.

²²Lako ri pomparasaya i Yusuf, tempo damo kamatena, ia nanguli Alatala manggeni toIsrael mesuvu lako ri tana Mesir bara maipia. Bo nitevaina anu rapoviara ka karobatana tempo ira malai lako ri Mesir.

²³Lako ri pomparasaya ntina tuama i Musa, tempo i Musa nipoanaka, nitabuniakara talu-mbula kasaena sabana nikitara ia ngana nagaya. „Nau Magau Mesir nompamenta pura-pura ngana langgai ntoIsrael kana rapatesi,„ ledo naeka ira nangeva parenta nu magau.

²⁴Lako ri pomparasaya i Musa, tempo ia nambasomo, ia ledo nadota rauli tupu nu Magau Mesir.

²⁵Nipokononapa mombarasai kasusa bo kapari mosanggani-nggani ante todea nu Alatala pade mombarasai kasana aga sampalai lako ri katuvu nadosa.

²⁶Niparasayana Magau Topepakasalama anu nijanji nu Alatala makava bara maipia. Nipekirina nabelopa ia rasalai sabana pomparasayana pade manggava pura-pura kakalumana ri Mesir. Nipekirina ivesia sabana ia bate-batena nanjarumaka belo radekei nu Alatala ka ia bara maipia.

²⁷Lako ri pomparasaya i Musa, nipalaisina tana Mesir. Ia ledo naeka ka Magau Mesir nau narau mpuu rara Magau. I Musa batena naroo rarana, apa eva nikitana Alatala anu ledo nikita.

²⁸Lako ri pomparasayana, nituduna toIsrael movia ada Paskah. Niparentana ira mombadika raa ri vambara ala malaeka anu nanggeni kamatea ledo mompatesi ana lumbuara mosanggani-nggani ante ana lumbua ntoMesir.

²⁹Lako ri pomparasaya ntoIsrael, ira nombavote Tasi Lei nasimbayu mpo nolipa ri tana bai. Tapi tempo toMesir nompasimbuku mevote mombaraga toIsrael, ira aga nalodo rantasi.

³⁰Lako ri pomparasaya ntoIsrael, nilintikura ngata Yerikho pitu-eo kasaena sampe nadungga tembo ngata haitu.

³¹Bo lako ri pomparasaya i Rahab, mombine bajinga, nitarimana nabelo mata-mata ntoIsrael riara banuana. Jadi ia ledo nipatesi nosinggani-nggani ante toYerikho anu ledo natundu nte Alatala,

³²Sampesuvu-sampesuvuku, da nadeapa jonjo ntanina mamala kutesa, tapi ledo nagana tempoku mantesa pakalanto hanupa pomparasaya i Gideon, i Barak, i Simson, i Yefta, i Daud, i Samuel bo nabi-nabi ntanina.

³³Lako ri pomparasayara, sanu ira nombadagi magau-magau. Nipoviara dota nu Alatala jadi nitarimara anu nijanji nu Alatala ka ira. Sanu ira nombaramu nganga nu singa.

³⁴Sanu ira nompepaya apu narega mpuu, bo nadea ngganimo ira nikabasaka lako ri tona nasadia mombatimbe ira. Tempo ira nalente, nipakaroso mpanjili. Ira najadi naroso riara posieva sampe nipakulera nombadagi tantara-tantara ntosangatana.

³⁵Lako ri pomparasayara, mombine-mombine nanggita mpanjili tona-tonara anu nipakatuvu mpanjili lako ri kamatena. Tapi naria muni tona ntanina nompalamba karora nipandasa sampe namate sabana pomparasayara. Ira ledo nadota rakabasaka lako ri kasusa haitu apa ira madota rapakatuvu mpanjili bo manggava katuvua nabelopa.

³⁶Naria muni tona nipongei-ngeika bo nicambu pakandasa, bo naria tona nibalunggu bo nisuaraka riara ntarunggu.

³⁷Naria muni tona nirempe watu sampe namate bo naria tona nigaragaji pakapudu, bo naria tona nipatesi ante guma. Ira nolinja-linja nangelo katuvua, bo pakeara aga kulimba nu bimba bo tovau. Ira mpuu-mpuu napepa, ira nipakasusa bo nipandasa.

³⁸Ira nolipa-lipa ri karava bai bo ri buluna. Ira aga nonturo ri beka-beka ntana bo ri bolo-bolo watu. Haitu pura-pura najadi nte ira sabana pomparasayara. Kakanana, dunia nadaa hitu ledo masipato raponturora!

³⁹Ira pura-pura nipodamba nu Alatala sabana pomparasayara. Nau ivesia, dopa nitarimara pura-pura anu nijanji nu Alatala,

⁴⁰sabana naria nia nabelopa nipakasadia nu Alatala ka kita pura-pura. PatujuNa ala ira mompopea sampe kita pura-pura mosanggani-nggani rapajadi magasa bo ledo makura nuapa-nuapa.

Ibrani 12

¹Jadi namala raulita, pura-pura ira pangane nombatiku kita bo nompakaroso rarata ante posabira. Sabana haitu, kita muni kana mombatedaka pura-pura anu nompopekai rarata bo dosa anu nekantaka nte kita. Kita kana maroo rarata mangoseaka dala nipakatantu nu Alatala ka kita, nasimbayu mpo topangova ri posilumba.

²Kita kana mangova mompetoto i Yesus, sabana Iamo nanggeni kita nomparasaya bo Iamo nompopompakule kita bate-batena momparasaya sampe ri kaupuna. I Yesus nombatidamaka kasusa bo kapari tempo nipaku ri kayu salib. Ri mata ntodea, namate ri kayu salib nepakaeya. Tapi ledo nipekirikaNa eyaNa, sabana nitoraNa kadamba nipakasadia ka Ia. Bo sii-sii Ia nonturo ri gadera magau ri panggana nu Alatala.

³Pekirikamo kasusa nirasai i Yesus. Ia nieva ntona nadosa anu mpuu-mpuu navuu matara nte Ia. Pekirikamo Ia ala ledo masau raramiu bo ledo maupu raramiu momparasaya.

⁴Sampesuvu-sampesuvu, dopa ria komiu nipatesi riara pompasimbukumi nangeva dosa.

⁵Nee rakalingasimiu tesa lako ri Buku Gasa anu nompangajari kita, nasimbayu mpo totua nompangajari ngana-ngana, ivei: “Anaku, nee rasapuaka pepatuduki nTupu. Nee maupu raramu ane raonteakaNa iko.

⁶Sabana Tupu nompatuduki bo nomparajea pura-pura tona nipotoveNa. Ia noparajea pura-pura tona nipangakuNa ana-anaNa.” (Ayub 5:17, Amsal 3:11-12)

⁷Jadi sampesuvu-sampesuvu, komiu kana mombatidamaka riarra kasusa bo kapari nirasaimiu. Tarimamo haitu mpo pepatuduki lako nte Tuamamiu Alatala, sabana komiu nirekeNa ana-anaNa mboto. Berimba? Naria ngana ledo niboba bo nipatuduki ntuamana? Natantumo ledo ria!

⁸Alatala nompatuduki bo nomparajea pura-pura tona nirekeNa ana-anaNa. Jadi ane komiu ledo nipatudukiNa, batuana komiu ledo ana-anaNa mpuu, komiu aga ana-ana vone.

⁹Kapolana, tuamata ri dunia nombaboba bo nompatuduki kita bo kita nombabila ira bo nekou nte ira. Ane ivesia, natantumo kana meliupa pekouta nte Alatala, Tuamata ri suruga ala kita matuvu mabelo.

¹⁰Tuamata ri dunia hitu nombaboba bo nompatuduki kita sampalai, nangoseaka anu nirekera nabelo. Tapi Alatala nompatuduki kita ala manggeni belo ka kita. PatujuNa ala kita majadi magasa masimbayu mpo Ia.

¹¹Tantu tempo kita niboba bo nipatuduki, kita ledo nadamba tapi aga nasusa. Tapi ane rapariarata pepatuduki haitu, kaupuna kana maria aselena riarra nggatuvuta, haitumo kita matuvu mangoseaka dota nu Alatala bo matinonto rarata.

¹²Sabana haitu, sampesuvu-sampesuvu, pakaroso palemium namaga bo pakaroso taputumium noridi.

¹³Osemo dala nalumbu ala kadamiu nakejo ledo matepakodu, tapi maroso mpanjili.

¹⁴Komiu kana mompasimbuku matuvu mosinggabelo ante pura-pura tona. Bo pasimbuku muni matuvu magasa, sabana tona ledo nagasa katuvuna ledo ntoto mamala manggita i Pue.

¹⁵Jagaimo! Nee sampe maria komiu moura momparasaya bo mompoara kabelo rara nu Alatala. Nee sampe maria tona majadi mpo tuda-tuda nelangu ri tatangamiu, anu nompakasusa todea ante racuna, sampe nadea tona niken riara dosa.

¹⁶Nee sampe maria tona mosipogau nte tona ledo bereina mboto. Bo nee sampe maria tona moinggu mpo i Esau, apa ia aga nompekirika kasana karon ri dunia hitu bo ledo nipekirikana dota nu Alatala. Kalumbuana nisulakana sanjuraya kande.

¹⁷Nisanimiu mbotomo, naupu sia, tempo ia nerapi kalumbuana lako nte tuamana, ia nipoara ntuamana naupa niperapina nte tangi. Domo nikavana dala mombabaliki sala nipoviana.

¹⁸Sampesuvu-sampesuvu, komiu ledo nirasaimiu anu nirasai ntoIsrael nggaulu tempo nitarimara Pojanji nu Alatala nokolu. Ira nakava nantingayo bulu anu namala ratui, haitumo Bulu Sinai nikavaya nu apu. Nikitara landa mpirika bo kulimu, bo nirasaira piori narimboso.

¹⁹Niepera moni tabue namangga mpuu bo niepera suara notesa. Nangepe suara haitu, naeka mpuumo ira sampe niperapira ante mpuu-mpuu ala suara haitu domo motesa ka ira.

²⁰Apa ledo nipakulera nangepe parenta nitesa nu suara haitu, ivei: “Ane maria komiu atau binatangiu makava mombatui bulu hitu, ia kana rarempe ante vatu sampe mamate.”

²¹Anu nikitara hamai mpuu-mpuu nompakaviora rarara sampe i Musa nanguli, “Yaku mpuu-mpuu naeka bo nolete.”

²²Tapi ledo ivesia komiu. Komiu nantarima pojanji nu Alatala nabaru, komiu nantingayo Bulu Sion, ngata nu Alatala anu matuvu sampe ri kasae-saena, haitumo ngata Yerusalem ri suruga. Komiu nantingayo nenjobu-njobu malaeka anu nasiromu madamba-damba.

²³Bo komiu nantingayo todea topomparasaya Alatala. Ira nireke ana-ana lumbua nu Alatala bo sanga-sangara nitulisi riara buku nu Alatala ri suruga.

Komiu nantingayo Alatala, Topotangara pura-pura manusia. Bo komiu nantingayo nyawa-nyawa ntona nanao anu namatemo, anu najadi nagasa.

²⁴Bo komiu muni nantingayo i Yesus, Topetariolo anu nompasiayu pojanji nabaru haitu. Bo komiu nantingayo raa nipatiti i Yesus anu nabelopa pade raa i Habel.

²⁵Jadi sampesuvu-sampesuvu, pakabelo-belo, nee sampe komiu ledo madota mangepe tesa niuli nu Alatala ka komiu. Apa isema-sema ledo nadota mangepe pepatora nu Alatala anu nipapola Nabi Musa ri dunia bara ipia, ira ledo rakabasaka lako ri pehuku nu Alatala. Nemopa kita anu nangepe Ia notesa lako ri suruga! Ane kita ledo madota mangepe Ia, natantumo kita muni ledo rakabasaka lako ri pehukuNa.

²⁶Tempo nggaulu ri Bulu Sinai suara nu Alatala namangga sampe nombagoya tana. Tapi sii-sii Ia nojanji ivei: “Sangganipa bara maipia kana Kugoya tana, bo ledo aga tana tapi langi muni.”

²⁷TesaNa “sangganipa” haitu, batuana, pura-pura anu nipajadiNa kana ragoyaNa bo rapakalipoNa ala aga anu ledo nogoya maboli.

²⁸Jadi haitu sampe kita masipato manguli tarima kasi nte Alatala, sabana Ia nombadekei loga ka kita majadi todea riara PoparentaNa bo PoparentaNa haitu ledo ntoto mogoya. Bo kita kana metupu nte Alatala ante cara nipodambaNa. Kita kana mekou nte Ia bo maeka movia anu ledo nipokonoNa.

²⁹Apa Alatala anu nisombata, mombahuku tona nompoara kabeloNa, nasimbayu mpo apu mepalabu.

Ibrani 13

¹Komiu topomparasaya, jadi komiu kana bate-batena mosimpotove mpo tona nosampesuvu.

²Nee makaja raramiu mantarima torata makava ri banuamiu naupa torata haitu ledo nisanimiu, sabana nariamo sanu tona nantarima bo nantande torata ledo nisanira, tano mai toratara haitu malaeka nu Alatala.

³Toramo bo tulungimo tona nitarunggu evamo komiu mboto nitarunggu nosangani-nggani ante ira. Bo toramo bo tulungimo tona nipakasusa sabana pomparasayara, evamo kasusamiu mboto.

⁴Ponjamboko kana rabilamiu pura-pura. Nee mompakagero ponjambokomiu ante mompogau tona ledo bereimiu mboto, sabana Alatala mombahuku tona nompogau tona ledo bereina mboto.

⁵Nee mompotove doi gaga sampe komiu aga natuvu mangelo doi. Tapi kana maosa raramiu ante anu naria nte komiu. Apa Alatala mboto nanguli ivei: “Ledo ntoto Kupalaisi iko.”

⁶Haitu sampe kita mabia manguli ivei: “Tupumo Topotulungi yaku, jadi ledo maeka yaku. Ledo ria nuapa-nuapa mamala rapovia ntona ka yaku.” (Mazmur 118:6)

⁷Pekirikamo katuvu pakeni-pakeni anu nanggeni Tesa nu Alatala ka komiu bara ipia. Pariarantaimo jonjo katuvura bo kamatera, bo pasialamo pomparasayara.

⁸Toramo! I Yesus Kristus ledo nabali-bali, lako ri nggauluname sampe sii-sii bo sampe ri kasae-saena.

⁹Nee sampe komiu masalandala lako ri pepatuduki nakana ante mangoseaka mpengaya-ngaya pepatuduki anu nontani lako ri pomparasayata, evamo pepatuduki atura-atura pangande. Nadea tona bara ipia nangoseaka atura-atura pangande, tapi atura haitu ledo nanggeni belo ka topangoseakana. Aginapa kita mompakaroso rarata mompekirika kabelo rara nu Alatala, apa haitumo anu nanggeni belo ka kita.

¹⁰Kita topomparasaya naria lanta pesomba, haitumo kayu salib i Kristus anu namate nombasompo dosata. Topanggeni pesomba ri Banua Petupu ntoYahudi nitagi mangande bau lako ri binata nisambale raposompo dosa. Ivesia muni tona da nangoseaka atura-atura pesomba agama Yahudi, ledo mamala manggava belo lako ri kamate i Kristus.

¹¹Nangoseaka Atura-atura agama Yahudi, raa lako ri binata nisambale majadi pesomba posompo dosa, kana rakeni nu Pakeni nTopanggeni Pesomba riar Tombi Nelabi Kagasana. Bo karobata nu binata haitu kana rapalabu ri savaliku ngata.

¹²Ivesia muni najadi ante i Yesus. Ia nikenri ri savaliku bobaa ngata Yerusalem bo nipatesi. Ia namate ala raaNa majadi pesomba posompo dosa anu nompakalali dosa ntodeaNa.

¹³Sabana haitu, kita kana mesuvu hau nte Ia ri savaliku ngata, nasadia rasalai nosangani-nggani nte Ia. Batuana, kita kana mombakabasaka anu nioseakata nggaulu bo aga momparasaya i Yesus, nau bara isema manjalai kita.

¹⁴Apa ri dunia hitu ledo ria ponturota naroo, tapi kita nanjarumaka ponturo nabelopa ri suruga ri tempo makava.

¹⁵Jadi ante petulungi i Yesus, kita kana masaro manggeni pesombata ka Alatala. Kita kana mombatoiya Ia bo manguli tarima kasi ka Ia, apa haitumo nireke pesombata.

¹⁶Bo nee rakalingasita mositulungi bo movia anu nabelo, sabana haitu muni nireke pesombata anu nompakadamba rara nu Alatala.

¹⁷Oseakamo parenta-parenta nu pakeni-pakenimiu bo pekoumo nte ira, sabana iramo nombajagai pomparasayamiu. Makava tempona bara maipia ira kana manguli pakalanto ri ngayo nu Alatala berimbana komiu nikeniakara. Jadi pekoumo nte ira ala ira mamala mantui pokarajaa haitu ante damba nu rara. Ane komiu ledo mekou, aga masusa rarara bo haitu ledo manggeni belo ka komiu.

¹⁸Sampesuvu-sampesuvu, posambayakamo kami. Nisani kami, rara ntai kami nagasa apa kami batena madota mokainggu nabelo riar mpengaya-ngaya.

¹⁹Bo kuperapi ante mpuu-mpuu raraku ala komiu momposambayaka yaku, ala yaku masalisa rakeni nu Alatala manjili tou nte komiu.

²⁰⁻²¹Alatala nompakatuvu mpanjili Tuputa Yesus lako ri kamateNa. Jadi Ia najadi Topoevu nakuasa anu nompoevu kita bimba-bimbaNa. RaaNa nipatiti

nompakaasa pojanji nu Alatala ante kita, bo pojanji haitu rapake sampe ri kasae-saena. Kuperapi Alatala, puna katuvua nabelo, mompakagana pura-pura anu nabelo niparaluumiu, ala rapakulemiu movia dotaNa. Kuperapi Ia manggeni komiu movia anu nipokonoNa ante petulungi i Yesus Kristus. Iamo masipato ratoiyata bo rabilata sampe ri kasae-saena. Amin!

²²Sampesuvu-sampesuvu, kuperapi nte komiu posabaramo mangepe tesa nitulisiku hitu, sabana suraku hitu ledo nandoe ntoto.

²³Kana rasanimiu, sampesuvuta i Timotius nikabasakamo lako ri tarunggu. Ane masalisa ia tumai nte yaku, kukeni ia mosangani-nggani nte yaku tou mosinggava nte komiu.

²⁴Pakavote tabe kami ka pura-pura pakenimiu bo ka pura-pura todea nu Alatala ri situ. Bo tarimamo tabe lako nte sampesuvuta sampomparasaya ri propinsi Italia.

²⁵Kuperapi Tupu mombadekei belo ka komiu pura-pura.

Yakobus

Yakobus 1

¹Sura hitu lako nte yaku, i Yakobus. Yaku batua nu Alatala bo batua i Pue Yesus Kristus. Nadea tabe ka komiu todea nu Alatala ri njumangu dunia.

²Sampesuvu-sampesuvu, ane komiu mambela mpengaya kasusa bo pesori, kana madamba raramiu.

³Sabana, nisanimiu ane maroo pomparasayamiu tempo nipesori, komiu majadi maroso bo rapakulemiu mantingayo nuapa-nuapa.

⁴Bo ane komiu bate-batena momparasaya sampe ri kaupuna, pomparasayamiu mpuu-mpuu majadi maroso bo ledo makura nuapa-nuapa.

⁵Ane makura noto pompekirimiu, perapimo lako nte Alatala. Bo radekeiNa pompekiri nanoto niperapimiu, sabana najoi raraNa nombadekei noto ka pura-pura tona. Ledo ntoto natove raraNa.

⁶Tapi ane komiu merapi nte Alatala, komiu kana mpuu-mpuu momparasaya bo nee monggai raramiu. Apa tona nonggai rarana nasimbayu mpo balumba ri tasi niburu mpoi ri hau tumai.

⁷⁻⁸Tona ivehaitu nopenga pekirina, ledo natantu nuapa rapoviana. Haitumo sampe ia ledo mamala manjarumaka manggava nuapa-nuapa lako nte Tupu.

⁹Sampesuvu-sampesuvu sampomparasaya, ane komiu mapepa, kana madamba raramiu, sabana nau napakasi katuvumiu, Alatala nompakaoge komiu.

¹⁰Ane komiu makalumana, kana madamba muni raramiu, sabana Alatala nompakaede raramiu. Apa nisanimiu tona nakalumana nasimbayu mpo sese nggavoko, aga sampalai katuvura.

¹¹Tempo peindo nu eo napane, kavoko haitu nalele sampe naronto sesena, bo naronto puramo rambana. Ivesia muni ante tona nakalumana. Sanggani tempo riarara popaelona, mamate muni ia.

¹²Nabelo mpuu tona naroso rarana riara kasusa bo pesori! Ane maroso rarana sampe ri kaupu pesori haitu, Alatala mombadekei katuvu nabelo ka ia sampe ri kasae-saena. Katuvu nabelo haitu nijanji nu Alatala ka tona nompotove Ia.

¹³Ane kita rapesori movia anu nadaa, nee raulita pesori haitu nakava lako nte Alatala. Haitu ledo nakana, apa Alatala ledo mamala rapesori movia anu nadaa, bo ledo muni Ia mompesori kita movia anu nadaa.

¹⁴Pura-pura tona nipesori movia anu nadaa tempo ia nitaja bo nikeni dota pompekirina mboto anu nadaa.

¹⁵Ane dota pompekirina nadaa haitu raoseakana, ia madosa. Ane ia batena movia dosa, ia mamate bo rapopogaa lako nte Alatala sampe ri kasae-saena.

¹⁶Sampesuvu-sampesuvu nipotoveku, nee rabagiu! 〔Alatala ledo nompesori kita movia anu nadaa.〕

¹⁷Pura-pura pedekei nabelo, anu ledo ria galona nadaa, nakava lako nte Alatala ri suruga. Ia nompajadi pura-pura anu nareme ri langi. Vayo-vayo najadi lako ri reme haitu nasaro nabali, tapi Ia ledo nabali. Ia bate-batena nabelo.

¹⁸Lako ri dotaNa mboto Ia nompajadi kita majadi ana-anaNa ala kita maogepa pade pura-pura anu ntanina nipajadiNa bo rapatani ka Ia mboto. Kita najadi ana-anaNa sabana kita nompariara tesaNa nakana.

¹⁹Sampesuvu-sampesuvu nipotoveku, pariaramo pakabelo-belo tesaku hitu. Kita kana masadia mangepe, tapi nee kaliu-liu motesa, bo nee masalisa marau.

²⁰Apa ane kita marau, ledo rapakuleta movia belo anu mompakadamba rara nu Alatala.

²¹Jadi, kabasaka puramo kabiasamiu naruto bo nadaa. Pakaede raramiu bo pariaramo tesa nu Alatala anu nitudaNa riara ntaimiu. Apa tesa haitu nakuasa mompakasalama komiu.

²²Jadi oseakamo tesa nu Alatala, bo nee aga raepe bayangi. Apa ane aga raepe bayangi, komiu nombabagiu karomiu mboto.

²³Isema-sema nangepe tesa nu Alatala bo ledo nioseakana, ia nasimbayu mpo tona nanggita lenjena mboto ri pompevayo;

²⁴nalaipa ia, nalingamo rarana berimba lenjena mboto.

²⁵Atura nu Alatala nagana mpuu bo naria kuasana mombakabasaka manusia lako ri dosa. Isema-sema nompariara pakabelo-belo bo batena nangoseaka Atura nu Alatala, bo ledo aga neepe bayangi bo nalinga, iamo radekeika nu Alatala belo riara bara nuapa-nuapa rapoviana.

²⁶Isema-sema nanguli iamo tona naroso poagamana, bo ledo nijagaina tesana, ia nombabagiu karon mboto. Agamana ledo naria gunana.

²⁷Tapi poagama nakana, anu ledo rasalai nTuamata Alatala, haitumo nantulungi ngana-ngana pailu bo timbala-timbala nasusa, bo nombajagai karo mboto ala ledo mangoseaka pokainggu nadaa nipovia ntona anu ledo nosisani nte Alatala.

Yakobus 2

¹Sampesuvu-sampesuvuku, komiu nomparasaya i Yesus Kristus, Tuputa nakuasa, jadi nee aga mompelenje.

²Rapana komiu masiromu mosambaya bo makava tona nakalumana nompake sinji bulava bo baju naramba. Bo makava muni saito tona napakasi nobaju ranta.

³Rapana komiu aga mombabila tona naramba bajuna bo manguli ka ia, “Kamaimo, Pua. Monturo ri ponturo nabelo hitu.” Tapi tona napakasi aga raulikamiu, “Peangga situmo iko, bara ponturomo ri jaula ri sii.”

⁴Batuana komiu nompoposisala singgamanusiamiu bo najadi topotangara anu nadaa pekirina.

⁵Sampesuvu-sampesuvu nipotoveku, epemo pakabelo-belo! Tona napakasi ri dunia hitu nipelisi nu Alatala. Nau ledo nadea kakalumanara ri dunia hitu, ira nipelisi nu Alatala majadi tona naoge pomparasayara. Iramo majadi todea riara Poparenta nu Alatala nangoseaka anu nijanjiNa ka tona nompotove Ia.

⁶Tapi nau ivesia, da nisalaimiupa ira bo tona nakalumana nibilamiu. Tano mai, tona nakalumana nantamanaka komiu bo nangumbunjai komiu hau ri ngayo ntopotangara!

⁷Tona nakalumanamo nanjalai sanga anu nipakaogeta, haitumo sanga nTuputa!

⁸Nabelo pokaingguta ane nioseakata atura nu Magauta anu nibacata riaru Buku Gasa ivei: “Potovemo roamiu nasimbayu mpo pompotovemi karomi mboto.”

⁹Ane komiu aga nompelenje tona, komiu novia dosa, apa niliunakamiu atura nu Alatala.

¹⁰Apa ane rapasimbukuta mangoseaka pura-pura atura nu Alatala, bo nau aga sangaya raliunakata, nasimbayu mpo niliunakata pura-pura atura haitu.

¹¹Rapana. Alatala nanguli, “Nee mobualo”, bo niuliNa muni, “Nee mepatesi”. Jadi nau komiu ledo nobualo, tapi ane mepatesi, komiu muni najadi topombaliunaka atura nu Alatala.

¹²Jadi komiu kana mombajagai pakabelo-belo tesamiu bo pokainggumi. Apa komiu nangoseaka atura nu Alatala anu nakuasa mombakabasaka manusia lako ri kuasa dosa.

¹³Isema-sema ledo naasi matana nanggita roana, Alatala ledo maasi mataNa manggita ia. Ane tona naasi matana nanggita roana, ledo paraluu ia maeka apa ia ledo rahuku nu Alatala.

¹⁴Sampesuvu-sampesuvuku, nuapa gunana kita nanguli kita nomparasaya Tupu, tano pokaingguta ledo nangoseaka dotaNa? Mamala pomparasaya ivehaitu mompakasalama kita?

¹⁵Rapana maria roa sampomparasaya nandasa sabana ledo ria ponapana bo ledo nagana kandeana eo-eo.

¹⁶Bo rapana kita aga manguli ka ia, “Pakabelo-belo ri dala! Kusarumaka komiu manggava ponapa nabelo bo kande rakande sampe mabosu.” Tapi ane kita

ledo mompakagana ka ia anu niparaluuna riaru nggatuvuna, tesata haitu ledo ntoto naria gunana!

¹⁷Ivesia muni ante pomparasaya. Ane raulita kita nomparasaya Tupu, tano pokaingguta ledo nangoseaka dotaNa, pomparasaya ivehaitu ledo ria gunana!

¹⁸Bara rauli ntona ivei: naria tona nanjarumaka pomparasayana. Bo naria muni tona nanjarumaka pokaingguna. Tapi kuuli ka komiu, ledo rapakulemiu mompopakita pomparasayamiu ka yaku ane ledo nabelo pokainggumiu. Tapi ante pokaingguku nabelo, rasanimumo yaku mpuu-mpuu nomparasaya.

¹⁹Komiu nomparasaya aga saito Alatala. Haitu nabelo, tapi seta-seta muni nomparasaya Alatala aga saito bo ira nolete naviora!

²⁰Nadoyo mpuu komiu ane raulimiu naganamo momparasaya bayangi, ledo paraluu mokainggu nabelo! Ledo ria gunana pomparasaya ivehaitu.

²¹Toramo Nabi Abraham, totuata nggaulu. Ia nireke nanao ri panggita nu Alatala sabana pokaingguna nabelo, haitumo tempo nidekeina anana i Ishak ka Alatala ri bavo lanta pesomba.

²²Lako rahaitu nisanita pomparasaya Nabi Abraham nasinggeni ante pokaingguna, bo pokaingguna haitu nompakalanto ia mpuu-mpuu nomparasaya.

²³Jadi haitu nompakadupa tesa nitulisi ri Buku Gasa ivei: “I Abraham nomparasaya Alatala, bo lako ri pomparasayana haitu ia nireke nanao ri panggita nu Alatala.” (Kajadia 15:6) Haitumo sabana Nabi Abraham niuli vega nu Alatala.

²⁴Jadi sampesuvu-sampesuvu, nalantomo ka kita, tona nireke nanao ri panggita nu Alatala sabana «pomparasayana nasinggeni nte» pokaingguna nabelo, ledo aga pomparasayana bayangi.

²⁵Ivesia muni tesa i Rahab, bajinga «lako ri ngata Yerikho» nggaulu. Ia nireke nanao ri panggita nu Alatala sabana pokaingguna. I Rahab nantarima mata-mata ntoYahudi riaru banuana bo nitulungina ira nalai lako ri ngata haitu moliu ri dala ntanina.

²⁶Jadi, sampesuvu-sampesuvu, ane domo naria nosa ri karota, namatemo kita, bo domo naria gunana. Ivesia muni pomparasayata. Ane pomparasayata ledo nasinggeni ante pokainggu nabelo, pomparasayata haitu nasimbayu mpo tomate, domo naria gunana.

Yakobus 3

¹Sampesuvu-sampesuvuku, nee madea komiu madota majadi guru agama, apa nisanimiu mantamopa potangara nu Alatala ka guru pade ka tona ntanina.

²Kita pura-pura nasaro novia mpengaya-ngaya pokainggu nasala. Tapi tona ledo sanggani nasala tesana, iamo tona nagasa, bo nipakulena nombakuasai pura-pura dota nu rarana.

³「Anu nakodi namala nombakuasai anu nambaso.」 Kita nombadika sama nakodi ri nganga jara mbaso ala raoseakana dotata bo kita namala nompamenta jara haitu.

⁴Ivesia muni kapala rantasi. Nau nambaso mpuu kapala bo narimboso poiri, kapala haitu mamala ragoliaka nu guli nantuntuni dota ntopompajala kapala haitu.

⁵Ivesia muni ante dilata. Naupa dilata nakodi, namovo mpuu pekeniakana! Nau pangale naluo mpuu, namala rakande nu apu sakide.

⁶Ivesia muni tesa nisovadaka nu dilata. Tesata nasimbayu kadaana ante apu. Dilata nompopesuvu mpengaya-ngaya anu nadaa, nelabipa pade sipa-sipa ntanina ri karota. Tesa-tesa nisovadaka nu dilata nasimbayu mpo apu lako ri narakaa nompakadaa pura-pura katuvuta.

⁷Pura-pura binata mamala rapakanondo, bara tonji, bara binata nenjoyo, bara bau riara nu uve. Bo naria mami tona natau nompakanondo ira.

⁸Tapi ledo ria saitoa tona nompakule nombakuasai dila manusia! Dila manusia haitu nadaa mpuu, ledo namala nikuasai. Tesa-tesa nisovadaka nu dilata nasimbayu mpo racu nepakamate.

⁹Ante tesata kita nombatoiya Tuamata Alatala, bo ante tesata muni kita nopindasi singgamanusiata anu nipajadi nu Alatala nangoseaka lenjeNa mboto!

¹⁰Lako ri sumba nesuvu posukuru bo tesa-tesa pepindasi. Sampesuvu-sampesuvuku, ledo masipato dilata mombasovadaka singgani-nggani anu nabelo bo anu nadaa.

¹¹Ledo naria mata nu uve nompopesuvu uve namoli bo uve napai nosinggani-nggani!

¹²Ivesia muni ante kayu. Ledo ria kayu ara novua vua zaitun, bo ledo muni naria anggur novua vua ara. Mata nu uve napaga ledo muni nompopesuvu uve namoli. 「Jadi ane kita nombatoiya Alatala bo mombapindasi singgaroata, ledo masipato!」

¹³Ane maria nte komiu tona nabelo pekirina bo nanoto rarana, ia kana mompopakita notona ante pokaingguna nabelo. Noto pompekirina haitu kana rapopakitana ante pokainggu nabelo anu neumba lako ri kaede rarana, mpo masipato ka tona nanoto rarana.

¹⁴Tapi ane komiu aga nasiriati, bo aga nompekirika karomiu mboto, nee mompakalanga raramiu bo manguli nanoto pekirimiu. Apa inggumiu haitu nosisala ante pepatuduki nakana.

¹⁵Noto pompekiri ivehaitu ledo nopuna lako nte Alatala, tapi aga nopuna lako ri dunia nadaa hitu, lako ri dota rarata nadaa, bo lako ri seta-seta.

¹⁶Ane naria tona nasiriati bo aga nompekirika karonna mboto, natantu naria muni posinggarau bo mpengaya-ngaya pokainggu nadaa.

¹⁷Tona naria noto pompekirina anu nopuna lako nte Alatala, iamo tona nagasa rarana, ledo ria pokaingguna nadaa. Ia natuvu nosinggabelo ante tona ntanina bo nalusu rarana. Ia ledo nasombo tapi nasadia nantarima tesa lako nte tona ntanina. Naasi mpuu matana nanggita roana napakasi, bo nadea poviana nabelo. Ia ledo nompelenje, bo nanoa rarana.

¹⁸Ane tona natuvu nosinggabelo nte roa bo nompoposinggabelo tona ntanina, masae-sae madea tona mangoseaka dota nu Alatala.

Yakobus 4

¹Nakuya sampe komiu nosinjanai bo nosinggarau? Posinjanai bo posinggarau neumba lako ri dota raramiu anu nadaa. Dota rara nadaa haitu nosieva riarantaimiu sampe nanggeni komiu novia nadaa.

²Nau naoge raramiu manggava, ledo nikavamiu anu nipodotamiu, jadi komiu nepatesi. Komiu nasiriati ka mbara-mbara ntona ntanina, tapi ledo nikavamiu. Jadi komiu nosinggarau bo nosinjanai. Sampesuvu-sampesuvu, ledo nikavamiu anu nipodotamiu sabana ledo niperapimiu nte Alatala.

³Tapi nau damo niperapimiu, ledo muni nikavamiu, sabana patujumiu nerapi nasala. Komiu aga nomperapi anu mompakasana karomiu mboto.

⁴Komiu nasimbayu mpo topobualo apa komiu ledo natutu nangoseaka Alatala. Ledo nisanimiu? Ane rapoinota anu nipodota ntona nadaa ri dunia hitu, kita majadi bali nu Alatala. Isema-sema mompoino anu nipoino ntona nadaa ri dunia hitu, ia nompajadi karna mboto bali nu Alatala.

⁵Nee rapekirimiu anu niuli ri Buku Gasa ledo nakana. Niuli ivei: Alatala nompajadi rara ntaita tapi rara ntaita haitu nadea mpuu nipoinona.

⁶Tapi Alatala nombatulungi kita lako ri kabelo nu raraNa. Bo petulungiNa haitu naogepa pade pura-pura anu nipoinota. Haitumo sampe naria tesa nitulisi riarabuku Gasa ivei: “Alatala nangeva tona nalanga rarana, tapi tona naede rarana nipoasiNa.”

⁷Sampesuvu-sampesuvu, komiu kana matundu nte Alatala. Evasimo Magau nu Seta, bo malai ia lako nte komiu.

⁸Pekitulungimo nte Alatala bo Alatala mpuu-mpuu mombatulungi komiu. Komiu topovia dosa, tumo movia dosa. Komiu toporompenga pekiri, pakasangumo pekirimiu mangoseaka Alatala.

⁹Komiu kana mpuu-mpuu manjoso raramiu bo motumangi masusa rara mantoraka dosamiu. Ledo mabelo komiu mongiri bo madamba, kana masusa rara bo motumangi.

¹⁰Komiu kana mompakaede raramiu ri ngayo nu Alatala bo Ia mompakaoge komiu.

¹¹Sampesuvu-sampesuvu, nee mosisalai. Isema-sema nanjalai bo nompakasala roana sampomparasaya, ia nanjalai bo nompakasala atura nu Alatala. Ane komiu mompakasala atura nu Alatala, natantumo komiu ledo topangoseaka atura, tapi topotangara atura haitu.

¹²Kakanana aga Alatala nakuasa mombadekei atura ka manusia bo mompakasala manusia. Aga Ia nakuasa mompakasalama kita, bara mombahuku kita. Jadi ledo masipato kita mompakasala roata sampomparasaya!

¹³Sampesuvu-sampesuvu anu nalanga rara, epemo tesaku hitu! Komiu nanguli, “Eo hitu bara maile kami manggalivo hau ri anu bo monturo sumai sampae kasaena modaga bo mompaelo doi.”

¹⁴Tapi ledo nisanimiu nuapa majadi riara nggatuvumiu maile! Katuvumiu ri dunia hitu nasimbayu mpo sumoa, sampalai kodi nikita, nalipomo.

¹⁵Aginapa komiu manguli ivei: “Ane rapodota nTupu, kami matuvu bo movia anu hitu, bara anu haitu.”

¹⁶Tapi ledo ivesia tesamiu. Komiu aga nalanga raramiu bo nangoe ka poviamiu mboto. Pokainggu ivehaitu nadaa!

¹⁷Ane nisanita anu nabelo paraluu rapoviata, tapi ledo nipoviata, kita nadosa.

Yakobus 5

¹Sampesuvu-sampesuvu anu nakalumana, epemo tesaku! Komiu kana mantete motumangi, apa komiu rapambela kasusa bo kapari!

²Kakalumanamiu malipo. Ponapamiu rakande nu saipa.

³Bulava bo salaka nipasiromumiu rakande ntagara. Bo kakalumanamiu natagara haitu majadi tandana komiu aga nompasiromu mbara-mbara nadea ri dunia tano naparamo kaupu nu dunia Siamu sabana sampe mandasa mpuu komiu, nasimbayu mpo anu nikande nu apu!

⁴Topokarajaa ri taluamiu ledo nitambomiu. Peintamo kandasara! Topokarajaa haitu nekakai nerapi tulungi bo pekakaira niepe nTupu Alatala anu nakuasa.

⁵Komiu nasimbayu mpo japi nipakaboya rasambale. Katuvumiu ri dunia nelabi kaganana bo doimiu aga nipakemiu nompebasa masana-sana ri dunia hitu. Tapi kaupuna komiu rahuku.

⁶Haitu mpuu-mpuu majadi sabana komiu nombahuku bo nompatesi tona anu ledo nasala bo ledo nompakule mangeva komiu.

⁷Sampesuvu-sampesuvuku, komiu kana mosabara sampe makava Tupu. Peintamo posabara ntopotuda, ira nompopea sampe naria vuana nisarumakara. Ira nosabara nompopea uda anu mompakatuvu tuda-tudara.

⁸Komiu muni kana mosabara bo maroo rara, apa naparamo eo kakava nTupu.

⁹Nee mongalu bo mosipakasala, ala komiu ledo rahuku nu Alatala. Toramo! Domo masae makavamo Ia mombatangara manusia.

¹⁰Sampesuvu-sampesuvu, oseakamo jonjo nabi-nabi nggaulu anu nompasimbayu tesa nu Alatala. Ira batena nosabara bo naroo rarara tempo nombarasai kasusa bo kapari.

¹¹Iramo niuli ntona nasana sabana karoo rarara tempo nirasaira susa bo pari. Nisanimumo tesa posabara Nabi Ayub nggaulu. Ia naroo rarana riara kasusa bo kapari, bo kaupuna Tupu nompakabelo mpanjili katuvuna. Apa Tupu nabelo raraNa bo naasi mpuu mataNa nanggita kita!

¹²Sampesuvu-sampesuvu, paraluu mpuu rapariaramiu hitu: nee mompakaroso tesa ante sumpa. Nee mosumpa manggasangai langi bara tana bara nuapa-nuapa ntanina. Ane patujumiu manguli iyo, naganamo raulimiu “iyo”. Ane patujumiu manguli ledo, naganamo raulimiu “ledo”. Nee mosumpa ala komiu ledo rahuku nu Alatala.

- ¹³Ane maria komiu nambela kasusa, ia kana mosambaya. Ane maria tona nadamba, ia kana modade mantoiya Tupu.
- ¹⁴Ane maria tona nadua, ia kana mompokio topanggeni agama mosambaya ka ia. Ira kana mombagese tona nadua haitu ante lana bo mekakai nte Tupu.
- ¹⁵Ane ira mosambaya bo mpuu-mpuu momparasaya, Tupu mompakabelo dua ntona haitu. Bo ane maria dosa nipoviana, Tupu mombaampungi ia.
- ¹⁶Haitumo sabana komiu kana mangaku salamiu, bo mosiposambayaka, ala duamiu rapakabelo. Posambaya ntona nanao nabisa mpuu.
- ¹⁷Toramo Nabi Elia nggaulu. Ia manusia biasa, nasimbayu mpo kita. Ia nosambaya ante mpuu-mpuu rarana ala ledo mauda. Bo mpuu-mpuu ledo nauda talu-mpae santanga kasaena.
- ¹⁸Naupu sia, nosambaya vai ia pade nakava uda lako ri langi bo tuda-tuda ntona naria vaimo aselena.
- ¹⁹Sampesuvu-sampesuvuku. Ane maria roamiu nasalandala lako ri pepatuduki nakana, bo maria roana manggeni ia manjili ri dala nakana, haitumo pokainggu nabelo.
- ²⁰Tona nompakeni roana nadosa haitu manjili lako ri dalana nasala, ia mompakasalama roana haitu lako ri pehuku nu Alatala sampe ri kasae-saena, bo dosana nadea raampungi. Tabe lako nte yaku, Yakobus

1 Petrus

1 Petrus 1

¹⁻²Sampesuvu-sampesuvu anu nipelisi majadi todea nu Alatala bo nonturo mpo topesovo nasimpotare ri umba-umba ri propinsi Pontus, Galatia, Kapadokia, Asia bo Bitinia: Sura hitu lako nte yaku i Petrus, suro i Yesus Kristus. Kuperapi Alatala mpuu-mpuu mabelo nte komiu bo mompakatinonto raramiu. Komiu nipelisi nTuamata Alatala majadi todeaNa nangoseaka niaNa mboto lako ri lamba pamulana. Bo Nosa Gasa nompakajadi komiu todea nagasa, nipatani ka Alatala, ala komiu matundu nte i Yesus Kristus bo dosamiu raampungina sabana raaNa natiti ri kayu salib.

³Masipato kita mombatoiya Alatala, Tuama nTuputa Yesus Kristus! Nambaso mpuu asi mataNa ka kita, sampe nidekeiNa katuvu nabaru ka kita. Bo katuvu nabaru haitu nitarimata sabana i Yesus Kristus nipakatuvu mpanjili lako ri kamateNa. Haitumo sabana panjarumakata naroso.

⁴Kita nanjarumaka manggava belo nipakadia nu Alatala ka pura-pura todeaNa. Belo haitu ledo magero, ledo mapopo, ledo mabali, bo nijagaiNa ri suruga ka kita.

⁵Sampesuvu-sampesuvu, komiu masipato mantarima belo haitu, sabana komiu nomparasaya i Yesus. Bo komiu batena nijagai nu Alatala ante kuasaNa ala komiu mamala mombarasai belo anu nasadiamo radekeiNa ka komiu ri kaupu nu dunia.

⁶Komiu kana madamba-damba sabana belo nisarumakamiu haitu. Komiu kana madamba naupa sii-sii tempo komiu da natuvu ri dunia komiu nombarasai kasusa bo nambela mpengaya-ngaya pesori.

⁷Patuju nu pesori-pesori haitu ala rasani kaliangu pomparasayamiu. Bulava nigonu ante apu ala rasani bara maria galona bara ledo. Pomparasayamiu noalipa pade bulava anu namala magero. Jadi pomparasayamiu kana rapesori muni ante mpengaya pesori. Bo ane pomparasayamiu mpuu-mpuu maliangu,

komiu ratoiya bo rabila bo rapakaoge tempo i Yesus Kristus makava mpanjili ri dunia.

⁸Nau ledo nikitamiu Ia bara ipia, komiu nompotove Ia. Bo nau ledo nikitamiu Ia sii-sii, tapi komiu batena nomparasaya Ia. Bo kadamba raramiu naoge mpuu sampe ledo rapakule mombasovadakana.

⁹Nadamba mpuumo raramiu sabana nitarimamiumo asele pomparasayamiu, haitumo komiu nipakasalama lako ri pehuku sampe ri kasae-saena.

¹⁰⁻¹¹Nabi-nabi nu Alatala nggaulu nangelo pakabelo-belo ala rasanira berimba Alatala mompakasalama manusia. Nibotora belo nidekei nu Alatala ka komiu, anu nirasaimiu sii-sii. Nosa Gasa i Kristus riara ntaira nompopaisani ka ira kasusa bo kapari anu mambela ka i Kristus, bo nipopaisaniNa muni kuasa bo kaoge rakava i Kristus maliu kasusa bo kapari haitu. Tapi dopa nisani nu nabi-nabi berimba kadupa nu tesa-tesa nibotora. Haitumo sampe niparesara pakabelo-belo ala rasanira tempona bo berimba kadupana pura-pura anu nibotora haitu.

¹²Bo Alatala nompakalanto ka ira anu nibotora haitu ledo nosinggambela ante ira mboto tapi nosinggambela ante komiu anu natuvu sii-sii. Kajadia-kajadia nibotora haitu, nipatolele ntopanggeni Kareba Belo ka komiu sii-sii. Nikenira kareba haitu ante petulungi Nosa Gasa nu Alatala, anu nipopanau lako ri suruga. Kakanana malaeka-malaeka nTupu mboto nadota mangisani batuana kajadia-kajadia pangane anu nipatolele ka komiu.

¹³Sampesuvu-sampesuvu, naria mamimo panjarumakata naroso. Sabana haitu, komiu kana mompakanoto raramiu bo mainga, bo maroo manjarumaka belo radekei ka komiu tempo i Yesus Kristus makava mpanjili.

¹⁴Komiu kana matuvu mpo ana-ana nu Alatala anu natundu nte Ia. Nee mangoseaka dota raramiu nadaa anu nombakuasai komiu tempo komiu da natuvu ri kalandana.

¹⁵Tapi komiu kana magasa ri mpengaya-ngaya anu nipoviamiu, sabana Alatala muni nagasa bo Iamo nompokio komiu majadi todeaNa.

¹⁶Apa naria tesa nu Alatala riaru Buku Gasa nanguli, “Komiu kana mokainggu magasa, sabana Yaku nagasa.”

¹⁷Sampesuvu-sampesuvu, komiu nanggasai Alatala Tuamamiu tempo komiu nosambaya. Jadi komiu kana matuvu mekou nte Ia ane komiu da nonturo mpo topesovo ri dunia hitu. Apa Iamo mombatangara pura-pura tona nangoseaka pokainggura mboto bo Ia ledo nompelenje.

¹⁸Pekoumo nte Alatala sabana nisanimiu mbotomo sompo nibayariNa mombakabasaka komiu lako ri katuvumiu nggaulu. Katuvumiu ledo ria gunana haitu, nipasialamiu lako nte ntotua nggaulu. Tapi Alatala nombakabasaka komiu lako ri katuvumiu nokolu haitu. Sompo ledo nibayariNa ante mbarambara anu ledo nainti evamo bulava atau salaka

¹⁹tapi nibayariNa ante anu nelabi noali, haitumo raa i Kristus. I Kristus nireke mpo ana bimba nadoli bo ledo nasala nisambale manjambei komiu.

²⁰Dopame dunia nipajadi, Ia nipakatantu nu Alatala mami majadi topantolo dosa manusia. Bo ri tempo sii-sii napara kaupu nu dunia Ia nakava ri dunia hitu mompakasalama komiu.

²¹Iamo sampe komiu nomparasaya Alatala. Alatala nompakatuvu mpanjili Ia lako ri kamateNa bo nombadekei kuasa bo kaoge nipokumaaka ka Ia. Jadi haitumo sampe komiu nomparasaya bo nanjarumaka Alatala.

²²Sampesuvu-sampesuvu, katuvumiu nipakagasamiu sabana komiu nangoseaka pepatuduki nakana. Haitumo sampe komiu namala nompotove sampesuvumiu sampomparasaya ante rara naliangu. Sabana haitu, posipotovemo ante rara mpuu-mpuu.

²³Apa komiu nipajadi nu Alatala manusia nabaru, bo katuvumiu nabaru haitu ledo nopuna lako ri manusia anu mamate. Katuvumiu nabaru nopuna lako nte Alatala anu ledo mamate. Komiu nanggava katuvu nabaru haitu sabana komiu nomparasaya Tesa nu Alatala anu natuvu bo naroo sampe ri kasae-saena.

²⁴Riara Buku Gasa nitulisi ivei: “Katuvu manusia pura-pura nasimbayu mpo kavoko, bo pura-pura kuasa bo kagayana mpo sese nggavoko. Kavoko haitu nalele bo sesena naronto.

²⁵Tapi Tesa nu Alatala bate-batena sampe ri kasae-saena.” (Yesaya 40:6-8) Tesa nu Alatala haitumo Kareba Belo anu nipatolele ka komiu.

1 Petrus 2

¹Sampesuvu-sampesuvu, nikavamiumo katuvu nabaru. Sabana haitu, tumo mokainggu nadaa. Nee modava. Nee aga mabelo ri sumba, nee masiriati bo nee mompakadaa tona ntanina.

²Ngana kodi dako nesuvu naino rarana nantomi uve njusu ntinana. Ivesia muni komiu kana maino rara mangepe Tesa nu Alatala anu najadi kandeana gasa ka nyawamiu. Ivesiamo posisanimiu nte Alatala mantambai maroso, sampe ratarimamiu pura-pura belo nipakasadiaNa ka tona nipakasalamaNa.

³Komiu kana maino ka Tesa nu Alatala, apa nirasaimiu mamimo kabelo rara i Pue.

⁴Jadi pekoumo nte i Yesus! Ia nirapaka vatu natuvu anu nipoara nu manusia sabana nisarumakara ledona gunana. Tapi Alatala nompelisi vatu haitu sabana haitu vatu tobelona ri panggitaNa.

⁵Komiu muni nasimbayu mpo vatu-vatu natuvu, jadi dekei Alatala mompake komiu majadi banua petupu ka Ia. Bo riara banua petupu haitu komiu majadi mpo topanggeni pesomba, anu natuvu nipatani ka Alatala. Bo komiu namala metupu nte Ia ante pekeniaka Nosa Gasa. Petupumiu haitu najadi pesomba anu rapokonoa rara nu Alatala sabana anu nipovia i Yesus Kristus.

⁶Apa riara Buku Gasa naria tesa nu Alatala ivei: “Epemo! Yaku nompelisi sangu vatu noali mpuu bo vatu haitu nituuKu ri ngata Sion majadi vatu pandasi nelabi karosona. Isema-sema manjarumaka vatu haitu, ledona ntoto manjoso rara.” (Yesaya 28:16)

⁷I Kristus, anu nirapaka vatu haitu, noali mpuu ka komiu topomparasaya. Tapi ane tona ledona nomparasaya, ia nasimbayu mpo anu nitulisi riara Buku Gasa

ivei: “Vatu nipoara ntopovia banua, vatu haitumo anu nopokopa ka banua haitu.” (Mazmur 118:22)

⁸Bo naria tesa ntanina ri Buku Gasa ivei: “Vatu haitu nompakatepasunu tona. Vatu haitu nompakadungga ira.” (Yesaya 8:14-15) Ira natepasunu sabana ira ledo nadota nangoseaka Tesa nu Alatala, bo haitumo bagiara nipakatantu nu Alatala ka ira.

⁹Tapi sampesuvu-sampesuvu, komiu ledo mpo ira haitu. Komiumo todea nipelisi nu Alatala. Komiumo nipelisi majadi mpo topanggeni pesomba anu mantulungi magau. Komiumo todeaNa nipatani ka Ia, komiumo najadi bagiaNa. Komiu nipelisi nu Alatala mompatolele panggaviaNa anu nipokumaaka ka tona ntanina. Iamo nompokio komiu mesuvu lako ri kalandana ala matuvu riaru karemeNa anu nabelo mpuu.

¹⁰Bara ipia komiu ledo todeaNa, tapi sii-sii komiu najadi todeaNamo. Bara ipia komiu ledo nipoasi mataNa, tapi sii-sii nirasaimiumo asi nu mataNa!

¹¹Sampesuvu-sampesuvu nipotoveku, katuvuta ri dunia hitu nasimbayu mpo topesovo bo torata anu nonturo aga sampalai. Jadi yaku mpuu-mpuu nerapi nte komiu, nee raoseakamiu dota rara nadaa anu batena nangeva nyawamiu nangoseaka dota nu Alatala.

¹²Komiu kana matuvu ante pokainggu nabelo mpuu ri tatanga ntona ledo nosisani nte Alatala. Ane mabelo pokainggumiu, nau rasalaira komiu bo raulira komiu novia anu nadaa, tapi kaupuna kana rapangakura nabelo pokainggumiu, bo ratoiyara Alatala tempo Ia makava.

¹³Pekoumo nte pura-pura topoparenta nipakatantu nu manusia, sabana haitumo nipodota i Pue. Pekoumo nte magau mbaso apa ia nalangapa nturona.

¹⁴Bo pekoumo nte gubernur-gubernur sabana iramo nipopale nu magau mbaso mombahuku tona nadaa bo mombatoiya tona nabelo pokaingguna.

¹⁵Alatala nompokono komiu mokainggu nabelo ala tona nadoyo anu ledo nisanina nuapa-nuapa domo mabia manjalai komiu, apa malantomo pesalaira haitu ledo nakana.

¹⁶Komiu kana matuvu mpo tona nikabasaka lako ri pehuku nu dosa. Tapi nee sampe haitu majadi loga ka komiu movia anu nadaa! Komiu kana matuvu mpo batua nu Alatala anu natundu nte Ia.

¹⁷Bilamo pura-pura tona. Potovemo sampesuvumiu sampomparasaya. Pekoumo nte Alatala bo bilamo magau!

¹⁸Komiu anu najadi potudua kana mekou nte puamiu bo mpuu-mpuu mombabila ia, nau ia tona nanondo bo nalusu rara, nau ia tona nasoa.

¹⁹Ane komiu rapandasa nau komiu ledo nasala, bo komiu mosabara riara kasusa haitu sabana nitoramiu dota nu Alatala, komiu ratoiya nu Alatala.

²⁰Ane komiu raboba sabana komiu nasala, bo ane komiu mosabara riara kasusa haitu, ledo masipato komiu ratoiya nu Alatala! Tapi ane komiu rapandasa sabana pokainggumiu nabelo, bo ane komiu mosabara riara kasusa haitu, komiu mpuu-mpuu ratoiya nu Alatala.

²¹Alatala nompokio komiu mosabara riara kasusa, nau komiu ledo nasala. Apa i Kristus nombarasai kasusa ala manggeni belo ka komiu, bo nidekeiNa jonjo ka komiu ala komiu mompasiala pokaingguNa.

²²Ia ledo sanggania novia dosa, ledo sanggania Ia nodava.

²³Tempo Ia nisalai ntona, ledo nibalasiNa. Tempo Ia nipandasa, Ia ledo nesava. Tapi Ia aga nanjarumaka Alatala, Topotangara nanao anu manjaliku Ia.

²⁴I Yesus mbotomo nanjimbuaka dosa-dosata tempo Ia nipaku ri kayu salib, ala kita rakabasaka lako ri kuasa nu dosa bo matuvu mangoseaka dota nu Alatala. Bo kita nipakabelomo lako ri baka-baka i Kristus.

²⁵Tempo bara ipia, komiu mpo bimba-bimba nasalandalamo. Tapi sii-sii komiu nipopanjalimo nte Topoevu anu nombajagai katuvumiu.

1 Petrus 3

¹Ivesia muni komiu totua-totua mombine kana mekou nte bereimiu langgai. Apa ane bereimiu ledo nomparasaya tesa nu Alatala, pekoumiu haitu mamala mompakeni ia momparasaya. Ledo paraluu raulimiu nuapa-nuapa ka ia,

- ²sabana ane rakitana komiu nekou nte Alatala bo nokainggu nagasa, ia muni madota momparasaya.
- ³Nee sampe kagayamiu aga ri savalikuna, evamo nompegaya buluamiu bara nompake ramba-ramba bulava bara pakea nasuli-suli.
- ⁴Tapi kagayamiu kana mopuna lako riaru ntaimiu, haitumo lako ri inggumi nalusu bo natinonto. Haitumo kagayana anu ledu ntoto malipo bo noali mpuu ri panggita nu Alatala.
- ⁵Mombine-mombine nagasa anu nanjarumaka Alatala tempo nggaulu, nekou nte bereira langgai. Ivesiamo nipakagayara karora.
- ⁶Jonjona, i Sara nanturusi anu niuli i Abraham ka ia bo nanggasangai i Abraham “i pua”. Bo komiu masimbayu nte i Sara ane komiu batena mokainggu mabelo bo ledu maeka ka nuapa-nuapa.
- ⁷Ivesia muni komiu totua-totua langgai. Komiu kana matuvu mosangganingani ante bereimiu ante pokainggu nanoto. Toramo, mombine ledu nasimbayu karosona ante langgai. Bilamo ira sabana ira muni nidekeika nu Alatala katuvua nabelo sampe ri kasae-saena nasimbayu mpo komiu langgai. Bilamo ira ala ledu maria nuapa-nuapa mombalava posambayamiu.
- ⁸Jadi sampesuvu-sampesuvu, kupapolamo tesaku. Komiu pura-pura kana mosangu pekiri bo mosangu rara. Posimpotovemo mpo tona nosampesuvu. Komiu kana mosipoasi mata bo nee malanga rara.
- ⁹Ane maria tona movia anu nadaa nte komiu, nee rabalasi ira ante anu nadaa. Ane rasalai ntona komiu, nee rapesava. Agina komiu merapi Alatala mombadekei belo ka ira. Apa komiu nipokio nu Alatala manggeni belo ka tona ntanina, ala komiu manggava belo lako nte Ia.
- ¹⁰Riaru Buku Gasa nitulisi ivei: “Isema-sema madota matuvu madamba bo mombarasai katuvua mabelo, ia kana mombajagai dilana ala nee motesa anu nadaa bo nee modava.

¹¹Ia kana mombakabasaka pokaingguna nadaa bo movia anu nabelo. Ia kana mangelo posinggabelo bo mompasimbuku matuvu mosinggabelo ante tona ntanina.

¹²Apa Tupu batena nompariara tona nanao anu nangoseaka dotaNa, bo Tupu nasaro nangepe posambayara. Tapi nievaNa tona nokainggu nadaa.” (Mazmur 34:13-17)

¹³Ane komiu masaro mokainggu nabelo, isema movia anu nadaa ka komiu?

¹⁴Tapi nau komiu mombarasai kasusa sabana pokainggumiu nabelo, mauntu mpuumo komiu! Nee maeka ka tona, bo nee makini raramiu.

¹⁵Tapi bilamo i Kristus riara ntaimiu bo pakaoge Ia sabana Ia Tupumiu nagasa. Bo ane rapekutana ntona komiu, nuapa sabana komiu nanjarumaka i Pue, komiu kana masadia mesana ka ira. Bo pesanamiu haitu kana rapovia ante ede rara bo ante tesa-tesa nalusu.

¹⁶Bo komiu kana matuvu ante rara ntai nagasa, mbelaka maria tona manjalai pokainggu nabelo nipoviamiu sabana pangoseakamiu i Kristus, ira kana maeya mboto.

¹⁷Aginapa kita mombarasai kasusa sabana pokaingguta nabelo, ane ivesia mami dota nu Alatala, pade mombarasai kasusa sabana pokaingguta nadaa.

¹⁸Apa i Kristus muni nombarasai kasusa nau ledo novia anu nadaa. Ia aga sanggani namate nombasompo dosa manusia nagana sampe ri kasae-saena. Ia ledo nasala, tapi Ia namate nanjambei kita anu nasala, ala mompoposinggabelo kita ante Alatala. Ia nipatesi tapi nipakatuvu mpanjili ante kuasa Nosa Gasa nu Alatala.

¹⁹Pade Ia nikenika nu Nosa Gasa hau nompatolele Tesa lako nte Alatala ka nyawa-nyawa ntomate anu nitarunggu ri ponturo ntomate,

²⁰haitumo nyawa ntona anu ledo natundu nte Alatala tempo Nabi Nuh nggaulu. Tempo Nabi Nuh da novia kapala, naoge mpuu posabara nu Alatala mompopea ira majea lako ri dosa-dosara. Tapi tempo uve nanggabuntu nompakalodo isi

dunia, aga uvalu tona nesavi kapala haitu. Bo kapala haitu noliu ri uve oge sampe ira uvalu nipakasalama.

²¹Uve oge haitu nirapaka ada pediu anu nompakasalama kita sii-sii. Ada pediu haitu ledo ada pompegasa tapa lako ri karota, tapi tandana kita topangoseaka i Yesus. Ada haitu nireke pojanjita nte Alatala ala kita mangoseaka Ia sabana niampungina dosata. Bo niampungina mpuu dosata sabana i Yesus natuvu mpanjili lako ri kamateNa.

²²Bo i Yesus neore hau ri suruga bo sii-sii nonturo ri ponturo nibila ri panggana nu Alatala bo nomparenta nosanggani-nggani nte Ia. Bo pura-pura malaeka bo topoparenta bo tonakuasa ri laerava natundu nte Ia.

1 Petrus 4

¹Kristus mboto nombarasai kasusa bo kapari tempo Ia natuvu ri dunia hitu. Jadi haitumo sabana komiu muni kana mompakaroo raramiu ala masadia mombarasai kasusa bo kapari nasimbayu mpo Ia. Apa isema-sema nombarasai kasusa bo kapari ri karonu mboto domo nadota novia dosa.

²Jadi da natuvu riaru dunia hitu, komiu kana matuvu mangoseaka dota nu Alatala, nee mangoseaka dota rara manusia anu nadaa.

³Apa naganamo logamiu bara ipia nangoseaka pokainggu-pokainggu ntona ledo nosisani nte Alatala. Bara ipia komiu aga natuvu nangoseaka dota raramiu nadaa ante pokainggu naruto, komiu nabiasa nalangu-langu, komiu nasiromu nangande mpebasa bo nanginu, bo komiu nompakande tupu-tupu ntanina, pokainggu anu nepakarunggu.

⁴Tapi sii-sii nahera roa-roamiu sabana komiu domo nangoseaka ira nompebasa nokainggu nadaa ante ledo ria rekena, bo haitumo sabana nisalaira komiu.

⁵Tapi makava tempona, ira kana mompangaku poviara nadaa haitu ri ngayo nu Alatala. Bo Alatala nasadiamo mombatangara pura-pura tona, nau tona da natuvu bo muni tona namatemo.

⁶Haitumo sampe Kareba Belo nipatolele muni ka tona namatemo. Ira namatemo sabana pehuku nu Alatala, nasimbayu nte pura-pura manusia

ntanina. Tapi Kareba Belo nipatolele ka ira ala nyawara mamala matuvu mabelo mangoseaka dota nu Alatala.

⁷Naparamo kaupu nu dunia. Jadi komiu kana mainga bo mompakanoto raramiu ala komiu mamala mosambaya.

⁸Tapi anu nelabi nopoko, komiu kana mpuu-mpuu mosimpotove. Apa ane kita mompotove roata, kita masadia muni mombaampungi tona ntanina.

⁹Komiu kana majole mantarima torata riara banuamiu bo nemo mongau-ngau.

¹⁰Kita simbo nidekeika pompakule ledo nasimbayu lako nte Alatala, bo kita kana mompake pakabelo pompakule nipatava ka kita mombatulungi tona ntanina.

¹¹Jonjona, isema-sema nidekeika pompakule mompasimbayu Tesa nu Alatala kana motesa mpo tona niposumba nu Alatala mboto. Isema-sema nidekeika pompakule mantulungi tona ntanina, kana mantulungi ante karoso nidekei nu Alatala ka ia. Pakemo pompakule-pompakule haitu ala nau damo nuapa majadi, Alatala ratoiya bo rabila sabana anu nipovia i Yesus Kristus ri katuvumiu. Alatalamo nakuasa bo masipato ratoiya bo rabila sampe ri kasae-saena. Amin!

¹²Sampesuvu-sampesuvu nipotoveku, nee mahera komiu nombarasai susa bo pari nantamo mpuu, mpo kapane nu apu. Haitu najadi mompakaliangu pomparasayamiu. Nee mahera bo nee rapekirimiu kasusa nirasaimiu haitu ledo ria kasimbayuna.

¹³Kakanana komiu kana madamba, sabana komiu nombarasai kasusa bo kapari nasimbayu mpo anu nirasai i Kristus mboto. Apa ane komiu nombarasi susa bo pari mpo nirasai i Kristus, mambaso mpuu kadamba nu raramiu tempo Ia makava mpanjili. Tempo haitu, kaoge i Kristus anu nipokumaaka rapopakita ka pura-pura manusia.

¹⁴Ane komiu rasalai ntona sabana komiu nangoseaka i Kristus, kana masana mpuumo komiu. Apa ane komiu rasalai sabana pomparasayamiu, batuana Nosa Gasa nu Alatala anu nakuasa, naria mpuu riara nggatuvumiu.

¹⁵Nee sampe maria komiu mombarasai kasusa sabana nepatesi bara nangangga bara novia anu nadaa atau nombagalo urusa ntona ntonina.

¹⁶Tapi ane komiu mombarasai kasusa sabana komiu topomparasaya, nee maeya matamiu. Ulimo tarima kasi ka Alatala, apa komiu mpuu-mpuu topangoseaka i Kristus.

¹⁷Nakavamo tempona Alatala mombatangara pura-pura manusia. Bo kita todeaNa mboto mokolu ratangaraNa. Ane kita todeaNa mokolu ratangaraNa natantu mantamo mpuumo pehukuNa ka tona ledo nadota nomparasaya Kareba Belo lako nte Ia!

¹⁸Riara Buku Gasa nitulisi ivei: “Iyapa tona nanao nakaja rapakasalama, Nemopa tona nadosa anu ledo natundu nte Alatala!” (Amsal 11:31)

¹⁹Jadi sampesuvu-sampesuvu, ane dota nu Alatala komiu kana mombarasai kasusa bo kapari, nee menonto movia nabelo. Sarumakamo Alatala manjaliku komiu. Apa Iamo nompajadi komiu, bo Ia namala raparasaya mompakadupa pojanjiNa ka komiu.

1 Petrus 5

¹Naria muni anu kuuli ka komiu pakeni ntodea topomparasaya! Yaku nabia notulisi ka komiu sabana yaku muni pakeni ntopomparasaya, bo yaku mboto nanggita kasusa bo kapari nirasai i Kristus bara ipia. Bo ane i Kristus makava mpanjili bo mompopakita kuasaNa bo kaogeNa ka pura-pura manusia, yaku muni manggava bagia ri kuasaNa bo kaogeNa haitu. Jadi yaku mpuu-mpuu nerapi nte komiu

²ala komiu mompiara todea nu Alatala anu niparasayaka komiu, nasimbayu mpo topoevu nompiara bimba-bimbana. Piaramo ira ante damba rara, nangoseaka dota nu Alatala, nemo mpo tona nipasuu. Bo nee aga mangelo untu ka karomiu mboto, tapi tuimo pokarajaa haitu sabana komiu mpuu-mpuu madota mantulungi todea topomparasaya.

³Bo nee damo dota-dota mompatundu topomparasaya anu niparasayaka komiu, tapi nabelopa komiu majadi jonjo anu masipato rapasialara.

⁴Bo tempo i Kristus, Topoevu Nopoko, makava mpanjili ri dunia, radekeiNa ka komiu tambo, haitumo bagia ri kuasaNa bo kaogeNa anu ledo maupu-upu.

⁵Ivesia muni komiu da namuda. Komiu kana mekou nte totua. Bo komiu topomparasaya pura-pura kana mompakaede raramiu bo mositulungi. Apa nitulisi riaru Buku Gasa: “Alatala nangeva tona nalanga rarana, tapi nipoasiNa tona naede rarana.” (Amsal 3:34)

⁶Jadi sampesuvu-sampesuvu, pakaedemo raramiu, bo pekoumo nte Alatala naroso ala rabilaNa komiu ri tempo nipakatantuNa.

⁷Dekeimo pura-pura kakini raramiu ka Ia apa Ia bate-batena nompariara komiu.

⁸Komiu kana mainga bo manoto rara, sabana balimiu, Magau nu Seta hau tumai nasimbayu mpo singa nongao-ngao nompengavu tona rasakana.

⁹Tapi nee raepe ia! Aginamo komiu batena momparasaya bo mangoseaka Alatala apa nisanimiu mbotomo topomparasaya ri umba-umba ri dunia nombarasai susa bo pari nasimbayu mpo komiu muni.

¹⁰Komiu kana mombarasai susa, tapi ledo masae. Maliu haitu Alatala mboto mompakagana nuapa-nuapa nakura nte komiu. Ia mompakaroo raramiu sampe ledo maria tona ntanina mamala mompopolengga atau mompopoura pomparasayamiu. Alatala mpuu-mpuu mompakaroso komiu apa nabelo mpuu raraNa bo Iamo nompokio komiu manggava bagia ri kuasaNa bo kaogeNa sampe ri kasae-saena sabana komiu nosangu rara ante i Kristus.

¹¹Iamo nakuasa sampe ri kasae-saena. Amin!

¹²Yaku notulisi sura nambuku hitu ante petulungi i Silas, sampesuvuta sampomparasaya. Nisaniku ia namala raparasaya. Patujuku notulisi sura hitu ala mompakaroso raramiu bo mompakalanto ka komiu Alatala mpuu-mpuu nompotove bo nombatulungi kita evamo nitesaku pangane. Jadi komiu kana batena manjarumaka pepotoveNa haitu.

¹³Tabé lako nte sampesuvumiu sampomparasaya anu naria ri sii ri ngata Babilon. Ira muni nipelisi nu Alatala nasimbayu mpo komiu. Bo tabe muni lako nte anaku i Markus.

¹⁴Posipakabotemo tabe ante tove, mpo tona nosampesuvu sampomparasaya. Kuperapi Alatala mombadekei katinonto ka komiu pura-pura anu nosangu rara ante i Kristus. Tabé lako nte yaku, Petrus

2 Petrus

2 Petrus 1

¹Sampesuvu-sampesuvuku anu mpuu-mpuu nomparasaya i Yesus Kristus, nasimbayu mpo kami. Iamo Alatala bo Topompakasalama kita, anu nompopompakule pura-pura kita nomparasaya sabana Ia nanao bo ledo nompelenje. Sura hitu lako nte yaku, i Simon Petrus. Yaku batua bo suro i Yesus Kristus.

²Kuperapi Alatala bate-batena mombadekei katinonto bo belo ka komiu, sabana komiu nosisani belo ante Ia bo ante Tuputa Yesus.

³Alatala nompake barakaNa mboto mombadekei pura-pura niparaluuta ala rapakuleta matuvu mangoseaka dotaNa. Nitarimata pura-pura haitu sabana kita nosisani ante Alatala, anu nompokio kita mombarasai kaogeNa bo kabeloNa.

⁴Ivesia muni Alatala nombadekei ka kita pedekei-pedekei nijanjiNa, anu nabelo mpuu bo nelabi noguna. Ane rapaketa pedekei-pedekei haitu, domo raoseakata dota rarata nadaa ri dunia hitu anu nompakagero katuvu manusia, bo rapakuleta mompasiala inggu nu Alatala mboto.

⁵Alatala nabelo mpuu nte komiu, jadi haitumo sabana komiu kana mpuu-mpuu mompasimbuku ala pomparasayamiu mosinggeni nte pokainggu nabelo. Bo kana rasanimiu dota nu Alatala.

⁶Komiu kana mombakuasai karomiu mboto bo mosabara nau bara nuapa majadi. Komiu kana batena matuvu mangoseaka dota nu Alatala,

⁷bo mosimpotove nte sampesuvumiu sampomparasaya. Bo komiu kana mompotove pura-pura tona.

⁸Ane komiu noinggu ivehaitu bo mantambaipa, posisanimiu ante Tuputa Yesus Kristus mpuu-mpuu maria gunana, bo maria asele mabelo riaru nggatuvumiu.

⁹Tapi tona ledo noinggu ivehaitu, pekirina nasimbayu mpo tona naburo matana, nalingamo rarana dosana nipegasa bara ipia.

¹⁰Jadi sampesuvu-sampesuvu, pasimbuku mpuumo mokainggu mabelo ala malanto komiu mpuu-mpuu nipelisi nu Alatala bo nipokioNa majadi todeaNa. Ane inggu-inggu pangane ratambaika pomparasayamiu, natantu ledo ntoto moura pomparasayamiu,

¹¹bo Alatala mboto mantarima komiu ante mabelo riaru Poparenta anu naroo sampe ri kasae-saena, haitumo Poparenta nTuputa Yesus Kristus, Topompakasalama kita.

¹²Jadi sampesuvu-sampesuvu, nisanimumo pura-pura anu nitesaku pangane, bo komiu naroo nangoseaka pepatuduki nakana anu nitarimamiu. Tapi naupa ivesia, yaku bate-batena mompopatora ka komiu pura-pura anu nitesaku haitu.

¹³Nipekiriku ane yaku da natuvu, masipato kupakaroso raramiu ante peparatoraku hitu.

¹⁴Apa nisanikumomo domo masae yaku mamate, nangoseaka anu niuli nTuputa Yesus Kristus ka yaku.

¹⁵Jadi kupasimbuku ala nau mamatemo yaku, komiu bate-batena mantora pura-pura tesa haitu.

¹⁶Kami nompatuduki ka komiu kuasa nTuputa Yesus Kristus bo kakavaNa mpanjili ri dunia hitu. Pepatuduki kami haitu ledo nangoseaka patesa-patesa nipovia nu manusia. Tapi kami mboto nanggita kaogeNa anu nipokumaaka.

¹⁷Apa kami mboto naria nosanggani-nggani nte Ia ri bavo nu bulu bara ipia tempo Ia nibila bo nipakareme nTuamata Alatala. Bo suara nu Alatala anu Neliu KaogeNa nanguli ivei: “Hitumo AnaKu nipotoveKu, Iamo nompakadamba raraKu.”

¹⁸Kami mboto nangepe suara lako ri suruga tempona kami nosanggani-nggani ante i Yesus ri bavo nu bulu nagasa.

¹⁹Naupu nikita kami anu najadi ri bulu haitu, nalanto mpuumo ka kami tesa nipasimbayu nu nabi-nabi nu Alatala nggaulu mpuu-mpuu nakana. Nabelo mpuu ane rapariaramiu tesa nu nabi-nabi haitu, sabana tesara nasimbayu mpo poindo nombavanta kalandana. Pariaramo tesara haitu sampe i Yesus makava

mpanjili ri dunia mombavanta komiu ante remeNa, nasimbayu mpo eo bo betue pompaeo nebonda nombavanta dunia.

²⁰Tesa nopoko kana ratoramiu haitumo: tesa-tesa niuli nu nabi-nabi riaru Buku Gasu, ledo mamala rabatuasi aga nangoseaka panggava mboto.

²¹Apa nabi-nabi nombaboto tesa ledo nangoseaka dota nu manusia. Tapi Nosa Gasu nu Alatala nombakuasai tona ala rapasimbayura tesa lako nte Alatala mboto.

2 Petrus 2

¹Tempo nggaulu naria nabi-nabi mpodava neumba ri tatanga ntodea nu Alatala. Bo ivesia muni sii-sii, guru-guru mpodava meumba ri tatangamiu. Rakenira pepatuduki nasala anu mompakagero pomparasaya ntona, bo rasapura i Kristus Tupura anu nombakabasaka ira lako ri kuasa nu dosara. Poviara mboto sampe ira rahuku masalisa.

²Nadea tona mompasiala pokainggu nu guru-guru gahaitu anu nangoseaka dota nu rarara nadaa. Bo pepatuduki nakana rasalai ntona sabana pokainggura haitu.

³Guru-guru mpodava haitu nadoko doi. Haitu sampe ira aga mangelo untu lako nte komiu ante tesa-tesa ledo nakana, anu nikarara mboto. Tapi pehuku ka ira nasaemo nipakatantu. Ira rahuku nu Alatala bo tempona ledo rasoro-soro.

⁴Toramo! Alatala ledo nombakabasaka malaeka-malaekaNa mboto lako ri pehuku tempo ira novia dosa, tapi ninavusakaNa ira riaru narakaa. Ira nisuaraka riaru bolo nalanda bo nirante hamai mompopea tempona ira rahuku ri Eo Potangara bara maipia.

⁵Ivesia muni tempo Nabi Nuh. Alatala ledo nombakabasaka isi dunia nggaulu lako ri pehuku tempo nipakaropuNa ante uve oge sampe namate puramo tona ledo nangoseaka dotaNa. Aga i Nuh sambanua, haitumo aga ira uvalu nipakasalama sabana i Nuh nompatolele ka todea ira kana mokainggu mabelo bo mangoseaka dota nu Alatala.

⁶Ivesia muni ante ngata Sodom bo Gomora. Alatala nombahuku tupu ngata nadaa haitu ante nompalabu ngatara. Haitu najadi peparatora ka tona ri puri anu ledo nangoseaka dota nu Alatala.

⁷Tapi i Lot nipakasalamaNa lako ri pehuku haitu sabana ia tona nabelo. Nasusa mpuu rarana nanggita pokainggu nabuga bo naruto nipovia ntona nadaa haitu.

⁸Apa i Lot haitu tona nabelo. Ia nonturo ri tatangara bo eo-eo nikitana bo niepena poviara nadaa sampe nasusa mpuumo rarana.

⁹Jadi lako ri tesa pangane, nisanita Alatala nompakule mompakasalama topangoseaka dotaNa tempo ira manggava pesori. Bo nipakuleNa muni mombatavani tona nadaa sampe ira rahuku ri Eo Potangara.

¹⁰Tona rahukuNa ivesia, nelabipa tona natuvu nangoseaka dota rarara nadaa bo nabuga, bo tona nanjapuaka kuasa nu Alatala momparenta ira. Guru-guru mpodava haitu nabia mpuu bo nalanga rarara. Ledo naeka ira nanjalai malaeka-malaeka anu nipokumaaka.

¹¹Malaeka-malaeka nu Alatala narosopa bo nakuasapa pade guru-guru mpodava haitu. Tapi naupa ivesia, malaeka-malaeka haitu ledo nanjalai malaeka-malaeka nadaa ri ngayo nu Alatala ante tesa nadaa.

¹²Tapi guru-guru mpodava haitu nanjalai nuapa-nuapa ledo nisanira. Ira nasimbayu nte binata nasoa, anu aga nipoanaka rasaka bo rapatesi. Ira ledo nompekiri, aga natuvu nangoseaka dota-dota anu naria nte ira. Jadi lako ri pokainggura nadaa haitu, guru-guru mpodava kana rapakaropu nasimbayu nte binata-binata nasoa.

¹³Ira rabalasi ante kasusa sabana nipakasusara tona ntanina. Nau eona, nadamba guru-guru mpodava novia mpengaya-ngaya nompakaosa dotara nadaa. Ira nangande nosanggani nte komiu mpo tona nabelo, tano pokainggura mpuu-mpuu nepakaeya! Ira aga nadamba nompebasa nangoseaka dota rarara nadaa.

¹⁴Ira bate-batena naino mompogau sambara mombine nikitara. Ledo nabasabasa ira novia dosa! Ira nombaoapa tona ledo naroso pomparasayana ala movia

dosa. Bo najadi kabiasara nario mata ante ledo ria kabasa-basana. Ira mpuu-mpuu tona nasurukavu!

¹⁵Nipalaisiramo dala nakana bo nasalandalamo ira. Nipasialara pokainggu i Bileam ana i Beor nggaulu. Ia aga naino ka doi rakavana lako ri poviana nadaa.

¹⁶Keledai nipesavi i Bileam aga binata anu ledo notesa. Tapi Alatala nombadekei kuasa ka keledai haitu notesa ante suara manusia, bo keledai haitu nangonteaka i Bileam, nabi nadoyo. Jadipa domo nipapola i Bileam niana nadaa haitu.

¹⁷Guru-guru mpodava haitu nasimbayu mpo mata nu uve naotimo. Ira nasimbayu mpo kulimu vuri aga niburu mpoiri narimboso. Alatala nompakasadia ponturo nalanda mpirika ka ira.

¹⁸Apa ira nombasovadaka ante nalanga rara, tapi tesa-tesara ledo ria gunana. Ante tesara niopara tona dako nenonto novega nte roara nadaa pokaingguna. Tona haitu niopara ante nompadidisi dota rarara nadaa ala raoseakara mpanjili pokainggu nadaa anu dako nikabasakara.

¹⁹Guru-guru haitu nojanji ivei: “Ane raoseakamiu pepatuduki kami, komiu makabasaka lako ri atura-atura! Komiu mamala movia nuapa-nuapa rapodotamiu.” Tapi nau niulira makabasaka, ira mboto nikuasai pokainggu-pokainggu anu nompakarugi manusia. Apa tona nidagi dota rarana nadaa, batuana ia nipobatua nu dota rarana haitu.

²⁰Mandasa mpuumo ira! Apa bara ipia ira mpuu-mpuu nosisani nte Tuputa Yesus, Topompakasalama kita, sampe ira nikabasakamo lako ri pokainggu nadaa anu nompakagero manusia ri dunia hitu. Tapi naupu sia, ira nipemala bo nikuasai nu pokainggu-pokainggu nadaa haitu mpanjili. Kaupuna, nelabipa kandasa katuvura pade ri pamulana.

²¹Aginapa ledo sangganira rasanira dala nakana, pade rasanira bo maupu sia aga rakabasakara parenta-parenta nu Alatala nipatolele ka ira.

²²Anu najadi nte ira nasimbayu nte porapa nanguli ivei: “Asu nekubu, nikandena mpanjili,” bo “Bavu dako nandiu notampo mpanjili.”

2 Petrus 3

¹Sampesuvu-sampesuvu nipotoveku, hitumo suraku karanduana ka komiu. Riara suraku karanduana hitu muni yaku nompasimbuku mompopatora ka komiu pepatuduki nakana ala pekirimiu batena magasa.

²Patujuku, ala ratoramiu tesa-tesa niboto nu nabi-nabi nu Alatala nggaulu, bo ala ratoramiu muni parenta-parenta lako nte Tuputa Yesus, Topepakasalama. ParentaNa nipasimbayu nu suro-suroNa anu nakava nte komiu.

³Anu nopoko kana ratoramiu, ri tempo napara kaupu nu dunia kana meumba tona nikuasai dota rarara mboto anu nadaa. Ira mompongeika komiu

⁴bo manguli, “I Yesus nojanji makava mpanjili ri dunia. Tapi ledo ria nakava. Tantu ledo majadi, sabana lako ri tempo kamate ntotuata nggaulu sampe sii-sii, dunia hitu ledo nabali-bali. Pura-pura bate-batena nasimbayu lako ri lamba pamulana tempo dunia nipajadi sampe sii-sii.”

⁵Tona notesa ivesia, nitunggaira nombakalingasi anu najadi bara ipia, haitumo, Alatala nompajadi langi nggaulu ante tesaNa, bo ante tesaNa muni tana nipajadiNa lako ri uve bo kabatana neumba lako ri tatanga nu uve.

⁶Bo nikalingasira muni Alatala nompakaropu isi dunia nggaulu ante uve, haitumo ante uve oge anu nanggabuntu nompakalodo isi dunia.

⁷Sii-sii ledo nikitata anu nabali, tapi langi bo tana anu naria sii-sii nijagai ante kuasa tesa nu Alatala sampe rapakaropu ante apu bara maipia. Sii-sii dunia da nijagai sampe Eo Potangara bara maipia tempo pura-pura tona anu ledo nangoseaka dota nu Alatala rahuku.

⁸Tapi, sampesuvu-sampesuvu nipotoveku, nee rakalingasimiu tesa hitu: Ri panggita nTupu, sanjobu mpae nasimbayu mpo saeo, bo saeo nasimbayu mpo sanjobu mpae.

⁹Nadea tona nanguli i Pue nokalera nompakadupa pojanjiNa makava mpanjili ri dunia. Tapi Ia ledo nokalera. Ia dopa nakava sabana Ia nosabara nte komiu, Ia madota ala ledo maria saitoa tona rahuku sampe ri kasae-saena. DotaNa, ala pura-pura tona manggava loga majea lako ri dosara.

¹⁰Tapi i Pue Yesus mpuu-mpuu makava mpanjili! KakavaNa ledo rasani-sani ntona, nasimbayu mpo kakava ntopangangga. Ri eo haitu langi malipo sanggani ante moni mamangga mpuu mpo suu nu apu oge. Bo pura-pura anu naria ri langi maropu rakande nu apu, bo dunia ante pura-pura isina malipo sanggani.

¹¹Jadi sampesuvu-sampesuvu, ane pura-pura anu naria kana maropu ivesia, berimbamo kita? Natantumo kita masipato mangoseaka dota nu Alatala bo matuvu ante pokainggu magasa.

¹²Apa kita hii nantongoraka Eo Potangara nipakatantu nu Alatala. Jadi kita kana mompasimbuku matuvu magasa ala Eo haitu masalisa makava. Ri Eo haitu langi maropu rakande nu apu bo pura-pura anu naria ri langi magonu ante kapanena.

¹³Tapi kita mompopea anu nijanji nu Alatala, haitumo langi nabaru bo tana nabaru, raponturo ntona nanao.

¹⁴Sampesuvu-sampesuvu nipotoveku, komiu nompopea kajadia-kajadia haitu, jadi pasimbukumo ala pokainggumi mabelo bo ledo maria anu rasalai atau mepakaeya ri panggita nu Alatala. Bo pasimbukumo matuvu mosinggabelo ante Ia.

¹⁵Toramo, posabara nTupu nombadekei loga ka manusia rapakasalama. Ivesia muni nitulisi nu sampesuvuta i Paulus nipotoveta. Surana haitu nitulisina nangoseaka noto nidekei nu Alatala ka ia.

¹⁶Ri pura-pura surana, pepatudukina nasimbayu nte anu nitulisiku ri bavona. Naria muni sanu tesana nakaja sakide rapaha. Tesana haitu nabiasa nitenggoaka ntona ledo natau bo tona ledo naroso pomparasayara. Ivesia muni nitenggoakara isi ntanina lako ri Buku Gasa. Tapi ira kana rahuku nu Alatala sabana pokainggura haitu.

¹⁷Jadi sampesuvu-sampesuvu nipotoveku, nisanimiu mamimo kana maria tona mombatenggoaka tesa nu Alatala. Haitu sampe komiu kana mainga ala komiu

ledo rakeni nu guru-guru mpodava mangoseaka pepatuduki nasala sampe domo maroso pomparasayamiu.

¹⁸Tapi komiu kana mantambai mosisani belo ante Tuputa Yesus Kristus, Topepakasalama, bo mantambai mombarasai kabelo raraNa riara nggatuvumiu. Iamo masipato ratoiyata bo rabilata, sii-sii bo sampe ri kasae-saena. Amin. Tabe lako nte yaku, Petrus

1 Yohanes

1 Yohanes 1

¹Tesa nu Alatala anu nombadekei katuvua nabelo naria mamimo lako ri lamba pamulana, bo haitumo ratesa kami riara sura hitu. Ia niepe kami bo nikita kami mboto. Ia nisabiki kami bo Ia natuvu singgani nte kami.

²Tempo Ia naria ri dunia, nikita kami Ia. Bo sii-sii kami nompasimbayu ka komiu anu nikita kami. Kami nosabiki Iamo anu nombadekei katuvua nabelo sampe ri kasae-saena. Ri lamba pamulana Ia naria nosanggani-nggani ante Tuamata Alatala bo Ia natuvu ri dunia hitu nte kami.

³Anu nikita kami bo anu niepe kami, haitu munimo rapatolele kami ka komiu ala komiu mosangu rara nte kami. Bo kita pura mamala matuvu mosangu rara ante Tuamata Alatala bo AnaNa i Yesus Kristus.

⁴Kami notulisi sura hitu ka komiu ala rarata mpuu-mpuu madamba.

⁵Hitumo kareba niepe kami lako nte i Yesus bo rapatolele kami ka komiu: Alatala reme bo ledo ntoto naria kalandana nte Ia.

⁶Ane raulita kita nosangu rara ante Alatala, tano mai kita aga natuvu ri kalandana, kita nodava, bo kita ledo natuvu nangoseaka dota nu Alatala.

⁷Tapi ane kita natuvu riara reme nasimbayu mpo Alatala naria riara nu reme, kita natuvu nosangu rara nte roa, bo Alatala mombalelaka pura-pura dosata sabana raa nu AnaNa i Yesus anu namate ala dosata mamala raampungi.

⁸Ane raulita ledo ria dosata, kita nombabagiu karota mboto. Haitu tandana ledo ntoto nioseakata dota nu Alatala.

⁹Tapi ane kita mombanoa dosa-dosata ri ngayo nu Alatala, raampungiNa dosata bo rapakagasaNa rarata lako ri pura-pura anu nadaa. Apa ivesia nijanjiNa ka kita bo 1 Ia namala rasarumaka mompakadupa pojanjiNa, bo movia anu nanao.

¹⁰Tapi ane raulita ledo sanggania kita novia dosa, haitu nasimbayu ante nompopodava Alatala. Kita aga nombasapuaka tesaNa, bo ledo ntoto nipariarata.

1 Yohanes 2

¹Sampesuvu-sampesuvu nipotoveku. Patujuku notulisi sura hitu ka komiu ala nee rapoviamiu dosa. Tapi ane maria tona movia dosa, naria saito topombasaliku, Iamo i Yesus Kristus anu nanoa. Iamo mombasaliku kita ri ngayo nTuamaNa, Alatala.

²I Yesus namate nombatanggu dosa-dosata. Bo ledo aga dosata nitangguNa, tapi pura-pura dosa manusia.

³Ane raoseakata parenta-parenta nu Alatala, haitumo tandana kita nosisani belo ante Ia.

⁴Tona nanguli ia nosisani belo ante Alatala, tapi ledo nioseakana parenta-parenta nu Alatala, tona haitu topodava. Ledo ntoto nioseakana dota nu Alatala.

⁵Tapi isema-sema nangoseaka parenta nu Alatala, tona haitumo mai mpuu-mpuu nompotove Alatala. Haitumo tandana kita mpuu-mpuu natuvu nosangu rara ante Alatala.

⁶Isema-sema nanguli ia natuvu nosangu rara ante Alatala, kana rapasialana katuvu i Kristus.

⁷Sampesuvu-sampesuvu nipotoveku, ledo parenta nabaru kutulisi ka komiu, tapi parenta njae anu nisanimiu lako ri pantepuuna pomparasayamiu i Kristus. Parenta njae haitu kareba niepemi nokolu, haitumo, kita kana mosimpotove.

⁸Naupa ivesia, parenta haitu nireke parenta nabaru, bo kabaruna mpuu-mpuu nikita ri katuvu i Kristus bo ri katuvumiu. Apa i Kristus reme nakana lako nte Alatala bo reme haitu nevanta riaru kalandana sampe kalandana nompamula nalipo.

⁹Isema-sema nanguli ia natuvu riaru reme tapi navuu matana nte sampesuvuna sampomparasaya, tona haitu bate-batena da riaru kalandana sampe sii-sii.

¹⁰Tona nompotove sampesuvuna, iamo natuvu riaru reme sampe ledo naria nuapa-nuapa ante ia anu mamala mompakanavu ia riaru dosa.

¹¹Tapi tona navuu matana nte sampesuvuna sampomparasaya, ia batena naria riaru kalandana. Ia nasimbayu mpo tona nolipa riaru kalandana, bo ledo nisanina hau ri umba rakalauna sabana kalandana haitu nompakaburo matana sampe ia ledo namala nekita.

¹²Yaku notulisi hitu ka komiu, ngana-ngana, sabana dosamiu niampungimo lako ri kamate i Yesus.

¹³Yaku notulisi hitu ka komiu, totua-totua, sabana komiu nosisanimo ante i Yesus anu naria mamimo lako ri lamba pamulana. Yaku notulisi hitu ka komiu, kabilasa bo randaa anu nangoseaka i Yesus, sabana nidagimiumo Magau nu Seta.

¹⁴Yaku notulisi hitu ka komiu, ngana-ngana, sabana komiu nosisanimo ante Tuamata, Alatala. Yaku notulisi hitu ka komiu, totua-totua, sabana komiu nosisanimo ante i Yesus anu naria lako ri lamba pamulana. Yaku notulisi hitu ka komiu, kabilasa bo randaa sabana pomparasayamiu narosomo. Nipariaramiumo Tesa nu Alatala, bo nidagimiumo Magau nu Seta.

¹⁵Jadi nee mompotove dunia hitu, bo nuapa-nuapa riarana. Isema-sema nompotove dunia hitu, ledo nipotovena Alatala.

¹⁶Apa pura-pura riaru dunia, evamo dota rarata nadaa, anu nikitata bo nipoino rarata, bo pura-pura anu nompakalanga rarata, haitu puramo ledo nopuna lako nte Alatala tapi aga nopuna lako ri dunia nadaa.

¹⁷Dunia bo pura-pura anu naria riarana anu nipoino manusia magero, tapi isema-sema mangoseaka dota nu Alatala, matuvu mabelo sampe ri kasae-saena.

¹⁸Sampesuvu-sampesuvu nipotoveku, naparamo kaupu dunia. Niepemiumo bara ipia, Bali i Kristus kana meonga. Bo sii-sii nadeamo tona neumba nobali ka i Kristus. Haitu tandana naparamo kaupu dunia.

¹⁹Bali-bali i Kristus nesuvu lako nte kita, tapi kakanana ira ledo nosangu pomparasaya ante kita. Ane ira mpuu-mpuu nosangu pomparasaya ante kita, natantu ira da mosanggani-nggani ante kita. Tapi nipalaikaramo kita, jadi nisanita ira ledo mpuu nosangu pomparasaya ante kita.

²⁰Tapi nitarimamiumo Nosa Gasa nu Alatala, anu nipopanau i Yesus Kristus. Haitu sampe komiu pura-pura nangisani pepatuduki nakana.

²¹Yaku notulisi sura hitu ka komiu ledo sabana ledo nisanimiu pepatuduki nakana. Nisanimiumo pepatuduki nakana. Bo nisanimiu munimo ledo naria dava riaru pepatuduki nakana.

²²Jadi, isema-sema nanguli i Yesus ledo Magau Topepakasalama anu nijanji nu Alatala, iamo mai topodava. Ia munimo bali i Kristus, apa nisapuna Alatala bo AnaNa.

²³Isema-sema nombasapu Ana nu Alatala, nisapuna muni TuamaNa Alatala. Tapi isema-sema nomparasaya Ana nu Alatala, nitarimana muni Alatala.

²⁴Jadi pariaramo pakabelo-belo pepatuduki niepemiu lako ri pantepuuna pomparasayamiu i Kristus. Ane pepatuduki haitu mpuu-mpuu rapariara ntaimiu, komiu bate-batena matuvu mosangu rara nte Ana nu Alatala bo Alatala, TuamaNa.

²⁵Hitumo nijanjiNa ka kita: Kita matuvu mabelo sampe ri kasae-saena.

²⁶Tesa hitu nitulisiku ka komiu apa bali-bali i Kristus nompasimbuku mompatuduki anu nasala ka komiu.

²⁷Tapi kakanana domo paraluu tona ntanina mompatuduki komiu, sabana nitarimamiumo Nosa Gasa anu nipopanau i Kristus. Bo Nosa Gasa haitumo naroo riaru ntaimiu bo mompatuduki ka komiu pura-pura anu paraluu rasanimiu. PepatudukiNa haitu nakana pura, ledo naria dava. Sabana haitu,

komiu kana maroo matuvu mosangu rara nte i Kristus nangoseaka anu nipatuduki Nosa Gasa ka komiu.

²⁸Jadi sampesuvu-sampesuvu nipotoveku, kita kana maroo matuvu mosangu rara nte i Kristus ala ledo maeya matata mantingayo Ia, bo ledo maeka rarata tempo Ia makava mpanjili ri dunia.

²⁹Nisanimumo i Kristus batena nangoseaka dota nu Alatala. Sabana haitu kana rasanimiu muni, isema-sema nangoseaka dota nu Alatala, iamo ana nu Alatala.

1 Yohanes 3

¹Namovo mpuu kaoge tove nu Alatala ka kita sampe kita niuliNa ana-anaNa! Bo kita mpuu-mpuu ana-anaNa mami. Tona ledo nomparasaya i Yesus ledo nisanira kita ana-ana nu Alatala, sabana ira mboto ledo nosisani ante Alatala.

²Sampesuvu-sampesuvu nipotoveku, kita sii-sii ana-ana nu Alatala mami, tapi dopa nipopaisani ka kita berimba katuvuta ri tempo makava. Anu nisanita, tempo i Kristus makava mpanjili, kita majadi masimbayu mpo Ia, apa rakitata mpuu lenjeNa.

³Isema-sema manjarumaka majadi masimbayu mpo i Kristus, ia kana mombajagai pokainguna ala katuvuna mpuu-mpuu magasa masimbayu mpo katuvu i Kristus.

⁴Isema-sema novia dosa, ia muni nombaliunaka parenta nu Alatala, sabana pokainguna nombaliunaka parenta nu Alatala, haitumo niuli dosa.

⁵Nisanimumo patuju i Yesus nakava ri dunia ala Ia mompakalali pura-pura dosa manusia. Bo nisanimiu muni Ia mboto ledo ntoto nadosa.

⁶Jadi isema-sema natuvu nosangu rara nte Ia, domo novia dosa. Tapi isema-sema batena novia dosa, ledo niparasayana mpuu i Yesus bo ledo nosisani belo nte Ia.

⁷Sampesuvu-sampesuvu nipotoveku, nee rapaloga tona mombabagiu komiu. Toramo! Isema-sema batena novia dota nu Alatala, iamo tona nanao ri panggita nu Alatala nasimbayu mpo i Kristus nanao ri panggita nu Alatala.

⁸Tapi isema-sema batena novia dosa, ia nangoseaka dota Magau nu Seta, sabana Magau nu Seta nadosa mami lako ri lamba pamulana. Patuju kakava Ana nu Alatala ri dunia ala mompakaropu povia Magau nu Seta.

⁹Tona najadi ana-ana nu Alatala domo batena novia dosa, sabana ana-ana nu Alatala kana manjava inggu nTuamara. Domo mamala ira batena movia dosa sabana ira najadi ana-ana nu Alatalamo.

¹⁰Hitumo posisalana ana-ana nu Alatala bo ana-ana Magau nu Seta: isema-sema ledo novia dota nu Alatala bo ledo nompotove sampesuvuna, ia ledo ana nu Alatala.

¹¹Iveimo kareba niepemi lako ri pantepuuna pomparasayamiu i Kristus: kita kana mosimpotove.

¹²Nee kita mompasiala inggu i Kain nangoseaka dota Magau nu Seta bo nompatesi tueina mboto. Nuapa sabana i Kain nompatesi tueina mboto? Sabana pokainggu i Kain nadaa bo ia nasiriati nanggita pokainggu ntueina nanoa.

¹³Jadi sampesuvu-sampesuvuku, nee mokumaa ane tona ledo nomparasaya i Yesus navuu matara nanggita komiu.

¹⁴Ane kita nompotove sampesuvuta, nisanita kita domo rapopogaa lako nte Alatala bo nikavatamo katuvua nabelo sampe ri kasae-saena. Tapi isema-sema ledo nompotove sampesuvuna sampomparasaya, ia kana rapopogaa lako nte Alatala.

¹⁵Isema-sema navuu matana nanggita sampesuvuna, ia haitumo nasimbayu ante topepatesi. Nisanimumo, topepatesi ledo manggava katuvua nabelo sampe ri kasae-saena.

¹⁶Nanggita pokainggu i Yesus, nisanitamo mosimpotove. Ia namate nanggeni belo ka kita. Jadi kita muni kana masadia mamate mantulungi sampesuvuta.

¹⁷Isema-sema nagana katuvuna bo nikitana sampesuvuna napepa, tapi ledo nadota ia mantulungi sampesuvuna haitu, natantumo ledo ntoto nipotovena Alatala.

¹⁸Sampesuvu-sampesuvu nipotoveku, nee aga mompotove sampesuvuta sampomparasaya ri sumba. Kita kana mompotove mpuu bo kita kana mompopakita tove haitu ante pokainggu nabelo.

¹⁹Jadi ane kita nompotove sampesuvuta ante rarata mpuu-mpuu, nisanita kita mpuu-mpuu ana-ana nu Alatala, bo rarata mamala matinonto tempo kita nosambaya ka Alatala.

²⁰Tapi nau rarata ledo matinonto mantora salata, kita mamala mompakatinonto rarata, sabana nisani nu Alatala puramo katuvuta bo pompoasiNa kita naogepa pade rara ntaita anu nompakasala kita.

²¹Jadi sampesuvu-sampesuvu nipotoveku, ane rara ntaita ledo nompakasala kita, ledo makaja rarata mosambaya ka Alatala.

²²Bo nuapa-nuapa raperapita nte Ia, natantu radekeiNa ka kita, sabana kita nanturusi parenta-parentaNa bo pokaingguta nompakadamba raraNa.

²³Hitumo niparentaNa ka kita: kita kana momparasaya AnaNa, i Yesus Kristus. Bo kita kana mosimpotove nangoseaka parenta i Kristus mboto ka kita.

²⁴Isema-sema nanturusi parenta nu Alatala, iamo natuvu nosangu rara ante Alatala bo Alatala muni nonturo riara ntaina. Bo nisanita Alatala nosangu rara ante kita sabana Nosa Gasa nidekeiNa naria riara ntaita.

1 Yohanes 4

¹Sampesuvu-sampesuvu nipotoveku, nee kaliu-liu raparasayamiu pura-pura tona nanguli naria Nosa Gasa nu Alatala nte ira. Tapi peintaka ruru, ala rasanimiu bara Nosa Gasa mpuu naria nte ira, bara ledo. Niuliku ivesia apa nadeamo nabi mpodava ri umba-umba ri dunia sii-sii.

²Hitumo tandana ala rasanita isema nikuasai Nosa Gasa nu Alatala: isema-sema nomparasaya i Yesusmo Magau Topepakasalama nakava ri dunia najadi manusia, tona haitumo naria Nosa Gasa lako nte Alatala.

³Tapi isema-sema ledo nomparasaya i Yesus nakava ri dunia najadi manusia, tona haitu ledo naria Nosa Gasa nu Alatala nte ia. Tona haitu nikuasai pekiri

lako ri Bali i Kristus. Niepemiumo Bali i Kristus makava, bo hitupa nariumo ia riara dunia.

⁴Sampesuvu-sampesuvu nipotoveku, komiumo ana-ana nu Alatala bo nidagimiumo nabi-nabi mpodava gahaitu, sabana Nosa Gasa nu Alatala anu riara ntaimiu nakuasapa pade Magau nu Seta anu nombakuasai pekiri ntona ledo nangoseaka dota nu Alatala.

⁵Nabi-nabi mpodava gahaitu ledo nangoseaka dota nu Alatala. Haitu sampe pepatudukira nangoseaka pekiri ntona ri dunia anu ledo nangoseaka dota nTupu, bo nadamba tona nompetingai pepatudukira.

⁶Tapi kita hitumo ana-ana nu Alatala, jadi isema-sema nosisani belo ante Alatala nompetingai pepatudukita. Tapi isema-sema ledo nomparasaya i Yesus, ledo nipetingaina pepatudukita. Jadi haitumo tandana ala rasanita isema nikenika Nosa Gasa lako nte Alatala anu nakana bo isema nikenika pekiri lako nte Magau nu Seta mpodava.

⁷Sampesuvu-sampesuvu nipotoveku, kita kana mosimpotove sabana tove nopuna lako nte Alatala. Isema-sema nepotove, iamo ana nu Alatala, bo nosisani belo ante Alatala.

⁸Tapi isema-sema ledo nepotove, ia dopa nosisani belo ante Alatala, sabana Alatala puna nu tove.

⁹Alatala nompopaisani toveNa ka kita ivei: nituduNa AnaNa saito-itoNa tumai ri dunia ala kita mamala matuvu mabelo sampe ri kasae-saena.

¹⁰Povia nu Alatala haitu nompopaisani tove nakana ka kita. Iveimo tove nakana: ledo kita nokolu nompotove Alatala tapi Alatala nokolu nompotove kita. Ia nompotove kita sampe nituduNa AnaNa mboto tumai mamate mombasambei kita ala dosata namala raampungu.

¹¹Sampesuvu-sampesuvu nipotoveku, naoge mpuu tove nu Alatala ka kita! Jadi kita muni kana mosimpotove.

¹²Dopa naria saitoa manusia nanggita Alatala. Tapi ane kita mosimpotove, haitumo tandana Alatala naria riara ntaita, bo toveNa ka kita mpuu-mpuu naria aselena riara nggatuvuta.

¹³Alatala nombadekei Nosa Gasana ka kita. Sia sampe nisanita kita natuvu nosangu rara ante Alatala bo Ia natuvu riara ntaita.

¹⁴Ledo aga haitu. Kami ana-anaguru i Yesus nikita kamimo Ia, Ana nu Alatala, bo kami nosabiki Iamo nitudu nTuamaNa Alatala tumai ri dunia majadi Topompakasalama manusia.

¹⁵Isema-sema nomparasaya i Yesusmo Ana nu Alatala, iamo natuvu nosangu rara ante Alatala, bo Alatala natuvu riara ntaina.

¹⁶Jadi haitumo sampe nisanita bo nisarumakata Alatala nompotove kita. Toramo! Alatala puna nu tove, jadi isema-sema nepotove, ia bate-batena natuvu nosangu rara ante Alatala, bo Alatala bate-batena natuvu riara ntaina.

¹⁷Ane kita nompotove sampesuvuta sampomparasaya, haitumo tandana kita mpuu-mpuu nompotove Alatala sampe ledo makaja rarata mantingayo Ia ri Eo Potangara ri kaupu dunia. Ledo makaja rarata mantingayo Ia sabana pokaingguta ri dunia hitu masimbayu mpo pokainggu i Kristus.

¹⁸Ane mpuu-mpuu nirasaita tove nu Alatala nte kita, kita domo maeka nte Alatala. Apa tove nu Alatala ka kita nompakaroso rarata sampe kita domo maeka nte Ia. Ane kita naeka nompekirika Eo Potangara ri kaupu nu dunia, batuana dopa nisanita mpuu Alatala nompotove kita.

¹⁹Kita nepotove sabana Alatala nokolu nompotove kita.

²⁰Isema-sema nanguli ia nompotove Alatala, tano mai navuu matana nanggita sampesuvuna sampomparasaya, ia mai topodava! Ane ia ledo nompotove sampesuvuna anu nikitana, natantumo ledo mamala ia mompotove Alatala anu ledo nikitana.

²¹Apa iveimo parenta i Kristus ka kita: “Isema-sema nompotove Alatala, kana raportovena muni sampesuvuna sampomparasaya.”

1 Yohanes 5

¹Isema-sema nomparasaya i Yesusmo Magau Topepakasalama anu nijanji nu Alatala, iamo nireke ana nu Alatala. Bo isema-sema nompotove Tuamata Alatala, natantu nipotovena muni roa-roana anu najadi ana-ana nu Alatala.

²Hitumo tandana ala rasanita kita nompotove roa-roata anu najadi ana-ana nu Alatala: kita nompotove Alatala bo nangoseaka parenta-parentaNa.

³Apa ane nipotoveta Alatala, natantu raoseakata parenta-parentaNa. Bo parenta-parentaNa ledo nakaja raoseaka,

⁴sabana isema-sema najadi ana nu Alatala nompakule nombadagi kuasa nadaa ri dunia. Nidagitamo kuasa nadaa ri dunia hitu ante pomparasayata.

⁵Isema nompakule nombadagi kuasa nadaa ri dunia hitu? Aga tona nomparasaya i Yesus Ana nu Alatala.

⁶I Yesus Kristus nakava ri dunia. Ia nidiu i Yohanes Topediu bo natitimo raaNa tempo Ia namate ri kayu salib. Ia ledo aga nidiu tapi Ia namate muni bo raaNa natiti. Nosa Gasa mboto nompakalanto ka kita i Yesusmo Ana nu Alatala. Bo anu niuli Nosa Gasa nakana mpuu.

⁷⁻⁸Jadi, ivesiamo Alatala nompakalanto ka kita i Yesusmo AnaNa: Nosa Gasa nosabiki i Yesus Ana nu Alatala. Bo anu najadi tempo Ia nidiu bo tempo Ia namate, haitu muni nompakalanto Ia Ana nu Alatala. Talu-ngaya hitu nasimbayu posabira, haitumo, i Yesus Ana nu Alatala.

⁹Ane ri potangara, kita nomparasaya posabi manusia. Tapi posabi nu Alatala narosopa pade posabi manusia, bo Ia mboto nosabi nompakatantu i Yesusmo AnaNa.

¹⁰Isema-sema nomparasaya Ana nu Alatala, nisanina nakana mpuu posabi nu Alatala. Tapi isema-sema ledo nomparasaya Alatala, batuana ia nompodava Alatala sabana ledo niparasayana posabi nu Alatala nombatesa AnaNa.

¹¹Iveimo posabi nu Alatala: nidekeiNa ka kita katuvu nabelo sampe ri kasae-saena, bo AnaNa, i Yesus puna nu katuvu nabelo.

¹²Jadi, isema-sema natuvu nosangu rara ante Ana nu Alatala, ia matuvu mabelo sampe ri kasae-saena. Tapi isema-sema ledo natuvu nosangu rara ante Ia ledo matuvu mabelo sampe ri kasae-saena.

¹³Yaku notulisi sura hitu ka komiu topomparasaya Ana nu Alatala, ala rasanimiu mpuu komiu matuvu mabelo sampe ri kasae-saena.

¹⁴Ledo nakaja rarata nosambaya ka Alatala, apa nisanita Ia mompetalingai perapita, asaa perapita nangoseaka dotaNa.

¹⁵Bo nisanita ane Ia nompetalingai perapita, natantumo ratarimata anu niperapita lako nte Ia.

¹⁶Sampesuvu-sampesuvuku, ane rakitamiu roamiu sampomparasaya novia dosa anu ledo mompopogaa ia lako nte Alatala sampe ri kasae-saena, komiu kana mosambaya ka roamiu haitu. Posambayamo ala [ia majea bo] Alatala mombadekei ka ia katuvu mabelo sampe ri kasae-saena. Tona niuliku hitu, tona novia dosa anu ledo mompopogaa ia lako nte Alatala sampe ri kasae-saena. Naria muni dosa anu mompopogaa tona lako nte Alatala. Ledo paraluu raposambayakamiu tona novia dosa haitu.

¹⁷Pura-pura pokainggu nasala niuli dosa. Tapi naria muni dosa anu ledo mompopogaa tona lako nte Alatala sampe ri kasae-saena.

¹⁸Nisanita ane tona najadi ana-ana nu Alatala, ira domo batena novia dosa, sabana i Yesus Ana nu Alatala nombajagai ira bo Magau nu Seta ledo nompakule mombadagi ira.

¹⁹Nisanita kita najadi ana-ana nu Alatala, bo nisanita tona ledo nomparasaya i Yesus nikuasai Magau nu Seta.

²⁰Nisanita muni i Yesus, Ana nu Alatala, nakava ri dunia hitu mompakanoto rarata ala kita mamala mosisani belo ante Alatala anu nakana. Kita natuvu nosangu rara nte Alatala anu nakana sabana kita natuvu nosangu rara nte AnaNa, i Yesus. Iamo Alatala anu nakana bo Iamo mombadekei katuvua nabelo sampe ri kasae-saena.

²¹Sampesuvu-sampesuvu nipotoveku. Jagaimo, nee metupu nte tupu-tupu anu ledo nakana. Tabe lako nte yaku, Yohanes

2 Yohanes

2 Yohanes 1

¹Nina ntali ana, anu nipelisi nu Alatala: Sura hitu lako nte yaku, i Yohanes, pakeni ntodea topomparasaya. Yaku mpuu-mpuu nompotove komiu. Ledo aga yaku tapi pura-pura topangisani pepatuduki nakana lako nte Alatala, nompotove komiu muni.

²Kami nompotove komiu sabana komiu nosangani-nggani nte kami nomparasaya pepatuduki nakana, anu naria riaru ntaita sampe ri kasae-saena.

³Tuamata Alatala bo i Yesus Kristus, Ana nu Alatala, mombadekei belo ka kita bo mompoasi kita bo mompakatinonto rarata. Haitu bagiata sabana kita nangisani pepatuduki nakana bo nosimpotove.

⁴Nadamba mpuu raraku nangepe naria ana-anamiu natuvu nangoseaka pepatuduki nakana, anu niparenta nTuamata Alatala ka kita.

⁵Jadi kuperapi mpuu-mpuu nte komiu, Ina, kita pura-pura kana mosimpotove. Anu nitulisiku hitu ledo parenta nabaru, tapi parenta nidekei ka kita lako ri pamulana kita nomparasaya i Yesus.

⁶Iveimo anu niuli tove: kita kana matuvu mangoseaka parenta nu Alatala anu niepeta lako ri pamulana: Kita kana matuvu mosimpotove.

⁷Nadeamo topebagiu neumba bo hau ri njumangu dunia. Ledo niparasayara i Yesus nakava ri dunia najadi manusia. Ira haitumo nombabagiu tona ntanina bo nangeva i Kristus.

⁸Jadi komiu kana mainga! Nee sampe anu nipatuduki kami ka komiu ledo maria aselena. Pasimbukumo mangoseaka pepatuduki nakana ala rakavamiu pura-pura belo nipakasadia nu Alatala ka komiu.

⁹Isema-sema nasalandala lako ri pepatuduki nakana bo ledo nioseakana pepatuduki i Kristus, ia ledo nosangu rara nte Alatala. Tapi isema-sema naroo nangoseaka pepatuduki i Kristus, ia nosangu rara nte Tuamata Alatala bo i Yesus, Ana nu Alatala.

¹⁰Jadi, ane makava tona nte komiu mompatolele pepatuduki nosisala ante pepatuduki i Kristus, nee ratarimamiu tona haitu riara banuamiu. Nee rakadambanakamiu ira,

¹¹sabana isema-sema mombakadambanaka ira, nasimbayu mpo niporoana ira novia anu nadaa.

¹²Da nadeapa anu kutesa ka komiu, tapi nipekiriku nabelopa domo kutulisi ri sura. Yaku nonia tou nte komiu, jadi nabelopa kita mosinggava bo motesa ri mata, ala rarata mpuu-mpuu madamba mpasanggani-nggani.

¹³Nadea tabe lako nte ana-ana nu sampesuvumi ri sii anu nipelisi nu Alatala. Tabe lako nte yaku, Yohanes

3 Yohanes

3 Yohanes 1

- ¹Gayus, vega nipotoveku: Sura hitu lako nte yaku, i Yohanes, pakeni ntopomparasaya. Yaku mpuu-mpuu nompotove iko.
- ²Vegaku, kuperapi nte Alatala, ala katuvumu mabelo bo karomu maroso, nasimbayu mpo karoso pomparasayamu.
- ³Nadamba mpuumo raraku, sabana bara sako-ndua topomparasaya nakava nte yaku nanguli iko naroo nomparasaya pepatuduki nakana. Niulira iko mpuu-mpuu natuvu nangoseaka pepatuduki nakana.
- ⁴Ledo ria anu nompakadamba raraku nelabipa pade nangepe kareba nanguli ana-anaku natuvu nangoseaka pepatuduki nakana.
- ⁵Vegaku, pokainggumu nosinggambela nte pomparasayamu tempo iko nantulungi sampesuvuta sampomparasaya anu nesai nte iko. Nau iko dopa nosisani ante ira, iko batena nombatulungi ira.
- ⁶Riara podade kami ri sii, nitesara kabelo nu raramu nantulungi ira. Jadi kuperapi, ane mesai vai ira nte iko, tulungimo ira mompapola polipara, ala madamba rara nu Alatala.
- ⁷Apa sampesuvuta haitu nanggeni kareba i Kristus bo ledo ria nuapa-nuapa nitarimara lako nte tona anu ledo nosisani nte Alatala.
- ⁸Jadi, masipato kita topomparasaya mombatulungi ira, bo ane nitulungita ira, nasimbayu mpo niporoata muni ira nompatolele pepatuduki nakana lako nte Alatala.
- ⁹Nariamo sura nitulisiku ka topomparasaya hamai, tapi i Diotrefes ledo nadota nangoseaka tesaku. Patujuna, ia mboto majadi pakeni ntopomparasaya.
- ¹⁰Ane makava ri situ yaku, kana kupakalanto ka komiu pura-pura anu nipoviana, sabana poviana haitu ledo ntoto nabelo. Nadea mpuu tesa dava niulina nompakadaa sanga kami. Bo ledo aga haitu. Tempo roa-roata sampomparasaya nakava nanggeni Kareba Belo, ledo nadota ia nantarima ira

ri banuana. Bo nitagina muni topomparasaya ntanina mantarima ira. Isema ledo nantuntuni tesana haitu, nipopalaina lako ri kasiromu ntodea topomparasaya, ledo nipalogana ira mantuntuni podade.

¹¹Vegaku, nee mupasiala pokainggu nadaa, tapi pasialamo pokainggu nabelo. Isema-sema novia anu nabelo, iramo ana-ana nu Alatala. Tapi isema-sema novia anu nadaa, ledo ntoto nosisani nte Alatala.

¹²Pura-pura tona nantoiya i Demetrius. Lako ri pokaingguna nanao, nisaniramo ia nangoseaka pepatuduki nakana. Kami muni nantoiya ia, bo nisanimu nuapa-nuapa niuli kami, namala raparasaya.

¹³Da nadeapa tesa kutesa ka iko, tapi nipekiriku nabelopa domo kutulisi ri sura.

¹⁴Nisarumakaku domo masae, yaku tou mosinggava nte iko bo mamala kita motesa ri mata.

¹⁵Kuperapi Alatala mompakatinonto raramu. Nadea tabe lako nte roa-roata ri sii. Pakapola tabe kami ka roa-roata ri situ. Tabe lako nte yaku, YOHANES

Yudas

Yudas 1

¹Sampesuvu-sampesuvu anu nipokio nTuamata Alatala majadi todeaNa: Komiu mpuu-mpuu nipotove nu Alatala, bo nijagaiNa sampe i Yesus Kristus makava mpanjili. Sura hitu lako nte yaku, i Yudas, batua i Yesus Kristus bo sampesuvu i Yakobus.

²Kuperapi ala komiu ledo maupu-upu mombarasai tove nu Alatala, bo ala Ia mabelo nte komiu bo mompakatinonto raramiu.

³Sampesuvu-sampesuvu nipotoveku, naoge mpuu raraku motulisi sura ka komiu, mombatesa kabelona nirasaita pura-pura anu nipakasalama i Yesus. Tapi nirasaiku eva naria anu nompasuu yaku mombabaliki niaku haitu. Apa naria tona anu nanggeni pepatuduki nasala nte kita. Sia sampe niuliku aginamo kutulisi sura mompakaroso raramiu ala komiu mompasimbuku mpuu mangeva tona anu madota mombabaliki pepatuduki nakana. Pepatuduki nakana nipasimbayu nu Alatala ka pura-pura todeaNa. Bo pepatuduki haitu aga sanggani nidekei nu Alatala sampe ri kasae-saena bo ledo namala rabaliki.

⁴Nariamo bara sako-ndua tona nesua nggalino-lino ri tatangata ntopomparasaya. Pangulira ira sampesuvuta sampomparasaya, tano mai ira ledo nangoseaka dota nu Alatala. Pangulira ledo makuya kita mangoseaka dota rarata nadaa apa Alatala nompotove kita bo raampungina salata haitu. Tapi pepatuduki haitu ledo ntoto nakana, ira aga nombatenggoaka pepatuduki anu nombatesa kabelo nu Alatala. Nisapura i Yesus Kristus saito-itoNa Magau bo Tuputa. Lako ri nggaulunama pehuku rapambela ka ira nipakatantu mamimo bo nitulisi riara Buku Gasa.

⁵Nau nisanimumo pura-pura hitu, kana kupopatora ka komiu pehuku nu Alatala ka tona novia nadaa. Nggaulu, Tupu nombakabasaka todeaNa toYahudi lako ri tana Mesir. Tapi naupu sia, naria sanu ira ledo nomparasaya sampe nipatesiNamo ira ri karava bai.

⁶Tora muni malaeka-malaeka nTupu nggaulu. Sanu ira ledo naosa rarara nte kuasa nipakatantu nu Alatala ka ira, sampe nipalaisira ponturora ri suruga. Ira nitarunggu nu Alatala ri ponturo nalanda mpirika bo nipou ante rante anu ledo namala rapudusi. Bo ira ledo rakabasaka sampe makava tempona ira rahuku ri Eo Potangara bara maipia.

⁷Tora munimo tupu ngata Sodom bo Gomora nggaulu bo ngata-ngata ri sinjorina. Ira nasimbayu nte malaeka-malaeka pangane, haitumo ira muni ledo nabasa-basa nosimpogau nte tona ledo bereira mboto bo nangoseaka pokainggu nabuga ntotomo. Ngatara nipakaropu ante apu rapopatora ka pura-pura tona, pokainggu nadaa rahuku ante apu sampe ri kasae-saena.

⁸Nau naria jonjo pehuku nu Alatala ka tona nadaa pangane, guru-guru mpodava gahaitu batena novia nadaa. Pangipi-pangipira niulira lako nte Alatala, tano mai ledo nakana. Pangipira haitu nanggeni ira novia dosa anu nompakaruto karora mboto. Ira nompandaente kuasa nu Alatala bo nanjalai malaeka anu nipokumaaka ri suruga.

⁹Tano i Mikhael mboto, nau ia tadulako malaeka nu Alatala, ledo nabia nanjalai Magau nu Seta. Tempo kamate i Musa, i Mikhael bo Magau nu Seta nosinjanaika isema mangala karobata i Musa. Nirasai i Mikhael ledo masipato ia manjalai Magau nu Seta. Ia aga nanguli, “Damo Tupu mombahuku iko!”

¹⁰Tapi guru-guru mpodava haitu nanjalai mpengaya-ngaya anu ledo nisanira. Ira nasimbayu mpo binata-binata anu ledo namala nompekiri. Anu nirasaira, haitumo nioseakara ante ledo ria rekena. Bo pokainggura haitumo sampe ira rahuku nu Alatala.

¹¹Mandasa mpuu ira! Nipasialara katuvu i Kain nggaulu, anu nasiriati bo navuu matana nte tueina. Nipasialara ntoto sala i Bileam anu nasadia movia nuapa-nuapa asaa manggava doi. Bo pangevara Alatala nasimbayu mpo peeva i Korah nggaulu sampe ira muni masipato rahuku nu Alatala.

¹²Tempo komiu nasiromu nangande nosangani-nggani mantora posangu raramiu nte i Kristus, guru-guru mpodava gahaitu aga nepakaeya. Ledo naeya matara nompebasa nangande bo aga nompekirika karora mboto. Ira ledo ntoto

ria gunana, nasimbayu mpo kulimu vuri anu ledo najadi uda, aga niburusi mpoiri. Bo ira nasimbayu mpo kayu ledo novua ri tempo mpovuana, mpo kayu nitovo bo nipekalesi sampe namate mpuu.

¹³Ira nasimbayu mpo balumba mbaso niburu mpoiri, bo pokainggura anu nepakaeya nasimbayu mpo rumpu bo bura natapa nitompesaka ri talinti. Ira nasalandala lako ri dala nakana nasimbayu mpo betue-betue mpolinja ri langi ledo nangoseaka dala nipakatantu ka ira. Jadi nipakasadia nTupumo ponturo nalanda mpirika ka ira sampe ri kasae-saena.

¹⁴I Henokh, muli kapitu-ntapina lako nte i Adam, nombaboto pehuku nu Alatala ka guru-guru mpodava gahaitu ivei: “Epemo! Tupu makava bara maipia ante njobu-njobu malaekana

¹⁵mombatangara pura-pura manusia. Ia mombahuku pura-pura topesapuaka sabana pesapuakara. Ia mombahuku topesapuaka nadosa haitu sabana tesa nadaa nisovadakara nanjalai Ia.”

¹⁶Guru-guru mpodava gahaitu batena nongau bo nompakasala tona ntanina. Ira natuvu nangoseaka dota rarara nadaa. Ira nangoe nompakalanga karora mboto bo notesa namomi ala raoseaka ntona dotara.

¹⁷Sampesuvu-sampesuvu nipotoveku, toramo tesa niuli nu suro-suro nTuputa i Yesus Kristus bara ipia.

¹⁸Niulira ivei: “Ane maparamo kaupu nu dunia, kana meumba topesapuaka anu mompongei-ngeika pomparasayata. Ira aga mangoseaka dota rarara nadaa bo ledo raoseakara dota nu Alatala.”

¹⁹Tona haitumo nompakagero kasintuvu ntopomparasaya. Ira nikuasai dota-dota rarara nadaa, bo Nosa Gasa nu Alatala ledo ntoto naria nte ira.

²⁰Sampesuvu-sampesuvu nipotoveku, posipakarosomo pomparasayamiu nangoseaka pepatuduki nakana, sabana pepatuduki niparasayata haitu nagasa mpuu. Bo posambayamo ante pekeniaka Nosa Gasa nu Alatala.

²¹Komiu kana bate-batena matuvu mantora pepotove nu Alatala ka komiu. Bo tongorakamo kakava nTuputa i Yesus anu mombadekei katuvu nabelo sampe ri kasae-saena ka kita sabana kabelo raraNa.

²²Komiu kana mompoasi tona da nolengga-lengga pomparasayara.

²³Naria tona ntanina damo kasalandalana. Tulungimo ira ala ira rapakasalama lako ri pehuku, nasimbayu mpo porabutakamiu tona lako ri apu. Bo poasi munimo tona nikuasai dota rarara nadaa. Tulungi ira manjili ri dala nakana, tapi jagaimo, mbelaka komiu matekeni mangoseaka pokainggura nadaa. Potovemo tona nadosa tapi povuu matamo pokainggura.

²⁴Ratoiyatamo Alatala sabana Ia nakuasa nombajagai kita ala ledo rakabasakata pomparasayata. Ia nakuasa manggeni kita hau ri suruga mantingayo Ia riarra kaogeNa, bo ledo maria salata, bo melabi kadamba rarata.

²⁵Aga Ia saito-itoNa Alatala. Iamo nompakasalama kita sabana anu nipovia nTuputa Yesus Kristus. Jadi ratoiyatamo Ia, apa Iamo Alatala anu nelabi kaogeNa, Magau nipokumaaka. Iamo nabaraka bo nakuasa lako ri lamba pamulana, sampe sii-sii, bo sampe ri kasae-saena! Amin! Tabe lako nte yaku, Yudas

Pompakita

Pompakita 1

¹Isi buku hitu notesaki kajadia-kajadia anu majadi bara maipia, anu nipopaisani nu Alatala ka i Yesus Kristus. I Yesus nitudu nu Alatala mompopaisani kajadia haitu ka topangoseaka Ia ala rasanira anu domo masae majadimo. Jadi i Yesus nombatudu malaekana hau mompopaisani anu majadi haitu ka batuaNa i Yohanes.

²Bo yaku, i Yohanes, nompasimbayu pura-pura anu nikitaku, haitumo tesa lako nte Alatala bo anu nipopaisani i Yesus Kristus.

³Masana mpuu tona anu mombabaca tesa-tesa niboto riaru buku hitu ka todea, bo masana muni tona mangepe bo mompariara anu nitulisi riarana. Apa domo masae pura-pura kajadia nitesa ri sii mpuu-mpuu kana majadi.

⁴Sampesuvu-sampesuvu sampomparasaya anu nonturo ri pitu ngata ri propinsi Asia. Yaku i Yohanes, merapi komiu mantarima katinonto bo belo lako nte Alatala anu nariamo lako ri lamba pamulana, bo naria sii-sii, bo maria sampe ri kasae-saena. Bo kuperapi ratarimamiu belo bo katinonto lako nte papitu Nosa nu Alatala anu naria ri ngayo Gadera Kamagaua nu Alatala,

⁵bo lako nte i Yesus Kristus. Iamo sabi anu namala raparasaya, Iamo tona paratama nipakatuva mpanjili lako ri kamateNa. Iamo nomparenta pura-pura magau riaru dunia. Ia nompotove kita bo nombakabasaka kita lako ri dosata ante raa kamateNa.

⁶Kita nipajadiNa todea riaru poparentaNa, kita nipajadiNa topanggeni pesomba anu manggeni pesomba ka TuamaNa Alatala. Masipato i Yesus ratoiya bo rabila, bo masipato Ia momparenta sampe ri kasae-saena! Amin!

⁷Peintamo! Ia makava nibungu kulimu. Ia rakita ntona pura-pura, nau ira anu nombatosu usuNa. Bo pura-pura valaa manusia ri dunia motumangi mpojea manggita Ia. Haitu mpuu-mpuu majadi! Amin!

⁸Tupu Alatala nanguli, “Yakumo hii Pamulana bo Kaupuna. Yaku naria mamimo lako ri lamba pamulana, Yaku naria sii-sii bo Yaku batena maria sampe ri kasae-saena. Yakumo toNeliu KakuasaKu.”

⁹Yaku hii i Yohanes, sampesuvumiu sampomparasaya. Yaku nombarasai susa bo pari nasimbayu ante pura-pura topangoseaka i Yesus, bo yaku muni najadi todea riara PoparentaNa nasimbayu ante pura-pura topangoseaka i Yesus, bo yaku muni nosabara tempo nipandasa, nasimbayu ante pura-pura topangoseaka i Yesus. Yaku nitaniaka ri levuto Patmos, sabana nompatolele Tesa nu Alatala bo pepatuduki i Yesus.

¹⁰Ri eo petupu yaku nikuasai Nosa Gasa nu Alatala, bo niepeku suara lako ri puriku namangga mpo moni ntabue.

¹¹Suara haitu nanguli ivei: “Tulisimo anu mukita bo pakatu ka todea topomparasaya nonturo ri pitu ngata, haitumo ngata-ngata Efesus, Smirna, Pergamus, Tiatira, Sardis, Filadelfia bo Laodikia.”

¹²Nangepe haitu, neili yaku mompeintaka isema notesa ka yaku. Tempo yaku neili, nikitaku papitu kada mpoindo bulava.

¹³Ri olo kada mpoindo haitu naria saito tona, lenjena mpo Ana nu Manusia. Baju nipasuaNa nandoe nakava ri kadaNa, bo bambaraNa nibeve bulava.

¹⁴BalenggaNa bo buluaNa naramputi mpo kapa bo salju. Bo mataNa narega mpo vaya nu apu.

¹⁵KadaNa nenggila mpo tambaga nitunu ri apu. Bo suaraNa namangga mpo soo nu uve oge.

¹⁶Ri pale ngganaNa naria pitu-angu betue, bo lako ri ngangaNa nesuvu samata guma nomata ntimali natada mpuu. Bo lenjeNa mpo vanta nu eo natongo.

¹⁷Nikitakupa Ia, kaliu-liu nadungga ntuobomo yaku ri ngayoNa mpo tomate. Tapi Ia nombatuu pale ngganaNa ri karoku bo nanguli ka yaku, “Nee maeka. Yakumo hii Pamulana bo Kaupuna.

¹⁸Yakumo hii anu Natuvu. Bara ipia Yaku namatemo. Tapi peintamo, sii-sii Yaku natuvu mpanjili sampe ri kasae-saena. Yakumo nakuasa nantipale gunji kamatea bo ponturo ntomate.

¹⁹Jadi, tulisimo pura-pura anu nikitamu, nau anu najadi sii-sii, nau anu majadi bara maipia.

²⁰Dopa nisanimu batuana pitu-angu betue nikitamu ri pale ngganaKu hitu bo pitu nggada poindo bulava. Jadi kupakalanto batuana ivei: pitu-angu betue haitu nirapaka papitu malaeka anu nanggeniaka todea topomparasaya anu nonturo ri pitu-ngata. Bo pitu nggada poindo bulava haitu nirapaka todea topomparasaya anu naria ri pitu-ngata haitu.”

Pompakita 2

¹Bo Ana nu Manusia nombatudu yaku motulisi ka malaeka anu nanggeniaka todea topomparasaya ri ngata Efesus ivei: “Hitumo tesa lako nte Yaku anu nantipale pitu-angu betue ri pale ngganaKu bo nolipa ri olo pitu-nggada poindo bulava.

²NisaniKu pura-pura pokainggumiu. Komiu natutu nokarajaa ka Yaku bo komiu nosabara tempo nipandasa sabana nomparasaya Yaku. NisaniKumo komiu ledo nasituju ante pokainggu ntona nadaa. Tona nompangaku karonu suro-suroKu tano ledo nakana, niparesamiu pokainggura sampe nalantomo ira topodava.

³Komiu mpuu-mpuu nosabara. Komiu nipandasa ntona sabana pomparasayamiu, bo ledo naupu raramiu nangoseaka Yaku.

⁴Tapi naria sangaya inggumiu anu ledo nipodambaKu. Komiu domo nompotove Yaku mpo bara ipia tempo komiu dako nomparasaya.

⁵Nakavao ntotomo kanavumiu! Haitu sampe Kuuli ka komiu, pakabelo-belo! Kajeamo komiu, bo poviamo mpo anu nipoviamiu ri pamulana. Ane ledo majea komiu, Kualasi kada mpoindo bulavamiu lako ri ponturona.

⁶Tapi nau ivesia, naria sangaya inggumiu nipokonoKu, haitumo navuu matamiu nanggita pokainggu ntona anu nangoseaka pepatuduki i Nikolaus, anu nipovuu mataKu muni.

⁷Isema-sema naria talingana epemo pakabelo-belo anu niuli Nosa Gasa nu Alatala ka todea topomparasaya ri umba-umba ngata. Isema-sema padagi kana Kudekei mangande vua lako ri Kayu Katuvua anu naria riaru Pampa nu Alatala ri suruga.”

⁸Naupu haitu nitudu Ana nu Manusia vai yaku motulisi ka malaeka anu nanggeniaka todea topomparasaya ri ngata Smirna ivei: “Hitumo tesa lako nte Yaku anu niuli Pamulana bo Kaupuna, anu namatemo bo natuvu mpanjili.

⁹NisaniKu kasusa bo kapari nirasaimiu. NisaniKu komiu mpuu-mpuu napepa, tapi kakanana komiu nakalumana riaru pomparasayamiu. NisaniKu komiu nislai ntona anu nompangaku karona toYahudi tano ledo nakana. Ira aga todea nu Magau nu Seta.

¹⁰Tapi nee maeka komiu mantingayo kasusa bo kapari anu domo masae kana rarasaimiu. Pariaramo! Magau nu Seta mompopesua sanu komiu hau rantarunggu bo mompesori komiu ala moura pomparasayamiu. Komiu rapandasa sapulu eo kasaena. Tapi nee maupu raramiu momparasaya Yaku nau komiu rapatesi, sabana Kudekei ka komiu hadia padagi, haitumo komiu matuvu mabelo sampe ri kasae-saena.

¹¹Isema-sema naria talingana epemo pakabelo-belo anu niuli Nosa Gasa nu Alatala ka todea topomparasaya ri umba-umba ngata. Isema-sema padagi ledo ntoto mambela pehuku anu niuli kamatea karongganina.”

¹²Naupu haitu Ana nu Manusia nombatudu yaku motulisi ka malaeka anu nanggeniaka todea topomparasaya ri ngata Pergamus ivei: “Hitumo tesa lako nte Yaku anu naria guma nomata ntimali bo natada mpuu.

¹³NisaniKumo ngata niponturomiu, haitumo ri ngata ponturo Magau nu Seta. Tapi naupa ivesia, naroso pomparasayamiu Yaku. Tempo sabiKu nosanga i Antipas nipatesi ri ngatamiu, komiu ledo nesapu nomparasaya Yaku. I Antipas

haitu sabiKu bo ia bate-batena nomparasaya Yaku sampe ia nipatesi ntona ri ngatamiu, haitumo ri ngata nikuasai Magau nu Seta.

¹⁴Tapi da nariapa bara sako-ngaya inggumiu anu ledo nipodambaKu. Naria tona nte komiu nangoseaka pepatuduki i Bileam nggaulu. I Bileam nompatuduki Magau Balak mompakanavu toIsrael riara dosa. Nipatudukina ia mompakeni ira mangande kandea nipopali sabana nipakande ka tupu-tupu ntanina, bo nompatuduki ira ledo makuya mosipogau nte tona ledo bereina mboto.

¹⁵Bo naria muni nte komiu anu nangoseaka pepatuduki i Nikolaus.

¹⁶Jadi Kuuli ka komiu, kajeamo lako ri dosamiu! Ane ledo majea komiu, Yaku masalisa makava nte komiu bo mangeva ira ante guma anu naria ri ngangaKu.

¹⁷Isema-sema naria talingana epemo pakabelo-belo anu niuli Nosa Gasa nu Alatala ka todea topomparasaya ri umba-umba ngata. Isema-sema padagi, Kudekei ka ia roti Manna anu nitabuniaka. Bo Kudekei muni watu nabula simbo sangu ka ira. Ri watu nabula haitu nitulisi sanga nabaru anu ledo ntoto nisani ntona ntanina, aga tona mantarima watu nabula haitu mangisanina.”

¹⁸Bo nitudu Ana nu Manusia vai yaku motulisi ka malaeka anu nanggeniaka todea topomparasaya ri ngata Tiatira ivei: “Hitumo tesa lako nte Yaku, Ana nu Alatala anu nomata narega mpo apu bo nokada nenggila mpo tambaga.

¹⁹NisaniKumo pura-pura pokainggumiu. NisaniKu tovemiu bo pomparasayamiu nte Yaku. NisaniKu bagomiu nantulungi Yaku bo komiu nosabara tempo nipandasa. Bo nisaniKu bagomiu nantulungi Yaku sii-sii nabelopa pade anu nipoviamiu tempo komiu dako nomparasaya Yaku.

²⁰Tapi da nariapa sangaya pokainggumiu anu ledo ntoto nipodambaKu. Haitumo mombine anu nosanga i Izebel anu nompangaku karonu nabi. Komiu nompaloga ia nompatuduki bo nombabagiu topangoseaka Yaku. Ia nompatuduki ira mosipogau ante tona ledo bereira mboto bo mangande kandea nipopali sabana nipakande ka tupu-tupu ntanina.

²¹NidekeiKumo loga ka ia majea lako ri pokaingguna nadaa haitu, tapi ia ledo ntoto nadota majea.

²²Jadi epemo! Yaku mompakadua ia sampe ia aga maturu ri paturuna. Bo tona nangoseaka pokaingguna nobualo, Kupambela susa bo pari nadaa, ane ledo menonto ira nangoseaka pokaingguna.

²³Bo ana-anana Kupatesi sampe malanto ka pura-pura topomparasaya, Yakumo anu nomparea pekiri bo rara ntai manusia, bo Yakumo anu mombabalasi komiu saito-saito nangoseaka pokainggumiu.

²⁴Tapi naria muni komiu toTiatira ledo nangoseaka pepatuduki nadaa haitu bo ledo nadota neguru anu niuli ntona ‘pangisani Magau nu Seta anu nalonto.’ Kuuli ka komiu ivei: Ledo Kutambai parenta-parenta ntanina ka komiu.

²⁵Tapi Kingisi pakarosomo pepatuduki anu naria nte komiu sampe Yaku makava mpanjili.

²⁶⁻²⁷Isema-sema padagi bo mangoseaka dotaKu sampe ri kaupuna, Kudekeika kuasa nasimbayu mpo nitarimaKu lako nte TuamaKu. Kudekei kuasa ka ira momparenta manusia ri umba-umba ri dunia. Ira momparenta ante ase poboba. Bo rapakaropura balira nasimbayu mpo tona norupusaka kura tana.

²⁸Bo Kudekei ka ira betue Pompaeo.

²⁹Isema-sema naria talingana epemo pakabelo-belo anu niuli Nosa Gasa nu Alatala ka todea topomparasaya ri umba-umba ngata.”

Pompakita 3

¹Ana nu Manusia netudu vai ala kutulisi ka malaeka anu nanggeniaka todea topomparasaya ri ngata Sardis ivei: “Hitumo tesa lako nte Yaku anu nombakuasai papitu Nosa nu Alatala bo anu nantipale pitu-angu betue. NisaniKumo pura-pura pokainggumiu. Komiu nireke ntona topomparasaya naroso, tano pomparasayamiu haitu namatemo.

²Pembangumo! Pakarosomo pomparasayamiu anu damo sakide. Dopame mamate pomparasayamiu anu damo sakide, pakaroso mamimo. Apa nikitaKu

lako ri pura-pura pokainggumiu, nau sangaya dopa ria nagana ri panggita nu Alatala.

³Jadi toramo pepatuduki niepemi bo nitarimamiu bara ipia. Oseakamo pepatuduki haitu bo kajeamo lako ri dosamiu. Ane ledo mainga komiu, sampesanika Yaku makavamo mombahuku komiu. Yaku makava mpo topangangga, ledo rasanimiu maipia Yaku makava.

⁴Tapi da nariapa nte komiu ri ngata Sardis bara sako-ndua tona nombajagai pakeara sampe ledo natapa. Iramo anu mamala molipa mosanggani-nggani ante Yaku mopakea mputi, sabana iramo anu masipato molipa ante Yaku.

⁵Isema-sema padagi kana radekeika baju mputi. Bo sangara ledo Kupakalipo lako ri Buku Katuvua, tapi Kusaliku ri ngayo nTuamaKu bo malaeka-malaekana.

⁶Isema-sema naria talingana epemo pakabelo-belo anu niuli Nosa Gasa nu Alatala ka todea topomparasaya ri umba-umba ngata.”

⁷Ana nu Manusia netudu vai ala kutulisi ka malaeka anu nanggeniaka todea topomparasaya ri ngata Filadelfia ivei: “Hitumo tesa lako nte Yaku anu nagasa bo nanao. Yakumo nantipale gunji nu vamba Poparenta Magau Daud. Ane Yaku mombaungge vamba, ledo ria saitoa tona mamala mombatutuina, bo ane Yaku mombatutui vamba ledo muni maria saitoa tona mamala mombaunggena.

⁸NisaniKumo pura-pura pokainggumiu. NisaniKu munimo ledo naroso ntoto pomparasayamiu, tapi komiu natutu nangoseaka tesaKu bo ledo nisapumi Yaku. Epemo! Yaku nobuka ka komiu sangu vamba, bo ledo ria saitoa tona mamala mombatutuina.

⁹Naria tona najadi todea Magau nu Seta anu nanguli iramo toYahudi, tano mai ledo, aga davara. Tapi epemo! Ira kana Kupopantaputu ri ngayomiu. Bo raulira Yaku mpuu-mpuu nompotove komiu.

¹⁰Komiu nangoseaka parentaKu anu nanguli pakaroo rara bo mosabara tempo nipandasa. Sabana haitu, Kusaliku komiu lako ri kasusa makava ri njumangu dunia mompesori tona nonturo ri dunia.

¹¹Domo masae Yaku makava! Jadi kingisi pakarosomo pepatuduki nipatuduki ka komiu ala komiu manggava hadia padagi lako nte Alatala. Nee sampe maria tona mangago hadia haitu lako nte komiu.

¹²Isema-sema padagi, ia masimbayu mpo tinja naroso ri banua nTuamaku Alatala. Ia matetida ri suruga sampe ri kasae-saena. Bo ri karon Kutulisi sanga nTuamaku Alatala, bo sanga nu ngata nTuamaku Alatala, haitumo Yerusalem nabaru anu manau lako nte Tuamaku Alatala ri suruga. Bo sangaKu mboto nabaru kana Kutulisi ri karon.

¹³Isema-sema naria talingana, epemo pakabelo-belo anu niuli Nosa Gasa nu Alatala ka todea topomparasaya ri umba-umba ngata.”

¹⁴Ana nu Manusia netudu vai ala kutulisi ka malaeka anu nanggeniaka todea topomparasaya ri ngata Laodikia ivei: “Hitumo tesa lako nte Yaku anu nipoposanga ‘Amin’, haitumo sabi natutu notesa anu nakana. Yakumo Tupu nu pura-pura anu nipajadi nu Alatala.

¹⁵NisaniKumo pura-pura pokainggumiu. Komiu ledo baliKu bo ledo muni topangoseaka Yaku. Aginamo komiu nompoara atau nompoiyo.

¹⁶Tapi komiu aga netanggode, ledo nompoara, ledo nompoiyo. Sabana haitu Kuteveulusaka komiu lako ri ngangaKu.

¹⁷Komiu nanguli, ‘Kami hii nakalumanamo, nagana puramo katuvu kami, domo kami paraluu nuapa-nuapa.’ Tapi kakanana ledo nisanimiu katuvumiu mboto! Komiu nelabi napakasi. Katuvumiu aga nipoasi mata ntona. Komiu napakasi mpuu, naburo matamiu, bo novuloamo komiu.

¹⁸Haitu sampe Kutevai ka komiu ivei: Alimo bulava nipakagasa riara apu lako nte Yaku ala komiu mpuu-mpuu makalumana ri panggitaKu. Bo ali munimo pakea mputi lako nte Yaku, ala komiu mamala mopakea bo ledo maeya

matamiu rakita ntona komiu novuloa. Bo ali munimo pakuli ragese ri matamiu ala komiu mamala mekita mpanjili.

¹⁹Isema-sema nipotoveKu, Kuonteaka bo Kujeani ala mompatuduki ira. Haitu sampe Kuuli ka komiu, pakadidi raramiu bo kajeamo lako ri dosamiu.

²⁰Peintamo! Hitumo Yaku neangga nombatanede-nede ri vamba. Ane maria tona mangepe suaraKu bo mombabuka vamba, Yaku mesua nte ia bo mangande mosanggani-nggani ante ia.

²¹Isema-sema padagi, ia Kupaloga monturo moparenta mosanggani nte Yaku ri Gadera KamagauaKu, nasimbayu mpo Yaku muni najadi padagi bo sii-sii nonturo bo noparenta nosanggani-nggani nte TuamaKu ri GaderaNa.

²²Isema-sema naria talingana, epemo pakabelo-belo anu nitesa Nosa Gasa nu Alatala ka todea topomparasaya ri umba-umba ngata.”

Pompakita 4

¹Naupu haitu naria vai anu nipopakita ka yaku. Nikitaku sangu vamba natebuka ri suruga. Bo niepeku suara pamulana anu notesa ka yaku pangane, kamanggana mpo moni ntabue. Nangulimo suara haitu ka yaku, “Pompene tumai! Kupopakita ka iko anu majadi maliu anu nikitamu pangane.”

²Sampesanika yaku nikuasai Nosa Gasa nu Alatalamo bo nikenina yaku hau ri suruga. Nakava hamai, nikitaku sangu Gadera Kamagaua, bo naria saito Toponturo ri Gadera haitu.

³Toponturo haitu lenjeNa damo nenggila mpengaya-ngaya surana mpo mata sinji anu nosanga watu yaspis, bo watu sardis. Naria muni tirauve nagavu mpo watu zamrud nombalili Gadera haitu.

⁴Bo naria muni ropulu bo ampa gadera ntanina nantiku Gadera pangane. Gadera ntanina haitu niponturo ntotua ropulu bo ampa. Ira nopakea mputi bo nosonggo bulava.

⁵Lako ri Gadera Kamagaua pangane nesuvu kila damo mparea nevanta, bo gente nu guru damo nosinjaleva poguna. Ri ngayo Gadera haitu naria muni pitu-angu sulo narega. Pitu-angu sulo haitu batuana papitu Nosa nu Alatala.

⁶Bo ri ngayo Gadera haitu naria muni sangaya nikitaku eva tasi nevayo mpo kaca. Ri sia naria ampa Anu Natuvu, nombatiku Gadera haitu. Nadea mpuu matara, ri njumangu karora naria mata, ri ngayora bo ri bengora.

⁷Anu Natuvu pamulana lenjena mpo singa, bo karanduana lenjena mpo japi lakina. Katataluna lenjena mpo manusia, bo kaampana lenjena mpo love mbaso tempo nevoru.

⁸Anu Natuvu haitu simbo aono kapina, bo ri njumangu karora naria mata, nau ri tambe kapira muni. Eo bongi ira ledο nenonto nodade, “Nagasa, nagasa, nagasa Tupu Alatala Neliu KakuasaNa. Ia naria mamimo lako ri lamba pamulana, bo sii-sii Ia naria. Bo Ia batena maria sampe ri kasae-saena.”

⁹Anu Natuvu haitu nombatoiya bo nombabila bo nosukuru nte Toponturo ri Gadera Kamagaua anu natuvu sampe ri kasae-saena. Tempo ira netoiya ivesia,

¹⁰ropulu bo ampa totua haitu nantaputu sampe ri tana ri ngayo nToponturo haitu. Ira nombasomba Ia anu natuvu sampe ri kasae-saena, bo nialara songgo bulava lako ri balenggara mboto bo nituura ri ngayo Gadera Kamagaua nu Alatala, tanda pobilara Ia. Bo niulira ivei:

¹¹“O, Alatala, Tupu kami, aga Komiu masipato ratoiya bo rabila kami. Aga Komiumo nakuasa, Komiumo nompajadi pura-pura anu naria. Bo lako ri dotaMiu mboto sampe pura-pura haitu nipajadi bo naria.”

Pompakita 5

¹Naupu haitu nikitaku santau sura nibaluu ri pale nggana nToponturo ri Gadera Kamagaua haitu. Sura haitu nitulisi ntimali bo nipulu pitu-mpopulu ala ledο mamala rabuka ntona.

²Bo nikitaku naria saito malaeka naroso mpuu nakava nekutana ante suara namangga, “Isema masipato mombabuka populu sura bo mombavole sura hitu?”

³Tapi ledo ntoto ria saitoa masipato mombabuka sura haitu bo mombabaca isina, nau ri suruga, nau ri dunia, nau ri tambe ntana.

⁴Nanggita haitu, notumangi yaku nonjodu-njodu bo nasusa mpuu raraku sabana ledo ntoto naria saitoa tona masipato mombabuka bo mombabaca isi nu sura haitu.

⁵Nanggita yaku notumangi, naria saito totua lako nte ira ropulu bo ampa haitu nanguli ka yaku, “Nee motumangi! Peintamo! Nariamo padagi. Sangana Singa lako ri valaa i Yehuda, Muli Magau Daud. Iamo masipato mombabuka sura pitu-mpopulu haitu.”

⁶Naupu haitu nikitaku sangu Ana Bimba neangga ri sinjori Gadera Kamagaua bo nipatiku nu ampa Anu Natuvu bo totua-totua gahaitu. Ri karoNa nikitaku bela baka, belana tempo Ia nipatesi nggaulu. Ri balenggaNa naria papitu tanduNa bo mataNa muni pitu-angu. Pitu-angu mataNa haitu, batuana papitu Nosa nu Alatala anu nituduNa hau ri njumangu dunia.

⁷Bo nekaparaimo Ana Bimba haitu mangala sura nibaluu lako ri pale nggana nToponturo ri Gadera Kamagaua.

⁸Tempo Ana Bimba nangala sura haitu, nantaputumo ampa Anu Natuvu, bo ropulu bo ampa totua ri ngayoNa mombasomba Ia. Ri palera saito-saito naria kacapi bo tubu bulava niisi dupa anu navangi mpuu. Dupa haitu nirapaka posambaya ntodea nu Alatala.

⁹Totua-totua gahaitu nodade sanggayu dade nabaru ka Ana Bimba ivei: “Komiumo masipato mangala sura haitu bo mombabuka populuna. Sabana, Komiu nipatesi bo ante raa nggamateMiu haitu nitoloMiu manusia lako ri njumangu dunia majadi todea nu Alatala, haitumo tona lako ri pura-pura ngata, bo lako ri pura-pura valaa bo tona lako ri mpengaya-ngaya basa ri dunia.

¹⁰Ira nipajadiMiu magau bo topanggeni pesomba anu nanggeni pesomba ka Tuputa Alatala. Bo ira moparenta mpo magau ri dunia hitu.”

¹¹Naupu haitu nipeintaku, bo niepeku suara malaeka nadea, nonjobu-njobu bo nojuta-juta kadeana. Ira nombatiku Gadera Kamagaua nosangani-nggani ante ampa Anu Natuvu bo ropulu bo ampa totua.

¹²Bo nodademo ira ante suara namangga ivei: “Ana Bimba anu nipatesi nggaulu, masipato ratesata kuasaNa bo kakalumanaNa, notoNa bo kabarakaNa. Iamo masipato rabila bo ratoiya bo rapakaoge.”

¹³Pade niepeku munimo suara nu pura-pura anu natuvu ri suruga, ri tana, ri tambe ntana, rantasi, bo pura-pura anu natuvu nodade ivei: “Toponturo ri Gadera Kamagaua bo Ana Bimba haitu masipato ratoiya bo rabila bo rapakaoge, bo kuasaRa masipato ratesata sampe ri kasae-saena.”

¹⁴Bo nepasiosemo ampa Anu Natuvu haitu, “Amin, nakana mpuu!” Bo nantaputumo totua-totua gahaitu sampe ri tana mombasomba Alatala.

Pompakita 6

¹Naupu haitu nikitaku Ana Bimba nombabuka populu paratama. Pade niepeku saito lako ri ampa Anu Natuvu haitu notesa ante suara namangga mpo moni guru kede. Niulina, “Kamaimo!”

²Nipeintaku, naria sangu jara bula. Topesavina nanggangisi pana bo nidekei ka ia songgo, mpo songgo nipoposonggoka tona padagi riara mposieva. Bo haumo ia mpo tadulako mombadagi balina.

³Naupu haitu, Ana Bimba nombabuka populu karanduana bo niepeku Anu Natuvu karanduana nanguli, “Kamaimo!”

⁴Bo nesuvu munimo sangu jara nalei buluna. Topesavi jara haitu nidekeika kuasa momposinggarau manusia ri dunia ala ira mosipatesi. Bo ia nidekeika guma nambaso samata.

⁵Naupu haitu Ana Bimba nombabuka populu katataluna. Bo niepeku Anu Natuvu katataluna nanguli, “Kamaimo!” Nipeintaku, naria munimo sangu jara navuri buluna, bo topesavi jara haitu nanggangisi daci potimba ʘtandana mapepa kandeaʘ.

⁶Naupu haitu niepeku suara lako ri olo ampa Anu Natuvu pangane nanguli, “Ali nu gando salite nasimbayu nte gaji saeo, bo ali labu nu ose talu-lite nasimbayu muni nte gaji saeo. Aga nee rapakagero talua zaitun bo talua anggur!”

⁷Naupu haitu Ana Bimba nombabuka populu kaampana. Bo niepeku suara lako ri Anu Natuvu kaampana nanguli, “Kamaimo!”

⁸Naliu haitu nikitaku sangu jara navaa buluna! Topesavi jara haitu nosanga “Kamatea.” Bo anu netuntuni ri purina nosanga “Ponturo Ntomate.” Ira randua haitu nidekeika kuasa mombabagi ampa pura-pura manusia ri dunia bo mompatesi sabagia. Naria sanu namate tempo posieva, naria sanu namate tempo nu ara, naria sanu namate tempo dua timboro, bo naria muni sanu namate nikande binata-binata nasingi ri dunia.

⁹Naupu haitu Ana Bimba nombabuka populu kaalimana. Bo nikitaku ri tambe Lanta Pesomba naria nyawa-nyawa ntona namate anu nipatesi sabana nompatolele Tesa nu Alatala bo ledo nenonto notesaki pomparasayara i Yesus.

¹⁰Ira nongare sanggani ante suara namangga mpuu, “O Pue, Komiu nelabi nakuasa! Komiu nagasa bo nanao! Sakuyapa kasaena pade ratangaraMiu bo rabalasiMiu tona nadaa ri dunia nompatesi kami?”

¹¹Naupu haitu, ira saito-saito nidekeika santonga baju mputi. Bo nangulimo Alatala ka ira, “Posabaramo sampalaipa sampe magana kadeana roamiu sampokarajaa, haitumo sampesuvumiu sampomparasaya anu rapatesi nasimbayu mpo komiu.”

¹²Naupu sia, nikitaku Ana Bimba nombabuka populu kaaonona. NibukaNapa, nalingu mbasomo bo mata nu eo najadi navuri mpo karu vuri. Bo bula najadi nalei njumangu mpo raa.

¹³Bo betue-betue nanavu sampe ri tana nasimbayu mpo vua kayu naleso naronto lako ri pantakana tempo niburu mpouri narimboso.

¹⁴Bo langi nekonjo nasimbayu mpo ompa nibaluu. Bo pura-pura bulu bo pura-pura levuto rara ntasi nolinja lako ri ponturora.

¹⁵Tempo haitu hau puramo tona ri dunia netabuni riara bolo-bolo vatu bo ri kele-kele vatu ri buluna, haitumo magau-magau ri dunia, topoparenta-topoparenta, tadulako-tadulako, tona nakalumana, tona naroso, pura-pura tona najadi batua bo tona biasa.

¹⁶Nongaremo ira ka bulu-bulu bo vatu-vatu, “Ivumo kami! Tabuniakamo kami ala domo rakita mata nToponturo ri Gadera Kamagaua haitu. Ivumo kami ala kami ledo rapambela rau rara nu Ana Bimba!”

¹⁷Apa nakavamo eo nipoviora rara manusia, tempo Alatala bo Ana Bimba mompopakita rau raraRa. Nau saitoa ledo maria mompakule mombatidamaka rapambela rau rara haitu!

Pompakita 7

¹Naupu haitu, nikitaku ampa malaeka neangga ri pata-njulapa dunia. Ira nombataamaka poiri rimbose lako ri pata-njulapa dunia ala poiri haitu ledo meburu ri tasi bo ri kabatana bo ri kayu-kayu.

²Bo nikitaku munimo saito malaeka ntanina nesuvu lako ri mpandakena. Nikenina mere lako nte Alatala anu Natuvu. Bo nongaremo ia ante suara namangga ka ampa malaeka pangane, anu nidekei nu Alatala ka kuasa mompakagero kabatana bo tasi.

³Niulina, “Nepa ruru rapakageromiu tasi bo kabatana bo kayu-kayu dopame kami mombamere kire ntopangoseaka Alatala ala ira ledo rapambela kasusa-kasusa haitu.”

⁴Bo niepeku kadea ntona nimere kirera, saatu patapulu bo pata-njobu. Ira lako ri muli sapulu randua ana i Yakub anu niuli toIsrael.

⁵Lako ri mulira sapulu randua valaa i Israel niala simbo sapulu ronjobu kadeana. Lako ri muli i Yehuda sapulu ronjobu nimere. Ivesia muni lako ri muli i Ruben sapulu ronjobu, lako ri muli i Gad sapulu ronjobu,

⁶muli i Asyer sapulu ronjobu, muli i Naftali sapulu ronjobu, muli i Manasye sapulu ronjobu,

⁷muli i Simeon sapulu ronjobu, muli i Lewi sapulu ronjobu, muli i Isakhar sapulu ronjobu,

⁸muli i Zebulon sapulu ronjobu, muli i Yusuf sapulu ronjobu, bo lako ri muli i Benyamin sapulu ronjobu muni.

⁹Naupu haitu, naria vai anu nipopakita ka yaku. Nikitaku nadea mpuu manusia, ledo rapakule ntona mombabila kadeana! Ira topomparasaya lako ri njumangu dunia, lako ri pura-pura ngata, lako ri pura-pura valaa, bo tona lako ri pura-pura basa ri dunia. Ira neangga ri ngayo Gadera Kamagaua nu Alatala bo ri ngayo Ana Bimba. Ira nopakea mputi pura bo novenggo-venggo tava, tandana nadamba rarara.

¹⁰Bo nongaremo ira ante suara namangga, “Kamaimo kita mombatoiya bo mombabila Alatala anu nonturo ri Gadera Kamagaua! Kamaimo kita mombatoiya bo mombabila Ana Bimba, sabana Iramo nompakasalama kita!”

¹¹Pura-pura malaeka muni neangga nombatiku Gadera Kamagaua, bo totua-totua, bo ampa Anu Natuvu. Pura-pura ira nantaputu sampe ri tana ri ngayo Gadera Kamagaua nombasomba Alatala.

¹²Niulira, “Amin! Ratoiyata Tuputa Alatala! Rapakaogeta Ia! Ratesata kanotoNa, raulita tarima kasi ka Ia. Rabilata Ia bo ratesata kuasaNa bo kabarakaNa sampe ri kasae-saena. Amin!”

¹³Naupu sia, naria saito totua lako nte ira ropulu bo ampa haitu nompekutana nte yaku ivei: “Isema tona nopakea mputi gahaitu? Lako ri umba ira?”

¹⁴NeNesanamo yaku, “Pua, ledo nisaniku, komiu nangisanina.” Bo nangulimo ia ka yaku, “Ira gahaitumo tona nipakasalama tempo pepandasa anu nelabi mpuu kadaana. Nitoposira pakeara sampe naramputi ante raa nu Ana Bimba, haitumo, dosara niampungi.

¹⁵Haitu sampe ira neangga ri ngayo Gadera Kamagaua nu Alatala. Eo bongi ira ledo nenonto netupu bo nombasomba Alatala riaru Banua nu Alatala. Bo Alatala anu nonturo ri Gadera KamagauaNa haitu nosanggani-nggani ante ira ala mombalendu ira.

¹⁶Ira gahaitu domo mombarasai ara ntai bara bai ntambolo. Bo ira domo muni rapapusi mata nu eo bara mombarasai eo mpane.

¹⁷Sabana, Ana Bimba anu naria ri sinjori Gadera Kamagaua nu Alatala haitu nompoevu ira. Ia nombanini ira hau ri mata uve anu nombadekei katuvua nabelo. Bo Alatala mboto nompaisi pura-pura uve mata lako ri matara „mombaondopi ira.”

Pompakita 8

¹Tempo Ana Bimba nombabuka populu kapapituna, nalino njii riara suruga nitasere santanga jaa kasaena.

²Bo nikitaku papitu malaeka neangga ri ngayo nu Alatala. Ira nidekeika pitu-angu tabue.

³Naupu haitu naria saito malaeka ntanina nakava neangga ri ngayo Lanta Pesomba. Malaeka haitu nanggeni santonga tubu bulava raportunju dupa. Nadea dupa nidekei ka ia ratunjuna majadi pesomba ka Alatala nosangganingani ante posambaya ntodea nu Alatala pura-pura. Bo nitunjuna dupa haitu ri Lanta Pesomba anu nipovia lako ri bulava. Lanta haitu naria ri ngayo Gadera Kamagaua nu Alatala.

⁴Tempo malaeka nombatunju dupa haitu, ununa nosumoa ri ngayo nu Alatala nosangganingani ante posambaya ntodea nu Alatala.

⁵Naupu haitu nialana tubu potunju dupa haitu bo niisina ante ruti nu apu lako ri bavo Lanta Pesomba. Bo nitedakana hau riara dunia. Nitedakanapa ruti nu apu haitu, nepogumo guru kede bo kila damo mpavende bo najadimo lingu.

⁶Naupu haitu papitu malaeka nidekeika pitu-angu tabue pangane, nompakasadia mompopomoni tabuena saito-saito.

⁷Bo malaeka pamulana nompopomoni tabuena. Kaliu-liu nauda esi bo apu nogalo raa sampe ri tana bo naromba mpuu. Bo sabagia lako ri tatalu bagia tana naupu sangganingani nikande nu apu, sampe napapu sabagia lako ri tatalu bagia kayu-kayu bo pura-pura kavoko naramata.

⁸Naupu haitu malaeka karanduana nompopomoni tabuena. Kaliu-liu naria anu mpo bulu mbaso napapu nitedaka rantasi. Bo sabagia lako ri tatalu bagia tasi nabali najadi raa.

⁹Bo namate sangganimo sabagia lako ri tatalu bagia anu natuvu riara ntasi. Bo naropu munimo sabagia lako ri tatalu bagia kapala nolipa rantasi.

¹⁰Naupu haitu malaeka katataluna nompopomoni tabuena. Kaliu-liu nanavumo sangu betue mbaso lako ri langi, narega mpo sulo. Betue haitu nanavu nambela sabagia lako ri tatalu bagia binangga bo mata nu uve ri dunia.

¹¹Sanga betue haitu “Napai”. Jadi sampetuu betue haitu, sabagia lako ri tatalu bagia binangga bo mata nu uve haitu najadi napai. Bo nadea manusia namate sabana nanginu uve napai haitu.

¹²Naupu haitu malaeka kaampana nompopomoni tabuena. Kaliu-liu naria anu nambela mata nu eo, bula bo betue-betue, sampe nalipomo sabagia lako ri tatalu bagia remera. Jadi, pata-jaa ri eona, mata nu eo ledo nareme, bo ivesia muni bula bo betue-betue tempo nabongi.

¹³Naupu haitu nitingoaku bo nikitaku sambaa tonji love nevoru ri laerava. Niepeku love haitu notesa ante suara namangga. Niulina, “Mandasamo! Mandasamo! Mandasamo tona nadaa nonturo ri dunia tempo malaeka tatalupa mompopomoni tabuera ngena.”

Pompakita 9

¹Naupu haitu malaeka kaalimana nompopomoni tabuena. Nomonipa tabue haitu, nikitaku sangu betue lako ri langi nanavu ri tana. Betue haitu nidekeika gunji vamba nu lovu anu ledo rapakule mantuvu kandalana.

²Naupu betue haitu nombabuka vamba lovu, nesuvumo unu nu apu oge lako riara lovu ndala haitu, nasimbayu mpo unu ntalua luu nitunju ntona. Bo mata nu eo bo laerava najadi nalanda sabana unu oge nesuvu lako riara lovu ndala haitu.

- ³Bo lako riara unu haitu nesuvumo nggaboro-nggaboro hau notagu ri tana. Nggaboro-nggaboro haitu nipopompakule mompandasa manusia, nasimbayu mpo supitole anu naria ri dunia.
- ⁴Nggaboro gahaitu nitagi mompakamate kavoko bara kayu bara tuda-tuda ntanina riara dunia. Aga manusia ledo naria mere nu Alatala ri kirena nipaloga rapandasa nggaboro gahaitu.
- ⁵Nggaboro gahaitu ledo muni nipaloga mompatesi manusia ri dunia. Ira aga nipaloga mompandasa ira pakadaa lima-mbula kasaena. Dua nirasai manusia anu nipandasa nggaboro haitu, nasimbayu mpo dua nirasai ntona nisii nu supitole.
- ⁶Lima-mbula kasaena, manusia nipandasa nggaboro gahaitu nandasa mpuu nirasaira sampe nompasimbuku mamate, tapi ledo namate. Ira mpuu-mpuu madota mamate, tapi ledo namate.
- ⁷Karo nggaboro gahaitu nasimbayu mpo jara nipesavi ntona mosieva. Ri balenggara naria sangaya nolenje mpo songgo bulava. Bo lenjera nasimbayu nte lenje nu manusia.
- ⁸Bulua nggaboro gahaitu nasimbayu mpo bulua mombine. Bo ngisira mpo ngisi singa.
- ⁹Bambarara nitutui nu ruke-ruke mpo baju ase. Bo moni kapira mpo moni doka nadea mpuu niumbu jara nangova hau ri posieva.
- ¹⁰Lelo nggaboro gahaitu nasimbayu mpo lelo nu supitole, bo bisa nu lelona haitu nasimbayu mpo bisa pesii nu supitole. Ri lelora haitu naria bisa mompakandasa manusia lima-mbula kasaena.
- ¹¹Naria saito magau najadi pakenira, iamo malaeka anu nakuasa mombabuka vamba lovu anu ledo rapakule mantuvu kandalana haitu. Sangana riara basa Ibrani, i Abadon, bo riara basa Yunani i Apolion. Batuana, Toperopu.
- ¹²Pepandasa pamulana naliumo, tapi epemo! Da nariapa rongaya pepandasa ntanina makava.

¹³Naupu haitu malaeka kaaonona nompopomoni tabuena. Bo niepeku naria suara notesa lako ri pata-njoki Lanta Pesomba nipovia lako ri bulava anu naria ri ngayo nu Alatala.

¹⁴Suara haitu nanguli ka malaeka kaaonona ivei: “Volemo ampa malaeka anu nisoo ri Binangga Efrat haitu.”

¹⁵Jadi nivolenamo malaeka ampa haitu. Malaeka ampa haitu nipakasadia mamimo lako ri nggauluname bo ira nompopea gantana ri mpae bo bula bo ri eo bo jaa nipakatantumo mompatesi sabagia lako ri tatalu bagia manusia ri dunia.

¹⁶Tantara-tantara nojara nantuntuni ira haitu roatu juta kadeana. Nisaniku kadeana sabana naria tona nanguli ka yaku.

¹⁷Riara panggitaku nikitaku jara-jara bo topesavina. Topesavi jara haitu nobaju ase. Bajura haitu nalei mpo vaya nu apu, bo nagavu mpo uve ntasi, bo nakuni mpo vatu colonggata. Balengga nu jara gahaitu mpo balengga nu singa, bo lako ri sumbara nesuvu unu, unu nu apu, bo vatu colonggata narega.

¹⁸Sabagia lako ri tatalu bagia manusia ri dunia nipatesi ante talu-ngaya pepandasa, haitumo ante apu, unu nu apu, bo vatu colonggata narega nesuvu lako ri sumbara.

¹⁹Bo ri lelo nu jara gahaitu naria sangaya nolenje mpo balengga nu ule neteo. Ante lelora, nipandasara manusia. Jadi jara gahaitu nompandasa bo mompatesi manusia ante sumbara bo ante lelora.

²⁰⁻²¹Manusia ntanina anu ledo namate riara pepandasa-pepandasa haitu, ledo ntoto najea lako ri pokainggura nadaa. Haitumo, ira ledo nadota nenonto nepatesi, bo ledo nadota nenonto nombadoti tona. Ira ledo nadota nenonto nosipogau ante tona ledo bereira mboto, bo ira ledo ntoto nadota nenonto nangangga. Ira ledo muni nenonto nombasomba seta-seta bo anu nipoviara mboto, evamo pinoito-pinoito nipoviara lako ri bulava, salaka, tambaga, vatu, bo kayu. Pinoito haitu ledo naria matana mekita bo ledo muni naria talingana meepe bo ledo nokada sampe mamala molipa.

Pompakita 10

¹Naupu haitu nikitaku malaeka ntanina anu naroso mpuu nanau lako ri suruga. Ia nibungu kulimu bo balenggana nilili ntirauve. Lenjena mpo kareme nu eo bo kadana mpo tinja, nenjela mpo vaya nu apu.

²Kada ngganana nombajeje tasi bo kada njidina nombajeje kabatana. Ri palena naria sangu buku kodi natebukamo.

³Bo nongaremo ia ante suara namangga, mpo kamangga suara nu singa. Nongarepa malaeka haitu, nepogumo pitu-angu guru ante moni namangga, notesa mpo manusia.

⁴Naupu pitu-angu guru haitu notesa, yaku madota motulisi anu niuli nu guru haitu. Tapi naria suara lako ri suruga nombatagi yaku ivei: “Tabuniakamo tesa niuli nu guru pitu-angu haitu! Nee mutulisi tesara!”

⁵Naupu haitu malaeka nikitaku pangane anu nombajeje tasi bo kabatana, nanganggataka pale ngganana hau ri langi.

⁶Bo nojanjimo ia ante sanga nu Alatala anu natuvu sampe ri kasae-saena, anu nompajadi langi, tana bo tasi bo pura-pura isina. Nanguli malaeka haitu, “Tempona domo rakonto-konto.

⁷Ane malaeka kapapituna mompopomoni tabuena, tempo haitumo Alatala mompakadupa niaNa nasaemo nitabuniakaNa. Kadupana haitu niuliNa ka batuaNa nggaulu, haitumo nabi-nabi anu nompasimbayu tesaNa.”

⁸Naliu haitu suara niepeku lako ri suruga pangane nanguli vaimo ka yaku, “Koi ala buku kodi anu natebukamo anu nikangisi nu malaeka anu nombajeje tasi bo kabatana.”

⁹Jadi hau yaku nanggaparai malaeka haitu bo niuliku ka ia, “Dekei ka yakumo buku kodi tutu.” Nangulimo ia ka yaku, “Alamo bo kande pakaupu buku hitu. Riara ntaimu buku hitu murasai mapai, tapi riara ngangamu murasai namomi mpo manisa.”

¹⁰Bo nialakumo buku kodi lako ri pale malaeka haitu, bo nikandeku sampe naupu. Ri ngangaku nirasaiku namomi mpo manisa. Tapi niomekupa, napaimo nirasaiku ri tailikoku.

¹¹Naupu haitu yaku nitudu vaimo, “Iko kana mompasimbayu tesa lako nte Alatala anu notesaki anu majadi nte magau-magau bo todea lako ri mpengaya-ngaya ngata bo valaa, bo topotesa mpengaya-ngaya basa.”

Pompakita 11

¹Naupu haitu nidekei ka yaku sanggoto kayu nolenje mpo kayu poreke. Bo yaku niparenta nu Alatala ivei: “Koimo reke BanuaKu ʼri ngata Yerusalem,ʼ bo Lanta Pesomba. Bo bila muni sakuya kadea ntona netupu riaru BanuaKu haitu.

²Tapi nee mureke kaluona doyata ri savaliku BanuaKu, sabana doyata haitu nidekei ka tona ledo nomparasaya i Yesus. Talu-mpae santanga kasaena ira mombakuasai ngataKu Yerusalem.

³Tempona haitu Kusuro randua tona mompasimbayu tesaKu. Ira mompake baju nipovia lako ri karu mpo tona nasusa rarana, bo ira mompasimbayu tesaKu talu-mpae santanga kasaena.”

⁴Randua suro haitu nirapaka ronggayu kayu zaitun bo roangu kada mpoindo anu neangga ri ngayo nu Alatala, Tupu nu njumangu dunia.

⁵Ane maria tona madota mompakadaa ira, maria apu mesuvu lako ri ngangara bo mompakaropu bali-balira gahaitu. Ivesiamo isema-sema madota mompakadaa ira rapatesi ante apu haitu.

⁶Ira randua haitu makuasa mantaamaka uda ala ledo mauda sakuya kasaena ira mompasimbayu tesa lako nte Alatala. Ira muni makuasa ri mata-mata nu uve ala mombabali uve-uve haitu majadi raa. Bo ira makuasa mompandasa manusia ri dunia ante mpengaya-ngaya pepandasa maipia rapodotara ʼala manusia majea lako ri dosara,ʼ.

⁷Ane maupumo ira randua mompasimbayu tesa nu Alatala, makavamo binata nadaa mangeva ira. Binata nadaa haitu anu mesuvu lako riaru lov u anu ledo

rapakule mantuvu kandalana. Ia mombadagi randua tona pangane bo mompatesi ira.

⁸Bo karobatara randua haitu matepalamba nggoo ri dala jama ri ngata mbaso, haitumo ri ngata anu nipompatesi i Yesus ri kayu salib. Ngata mbaso haitu nirapaka Sodom bo Mesir nggaulu „sabana nadaa mpuu tupu ngata haitu„.

⁹Talu-mbongi santanga kasaena karobatara randua ledo radekei ratana ri dayo, aga rakita ntona lako ri njumangu dunia, lako ri pura-pura ngata, bo lako ri pura-pura basa ri dunia.

¹⁰Manggita haitu, tona nadaa nonturo ri dunia madamba mpuu. Ira mosusa madamba-damba bo mosidekeika hadia, sabana namatemo tona randua haitu anu mpuu-mpuu nompandasa toponturo ri dunia.

¹¹Tapi nikitaku naliu talu-mbongi santanga, naria mpanjili nosara lako nte Alatala. Natuvu mpanjilimo ira bo kaliu-liu neangga ri sia. Nanggita ira natuvu mpanjilimo, naviora puramo tona nadea gahaitu.

¹²Naupu haitu nariumo suara namangga lako ri suruga nanguli ka ira randua, “Kamaimo! Peore tumaimo!” Bo neore mpuumo ira hau ri suruga nibungu kulimu bo pura-pura balira nanggita peorera haitu.

¹³Eva nisuka, ri tempo haitu muni najadimo lingu mbaso. Bo nageromo sabagia lako ri sapulu bagia ngata mbaso haitu, bo pitu-njobu tona namate sabana lingu mbaso haitu. Nanggita haitu naviora mpuumo rara ntona da natuvu ri sia, bo niulira, “Nambaso mpuu kuasa nu Alatala anu naria ri suruga!”

¹⁴Jadi naliumo pepandasa karanduana. Epemo! Domo masae pepandasa katataluna muni kana majadi.

¹⁵Naupu haitu malaeka kapapituna nompopomoni tabuena. Bo kaliu-liu nariumo suara-suara ri suruga nongare ante namangga mpuu ivei: “Sii-sii pura-pura poparenta ri dunia hitu najadi poparenta nTuputa bo poparenta nu Magau Topepakasalama anu nijanji nu Alatala. Ia momparenta sampe ri kasae-saena!”

¹⁶Bo ropulu bo ampa totua anu nonturo ri gaderara ri ngayo nu Alatala nantaputu sanggani sampe ri tana mombasomba Alatala.

¹⁷Niulira, “O, Pue Alatala, neliu mpuu KakuasaMiu! Bo Komiu naria mamimo lako ri lamba pamulana bo bate-batena naria sii-sii! Kami notarima kasi nte Komiu apa nipopakitaMiumo kuasaMiu naoge. Nompamulamo Komiu nomparenta!

¹⁸Tona ledo nosisani nte Komiu narau bo nangeva Komiu. Tapi nakavamo gantana Komiu mompopakita rau nu raraMiu ka ira. Nakavamo gantana Komiu mombatangara tona namate. Bo nakava munimo gantana Komiu mombadekei tambo ka batua-batuaMiu, haitumo, nabi-nabi anu nompasimbayu tesaMiu, bo ka pura-pura todeaMiu, ira anu nombabila Komiu, nau tona biasa, nau tona naoge katuvuna. Nakavamo gantana Komiu mombahuku tona anu nompakaropu manusia ri dunia hitu.”

¹⁹Naupu haitu natebukamo vamba Banua nu Alatala ri suruga bo riaru banua haitu nikitaku Peti Pojanji nu Alatala. Tempo haitu kila damo mparea bo guru kede damo mpapedi. Najadimo lingu mbaso ante uda esi naromba mpuu.

Pompakita 12

¹Naliu haitu, neumbamo tanda ri langi anu mpuu-mpuu nipokumaaka. Naria saito mombine nopakea mata nu eo. Ia neangga ri bavo nu bula, bo ri balenggana naria songgo nipovia lako ri sapulu randua betue.

²Mombine haitu natiana, damo kapoanana bo ia nongare-ngare sabana dua poanana.

³Bo neumba munimo tanda ntanina ri langi anu mpuu-mpuu nipokumaaka. Naria sangaya ule mbaso nalei, sangana ule naga. Ule naga haitu nobalengga papitu bo notandu sapulu. Pura-pura balenggana naria songgo magau.

⁴Lelo nu ule naga haitu nangumbunjai sabagia lako ri tatalu bagia betue ri langi, bo nitedakana ri tana. Ia neangga ri ngayo nu mombine ranja mpoana haitu. Patujuna mangome ana nu mombine haitu mesuvu.

⁵Bo mombine haitu noanaka saito ngana langgai. Ngana haitumo nomparenta njumangu dunia ante ase poboba. Dopa nakapo ngana haitu niome nu ule naga,

sampesani ngana haitu niagosimo lako nte tinana bo nikeni hau nte Alatala bo Gadera KamagauaNa ri suruga.

⁶Naupu haitu nalaimo mombine hau ri karava bai. Ri sia ia nonturo ri ponturo nipakasadia nu Alatala mamimo ka ia. Ri ponturo haitu ia nipiara talu-mpae santanga kasaena.

⁷Naria posieva riaru suruga. Tadulako malaeka nTupu nosanga i Mikhael ante malaeka-malaekana nomporoa ia nangeva ule naga haitu. Bo ule naga haitu nitulungi malaeka-malaekana muni nangeva gi Mikhael.

⁸Tapi ule naga ante malaekana nidagimo bo domo nipaloga nonturo ri suruga.

⁹Jadi ule naga haitu nipopalai lako ri suruga bo nitedaka hau ri dunia nosanggani-nggani ante malaeka-malaeka anu nantulungi ia. Ia haitumo Ule Ntua anu nosanga Topangadu atau Magau nu Seta, anu nombabagiu manusia ri njumangu dunia.

¹⁰Naupu haitu niepeku suara riaru suruga namangga mpuu nanguli, “Sii-sii nakavamo gantana Alatala mompakasalama todeaNa. Sii-sii nipopakitaNamo kuasaNa, nompamulamo Ia nomparenta mpo Magau. Sii-sii nakavamo Magau Topepakasalama anu nipelisi nu Alatala mompopakita kuasaNa, sabana Magau nu Seta nipopalaimo lako ri suruga, Magau nu Seta haitumo anu nompangadu todea sampomparasaya eo bongi ri ngayo nTuputa Alatala.

¹¹Tapi todea sampomparasaya haitu nombadagi Magau nu Seta ante kuasa lako ri raa nu Ana Bimba anu namate nombasompo dosara. Bo nidagira ia ante pepatuduki i Yesus nipatolelera. Bo ledo nipotovera katuvura, ledo ntoto nenonto nomparasaya nau sampe rapatesi.

¹²Sabana haitu, kana madamba mpuu komiu toponturo ri suruga. Tapi mandasamo komiu toponturo ri tana bo ri tasi sabana nanaumo Magau nu Seta tou nte komiu. Bo nagigi mpuumo rarana sabana nisanina logana mebagiu damo sampalai.”

¹³Nisani nu ule nagapa ia nitedaka ri dunia, niraganamo mombine anu dako noanaka ngana langgai pangane.

¹⁴Tapi mombine haitu nidekeika randua kapi nambaso mpo kapi ntonji love ala ia mamala mevoru hau ri ponturo nipakadia ka ia ri karava bai. Hamai ia rapiara talu-mpae santanga kasaena, bo ia ralenduti ala ledo mamala rakuyasi nu ule naga haitu.

¹⁵Ule naga haitu nombasuparaka uve oge mpo binangga lako ri ngangana hau nombaraga mombine haitu ala mombaavesaka ia.

¹⁶Tapi tana nantulungi mombine haitu. Kaliu-liu nebeka tana bo uve oge anu nisuparaka nu ule naga naupu pura nisondena.

¹⁷Nagigi mpuumo rara nu ule naga haitu nanggita mombine, sampe ia hau mombaeva muli-muli nu mombine haitu ntanina, haitumo tona natutu nangoseaka parenta-parenta nu Alatala bo bate-batena nanggangisi pepatuduki i Yesus.

¹⁸Naupu haitu neangamo ule naga haitu ri bivi ntasi.

Pompakita 13

¹Naliu haitu nikitaku sangu binata nadaa nesuvu lako rantasi. Binata haitu notandu sapulu bo nobalengga papitu. Pura-pura tanduna naria songgo mpo songgo magau, bo ri pura-pura balenggana nitulisi tesa-tesa nompandaente Alatala.

²Binata nikitaku haitu nolenje mpo taveve mbaso niuli tutul, bo kadana mpo kada nu beruang, bo sumbana mpo sumba nu singa. Bo ule naga nombadekei karosona mboto bo gadera kamagauana bo kuasana naoge ka binata haitu.

³Sangu lako ri pitu-angu balengga binata haitu naria bela baka oga anu rapomatena. Tapi bela haitu natoromo. Jadi pura-pura manusia ri dunia nokumaa mpuu nanggita binata nadaa haitu, bo nosimpagomo ira nangoseaka ia.

⁴Nisombara ule naga sabana ia nombadekei kuasa ka binata nadaa haitu, bo nisombara muni binata nadaa. Niulira, “Ledo ntoto naria kasimbayuna binata hitu! Ledo ria saitoa mabia mangeva ia!”

⁵Binata nadaa haitu nidekeika kuasa notesa, bo ia nangoe bo nompandaente Alatala. Nidekei muni ia noparenta bo novia dotana mboto talu-mpae santanga kasaena.

⁶Jadi ia nompakalanga karonu mboto, bo nompakasimbayu karonu nte Alatala. Ia nanjalai Alatala, bo nipandaentena muni Gadera Kamagaua nu Alatala ri suruga bo pura-pura anu nonturo hamai.

⁷Ia nipaloga muni mangeva todea nu Alatala bo mombadagi ira. Bo nidekei muni kuasa ka ia momparenta manusia ri njumangu dunia, haitumo tona ri pura-pura ngata, bo valaa, bo tona lako ri pura-pura basa ri dunia.

⁸Pura-pura manusia nonturo ri dunia mombasomba binata haitu, haitumo pura-pura tona anu ledo nitulisi sangara riara Buku Katuvua dopame dunia nipajadi. Buku haitu naria nte Ana Bimba anu nipatesi.

⁹Jadi, isema-sema naria talingana epemo pakabelo-belo tesa hitu:

¹⁰Isema-sema nipakatantu ratavani, kana ratavanimu. Isema-sema nipakatantu rapatesi ante guma, kana rapatesi ante gumamo. Anu nopoko ri sii, todea nu Alatala kana maroo tempo nipandasa bo nee moura momparasaya.

¹¹Naliu haitu nikitaku sangaya binata nadaa ntanina neumba lako ri tana. Binata haitu notandu randua mpo tandu nu ana bimba, tapi suaranya mpo suara ule naga.

¹²Binata nadaa karanduana haitu mpo nabi niposuro nu binata nadaa pamulana. Jadi pura-pura kuasa nu binata pamulana haitu nipajala nu binata karanduana. Pura-pura manusia ri dunia nipasuuna mombasomba binata pamulana anu naria bela baka oga anu natoromo.

¹³Binata karanduana haitu novia tanda-tanda nipokumaaka. Ri ngayo ntona pura-pura nipopanauna apu lako ri langi nanavu ri tana.

¹⁴Nipoviana tanda-tanda haitu ante kuasa nidekei nu binata pamulana ka ia ala mombabagiu tona nonturo ri dunia. Nituduna ira movia bo mompopeangga sangu pinoito nambaso nolenje mpo binata pamulana, anu nitimbe pakaoga tapi ledo namate.

¹⁵Binata karanduana nidekeika kuasa mompopoinosa pinoito haitu sampe pinoito haitu namala motesa. Bo pinoito haitu momparenta isema-sema ledo madota mombasomba ia kana rapatesi.

¹⁶Pura-pura tona nipasuu nu binata karanduana haitu ramere ri pale nggana atau ri kirera, nau tona biasa, nau tomaoge, nau tona nakalumana nau tona napakasi, nau tona najadi batua nau madika-madika.

¹⁷Ledo ria saitoa tona namala mangali atau mompobalu nuapa-nuapa ane ledo naria tanda haitu ri palena atau ri kirena, haitumo sanga nu binata pamulana atau lamoro anu norapaka sangana haitu.

¹⁸Kita paraluu noto ala rasanita batuana tesa pangane. Tona natau rasanina mombareke lamoro-lamoro lako ri sanga binata haitu, apa lamoro haitu nirapaka sanga manusia saito. Lamorona haitu onoatu onopulu bo aono.

Pompakita 14

¹Naliu haitu naria vai anu nipopakita ka yaku. Nikitaku Ana Bimba neangga ri bavo Bulu Sion nosanggani-nggani ante saatu patapulu bo pata-njobu tona. Bo sanga nu Ana Bimba bo sanga nTuamaNa Alatala nitulisi ri kirera.

²Bo niepeku moni namangga lako ri suruga mpo soo nu uve oge bo mpo pogu guru kede. Moni haitu mpo moni nu kacapi nidui.

³Tona saatu patapulu pata-njobu haitu nodade dade nabaru ri ngayo nu Alatala bo ri ngayo ampa Anu Natuvu bo totua-totua anu nombatiku Gadera Kamagaua nu Alatala. Dadera haitu ledo namala nipeguru ntona ntanina aga ira saatu patapulu bo pata-njobu anu nitolo nu Ana Bimba lako ri dunia.

⁴Ira haitumo nasimbayu mpo tona ledo sanggani nosampaturu ante mombine, nagasa mpuu pokainggura. Ira nangoseaka Ana Bimba ri umba-umba nikalauNa. Iramo nitoloki lako nte pura-pura manusia ri dunia bo nipatani ka Alatala bo ka Ana Bimba, nasimbayu mpo tona nombadekei asele ntalua pamulana ka Alatala.

⁵Ira ledo sanggani nodava, bo nau aga sakide ledo ntoto naria salara.

⁶Bo nikitaku saito malaeka ntanina nevoru ri laerava. Ia nanggeni Kareba Belo anu ledu nabali sampe ri kasae-saena ka pura-pura manusia ri dunia, haitumo ka tona ri pura-pura ngata, ri pura-pura valaa, bo lako ri pura-pura basa ri dunia.

⁷Notesamo ia ante suara namangga, “Bilamo Alatala, bo tesamo kaogeNa! Apa nakavamo tempona Alatala mombatangara manusia! Petupumo nte Alatala anu nompajadi langi, tana bo tasi bo pura-pura mata nu uve!”

⁸Naupu haitu naria malaeka karanduana nantuntuni malaeka paratama. Nangulimo ia, “Nageromo! Nageromo ngata mbaso Babel! Sabana, tupu ngata haitu nompakalangu tona lako ri umba-umba ngata ante uve anggurra, haitumo nikenira ira mompasiala pokainggura nadaa bo nabuga!”

⁹Naupu haitu naria malaeka katataluna nantuntuni malaeka karanduana pangane. Nongaremo ia ante suara namangga mpuu ivei: “Isema-sema nombasomba binata nadaa ante pinoitona bo nantarima mere nu binata haitu ri kirena bara ri palena,

¹⁰tona haitu rapokarau nu Alatala bo ledu ntoto rakurangiNa pehuku ka ira! Pehuku haitu nirapaka tona nipainu panginu napai mpuu, bo ledu niposigalo ante uve! Ira pura-pura rapandasa riaru apu bo vatu-vatu colonggata narega ri panggita malaeka-malaeka nagasa bo Ana Bimba.

¹¹Unu nu apu mompandasa ira bo ledu maupu-upu mounu sampe ri kasae-saena. Eo bongi ledu ria kaupu-upuna pepandasa ka ira sabana nisombara binata nadaa haitu ante pinoitona bo nitarimara tanda sanga nu binata haitu ri karora.

¹²Anu nopoko ri sii, todea nu Alatala kana maroo mompasaya bo mosabara tempo mombarasai susa, haitumo ira anu nangoseaka parenta-parenta nu Alatala bo ledu nenonto mompasaya i Yesus.”

¹³Naupu haitu niepeku suara lako ri suruga nanguli, “Tulisimo tesa hitu: nompamula sii-sii nabelo mpuumo tona natutu mompasaya i Pue sampe namate.” Bo nesanamo Nosa Gasa nu Alatala, “Nakana mpuu tutu. Domo

rarasaira kasusa bo kapari, bo maria tambo radekei ka ira nangoseaka panggaviara.”

¹⁴Naupu sia, naria vai anu nipopakita ka yaku. Naria kulimu nabula bo ri bavo nggulimu haitu naria saito tona nonturo, lenjena mpo Ana nu Manusia. Ri balenggaNa naria songgo bulava bo ri palena naria samata are ntada.

¹⁵Naupu haitu naria malaeka ntanina nesuvu lako ri Banua nu Alatala ri suruga. Bo nongaremo ia ante suara namangga ka tona nonturo ri bavo kulimu haitu, ivei: “Pakemo aremu tutu, bo posombemo, sabana temponamo mosombe! Manusia ri dunia nasadiamo rahuku!”

¹⁶Jadi tona nonturo ri bavo nggulimu haitu nompake arena bo nisombenamo isi dunia.

¹⁷Naupu haitu nikitaku saito malaeka ntanina nesuvu lako ri Banua nu Alatala ri suruga. Ia muni nantipale samata are ntada.

¹⁸Bo nakava saitopa malaeka ntanina lako ri Lanta Pesomba. Iamo nakuasa nombaurusi apu ri Lanta Pesomba haitu. Nongaremo ia ante suara namangga ka malaeka anu nantipale are ntada, ivei: “Pakemo aremu tutu bo tentesimo vua anggur ri dunia, natasamo vuana.”

¹⁹Jadi nipake nu malaeka haitu mpuumo arena nombatentesi vua anggur haitu lako ri valaana, bo nitendeakana hau riar pompea vua anggur. Poviana haitu nirapaka tempo Alatala mompopesuvu rau raraNa ka tona nadaa pokaingguna.

²⁰Jadi vua anggur haitu nipea ri pompea vua anggur ri savaliku ngata. Bo noilimo raa lako ri pompea haitu mpo binangga kaogena, kakavao poili raa haitu talu-atu kilo kakavaona bo kandalana nitasere sametere santanga.

Pompakita 15

¹Naupu haitu, nikitaku ri suruga naria sangayapa tanda nambaso anu nipokumaaka. Naria papitu malaeka ante pitu-ngaya pepandasa kaupuna. Ante pepandasa haitu maupumo rau rara nu Alatala mompokarau manusia ri dunia.

²Bo naria sangaya nikitaku eva tasi nevayo mpo kaca bo nogalo apu. Bo ri bivi ntasi haitu nikitaku tona dea neangga. Tona gahaitumo nombadagi binata nadaa sabana ira ledo ntoto nombasomba ia, bo ledo nombasomba pinoito binata haitu, bo ledo nombatarima mere nu binata haitu, haitumo lamoro nirapaka sangana. Pura-pura ira neangga ri bivi ntasi haitu nantipale kacapi nidekei nu Alatala ka ira.

³Bo nipodadekaramo dade Nabi Musa, batua nu Alatala nggaulu. Bo nipodadekara muni dade mombabila Ana Bimba ivei: “O Pue Alatala, neliu mpuu KakuasaMiu! PoviaMiu naoge bo mpuu-mpuu nipokumaaka. Komiumo Magau nu pura-pura manusia ri dunia! Pura-pura pokaingguMiu nakana bo nanoa.

⁴Pue, pura-pura manusia mekou nte Komiu. Pura-pura tona mombabila bo mombatoiya kaogeMiu, sabana aga Komiu mpuu-mpuu nagasa. Pue, pura-pura tona ri dunia makava mombasomba Komiu, sabana nisanira pura-pura pobotusiMiu nanoa.”

⁵Naupu haitu nikitaku tona nangungge Banua nu Alatala ri suruga, ante Tenda nTupu riarana.

⁶Bo lako riarana Banua nu Alatala haitu nesuvumo papitu malaeka nanggeni pitungaya pepandasa kaupuna. Pakeara nipovia lako ri kae naramputi nenggila, bo bambarara nibeve bulava.

⁷Neongapa malaeka haitu, saito lako nte ampa Anu Natuvu nombadekei ka ira pitu-ntonga tubu bulava naponu ante rau rara nu Alatala, Alatala anu natuvu sampe ri kasae-saena.

⁸Bo Banua nu Alatala ri suruga kaliu-liu naponu ante unu nu apu anu nesuvu lako ri kaoge bo kuasa nu Alatala. Ledo ria saitoa namala mesua riarana Banua haitu ane dopa naupu papitu pepandasa anu niken nu malaeka papitu haitu.

Pompakita 16

¹Naupu haitu niepeku suara namangga lako riaru Banua nu Alatala ri suruga nanguli ka papitu malaeka, “Koimo, busaka isi tubu-tubu naponu ante rau rara nu Alatala tutu ri dunia.”

²Nangepe haitu, haumo malaeka pamulana nombabusaka isi tubuna ri dunia. Bo sampesanika neumbamo bisu-bisu nadaa anu nadua mpuu ri karo ntona pura-pura anu naria mere binata nadaa haitu bo ri pura-pura tona anu nombasomba pinoitona.

³Naupu sia malaeka karanduana nombabusaka isi tubuna riaru ntasi. Bo tasi haitu najadi mpo raa mate sampe pura-pura anu natuvu riaru ntasi, namate.

⁴Naupu haitu malaeka katataluna nombabusaka isi tubuna ri pura-pura binangga bo mata-mata nu uve. Bo pura-pura uve haitu nabali najadi raa.

⁵Naliu haitu niepeku suara malaeka anu nombakuasai uve nanguli, “O, Pue Alatala, Komiu naria mamimo lako ri pamulana bo sii-sii bate-batena naria. Komiu toGasa, Nanao mpuu pobotusiMiu,

⁶Apa tona gahaitu nompatesi bo nompakatiti raa nu nabi-nabiMiu bo raa ntodeaMiu. Tapi sii-sii Komiu nombabalasi ira ante nompopainu raa ka ira. Masipato mamimo pehuku hitu ka ira!”

⁷Naupu sia, niepeku suara lako ri Lanta Pesomba nanguli, “O Pue Alatala, ivesia mamimo! Nakana bo nanao mpuu pehuku nipambelaMiu! Neliu mpuu KakuasaMiu.”

⁸Naliu haitu, malaeka kaampana nombabusaka isi tubuna ri mata nu eo. Bo mata nu eo haitu nidekeika kuasa mompalabu manusia ante kapanena mpo apu.

⁹Manusia gahaitu nipakaboa pane nu mata eo. Bo ira nombasalai Alatala sabana Iamo nomparenta pepandasa haitu rapambela ka ira. Tapi ira ledo ntoto nadota majea lako ri poviara nadaa, ira ledo nadota mombabila bo mombatoiya kaoge nu Alatala.

¹⁰Naupu haitu malaeka kaalimana nombabusaka isi tubuna ri ponturo binata nadaa. Sampesanika pura-pura ngata niparenta nu binata haitu najadi nalanda mpuu. Bo pura-pura todeana nanggiki dila sabana kandasara.

¹¹Ira nombasalai Alatala anu naria ri suruga sabana nadua mpuu nirasaira bo nadaa mpuu bisu-bisu ri karora. Tapi ira ledo najea lako ri pokainggura nadaa.

¹²Naupu haitu, malaeka kaaonona nombabusaka isi tubuna ri binangga mbaso nosanga Binangga Efrat. Bo kaliu-liu naotimo uve ri binangga haitu ala masadia dala raose nu magau-magau anu makava lako ri bagia pandakena.

¹³Bo nikitaku tatalu seta nolenje mpo tumpa. Ira sanggayu-sanggayu nesuvu lako ri nganga nu ule naga, lako ri nganga binata nadaa bo lako ri nganga nabi mpodava.

¹⁴Ira tatalu haitu nosa nu seta-seta anu novia tanda-tanda nipokumaaka. Ira hau mosinggavaka pura-pura magau ri njumangu dunia bo mompokio ira masiromu meeve ri eo mpepakaviora, haitumo tempo Alatala toNeliu KakuasaNa, mombadagi pura-pura baliNa ri dunia.

¹⁵Bo nangulimo i Yesus, “Pariaramo! Yaku makava ri tempo ledo nisani-saniamiu nasimbayu mpo topangangga. Mabelo mpuu tona batena mainga bo mombajagai pakeana ala tempo Yaku makava ledo maeya matana mpo tona novuloa nelaya ri ngayo ntodea.”

¹⁶Jadi seta-seta haitu nompasiro mu magau-magau ante tantara-tantarara lako ri umba-umba ri dunia, ri ponturo niuli riara basa Ibrani, “Harmagedon.”

¹⁷Naupu haitu malaeka kapapituna nombabusaka isi tubuna hau ri laerava. Bo niepeku suara namangga lako ri Gadera Kamagaua nu Alatala ri BanuaNa nanguli, “Naupumo!”

¹⁸Bo noreamo kila bo guru kede damo nosinjaleva poguna, bo najadimo lingu mbaso. Lako ri pamulaname manusia nipajadi nu Alatala ri dunia sampe tempo hitu, dopa ntoto naria karimbosona lingu ivehaitu. Naroo mpuu lingu mbaso haitu.

¹⁹Bo ngata mbaso nosanga ngata Babel nabingga tatalu bagia. Bo nagero sanggani pura-pura ngata mbaso ri njumangu dunia. Bo Alatala nombabalasi kadaa ntoponturo ri ngata mbaso Babel haitu. Ia nompopainu pakaupu uve anggur nu rauNa ka ira. Batuana, Ia mpuu-mpuu nompokarau ira bo ledo ntoto naria kaondo-ondoNa.

²⁰Tempo lingu haitu, pura-pura levuto riara ntasi nalipo sanggani bo bulu-buluna domo naria.

²¹Bo naria vatu-vatu esi nambaso mpuu nanavu lako ri langi nombarunju manusia. Kantamo nu vatu esi haitu nitasere nte limapulu kilo kantamona sangu. Nanggita haitu manusia nanjalai Alatala sabana nadaa mpuu pepandasa uda esi haitu.

Pompakita 17

¹Naupu haitu, saito lako ri papitu malaeka anu nantipale tubu-tubu pangane nakava nte yaku bo nanguli ka yaku, “Kaimo, kupopakita ka iko pehuku rapambela ka bajinga nakuasa, haitumo ngata mbaso nibangu napara binangga nadea.

²Magau-magau ri dunia nakava nosipogau nte mombine haitu. Bo mombine haitu nompopainu tona nonturo ri dunia ante uve anggur napai anu nepakalangu. Batuana, ia nompadidi ira nompasiala pokaingguna nadaa bo nabuga.”

³Naupu haitu yaku nikuasai Nosa Gasa nu Alatala bo niken nu malaeka haitu hau ri karava bai. Hamai nikitaku saito mombine nesavi binata nalei buluna. Ri njumangu karo nu binata haitu nitulisi tesa-tesa anu nompandaente Alatala. Binata haitu muni nobalengga papitu bo notandu sapulu.

⁴Mombine pangane nompake baju nalei nogalo nakamumu anu niparika ante ramba-ramba bulava, mutiara bo vatu-vatu sinji nagaya bo nasuli alina. Ri palena naria sangu boda bulava niisi panginu nadaa bo naruto anu nirapaka pokaingguna nabuga.

⁵Ri kirena nitulisi sanga ledo nisani ntona batuana, ivei: NGATA BABEL ANU NAKALUMANA TINA NU PURA-PURA BAJINGA PONTURO NTOPOVIA MPENGAYA-NGAYA POKAINGGU NARUTO

⁶Bo nikitaku mombine haitu nalangu sabana nanginu raa ntodea nu Alatala. Batuana, nadidi rarana nompatesi tona nomparasaya i Yesus bo nompatolele karebaNa. Nokumaa mpuu raraku nanggita mombine haitu.

⁷Bo nangulimo malaeka haitu ka yaku, “Nakuya iko nokumaa nanggita mombine haitu? Kupakalanto ka iko anu nirapaka mombine haitu bo binata nipesavina anu nobalengga papitu bo notandu sapulu.

⁸Da nokolu, binata nikitamu haitu da naria natuvu, tapi sii-sii domo naria. Tapi ia meumba mpanjili bara maipia lako riarra lovu anu ledo rapakule mantuvu kandalana. Maliau haitu ia rahuku sampe ri kasae-saena. Bo tona natuvu ri dunia anu ledo nitulisi sangara riarra Buku Katuvua dopame dunia nipajadi nu Alatala, ira mpuu-mpuu mokumaa manggita binata haitu. Sabana, da nokolu binata haitu natuvu, sii-sii domo naria, tapi meumba mpanjili bara maipia.

⁹Ri sii kita paraluu pekiri manoto. Pitu-angu balengga nu binata nadaa anu nipesavi nu mombine haitu nirapaka papitu bulu nipombabangu ngata. Bo papitu balengga haitu muni nirapaka papitu magau.

¹⁰Alima lako ri magau-magau haitu domo nomparenta. Saito da nomparenta bo magau kapapituna dopa nompamula nomparenta. Tapi ane ia makava, aga sampalai ia radekei momparenta.

¹¹Binata anu natuvu nokolu bo sii-sii domo naria, ia haitumo magau kauvaluna. Tapi ia muni saito lako ri magau papitu pangane. Kaupuna ia kana rahuku sampe ri kasae-saena.

¹²Sapulu-anguna tandu nikitamu haitu nirapaka sapulu magau anu dopa nompamula nomparenta. Ira radekeika kuasa moparenta mosanggani-nggani ante binata haitu sajaa kasaena.

¹³Ira mosangu pekiri mombatulungi binata nadaa haitu. Ira natundu nte binata haitu bo pura-pura karoso bo kuasa poparentara nipakera movia dota nu binata nadaa haitu.

¹⁴Bo ira mosieva ante Ana Bimba. Tapi Ana Bimba mombadagi ira sabana Iamo Tupu nu pura-pura tupu bo Magau nu pura-pura magau. Bo nosanggani-nggani ante Ana Bimba haitu maria muni topangoseaka-topangoseaka Ia anu nipokioNa bo nipelisiNa, anu natutu nangoseaka Ia.”

¹⁵Naupu haitu nanguli vai malaeka ka yaku, “Binangga nadea nikitamu pangane napara mombine bajinga, nirapaka tona ri njumangu dunia, todea-todea lako ri umba-umba ngata, bo topobasa mpengaya-ngaya basa ri dunia.

¹⁶Makava tempona binata nadaa bo sapulu magau nikitamu pangane mavuu matara nanggita mombine bajinga. Ira mombaago pura-pura nuapa naria nte ia bo ravuloasira. Bo rakandesira isi karo mombine haitu bo rapalabura karobatana riara apu sampe maupu.

¹⁷Haitu pura-pura kana majadi sabana Alatalamo nompakasangu pekiri nu magau sapulu movia nia nu Alatala mboto. Ia nompakasangu rarara mombadekei kuasara ka binata nadaa haitu ala binata haitu momparenta sampe madupa pura-pura anu nitesa nu Alatala.

¹⁸Bo mombine nikitamu haitu nirapaka ngata mbaso anu nomparenta magau-magau ri dunia.”

Pompakita 18

¹Naupu malaeka pangane notesa, nikitaku saito malaeka ntanina nanau lako ri suruga. Naoge mpuu kuasana, bo lako ri karemena njumangu dunia nareme.

²Nongaremo ia ante suara namangga, “Nageromo! Nageromo ngata mbaso Babel! Nompamula sii-sii ngata haitu majadi ponturo nu seta-seta, bo ponturo mpengaya-ngaya anu nadaa, bo ponturo mpengaya tonji naruto anu nipovuu mata nu manusia.

³Nageromo ngata Babel sabana tupu ngata Babel nompakeni tona lako ri njumangu dunia nanginu panginu napai anu nepakalangu. Batuana, nipakenira

tona mompasiala pokainggura nadaa bo nabuga. Pura-pura magau ri dunia nompasiala pokaingguna nabuga. Bo topopagoli-topopagoli ri dunia najadi nakalumana puramo sabana nompobalu mpengaya-ngaya mbara-mbara nasuli ka tupu ngata Babel anu ledo ria kabasa-basana.”

⁴Naupu haitu, niepeku suara ntanina lako ri suruga nanguli, “Umba komiu, topangoseaka Yaku. Pesuvumo komiu lako riaru ngata hitu! Nee ratuntunimiu dosa-dosa ntupu ngata hitu ala pehuku rapambela ka ira ledo mambela komiu!

⁵Sabana, nadea mpuumo dosara haitu, notumuvu sampe ri langi. Bo sii-sii kadaara nipeinta nu Alatalamo.

⁶Jadi povia munimo ka tupu ngata hitu nasimbayu mpo nipoviara ka tona ntanina. Balasimo ira ronggani kadeana lako ri pura-pura pokainggura nadaa. Isimo bodara ante panginu ronggani kapaina pade panginu nipakasadiara ka tona ntanina.

⁷Pakasadia ka ira pepandasa bo kasusa masipato nte pokainggura nompakalanga rara bo mompebasa-basa kasana karora mboto. Sabana, ira bate-batena notesa riaru ntaira ivei: ‘Yaku hii natuvu mpo madika. Yaku ledo timbala, bo yaku ledo ntoto mombarasai kasusa bo kapari.’

⁸Sabana haitu, riaru saeo ira rarumpa pepandasa-pepandasa evamo kamatea, kasusa rara, bo kamate ara. Ngatara haitu mapapu sanggani rakande nu apu, sabana nakuasa mpuu Tupu Alatala anu nombahuku tupu ngata haitu.”

⁹Magau-magau ri dunia, anu nompesana-sana ante tupu ngata Babel bo nangoseaka pokaingguna nabuga, tempo rakitara unu nu apu ri ngata napapu haitu, motumangi mpojea ira sabana kagero ngata haitu.

¹⁰Ira aga meangga meantoaka nggavao manggita unu nu apu haitu, apa naeka ira rapendai kasusa anu nombarumpa ngata mbaso haitu. Ira manguli, “Oranga! Oranga! Nandasa mpuumo tupu ngata mbaso moitu, ngata Babel anu naroso mpuu! Aga riaru sajaa nipambela pehuku nu Alatala komiu!”

¹¹Bo topopagoli-topopagoli ri dunia motumangi bo mabuku rarara mantoraka ngata Babel sabana domo maria tona mangali balu-balura.

¹²Domo maria topangali bulava, salaka, vatu-vatu sinji nasuli bo mutiara nipobalura. Domo muni maria topangali pakea nipovia lako ri kae nalusu, kae sutra, kae nalei bo nakamumu nasuli. Domo maria topangali mpengaya-ngaya pareva nipovia lako ri kayu navangi bo pareva-pareva nipovia lako ri ngisi gaja bara pareva-pareva nipovia lako ri kayu nasuli alina. Bo domo maria topangali pareva-pareva nipovia lako ri tambaga, ase, bo lako ri vatu pualam.

¹³Domo maria topangali kayu momi, rampa-rampa ntanina, bo lana vangi, mur bo dupa. Domo maria topangali uve anggur, lana zaitun, labu gando bo ose. Ivesia muni japi, bimba, jara, kareta bo tona rapobatua, domo raali ntupu ngata Babel.

¹⁴⁻¹⁵Topopagoli-topopagoli gahaitu manguli, “Pura-pura anu nipoino raramiu domo ntoto naria. Nalipo puramo kakalumanamiu bo anu nompakasana katuvumiu, domo rakavamiu mpanjili.” Topopagoli-topopagoli najadi nakalumana sabana nompobalu mbara-mbara nasuli ka tupu ngata Babel, aga meangga meantoaka nggavao manggita ngata haitu sabana maviora rarara mambela kasusa anu nombarumpa ngata haitu. Ira motumangi mpojea ante rara masusa.

¹⁶Ira mongare-ngare, “Oranga! Oranga! Nandasa mpuumo tupu ngata mbaso moitu! Tupu ngata Babel nabiasa nompake pakea nipovia lako ri kae nalusu, bo lako ri kae nakamumu bo nalei anu niparika ramba-ramba bulava, vatu-vatu sinji anu nasuli bo mutiara.

¹⁷Tapi aga riaru sajaa kakalumana nadea mpuu haitu naropu sanggani.” Bo pura-pura topompajala kapala, ante topokarajaa riarana, bo pura-pura topesavi kapala ante pura-pura tona anu nopaelo katuvura ri tasi, meangga mepentoaka nggavao manggita ngata haitu.

¹⁸Tempo rakitara unu nu apu molumura lako ri ngata mbaso nipalabu haitu, ira mongare-ngare, “Ledo ria ngata ntanina ri dunia nasimbayu mpo ngata mbaso moitu!”

¹⁹Ira mombakamburaka sovu ntana ri balenggara sabana kasusa rarara. Ira mantete motumangi bo manguli, “Oranga! Oranga! Nandasa mpuumo tupu

ngata mbaso moitu! Lako ri kakalumana ntupu ngata Babel haitu, pura-pura tona naria kapalana rarantasi najadi nakalumanamo. Tapi peintamo! Aga riaraja sajaa naropu sangganimo pura-pura kakalumanara haitu!”

²⁰Bo nanguli malaeka, “Umbamo komiu toponturo ri suruga! Pakadambamo raramiu! Pakadambamo raramiu todea nu Alatala mosangganinggani ante suro-suroNa bo nabi-nabiNa! Sabana, tupu ngata mbaso Babel nihuku nu Alatalamo! NibalasiNamo pokainggura nadaa nte komiu.”

²¹Naupu haitu nikitaku saito malaeka naroso mpuu nombaanggataka sangu vatu mbaso bo nitedakana hau rantasi. Bo niulina, “Ngata Babel ngata mbaso haitu rapakaropu sangganimo, domo maria, nasimbayu mpo vatu hitu nitedaka rantasi domo rakava mpanjili.

²²Domo raepe moni musi lako nte topomore kacapi, bara moni ntopodade ri ngata haitu. Domo raepe musi ntoposuli bara topotavusi tabue. Domo maria topande movia bara nuapa-nuapa ri ngata haitu, bo moni nu pogili domo raepe riarana.

²³Domo maria reme poindo rakita riarana, bo domo raepe suara boti langgai bo boti mombine madamba-damba. Topopagoli-topopagoli lako ri ngata haitu najadi tomaoge ri dunia. Bo ante pangisani nadaa, tupu ngata haitu nombabagiu pura-pura manusia ri dunia.”

²⁴Tupu ngata Babel kana rahuku sabana ri ngata haitumo raa nu nabi-nabi bo todea nu Alatala nipakatitira. Bo raa lako ri kamate ntona ntanina pura-pura anu nipatesi riaraja dunia hitu kana rapasau ka tupu ngata Babel haitu.

Pompakita 19

¹Naupu haitu yaku i Yohanes, nangepe moni mpo suara ntona dea novoo nongare-ngare ri suruga. Niulira, “Haleluya! Ratoiyamo Alatala! Sabana Iamo nompakasalama kita. Iamo Alatala anu naoge bo nakuasa!

²Ratoiyamo Ia sabana pombabotusiNa nakana bo nanao. NihukuNamo bajinga haitu, anu nompakadaa dunia apa nipakenina tona ntanina nosipogau ante ia.

Nipesava nu Alatalamo mombine haitu sabana pompatesina topangoseaka Alatala.”

³Bo nongare munimo tona dea haitu, “Haleluya! Ratoiyamo Alatala, sabana unu nu apu nompalabu ngata haitu molumura sampe ri kasae-saena, ledo ria kaupu-upuna!”

⁴Bo ropulu bo ampa totua bo ampa Anu Natuvu haitu nantaputu nombasomba Alatala anu nonturo ri Gadera KamagauaNa. Niulira, “Amin! Ratoiyamo Alatala!”

⁵Naupu haitu naria suara lako ri Gadera Kamagaua haitu nanguli, “Umba komiu pura-pura topangoseaka Alatala! Toiyamo Tuputa Alatala! Toiyamo Ia, komiu anu natundu nte Ia, nau tona biasa nau tona naoge katuvuna!”

⁶Naupu haitu niepeku mpo suara ntona dea novoo mpo soo nu uve oge bo mpo moni guru kede. Nongaremo ira, “Toiyamo Alatala! Sabana, Tuputa Alatala nomparenta pura-pura anu naria! Neliu mpuu KakuasaNa!

⁷Kamaimo kita modade ante damba rara. Kamaimo kita mantoiya kaogeNa. Sabana, nakavamo eo ponika Ana Bimba. Boti mombine nasadiamo ranika.

⁸Ia nidekeika pakea mputi nalusu nenggila rapakena.” (Pakea nalusu nidekei ka mombine haitu nirapaka pokainggu-pokainggu nanao anu nipovia ntodea nu Alatala.)

⁹Naupu sia, nangulimo malaeka haitu ka yaku, “Tulisimo hitu: Nabelo mpuumo tona nigaga hau ri posusa ponika Ana Bimba.” Bo niulina munimo, “Tesa-tesa hitu lako nte Alatala bo nakana mpuu!”

¹⁰Nangepe tesa haitupa, nantaputumo yaku sampe ri tana ri ngayo malaeka haitu nombasomba ia. Tapi nangulimo ia ka yaku, “Nemo! Nee rasomba yaku. Sombamo Alatala! Sabana yaku hii aga batua nu Alatala nasimbayu mpo iko bo nasimbayu mpo sampesuvumu sampomparasaya anu naroo nanggangisi pepatuduki nakana nipopaisani i Yesus. Apa pepatuduki nakana nipopaisani i Yesus, haitumo poko nu tesa ntona anu nompasimbayu tesa lako nte Alatala.”

¹¹Naupu haitu nikitaku suruga natebuka. Riara suruga nikitaku sangu jara bula. Topesavi jara haitu nosanga “Tona Natutu bo Nanao.” Ia Topotangara bo Topeevea nanao.

¹²MataNa narega mpo vaya nu apu bo ri balenggaNa nadea songgo magau. Ri karoNa naria sanga nitulisi, tapi aga Ia mboto nangisani sanga haitu.

¹³Baju ndoe nipasuaNa nilome ri raa. Bo Ia nidae “Tesa nu Alatala.”

¹⁴Tantara-tantara nu suruga anu nombatuntuni Ia nesavi jara bula pura. Pakeara nipovia lako ri kae mputi nalusu bo nagasa.

¹⁵Bo lako ri ngangaNa nesuvu samata guma natada. Ante guma haitu Ia mombadagi tona pura-pura riara dunia anu nangeva Ia, bo Ia momparenta ira ante ase poboba. Ia mombajeje-jeje pakaoya vua anggur ri pompea anggur nu Alatala anu Neliu KakuasaNa. Batuana, Ia mompopakita rau rara nu Alatala ka tona nadaa.

¹⁶Ri bajuNa bo ri timpuNa nitulisi sangaNa ivei: MAGAU NU PURA-PURA MAGAU, TUPU NU PURA-PURA TUPU.

¹⁷Naupu haitu, nikitaku saito malaeka neangga ri mata nu eo. Nongaremo ia ante suara namangga nompokio pura-pura tonji nevoru ri laerava, “Kamaimo komiu pura-pura, mangande ri posusa mbaso nipakasadia nu Alatala!

¹⁸Kamaimo mangande isi ntomate, haitumo magau-magau bo tadulako-tadulako, bo isi tantara-tantara nabia. Kamaimo komiu mangande isi ntopesavi jara bo isi jarara, bo isi manusia pura-pura, haitumo batua, madika, tona naoge katuvuna, bo tona biasa.”

¹⁹Naupu haitu nikitaku binata nadaa pangane bo magau-magau ri dunia ante tantarana nasiromu ala mosieva ante Topesavi jara bula bo tantaraNa.

²⁰Tapi binata nadaa nisaka sanggani ante nabi mpodava bo ira randua nitedaka nggatuvu riara ntasi apu anu navaya ante vatu-vatu colonggata navaya. Nabi mpodava haitumo novia tanda-tanda nipokumaaka ante kuasa nidekei nu binata nadaa ka ia. Ante tanda-tanda nipokumaaka, ia nombabagiu tona nimere ante tanda nu binata nadaa bo tona nombasomba pinoitona.

²¹Jadi naupu sia, Topesavi jara bula nompatesi pura-pura tantara nu binata nadaa, nitimbeNa ira ante guma nesuvu lako ri ngangaNa. Bo nakava mpuumo tonji-tonji nangande isi karobata ntomate haitu sampe nabasa.

Pompakita 20

¹Naupu haitu, nikitaku saito malaeka nanau lako ri suruga. Ri palena naria gunji vamba nu lovu anu ledo rapakule mantuvu kandalana. Bo nitipalena muni sangu rante nambaso.

²Nisakana ule naga haitu anu niuli Ule Ntua, atau Topangadu atau Magau nu Seta. Bo ule haitu sanjobu mpaemo kasaena nirantena.

³Nitedakana ule haitu riara lovu anu ledo rapakule mantuvu kandalana haitu. Naupu haitu nigunjina bo nimerena vamba lovu haitu ala ule naga ledo mamala mesuvu mombabagiu manusia sampe magana tempona sanjobu mpaekasaena. Maliau haitu ia kana rakabasaka mpanjili sampalai.

⁴Naupu haitu nikitaku bara sako-angu gadera kamagaua. Bo tona nonturo ri gadera haitu nidekeika kuasa mombatangara. Bo nikitaku muni nyawa-nyawa ntona namate nitampa balenggara sabana ira batena nompatolele pepatuduki nakana anu nipopaisani i Yesus, bo batena nompatolele Tesa nu Alatala. Ira ledo muni nombasomba binata nadaa bo pinoitona, bo ira ledo muni nantarima mere binata haitu ri kirera bara ri palera. Ira gahaitu natuvu mpanjili bo nomparenta mpo magau nosanggani-nggani ante i Kristus sanjobu mpaekasaena.

⁵Haitumo niuli pembangu ntomate pamulana. Tomate ntanina dopa matuvu mpanjili ane dopa maupu sanjobu mpaekaitu.

⁶Nabelo mpuu tona rapakatuvu mpanjili tempo pembangu ntomate pamulana, apa iramo todea nu Alatala. Ira ledo mambela pehuku niuli kamatea karongganina. Tapi ira majadi topanggeni pesomba ka Alatala bo ka i Kristus. Bo ira momparenta mpo magau mosanggani-nggani ante i Kristus sanjobu mpaekasaena.

⁷Ane maupumo sanjobu mpae, Magau nu Seta rakabasaka lako riarantaranguna [ri lovu ndala haitu],

⁸bo ia hau mombabagiu tona ri njumangu dunia, haitumo ngata-ngata bo todea-todea niuli Gog bo Magog. Magau nu Seta haitu mompasiromu tona gahaitu mangeva Alatala bo topomparasaya. Kadea ntona rapasiromu mpo bone ri bivi ntalinti, ledo rapakule mombabilana.

⁹Ira mompesayoki dunia bo makava lako ri umba-umba dunia mombatiku ngata nipotove nu Alatala, haitumo ponturo ntodea nu Alatala. Tapi apu manau lako ri langi mompalabu ira pura-pura sampe maupu.

¹⁰Maupu haitu Magau nu Seta anu nombabagiu ira ratedaka riarantasi apu navaya ante vatu-vatu colonggata narega. Haitumo ponturo nipotedaka binata nadaa bo nabi mpodava nokolu. Hamai, eo bongi ira rapandasa sampe ri kasae-saena.

¹¹Naupu haitu nikitaku sangu Gadera Kamagaua nabula bo nambaso. Bo nikitaku muni Toponturo ri Gadera haitu. Nariapa ia ri sia, nalipo singganimo dunia, bo domo naria nikita.

¹²⁻¹³Bo nikitaku tona namate neangga ri ngayo Gadera haitu, haitumo, tomaoge bo tona biasa, tona namate nalodo rantasi, tona ntanina anu namate janjina, pura-pura tona lako ri ponturo ntomate. Ira pura-pura neangga ri ngayo Gadera Kamagaua nu Alatala haitu. Bo buku-buku nitimpamo bo niparesa. Riarabuku-buku haitu nitulisi pura-pura pokainggu ntona namate. Jadi pehuku ka ira nipakatantu nangoseaka pokainggu-pokainggura nitulisi riarabuku-buku. Bo naria buku ntanina nitimpa muni anu niuli Buku Katuvua.

¹⁴⁻¹⁵Isema-sema ledo nitulisi sangana riarabuku Katuvua haitu, nitedaka riarantasi apu. Haitumo niuli kamatea karongganina, pehuku riarantasi apu. Naupu haitu domo ria kamatea bo domo ria ponturo ntomate, apa kamatea bo ponturo ntomate nitedaka riarantasi apu.

Pompakita 21

¹Naupu haitu nikitaku dunia nabaru. Langi pamulana bo tana pamulana naliumo, bo domo ria tasi.

²Bo nikitaku muni ngata nu Alatala, ngata Yerusalem nabaru nanau lako nte Alatala ri suruga. Nagaya mpuu ngata haitu mpo boti mombine nopakea nagaya nasadia raala boti langgai.

³Bo niepeku suara namangga lako ri Gadera Kamagaua nu Alatala haitu nanguli, “Pariaramo! Sii-sii ponturo nu Alatala nosanggani-nggani ante manusia. Ia monturo ri tatangara bo ira majadi todeaNa. Bo Ia mboto mosanggani-nggani ante ira bo majadi Alatala rasombara.

⁴Ia mbotomo mombapaisi pura-pura uve mata lako ri matara. Domo maria tona mamate, domo maria tona masusa rarara bara motumangi, bo domo maria tona madua. Sabana, dunia nokolu domo naria.”

⁵Naupu haitu nangulimo Toponturo ri Gadera Kamagaua, “Pariaramo! Sii-sii Yaku nompakabaru pura-pura anu naria.” Bo niuliNa munimo ka yaku, “Tulisimo anu Kutesa, sabana tesa hitu mpuu-mpuu nakana bo namala raparasaya.”

⁶Bo niuliNa ka yaku, “Naupu puramo! Yakumo hii Pamulana bo Kaupuna. Yaku nompamula bo Yaku muni nompakaupu. Isema-sema nabai tambolona Kudekeika uve lako ri mata nu uve anu nombadekei katuvua nabelo sampe ri kasae-saena. Uve haitu Kudekei bayangi, ledo paraluu rabayari.

⁷Isema-sema padagi, rakavana pura-pura anu niuliKu pangane. Bo Yakumo majadi Alatalara bo ira majadi anaKu.

⁸Aga tona naeka mangoseaka Yaku, atau ledo niparasayana Yaku, bo tona nadaa pokaingguna, topepatesi, tona nokainggu nabuga, topedoti, tona nombasomba tupu-tupu ntanina, bo pura-pura topodava, ira pura-pura kana rahuku riara ntasi apu anu navaya ante vatu-vatu colonggata. Haitumo niuli kamatea karongganina.”

⁹Naupu haitu nakavamo saito malaeka lako nte ira papitu anu nantipale tubu-tubu niisi ante pitu-ngaya pepandasa kaupuna. Nangulimo ia ka yaku, “Kamaimo, kupopakita ka iko boti mombine anu rapoberei nu Ana Bimba.”

¹⁰Bo yaku nikuasai Nosa Gasa nu Alatala bo niken ni nu malaeka hau ri bavo bulu anu nambaso bo nalanga. Lako ri bavo bulu haitu nituduakana ka yaku ngata nu Alatala anu nosanga ngata Yerusalem nanau lako nte Alatala ri suruga.

¹¹Ngata haitu nareme mpuu ante kareme nu Alatala mboto. Karemena damo nenggila mpo mata sinji nasuli alina, mpo vatu yaspis anu nevayo mpo kaca.

¹²Ngata haitu ntiku-ntiku nitembo nakumba bo nalanga. Tembo haitu sapulu randua bobaana bo sapulu randua malaeka. Pura-pura bobaa simbo naria malaeka nombajagina. Ri bobaa haitu naria nitulisi sanga-sanga nu ana i Israel nggaulu anu najadi sapulu randua valaa ntoYahudi.

¹³Tembo kumba haitu pata-njulapa bo sanjulapa-sanjulapa tatalu bobaana: tatalu ri mpandakena, tatalu ri mpanauna, tatalu ri tasina, bo tatalu ri puluna.

¹⁴Tembo ngata haitu nipopeangga ri bavo sapulu rolonta vatu pandasi bo ri vatu pandasi haitu naria nitulisi sanga sapulu randua suro nu Ana Bimba.

¹⁵Malaeka anu notesa ante yaku haitu nantipale sambesa toko poreke nipovia lako ri bulava raporeke kambaso ngata haitu ante tembo bo bobaana.

¹⁶Ngata haitu pata-njulapa. Kandatena nasimbayu nte kaluona. Malaeka haitu nombareke ngata haitu ante toko porekena. Kandatena ronjobu pata-atu kilo. Kaluona bo kalangana nasimbayu ante kandatena.

¹⁷Nirekena munimo tembo ngata haitu. Kalangana onopulu metere. Poreke nipake malaeka nasimbayu mpo poreke nipake manusia.

¹⁸Tembo ngata haitu nipovia lako ri vatu-vatu yaspis, anu nenggila nalei bo nagavu. Ngata haitu nipovia lako ri bulava anu ledo ria galona, sampe damo nenggila mpo kaca nevayo.

¹⁹Vatu-vatu pandasi ngata haitu nivera ante sapulu rongaya vatu nasuli alina, salonta sangaya muni vatuna. Lonta pamulana nivera ante vatu yaspis navoe bo nevayo mpo kaca. Lonta karanduana nivera ante vatu nilam anu nagavu mpo uve ntasi nandala. Lonta katataluna nivera ante vatu mirah naputi bo nevayo. Lonta kaampuna nivera ante vatu zamrud nosura mpo pae.

²⁰Lonta kaalimana nivera ante vatu unam anu nisai nabula bo nalei. Lonta kaonona nivera ante vatu sardis anu nalei tua. Lonta kapapituna nivera ante vatu ratna cempaka anu narangguni mpo bulava. Lonta kauvaluna nivera ante vatu beril anu nosura nakuni-kuni. Lonta kasasiona nivera ante vatu krisolit anu nakuni mpuu. Lonta kasapuluna nivera ante vatu krisopras anu nosura mpo palapa loka. Lonta kasapulu sanguna nivera ante vatu lazuardi anu nagavu mpo langi. Bo lonta kasapulu randuana nivera ante vatu kecubung anu nakamumu bo nevayo.

²¹Bo sapulu randua bobaa haitu nipovia lako ri sapulu randua mutiara, sangu bobaa sangu mutiarana. Bo dala riarra ngata haitu nipovia lako ri bulava anu ledo ria galona, damo nenggila mpo kaca nevayo.

²²Ledo ria banua petupu nikitaku riarra ngata haitu sabana Alatala toNeliu KakuasaNa, bo Ana Bimba mboto najadi Banua Petupu ri ngata haitu.

²³Bo ngata haitu ledo paraluu reme nu eo bara reme nu bula, sabana reme lako nte Alatala nompakaremena, bo Ana Bimba najadi poindona.

²⁴Pura-pura manusia ri dunia matuvu riarra karemena. Bo magau-magau ri dunia manggeni kakalumanara hau riarra ngata haitu.

²⁵Bobaa-bobaa ngata haitu bate-batena natebuka, ledo ntoto nateupi-upi sabana ri ngata haitu ledo ria bongina.

²⁶Pura-pura manusia makava mombasomba bo manggeni kakalumanara mesua riarra ngata haitu.

²⁷Tapi anu naruto bo tona novia nadaa bo topodava ledo ntoto mamala mesua riarra ngata haitu. Tona mamala mesua hamai aga tona nitulisi sangana riarra Buku Katuvua nu Ana Bimba.

Pompakita 22

¹Bo malaeka haitu nompopakita ka yaku, Yohanes, sangu binangga, uvena damo nenggila mpo kaca nevayo. Bo uvena nombadekei katuvua nabelo. Binangga haitu nemata lako ri Gadera Kamagaua nu Alatala bo Ana Bimba,

²bo noili ri tatanga dala ngata haitu. Ri tinggi binangga ntimali-mali naria kayu-kayu niuli “Kayu Katuvua”. Kayu haitu novua sapulu ronggani sampae, sambula sanggani novua. Bo tava kayu haitu nipopakuli mompakabelo tona ri njumangu dunia.

³Riara ngata haitu domo naria nuapa-nuapa nipindasi nu Alatala. Gadera Kamagaua nu Alatala bo Ana Bimba naria riara ngata haitu. Bo pura-pura topangoseaka Ia metupu ri ngayoNa.

⁴Bo ira manggita lenjeNa mpuu. Bo sangaNa ratulisi ri kirera pura-pura.

⁵Domo maria bongina. Tupu ngata haitu domo paraluu poindo bara reme nu eo mombavanta ira, sabana reme lako nte Alatala mbotomo mombavanta ira. Bo ira momparenta mpo magau sampe ri kasae-saena.

⁶Naupu haitu, nangulimo malaeka pangane ka yaku, “Pura-pura tesa pangane mpuu-mpuu nakana bo namala raparasaya. Alatala nombadekei Nosa Gasana ka pura-pura nabiNa, haitumo, todeana anu nompasimbayu tesa lako nte Ia. Iamo nombatudu malaekana tumai mombatuduaka ka topangoseaka Ia anu domo masae majadi.”

⁷Bo nangulimo i Yesus, “Pariaramo! Domo masae makavamo Yaku. Nabelo mpuumo tona nompariara anu niboto ri buku hitu!”

⁸Yaku i Yohanes nanggita bo nangepe pura-pura kajadia pangane. Naupu yaku nangepe bo nanggita haitu pura-pura, nantaputumo yaku sampe ri tana mombasomba malaeka anu nombatuduaka pura-pura kajadia haitu ka yaku.

⁹Tapi malaeka haitu nombatagi yaku, “Nemo! Nee rasomba yaku! Sombamo Alatala! Apa yaku hii aga batua nu Alatala nasimbayu mpo iko bo roa-roamu nabi bo tona natutu nangoseaka tesa-tesa nitulisi riara buku hitu.”

¹⁰Bo niulina munimo ka yaku, “Nemo mutabuniaka tesa niboto riara buku hitu, apa domo masae majadi mpuumo.

¹¹Isema-sema nadaa pokaingguna, palambamo ia batena movia nadaa. Isema-sema naruto pokaingguna, palambamo ia batena movia anu naruto. Isema-sema nanao, palambamo ia masaro movia anu nanao. Isema-sema nagasa rarana, palambamo ia batena movia anu nagasa.”

¹²Bo nanguli munimo i Yesus, “Pariaramo! Domo masae makavamo Yaku manggeni tambo bo Kubalasi pura-pura tona nangoseaka pokainggura.

¹³Yakumo hii Pamulana bo Kaupuna. Yakumo Pompamulana bo Panggaupuna. Yakumo nompamula bo Yakumo nompakaupu.”

¹⁴Nabelo mpuumo tona notoposi pakeana sampe nagasa, apa iramo rapaloga mangande vua lako ri Kayu Katuvua. Iramo rapaloga mesua riara ngata haitu mangose bobaa.

¹⁵Tapi tona nadaa, topedoti, tona nogau sala ante tona ledo bereina mboto, topepatesi, tona netupu nte tupu ntanina, topodava bo pura-pura tona nompokono dava, ponturora pura-pura aga ri savaliku ngata haitu.

¹⁶“Yaku i Yesus, nombatudu malaekaKu hau mompopaisani petevaiKu hitu ka komiu todea topangoseaka Yaku. Yakumo hii muli bo valaa Magau Daud. Yakumo hii betue pompaeo anu nareme.”

¹⁷Nosa Gasa bo boti mombine anu nasadia rapoberei nu Ana Bimba haitu nanguli, “Kamaimo!” Bo pura-pura tona nangepe tesa hitu kana manguli, “Kamaimo!” Isema-sema nabai tambolona, kamaimo! Isema-sema madota, kamaimo manginu uve anu nombadekei katuvua. Uve haitu nidekei bayangi, ledo paraluu raali.

¹⁸Yaku i Yohanes, nompopainga ka pura-pura topangepe tesa pombaboto nitulisi riara buku hitu ivei: Isema-sema mantambai isi tesa ri buku hitu, Alatala mantambai ka ia pepandasa-pepandasa nitesaki riara buku hitu.

¹⁹Bo isema-sema mompakalipo isi tesa pombaboto ri buku hitu, Alatala mangala bagiana, haitumo, ia ledo radekei mangande vua lako ri Kayu Katuvua bo ledo radekei mesua riara ngata nu Alatala mpo niuli riara buku hitu.

²⁰Bo i Yesus anu nompasimbayu pura-pura tesa hitu nanguli, “Nakana! Domo masae makavamo Yaku!” Amin! Maranata! Kakavamo, Pue Yesus!

²¹Kuperapi i Pue Yesus mombadekei belo ka pura-pura todea nu Alatala. Amin.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2022, Vitória/ES -Brasil